


Diidz ne rdeed
guielmban



New Testament in Zapotec, Mixtepec (MX:zpm:Zapotec,
Mixtepec)

Diidz ne rdeed guielmban

New Testament in Zapotec, Mixtepec (MX:zpm:Zapotec, Mixtepec)

copyright © 1998 Wycliffe Bible Translators, Inc.

Language: Mixtepec Zapotec (Zapotec, Mixtepec)

Translation by: Wycliffe Bible Translators, Inc.

Zapoteco, Mixtepec [zpm], Mexico

Copyright Information

© 1998, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Zapotec, Mixtepec

© 1998, Wycliffe Bible Translators, Inc.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2018-11-16

PDF generated using Haiola and XeLaTeX on 22 Feb 2024 from source files dated 29 Jan 2022

5317ca58-7555-5e4c-a420-e1e9210e2df2

Contents

MATEO	1
MARCOS	37
LUCAS	60
JUAN	98
HECHOS	126
ROMANOS	160
1 CORINTIOS	175
2 CORINTIOS	191
GALATAS	201
EFESIOS	207
FILIPENSES	213
COLOSENSES	217
1 TESALONICENSES	221
2 TESALONICENSES	224
1 TIMOTEO	226
2 TIMOTEO	231
TITO	235
FILEMON	238
HEBREOS	239
SANTIAGO	250
1 PEDRO	254
2 PEDRO	259
1 JUAN	262
2 JUAN	266
3 JUAN	267
JUDAS	268
APOCALIPSIS	270

XTIIDZ NDZON DIOS MIÑE PQUIAA MATEW

¹ Jesús men ne pxeel Dios ga, lo xtií Abraham, lo xtií David, ga brieequia me. Lëë grë xmengoldoo me nu:

² Abraham goc pxoz Isaac, Isaac goc pxoz Jacob,

Jacob goc pxoz Judá (bio zla xpëed Jacob),

³ Judá goc pxoz Far ni Zar (Tamar brieeleë tsiel Judá),

Far goc pxoz Srom,

Srom goc pxoz Aram.

⁴ Aram goc pxoz Minadab,

Minadab goc pxoz Naasón,

Naasón goc pxoz Salmon.

⁵ Salmóngoc pxoz Booz (Rahab brieeleë tsiel Salmon),

Booz goc pxoz Obed (Rut brieeleë tsiel Booz),

Obed goc pxoz Isái.

⁶ Isái goc pxoz rey David,

David goc pxoz Salomón (lëë Salomón ga gop tsiel Urí wnaa ne bionie David).

⁷ Salomón goc pxoz Roboam,

Roboam goc pxoz Abí,

Abí goc pxoz Asá,

⁸ Asá goc pxoz Josafat,

Josafat goc pxoz Joram,

Joram goc pxoz Uzí.

⁹ Uzí goc pxoz Jotam,

Jotam goc pxoz Acaz,

Acaz goc pxoz Ezequí.

¹⁰ Ezequí goc pxoz Manasés,

Manasés goc pxoz Amón,

Amón goc pxoz Josí,

¹¹ Josí goc pxoz Jeconí (bio zla xpëed Josí).

Leñ dze ne nac Jeconí mëed, leñ dze co güeybee zho zha Babiloin grë zha Israel, beynie zho zha Babiloin.

¹² Babiloin, ga gol tib xpëed Jeconí brieeleë Salatiel,

Salatiel goc pxoz Zorobabel.

¹³ Zorobabel goc pxoz Abiud,

Abiud goc pxoz Liaquim,

Liaquim goc pxoz Azor.

¹⁴ Azor goc pxoz Sadoc,

Sadoc goc pxoz Aquim,

Aquim goc pxoz Liud.

¹⁵ Liud goc pxoz Leazar,

Leazar goc pxoz Matán,

Matán goc pxoz Jacob.

¹⁶ Jacob co nagon goc pxoz José, men ne ptsieelnia Marí.

Marí goc xníaa Jesús, Men ne nacle diidz ga cxeel Dios guíaad lo guidzliu.

¹⁷ Zig choopchop bdziñ lo dii co, dzigoraa brieequia Jesús. Tsiida zho wban desde

Abraham haxta David; stsiida zho wban desde Salomón haxta leñ dze ne bey zho Babiloin; stsiida zho wban desde leñ dze co haxta bdziñ dze ne goc me mëed.

Gol Jesús

(Lc. 2:1-7)

¹⁸ Znu bzhaac Marí grop José leñ dze ne ziaadyob gal Jesús. Gard ctsieelnia Marí loxaque xtiidz me no ne laa me ycaa José, zeene bnabey Espíritu Sant pquialo tib mëed zdo me. ¹⁹ Zeene bien Joséw, mine been me gocladz me mazd nsaan me Marí; sac sca rnabey ley ni zienalpa me mine rnabey ley; per laa me gocladz zhlianse nzoit me, sacne racladz me nríee xquielto Marí. ²⁰ Zhgab co no me, tibaque blulo tib xanjí Dios lo me lo mcaal.

—José (xiag David) —rëb anjl co—, peet tsienied guic luu, pcaania Marí gac me tsiel luu; sac gon mëdeyen ne zoney me ga, Espíritu Sant bnabey pquialo win zdo me.

²¹ Zeene gal dze ne laa win gal, JESUS cueelë luu win, sca grieeleë win sac win csílaa grë menladz win lo dol.

²² Ga brieequia mine bnee Dios padzeela, zeene bzeet zha ne biadnee xtiidz mew, rëb zho:

²³ Bii zan to ganle zeene laa tib mëedbgui yquiaalo zdo tib wnaayeen ne gard gnee mguí lo.

Zeene laa win gal, Emanuel grieeleë win.

(Emanuel nac zig nacne rnee ne: Dioszhal ziaad lo ne.)

²⁴ Zeene bna José laa guic me goc tibli; bin me xtiidz anjl co laa me ptsieelnia Marí.

²⁵ Laa me wban tipe grop me per ib bgaald me Marí, haxta bded dze ne laa mëdeyen co gol. Bdziñ dzew, laa win gol, dzigo bleelë José win JESUS.

2

Güeygan bla zha rac Jesús

¹ Tib guiedz win ne ndxie xtan Judé lë Belén, ga gol Jesús. Lëetse leñ dze co zob men ne lë Herod nac me rey ne rnabey dan co.

Goc palal dzew, laa bla zha ne runbey lo mel ziaad nëz ne rlan ngbidz bdziñ Jerusalén, ² bnabdiidz zho rëb zho:

—¿Pa lo dien no mëed ne gac men ne gnabey ladz to nu, mëed ne griñ gol ga? Bdziñ no tib mel nëz ne no no, mel co blu lo no laa win gol-le, miñ co ne ziaad no nu ziaaddziñ no win.

³⁻⁴ Grë menguedz Jerusalén, zeene bin zhow bzee zdo zho. Laa Herod, riendraa me zha guñ me, bnabey me pcaalsa grë zha ne nac pxoz non, grë zha ne rseed miech ley, bnabdiidz me lo zho dien pa lo nac diidz gal Men ne nole diidz cxeel Dios guíaad lo guidzliu ga. ⁵ Dzig rëbchaa zho lo me:

—Belén, guiedz ne ngab Judé ga none gal men co, sac scale zhobnee lo guits ne pquiaa zha ne pxeel Dios padzeela biadteed xtiidz me, zeene psiaab me guic zho znu bnee zho: ⁶Teĭ Belén,

niice ne winraaw lo grè guiedz ne ngab Judé, per nroob nona; sac gon ga grieequia tib men ne gnabey, men ne so yquiaanap grè men Israel, ne nac zho zha ne ngab lo naa.

⁷Nacne zhliaanse bnabey Herod gocredz gza zha rac co, bnabdiidz me lo zho dien blapaa dze rac psilo gon zho blan mel co.

⁸Blozhse ga, dzigo pxeel me zho Belén, rëb me lo zho:

—Ga goĭtsie goĭtsieguib mëed co. Zigne gdziel to win, goĭtëniegagh diidz lo naa nu, zeena ye naa ga gagan naa win.

⁹Blozhse sca pso me diidz lo zho, laa zho bio nëz stib laa zho zie. Laa mel ne gon zho brieequia nëz ne ziaad zho ga, laa ma neraque lo zho; haxta bdziñ ma ngali guic yu ne no mëdyeen co, gataa laa ma blëz.

¹⁰⁻¹¹Zeene gon zho laa mel co blëz ga, per nli rley zho. Bzëeb zho len yu co, gon zho laa mëdyeen co no ga grop xniaa win, dzigo pquiiitgzhib zho lo win, bnee zho tib xtiidz zho lo win. Blozh ga blee zho ncuaañe zienie zho lo win, blee zho or, blee zho tiblo yaalnex, ni tiblo nceit nex rnee zho mirr, bgad zho lo win.

¹²Zeene laa gza zha rac co wbi Belén, laa ne nieted zho Jerusalén, stible nëz bzhen zho zey zho; sac bnee Dios lo zho lo mcaal, rëb me tsienied zho diidz lo Herod.

¹³Laa gza zha rac co zey, zeene güeylulo tib xanjĭ Dios lo José lëetse nixguies me, rëb anjĭ co lo me:

—José, na zeena guche i pcaanie mëdyeen qui nëz grop xniaa win, goĭsë nëz Egipt, sac laa Herod yquiaguib win gut me win. Egipt, ga cuëznie to win, na naaque guialnie diidz lo to zeene laa to gbi ga.

¹⁴Guieel cogazh guche José, pcaanie me mëdyeen co nëz grop xniaa win, laa zho ziese nëz Egipt; ¹⁵ga blëz me haxta bdziñ dze ne laa Herod gut. Ga brieequia miñe bnee zha ne biadteed xtiidz Dios padzeela, zeene znu bnee zho: “Nëz Egipt no xpëed naa, zeene bredz naa me.”

Bnabey Herod gut grè mëedlas

¹⁶Laa zeene gon Herod wbiendraa gza men rac co nienie zho diidz lo me, per nli blëe me. Ntseeb rac me, pxeel me zha ne güey Belén ni grëaa guiedz ne ndxie gax ga, güeygut zho grëse mëedbguie yeen ne no grè guiedz co, desde win ne golvëz, haxta win ne rap chop iz. Tibaque nan me sca ngaa mëdyeen ne nac Jesús ga niet win, sac blee me cuent zhile gac chop iz psilo gon gza zha rac co blan mel co. ¹⁷Guieñëdcox ne bio grè

miech co, ga brieequia miñe bzeet Jeremí men ne biadteed xtiidz Dios padzeela, zeene znu rëb me:

¹⁸Tib redz nroob ne zëeb len guiedz Ramá. Grë wnaa Judá, zha ne ziaad lo xtií Raquel, mbanse rac zho, roon zho no zho xquieñë xpëed zho;

zha rna zha ne cchoobladz zdoo zho, sac laa xpëed zho gut.

¹⁹Goc palal dzew laa Herod gut, dzigo pxeel Dios tib xanjĭ me güeynee lo José lo mcaal zaatne no José nëz Egipt, rëb me lo José:

²⁰—José, guche i, pcaanie mëdyeen qui nëz grop xniaa win, goĭbire nëz Israel stib; laa zha ne quianaĭ win ga gutle.

²¹Dzigo brieenie José mëdyeen co ga grop xniaa win, bio me nëz laa me wbiere zeynie win nëz Israel. ²²Per zeene bin José lëèque tib xpëed Herod men ne lë Arquela, men co biaan xĭugar Herod zobnabey xtan Judé, bdzieb José ndziñnie me mëdyeen co nëz co. Dzigo bneequa Dios lo me lo mcaal tsie me nëz Galilé.

²³Goĭ zho Galilé, bdziñaque zho guiedz Nazaret, ga wbannie zho mëdyeen co. Ga brieequia miñe bzeet grè zha ne biadteed xtiidz Dios padzeela, zeene rëb zho: men Nazaret guiab miech nac Jesús.

3

Psilo Juan Bautist noseed me miech (Mr. 1:1-8; Lc. 3:1-9, 15-17; Jn. 1:19-28)

¹Len dze ne psilo Juan Bautist noseed Juan miech xtan zha Judé, dan zit ne no me ga; ²rnee me lo zho:

—ĭGoĭsaan xquieñntseeb to, goĭnab lo Dios gun me to perdon grëtaa dol ne ziyun to; sac gon laa dze bdziñle laa me csilo gnabey!

³Lëe Juan Bautist ga bzeet profet Isá, zeene znu pquiaa me:

Bii zon miech ganle zeene laa tib tsi men zëeb tib dan zit, rnee me:

“Goĭzhixcuua nëz ne ted men ne rnabey, goĭsaan grè guieñntseeb ne ruñ to.”

⁴Niapse guits lad camell niaa xab Juan, guid nac ncuaañe ndxie len me, ni niapse nguzhanch ni dzin dan row me.

⁵Nzian grè menguiedz Jerusalén, grè men Judé, grè men ne no gax ro guiubee Jordán, rree zho rieuquaaadiag zho zhiwseed me. ⁶Grè zha ne rxobdol grëse xtoĭ zho, dzigo rchoobnis me zho ro guiubee co.

⁷Laa zeene ran me grè zha farisé, zha saducé ne rdziñ lo me ga racladz zho ye zho chobnis, dzigo rnee me lo zho:

—ĭMiech ngoopdol, masaque nac to zig nac meel! Nan to na lëe, loxaque chobnis to laa to laale lo grè guieñëdcox ne ziaadyob. ⁸Led scada gon, none zaacse gban to zeena glu nli dib zdoo to psaan to grè

xquie_lntseeb to. ⁹ Ni gacniatsde to guiab to loxaque por nace to xtií Abraham, laa Dios csilaale to; sac gneli naa lo to ganle telne gacladz Dios, haxta grē quie zac gnabey me tsaalow miech ne gac zha xtií Abraham. ¹⁰ Nañle to ganle, grē yag nex, zeene rquiad nex low led rruqa, rlozh ga rliaa_l lo gui, ga reca. Scadaa nagon gdzieelo miech ne gband zigne racladz Dios, sac rrieequia laa me nzhenle xquiiyag me cchug me yag ne sca nac.

¹¹ Nli tib wrobnisse nu rnedz naa lo to, nacesw zig tib señ, sac lēē gdib rluw laa to psaan xquie_lntseeb to, laa to bzēēb xnēz Dios. Sanguē meñ ne no guiaad ga, mesi Espiritu Sant gdeed me lo zha ne gliladz me; ni scagaa zha ne gliladz me, sonēz me zho zaatne nitlo zho. Ne nligaa tib meñ non nac me, tel naa peet nond naa, per ni par tib ngundziin ne glit lab me raguiald naa gac naa. ¹² Laa me guiaad zig tib zha ne rbeeguizh zhobxtil, sac zha co rlozhse runmbe zho zhob, rgotsow zhow, laa paj rielaal zho lo gui, ga reca. Per gui ne gzēēg grē paj ne guiadbee me ga, gdziñd dze guiuuw.

Brobnis Jesús

(Mr. 1:9-11; Lc. 3:21-22)

¹³ Len dze co brieē Jesús nēz Galilé zie me nēz ro guiubee Jordán, laa me zie par cchoobnis Juan me. Bdziñ me ¹⁴ nēd Juan cchoobnis Juan me, rēb Juan lo me:

—Lēda i gon, naa none guial lo luu cchoobnis luu naa.

¹⁵ Dzigo rēb me lo Juan:

—Nli scaw, per mazd pchoobnis naa, sac gon ib nonguiel_l dziuuñ ne mine rnabey Dios.

Dzigoraa pchoobnis Juan me. ¹⁶ Laa me zieriee lo nis zeene laa zhan gbaa bzhal, gonpaa me zig rlu tib palom rlu Espiritu Sant laa me ziad-zēēb bdziñ me guic me, ¹⁷ ni blu zēēb tib tsi meñ co nēz gbaa rnee me:

—Xpēēd naa gon nac meñ qui, rleynie naa me, meñ nziiu nac me lo naa.

4

Gocladz men_dox niuñgüet ma Jesús

(Mr. 1:12-13; Lc. 4:1-13)

¹ Zeene blozh brobnis Jesús, dzigo güeynie Espiritu Sant me tib dan zit, zaatne guieñd miech; ga gocladz men_dox niuñgüet ma me niuñ me mine racladz ma.

² Zeene goc choo ngbidz choo guieel no me dan co ni tib lē peet rowd me, laa me pcaabedz ³ hor co bdziñ men_dox zaatne no me ga, rēb ma:

—Telne nli Xpēēd Dios nac luu, bnabey tsaalo grē quie rii ncuaañe gow luu.

⁴ Dzigo pquiab me rēb me lo ma:

—Znu zhobnee lo Xtiidz Dios: “Niapse por xtiidz Dios mban miech, yquiamband zho loxaque guie_lwagwse.”

⁵ Blozh ga güeynie ma me Jerusalén, blep ma me glaa guic yadoo nroob ne zob lad guiedz co, ⁶ rēb ma lo me:

—Telne nli Xpēēd Dios nac luu, bringaa nu, beñque led znu zhobnee lo Xtiidz Dios: “Znabey Dios grē xanj_l me yquiaanap luu, zha queedz luu, zeena ni tib quie ycaand ni luu.”

⁷ Pquiab me rēb me lo ma:

—Psoladz ganle, noque stib zaatne znu rnee lo Xtiidz Dios: “Biēñ, Dios nac meñ ne rnabey luu, nodne quitnie luu me gnab luu lo me ncuaañe nod gon me.”

⁸ Blozh ga bii güeynie ma me glaa tib guic gui, ga blu ma grēse guiedz ne ndxie dib lo guidzliu lo me, ni blu ma grēse ncuaañ ndaan ne rap tib tib guiedz co, ⁹ rēb ma lo me:

—Bui ganle, grēse ncuaañ qui gon gnedz naa lo luu telne squitsgzhib luu lo naa niina, gunnon luu naa.

¹⁰ Horco pquiab me rēb me lo ma:

—jBiche lo naa nu men_dox! Znu gon zhobnee lo Xtiidz Dios: “Diosse nac meñ ne rnabey, mese none gunnon luu, lo me rieguial yquitsgzhib luu; ni mine rnabey me miñ co none gon luu.”

¹¹ Dzigoraa biche ma lo me, dzigo bdziñ bla anj_l bdeed zho ncuaañe dow me.

Psilo Jesús pseed me miech nēz Galilé

(Mr. 1:14-15; Lc. 4:14-15)

¹² Zeene bin Jesús laa Juan biab ladzguiib, dzigo brieē me ga güey me nēz Galilé, guiedz ne lē Nazaret.

¹³ Zhisaque goca, brieēque me ga güey me Capernaum tib guiedz ne ndxie gax ro Nisdoo Galilé, zaatne nac xtan zha xtií Zabulón ni zha xtií Nefalí. ¹⁴ Ga brieēquia mine bzeet Isá (meñ ne pxeel Dios padzeela biadnee xtiidz me), zeene psiaab Dios guic Isá rēb Isá:

¹⁵ Grēse men_zit ne ndxie xtan Galilé, nēz dan ro guiubee Jordán, gax ro Nisdoo Galilé, zaatne gocchen Zabulón ni Nefalí;

¹⁶ miech ne no lo ncow nac zho, per niina tib biini nroob biab lo zho. Ladzniale guie_lgut no zho,

per laa biini co biab lo zho par gree zho ga.

¹⁷ Ga psilo Jesús pseed me miech, rnee me lo zho csaan zho xquie_lntseeb zho, gbig zho lo Dios, sac laa dze ne csilo gnabey Dios ziaadgaxle.

Bredz Jesús tap ngoozme_l

(Mr. 1:16-20; Lc. 5:1-11)

¹⁸ Len dze co, tib dze zieded Jesús gax ro Nisdoo Galilé gon me chop ngoozme_l, tib zho lē Simón Pedr, stib zho lē Ndrés; grop

bets zho lëetse laa zho noron guïex ne rgaa mel lo nis. ¹⁹ Dzigo bredz me zho, rëb me lo zho:

—jGoltë goltënał zhits naa! jLaa naa cxel to tsie to stib gooz, tsietop to grë miech ne sëëb xnëz Dios!

²⁰ Horcogazh psan zho guïex ne rgaa mel ga, laa zho zienał zhits me.

²¹ Zhisaque bzë me ro nis co, gon me laa Jacob ni Juan (lëë grop xingan men ne lë Zebedë ga) no tib len barcw gza pxoz zho, noquiaabdie zho guïex ne rgaa mel; dzigo bredz me zho. ²² Zigne bredz me zho bi-aanmieque pxoz zho barcw ga, laa zho zienał zhits me.

Zëëb diidz grëtaa milagr ne run Jesús

²³ Dipse xtan zha Galilé, guiedz ne rdziñtaa Jesús rie me grë yadoo ne zob lad guiedz co rseed me miech Xtiidz Dios, rnee me lo zho zha racladz Dios gban zho, ni runguïac me grë men rzacné, tel pe guielguidztaa rzac zho.

²⁴ Tel pa lotaaw zëëb diidz scataa run me grë milagr, haxta nëz Siria bin miecha. Nzian grë men co briece ga bdziñnie zho grë zhimguidz zho lo me: no grë men rzacné co noguitnie mendox, no zho rlan guielguidz gutye, no zho gutoo dipse xcuerp, no zho rlan grë pe stib guielguidz, nogaa zho rlan grë pe yoob; grëse zho beenguïac me zho. ²⁵ Zaatne zieetaa me, miech guizhiu ne nał zhits me, grë zha Galilé, grë zha Decápolis, grë zha Jerusalén, grë zha Judé, haxta grë zha ne no stib nëz ro guiubee Jordán.

5

Cho nac zha ne wen zie (Lc. 6:20-23)

¹ Tib dzew, gon Jesús laa grë miech guizhiu co bdziñ lo me, dzigo bzoquia me glaa tib guic gui win. Ga zob me, bdziñ grë xpëëdsuel me lo me, ² dzigo psilo me pseed me zho, rëb me:

³ —jWen zie zha ne rien ib none gbig zho lo Dios, sac ib zdziñ zho zaatne rnabey me!

⁴ jWen zie zha ne mban rac roon niina, sac schoobladz Dios zdoo zho!

⁵ jWen zie zha ndooladz, zha ne zienie guic gban zigne rnabey Dios, sac scaania zho guidzliu ne gdeed me lo zho!

⁶ jWen zie zha ne racladz gun grë mine rnabey Dios, rzac zhow zigne rzac zha ne rcaabedz, zha ne rnabga zhis, sac ible zacnie Dios zho parne grieelo gun zhow!

⁷ jWen zie zha ne rquia zdoo miech, sac zigne rquia zdoo zho samiech zho scaque Dios squia zdoo me zho!

⁸ jWen zie zha ne mbele zdoo, zha ne biaanmbele lo xtol, sac zanlo zho Dios!

⁹ jWen zie zha ne noxco zaacse gban miech, tild zho, sac masaque mëed gac zho lo Dios!

¹⁰ jWen zie zha ne loxaque porne quiayun zho mine rnabey Dios, rquianał miech zho, sac ible zdziñ zho zaatne rnabey me!

¹¹ Zig nac to, zeene csilo grë miech yquiaago zho to, ctsidil zho to, yquiadi-idzguizh zho to loxaque ne riladz to naa, jwen zie to ga! ¹² jNley golco zdoo to, nguieel golgac, sac gon tib guielnzaac nroob ne gneedz Dios lo to! Golsoladz ganle, scaque been zho grë zha ne pxeel me padzeela biadnee xtiidz me.

Nac to zig nac zed, zig nac biini (Mr. 9:50; Lc. 14:34-35)

¹³ Masaque nac to lo guidzliu rii zig nac zed. Nanle to ganle pa lotaa rquiin zed, per telne nzhida, zpa dien rquiina? jLëë gdib rliaala lo guizh, zaatne rded rzë miech rzëeni zhow!

¹⁴ Nac to zig tib biini ne noziini lo guidzliu. Grieelod tsongueets to, sac tib guiedz ne ndxie glaa tib guic gui, grieelod tsongueetsa. ¹⁵ Golguien ganle nacd biini parne tsolana, sinque parne gziiniw lo grë miech ne no len yu. ¹⁶ Zaacse sca golgac, mine rquiin min co golgun, masaque lëëw gac zig tib biini; zeena zeene gan miech biini co zien zho ganle pa lotaa men nroob nac Pxoz to men ne no gbaa.

¹⁷ Guiabde to togo bod laa naa zial zialtichee naa ley ne psan Moisés, o grëгаа mine bnee zha ne biadteed xtiidz Dios padzeela; sac led mincod zial naa, sinque laa naa zial gun naaw zigne no gaca. ¹⁸ Gneli naa lo to ganle: Laga niaa guidzliu rii, laga niaa gbaa, ib none gac mine zhonee lo ley, mine bneegaa zha ne biadteed xtiidz Dios, ni tib lë paat gdzëëda. ¹⁹ Gacxe waa zha ne quiits tib ley niicle mine mazdraa wina, ni cseed zho miecha zigne run zho ga, ib tedsod zha nac zha ne mazdraa win guiaan lo grë zha ne yгаа zaatne rnabey Dios. Sangue zha ne guna zigne rnabeya, ni cseed zho miech scaque tsienal zhow, zha cosi nroob gacnon zho lo grë zha ne gdziñ zaatne rnabey Dios.

²⁰ Rso naa diidz lo to sca, zaacse golgac gunde to zigne run grë maistr ley, grë zha farisé; sac telne tsoxcod to gban to zigne racladz Dios, grieelod gdziñ to zaatne rnabey me.

Nodne gut miech (Lc. 12:57-59)

²¹ Led nanle to ganle, no tib ley ne biaan lo xmengol to padzeela, rneew: “Gute luu samiech luu”; rnabeya zha ne gut samiech, ib none guetaque zho, quizhgazh zho dol co. ²² Sca rnee ley co, per zig nac zha ne gon në rac zdoo ran samiech, rrieequia beetle

zho ga, ye zho rieguiaḷ quizh falt co. Zig nac zha ne gnee pe tib diidznè lo samiech, none gacredz zho lo wxtis zeena guḷquizh zho zho dol co; zha ne quiegaa samiech, lèèque zha rguib guey zho gabil ga.

²³ 'Gacxe waa tel ziesan to tib gon, per lo pcoogle zo to rsoladz to rdilnie to tib samiech to, ²⁴ gase golsan gon co, goltsie goltsienabgagh pardon lo zha ne rlèè to lo ga, gbireraa to dzigo gdeed to gon co. ²⁵ Zha ne sca rlèènie to, goltsoxco pront golguiaaḷ wen; zeena tsiezod zho to lo wxtis, sac telaa zho tsiezo to lo wxtis ib znabey wxtis tso to ladzguib. ²⁶ Gneli naa lo to ganle grieede to ga, haxtaque lozh quizh to grè dimi ne gnab wxtis lo to.

Nodne tsonie miech zha ne led tsieeld zho

²⁷ 'Nanlaque to ganle zha rnee stib ley ne biaan lo xmengol to, rneew: "Zha ne nole tsieel, zigtaa mguiw zigtaa wnaaw, nodne tsonie zho zha ne led tsieeld zho." ²⁸ Per zig nac zha ne gon, ran tib wnaa ni rsilo zho riogui zho tsonie zho wnaa co, laa zho bdiitsle ley co.

²⁹ 'Gacxe waa, bziaalo to mine rquiaqui runctal to xtol to, mazd golcueegazha; niicle tel bziaalo derech tow. Peet nacd nitlo tib lèque xuerp to, lèdle dib nacsew tsietsobe gabil. ³⁰ Laa tel niagaa tow, mine rquiaqui runctal to xtol to, niicle tel nia derech tow, golchuggazha. Peet nacd nitlo tib nia to, lèdle nitlo to len gabil dib nacse xuerp to.

Nodne csèbtsieel miech

(Mt. 19:9; Mr. 10:11-12; Lc. 16:18)

³¹ 'No stib ley znu rnee: "Mgui ne racladz csaan tsieel, zac ctso zho; totsaque gdeed zho tib guits lo wnaa, zaatne raquiet ne laa zho psaan wnaa." ³² Per gni naa lo to ganle: telne quiangobd tsieel zho stib mgui, ni rsèbtsieel zho, lèèque zha rguib ga yquianie tsieel zho stib mgui. Mgui ne ctsieelnia wnaa co, dol ga guḷ zho, sac gon nole tsieel wnaa co.

Nodne yquidie miech

³³ 'Ziyon to ganle zha nac stib ley ne biaan lo xmengol to rneew: "Zha ne gzeet lè Dios par glu zun zho mine bnee zho, yase zeene gdeed zho tib gona, gungaa zho pe tib dziina, ib none guḷ zhow." ³⁴ Per gni naa lo to ganle: nodne sca gzeet to lè Dios, per ni gbaa nodne ne sca gzeet to, sac gon ga nac zaatne zob Dios; ³⁵ per ni guidzliu, sac lo guidzliu nac zaatne zo ni me; per ni Jerusalèn, sac ga nac guiedz nroob ne rnabey me; ³⁶ guiaabgaa to gzeet to guic to. Gunscade to, sac gon zig nac guic to, per ni tib guitsguic to grieelod csan nquits to, grieelodgaa csan ngas tow. ³⁷ Gacxe waa ncuuaḷe rgobey to zrieelo guḷ to, golguiab: "zun naaw", togo riengaa to grieeloda, golguiab: "grieeloda"; tsode to

dieen cho gzeet to, sac gon led Diosdraa rnabey min co.

Nodne ctsire miech guielnè

(Lc. 6:27-36)

³⁸ 'No stib ley znu rnee: "Tel cuee zho tib bziaalo luu, guiaand luu scase bleequie stib bziaalo zho, tel cueegaa zho tib lay luu, scaque been blee stib lay zho." ³⁹ Sanguie naa laa naa rso diidz lo to gon, gunscade to; zha ne gacntseeb lo to, gacndaande to lo zho. Tel cap zho lo to, tiblise golgac, ib gunde to gisaque nia to.

⁴⁰ 'Zha ne tsiezo to lo wxtis, ni lozh ga haxta gla zho xibiaagw to, golsaan güey zhow haxta xabnal to goldeed lo zho. ⁴¹ Zeene grieequia zha ne gnabey to güey to xyo zho tib groḷ hor, golgüeya, haxta tib hor goltsie güey tow. ⁴² Zha ne gnabtaa pe cos lo to, goldeeda; zig nac zha ne ziadtiin, goldeed ncuuaḷe ziadtiin zho, ctsirede to zho scase.

⁴³ 'Ziyonle to ganle no zha ne znu rnee: "Zha ne rdzieel xtiidz luu bleynie zho, sca-gaa zha ne rlèè lo luu, blèènie zho." ⁴⁴ Per led scada gon, jnone zaacse gac to lo zha ne rlèè lo to! jzha ne rgodee to, golnab lo Dios gunlay me zho! ⁴⁵ Zeena sca glu nli xpèed men ne zob gbaa nac to. Golgan ganle tel me rnabey me rziini ngbidz lo grèse miech, zigtaa lo zha wena, zigtagaa lo zha ntseeba; scaque nisguie me rsiaba rquin zho grèse zho, rbed me dien cho ngable lo me, chogaa ngabd lo me. ⁴⁶ jGase nasca golwi! Tel lox-aque zha ne ndzieeldiidz to zha cose rleynie to, jniacxe zgaa to guielnzaac ne gdeed Dios? Haxta zha ne mazdraa ntseeb run min co. ⁴⁷ Tel loxaque zha ne nacse menlidz to, lo zha cose zaacse rnee to, jpe lèè guielwen ga na rlu to? Haxta zha ne runbeyd Dios run min co. ⁴⁸ Goltsoxco sca ndzinli golgac, zigne rleynie Pxoḷ to (men ne zob gbaa) grèse miech, scaque none guḷ to.

6

Zha ne run xyudar samiech

¹ 'Zeene guḷ to xyudar samiech to, ib gunde to zaatne ndxiepaa miech ga so to glu to xquielwen to, par gan zho mine run to. Telne sca guḷ to, ygaade to guielnzaac ne gdeed Pxoḷ to men ne zob gbaa. ² Gacxe waa, zeene guḷ to xyudar zha ne guiend pe yquin, gooldide tow zigne run grè zha ne rquiaalo rquia zdoo samiech; sac zha co tel pe ncuuaḷe rgad zho, rzo zho len yadoo, rzo zho ro nèz rlozhd yquiaabdzie zhow par gacnanpaa miecha, zeena zha ne gona guiab zho: jzha wentaa zha qui! jGneli naa lo to ganle ne sca riapnziiu zho lo miech, lèèle gdib guielnzaac ne yгаа zho ga!

³ Golguien sca, zeene guḷ to xyudar zha ne no tib liaadz, choot lo gzodiidzde tow, per ni zha ne mazdraa ndzieeldiidz to nodne

gacnaŋa. ⁴ Dzigo scagaa Pxoꝝ to nroob guieŋzaac ne gneedz me lo to, sac teŋ me grēsew raŋ me.

Zha gzoðiidznie miech Dios

(Lc. 11:2-4, 34-36; 12:22-31, 33-34; 16:13)

⁵ Scaque zeene gzoðiidznie to me, gunde to zigne ruŋ grē zha ne rquiaalo miech wen nac zho. Sac teŋ zha co zeene rzodiidznie zho me, rzo zho zaatne gaŋpaa miech zho, zig nac leŋ yadoo, zig nac leŋ guiedz zaatne rded rzē miech. Gneli naa lo to gaŋle lēēle guieŋzaac ne yгаа zho ga. ⁶ Golguien zeene gzoðiidznie to me, golsēēb leŋ lidz to dziits golsioog ro yu, ga golzodiidznie me. Ible ted-sod nroob guieŋzaac gneedz me lo to, sac niicle ncuaaŋe mazdraa nguets zhliaana, raŋ mew.

⁷ Ni zeene nozodiidznie to me, gunde to ncuaaŋe nonee to lēēw rlozh, lēēw rsilo zigne ruŋ grē zha ne runbeyd me. Sac zha co rzac zho por nroob diidz gnee zho, por nzian vuelt gnee zhow dzigo squiaadiag mew. ⁸ Guŋscade to, sac me ne nac me Pxoꝝ to gardle gnee to xliaadz to lo me laa me naŋle pe nac ncuaaŋe rquiin to. ⁹ Gacxe waa zeene gzoðiidznie to me, znu golnee:

Dios, luu ne nac luu Pxoꝝ no, zob luu gbaa; luuse nac meŋ ne mazdraa ndzon.

¹⁰ Luu nac meŋ ne gnabey no, miŋe gnabeytaa luu zigne raca gbaa, scaque none gaca lo guidzliu nu.

¹¹ Been guieŋzaac bneedz ncuaaŋe dioow no nadze.

¹² Bzhiguiel been no perdon grēse doŋ ne ziodziuuŋ no lo luu, zigne rdziuuŋ no samiech no perdon grē falt ne ruŋ zho lo no.

¹³ Gdeete luu diidz yquii mendox no, been guieŋzaac bla no lo ma.

Luu nac meŋ ne rnabey, meŋ ne rap poder, meŋ ne mazdraa nroob. Miŋe rnab no nu, ndionpaa no zuŋ luuw.

¹⁴ Sca nagon none gnee to. Ni golgona gaŋle, zha ne goŋ guŋ samiech zho perdon teŋ pe nactaa falt ne been zho lo zho, scaque Pxoꝝ to meŋ ne zob gbaa, zuŋ me zho perdon. ¹⁵ Zha ne gund samiech zho perdon, niicle megaa gund me perdon toŋ zho.

¹⁶ Siba, zeene nocuan to nozodiidznie to me, guŋbande to lo to. Sac grē zha ne rquiaalo miech wen nac zho, sca ruŋ zho; zeene nocuan zho xtsiinpaa ruŋ zho runban zho lo zho par gaŋ miech laa zho nocuan. Gneli naa lo to gaŋle, zha ne sca ruŋ lēēle guieŋzaac ne yгаа zho ga. ¹⁷⁻¹⁸ Guŋscade to, nguieel golgac ine golzēē biegw guic to, golquiib lo to, zeena ni tib choot guieŋd laa to nocuan, loxaque Pxoꝝ to gacnaŋa, sac grēse ncuaaŋe rac nguets raŋ mew. Grēse ncuaaŋe rac, me raŋa, me nac meŋ ne gneedz tib guieŋzaac nroob lo to.

¹⁹ Tsienalde to loxaque dieŋ zha gapchen to lo guidzliu rii, sac nac ncuaaŋ lo guidzliu rii rban ngbaana, rnitlo mxila, haxta noxtseeb guioochena. ²⁰ Mazd goltsoxco yгаа to guieŋzaac ndzon ne no gbaa, sac miŋe no gbaa, led yed miŋ co guioochen, led yed miŋ co cuan ngbaan, led yedgaaw gnitlo mxil. ²¹ Golgona gaŋle, guieŋzaac ne goŋ guŋlo to, ga glu pa gdziŋ xalm to, sac zaatne guŋlo to guieŋzaac co ga nac zaatne gdziŋ xalm to.

²² Rrieequia nac bziaalo to zig nac tib biini. Telne niapse lo grē ncuaaŋe ndzinli rwi to, dzigo gdipse xcuerp to no lo guieŋbiini. ²³ Laa telne loxaque lo grē ncuaaŋe nonguiel rwi to, dzigo gdipse xcuerp to no lo guieŋcow ga. iZha rnazhe lo guieŋcow co, teŋ lēēque biini noyac guieŋcow!

²⁴ Golgona gaŋle, grielod goŋ gleynie to dimi, ni gleynieque to Dios. Ib none telne Dios rleynie to, me none gleynie to, togo dimigaaw, dimi golleynie.

²⁵ Gacxe waa, gni naa lo to gaŋle: Tsode to zhgab dieŋ zha gban to lo guidzliu rii, pa griee pe gow to, pe guie to, pe gacwxabгаа to. Siba, iŋniacxe mazdraa non guieŋwagw lo xquieŋmban to? Xabгаа tow, iŋniacxe mazdraa nona lo xcuerp to? ²⁶ Golwi lo grē mguin gaŋle, led yed ma rquia gon, led yed ma rquia wlaap, led yed ma rgotsow pe guieŋgon, per row ma, sac Pxoꝝ to meŋ ne zob gbaa, meŋ co rdeed ncuaaŋe row ma. iTel to goŋ, mazdraa non to lo grē mguin co! ²⁷ Ni lalnu paat rquiinda tant tso to zhgab. Telne guiab to tso to zhgab dieŋ zha gacnool txte to spalal yeense, iŋniacxe zrieelo to guŋnool tow?

²⁸ Zig nac lar, ipe nacne tant tso to zhgab dieŋ pe gacwxab to? Pe rwide to lo grē guiee ne gaŋle zēēb dan, zha rooba, led yeda rio zhgab dieŋ zha gacwxaba, per niow rnaw; ²⁹ gni naa lo to gaŋle, per ni rey Salomón con grē xab niazh me, blud me scataa niow.

³⁰ Gase na gaŋle golwi, niicxe grē guiee dan co na, zna dze zob nguiaaw, gzhe widz laaw bidzle, laaw tsecle, ni scataa niow rgacwxab Diosa, ipe lel to dzigo ygacwxabd me, niicle ne squi gard guieŋ to dib zdoꝝ to gnalo to me?

³¹ Tsode to zhgab sca guiab to: “iBay pa griee pe dioow ne, pa griee pe dio ne, pa griee pe dziaacwxab ne?” ³² Grē miech ne runbeyd Dios, tibaque zhgab co rio zho. Saŋgue to golsoladz gaŋle, Pxoꝝ to meŋ ne zob gbaa, naŋle me pe nac grē xliaadz to, ³³ me nac meŋ ne gneedz ncuaaŋe yquiin to, per ib none glo tsoxco to gban to zigne rnabey me. ³⁴ Golguien sca tsode to zhgab dieŋ zha ted to gzhe widz, sac gzhe widz co zhaalaque xco ne ziaad. Tib tib dze zhaase zhaase zhgab ne ziaadniew.

7

Nodne gzee zdoo ne cho zha rac

(Lc. 6:37-38, 41-42)

¹ Blozh ga rëbchaa me lo zho:

—Golguien, ib gunde to në gac zdoo to zeene ran to ncuuan nonguield ne run stib miech, sac to tozhal gunquizh zhow; zeene scagaa Dios, gunscad me to. ² Sac gon tel zha rzac to samiech to, scasaque sac Dios to.

³ 'Ileda ga gon tso to lozhd gzee zdoo to dien cho pe run, ni nenda mazdraa mine run to! ⁴ 'Pe ro to glisqui to mine run stib zho, ni tel mazdraa nac mine run to? ⁵ 'Golguien sca glude to ncuuane nacle to! Glo goltsoxco ndzinli gac to, dzigo lozh ga zac tsienet to lo stib zho zha gacndzinli zho.

⁶ 'Ndzon nac Xtiidz Dios, gdeete tow lo zha ne rlëeniew, sac gon rrieequia lo mëcw ga gdeed tow, ib zun zho mine run mëcw zacntseeb zho lo to. Naca zig nac quie perl, gdeete tow lo zha ne rleynieda, sac gon rrieequia lo nguts ga gdeed tow, tel ngutsa niicle ncuuane mazdraa non glaal zho lo ma, loxaque gzëeni maw.

Ncuuane gnabtaa ne zgaa new

(Mr. 1:22; Lc. 6:31, 43-44, 47-49; 11:9-13; 13:24-27)

⁷ 'Ncuuane rquiin to, golnaba lo Dios, scagaa me zneedz mew. Golguib tel pe racladz to, me nac men ne gacnie to gdziel tow. Golcuedzlë me, scagaa me scaania me to. ⁸ Sac grëse zha ne rbig lo me rnab zho ncuuane rquiin zho, rdeed mew. Zha ne rguib ncuuane racladz, racnie me zho rdziel zhow. Zha ne rbedzlë me, rcaania me zho.

⁹ 'Golwi ganle, zig nac to zeene rnab xpëed to quiet gow win, 'niacxe ziazh to co to tib quie nia win? ¹⁰ Zeene rnabgaa win mel, 'niacxe zdeed to tib meel lo win? ¹¹ Led rioxco to lëë niapse ncuuane wen rdeed to lo xpëed to, niicle ne miech ntseeb nac to. Telne sca rioxco to xpëed to, pelej Pxoza to dzigo, men ne zob gbaa, tsoxocd me to. Ib tedsod grëse zha ne gnab lo me gdeed me ncuuane rquiin zho, zdeed mew.

¹² 'Zha ne racladz ndzinli gac miech lo zho, none glo zho zaacse gac zho lo miech. Zigtaa ley ne psan Moisésa, zigtagaa mine bnee grë zha ne biadteed xtiidz Dios padzeelaw, sca rnabeya.

¹³⁻¹⁴ 'Goltsoxco sca tsienal to mine rnabey Dios, niicle ne nac guielmban co zig nac zeene rzë ne tib nëz nia. Zhis zha ne rzëeb nëz co, per nëz co zgaa miech guielmban ndzon ne rdeed Dios. Sac gon zha ne mban zigne notaa guic zho, rrieequia tib nëz nzhen ga zie zho; ndal miech ne zie nëz co, per nëz ne nitlo zho ga zie zho.

¹⁵ 'Nsin golso lo zha ne gacladz yquidie to gnë zho xtiidz Dios noteed zho, niicle ndooladz rlu zho pale cho grë mëcwxiil yeen,

per zha ntseeba, masaque nac zho zig grë coyot blë. ¹⁶ Zigne runbey miech tib yag por nex ne rquia low, scaque wen wen golwi zha nac ncuuane run zho, dzigo ga gunbey to cho nac zho. Sac gon zig nac uv, rquiada lo yag quiets; niicle guigwgaaw rquiada lo grë lbë quiets. ¹⁷ Tib tib yag nex rdeedsew xnexa. Tib yag wen, nex wen rquia low; scagaa yag ncuuana, nex ncuuan rquia low. ¹⁸ Grieelod yquia nex ncuuan tib lo yag ne rquia nex wen, ni grieelodgaa yquia nex wen tib lo yag ncuuan. ¹⁹ Gacxe waa grë yag ne rquia nex ncuuan, paat rquiinda, lëë gdib rruga, rlozh ga rzëëg zhow. ²⁰ Min co nagon rne naa lo to, zha ne sca guiaad, por ncuuane run zho ga gunbey to cho nac zho.

²¹ 'Grë zha ne rnee noxco zho mine rnabey Dios, no zho lega rneesew. Nenda haxta rnee zho, naa nac men ne rnabey zho, per gdzind zho zaatne rnabey Pxoza naa. Sac zha ne nlipaa run mine rnabey me, zha cose gdzin ga. ²² Gal dze co, nzian zha ne grieequia gnë lo naa: "Conque rdziunbey no luu, blactaa name bio no bionee no Xtiidz luu lo miech, nzian milagr ne bdziun no, haxta mendox bdziunxoon no zeene bzeet no lë luu." ²³ Niicle sca gnë zho, ib ycaaniad naa zho, sonëz naa zho; sac ni lalnu beend zho ncuuane ndzinli.

²⁴ 'Zha ne rquiaadiag mine rne naa, ni rioxco zho rban zhow zigne naca, rrieequia nac zho ga zig tib zha ndzielguic ne bzaa lidz zaatne nac tib lo quie. ²⁵ Niicle riab guedox per peet rac lidz zho, niicle rriee medox, nis naal ne raclo rded zaatne zoba ga, per rbixcheda.

²⁶ 'Laa grë zha ne rquiaadiag xtidz naa, ni rioxocd zho gban zhow zigne naca, ziaad gac zho ga zig tib zha nxen ne güeyzoob lidz zaatne nac tib lo yuzh. ²⁷ Znuse bnitlo lidz zho, sac zeene biab guedox, lo medox no brieë, lo nis naal ne goclo bded zaatne zoba, znuse bixchew, ni stib lëw biaand.

²⁸ Zeene blozh bnee Jesús, grë miech ne noquiaadiag ga, per nli rzee zdoo zho gon zho zha rseed me, ²⁹ sac rlu men rnabey nac me, led yed me rseed miech zig rseed grë maistr ley.

8

Biac tib mgui ne rlan lepr

(Mr. 1:40-45; Lc. 5:12-16)

¹ Laa Jesús ziad-zëeb cho gui win co, miech guizhiu ne nal zhits me, ² tibaque brieequia tib mgui ne rlan guiedzdox ne lë lepr, wbig me pquitsgzhib me lo Jesús, rëb me:

—Tebaa siguieel luu gunguiac luu naa.

³ Dzigo pxobnia Jesús guic mgui, rëb Jesús: —Zunguiac naa luu. 'Niinagazh laa luu guiaanmbe!

Horcogazha laa grë guiedz co bnitlo.
 4 Dzigo rëbchaa Jesús lo me:

—Bina ganle, choot lo gzodiidzd luu gon zha biac luu; sinque güey lo pxoz güeyaan gon ne rieguiäl gdeed luu zigne rnabey ley ne psan Moisés, zeena gan zho ganle laa luu biacle.

*Biac tib zha ne rquia dziin tib lo menguiib
 (Lc. 7:1-10)*

5 Loxaque bdziñ Jesús guiedz Capernaum, laa tib men ne rnabey lo xmenguiib zha Roma bdziñle lo me, rnab men co gunguaiac Jesús tib zha ne quia xtsiin me, rëb me:

6 —Been tib guielnzaac beenguiac tib zha ne rquia xtsin naa, laa zho nix lidz naa ib gacd grial zho, mban rac zho yoobdox ne rquia zho.

7 Dzigo rëbchaa Jesús:
 —Peet nacda, na së naa guio ne gunguaiac naa zho.

8 —Coo —rëb menguiib co—, rieguiäl csodziin naa luu sëe luu haxta lidz naa. Nanpaa naa zrieelo luu nugazh gnabey luu guiac zho. 9 Sac zig nac naa no zha ne rnabey lo naa, ni ron naa mine rnabey zho; scagaa tel guiep naa tib lo zhaguiib ne rnabey naa: “Güey nu”, rie zho; rnegaa naa: “Dë nu”, riaad zho; zha ne runгаа dziin lo naaw, mine rnabeytaa naa zho, run zhow. Scaque luu nagon nanpaa naa zrieelo sca gnabey luu guiac xmoz naa.

10 Zeene gon Jesús sca rnee men co, rley me, rëb me lo grë zha ne zienäl zhits me ga:

—Lo grë zha Israel, gard gon gan naa tib zha ne squitaa dib zdoo rnaló Dios. 11 Ni golquiaadiaga ganle, zdziñ dze grële zha zit ne squi gnalo Dios, zha co yгаа sobnie Abraham, sobnie Isaac ni Jacob zaatne rnabey Dios. 12 Laa grë zha Israel, niicle nac zho zha ne nac diidz gdziñ ga, leñ lo ncow nëz ley guiaa zho, ga tso zho goonnë zho, haxta gow lay zho lo guielnëdox co.

13 Blozh ga rëbchaa me lo menguiib co:
 —Bzë nasca, gocnan ganle zigne bliladzse luu guiac xmoz luu, sca gaca.

Horcogazha laa moz co biac.

*Biac xniadzoop Pedr
 (Mr. 1:29-34; Lc. 4:38-41)*

14 Laa zeene bdziñ Jesús lidz Pedr, gon me laa xniadzoop Pedr nix rlan xlëë. 15 Dzigo bded me zaatne nix zhuz co, zigne bzhen me nia zhuz laa xlëë co blëz. Horcogazh guche zhuz beenlo zhuz ncuuaane dow zho.

16 Ziedzele dzew, laa ngbidz rzëëblew, zeene bdziñ grë miech co, nzian grë zha ne nosacsi mendox bdziñnie zho lo me. Grëse zho beenguiac me, goctox me lo grë mendox ne nosacsi zho ga, benxoon me ma; ni zha ne rlangaa pe stib guielguidz, grëse zho beenguiac me. 17 Ga brieequia mine bzeet Isá, men ne biadteed xtiidz Dios lo miech

padzeela, zeene rëb me: “Grëse xquielnë ne, grëse guielguidz ne rziac ne, me biw.”

*Zha ne racladz sëeb xnëz Jesús
 (Mr. 4:35-41; Lc. 8:22-25; 9:57-62)*

18 Zeene gon Jesús scataa ndal miech ne goclo lo me ga, dzigo bnabey me xpëëdsuel me gzhixcuaa zho, sac laa zho no tedquia stib nëz ro nisdoo co. 19 Dzigo wbig tib men ne nac maistr ley lo me, rëb maistr co:

—Zaatne tsietaa luu gon, sënäl naa zhits luu.

20 Dzigo rëbchaa me:

—Gocnaa ganle, naa ne nac naa Mgui ne pxeel Dios, peet rapd naa nu, mazd zig nac grë mëz, grë mguin, rap ma zhibliee ma, rap ma zhiptsieez ma; per naa per ni zaatne gaguies naa quianied naa.

21 Wbigaque stib zha ne rzënalë zhits me, rëb zho:

—Ye naa gon sënäl naa zhits luu, per bzhiguiel bneedz diidzbey cuëz naa gangazh naa tsoliu pxoz naa.

22 Pquiab me rëb me:

—Dënal zhits naa. Psaan, nzian grë zha gut no, tsow tsiequeets zho samengut zho.

23 Dzigo laa me bzëëbnie xpëëdsuel me tib leñ barcw, laa zho zie. 24-25 Laa zho zie lo nis co, tibaque zeene psilo briece tib medox, masaque rlis me lo nis co, laaw psilo rzëëb leñ barcw. Dzigo lëëlëd güey zho güeycuaan zho me, sac lëëtaque nixguies me.

—Ligier ganle —rëb zho—, blee mcaal lo luu. ¡Bui ganle laa ne nitlo lo nis rii, csaand luu guet ne nu!

26 Dzigo rëbchaa me lo zho:

—¿Pe nacne squitaa rdzieb to? ¡Gardaque dzigo lëë gliladz to cho nac naa!

Dzigo guche me, bnee me lo me co, bnee me lo nis co cuedzew. Horcogazha blëz me co, niicle nis cow laaw bredze. 27 Zeene gon zhow, bzee zdoo zho.

—Bay chozhe waa nac men rii —rnee zho—. ¿Zha nac ne haxta me, haxta nis ron xtiidz me?

*Men Gadar ne nosacsi mendox
 (Mr. 5:1-20; Lc. 8:26-39)*

28 Laa zho bdziñdze stib nëz ro nisdoo co, zaatne nac xtan zha Gadar, zeene brieequia chopmgi ne nosacsi mendox, bdziñ lo Jesús ga. Zha ntseeba, rdzieb miech zho, choot rdete nëz co. Leñ baa briece grop mgui co bdziñ zho ga, 29 nguied roptsie zho rnee zho:

—¡Peet gund luu no Jesús, psaan no! Rdziunbey no luu, Xpëed Dios nac luu. Ne nli-gaa been guielnzaac csacsid luu no niinaga.

30-31 Zitlaaque ga ndxie tib dzoon nguts notop lag, dzigo bnab grë mendox co lo Jesús rëb ma:

—Tejne cuee luu no nu, bzhiguiel bneedz diidz lose grë nguts qui gdziin no.

32 —Niinaga sca gołtsie —rëb me.

Zigne psaan mendox co grop mgui co, güey ma bdziñ ma lo grë nguts co. Horco psilo grë nguts co, rquiaa ma corr güeypix ma tib ro yeedox ne quia ro nisdoo co, bliaal ma lo nis, grëse ma gut.

33 Zha ne quianap grë nguts co, gzase zho bzhooñ. Güey zho lad guiedz güeyzodiidz zho zha goc grë nguts co, ni bzodiidz zho zha biac grop mgui ne nosacsi mendox ga. 34 Grëse miech co, briece men co gutoo, ib gac sé me. Lo yag zhoob me bdziñnie zho me ga.

9

Biac tib men ne gutoo
(Mr. 2:1-12; Lc. 5:17-26)

1 Dzigo wbiireque bzëeb zho len barcw, bdziñ zho guiedz Capernaum stib, sac ga nac zaatne rbëz Jesús len dze co. 2 Zhisaque goc bdziñ me, laa zho bdziñnie tib men rzacné lo me, dipse men co gutoo, ib gac sé me. Lo yag zhoob me bdziñnie zho me ga.

Zeene gon Jesús dib zdoos grë zha co rnaloo zho ne me gunguaiac men rzacné co, rëbchaa me lo men rzacné co:

—jNley bloo zdoos luu xin! jLaa naa benle perdon grëse xtol luu!

3 Ga zob blalaa maistr ley, zeene gon zho sca bnee me, bza zdoos zho rëb zho: “jQuia-guitnie men qui Dios gon squi rze xtiidz me!” 4 Biengas Jesús sca rza zdoos zho, dzigo rëbchaa me:

—Lëda i gon squi rza zdoos to. 5 Nli nganda guiab ne lo miech: “Laa naa benle perdon grëse xtol luu”; per grielod lega guiab ne laa ne gunguaiac zho. 6 Gacnan to sca ganle naa ne nac naa Mgui ne pxeel Dios, ile rap naa poder par gun naa miech perdon.

Dzigo rëbchaa me lo men rzacné co:

—jNiinagazh guche i, bi yag ne bzhooob luu i, zeen bzé!

7 Zigne sca bnee me, laa mgui co bzoli, laa me zey. 8 Grë miech guizhiu ne ndxie ga, zeene gon zho sca beenguiac me mgui co, bdzieb zho. Psilo zho rdeed zho xquizh lo Dios, scataa poder ne bdeed Dios lo me.

Bredz Jesús Matew
(Mr. 2:13-17; Lc. 5:27-32)

9 Blozh ga laa Jesús briece ga. Ro nëz zieded me gon me tib men lë Matew, lëëtaque laa men co zob lo mezh zaatne razh dimi ne rey lo zha Roma; sac me rcaania dimi co. Dzigo bredz Jesús me tsienal me zhits Jesús. Ga guso me, laa me zienal.

10 Bded ga güeynie me Jesús tib wagw lidz me. Grë zha ne rcaania dimi ne razh lo zha Roma, grë zha ne zëeb diidz nac zha ntseeb, tipse brenie Jesús zho grë xpëëdsuel me.

11 Blalaa zha farisé, gon zho sca tipse zobnie me grë zha co, bded ga, rëbchaa zho lo xpëëdsuel me:

—jMod scataa na rownie xmaistr to grë zha ngoopdol, grë zha beed ne nac recaudador!

12 Bin Jesús sca quianee zho, dzigo rëbchaa me lo zho:

—Nanle to ganle, zha ne run rmed, zaatne no zha rzacné ga rquiin zho, jniacxe squiin zho zaatne no zha ne ndip ndaan?

13 Gołsoladz ganle znu rnee Dios: “Laa naa racladz gacndooladz miech, yquia zdoos zho samiech zho, racladzaxe naa waa guiaad zho dieen peraa guiaadlogon zho lo naa.” Mazd ganle gołtsie, tsow gołsob golguien dien zha nacne sca rnee me. Tel naa, zialguibd naa miech wen, sinque laa naa zialguib grë zha ngoopdol.

jPe nacne rcuand xpëëdsuel Jesús?
(Mr. 2:18-22; Lc. 5:33-39)

14 Bdzinaque xpëëdsuel Juan Bautist, bnabdiidz zho lo Jesús, rëb zho:

—jPe nac waa ib rcuand xpëëdsuel luu? Ni no grë no zha farisé, zhiga zhiga laa no rcuanle.

15 Pquiab me rëb me lo zho:

—Zaatne nadien noyac tib guieltsieel, jpe niacxe lega csilo grë zha ne ndxie lo lni tso zho guielnë, ycuau zho, ni ran zho laa mgui ne notsieelnia zo lo zho? Per dzin dze zeene laa mgui co gbighe, ni zeene laa dze co gdzin, dzigosi nagon rieguial tso zho guielnë, rieguial ycuau zho.

16 Ranle to ganle, zha ne rquiaabdie tib lë lar, yquiaad zho lar cub lad lar gox, sac zha ne sca gun paat yquind wquiaabdie co. Zeene laa lar cub gbe, lëëque lëëw gunnat zaatne nriez lar gox. 17 Scaque tsod zha ne cotsow vin cub tib len guid ne padzeela noquiin, sac stiesz nziu cuba; dzigo niicle guid cow, niicle nziugaawa laaw nitlo ga. Gacxe, tel nziu cuba none len guid cubaque tsotsowa.

Brieaban tib mëdwana yeen
(Mr. 5:21-43; Lc. 8:40-56)

18 Lëëtaque sca quianee Jesús lo xpëëdsuel Juan Bautist, zeene bdziñ tib mgui ne nac zha non yadoo. Zigne bdziñ me pquitsgzhib me lo Jesús, rëb me:

—Been tib guielnzaac sé luu guio ne lidz naa. Laa tib xpëëdwana naa blozh niina, per nanpaa naa telne cxobnia luu guic win, zbeeban luu win.

19 Dzigo bio Jesús nëz zienal me zhits men co, gza xpëëdsuel me. 20 Lad grë miech ne zienal ga, lad co no tib men wnaa, gocle tsiipchop iz rlan me tib guielguidz, rzac me zigne rzac grë men wnaa gzob mëë, tibaque rlan mew ib rbëzda.

Ga zie me, zeene wbig me nêz zhits Jesús, bzhen me ro lar ne mbix Jesús, ²¹ sac tibaque güeynie guic me, ziac me totsaque ygaa xab Jesús nia me. ²² Dzigo wbire lo Jesús, dze bui Jesús lo me.

—Xin —rêb Jesús—, peet tsienied guic luu. Laa luu biac sacne bliladz luu naa.

Gataa laa wnaa co biac lo guielguidz co.

²³ Laa zeene bdziñ Jesús lidz men rnabey co, laa zha ne rool ndxie, noquiaa zho grê di ne rac lo ngutoo, grêraa zha ne ndxie ga, nguiedz zêeb tsi zho roon zho, tib ruid ne rac. ²⁴ Dzigo rêbchaa me lo zho:

—Golree nêz ley, sac gon gute mêed qui, nixguisse win.

Zha ne rlêe, zha ne rzhidzniegaa me, laa zho brieey ley. ²⁵ Dzigo laa me bzêeb len yu zaatne nix mêed co, bzhen me nia win. jHorcogazha laa win guche!

²⁶ Grêse guiedz ne ndxie dib gax ga, gocnan miech scataa milagr nroob ne been me, bleeban me mêed co.

Biac chop zha ne rold lo ni tib zha ngop

²⁷ Zeene laa Jesús wbi ga, nêz zie me brieenal chop zha ne rold lo zhits me, nguiedz rbedz zho rnee zho:

—jJesús, xingan David, pquia zdoo no!

²⁸ Bdziñ Jesús yu ne rbêz me, laa zho wbig lo me. Dzigo rêbchaa me lo zho:

—¿Dib zdoo to dzigo lêe riladz to zrieelo gunguiac naa to?

—Dib zdoo now —rêb zho.

²⁹ Dzigo pquiaania me zhits bziaalo zho, ni rêb me:

—Mine bliladz to i nasca, laaw gac niina zigne bliladz tow.

³⁰ jHorcogazha laa lo grop zha co biac!

Dzigo pso Jesús diidz lo zho choot lo gzodiidz zho zha biac zho, ³¹ ni zigne brieey zho ga, laa zho bzodiidzlew. Blozh ga, grêse guiedz ne ndxie dib gax ga, gocnan miech scataa nac milagr ne run me.

³² Loxaque wbi grop zha ne biac lo ga, laa bla zho bdziñlaque, bdziñnie zho tib men ne nosaci mendox, psanngop ma men co.

³³ Dzigo benxoon Jesús mendox co, zeene laa ma bzhoon laa men co psilo bnee. Grê miech guizhiu ne ndxie ga, per nli rzee zdoo zho, rnee zho:

—jWaltaa gard dzian ne tib men ne squitaa gun grê milagr qui!

³⁴ Laa grê zha farisé rnee:

—Ma ne rnabey lo mendox nacie men qui, gane rrieelo runxoon me mendox.

³⁵ Grêse guiedz ne ndxie gax ga, zigtaa guiedz nrooba, zigtagaa guiedz lasa rie Jesús rieseed me miech. Zaatne rdziñtaa me, rie me xyadoo zho rnee me lo zho zha racladz Dios gban zho, ni runguic me zho tel pe nactaa guielguidz ne rzac zho.

³⁶ Zeene ran me grê miech guizhiu ne rcaalsa lo me, rquia zdoo me zho, sac ran me mban rac zho guien cho tib zha ne gacnie zho, rac zho zig grê mêcwxil yeen ne guien xbxator.

³⁷⁻³⁸ Tib vuelte haxta rêb me lo xpêedscuel me:

—Golnab lo Dios cxeelraa me zha ne gun xtsiin me. Golwi ganle pe zhidaa grê miech qui, quiambêz zho dien cho gnee Xtiidz Dios lo zho. Masaque nac zho niina, zig tib guielgon ne golle gliapa.

10

*Bzo Jesús zha ne tsienee xtiidz me
(Mr. 3:13-19; Lc. 6:12-16)*

¹ Blozhse sca bnee Jesús, dzigo bredz me gza tsiipchop zha ne nac xpêedscuel me ga, bzo me zho tsienee zho Xtiidz Dios lo miech, bdeed me poder lo zho gunxoon zho mendox zaatne nosaci ma miech, ni gunguiac zho grê men rzacne.

²⁻⁴ Znu lê gza tsiipchop zha co:

Simón (zha ne rneeque zho Pedr),

Ndrés (bets Simón),

Jacob ni Juan (zha co nac xingan Zebedé),

Lip,

Bartol,

Mazh,

Matew (zha ne ptop dimi ne razh lo zha Roma),

Jacob (xingan Alfé),

Lebeo (zha ne rneeque zho Tadé),

Simón (zha ne no lo partid ne racladz grieey zha Roma Israel),

ni Judas Iscariot (zha ne güeyto Jesús).

*Pxeel Jesús zha ne tsienee xtiidz me
(Mr. 6:7-13; Lc. 9:1-6)*

⁵ Blozhse ga, pso me diidz lo zho zha tsie zho, rêb me lo zho:

—Nanle to nagon, tsiede to zaatne no grê zha ne nacd zha Israel, niicle sëebde to grê guiedz ne ndxie xtan zha Samar. ⁶ Zaatne no grê zha Israel, gase goltsie; lêe grê mêcwxil ne nonziaab ga.

⁷ 'Goltsie, goltsienee lo zho gacnan zho ganle laa dze ziaadgaxle zeene laa Dios csilo gnabey.

⁸ 'Grêse zha ne rzacne, golgunuiac zho; zha ne rlan guiedz lepr, golsanbe zho; zaatne nix zha ne gutle, golcueban zho; grê zha ne nosaci mendox, golgunxoon ma. Peet gnabde to lo miech, golguien ganle lega bnedz naa poder qui lo to, bzhiide tow.

⁹⁻¹⁰ 'Peet güeyde to, xab tow, lab tow, mine nacwse to, mine quiase ni to, mincose goltsienie. Güeyde to dimi, per ni tib guiet güeyde to; sac zaatne tsiegun to dziin rii, ib ga none gneedz zho ncuane gow to.

¹¹ 'Guiedz ne gdziñtaa to, golguib dien pa lo no tib zha ne ndzinli, dzigo lidz zha co

gol'tsiebêz, haxta gza dze ne laa to ghi guiedz co. ¹² Zeene noguib to pa cuêz to, yu ne tsie to, zaacse gol'gac, gol'quiaabdiuzh zha ne no yu co, ¹³ gol'nab gunlay Dios zho. Telne wen gac zho lo to, zunlay me zho, togo guncasdgaa zho to, dzigo toque gunlay me. ¹⁴ Zha ne sca siguield ycaania to, gol'rieegazh lidz zho; guiedz ne siguield zho yquiaadiag zho mine nonee to, gol'bigazh guiedz co; gollit grê yudie co ni to, gollu lo zho ganle led xtoldraa to ga tel laa zho nitlo. ¹⁵ Gneli naa lo to ganle zeene gal dze ne laa Dios gun xquielwxtis me, bii lëêtaa gac guielnê ne yгаа grê miech ne bio guiedz Sodom, guiedz Gomorr; lëde guielnê ro ne yгаа grê miech ne sca siguield ycaania to.

¹⁶ 'Nsin gol'so, gol'guien ganle rrieequia tib mëcwxil yeense nac to, ni laa naa rxel to zaatne no grê coyot dox. Ndooladz gol'gac, niowse gol'gac lo miech zig rac grê palom, per scagaa con cuidad gol'tsie, gol'gan ganle zha rzê meel. ¹⁷ Nligaa nsin gol'so, sac gon ib ziezo miech to lo wxtis, ni lëêque len yadoo ga quin zho to, ¹⁸ haxta ziezo zho to lo grêraa zha nroob ne rnabey. Laa zho guna, loxaque ne nac to zha ne no xnêz naa, ni gagaa nagon gdeeda diidz gnee to xtudz naa lo grê zha co, ni lo grêragaa miech ne nacd zha Israel.

¹⁹ 'Zeene sca tsiezo zho to lo grê zha rnabey co, tsode to zhgab dien pe gnee to, dien zhagaa gnee tow; sac zeene sca tsiegala, Dios gneedz diidz ne gnee to. ²⁰ Led tod gnee, sinque, izhiEspiritu Pxo to men ne zob gbaa, men co gnee ga!

²¹ 'Zlëeniedox miech zha ne no xnêz naa. Zio zha ne lëêque bets zho, zha ne lëêque pxoz zho, zha ne lëêque xpëed zho ctsidil zho, tsielo zho zho ladznia zha ne gut zho. ²² Tel to, guiets yag gan miech to, per telne dziits so to tel pe nactaa lo guielnê ne ted to, ib zgaa to tib guielmban ndzon ne gdzindraa dze lozh. ²³ Guiedz ne no to, zeene laa miech csilo yquiaana to, gol'rie ga, gol'tsie stib guiedz. Gneli naa lo to ganle, niicle stib guiedz stib guiedz tsie to, gardaque lozh tsieted to grê guiedz ne ndxie Israel zeene gal dze ne laa Mgui ne pxeel Dios guiaad stib.

²⁴ 'Gol'wi ganle zha ne nac mëêdscuel, tsod zha ne ndziibraa non lo maistr, zha ne rquiagaa dziin, tsod zha ne nonraa lo zha ne rree zho. ²⁵ Tel zha gun miech maistr, scaque gun zho mëêdscuel; tel pe cteed zho bizhuan dziin, mincoque cteed zho zha ne quia dziin. Gacxe waa peet tsienied guic to, tel pe nactaa ncuane gnee miech to, sac gon niicxe naa name ne nac naa Dad, menox rnee zho nac naa.

²⁶ 'Gdziebde to, zdziin dze ne glu ganle cho zienal mine nac diidzli, chogaa zienal guielntseeb, gal dze co grêsew xoobnen.

²⁷ 'Grêse mine rne naa lo to zeene nese rziodidza, gol'neew lo miech, haxta glaa guic yu gol'so, nguiedz gol'neew. ²⁸ Gdziebde to miech, gol'guien ganle no tib men nroobraa, lëê men co nac Dios. Tel miecha, loxaque cuerpse zrieelo zho csacsi zho, sangue Dios, zrieelo me gnitlo me miech dib xcuerp zho, dib xalm zho len gabil.

²⁹ 'Nligaa gdjebde to, csaand Dios lega pe gac to. Gol'wi ganle, zig nac grê mguin niicle ne rzac miech peet nond ma, haxta chop ma rdeed zho por tib gaay centav; per Pxo to gon men ne zob gbaa rsaanladz me ma, ni tib ma guete telne gdeete me diidz. ³⁰ Pelel to dzigo csaan me, haxta guits guic tow, grêsew ngaba lo me. ³¹ Gdziebde to sca, gol'guien ganle nonraa to lo tib dzoon mguin.

³² 'Gneli naa lo to ganle, zha ne glu lo miech nacie zho naa, scaque naa zeen gal dze co zlu naa lo Pxo naa men ne zob gbaa, nacie naa zho. ³³ Sangue zha ne ctoladznie naa lo miech, scaque naa ziep naa lo me runbey naa zho.

³⁴ 'Guiabde to togo laa naa zial loxaque par cuin wense miech! Lëda gon, ye zial naa zialgunctil naa zho. ³⁵ Sac zha ne sëeb xnêz naa, zlëenie xpëed zho zho, tel mëêdgaaw, zlëenie pxoz zho zho; scaque men wnaaw, zlëenie xinzhizh zho zho, zha ne nacga nguzhizha, zlëenie xnïaa tsieel zho zho. ³⁶ jLëêque menlidz miech gac zha ne glëe gan zho!

³⁷ 'Zha ne mazdraa rquia zdoos glëenie pxoz zho zho, glëenie xnïaa zho zho, glëeniegaa xpëed zho zho, porne gun zho mine rnabey naa, peet xtsiind zha co par ygab zho xnêz naa. ³⁸ Scaque zha ne yquia zdoos cueeladz zho zho guiaadnal zho zhits naa, grielod ygab zho lo naa. ³⁹ Sac grêse zha ne rquia zdoos guielmban ne rap zho lo guidzliu rii, ygaad zho guielmban ndzon ne gneedz Dios; sangue zha ne cueeladz xquielmban, niicle tel csacsi miech zho loxaque ne no zho xnêz naa, ib zgaa zho guielmban ndzon co.

⁴⁰ 'Niina gon ne squi tsie to, grêse zha ne zaacse ycaania to, zaacse gnee zho lo to, rrieequia naa ga sca ycaania zho; ni zha ne sca ycaania naa, rrieequia men ne pxeelle naa ga sca ycaania zho. ⁴¹ Zha ne cuêzlo tib men ne noteed xtiidz Dios lo miech, guielnzaac ne gdeed Dios lo men co, ye zho yгаа guielnzaac co. Zha ne cuêzlo tib miech ndzinli, guielnzaac ne gdeed Dios lo zha co, ye zho ygaaw. ⁴² Ni zha ne gneedz maase tib zhigaque nis yag lo cho tib zha win ne nac to ne nac to xpëêdscuel naa, ib tedsod zdeed Dios guielnzaac ne tsiegual zho.

*Zha ne pxeel Juan Bautist
(Lc. 7:18-35)*

¹ Zeene blozh pso Jesús diidz lo gza tsiip-chop zha co, dzigo laa zho zie. Blozh ga laa me brieeque, güey me grë guiedz ne ndxie gax ga, güeyseed me grë miech co.

²⁻³ Len dze co no Juan Bautist ladzguib, ga no Juan bin Juan zha nactaa grë milagr ne run Jesús, dzigo pxeel Juan bla xpëedsuel Juan güeynabdiidz zho lo me, dien pe lëële Men ne zëëble diidz cxeel Dios lo guidzliu ga nac me, te dzigoraa gdziñ men co ye. ⁴ Dzigo rëbchaa me lo zho:

—Grë ncuaañe bin to rne naa, grëgaa ncuaañe gon to run naa, goltsie golzodiidza lo Juan. ⁵ Ran to ganle grë zha ne rold lo, grë zha ne gacd sè, grë zha ne rlan guiedz lepr, grë zha ne rcauat, laa zho riac; haxta grë zha ne gutle, laa zho rrieeban. Xtiidz Diosa, laaw quiagaaz lo grëse zha ne rquiina. Grësew, golzodiidza. ⁶ Ni golguiab lo me, dichos zha ne rächopd guic, sinque tiblrique rac zho riladz zho cho nac naa.

⁷⁻⁸ Zeene laa xpëedsuel Juan zey, dzigo psilo me bzeet me Juan lo miech guizhiu ne ndxie lo me ga, rëb me:

—Zeene güey to dan ngan co, güey to lo Juan, zha dien güeynie guic to nian to me? ¿Pe rëb to rlu me zig tib goobgui ne nëzrii nëzrec rey me, te rëb to ye tibo masaque grë lar niazh ne racw zha non nacw me? Per nanle to ganle zha ne scataa racwxab riold zho dan. ⁹ Nligaa cho dien güeynie guic to nac me, zte rëb to ye tib men ne noteed xtiidz Diosa? Gacnañ to ganle tib men ne noteed xtiidz Dios gon nac me, ni me nac tib zha ne mazdraa nroob lo grë zha ne ziyun dziin co. ¹⁰ Me ga raquiet lo Xtiidz Dios zaatne znu rnee:

Sxel naa tib zha ne tednerga lo luu, zha co gzhixcuaa nëz ne ted luu.

¹¹ Ne nligaa lo grëse mgui ne zieded lo guidzliu gard grieequia tib zha ne mazdraa non lo Juan Bautist; per zha ne gon winraa zaatne rnabey Dios, nonraa zha co lo me.

¹² Desde psilo Juan noseed me miech zha-paa racladz Dios gban zho, ni rchoobnis me zho, hor co psiloque brieequia zha ne rlëënie zhiwseed Dios, gacxe waa zha ne nli-paa rdziebd, zha cose rcaaniaw, rzëëb zho xnëz me. ¹³ Mazd glo tibaque raquiet ne laa men ne cxeel Dios ga guiaad, zigtaa lo leya, zigtagaa grë zha ne biadteed xtiidz Diosa, bzeet zhow. Ni niina ne laa Juan biaad, laa men co blanso. ¹⁴ Juan gon biaad niina zig no diidz guiaad Li; golgacnañ sca ganle cho nac me. ¹⁵ Zha ne racladz guien zho zha nac grë miñe none naa nu, jyquiaadiag zhow!

¹⁶⁻¹⁷ 'Nac grë miech rii, rienñd zho pe racladz zho. ¿Cho ganle run zig run zho? Lëë zho run miñe run mëëdlas ne rio wguit ro nëz, niicle rool xcompañer win di nguieel

rieded win, niicle rool gaa zho di ngan, roond win. ¹⁸ Sac gon biaad Juan, ran zho rowd me tel pe ncuaañe row zho, ried me ncuaañe rie zho, dzigo laa zho rnee mendox nacnie me. ¹⁹ Blozh ga ziaad Mgui ne pxeel Dios, ran zho row me, rie me, laa zho rneeque, lega rowcho me, lega riecho me, ib rienñd me cho rtsieelsa me, haxta grë zha ngoopdol, haxta grë zha yozh ne rtop dimi ne razh lo zha Roma rzënie me. Sca rnee zho, sañgue zha ne rgaa guielbiini ne rdeed Dios, rien zho cho nac zha ne ziaadgun xtsiin me.

*Miech ne bzhiguiel ncaania xtiidz Jesús
(Lc. 10:13-15, 21-22)*

²⁰ Blozhse ga, dzigo psilo Jesús bzeet me miñe yгаа grë zha ne pcaaniad xtiidz me; sac nzian guiedz ne güey me niicle gon zho grëtaa milagr ne been me, per ib psaañd zho xquielntseeb zho, rëb me:

²¹ —¡Probsaxe grë men guiedz Corazín, grë men guiedz Betsaid! Sac gon gonpaa zho grë poder ne rap Dios, per ib psaañd zho xquielntseeb zho. Tel niaca miñe nian grë men guiedz Tiro, grë men guiedz Sidón, grë milagr ne gon zho ben naa, ib nded-sod mban niac grë zha co nio zho guielnë, zëëb nsaan zho xquielntseeb zho, mbig zho lo Dios. ²² Gacnañ zha Corazín, gacnañ zha Betsaid sca ganle, gal dze ne gon Dios guielwxtis, lëëtaa caxtigw ne yгаа zha Tiro ni zha Sidón, mazdraa miñe yгаа zho. ²³ Scaque zha Capernaum, masaque rzac zho niina zha nziuuraa lo Dios, per gacnañ zho ganle haxta guiet lo ncowdoo ne guey mendox ga guey zho; sac gon tel niaca miñe nian zha Sodom grë milagr ne ran zho noyun naa, ible nsaan zha co xquielntseeb zho, nitlod zho. ²⁴ ¡Gacnañ zha Capernaum ganle gal dze ne gon Dios guielwxtis, lëëtaa caxtigw ne yгаа zha Sodom, mazdraa miñe yгаа zho!

²⁵ Dzigo bzodiidznie Jesús Dios, rëb me:

—Dios luu ne nac luu Pxoz naa, luu rnabey gbaa luu rnabey guidzliu, rnedz naa xquizh lo luu sac grë miñe noyun luu nu niina bdeete luu diidz niacnañ grë zha raca, sinque laaw blu luu lo grë zha ne nac zig grë mëëdlas. ²⁶ Sca quiayun luu, sac ib scale racladz luu gaca.

²⁷ Blozh ga rëb me lo grë miech ne ndxie ga:

—Grëse ncuaañe ran to quiayun naa, Dios men ne nac Pxoz naa, me bneedz poder rii lo naa; sac ib laa me bzo naa, naa gūña. Xpëed me nac naa, wen wen runbey me naa, scagaa naa wen wen runbey naa me. Choot runbeyd me zigne runbey naa me, per zha ne gacladz naa gunbey me, zunbey zho me.

²⁸ Grëse to ne nac to zha ne në noded, rdib rdzag to quiaguib to dien zha guiaanwen

zdoo to, goltë lo naa, naa gneedz tib wdziladz ndzon lo to. ²⁹ Nligaa golbig lo naa, goltënał zhiwseed naa, goltac tib miech tiblibadz, tib miech ndooladz zigne nac naa; zeena gap to descans co. ³⁰ Nacda ncuuaane ngan, nacda ncuuaane guiab to glëbde to gun tow.

12

*Dze ne rdziiladz zha Israel lo dziin
(Mr. 2:23-28; Lc. 6:1-5)*

¹ Len dze coquew, tib dze lëëtaque dze ne rdziiladz zha Israel lo dziina, bded Jesús zaatne zëëb zhoxtil grë xpëëdsuel me. Ga zie zho rcaabedz zho, dzigo psilo zho ptop zho mzion co dow zho zhoxtil co. ² Gon bla zha farisew, dzigo rëb zho:

—iLëda i gon noyui to no, noguiis to ley i! Golguien ganle dze nda nac dze rii.

³ Pquiabchaa me rëb me lo zho:

—iPe gard glab to zaatne ziaad ganle zha been rey David, tib dze zeene pcaabedz me grë me zha ne ziegza me, ni zienied zho pe gow zho? ⁴ Rneew, bzëëb me len yadoo güeynab me quietxtil ne nac gon, downie me grë zha ne ziegza me ga, ni loxaque zha ne nacse pxoz row quietxtil co, ipe led bdiitsd me ley ga? ⁵ Lo xley Moisés name zhoobnee ganle zha haxta dze ne rdziiladz to lo dziin run grë pxoz dziin len yadoo, ni nreeda dol ga sca run zho. ⁶ Golwi ganle zha rats ley par gac dziin len yadoo, ni yadoose ga, gacnan to ganle lo to nu zo men ne mazdraa non lo yadoo.

⁷ Rnee Dios lo Xtiidz me, quiambëzd me dien peraa gun miech, dien peraa cogon zho lo me, sinque mine racladz me guien zho yquia zdoo zho samiech zho. Tel niaca mine nli rien to min co, zien to gdziibdölde to zha ne rapd dol. ⁸ Gacnan to ganle naa ne nac naa Mgui ne pxeel Dios, naa rnabey dze rii, nanpaa naa pe nonguiel gac.

*Biac tib mgui ne mband tib nia
(Mr. 3:1-6; Lc. 6:6-11)*

⁹ Bded ga, gol stib dze ne rdziiladz zho lo dziina, güey Jesús len yadoo win ne zob lad guiedz co. ¹⁰ Lad grë miech ne ndxie len yadoo co, no tib mgui ne mband tib nia; porque laa zha farisé bnabdiidzlaque lo me dien pe nonguiela gunguiac me miech dze ne rdziiladz zho lo dziin. Sca bnabdiidz zho, sac quiaguib zho dien pe yquiaaqui zho me tsiezo zho me lo wxtis.

¹¹ Dzigo pquiab me rëb me lo zho:

—Togase dien, zha run to zeene lëëtse dze rii rietsobe tib xpëcwxil to tib len blë nroob, led zëëb lëë rie to riebee to ma? ¹² Tel sca rquia zdoo to mëcwxil, igolguien ganle mazdraa gon non miech lo tib mëcwxil! Gacxe waa ible nonguiela gun ne xyudar samiech ne, niicle maase dze nda nac dze co.

¹³ Dzigo rëbchaa me lo mgui ne në nia ga:

—iBzigaa nia luu!

Zigne bzigaa mgui nia mgui, biacgazha, biaana zig nac stib mine ndaantaque ga.

¹⁴ Grë zha farisé co, zigne briece zho ga laa zho psilo bnediidz dien zha gdeeda diidz gut zho Jesús. ¹⁵ Bien Jesús sca no guic zho, dzigo mazd briece me ga. Miech guizhiu ne zienał zhtis me, grëse men rzacne ne zienał ga, beenguiac me zho; ¹⁶ per pso me diidz lo zho, choot lo gzodiidz zhow.

¹⁷ Ga briecequia mine pquiaa Isá, tib men ne biadteed xtiidz Dios padzeela, zeene rëb me:

¹⁸ Lëë men rii bzooblo naa gun xtsin naa, rleynie naa me, rzac zdoo naa grë ncuuaane run me.

Zded naa zhiEspiritu naa gacnie me, me nac men ne cxobnen xtidz naa lo grëse miech.

¹⁹ Tilnied me miech, sedzd yan me lo zho, sod me ro nëz gopstie me.

²⁰ Grë zha ne gzhe gzhele rac, zig tib goobgui ne quiaxweele, zig tib lë guier ne noyüidiele,

csand me zdoo zho;

zha ne mban rac lo xliaadz zho, csaand me zho.

Min co toxco me, haxta gan me grëse miech gacnan mine nac diidzli, ni tsienał zhow.

²¹ Haxta zeene gan me ye grë zha ne nacdraa zha Israel, laa zho gnalo me.

Rëb zho mendox nacnie Jesús

(Mr. 3:20-30; Lc. 6:43-45; 11:14-23; 12:10)

²² Dzigo güeynie zho tib mgui lo Jesús rold lo mgui ni gacdaque gnee mgui, sac nosacsi mendox mgui. Znuse beenguiac me mgui, gagazh psilo gon mgui, psilo bnee mgui.

²³ Grë miech ne ndxie lo me ga, per nli bzee zdoo zho, rnee zho:

—iBay pe lëë men qui naye nac Men ne zëëble diidz ga cxeel Dios!

²⁴ Zeene gon zha farisé sca rnee grë miech co, rzachaa zdoo zho rnee zho: “Pe Dios nazho cxeel me, ma ne rnabey lo mendox ma co nacnie me, gane rrielo runcxoon me mendox.”

²⁵ Bien Jesús sca rza guic zho, dzigo rëbchaa me lo zho:

—iNcuuaane gacd gon rnee to! Tel tib wxtis nadien lëëque zha ne nacnie zho csilo tilnie zho, iñiacxe zac gnabey zho? Tib guiedza, tel lëëque zha guiedz co tilnie menlad zho, led znuse lozh guiedz co; tib diigaa miecha, tel lëëque zha tilnie menlidz zho, iñiacxe nitlod dii co? ²⁶ Scaque mendox nagon, telne lëëque lëë ma guncxoon samendox ma, ipe nale na bnitlo ma! ²⁷ Nana ne squi rnee to

Beelzebú nacie naa gane rrieelo runcxoon naa mendox, ¿zha ne nacgrè to dzigo, cho nacie zho ne ye zho runcxoon ma? Gase naganle rlu dolldox i quiaayun to, squi rnee to. ²⁸ Sanguè tel naa zhiEspíritu Dios nacie naa gane runcxoon naa mendox, ni ga rlu ganle laa Dios psilo quianabeyle nu.

²⁹ ¡Masaque nac mendox zig tib zha ne no xfuers, zha no gacladz cuee grè ncuaaane no lidz zha co, none cxidoogazh zho! ³⁰ Tel mendoxa rlèènie ma naa, ni nanle to ganle zha ne rlèè lo ne, gacnied zho ne.

³¹⁻³² 'Gacnan to ganle, grèse dol ne run miech, grè tel zha rguie zho, rdzibdee zho, niicle tel haxta gneenè zho naa, bii zuñ Dios zho perdon min co; sangue zha ne gneenè zhiEspíritu me, ib gundraa me zho perdon.

³³ 'Nanle to ganle zig nac yag nex, miñe nac yag, min co nac nex ne rdeeda. Tel yag wena nex wen rquia low, togo yag ncuangaaw, nex ncuanaaque rquia low. ³⁴ ¡Scaque to nagon zhin mendox! ¿Zha nan to nadien gac to miech wen, tel desde zdoo to ntseeb? Miech ntseeb to gane squi rzè xtiidz to, sac gon, igrèse diidz ne rrieer ro miech, zdoo zho rzaw! ³⁵ Gacxe waa, zha ne mbe zdoo, niapse diidz wen, diidz ndooladz nac xtiidz zho. Sanguè zha ne ntseeb zdoo, niapse diidz ntseeb, niapse diidznè rrieche ro zho. ³⁶ Ni gal dze ne gon gun Dios guielwxtis, ib tedsof zunquizh me miech tib tib diidz ntseeb, tib tib diidznè ne sca rrieer ro zho. ³⁷ Sac gon zigne rzè xtiidz zho niina, min co cueequia zho gal dze co, o mincogaa cteedquie zho.

*Racladz zha farisé gan zho milagr
(Mr. 3:31-35; 8:12; Lc. 8:19-21; 11:24-26, 29-32)*

³⁸ Tib dze wbig zla zha farisé lo Jesús gza zho zla maistr ley, rëb zho lo me:

—Maestro, racladz no dzian no gun luu tib milagr, milagr ne glu nli Dios pxeel luu.

³⁹ Pquiab me rëb me lo zho:

—Nazdpaa ntseeb to, squitaa gocndip zdoo to nöz lo Dios, ¿zha nacraa milagr ne racladz to gan to? ⁴⁰ Stibaque milagr gon gan to, lëè min co gac zeen gal dze ne laa Mgui ne pxeel Dios, tso len liu tson dze, tson guieel zigne bio Jonás len mel nroob co tson dze ni tson guieel. ⁴¹ Ni gal dze ne gon gun Dios xquielwxtis me, ib steedquie zha Nínive miech ntseeb ne nac to i; sac gon zeene güeynee Jonás lo zho, grèse zho psaan xquielntseeb zho wbig zho nöz lo Dios, laa to nède to gon to diidz niicle ne lo to nu zo tib men ne mazdraa non lo Jonás. ⁴² Scaque rein ne bzob nöz Sabá, steedquie me to gal dze co, sac tel rein co golwi ganle pa lo guidzliu ne brieer me biaadgan me rey Salomón, biadquiaadiag me grè xtiidz Salomón. Ni to

lo to nu zo men ne mazdraa non lo Salomón, ni ib ronde to xtiidz me.

⁴³ 'Telne csaande to xquielntseeb to i gon, low lozh to. Sac to zig bzhaac tib zha ne psacsi mendox. Zeene brieer ma zdoo zho, güey ma güeyquianzè ma grè dan zit güeyguib ma dien pa cuèz ma. Gonse ma rdziel zaatne cuèz ma, ⁴⁴ rëb ma: "Mazd laa naa gbireque guia naa zaatne brie naa ga." Zeene biire ma bdzin ma zdoo zha co, gon ma nroob lugar no, pale tib yu dets, ⁴⁵ nacne güeyaque ma güeyxi ma zgzadz samendox ma, ma ne mazdraa ntseeb blèznie ma zdoo zha co. ¡Dzigole mazdraa mban biaan zha co, lèdlegaa zigne goc zho glo! Scadaa nagon gdzieelo to.

⁴⁶ Laa me bii noneeque, zeene laa xniaa me ni zha bets me bdzin, racladz zho gzodidznie zho me. Per brieelod nözèb zho haxta len yu, sac scataa miech guizhiu ne ndxie lo me ga. ⁴⁷ Dzigo rëb tib zho lo zha:

—Laa xniaa luu gon ni zha bets luu quiambéz luu nöz ley, racladz zho gzodidznie zho luu.

⁴⁸ Pquiab me rëb me:

—¿Xnia naa ye, bets naa ye?

⁴⁹ Blis nia me, blu me grè xpèèdscuel me, dzigo rëbchaa me:

—Zha ne gon nac zig zha rii, lëè xnia naa ga, lëè bets naa ga. ⁵⁰ ¡Sac grèse zha ne run miñe rnabey Pxoos naa men ne zob gbaa, grèse zha co nac bets naa, nac bzian naa, nac xnia naa!

13

Nac Xtiidz Dios zig zhoxtil

(Mr. 4:1-20; Lc. 8:4-15)

¹ Blozh ga brieer Jesús güey me ro nisdoos. Ga zob me, ² zeene gon me nzian miech ne nocaals lo me ga, nacne bieper me güeysof me tib len barcw zo gax ro nis co, psilo me pseed me zho.

³⁻⁴ Ndal grè ncuaaane pseed me zho, per niapse con cuent rnee mew lo zho. Lëè tib cuent ne bzodiidz me ga nu, rëb me:

—Tib zha name güey gon zhoxtil. Zeene laa zho quialaal zhoob co, now bliaal gax ro nöz, now bliaal lad quie, now bliaal len yag guiets. Miñe bliaal gax ro nöz ga, güey grè mguin znuse dow maw. ⁵ Miñe bliaal zaatne nac lad quie, znuse znuse blana, ⁶ per zeene laa lo ngbidz brieer, znusaque bgoola, bidz-gaw; sac guien nroob low. ⁷ Miñe bliaal zaatne nac len yag guiets co, zeene laa yag guiets pxii, bnitlogaw. ⁸ Sanguè miñe bliaal zaatne nac lo liu naal, blana, brooba ni goca; lo tib tib zhoob co no zhimziona brieer galptsii zhoob, now brieer tsonkala, nogaaw brieer haxta tib gayoow.

⁹ Blozh ga, rëbchaa me:

—Zha ne racladz guien miñe rne naa nu, yquiaadiag zhow.

¹⁰ Zeene laa grë miech co zey, dzigo wbig xpëëdsuel me bñabdiidz zho lo me dien pe nac ne sca niapse con cuent rseed me grë miech. ¹¹ Pquiab me rëb me:

—Tel to, Dioszhal rlu lo to zha rnabey me, niicle ncuuaane mazdraa nguetsa; laa grëraa miech ne gard gbig lo me, grielod guien zhow. ¹² Sac zha ne noxcole dien zha rnabey me, zdeedraa me guielbiini lo zho guien zhow, laa zha ne noxcoda, mine riense zho, stiche mew. ¹³ Sca rseed naa zho parne tsoguc zho zha rnabey Dios, per nac zho niicle nzhal lo zho rwi zho, per peet ranð zho; niicle nzhal diag zho per peet rond zho; ib peet riend zho. ¹⁴ Lëë mine nac zho i bzeet Isá, zeene znu rëb me:

Nac miech qui, niicle peraa ron zho, per peet riend zho;

niicle rwiraa zho, per peet ranð zho.

¹⁵ Ne nliipaa miech nad, miech ndip zdoo nac zho,

rrieequia ntse zho diag zho, ntse zho lo zho; parne peet gond zho, peet gand zho.

Ib riend zho zha gbig zho lo naa, ygab zho xnëz naa, parne csilaa naa zho.

¹⁶ 'Sangue to —rëb Jesús lo zho—. ¡Dichos to porne rien to pe ran to, ni riengaa to mine ron to! ¹⁷ Blactaa zha ne biadteed xtiidz Dios padzeela, blactaa zha ne güeynal mine nac diidzli, bzoobladz zho nian zho grë ncuuaane ran to niina, per bgaad zho nian zhow; bzoobladz zho nquiaadiag zho grë ncuuaane noquiaadiag to, per bgaad zho nion zhow.

¹⁸ 'Golquiaadiag sca ganle zha nac xcuent zha ne güey gon ga. ¹⁹ Ro nëz ne sca bliiaal zhoob co, sca nac palal miech ne riepaa zha ne rienee Xtiidz Dios lo zho, per rioguid zhow, rlozh ga rdzinaque mendox, rietiche ma tel palalse mine rien zho. ²⁰ Lad quie ne bliiaal spalal zhoob co, sca nac grë zha ne rley rcaania Xtiidz Dios; ²¹ per led dib zdood zho rcaania zhow, gane zeene laa miech rsilo rlëë lo zho, laa miech rtsidil zho porne rililadz zhow, rsaanga zhow. ²² Nogaa zho nac zig nac len yag guiets co. Rquiaadiag zho Xtiidz Dios, per rsilo zho lel grë ncuuaane no lo guidzliu rii mazdraa rionie guic zho, rquidie grë dimi zho. Grë ncuuaane co rioxcoraa zho, laa ne tsonie Xtiidz Dios guic zho, min co rquiaqui ib rund zho mine rnabey me. ²³ Laa liu naal ne bliiaal mine scataa goc ga, sca nac grë zha ne dib zdoo rquiaadiag Xtiidz Dios, rien zho zha naca, ni rban zhow zigne rnabeya. Rrieequia grë ncuuaane run zho, no zho nac zig mzion ne briece galptsii zhoob ga, no zho nac zig mine briece tsongala, nogaa zho nac zig mine briece tib gayoow ga.

*Zha nac xquielrnabey Dios
(Mr. 4:30-34; Lc. 13:18-21)*

²⁴ Biire pcaalsa miech lo me stib, dzigo psiloque me pseed me zho con stib cuent, rëb me:

—Ziaad gac xquielrnabey Dios lo guidzliu rii zig bzhaac tib men ne gon zhoobxtil. Niapse zhoob wen, zhoob nal gon me, ²⁵ per no tib zha ne rlëë lo me, gol tib pcow liu, horne grëse miech nixguies, güey zho güeylaal zho xmidz guizh ncuuaan zaatne gon me.

²⁶ 'Zeene laa zhoobxtil co psilo blan mzion, hor coraa blu laa guizh ncuuaan co no lada. ²⁷ Grë zha ne quia xtsiin me, zeene gon zhow güey zho rëb zho lo me: "Tebaa gan luu ganle, dipse lad xoob luu zëëb guizh ncuuaan, ¿dieen pa brieewe gocbniw ga?" ²⁸ Dzigo rëb me: "Rien naa no cho tib zha ne rlëë lo naa, zha co been dziin co."

'Gocladz zho, hor cogazh nielaadz zhow per bzhiguield me, ²⁹ rëb me lo zho: "Tsielaadzde tow, sac tel glaadz tow niina ye zhoobxtil gliaadzniew. ³⁰ Golsaan sca zëëba ga, na zeene laa wlaap gac, hor co gnabey naa zha ne quiits zhoob, ctopgazh zhow gdziin zhow tib lad tseca; lozhraa ga quiits zho zhoob, tsasa ga, glansow ro yu."

³¹ Blozh ga bzeet me midz moxtaz, rëb me:

—Nac xquielrnabey Dios zig nac tib midz moxtaz ne ran miech dan rii. Nan to ganle midz moxtaz nac midz ne mazdraa win, ³² ni tel gacbniw, rooba ni lëëw roobraa lo grë guizh ne ran zho ro yu, raca lal tib yag nex, haxta rdzin grë mguin rzhixcuuaa ma zhiptsieez ma lo grë zhicwa.

³³ Rëbaque me:

—Nac xquielrnabey Dios zig nac ncobi ne rquiaa men wnaa lad ncob ne riaa guietxtil. Niipaque ncobi riots tson lmud rin, ni dib nace ncob co rzibe.

³⁴ Grëse mine pseed Jesús grë miech co, niapse con cuent bnee mew lo zho. ³⁵ Ga brieequia mine bzeet zha ne biadteed xtiidz Dios padzeela, zeene rëb zho: "Niapse con cuent cseed naa miech, sca gnee naa lo zho grëtaa ncuuaane gard gacnan miech wlal ne bre guidzliu."

Zha nac xcuent guizh ncuuaan co

³⁶ Blozhse bnee Jesús lo grë miech co guey zho, yequ me laa me zey gza xpëëdsuel me. Bdzin zho ro yu, ga bnab zho lo me siguel me gnee me lo zho dien zha nac xcuent guizh ncuuaan ne bzeet me ga. ³⁷ Dzigo rëbchaa me lo zho:

—Golgonaa sca, znu gon nac cuent co. Rrieequia gon naa ga nac men ne gon zhoob co. ³⁸ Liu ne bniaaw ga, nac lo guidzliu, zhoobxtil co nac grë miech ne nole xnëz Dios, laa guizh ncuuaan co nac grë zha ne no lадznia mendox. ³⁹ Zha ne güeygan guizh ncuuaan co, lëë mendox ga. Dze lo wlaap co, gac dze ne gun Dios xquielwxtis me, zha ne tsie wlaap ga, lëë anjl ga. ⁴⁰ Ni zigne

sca cuee zho guizh ncuuan co lad zhoxbtil, gzëëg zhow, scapaa nagon gal dze ne gac xquielwxtis Dios, ⁴¹ sxeļ naa grë xanjł naa tsie zho tsiebee zho grë zha ntseeb, zha ne sca runctal xtol grëraa miech, lad zha ne no xnëz naa. ⁴² jGrëse zha ntseeb co, hor co laa zho guey lo guidox ne rieguial zho! Ga tso zho goonnë zho, haxta gow lay zho lo guielnëdox co. ⁴³ Laa grë zha ne güeynal mine nac diidzli, zha co gdziņ zaatne rnabey Pxoż naa, masaque zig xbiini ngbidz glu zho ga. jZha ne racladz guiena yquiaadiag zhow!

⁴⁴ Ziaad gac xquielrnabey Dios zig tib ncuuañ non ne noliu tib lo xcuaa miech. Zha ne gdziel tib ncuuañe sca non, ib ted-sod zie zho sto zho grëse ncuuañe rap zho griece dimi si zho liu co, parne guñcheñ zho ncuuañ non co.

⁴⁵ Zha ne rzëëb lo xquielrnabey Dios ziaad gac zho zig tib zha ne rzi quie perl mine mazdraa niazh. ⁴⁶ Zeene ron zho pa no tib perl co, rto zho grëse ncuuañe rap zho, rie zho rzi zhow.

⁴⁷ Nacaque xquielrnabey Dios, zig tib guieñ nroob ne rgaam meļ niina, zeene rsëëb ngooz meļ lo nis grë lose meļ rtopa. ⁴⁸ Rlozhse riodzëw, dzigo rbeequia zhow ro nis, garaa rzob zho rbe zho grë meļ co; ma ne rquiin laa tib chicuid zole rio ma, laa ma ne rquiind rsëëb zho. ⁴⁹ Scapaa nagon gac miech gal dze ne guñ Dios xquielwxtis me, ziaad grë xanjł me cuee zho grë zha ntseeb lo zha ne no xnëz me, ⁵⁰ tsieroñ zho zho lo guidox ne rieguial zho. Ga tso zho goonnë zho, haxta gow lay zho lo guielnëdox co.

⁵¹ Blozhse ga, rëb me lo zho:
—jPe bieñ to na zha nac grë mine blozh bne naa lo to nu?

Grëse zho pquiab rëb zho:

—Bieñ now.

⁵² Dzigo rëbchaa me:

—Tib zha ne rienle zha nac grë ley ne psañ Moisés, ni squi guieñ zho zha nac zhi-wseed Dios mine zialnie naa niina, masaque nac zho zig tib zha gol ne quanie chop lo ncuuañ non lidz zho, quanie zho grë miñ gol-le ni quaniequegaa zho miñ cub.

Güey Jesús ladz me

(Mr. 6:1-6; Lc. 4:16-30)

⁵³ Blozhse sca bzodiidz me grë cuent co lo zho, laa me briece ga zie me nëz ladz me.

⁵⁴ Bdziņ me ga güey me yadoo, psilo me pseed me grë miech co. Per nli rzee zdoos zho ron zho grë mine rnee me, rnabdiidzla zho rnee zho:

—jPazhe waa squitaa pseed meñ qui? jZha nac guielbiini ne squitaa rap me i, ne rnee miech ndal grë milagr ne ruñ me? ⁵⁵ Tib zhinse ngurëeyag name nac me. Led lëë xingan Marí i, bets me name nac Jacob, nac

José, nac Simón ni Judas; ⁵⁶ grë bzian mew, nu no zho grë zho. jPa dzigo güey me wseed qui?

⁵⁷ Ib beencaasd zho me, haxta rlëë zho lo me. Zeene gon me sca rac zho, rëbchaa me lo zho:

—Zha ne rteed xtiidz Dios, mazd wen rnee miech lo zho stib dan, stib guiedz, lëdle ladz zho ni menlidz zho ni menladz zho nëd gunbey zho.

⁵⁸ Beend me nzian milagr ga, sac sca ndip zdoos grë miech co ib nëd zho nliadz zho cho nac me.

14

Gut Juan Bautist

(Mr. 6:14-29; Lc. 9:7-9)

¹ Len dze co bin rey Herod (meñ ne rnabey Galilé) grë ncuuañe ruñ Jesús, sac tel pa lotaaw zëëb xtiidz me; ² dzigo rëb Herod lo grë zha ne ruñ dziin lo me:

—Rieñ naa lëë Juan Bautist ga quiaynu grë miñ co, segur brieaban me.

³ Sca rnee Herod sac nanwen me zha been me Juan. Me bnabey bgaa Juan bzoob zho Juan caden bio Juan ladzguiib, ⁴ loxaque ne rnee Juan lo me nonguielga la lëëque Herodí ptsieelnia me, sac tsieelpaa bets me Lip nac Herodí. ⁵ Gocladz Herod niut me Juan, per bdzieb me menguedz, sac rleynie zho Juan, rien zho xtiidz Dios ziadteed Juan lo miech.

⁶ Laa tibtaa dzew, lëëtaque noyac zhilni Herod dze ne bloozh me stib iz, bded tib xindzoop Herodí squi ndxie grë zha ne zobnie me psilo ndzoop biee ndzoop. Bdziladz me gon me zha biee ndzoop, ⁷ haxta briece ro me rëb me: “Ncuuañe gacladztaa luu gnab luu, znedz naaw.” ⁸ Per glole pquiil Herodí ndzoop, nacne rëb ndzoop lo me: “Mine racladz naa, xoob guic Juan tib len bandej gneedz luuw lo naa niinagazh.”

⁹⁻¹⁰ Zeene bin Herod sca rëb ndzoop, mbanse rac me; per rdeetraaw diidz niab me grieloda, sac grëse zha ne zobnie me ga, bin zho rëb me zdeed me ncuuañe gnabtaa ndzoop. Dzigo race me pxeel me zha ne güeychug guic Juan len ladzguiib. ¹¹ Zeene wbire zho, zhoobse guic Juan tib len bandej bdeed zhow lo ndzoop, dzigo güey ndzoop güeydeed ndzoopa lo xniaa ndzoop.

¹² Zeene gocnañ xpëëdsuel Juana, güey zho güeylis zho me ga güeyqueets zho me. Blozh ga güeyzodiidz zho lo Jesús zha bzhaac me.

Bguiaañ Jesús gaay miļ miech

(Mr. 6:30-44; Lc. 9:10-17; Jn. 6:1-14)

¹³ Zeene bin Jesús sca bzhaac Juan, dzigo briece me ga bzëëb me barcw zie me tib zaatne guieñd miech. Per znuse bieñ diidza, nzian grë guiedz co zha ne gocnañ, tib

ro nis güey zho, glole zho bdziñ zaatne no gdziñ me ga.

¹⁴ Laa me noyet leñ barcw, zeene blis lo me gon me laa grë miech guizhiu co ndxie ga; pquia zdoo me zho, beenguiaic me grë mguidz ne zienie zho.

¹⁵ Laa dze ziedzelew, wbig xpëëdsuel me rëb zho lo me:

—Mazd gudz lo grë miech qui guey zho na, zeena guiob tsie zho grë guiedz win ne ndxie gax i tsiesi zho ncuaañe gow zho; sac gon laa dze bdzele.

¹⁶ Pquiah me rëb me lo zho:

—¿Pe nacne guey zho squise? To none gdeed ncuaañe gow zho.

¹⁷ Rëbchaa zho:

—¿Per pe diñ yguiaañ no zho? Pe rnase gaay guietxtil ni chop meļ ne ziaadnie no nu, lo grëtaa miech qui.

¹⁸ Dzigo bnabey me zho güeynie zho guietxtil co, güeynie zho meļ co lo me, ¹⁹ ni bnabey me grë miech co bzob zho lo grë guizh nguia ne zëëb ga. Horco bzhen me gza guietxtil co ni grop meļ co, blis lo me nëz gbaa, bdeed me xquizh lo Dios. Blozhse bdeed me xquizh, beengroļ me gza guietxtil co, meļ co ne, zigse rdeed mew lo xpëëdsuel me scase scase bdiiz zhow lo grë miech co. ²⁰⁻²¹ Grëse zho dow zho haxta zaatne bieltaa zdoo zho. Miech tafa, zha bguise rgaazig gaay mil, nandragaa grë meñ wnaa, grë mëëdlaas; ni zeene blozh dow zho, scase ncuaañe nroob biaan, biodzë tsiipchop chicuid bio grë guietxtil co, bio grë meļ co.

Rzë Jesús lo nisdo

(Mr. 6:45-56; Jn. 6:16-21)

²² Zeene blozh ga, bnabey Jesús xpëëdsuel me bzëëb zho leñ barcw, zeena zienerga zho tedquia zho stib nëz ro nis co; laa me bii blëz ga, nozonëz me grë miech co. ²³ Blozhse bzonëz me zho, dzigo güey me tib guic gui zob gax ga, güeyzodiidnie me Dios, tipse me zo ga laa liu pcow.

²⁴ Horco laa barcw ne zie xpëëdsuel me ga no lo nis co, ib gacd csëëniob zhow, sac rriee me rtsire mew, nëzrii nëzrec raca lo nis.

²⁵ Merle guini liuw, tibaque zeene laa me bdziñ zaatne zie zho ga, tib lo nis co ziezë me.

²⁶ Zeene gon zho laa meñ co sca ziaad-zë lo nis co, bdzieb zho, broptsie zho rnee zho:

—¿Tib ndziin i gon ziaad i!

²⁷ Dzigo bnee me lo zho rëb me:

—¿Gdziebde to, naa ziaļ nu!

²⁸⁻²⁹ Pquiah Pedr rëb Pedr:

—Telne luu i ziaad i, bneedz diidz së naa lo nis glanso naa lo luu i.

—¿Dë sca! —rëb me.

Lëëled biet Pedr leñ barcw, laa Pedr ziezële lo nis co ³⁰ zeene gon Pedr scataa rliis me low, bdzieb Pedr. Tibaque zeene

biñ Pedr laa Pedr nodedquiele low, hor co broptsiedan Pedr, rbedz Pedr me, tsiebee me Pedr ga.

³¹ Dzigo wbig me bzhen me nia Pedr, bzoli me Pedr lo nis co.

—¿Aque luu gon Pedr! —rëb me—. ¿Pe nacne gocchop guic luu? ¿Gard gon gliladz wen luu cho nac naa?

³² Zeene laa me biepnie Pedr leñ barcw, laa me co blëz. ³³ Grëraa zha ne no leñ barcw ga, rleynie zho me, rzee zdoo zho rnee zho:

—¿Nasi nagon ndion no nli Xpëëd Dios nac luu!

³⁴ Zeene bdziñ zho stib nëz ro nis co, zatne rnee zho Genesaret, ga biet zho barcw.

³⁵ Grë miech co zeene gocnañ zho laa me bdziñ ga, znuse znuse pxoon zho diidz grëraa guiedz ne ndxie gax ga. Dzigo brieer grë miech co, güeynie zho grë meñ rzacné lo me, ³⁶ rnab zho lo me siguiel me maase ni xabse me xen grë meñ rzacné co. Grëse zha ne bzhen ni xab me, biac zho.

15

Ncuaañe runctal xtoļ miech

(Mr. 7:1-23)

¹ Tib dze, bdziñ bla zha farisé ni zla maistr ley ne ziaad nëz Jerusalén, lo Jesús; rëb zho lo me:

² —¿Pe nacne diñ zienald xpëëdsuel luu miñe blu xmengol ne, pe nacne zeene laa zho row, ib rguuibd zho nia zho zigne nopaa tsara?

³ Pquiah me rëb me lo zho:

—¿To waa, pe nacne quiaquiti to xley Dios? Golguien ganle laa ne gun to miñe rnabey Dios zigne naca, leļ ncuaañe blu xmengol to, miñ co zienal to.

⁴ Led znu gon rnee lo xley Dios: “Gon pxoz luu, gon xniaa luu”, ni rneew: “Zha ne quie pxoz, quiegaa zho xniaa zho, ib none guet zho.” ⁵ Laa to gon rnee to: “Peet nacda gund zho xyudar xmengol zho niicle no me liaadz, totsaque gdeed zho gon.”

⁶ Tib lad rsan to xley Dios, miñe blu xmengol to miñ co noxcoraa to.

⁷ ¿Loxaque guielwquidie qui no to! Rquiaalo to miech wen nac to, per lëëpaa miñe run to i ga bzeet Isá zeene rëb me:

⁸ Grë miech rii, rquiaalose zho runnon zho naa,

rond zho diidz gun zho miñe rnabey naa.

⁹ Zhlēse nac grë ncuaañe run zho, rnee zho laa zho riaadgan naa;

sac niapse guicle zho riab grë wseed ne quialu zho lo miech.

¹⁰ Dzigo bnee me lo grë miech ne ndxie lo me ga, rëb me:

—Golquiaadiag miñe gni naa lo to nu, ni goltsoxco guien to zha naca. ¹¹ Golgacnañ ganle, grë ncuaañe rdziñ zdoo miech, led miñcod runctal xtoļ zho; sinque grë ncuaañe

ntseeb ne rza guic zho, diidz ntseeb ne rriee ro zho, min co runctal xtol zho.

¹² Horco wbig xpëedsuel me, rëb zho:

—¿Pe bien luu ganle blëe zha farisé gon zho sca rëb luu lo zho?

¹³ Pquiab me rëb me:

—Grëse yag ne squi beenbnid PxoZ naa men ne zob gbaa, ib none laaw gliaadz zolo zolow. ¹⁴ Golsaan zho, nli zha noseed miech per nac zho zig nac zha ne rold lo. Ni nanle to ganle, tel tib zha ne sca roldle lo ni xenaque zho nia stib zha ne ran, zaatne nac tib len blë, ib tedsod grop xcuaa zho tsietsobe ga.

¹⁵ Bdedse ga, wbig Pedr lo me rëb Pedr:

—Bzhiguel bnë lo no dien zha nac diidz ne në luu ga, ne rnee luu led ncuaañe rowd miech runctal xtol zho.

¹⁶ Pquiab me rëb me:

—¿Pe niicle to riendaquew dzigo lëe? ¹⁷ ¿Pe riende to grë ncuaañe row miech, led mincod runctal xtol zho? Sac grë ncuaañe row zho rdzinda len zdoomban zho, zhaa zaatne rdzina; tib rietedsew xcuerp zho, rlozh ga rrieehaw. ¹⁸ Sangue grë diidznë ne rriee ro zho, zdoomban zho ga rzaw, ni lëe min co nac min runctal xtol zho. ¹⁹ Zdoomban zho nac zaatne rza grë ncuaañe ntseeb ne run zho, zig nac:

zeene rio zho grë zhgab yozh,
zeene rut zho samiech zho,
zeene rionie zho zha ne nole tsiel,
zeene rionie zho zha ne nacd tsiel zho,
zeene run zho guielgbaan,
zeene lega rnexuu zho samiech zho,
zeene rneenë zho samiech zho.

²⁰ Grë ncuaañe ntseeb co nagon nac mine runctal xtol miech, gunctald zho xtol zho niicle tsard nia zho zigne nacpaa grë zhiwseed mengol.

*Biac xpëed tib wnaa zit
(Mr. 7:24-30)*

²¹ Ga briece Jesús, güey me haxta nëz Tiro ni nëz Sidón.

²² Nëz co no me güey tib wnaa ne ziaad lo xti zha Canaan lo me, nguiedz zëeb tsi wnaa co rnab me lo Jesús siguiel Jesús tsiegunguaiac tib xpëdwanaa me nosacsi mendox. ²³ Per ib pquiabd Jesús lo xtiidz wnaa co, dzigo wbig xpëedsuel me, rëb zho:

—Mazd bzhiguel pquiaadiag mine rnee wnaa qui, bui ganle zha ncuetaa zëeb tsi me na! Me zhits ne.

²⁴ Pquiab Jesús rëb me:

—Ziald naa par gun naa xyudar zha zit, sinque laa PxoZ naa pxeel naa par gun naa xyudar grë zha Israel ne rzac zig grë mëcwxiiil ne zonziaa lo xbaxtor.

²⁵ Scaque nonee me laa wnaa co wbig pquitsgzhib lo me.

—Bzhiguel —rëb me—, been tib guielnzaac been xyudar naa.

²⁶ Rëbchaa Jesús lo me:

—Nonguielda gon, cob ne guiet ne no nia mëed gdeed new lo mëcw.

²⁷ —Nliw, scaw —pquiab wnaa co—, per niicle mëcwa name rsaanaque bizhuan ma rbig ma row ma mine rrieehaw nia mëed.

²⁸ Horco pquiab Jesús rëb me:

—¿Squiw nagon! ¿Rlu nli dib zdoo luu rnalo luu naa! Gacxe waa mine rnab luu i gun naa, niinagazh laaw gac.

Horcogazh biac xpëed wnaa co.

*Nzian miech ne beenguiac Jesús
(Mr. 8:1-10)*

²⁹ Nëz co whi Jesús bdzin me ro Nisdoo Galilé.

Ro nis co no me, miech guizhiu ne pcaalsa lo me. Tib dze gon me scataa nzian miech co, dzigo güey me güeysob me tib guic gui win zob gax ga. ³⁰ Ga zob me rdzin grë miech co rdzinnie zho grë zhimguidz zho lo me, no zho zienie grë zha ne në ni, no zho zienie grë zha ne rold lo, grë zha ne guiend tib nia, grë zha ne guiend tib ni, grë zha ngop, ni grëragaa zha ne rlan pe stib guielguidz; grëse zho beenguiac me.

³¹ ¿Ncuaañe gzee zdoo ne goc ga! Grë zha ne ni tib diidz gard gnee, per nli rley zho laa zho psilo rnee; grë zha ne guiend tib ni, guiend tib nia, laa ni zho laa nia zho biaan zigne no gaca; grë zha ne rgob ni, haxta rias zho laa ni zho goc-wen; grë zha ne rold lo, rlozhd gzee zdoo zho grë ncuaañe ran zho. Grëse miech ne ndxie ga, rzee zdoo zho, rley zho roolnie zho Dios.

³² Dzigo bredz me xpëedsuel me rëb me lo zho:

—Rquia zdoo naa grë miech rii. Nadzele rac tson ngbidz blanso zho lo ne nu, ni na quianiedraa zho pe gow zho. Telne squise gzonëz naa zho, nend pa lo zie zho nëz ycow zho.

³³ Pquiab zho rëb zho:

—¿Per pe yguiaa ne zho? ¿Pa guioxi ne guielwagw ne yquii grëtaa miech qui dan rii, naca zaatne guiend miech?

³⁴ Dzigo bnabdiidz me lo zho, rëb me:

—¿Bla guietxtil ziaadnie to i?

—Gadzaquew no —rëb zho—, ni chop tson mel win.

³⁵⁻³⁶ Dzigo bnabey me grëse miech co bzob zho lo liu. Blozh bzheñ me gza gadz guietxtil co, ni gza mel co, bdeed me xquizh lo Dios; blozhse bdeed me xquizh, zigse rungröl me guietxtil co scase scase rdeed mew lo xpëedsuel me rguizh zhow lo grë miech co; scaque been me gza mel co.

³⁷⁻³⁸ Grëse miech co dow zho haxta zaatne bieltaa zdoo zho. Miech guizhiuw, zha bguise rgaa zho maase tap mil, nandragaa grë men wnaa, grë mëedlas; ni zeene blozh

ga bii biodzë gadz chicuid bio grë minë biaan.

³⁹ Blozhse bnee me lo grë miech co, blozhse bzonëz me zho, dzigo laa me bzëëb len barcw zie ne nëz xtan zha Magdal.

16

*Gocladz zha farisé niungüet zho Jesús
(Mr 8:11-21; Lc. 12:54-56)*

¹ Magdal no Jesús, bdziñ bla zha farisé ni zla zha saducé lo me, gocladz zho niungüet zho me dien pe nxind me tib diidz, pe tib ncuaañe nonguielḡgaa niun me. Rquiaaalo zho rnab zho lo me guñ me pe tib milagr, zeena gliladz zho nli Dios pxeel me.

²⁻³ Dzigo pquiab me rëb me lo zho:

—jPe nlipaa rnee to riende to zha nac grë ncuaañe noyac len dze riil! Zha zëëb dzigo runbey to pe rlu lo xcow. Zeene ran to rquia xcow nizhnie bdze dze, rienle to quiet stib dze co zriee lo ngbidz. Sil ne rangaa to quia xcow nizhnie, quia xcow nlaan zhan gbaa, rienle to guixoo guiab dze co. ⁴ Nazdpaa ntseeb to, squitaa gcondip zdoos to nëz lo Dios, zha rnaraa milagr ne racladz to gan to? Stibaque milagr gon gan to, tib minë gac zigne bzhaac Jonás.

Blozhse sca rëb me lo zho, zoque zho ga, ziega me.

⁵ Zeene briece zho ga, zoladzd xpëëdscuel me ney zho quietxtil ne niow zho. ⁶ Lega nacle psilo me nonee me lo zho, rëb me:

—Golguien gon, napaa noyab to lo zhincobi zha farisé, lo zhincobigaa zha saducé.

⁷ Zeene gon zho sca rëb me, rneechaa zho:

—Porne nagon ziaadnied ne quietxtil, gane squi rnee me lo ne.

⁸ Bien me sca nonee zho, dzigo rëb me lo zho:

—jGardaque lëë guien to cho nac naa! jPe nacle tso to zhizhgab quietxtil? ⁹ jNi lalnu lëë peet riende to! jPe rsoleadzde to zeene gaayaque quietxtil bguiaan ne gaay mil miech, bla chicuida biaan? ¹⁰ Scaque zeene gadzaque quietxtil ni bgaaw dow tap mil miech, jpe niicle min co rsoleadzdraa to? ¹¹ jZha nac dzigo rzac to quietxtil nozet naa? Golguien ganle zhincobi zha farisé, zhincobi zha saducé ni naa.

¹² Dzigoraa bien zho led ncobidpaa rzeet me, sinque rëb me lo zho gap zho cuidad lo zhiwseed zha farisé, lo zhiwseedgaa zha saducé.

*Bnee Pedr cho nac Jesús
(Mr 8:27-30; Lc. 9:18-21)*

¹³ Bdziñ Jesús nëz xtan zha Cesarea de Filipino grë xpëëdscuel me, nëz co no me bnabdiidz me lo zho rëb me:

—jCho dien ron to rnee miech nac naa?

¹⁴ Pquiab zho rëb zho:

—No zho rnee Juan Bautista, no zho rnee Lív, no zho rnee Jeremíw, men ne biadteed xtiidz Dios padzeela; nogaa zho rnee no cho stib men ne ziadteed xtiidz Diosa zig biaad zha ne biaad padzeela.

¹⁵ Dzigo rëb me lo zho:

—jTo waa? jCho rzac to nac naa?

¹⁶ Pquiab Pedr, rëb Pedr:

—jLuu nac Men ne zëëble diidz ga cxeel Dios! jXpëëd Dios nac luu!

¹⁷ Dzigo rëbchaa me:

—Dichos luu Simón (xingan Jonás) briece diidz qui ro luu, sac gon Pxoos naa men ne no gbaa, men co bneedz guielbiini qui lo luu, nacda ncuaañe cho miech nëw lo luu. ¹⁸ Ye naa gon niina laa naa gni ganle cho nac luu, luu nac zig tib quie, ni quie ne gon squi nac gzhixcuua naa xyadoo naa; tsod zha ne grieeo gnitlo yadoo co, per ni guielgut gnitloda. ¹⁹ Laa naa rzo luu, luu gnee Xtidz naa lo miech zeena gacnañ zho zha grieeo ygaa zho zaatne rnabey Dios; luu gac zig tib zha ne rey liow, tel zha cow, zha zac cxal ro yu, ni zha zac csiooga.

²⁰ Dzigo pso me diidz lo zho choot lo gneed zho, me nac Men ne zëëble diidz ga cxeel Dios.

*Bzeet Jesús zha guñ miech me
(Mr 8:31-9:1; Lc. 9:22-27)*

²¹ Len dze co psilo Jesús bzeet me lo xpëëdscuel me zha csacsi miech me. Rëb me nroob ncuaañe ceed zho me, zeene laa me tsie Jerusalén; grë zha non lo menguietz, grë pxoos ne rnabey, grë maistr ley, ible stsidil zho me ni haxta zut zho me; per zeene gac tson ngbidz gut me, laa me grieeban.

²² Gon Pedr zha rnee me, dzigo bredzaque Pedr me blisqui Pedr lo me dien pe nacle rnee me laa me guet. ²³ Zeene bin mew, zoque Pedr ga, biecw me rëb me:

—jBiche lo naa nu menodox! jLoxaque no luu par gungüet luu naa! Zienied guic luu minë rnabey Dios, sinque minë rleynie miech, min co zienie guic luu.

²⁴ Dzigo bnee me lo zho, rëb me:

—Zha ne racladz sëëb xnëz naa, none cueeladz zho zho, none lëb zho guiaadnañ zho minë rnabey naa, niicle tel min co yquiaaqui csacsi miech zho. Nodne yquia zdoos zho xquielmban zho, ²⁵ sac zha ne yquia zdoos xquielmban, lel znu nitlo zho; sangue zha ne sca cueeladz xquielmban porne no zho xnëz naa, ib zgaa zho tib guielmban ndzon ne gdziñd dze lozh. ²⁶ Zha ne zienie guic loxaque gapchen, jpa dien yquina lo zho, tel lëëw yquiaaqui guey zho gabil? jNiacle zrieeo gdziib zho dimi, laa zho len gabil? ²⁷ Naa ne nac naa Mgui ne pxeel Dios, zdziñ dze ne gbiire guial naa stib, guialnie naa grë xanj naa, glu naa ganle pa lotaa men nroob nac Pxoos naa; dze co

gded naa miñe tsieguial tib tib miech, tel zha wban zho. ²⁸ Ib tedsod lo grê zha ne ndxie nu niina, bii no zha ne gan ganle, zeene laa naa csilo gnabey lo guidzliu rii.

17

Bdzëëlo Jesús

(Mr. 9:2-13; Lc. 9:28-36)

¹ Goca xoop ngbidz, bredz Jesús Pedr, Jacob ni Juan bets Jacob güeynie me zho tib guic gui glaa.

² Guic gui co no zho, zeene gon zho laa me bdzëëlo. Masaque biinidoo rriee lo me, pale lo ngbidz; xab mew, per nli rquiab-niw, masaque biini ne rrona. ³ Tibaque zeene gon zho laa Moisés ni Lí meñ ne biad-teed xtiidz Dios padzeela, nozodiidznie me. ⁴ Rdzieb zho, lo dzeb co brieer ro Pedr rëb Pedr:

—Maestro, jtebaa zha grieelo guiaan ne nu! Telne racladz luu, na maase gzaa no tson yu yag xiid nu, tiba cuëz luu, tiba cuëz Moisés, stiba cuëz Lí.

⁵ Scaque nonee Pedr, zeene znuse pquia tib xcow ngali zaatne zo zho ga, masaque biini ne rron xcow co, lo xcow co bin zho zëëb tsi tib meñ co, rnee me:

—Lëë xpëëd naa i gon, rleynie naa me, rzac zdoo naa mine quiayun me. Miñe rnee me, golgona.

⁶ Mazdraa bdzieb zho bin zho sca rnee meñ co, lëëld pquitsgzhib zho haxta bdzin lo zho lo liu. ⁷ Dzigo wbig Jesús, pcaañnia me zho, rëb me:

—Golsoli, gdziebde to.

⁸ Zeene blis lo zho bui zho, mese zo ga, gondraa zho schop meñ co.

⁹ Blozhse ga, laa zho wbi ga. Cho gui co ziad-zëëbnie me zho, pso me diidz lo zho miñe gon zho ga, choot lo gzodiidz zhow, nieeda gal dze ne laa me brieeban.

¹⁰ Dzigo bnabdiidz zho lo me, rëb zho:

—¿Bay zha nacne rnee maistr ley, glo Lí no guiaad stib, dzigoraa guiaad Meñ ne zëëble diidz ga cxeel Dios?

¹¹ Rëbchaa me:

—Nliw, ible nacle diidz ne glo Lí guiad-seed miech gon zho xtiidz Dios. ¹² Ni gacnañ to ganle laa me biaadle, per beenbeyd miech me, lel psacsi zho me been zho me miñe gocladzttaa zho; ni ib tedsod gon, scaque csacsi zho Mgui ne pxeel Dios.

¹³ Zeene blozh sca rëb me, dzigo bien zho Juan Bautist ga rzeet me.

Biac tib mëëd ne nosacsi mendox

(Mr. 9:14-29; Lc. 9:37-43)

¹⁴ Zeene blozh biet zho cho gui co, gon zho miech guizhiu ndxie ga quiambëz Jesús. Lad co brieer tib mgui, wbig me lo Jesús, pquitsgzhib me lo Jesús, rëb me:

¹⁵ —Laa naa rnab lo luu, bzhiguiel beenguiac xpëëd naa, nrooble nosacsi guidz gutye win. Blactaa ziyobe win lo gui, ziyobe win lo nis ne. ¹⁶ Blansonie naa win lo xpëëdscuel luu nu, per rrieeelod zho gunguiac zho win.

¹⁷ Dzigo rëbchaa Jesús lo xpëëdscuel me:

—¿Pe na squitaa miech ntseeb nac to, ib nëde to gnalo to Dios! ¿Palal tiemp ne so naa gne naa lo to? ¿Ncuaañe cxeewdraa naa lo to squi nac to! ¿Goltënie mëëd qui nu!

¹⁸ Dzigo goctox Jesús lo mendox ne nosacsi mëëd co, benxcoon me ma, hor cogazh laa mëëd co biac.

¹⁹ Haxta wbiraa zho ga, wbig zho lo me bnabdiidz zho dien pe nacne brieelod zho niunxcoon zho mendox ne nosacsi mëëd co. ²⁰⁻²¹ Dzigo rëbchaa me:

—Brieelode to niunxcoon to ma, sacne rnalode to Dios. Tel niaca miñe rnalole to Dios siquier palal yeen, gzoob ne siquier lal tib midz moxtaz, niicxe ncuaañe mazdraa ngan gnab to lo me, zun mew; tsod ncuaañe grieelod gun to.

Bzeet Jesús laa miech csacsi me

(Mr. 9:30-32; Lc. 9:43-45)

²² Xtan zha Galilé no zho, tib dzew rëb me lo zho:

—Naa ne nac Mgui ne pxeel Dios, ib znaaz miech naa, ²³ haxta zut zho naa; per zeene gac tson ngbidz gut naa, zriebaan naa.

Zeene bin zho sca rnee me, bio zho guieñe, mbanse rac zho.

²⁴ Bdzin me guiedz Capernaum, loxaque bzëëb me lad guiedz, laa zha ne rtop dimi ne razh yadoo wbigle lo Pedr, bnabdiidz zho dien pe rguizh me dimi co. Pquiab Pedr rëb Pedr lo zho:

²⁵ —Rguizh mew, ¿pe nacne quizhd mew?

Zeene bdzin zho len yu ne rbëz me, gardle guiab Pedra lo me, glole me bnabdiidz rëb me lo Pedr:

—Zig nac dimi ne razh lo meñ ne nac rey dien, ¿pe ye xpëëd me rguizha, te loxaque zha zit rguizha ye?

²⁶ Pquiab Pedr rëb Pedr:

—Zha zitse rguizha.

—Nligaa sca naca —rëb Jesús—. Zha ne nac mëëd nodne quizh zho, ²⁷ per par guiabd zho rdziond ne diidz, güey güeyron xanzuel luu lo nis. Meñ ne glopaa ygaa low, bzheñ ma pxal ro ma, ga gdziel luu dimi; dimi co güeynie bdiizh miñe no dizh ne grop ne.

18

¿Cho nonraa?

(Mr. 9:33-37, 42-48; Lc. 9:46-48; 15:3-7; 17:1-3)

¹ Len dze co bnabdiidz xpëedsuel Jesús lo me, dien cho tib zho gac zha ne mazdraa gacnon lo grë zha ne no xnëz Dios.

² Dzigo bredz me tib mëëdbgui win, bzo me win glowtaa lo zho, ³ rëb me:

—Gneli naa lo to ganle, telne csaande to xquielntseeb to, telne gacnguudzladzde to, gac to zig mëëdwin rii, per ni xnëz Dios grieelod sëëb to. ⁴ Zha ne racladz gac zho zha non, none gac zho tib miech ndooladz, none gac zho zig tib mëëdla. ⁵ Miech ne gacnie zha ne sca nac, zha ne rleynie naa, rrieequia naale gac racnie zho.

⁶ Per miech ne yquuil zho gunctal zho xtol zho, jprobsaxe zha co! Mazd zhi guielnëw lo zho ygadoo tib quie molin zhobxtil yan zho tsieron zho zho nisdoo. ⁷ jNac lo guidzliu rii, runfalte guielntseeb low! Runfalte ncuaañe gunctal xtol miech, jper probsaxe zha ne yquuil zha ne nole xnëz naa, gunctal zho xtol zho!

⁸ Golguien telne tib nia to, tib nigaa to rquiaui runctal to xtol to, goltichegazha. Peet nacd maase tibaque ni to, tibaque nia to zob totsaque ygaa to guielmban ndzon ne gdziñd dze lozh, lëdle zob gropa ni laa to guey gabil, lo beldox ne gdziñd dze guiuu. ⁹ Scaque bziaalo to, mine rquiaui runctal to xtol to, goltichegazha, peet nacd maase tibaque lo to zob totsaque ygaa to guielmban ndzon ne gdziñd dze lozh, lëdle zob gropa ni laa to guey lo beldox ne nac gabil.

¹⁰ Ib gunde to csanwin to grëraa zha ne no xnëz naa, zha ne nac zha mban, sac gon non zho lo Dios, anjl ne quianap zho, tibaque zo me lo Pxoza naa men ne zob gbaa.

¹¹ Nziuu miech lo Dios, tel naa ne nac naa Mgui ne pxeel me, ib laa naa zial zialsilaa naa grë zha ne zonziaab lo me.

¹² Rzac Dios miech zig tib men ne rquianë zdoo xpëcwxiiil. Telne quianie zho tib gayoo ma, ni gziaab tib ma, led zëëb lëë rsan zho stapgal tsiimtap ma ne zo lo zho, rbire zho rieguib zho ma ne bziaab ga. ¹³ Zeene rdziel ma lo zho, rlozhd gleynie zho ma, lëë ma rac guielbley que grëraa xcompañer ma. ¹⁴ Scadaa nagon rzac Pxoza naa miech, grë zha ne nole xnëz me, ib racladz me gziaab zho.

¹⁵ Golguien sca, tib tib to zeene cho tib zha ne nacgrë to gun pe tib falt lo to, goltisie goltsienee lo zho; gropse to golzodiidz pe nac mine pxin zho. Telne siguiel zho guiaan to mpas, laa to beenle gan ga gneewen to stib.

¹⁶ Laa telne nëd zho, dzigo golguib tib zha ne së, chopgaa zha ne së gan ganle zha rac zho. ¹⁷ Tel niicle scaw nëdaque zho guiaan to mpas, dzigo mazd golguiab lo grëse zha ne nacgrë to gnee zho lo zho. Telne niicle xtiidz zha co nëd zho gon zho, dzigotaa mazd golsaan zho, sacdraa to bets to ga, golcuae

zho lad to, golzac zho zig rzac miech grë zha ne zienal guielntseeb.

¹⁸ Gneli naa lo to ganle, grëse zha ne gon xtiidz to zeene rnee to lo zho gac-wen zho, scagaa Dios scaania me zho; per zha ne gonda, ycaaniad me zho.

¹⁹ Ni racladz naa gacnan to ganle, grë zha ne no xnëz naa, niicle tib nëzaque zho, per telne tipse rac zho, ncuaañe gnabtaa zho lo Pxoza naa men ne zob gbaa, zdeed mew. ²⁰ Sac zeene rcaalsa zho roolnie zho naa, ga zo naa lo zho; niicle maase chopaque, tsonaque zho.

²¹ Dzigo wbig Pedr rëb Pedr lo me:

—Zha ne sca dzigo gun falt lo naa, çblataa vuelt no gun naa zho perdon? çGadztaaw lëë?

²² Pquiab me rëb me:

—Lëda gon Pedr, led loxaque gadzde vuelt. Tel blataa vuelt gun zho falt lo luu, none gun luu zho perdon.

Zha ne beend perdon

²³ Grë zha ne no xnëz Dios, ib none gun zho perdon samiech zho.

Tib rey name, tib dzew bredz me grë zha ne rquia dziin lo me, par dien zha quiauy zho dziin. ²⁴ Loxaque psilo me, zeene laa xcuent tib zha co blozh brie, nroob briequia zho lo me; ²⁵ par quizh zhow, peet nzhend zho. Dzigo bnabey me to zho grop tsieel zho, xpëed zho ne, ni grëse ncuaañe rap zho, parne grieeel gazh xquielqui zho. ²⁶ Zeene gon zho sca rëb me, pquitsgzhib zho lo me, rëb zho: “jBeen guielnzaac, gop tib paciens, naa dien zha gun naa quizh naa xquielqui naa lo luu!” ²⁷ Gon me zha rac zho, pquia zdoo me zho, psilaa me zho, beenquizhdaque me zho xquielqui zho.

²⁸ Loxaque brie zho ga, bdziel zho tib zha ne nzeëb palal yeen dimi lo zho, tib zha ne rquiaque xtsiin rey cow. Zigne gon zho zha co, zolinëz wbig zho bdie zho yan zho, rnab zho gagazh quizh zho xtimi zho. ²⁹ Dzigo pquitsgzhib zha co lo zho, rnab zho siguiel zho gap zho paciens, dien zha gacllo dimi co quizh zho. ³⁰ Pe nquiaadiag zho ga, bnab zho bio zha co ladzguib, haxta bdiizh zho dimi ne zëëb zho ga. ³¹ Grëraa zha ne rquia dziin lo rey co, zeen gocnan zhow, bdeednë zho, güey zho güeyzodiidz zhow lo me. ³² Zeene bin mew, bnabey me gocredz zho, goctox me lo zho rëb me: “jPe clas miech nac luu! Pe rsoladz luu zha rac luu bnab luu pquia zdoo naa luu, haxta beenquizhd naa luu guielquidox ne zëëb luu ga. ³³ çPe nacre pquiad zdoo luu zha co, zigne pquia zdoo naa luu?” ³⁴ Blëë me gon me sca been zho, bnabey me bio zho ladzguib, haxta blozh bdiizh zho grëse xquielqui zho.

³⁵ Scadaa nagon guṇ Pxoz naa to, teḷne gunde to samiech to perdon, teḷ pe nac falt ne guṇ zho lo to.

19

Zha ne rsëbtsieel

(Mr. 10:1-12; Lc. 16:18)

¹ Blozhse sca bnee Jesús lo zho, brieenie me zho ga güeyted zho grë guiedz ne ndxie xtan zha Judé, grë miṇe riaan nêz dan ro guubee Jordán, nêz ne rlan ngbidz. ² Miech guizhiu ne rreee grë guiedz co, rdziṇ lo me; grë meṇ rzacnê ne rdziṇnie zho, beṅguaiac me zho.

³ Ga no me, bdziṇ bla zha farisé gocladz zho niungüet zho me, par diṇ pe nxiṇd me tib diidz; bnabdiidz zho lo me rëb zho:

—Pe gnê luu diṇ, ¿pe wena csëbtsieel zha bgui ne gacladztaa csëbtsieel?

⁴ Pquiab me rëb me:

—¿Mod rande to zha zhobnee lo Xtiidz Dios? Lo co zhobnee ganle zeene psan me miech, tib nêz zho psan me, tib mgui ni tib wnaa. ⁵ Ni rneew, ib none grieezhaa mgui lo pxoz zho, lo xniaa zho par gbannie zho wnaa ne nac tsieel zho, gac zho tibaque miech grop zho. ⁶ Nligaa nacdraa zho chop miech, sinque laa zho rac tibaque. Dios nac meṇ ne psan ycatsieel miech, cho dzigo nac miech par quuits zho miṇe rnabey me.

⁷ Dzigo rëb zho lo me:

—¿Pex nac dzigo waa bdeed Moisés diidz csëbtsieel mgui ne racladz csëbtsieel? Rëb Moisés, zac csëbtsieel zho, totsaque yquia tib quits gdeed zho lo wnaa zaatne raquiet laa zho psaan wnaa.

⁸ Pquiabchaa me rëb me:

—Ne squitaaxe waa miech nad, miech ndip zdooc xmengol to, gane bdeed Moisés diidz csëbtsieel zho; sangue Dios psan me diidz csëbtsieel miech. ⁹ Gacnan to ganle, zha ne csëeb wnaa ne nac tsieel zho, ni teḷ peet guieyozh beend wnaa co, doḷ ga guṇ zho csëeb zho tsieel zho ycaa zho stib wnaa. Scaquegaa mgui ne ycaa wnaa ne psëeb zho ga, doḷ ga guṇ zho sac gonṇ no tsieel wnaa co.

¹⁰ Dzigo rëbchaa xpëëdsuel me:

—Teḷ scataa nac xcuent guieḷtsieel, mazd lëëquew dzigo ctsieelniad ne.

¹¹ Pquiab me rëb me:

—Nligaa no mgui ne rtsieelniad, per zhis zho, ni no pe nacne sca riaan zho. ¹² No zho desde rac zho mëed, nacd zho zha ne grieeo tsonie wnaa; no zho ib miech sca rsan zho. Nogaa zha ne ib zha rbeeladz zho ctsieelniad zho, parne grieeo tsoxcoraa zho guṇ zho xtsiṇ Dios. Zha ne sca rquiabladz ctsieelniad, maase ctsieelniad zho.

Beenlay Jesús mëédlas

(Mr. 10:13-16; Lc. 18:15-17)

¹³ Ga no Jesús, ndal zha ne bdziṇ bdziṇnie zho xpëédlas zho lo me, parne cxobnia me guic win guṇlay me win. Grë zha ne nac xpëédscuel me, leḷ psilo zho rtsidiḷ zho pe nacne nodziṇnie zho grë mëédlas co lo me.

¹⁴ Zeene gonṇ me sca quiayuṇ zho, rëbchaa me lo zho:

—Ctsirede to grë mëédlas yeeṇ qui, goḷsaan guiaad win lo naa. Sac gonṇ grë mëédlas yeeṇ, ni zha ne nac zig nac win, zha co nac zha ne sëeb ygab lo Dios.

¹⁵ Dzigo psilo me pxobnia me guic grë mëédlas yeeṇ co, beenlay me win. Blozhse ga, laa me briece ga.

Bzodiidznie tib zha ricw Jesús

(Mr. 10:17-31; Lc. 18:18-30)

¹⁶ Laa me zieriee ga, zeene bdziṇ tib mgui nguieg, tib zha ricwa, rëb zho lo me:

—Nan naa luu nac tib meṇ ne noseed miech, ni tib meṇ wen nac luu. Bnê diṇ, ¿pe nac mine guṇ naa parne grieeo ygaa naa guieḷmban ndzon ne gdziṇd dze lozh?

¹⁷ Pquiab Jesús rëb me:

—Rnee luu lëe tib meṇ wen nac naa. ¡Nli-gaaw, Diosse nac meṇ wen! Teḷne nli racladz luu ygaa luu guieḷmban co, none tsoxco luu gban luu miṇe rnabey Dios.

¹⁸ Pquiab zho rëb zho lo me:

—¿Pa miṇ waa?

Rëbchaa me:

—Miṇe rnee:

Gute luu samiech luu, teḷne nole tsieel luu, tsonied luu zha ne led tsieel luu, cuand luu samiech luu, yquiadiidzguizhd luu samiech luu, ¹⁹ gonṇ pxoz luu, gonṇ xniaa luu, cued luu xquieḷto me. Bleynie samiech luu, zigne rleynie luu luu.

²⁰ Dzigo rëbchaa zho:

—Ni tib miṇe rnee luu i gard quits naa, grësew zanaḷ naaw zigne naca. Racladz naa gacnan naa, diṇ peraa no guṇ naa.

²¹ Horco rëb me lo zho:

—Teḷ racladz luu gac luu tib zha ne gban grëse miṇe rnabey Dios, güey sca güeyto grëse ncuaaṇe rap luu, dzigo güeytiidz dimi co lo grë zha ne guiend pe yquín. Lozh ga, dë dënaḷ zhits naa. Miṇ co nagon guṇ luu, dzigo zgaa luu guieḷmban ndzon co; ni scagaa nroob guieḷnzaac ne ygaa luu nêz lo Dios.

²² Zeene bin zho sca rëb me, mbanse rac zho laa zho zey, sac nroob ncuaaṇe quianie zho.

²³ Dzigo rëbchaa Jesús lo xpëédscuel me:

—Gneli naa lo to ganle, grë zha ne squi rapcheṇ rzacxuu zho par sëeb zho xnêz Dios gnabey me zho. ²⁴ ¡Ne nligaa ngan rzac zhow! Mazd ngandse rded tib camell guieer

guzh lëdle sëëb tib zha ne squi rapchen xnëz Dios.

²⁵ Zeene bin zho sca rëb me, rzee zdoo zho, rnee zho:

—Bay, çhosezhe dzigo waa nac zha ne zrieelo sëëb xnëz Dios?

²⁶ Dze bui me lo zho, dzigo rëbchaa me:

—Nligaa par miech zootle tsod zha ne grielo sëëb xnëz me; sangue me nan me no zho. Sac tel me, tsod ncuaa ne grielod gun me.

²⁷ Horco pquiab Pedr rëb Pedr lo me:

—No dzigo waa, çpe nac mi ne ygaa no? Nanle luu ganle, tel no grëse ncuaa ne rdzi-aap no, laa no psana, ziaadnal no zhits luu.

²⁸ Pquiab me rëb me:

—Golgona ganle, dze ne gacncub grëse ncuaa ne no, zeene laa Mgui ne pxeel Dios zob lo xcan ne zo zaatne nac lo guielndzon ne no me, dze co lo gza to ne nac to zha ne biaadnal zhits naa, sob to lo gza tsiipchop xcan ne rieguial to. To gac zha ne gun guielwxtis lo gza tsiipchop dii ne nac zha Israel. ²⁹ Grëragaa zha ne psan lidz, psan zho bets zho, bzian zho, xnïaa zho, pxoz zho, tsiel zho, xpëed zho, liun zho porne noyun zho xtsin naa, na lo guielmban riique laa zho gana stib tib gayoogaw tib tiba; ni ib tedsod zgaa zho tib guielmban ndzon ne gdziandra dze lozh.

³⁰ Nli zig nac niina, nzian zha ne rzac zha non nac zho, nogaa zha ne rzac zho peet nond, per zeene gal dze co lalga gac zho grë zho.

20

Lalga nac grë zha ne no xnëz Dios

¹ Grë zha ne no xnëz Dios, zac zho lo me zig bzhaac grë zha ne güey xtsiin tib men co.

Tib men co name nroob dziin quianie me, tib dzew zigne biini liu brie me güeyguib me zha ne tsielaap xuv me. ² Bdzial me palal zho, biaan zho diidz palal quizh me zho dze, laa zho bzëëb lo dziin. ³ Glaale ngbidza brie me güeyted me len guiedz, lëetse güeytsib me lo bla zha ne zob ga racladz dziin. ⁴ Dzigo bree me zho, rëb me: “Goltsie xtsin naa, na quizh naa to mi ne non xtsie to.”

⁵ Rwe ngbidza, biire me güey me güeyguib me spalal zho. Maase las treza güeyaque me stib.

⁶ Zhile sëëb ngbidza, biire me güey me len guiedz. Ga bdzieel me zla zho, gon me scase zob zho ga. Dzigo rëbchaa me lo zho: “çPe nacre squise noded dze to?” ⁷ Pquiab zho rëb zho: “Choot rneezdaxe dziin waa yquiaa no.” Rëbchaa me: “Nasca zeena tsie to lo xtsin naa, maase quizh naa xtse to.” Dzigo laa zho zie.

⁸ Zeene laa dze blozh bdze, bnee me lo zha ne zo lo xtsiin me, rëb me: “Bredz grë

zha qui na, bdiizh xtse zho grëse zho. Zha ne bza bzëëb lo dziin, zha co glo bdiizh, lozhræa ga quizh luu zha ne glo bzëëb.” ⁹ Dzigo bded zha ne bdzele dze bzëëb lo dziin ga, tib tib zho pcaase zho mi ne non zho tib dze. ¹⁰ Grë zha ne glo bzëëb lo dziin, zeene gon zhow, tibaque güeynie guic zho nroobraa nguizh me zho. Per zeene laa zho gozh, lalgaque pcaa zho.

¹¹ Zeene gon zho lalga pcaa zho grë zho, blëe zho, güey zho güeylisqui zhow lo men ne nacchen dziin ga, rëb zho: ¹² “Psacsi luu no i gon squi been luu. Bui ganle gdipse dze ptsuu ngbidz no pquiaa no xtsiin luu, çzha nac dzigo lalga quizh luu no grë no zha qui, ni niipyeenaque been zho dziin?”

¹³ Pquiab me rëb me: “Bets, nosacsid naa to, biaanle ne diidz name palal quizh naa xtse to. ¹⁴ Nana sca golgüey xtimi to i, zeena golsë. Ib zdoo naa rala lalga quizh naa to grëse to. ¹⁵ çStiba, xtimi naaw, zrieelo gundzin naaw zigne racladz naa! çTe në rac zdoo to ye, ran to rquia zdoo naa miech?”

¹⁶ Scapaa nagon gac zha ne no xnëz Dios. Lal gacnon zho, zigtaa zha ne glo bzëëb xnëz mew, zigtagaa zha ne sëëb bwaw.

Bzeet Jesús stib laa miech csacsi me (Mr: 10:32-45; Lc: 18:31-34)

¹⁷ Nëz no Jesús zie me nëz Jerusalén, tibaque bredz me gza tsiipchop xpëedscuel me, ¹⁸ bzeet me lo zho zha gun miech me zeene laa zho gdziin Jerusalén, rëb me:

—Ib ziaab naa ladznia grë pxoz ne rnabey grë zho maistr ley, zha gnab guet naa. ¹⁹ Zha co naa ladznia zha zit, parne gunnguzee zha co naa, parne quin zho naa, ni haxta squiaa zho naa lo cruz. Per zeene gac tson ngbidza, zriebaan naa.

²⁰ Tibaque zeene wbig tsiel Zebedé wbig-nie me grop xingan me Jacob ni Juan, pquit-sghib me lo Jesús rnab me gun Jesús tib favor ne racladz me. ²¹ Dzigo bnabdiidz Jesús lo me, pe nac favor ne racladz me. Pquiab me rëb me:

—Racladz naa gneedz luu diidz sob tibga xpëed rii naa cue luu zeene gdziin dze ne laa luu zob zobnabey luu; tib zho nëz derech, stib zho nëz revés.

²² Pquiab Jesús rëb me lo wnaa co:

—çNi luu gon riend pe rnab luu! çNiacle zleb zho gan zho grë guielne ne gan naa, tedgaa zho grë mi ne teed naa?

Pquiab zho rëb zho:

—Zlëëb no.

²³ Rëbchaa me lo zho:

—Nli nenda zan to grë guielne ne gan naa, ni zdedgaa to mi ne teed naa; per ne gnedz naa diidz sob to cue naa nëz derech, nëz revésgaa, led naad raguiäl min co; sac laa lugar co biaanle par zha ne tsieguiala, ni

Pxoz naa men ne zob gbaa men cose nan dien chow.

²⁴ Grëraa xpëëdsuel me, zeene bin zho pe nac mine rnab Jacob grop Juan, blëë zho lo zho. ²⁵ Dzigo bredz Jesús zho grë zho, rëb me lo zho:

—Ran to ganle zha ran grë zha ne rnabey grë guiedz ne ndxie lo guidzliu, ni grë zha ne nac zha non, masaque rnabey zho samiech zho zigne racladzta zho. ²⁶ Sangue to gon gunscade to. Zha ne racladz gac zho zha non lo to, laa ne glu zho zha non zho, none glo zho guiaanwin, gac zho zig tib ngundziin lo to. ²⁷ Scaquegaa zha ne racladz gnabey zho lo to, none glo cseed zho gon zho mine gnabey to zho. ²⁸ Golgan ganle, niicle naa ne nac naa Mgui ne pxeel Dios, ziald naa par gnabey naa miech, sinque laa naa zial par gac naa tib ngundziin lo zho, ni gded naa xquielmaban naa zeena laa zho lo grëtaa ncuaae ngadoo zho. Ni nanpaa naa miech guizhiu ne laa.

Biac chop zha ne rold lo
(Mr. 10:46-52; Lc. 18:35-43)

²⁹ Miech guizhiu nal zhits Jesús, laa me zieriee guiedz Jericó. ³⁰ Ro nëz co zob chop zha ne rold lo, zeene bin zho laa me ziaad ga, psilo zho nguiedz rbedz zho rnee zho:

—Jesús, men xtií rey David, pquia zdoo no!

³¹ Blalaa zha ne zie ga, psilo zho ndox zho lo grop zha co parne guioog ro zho, per lel hor cole nguiedzraa rbedz zho me. ³² Nacne zeene bdziñ me zaatne zob zho, blëz me, bnabdiidz me lo zho rëb me:

—¿Pe nadien gon to naa?

³³ Pquiab zho rëb zho:

—¡Racladz no guiac lo no!

³⁴ Pquia zdoo me zho gon me sca rac zho, dzigo pquiaania me zhits guidlo zho. Horcogazh laa lo zho biac, laa zho zienal zhits me.

21

Bdziñ Jesús Jerusalén
(Mr. 11:1-11; Lc. 19:28-40; Jn. 12:12-19)

¹ Sca no Jesús nëz grë xpëëdsuel me, laa me bdziñ guiedz Betfagé. Gaxle ga riaan Jerusalén, nëz danse squi riaan Gui Oliv. Dzigo pxeel me chop xpëëdsuel me, rëb me lo zho:

² —Goltsie guiedz win ne ndxie danse lo ne i. Ga gdziñ to zaatne quiadoo tib burrgus grop xpëëd, dzigo golxadz ma goltënie ma nu. ³ Tel cho gnabdiidz pe nacne noxadz to ma, golguiab lo zho: Men ne rnabey ne, men co rquín ma, na zigne lozh xtsiin ma guiaadsan no ma.

⁴ Ga brieequia mine bnee tib men ne bidteed xtiidz Dios lo miech padzeela, zeene rëb me:

⁵ Golguiab lo men Jerusalén:

“Golwi ganle, laa men ne nac zhirey to ziaad i.

Tib men ligase rlu me, zob me lad tib burrrwin,

tib ladse ma ne rey yo zob me.”

⁶ Laa zho zie, zigne bnabeyse me zho ga, scase been zho. ⁷ Zeene wbire zho, laa zho bdziñnie burrr co grop xpëëd ma. Pxob zho lar ne rbix zho lad xpëëd ma, laa me bzob ma. ⁸ Zigse zie me, no grë miech guizhiu co, rta zho lar ne rbix zho ro nëz rded burrr ne zob me ga; nogaa zha ne rchoo nia grë yag nguia, rdziñ zhow ro nëz rded me. ⁹ Grëse zho, zigtaa zha ne nera, zigtaa zha ne nañ, nguiedz roptsie zho rnee zho:

—¡Golgotsaa co ne xviv xingan David! ¡Golgotsaa gleynie ne me! ¡Zha ndzontaa Dios, pxeel me men nroob qui lo ne!

¹⁰ Zeene bdziñ me Jerusalén, rlozhd gzee zdoo grë miech ne ndxie ga, rnabdiidzla zho rnee zho:

—¿Bay cho nac men qui?

¹¹ Rquiab grë zha ne nal zhits me ga, rnee zho:

—¡Lëë Jesús i! ¡Lëë men Galilé qui, noteed xtiidz Dios lo miech!

Blee Jesús miech len yadoo
(Mr. 11:15-19; Lc. 19:45-48; Jn. 2:13-22)

¹² Biini liu co, zeene bdziñ Jesús Jerusalén stib, güey me yadoo nroob ne zob lad guiedz co. Bdziñ me gon me nzian miech ne ndxie ga, masaque tib lguiiayun zho, zha ne no wto, zha ne no wzi. Nacne güey me ptiixche me xmez zha ne notsëë dimi, ptiixche me xmez zha ne no wto palom; blee me zho ga grëse zho, ¹³ rëb me lo zho:

—Led znu gon zhubnee lo Xtiidz Dios: “Zaatne nac lidz naa nu, nu none guiaad grëse miech sodiidznie zho naa.” Laa to gon, quiaayun to lugar rii zig tib zhibliee ngbaan. ¹⁴ Ga no me bdziñ bla zha ne rold lo, zla zha ne në ni, wbig zho lo me. Gzase zho beenguiac me. ¹⁵ Nzian mëëdla yeen ne ndxie len yadoo ga, psilo win nguiedz rnee win: “¡Zha ndzontaa xingan rey David!”

Grë zha ne nac pxoz ne rnabey, ni grë maistr ley, zeene gon zho milagr ne been me ga, ni gon zho zha rnee grë mëëdla co, rlëë zho, ¹⁶ rëb zho lo me:

—¿Pe ib rond luu ganle pe nonee grë mëëdla qui?

Pquiab me rëb me:

—Ron naaw. ¿To waa, pe rande to ganle zha zhubnee lo Xtiidz Dios, zaatne raquiet mine noyac nu? Led rneew lëë:

Haxta grë mëëdla ne bii radz, ye win rley win roolnie win me.

¹⁷ Blozhse sca rëb me, zoque zho ga, laa me bio nëz zie me nëz Betain. Ga blëz me wdze co.

*Wbidz tib yag guigw**(Mr. 11:12-14, 20-33; Lc. 20:1-8)*

¹⁸ Sil co zeene no me nêz gdziñ me Jerusalén, pcaabedz me. ¹⁹ Gon me zob tib yag guigw gax ro nêz, dzigo güey me güeyso me low dien pe ndziel tib nex low niow me. Bdziñ me gon me loxaque zhiblagsew zëeb, nacne rëb me low:

— ¡Lëë blozh xtse luu nu gon! ¡Gdziñdraa dze ne yquia nex lo luu!

²⁰ Biini liu, zeene laa zho zie Jerusalén stib, gon xpëedscuel me, laa yag guigw co bidzle. Bzee zdoo zho, bnabdiidz zho lo me rëb zho:

— ¿Bui ganle, bay zha nacne squi znuse wbidz yag guigw qui?

²¹ Pquiab me rëb me:

— Gneli naa lo to ganle, telne dib zdoo to rnaló to Dios, niicle ncuaañe mazdraa ngañ gnab to lo me, zun mew. Lëëraasi none dib zdoo to gliladz to zaca, ni palal gacchopd guic to. ²² Grëse ncuaañe gnab to zeene rzodiidznie to me, zneedz mew, totsaque dib zdoo gliladz to laa to ycaaniaw.

²³ Bdziñ me Jerusalén, wbiire güey me len yadoo. Ga noseed me miech, zeene bdziñ bla zha ne nac pxoz ne rnabey ni zla zha ne nac men non lo mengüiedz, bnabdiidz zho lo me rëb zho:

— ¿Cho dzigo nac luu ne squitaa ziaadnabey luu len yadoo? ¿Cho rnabey luu?

²⁴ Pquiab me rëb me lo zho:

— Ye naa laa naa gun tib wnabdiidz lo to. Telne stire to low, dzigo gni naa lo to ganle cho rnabey naa ne laa naa noyñ grë ncuaañe noyñ naa. ²⁵ Golnë dien, ¿cho pxeel Juan Bautist biaad me pchoobnis me miech? ¿Pe Dios pxeel me, te miechsew ye?

Psilo zho rnabdiidzla zho dien zha ctsire zho lo xtiidz me, rnee zho:

— Telne dzieets ne Dios pxeel Juan, dzigo laa me gnë: “¿Pex nac dzigo waa bliladzde to mine bnee me?” ²⁶ Tel na dzieetsgaa ne, miechse pxeel Juan, grieequiadaque ne.

Rdzieb zho niab zho miechse pxeel Juan, sac nan mengüiedz nli Dios pxeel Juan biadteed Juan xtiidz me lo miech.

²⁷ Dzigo mazd mine been zho rëb zho lo me:

— Ndiond no dien cho pxeel Juan.

Dzigo rëbchaa me lo zho:

— Niicle naagaa nagon, grieelod gni naa lo to cho rnabey naa quiaayñ naa grë min rii.

Zha nac zha ne rond diidz

²⁸ Golquiaadiaga ganle. Tib mguí, quianie me chop mëëdbgui. Tib dzew, bredz me tib zho rëb me lo zho: “Xin, none gon tsie luu nadze, tsietop luu uv xcuaa ne.” ²⁹ Pquiab zho rëb zho: “¡Gad naa!” Wdzeelaaw, bien zho nongüelda ga sca gun zho, dzigo bio zho nêz güey zho. ³⁰ Laa stib zho, zeene bredz

me zho bnabey me zho tsie zho lo dziin, rëb zho: “Peet nacda, na maase ga naa.” Blozh ga pasë zho nie.

³¹ Golnë dien, lo grop mëëd co, ¿cho nac zha ne bin xtiidz pxoz?

Pquiab zho rëb zho:

— Zha glo cow.

Dzigo rëbchaa me:

— Gneli naa lo to ganle, mincodaa quiaayac nu niina: Grë zha ne rzac to mazdraa ngoopdol, zig nac grë zha ne rtop dimi ne razh lo zha Roma, zig nac grë wnaa ro nêz, mazd glole zha co nozëeb xnêz Dios, lëdle to. ³² Biaadpaa Juan Bautist name biadseed me miech csaan zho xquielntseeb zho, gban zho zigne racladz Dios, ni pe liaadz to nion to mine rnee me. Mazd grë wnaa ro nêz, grë zha ne rtop dimi ne razh lo zha Roma, znuse psaan zho xquielntseeb zho. Laa to, niicle ran to nosaan grë zha co xquielntseeb zho, per ib rsaande to mine nac to.

*Xcuent zha ne pquianap liu**(Mr. 12:1-12; Lc. 20:9-19)*

³³ Dzigo bzodiidz me stib cuent lo zho rëb me:

— Tib men name, nroob lbë uv beenbni me lo liun me. Psilo me ptse me igose liu co, bzaa me zaatne gzhii grë uv co, ni bzaa me tib yu glaa zaatne sob zha ne yquiaanapa. Blozh ga, blediñ me liu co lo bla zha ne ran liu, dzigo laa me briece, laa me zey zit.

³⁴ Zeene gol mëë ne laa nex co gol, pxeel me bla zha ne quia xtsiin me zie lo zha ne quianap liun me ga, parne gdeed zha co uv ne rieguial me ycaa me. ³⁵ Per leñ bnaaz zho zho, zha ne blooquie zho, zha ne bdeedgolp zho, haxta beet zho tib zho. ³⁶ Wbiire pxeel me zla zho, hor cole nzianraa zho pxeel me, per niapse sca psacsi zha co zho.

³⁷ Tibaque zeene pxeelaque me xpëed me, bza guic me rëb me: “Gañse zho xpëed naaw, zon zho mine gnee me.”

³⁸ Pex nion zho diidz, zeene gon zho xpëed me, rëbchaa zho: “¡Lëë zha qui nagon guiaañie liu rii! ¡Golgotasaa dziuut ne zho, zeena guiaañ lo ne!” ³⁹ Dzigo bnaaz zho xpëed me, güeynie zho me zaatne nac tib lad lo liu co, ga güeygut zho me.

⁴⁰ ¿Zha sca dien rzac to gun bizhuan liu co gza zha co, zeene laa me gbire?

⁴¹ Pquiab grë zha ne nac pxoz ne rnabey, ni zha ne nac zha non lo mengüiedz ga, rëb zho:

— Ni lalnu yquiad zdoo me zho, znit-logazh me zho. Lozhse ga, cuediinga me liun me lo zla zha ne gundziina, zha ne guien gdeed nex ne rieguial me ycaa me.

⁴² Dzigo rëbchaa me lo zho:

— Haxta lo Xtiidz Dios no tib zaatne znu rnee, ¿pe gard ganle glab tow? Rneew: Quie ne psëeb zha ne nozaa yu,

ni nanð zho lëëpaa quie co nac miñe rnazdzi-its yu.

¡Ncuaañe gzee zdoò new! Sac Dios bnabey sca goca.

⁴³ 'Gacnañ to ganle, scadaa nagon griece to lad grë zha ne ngab lo Dios, parne gbig zha ne tsoxcopaa guñ xtsiin me, zha cole guiaan xlugar to. ⁴⁴ Zha ne tsietsobe lo quie ne raquiet ga, zac zho zig tib ncuaañe rac tson tap lê; laa tel lëëgaaw tsobe lad zho, zac zho zig tib ncuaañe die die rac.

⁴⁵ Grë zha ne nac pxoz rnabey ga, ni grë zha farisé, zeene blozh pquiaadiag zho cuent ne bzodiidz me lo zho ga, bien zho zha ga rzeet me. ⁴⁶ Nacne gocladz zho naaz zho me, per bdziebaque zho; sac ndal miech rleynie me, niicle ne rzac zho tib zha ne noteedse xtiidz Dios nac me.

22

Zha ne néd sëëb xnëz Dios

¹ Bzodiidz Jesús stib cuent lo zho, rëb me:

² —Grë zha ne rbedz Dios ygab zho xnëz me, none tsoxco zho gon zho miñe rnee me; sac nenda gdzieelo zho zig bdzieelo zha ne bredz tib rey co nie zho lo zhilni xpëëd me.

³ 'Tib rey name, ziaadyob ctsieelnia xpëëd me, nzian zha ne bredz me tsie lo lni. Zeene laa dze co bdziñ, pxeel me zha ne quia dziin lo me zietsedz grë zha ne bredz me lo lni ga, per néd zho nienal zho. ⁴ Wbiire me pxeel me zla zho rëb me: "Goltsietsedz zho, golguiab, laa guielwagw ne yquiin goclole, sgiuel zho na guiaad zho." ⁵ Per ib beencasd zho zha ne pxeel me ga, no zho briece zie lo xcuaa, no zho briece zie zhiwto, ⁶ nogaa zho lel bnaaz zho zha co, psacsi zho zho, beet zho zho. ⁷ Zeene gon me sca been zho, blëë me, bnabey me grë xmenguiib me güey zho güeygut zho grë zha ntseeb ne psacsi xmandad me ga, ni bnabey me bzëëg zho guiedz co. ⁸⁻⁹ Blozh ga biire pxeel me zla zho, rëb me: "Laa guielwagw rii goclole, miñe naca goltsie tib nëz yu, zha ne gdzieeltaa to, golcuedz zho guiaad zho lo lni; sac grë zha ne bredz naa ga niaad, laa zho blule ganle rieguiald zho guiaad zho nu."

¹⁰ 'Dzigo briece zho güey zho, miech ne bdzieeltaa zho, zigtaa zha ndzinliw, zigtaa zha ntseeba, grë zho bredz zho bdziñnie zho zho lo lni. Gol hor wagw, biodzëse len yu ndxie miech. ¹¹ Zeene laa rey bzëëb zienne me lo zho, gon me lad co no tib zha co nacwxabd zho zigne rieguiald gacwxab zha ne sca rie tib lo guieltsieel. ¹² Dzigo rëbchaa me lo zho: "Bets, çpe nacne squise luu bzëëb luu nu, bui ganle nacwd luu lar ne bneedz zho niacw luu?"

'Dzese zob zho, rdziold zho pe guiab zho lo me. Gonse me sca rac zho, ¹³ bnabey me zha ne nodziib lo mezh rëb me: "Golzobdoo zha rii, golxidoo grop nia zho, grop ni zho,

golcuae zho nu goltsieron zho lo ncow nëz ley. ¡Ga nac zaatne rieguiald zho, ga gan zho guielnëdoox ne no ted zho, goonnë zho, haxta gow lay zho!"

¹⁴ 'Minçodaa nagon rac len dze rii —rëb Jesús—, ndal zha ne raredz sëëb xnëz Dios, per zhis nac zha ne rioxco rzëëb.

Pe nonguiel quizh miech contribucion
(Mr. 12:13-17; Lc. 20:20-26)

¹⁵ Blalaa zha farisé ne ndxie ga güey zho bnediizd zho dien zha gungüet zho Jesús cxin me tib diidz, zeena min co yquiaaqui tsiezo zho me lo wxtis. ¹⁶ Dzigo pxeel zho bla zha ne nacgrë zho, ni güey zla zha ne racnie Herod gogcza zho. Bdziñ zho rëb zho lo me:

—Maestro, ndion no niapse diidzli zienal luu, ni scagaa zeene rseed luu miech, rdziebd luu miñe nac diidzli min co rnee luu lo zho. ¹⁷ Gane niina, racladz no gnë luu dien pe nonguiela ga rdeed no dimi ne razh lo rey ne zob Roma, te nonguiel da ye.

¹⁸⁻¹⁹ Bienga me racladz zho gungüet zho me, dzigo rëbchaa me lo zho:

—¿Pe nan to na rienð naa pe no guic to? Masaque rëb to na lëë, znuse gungüet to naa. Golneedz tib pes ne rguizh to nu ganle.

Dzigo bdeed zho tib pes plat lo me. ²⁰ Blozh ga, rëbchaa me lo zho:

—¿Cho nu, cho lê nu quia lo pes rii?

²¹ Pquiab zho rëb zho:

—Lëë rey i, lëë lê me i quia lo qui.

Dzigo rëb me lo zho:

—Miñe rieguiald sca ycaa rey, goldeeda lo rey; scaquega miñe rieguiald ycaa Dios, lo Dios goldeeda.

²² Zeene gon zho sca ptsire me lo xtiidz zho, bzee zdoò zho, mazd miñe been zho laa zho wbichese ga, laa zho zey.

¿Pe nli zrieeban miech?

(Mr. 12:18-27; Lc. 20:27-40)

²³ Dze coquew, güey bla zha saducé lo Jesús. Nac zha saducé riladzd zho zdziñ dze grieeban miech. Dzigo bdziñ zho, ²⁴ rëb zho lo me:

—Maestro, znu psan Moisés diidz: Telne glo mgui guet lo wnaa ne nac tsieel mgui, ni gopd wnaa mëëd, dzigo none betsaque zho ctsieelnia wnaa co stib, zeena gap wnaa mëëd ne guiaan xlugar xpëëd zha ne gut ga.

²⁵ 'Bio tib dii zha co znu bzhaac, gadz bets nac zho. Ptsieelnia zha ne nac zha gol, zeene laa zho gut biaand xpëëd zho. Dzigo ptsieelnia stib bets zho wnaa co. ²⁶ Blozh ga gutaque zha co, pa së zho nsan mëëd. Ptsieelniaque me stib zho, goc zho tson, niicle zha co psandaque mëëd. Sca sca haxta bza gza gadzse zho ptsieelnia me, ²⁷ tibaque zeene yeque me laa me gut. ²⁸ Miñe racladz no gacndion no, çchopaa dzigo gac tsieel

wnaa co zeene laa zho grieëban? Sac gza gadzse zho ptsieelna me.

²⁹ Pquiab Jesús rëb me lo zho:

—I nagon laa to rxin, mine naca riende to zha nac Xtiidz Dios, niicle rliiladzde to zrieelo me gun me ncuuaan ro ne gard gan miech. ³⁰ Sac gon zeene gal dze ne laa grë miech grieëban, niicle nguiv niicle wnaaw led yedraa hor co dien cho tsiieelna zho; sac hor co laa zho gac zig nac grë anjl ne no gbaa. ³¹ Stiba, ib nli zrieëban mengut. Mod rande to zha zhubnee zaatne raquiet zeene rëb Dios: ³² “Naa nac Dios ne rliiladz Abraham, naa nac Dios ne rliiladz Isaac, naa nac Dios ne rliiladz Jacob.” Niicle ne gutle gza zha co hor co, per zeene sca bnee Dios gase rlu mban zho no zho lo me; sac tel Dios, jnacd me xDios mengut, sinque xDios zha mban nac me!

³³ Grë miech ne ndxie ga, zeene gon zho sca ptsire me lo xtiidz zha saducé co, rzee zdoo zho.

Xley Dios mine mazdraa non

(Mr. 12:28-34)

³⁴ Grë zha farisé ne ndxie ga, gon zho sca psiioog Jesús ro grë zha saducé co.

Horco biire grë zha farisé co bzodiidz zho stib. ³⁵⁻³⁶ Lad zho no tib maistr ley, dzigo wbig maistr ley co lo Jesús, rëb zho:

—Maestro, lo grë xley Dios, bzhiguiel bnë lo naa dien, çpa min nac mine mazdraa non?

Sca rëb zho, sac gocladz zho niungüet zho me. ³⁷⁻³⁸ Pquiab me rëb me lo zho:

—Lëë mine mazdraa non nu znu rnee: “Dib zdoo luu, dib xalm luu, dib guielbiini ne no guic luu, bleynie Dios, men nroob ne rnabey luu.” Lëëw nac mine mazdraa non, ni lëëw gloopaa raquiet lo grëse ley. ³⁹ No stib mine rnee: “Bleynie samiech luu zigne rleynie luu luu.” Ye min rii nona, meraque lala con min glo. ⁴⁰ Zha ne gban zigne rnabey grop ley rii, lëële grë ley ne psan Moisés ga, lëële grë zhiwseed zha ne biadteed xtiidz Dios ga, zianał zho.

çCho xpëed nac Crist?

(Mr. 12:35-37; Lc. 20:41-44)

⁴¹⁻⁴² Gon Jesús nzian farisé ndxie lo me ga, nacne bnabdiidz me lo zho rëb me:

—çZha dien rzac to guiaad Men ne zëëble diidz ga cxeel Dios? çCho lo xtiï grieëquia me?

Pquiab zho rëb zho:

—Lo xtiï David grieëquia me.

⁴³ Dzigo rëbchaa me lo zho:

—çPe scaw sca? Zha nac waa zeene bdeed Espiritu Sant guielbiini lo David bzeet David men co, rëb David me nac men ne rnabey David. Golgan ganle znu bnee David:

⁴⁴ Rëb Dios lo men ne rnabey naa:

“Cue naa nëz derech, nu bzob,

nieda lozh gnaz naa grëse zha ne rlëë lo luu, csañ naa zho ladzna luu.”

⁴⁵ Gase nagon telne nli zha xtiï David gac Men ne cxeel Dios ga, çzha nac dzigo rnee David men co rnabey David?

⁴⁶ Ni tib zho ib bdzielid zho zha ntsire zho lo xtiidz me; desde dze co ni stib zho biazhdraa pe nabdiidz zho lo me.

23

Mine nac maistr ley grë zho zha farisé

(Mr. 12:38-40; Lc. 11:37-54; 13:34-35; 20:45-47)

¹ Dzigo psilo Jesús bnee me lo grë miech co, ni lo xpëedsuel me, ² rëb me lo zho:

—Grë maistr ley ni grë zha farisé ib lëë xtsiin zho ga, nac cseed zho miech zha nac ley ne psan Moisés. ³ Golguien golgon xtiidz zho, iper nsin golso, ib gunde to mine run zho! Nac zho, ni lalnu rund zho mine rseed zho miech. ⁴ Rio zho rnee zho lo miech, min rii, min rii rnabey ley gun to, ni per ni zha rioxcod zho siquier csilo zho gun zhow.

⁵ çGrë ncuuaen run zho, laaw runse zho par ganpaa miecha! Par guiab miech nguzobdiidz zho lo Dios, rio zho led zhid nzhen grë lo cint rquiaa zho Xtiidz Dios, rlozh ga rzhidoow yan nia zho, rzhidoow quia zho ne. Lar ne rbix zhow, rlozhd dieen peraa rquia lada, xab zhow, haxta zhits ni zho rbiba. ⁶ çZeene rbedz miech zho tib wagw nroob, rdziladz zho zhapaa rzob gro! mez, niicle len yadoogaaw, zaatne glupaa zha non nac zho, ga rzob zho! ⁷ Ro nëza, rdziladz zho ndooladz gnee miech bdiuzh lo zho, zeene rnee miech “zha rac”, “zha non”, nac zho, rlozhd gley zho.

⁸ Sangué to gon yguibde to dien zha gnee miech “zha rac” nac to, sac tibaque men rac no, lëë me ga zëëble diidz cxeel Dios; golguien ganle tel to lalga nac to, rriequia bets to grë to. ⁹ Ib gunde to zig run grëraa miech, runnon zho tib samiech zho rnee zho lëë pxoz zho ga, sac tibaque men ne nac Pxoz to, lëë men co no gbaa. ¹⁰ Yguibde to sac miech topaa gunctsin zho lo Dios, sac loxaque Men ne nole diidz ga cxeel me, men cose zrieelo gunctsin zho lo me. ¹¹⁻¹² Nodne gaglaa to lo samiech to, mazd ndooladz golgac lo zho, sac zha ne racglaa, ziaanwin zho. Gaxe waa, telne racladz to gacnon to, none ndooladz gac to lo samiech to.

¹³ çProbsaxe to maistr ley, probsaxe to zha farisé! Lëda i gon noyun to, rzac to noxco to sëëb miech xnëz Dios, per lel noca to sëëb zha ne racladz sëëb. Ni stiba, per ni to nod xnëz me. ¹⁴ çProbsaxe to! Guielntseeb i gon run to, rio to rlozhd gool to xlay to rzo to ro nëz, ni noque to rla to ncuuaen rapse grë wnaa viud; ib tedsod gon guielnëdox ne yгаа to.] ¹⁵ çProbsaxe to, rzac to na lëëw ga run

to! Rio to gui dan rbix to, haxta rded to nisdoo, rquiaguib to dien cho sëëb xnêz to ni rlozh ga laa ne ygab zho nêz lo Dios, leļ nêz leñ gabil zienie to zho. ¹⁶ jProbsaxe to, nac diidz name to noseed miech, ni per ni to riend pe rnee to! Rnee to lo miech: "Zha ne rzeet yadoo ni tel guñd zho miñe rnee zho, peet nacd ga, per tel gzeet zho grê or ne no leñ yadoo ni guñd zhow, dol ga guñ zho." ¹⁷ jNadzpaan xen to, nadzpaan cnow nac guic to! jNiace mazdraa non or lo yadoo? Golguien ganle por yadoo, nacley grê or co. ¹⁸ Rneeque to: "Zha ne gzeet lo pcoog, led dolda telne guñd zho miñe rnee zho; per tel gzeet zho gon ne ndziib lo pcoog ni guñd zhow, dol ga guñ zho." ¹⁹ jPe nliipaa rnee to peet riende to! jNiace mazdraa dzigo non gon que lo pcoog? jPe rande to por lo pcoog co raclay gon? ²⁰ Golguien ganle, zha ne rzeet lo pcoog, yele grê ncuaaane ndziib low ga quiazeet zho; ²¹ zha ne gzeetgaa yadoo, haxta Diosle ga gon rzeet zho, sac ga rbêz me. ²² Scasaque zha ne gzeet gbaa, zaatne rzoble Dios ga nozeet zho, masaque rrieequia me ga rzeet zho.

²³ jProbsaxe to maistr ley, probsaxe to farisé! Rzac to na demas nguzobdiidz to lo Dios, rio to haxta grê guizh bitxtil, guizh nizh, guizh comin run to tsii lal, rded to tib lala miñe rieguial tsiesan to yadoo, laa ley ne mazdraa non zienied guic to guñ to miñe rnabeya. Nli rieguiala gdeed to grê gon co, per none scaque tsoxco to guñ to miñe nac diidzli, none yquia zdoo to samiech to, none dib zdoo to gnalo to Dios. Miñ rii nac miñe mazdraa non.

²⁴ jNe nliipaa ib riende to pe quiayun to! Rzac to na noxco to gunctalde to xtól to, masaque ni tib ngurudz rsaande to tso lo ncuaaane row to, ni riende to rrieequia haxta tib camell rab to. ²⁵ jProbsaxe to, masaque nac to zig tib plat, zig tib tas ne nêz zhtssew mbe rna, laa nêz leña rnadraa! Laglaase rquiaalo to miech wen nac to, per tibaque noban to, tibaque nosacsi to samiech to. ²⁶ Golguien none glo csaan to xquielntseeb to, none gac to zig tib plat zig tib tas ne zigtaa mbe nêz zhitsa, scagaa mbe nêz leña. ²⁷ jProbsaxe to, nac to gon zig grê baa ne dieen paraa nquitsbie rna! Niow rlu nêz zhitsa, laa nêz leña loxaque grê ncuaaan biodz, loxaque grê dzit ngutoo nodzê. ²⁸ Sca gon nac to, ne rac to zootxe luu waa nli miech ndzinli nac to, per nêz leñ zdoo to loxaque zhgab ne dien zha yquidie to miech, zha csacsi to miech no to.

²⁹ jProbsaxe to maistr ley, probsaxe to farisé! Ni lalnu guielto guieni lo to, rio to rzhixcuaa to ro xpaan grê zha ne biadteed xtiidz Dios, ni lëëpaa grê pxozgol to beet zho. Dieen peraa run to rquiaalo to rsoladz to zho. ³⁰ Rnee to: "Telne niaca miñe nole ne

leñ dze co, ndeete ne diidz nsacsi xmenjol ne grê men rii." ³¹ jLëëque to gon nobeero ga, zha nactaa lo dii ntseeb ne ziaad to! ³² jScaque nasca golgun! jGoltsenal grê miñe been pxozgol to ga! ³³ jMiech ngoopdo! jZhin mendox! Telne csaande to xquielntseeb to i, ib tedsod gon gabil guey to.

³⁴ 'Grê zha ne cxel naa, zig nac zha ne guiadteed xtidz naa, zha ne nacnie Espiritu Sant, zha ne yгаа guielbiini yquiaa zho miñe gnabey Espiritu Sant zho, ib tedsod sacsi to zho. No zho gutgazh to, no zho yquiaa to lo cruz, no zho lëëque leñ xyadoo to gdeed yag to zho, ib gandzede to zho, stib guiedz, stib guiedz tso to ctsidiļ to zho. ³⁵ Blactaa grê miech ne sca peet xtold ziyut to grê xmenjol to, psilow desde Abel haxta Zacari xingan Berequí, men ne beet xmenjol to zaatne nac gax lo pcoog leñ yadoo. Ni ye to gon zëëb xchen grêse zha co. ³⁶ jGneli naa lo to ganle, grê miech ne gon mban leñ dze rii, grê to zho yгаа guielndox ne tsieguial to por grêtaa guielntseeb co!

³⁷ jAque tow men Jerusalén! jPe nacne squitaa nac to, rut to zha ne ziadteed xtiidz Dios lo to, rgoquie to grê zha ne rxeel me lo to? Blactaa gocladz naa, niacnie naa to, nquiianaap naa to, zig run nguid rgueedz ma xpëed ma, per bzhiguielde to. ³⁸ Gacnan to sca ganle, nadzetaa gon laa lidz to nu guiaaan ngan, ³⁹ sac gandraa to naa, haxta gal dze ne guiab to: "jZha ndzontaa men qui pxeel Dios lo ne!"

24

jNsin golso!

(Mr. 13:1-23; Lc. 17:22-24; 21:5-24)

¹ Laa Jesús zieriee leñ yadoo grê xpëedscuel me, zeene pcuëëdzde zho me, rëb zho:

—Gotsaa gwi ne ganle zha niaataa yadoo rii.

² Blozhse bui zho low, rëbchaa me lo zho:

—Niicle squitaa nagon niaaw, per zdziñ dze ne nitlow dib naccsew. Ni stib quie qui guiaandraa zigne squi zhoxbcuaw i.

³ Brie me leñ yadoo ga grê me zho, laa zho zie nêz Gui Oliv. Bdzin zho cho gui co, ga zbob me grê me zho. Dzigo wbig gax bla zho lo me, bnabdiidz zho rëb zho:

—Bzhiguiel bnê lo no dien, jpa hor dzigo gac miñe bzeet luu ga? jZha glu zeene laa luu ziaadyoble guiaad? Zeene nitlogaa guidzliu, jzha gacndion no laa dze co ziaadyoble?

⁴ Pquiab me rëb me lo zho:

—Nsin golso, zeena choot yquidiede to.

⁵ Sac nzian zha ne grieequia guiab zho zha nac Men ne zëëble diidz cxeel Dios; ni nzian miech ne yquidie zho. ⁶ Zeene gon to nêzrii nêzrec noxtseeb csilo diļ, guiabde

to togo lëele dze ne guial naa ga bdziñ; sac niicle noyacle dila, noxtseebragaa pa csilo gaca, led lëdle ne nitlo guidzliu ga. ⁷ Garaa csilo grë dillox, grë guiedz nroob laaw tilnie saguiedz nrooba; grë zha ne rnabey grë guiedz nroob, laa zho tilnie sazha rnabey zho. Nëzrii nëzrec csilo gni grë zhodox, nzian zaatne gan miech gbin. ⁸ Ni lega loxaque miñe rsilosew ga, sac nroobraa guielñe ne gan miech lozh ga.

⁹ Zeene laa grë ncuuan rii noyac, jnsin gols! Sac hor co laa miech tsielo to ladznia zha ne csacsi to, haxta zut zho palal to, grëse miech tsidil zho to loxaque ne nac to zha ne no xnëz naa. ¹⁰ Nzian zha ne nole xnëz naa, leñ dze co laa zho gbiche, laa zho csilo lëëque zha glëënie zha ne nacgrë zho, haxta zielo zho zho ladznia zha ne gut zho. ¹¹ Len dze co zrieequia nzian zha ne yquidie miech guiab zho xtiidz Dios noteed zho, ni nzian zha ne gliladza. ¹² Grë zha ne nole xnëz naa, zeene gan zho grëtaa guielntseeb, grëtaa dol ne quiayun miech leñ dze co, ndal zho gleyniedraa zho Dios dib zdo zho. ¹³ Per zha ne tiblucque gac, gbiched zho lo Dios, niicle tel petaa gan zho noyac, zha co gac zha ne gdziñ lo me. ¹⁴ Niicle scataa noyac grë ncuuan co, ib none ygaaz Xtiidz Ndzon Dios lo grëse miech, grëtaa zaatne ndxie miech laa zho gacnana; lozhraa ga dzigo laa guidzliu rii nitlo.

¹⁵ Zeene gan to zaatne nac Lugar Nda leñ yadoo, zo tib ncuuane rieguiald so ga, tib ncuuane ziaad gnitlo, zigne bzeet Daniel men ne biadteed xtiidz Dios (zha ne glaba, none guien zho zha naca), hor co golguib dien zha xoon to. ¹⁶ Zha ne no grëraa guiedz ne ngab judé, none xoon zho tsie zho dan, ga tsietsolan zho. ¹⁷ Zha ne lëëtaque hor co no glaa guic lidz, none lëëled xoon zho, ib guiabd zho sëeb zho leñ yu tsiebee zho ncuuane rap zho. ¹⁸ Zha ne lui guaged lo dziin dan, ib guñd zho tsie zho lad guiedz tsixi zho xab zho. ¹⁹ jProb grë men wnaa ne lëëtse leñ dze co zoney xpëed, men ne quaniegaa mëdyeen ne bii radz! ²⁰ Golnab lo Dios gande to guielñe co leñ mëe ne rac na, dze ne rdziladzgaa to lo dziin. ²¹ Ne nligaa guielñedoxa. Wlal ne biaan guidzliu haxta lo nadze, gard gan miech tib guielñedox sca, ni gandragaa zhow ted ga. ²² Telne csaan Dios nroob dze gac guielñe co, ni stib miech rii guiaandraa; per na por grë zha ne bzooblo me sëeb xnëz me, gdeete me diidz gaca nroob dze.

²³ Zigne rne naa ga, leñ dze ne scataa gan miech grë dil co, zha ne gnë lo to: “Goltë nu ganle, lëe Men ne nole cxeel Dios ga blanso nu”, gnëgaa zho: “Goltie nec ganle, laa me bdziñ ga”, gliladzde tow. ²⁴ Sac zrieequia zha ne yquidie guiab zho zha nac men co, zrieequia zha ne guiab xtiidz Dios ziadteed zho lo miech, zuñ zho grë milagr nroob,

parne yquidie zho miech, haxta zha ne nole xnëz Dios, zguib zho dien zha gdeeda diidz yquidie zho zho. ²⁵ jNsin sca gols! Benque laa naa nilew lo to. ²⁶ Nligaa zha ne gnë lo to laa men ne pxeel Dios ga blansole, gliladzde tow. Nenda cxeel zho to tib dan zit, gnë zho: “Goltsie ganle laa me no ga”, gnëgaa zho pa tib leñ yu ne no me, ni tib xtiidz zho gliladzde to. ²⁷ Sac zeen gal dze ne guiaad me stib, gacda ncuuan ngeets zhlaan, grëse miech gan me. Zig tel guiab tib belye nroob ne glu zhan gbaa, desde nëz ne rlan ngbidz haxta nëz ne rzëeb ngbidz, žniacxe gand grëse miecha? ²⁸ Zlupaa zeene laa me guiaad; nanle to ganle zaatne nix ma gut, ga rcaalsa pech.

Ziaad Jesús stib

(Mr. 13:24-37; Lc. 12:41-48; 17:26-30, 34-36; 21:25-33)

²⁹ Zeene lozhse gan miech grë guielñedox co, laa lo ngbidz ycow, gziinidraa mëe. Grë mel ne ndziib gbaa, laa ma gliaal; grëraa ncuuane no gbaa, masaque nëzrii nëzrec gaca. ³⁰ Horco zlu ganle zeene laa Mgui ne pxeel Dios ga, ziad-zëeb lo xcow con grë guielndzon, con grë poder ne rap me, grëse miech mban gac zho, zoon zho gan zho me. ³¹ Grë xanjl Dios, hor co laa Dios cxeel zho tsiecuedz zho zhitrompet zho parne ycaalsa grëse zha ne ngab xnëz me, tel pa lotaa lo guidzliu no zho.

³² Golzoob cuidad zha nac yag guigw. Led nanle to ganle, zeene laa grë zhicwa racnieen, ni rsilo rdzib zhiblaga, gase rlu ne laa mëe nëeg ziaadgaxle. ³³ Scaque nagon zeene gan to laa grë miñe rne naa lo to nu rsilo noyac, dzigo nanle to laa dze ne guiaad men co ziaadgaxle. ³⁴ Gneli naa lo to ganle, nzian miech ne mban niina bii zan zho zeene laa grë ncuuan co csilo gac; sac ible ncuuane gaca. ³⁵ Dzdzin dze ne nitlo gbaa, nitlo guidzliu, sangue miñe rne naa lo to nu, nitloda; ible laaw none gac.

³⁶ Lëëraasi choot nand dien pa dzew, dien pa horgaaw, per ni grë anjl ne no gbaa, per ni naa nanda, loxaque Pxoze naa nana.

³⁷⁻³⁹ Nanle to ganle zha bzhaac miech leñ dze ne wban Noé, ib bililadzd zho xtiidz me. Guxt no zho lo zhilni zho, zha ne notsieel-nia, zha ne nobediingaa xpëed, laa dze bdziñ laa Noé bzëeb leñ barcw; tibaque zeene baa zho biini laa guiedox co nonitlode zho. Scadaa nagon sac grë miech nad rii, tibaque zeene tsaa zho biini laa Mgui ne pxeel Dios ga ziaadle. ⁴⁰ Horco zaatne quia chop mgui lo dziin dan; tib zho tsienal zhits me, stib zho guiaan. ⁴¹ Zaatne quiayot chop wnaa, tib zho tsienal zhits me, stib zho guiaan.

⁴² jNsin sca gols, sac gon nande to dien pa horgaa guiaad me, benque laa vis racle lo to! ⁴³ Golgan ganle, tel niaca miñe gacnan

miech laa ngbaan tsieban lidz zho guieel, per nand zho dien pa horpaaw; zñiacxe zaguies zho? Led sobna zho lëë, nsin nsin so zho. ⁴⁴ Scaque to nagon, none nsin so to, sac gon lega naclew zeen gan to laa me ziaadle.

⁴⁵ 'Golgan ganle, masaque laa to gac nagon zig tib ngundziin ne riaanne ro lidz men ne rquia zho xtsiin.

'Ngundziin ne ndzinli, zeene laa men ne quia zho xtsiin ga greee, ine niowse guiaan zho guiaanne zho grëraa zha ne no lidz me. ⁴⁶ Zha ne sca gun, jwen tsie zho, sac zeene gbire me gan me scataa noxco zho dziin ne pso me zho, zianziuu zho lo me ⁴⁷ haxta so me zho, zha yquiaanap grëse ncuane rap me!

⁴⁸ 'Tel ngundziin yozhgaaw, mine tsienie guic zho guiab zho gbireniobd men ne quia zho xtsiin ga, ⁴⁹ csilo zho csacsi zho grëraa zha ne nac ngundziin, csilo zho ctsieelsa zho grë ngonziuu tso zho loxaque gzudz zho, loxaque gowcho zho, ⁵⁰ tibaque zeene gan zho laa me bdzinle. ⁵¹ Zha ne sca gun, per peraa dien gun me, ib tedsod nroob caxtigw ne cteed me zho, sonëz me zho guey zho zaatne no grëraa zha ne rond diidz, ga tso zho grë zho zha co goonnë zho, haxta gow lay zho lo guieledox ne ted zho.

25

Zha bzhaac tsii wnaa nguieg

¹ Blozh ga rëbchaa Jesús lo zho:

—Par sëëb miech zaatne nabey Dios, masaque naca zig rzëëb miech tib lo lni zaatne noyac tib guieltsieel.

'Tsiu wnaa nguieg name, brieë zho zixinëz zho mgui ne ctsieelnia, tib tib zho bise zho psin win ne rec nceit ne rziini. ²⁻⁴ Gaay zho goc ligier pcodzëë zho zhipsin zho nceit, ni zhaaque bi zho zniipa; laa zgaay zho gocnroladz, zigne bzhëse zho psin co scase bi zhow, bid zho nceit ne niodzëraaw.

⁵ 'Goc pa hora rio zhimcaalo zho, ni rdzindaque mgui ne zixinëz zho ga, tibaque zeen laa zho pquia mcaal. ⁶ Gol gröl guieela, zeen laa vis rac, laa mgui co ziaadle, zha ne zixinëz me ga, zac greee zho tsiedzieel zho me. ⁷ Lëëled brieë mcaallo gza wnaa nguieg co, psilo zho nozhixcuua zho zhipsin zho. ⁸ Zeene gon gza zha nroladz co ygaadraa zhinceit zho, dzigo bnaab zho lo zgaay zha co, gdeed zho niip nceit yquiiin zho, sac laa zhipsin zho noyuule. ⁹ Pquiaab zho rëb zho: "Grieeeloda, sac mine yquiiinse zhipsin no ziaadnie no. Mazd goltsie zaatne rto zhow, ga goltsixiw." ¹⁰ Per lo lal ne zixi zho nceit, laa mgui co bdzin. Zeene wbiire zho, laa ro yu nioogle, loxaque gza zha ne nsinle zo ga, zha cose bzëëb len yu. ¹¹ Dzigo psilo zho, rcaan nia zho ro yu, rbedz zho mgui co cxal me ro yu sëëb zho. ¹² Per bdeete me diidz

nzëëb zho, rëb me: "Runbeyd naa to gon, nand naa dien cho nac to."

¹³ 'jNsin sca golso! —rëb Jesús—. Sac gon nande to pa dzepaa, pa horpagaa gbiire guiaad Mgui ne pxeel Dios.

Zha ne biaanëe dimi

¹⁴ 'Mgui ne pxeel Dios ga, ziaad gac me zig tib men ne no greee tsie tib viaj zit.

'Tib men name no greee me tsie me tib guiedz zit, dzigo bredz me zha ne run dziin lo me, bdeed me palalga xtimi me lo zho gundziin zhow len dze ne guieud me ga. ¹⁵ Tib zho pcaania gaay mil pes plat, tib zho chop mila, stib zho pcaania tib mila. Tib tib zho, bdeedse me mine rgobey me grielo zho gundziin zho, dzigo laa me brieë laa me zie.

¹⁶ 'Zha ne biaanëe gaay mil pes plat co, güey zho blooon zhow, beëna gan zgaay mila. ¹⁷ Zha ne biaanëe chop mila, ye zho güey zho blooon zho dimi co, scaque beëna gan schop mila. ¹⁸ Laa zha ne pcaania tib mila ga, lel güey zho güeyteen zho tib guieer güeyloliu zhow.

¹⁹ 'Goc bla iza laa men co bdzin, dzigo bredz me zho tib tib zho, tsie zho gzodiidz zho dien yo dimi ne biaanëe zho ga.

²⁰ 'Bdzin zha ne pcaania gaay mil pes plat co, bdzinne zho xtimi me, rëb zho: "Laa xtimi luu nu gon, lëë gaay mil pes ne psan luu lo naa nu, laa zgaay mil min rii nac mine bdziniaaw." ²¹ Rley me rëb me lo zho: "jZha squi nagon racladz naa! Rley naa ran naa squitaa ndzinli luu, squitaa nguzobdiidz luu; sac gon lo palalse dimi ne psan naa lo luu ga, bioxco luu zaacse bendziin luuw. Nana gon, nroobraa mine gnedz naa gundziin luu. jNa bded, zeena ygaa luu grë guiebley ne quiaayac nu!"

²² 'Blozh ga, bdzinaque zha ne biaanëe chop mila ga, ye zho laa zho bdzinne xtimi me, rëb zho: "Laa xtimi luu nu gon, lëë chop mil pes ne psan luu lo naa nu, laa schop mil min rii nac mine bdziniaaw." ²³ Pquiaab me rëb me: "jSquiw nagon! Rley naa ran naa squitaa ndzinli luu, squitaa nguzobdiidz luu lo naa; sac gon lo palalse dimi ne psan naa lo luu ga, bioxco luu zaacse bendziin luuw. Nana gon, nroobraa mine gnedz naa gundziin luu. jNa bded, zeena ygaa luu grë guiebley ne quiaayac nu!"

²⁴ 'Zeene bdziintaa zha ne biaanëe tib mila ga, rëb zho lo zho: "Nli bendziind naa xtimi luu, sac nanle naa zha nac luu, nicele paraa niundziin naaw, grëse mine niuna gan lo luu niaana; ²⁵ gane mazd bialoliu naaw. Tib mil naca bneedz luuw, ledaaw nu." ²⁶ Blëë guic me, rëb me lo zho: "jBiche nu, paat rquiind naa miech yozh, miech nroladz ne squi nac! Conque nanle luu sca nac naa, ²⁷ çpex nac dzigo waa bioxcd

luu maase mbediñ luu dimi qui, ndziniaaw palal ncaania naaw niina?"²⁸ Dzigo rëbchaa me lo zha ne ndxie ga: "Niinagazh gołcob tib mil pes qui lo zha qui, goldeeda lo zha ne ziaadnie tsiuw i."²⁹ Sac zha ne rioxco rundziin ncuuañe rcaania zho, zacnroobraa ncuuañe yquianie zho. Laa zha ne squi nac, haxta miñe pcaaniale zho, zdiooba lo zho.³⁰ Gołxeñ zha yozh qui, gołtsiesañ zho lo ncow nêz ley. Ga gañ zho guiẽlnêdoh ne tsieguañ zho, ga goon zho haxta gow lay zho."

Zha gañ Jesús guiẽlwxxtis

³¹ Blozhse bzodiidz Jesús cuent co lo zho, rëbchaa me:

—Naa ne nac naa Mgui ne pxeel Dios, zeen gał dze ne laa naa guañ stib, ziañnie naa grê xanjł naa, zlu grêtaa guiẽlndzon ne rap naa, laa naa sob lo xcan ne raguail naa soob naa.³² Grêse miech ne ndxie dibdoose lo guidzliu, hor co laa zho gacredz lo naa, laa naa cueextso zho zig rbeextso baxtor chiv lad xpëcwxiil zho.³³ Zha ne no xnêz naa, zha co gdziñ naa cue naa nêz derech, laa zha ne nod xnêz naa, cue nêz revés.

³⁴ 'Lozhse ga, naa ne nac naa meñ ne rnabey, hor co laa naa cuedz zha ne no xnêz naa, guiep naa lo zho: "Gołtê grêse to, to ne nac to zha ne nziuu lo Pxož naa. Gołted zeena ycaania to zaatne cuêz to, ible par to bzaa mew desde zeene bzaa me guidzliu.³⁵ Sac zeene pcaabedz naa, bneedz to ncuuañe dow naa; zeene bnab zhis naa, bneedz to ncuuañe go naa; zeene bial naa ladz to, bneedz to lidz to blêz naa;³⁶ zeene goñ to guiẽnd xab naa, bgacwxab to naa; zeene bzhaçnê naa, zeene bio naa ladzguuib, biaad to biaadgañ to naa."³⁷⁻³⁹ See zdoo zho gnê zho: "¿Per pa hor bneedz no ncuuañe doow luu, ncuuañe go luu, pa hor bneedz no zaatne blêz luu, pa horgaa bneedz no lar ne gotxab luu, ib bdziõnd no nzhaacnê luu, bdziõnd no niogaa luu ladzguuib?"

⁴⁰ 'Dzigo guiep naa lo zho: "Gzobtaa hor ne goñ been to xyudar zha ne nacgrê to, güeygañ to zho, pcaaniagaa to zho, niicle zha ne bzoob miech peet nonda, rrieequia xyudar naa ga been to, rrieequia naa ga biaadgañ to."

⁴¹ 'Laa zha ne ndxie nêz revés, hor co laa naa gzonêz zho, guiep naa lo zho: "¿Gołbiche lo naa nu, miech ndziibdee! ¿Gołsê lo guidox ne rieguail to, zaatne no gey mendox grê xanjł ma!"⁴² Sac goñ, bio dze pcaabedz naa ni bneedzde to ncuuañe niow naa; bnab zhis naa, ni bneedzde to pe nie naa.⁴³ Bial naa ladz to, ni bneedzde to zaatne mbêz naa; goñ to guiẽnd xab naa, ni ni tib lê lar bneedzde to niacw naa. Bio naa ladzguuib, bzhaçnê naa, ni pe liaadz to niaadgañ to naa."

⁴⁴ 'Squiab zho gnê zho lo naa: "Per pa hor bdziõn no luu rcaabedz luu, rnabgaa zhis luu; pa hor bdziõn no guiẽnd pa cuêz luu, guiẽnd lar ne gacw luu; pa horgaa bdziõn no no luu ladzguuib, nixgaa luu rzacnê luu."

⁴⁵ 'Dzigo guiep naa lo zho: "Grêse vult ne bzoliaadz to niun to xyudar zha ne no xnêz naa, bzoliaadz to niegañ to zho niicle zha ne mazdraa wina, rrieequia naa ga sca been to."

⁴⁶ 'Horco grêse zha co laa zho guey lo guidox ne gdziñdraa dze griee zho; laa zha ne bioxco wban zigne rnabey naa, grêse zho laa zho yгаа tib guiẽlmban ndzon ne gdziñdraa dze lozh.

26

Bnediidz zho dien zha gnaaz zho Jesús

(Mr. 14:1-2; Lc. 22:1-2; Jn. 11:45-53)

¹ Zeene blozh sca bnee Jesús lo grê miech co, dzigo rëbchaa me lo xpëêdscuel me:

² —Nanle to ganle schopaque ngbidz, laa lni Pascw csilo. Naa ne nac naa Mgui ne pxeel Dios, lo lni co goñ gnaaz miech rii naa, tsielo zho naa ladznia zha ne yquiaa naa lo cruz.

³ Grê zha ne nac pxoz ne rnabey, grê maistr ley ni grê zha ne nac meñ non lo meñ guiedz Israel, lëêtaque hor co laa zho ndxie lidz Caifás, meñ ne nac pxoz nroob.⁴ Laa zho ndxie ga, nonediidz zho dien zha grieeolo gnaaz zho Jesús, gut zho me, per tib mod ne grieelod glisqui meñ guiedza.⁵ Rnee zho: "Lëêraasi choot gnabeyd yгаа me merpaa dze lni, zeena gacntseebd menguiedz."

Pchoob tib wnaa nceit nex guic Jesús

(Mr. 14:3-9; Jn. 12:1-8)

⁶ Betain ga no tib meñ ne biac lo guiedz lepr, lê Simón. Lëêtaaque no Jesús lidz meñ co,⁷ zeene bdziñ tib wnaa bdziñnie tiblo nceit nex, nosew tib leñ ncuuañ win niaa niapse quie rbební, tiblo nceit ni-azha. Squi zob Jesús lo mezh, güey wnaa co güeychoob me nceit co guic Jesús.⁸ Zeene goñ xpëêdscuel Jesús sca been wnaa co, blêê zho, rnee zho:

—¿Pa rieguaila squi pxin zhlê wnaa qui nceit qui!⁹ Tel niaca miñe ndow, pe zhidaa dimi ne nguizh zhow, nquiinpa dimi co ngaaza lo grê zha ne guiẽnd pe yquiiñ.

¹⁰ Goñ Jesús sca rac zho, dzigo rëbchaa me lo zho:

—¿Pe nacne riêê to lo wnaa qui? Gołsaan me. Par naa nroob non miñe been me i.¹¹ Tel nli lëê racladz to gun to xyudar zha ne guiẽnd pe yquiiñ, zac ygad to lo zho stib dze, sac tibaque ran to zho; sangue naa zhile laa naa gbiche lo to.¹² Led pxin zhlêd wnaa rii zhinceit me, sac goñ rrieequia laa me bzhixcauale xcuerp naa nu gał dze ne

ygueetsa. ¹³ Gneli naa lo to ganle, dipse lo guidzliu zaatne cseedtaa miech Xtiidz Dios, ible soladz zho wnaa rii, seet zho mine been me nu.

Güeyto Judas Jesús

(Mr. 14:10-11; Lc. 22:3-6)

¹⁴ Lo gza tsiipchop zha ne nac xpëëdsuel Jesús ga, brieë zha ne lë Judas Iscariot güeyzodiidznie Judas grë zha ne nac pxoz ne rnabey, ¹⁵ rëb Judas lo zho:

—¿Palal quizh to naa telne gun naa Jesús nregar lo to?

Dzigo biaan zho diidz quizh zho Judas galptsii pes plat. ¹⁶ Nacne psilo Judas noguib Judas dien zha gdeeda diidz csañ Judas me ladznia zho.

Dowxtseenie Jesús xpëëdsuel me

(Mr. 14:12-25; Lc. 22:7-23; Jn. 13:21-30; 1Co. 11:23-26)

¹⁷ Mer dze ne rsilo lni Pascwa, len dze ne sca row zho guietxtil ne riotsd ncobi ga, bnabdiidz xpëëdsuel Jesús lo me dien pa lo racladz me tsiegunlo zho ncuaañe gowxtseenie me zho wdze co. ¹⁸ Dzigo rëbchaa me lo zho:

—Nanle to ganle cho lidz zrieelo gdziñ ne. Goltsie Jerusalén golguiab lo zho: “Znu në xmaistr no: Gneedz luu lidz luu me dioow no xtsee Pascwa rii. Niinataa laa xtse me bdziñ, gane racladz me lidz luu nu diowxtsee no nawdze grë no me.”

¹⁹ Dzigo laa zho zie. Güey zho zaatne pxeel me zho ga, ga beenlo zho xtsee co.

²⁰⁻²¹ Wdze co, laa me no xtsee grë me zho, zeene bnee me lo zho rëb me:

—Gacnañ to ganle, lëëque tib to gon tsielo naa ladznia zha ne gnaaz naa nawdze rii.

²² Zeene bin zho sca rëb me, mbanse rac zho, dzigo psilo zho tibga tibga zho rnabdiidz lo me, rnee zho:

—Bnë dien, ¿cho gon min co? ¿Pe naaw?

²³ Pquiab me rëb me lo zho:

—Zha ne gan to csëëb xcuun len xquien naa, lëë zho ga. ²⁴ Naa ne nac naa Mgui ne pxeel Dios, niina laa miech gut naa zigne raquietsew lo Xtiidz Dios; per, jprobsaxe zha ne tsielo naa ladznia zho! ¡Mazd wen nie zho, ib niacd zho miech lo guidzliu!

²⁵ Zeze Judas rnabdiidz lo me rnee Judas:

—Maestro, ¿pe gon naaw ye?

Rëbchaa me lo Judas:

—Luuw gon Judas, luu güeyto naa.

²⁶ Laa zho noyow, zeene bzhen Jesús tib guietxtil, bdeed me xquizh lo Dios, blozh ga beengrol mew, dzigo bdiiz mew lo zho, ni rëb me:

—Golquiina, lëë xcuerp naa i gon.

²⁷ Ni bzhen me tib cop nroob vin, bdeed me xquizh lo Dios, blozhse bdeed me xquizh, dzigo pteed me cop co lo zho grëse zho, rëb me:

—Golgie vin qui, ²⁸ sac lëë xchen naa i, mine no gzhiee par guiaambe grë miech lo xtoj zho sëëb zho xnëz Pxoz naa, sac lëë stib mod cub nu psañ me parne sëëb miech xnëz me. ²⁹ Lëë lultm vuelnt nu guie naa vin rii, sac zhaale stib vin cub ne guie naa gal dze ne guienie naa tow zaatne rnabey Pxoz naa.

Dzigo psilo me biilnie me Dios gza me zho.

Bzeet Jesús zha gun Pedr

(Mr. 14:26-31; Lc. 22:31-34; Jn. 13:36-38)

³⁰ Blozhse biilnie zho Dios, laa me brieë ga gza me zho, laa me zienie zho nëz Gui Oliv.

³¹ —Ible saan to naa nawdze rii —rëb me lo zho—, sac scale ziaad lo Xtiidz Dios zaatne rnee: “Zdeed Dios diidz csiwee zho baxto; lozh ga nëzrii nëzrec gliaal mëcwxiil.”

³² Mincopaa nagon gun miech naa, per zeene laa naa grieëban glole naa ga Galilé, ga cuëz naa to.

³³ Dzigo rëbchaa Pedr lo me:

—Niicle telne saan grë zha qui luu, sangue naa gon csaand naa luu.

³⁴ Pquiab me rëb me lo Pedr:

—Gneli naa lo luu ganle, guieel riigazh, gardle yuedz gall, laa luu csale tsoñ vuelnt guiab luu runbeyd luu naa.

³⁵ Per tibaque nac xtiidz Pedr, rnee Pedr lo me:

—Niicle tel zaatne guet luu guet naa, per gunscad naa. ¿Pe nacne guiep naa runbeyd naa luu?

Scaque rnee grëraa xpëëdsuel me.

Bzodiidznie Jesús Pxoz me Getsemaní

(Mr. 14:32-42; Lc. 22:39-46)

³⁶ Zeene bdziinnie Jesús zho zaatne lë Getsemaní, dzigo rëbchaa me lo zho:

—Nuse nagon golsob, laa naa ga gazodiidznie naa Pxoz naa.

³⁷ Horco psilo mban rac zdoo me, ri-abguieñe me, dzigo bredz me Pedr, ni grop xingan Zebedé, bzënie me zho palal ³⁸ dzigo rëbchaa me lo zho:

—Mban rac zdoo naa, zootle zig zet naa lo guieñe rii. Nuse nagon golguiaan, per golsobna.

³⁹ Bzë me spalal, dzigo pquiitsgzhib me haxta bdziñ lo me lo liu; psilo me bñab me lo Dios, rëb me:

—Papá, laa naa rnab lo luu, telne zala zdoo luu, bzhiגיעל psilaa naa lo grë guieñe rii. Min rii rnab naa lo luu, per telne grieeloda, mine gnëtaa luu, min co gac.

⁴⁰ Zeene guso me, güey me zaatne biaan gza tsoñ zha co, gon me laa zho nixguesle; dzigo rëbchaa me lo Pedr:

—¿Pe ni palal blëbde to nzobna to? ⁴¹ Golsobna, golnab lo Dios zeena yquuild mendox to. Niicle ne squi lëbdraa xcuerp to sobna to, per golnab lo Dios, sac gon min co nac mine racladz zhiespiritu to.

⁴² Dzigo güey me stib, güeyzodiidnie me Dios; scaque mine bnaab me glo mincoque bnaab me. ⁴³ Zeene wbiire me bdziin me lo zho, gon me laa zho nixgueslaque, sac lëbdraa zho mcaal. ⁴⁴ Wbiire güey me güeynab me lo Dios, scaque mincoque bnaab me. ⁴⁵ Zeene laa me wbiiretaa bion vuelc to, rëbchaa me lo zho:

—Lëew nagon, zacle na gaguies to, zacle gdziiladz to. Naa ne nac naa Mgui ne pxeel Dios, laa hor nagon bdziin zeene laa grë miech ntseeb rii guiadnaaz naa. ⁴⁶ Goltsieso, zeena zio ne; sac gon laa zha ne glu naa lo zho ziaadle nu.

Bnaaz zho Jesús

(Mr. 14:43-50; Lc. 22:47-53; Jn. 18:2-11)

⁴⁷ Laa Jesús bii quianeeque, zeene laa Judas (tib zha ne nac xpëëdscuel me) bdziin, bdziinne Judas tib dzoon zha ne pxeel grë pxoz ne rnabey, ni grë zha ne nac zha non lo men guiedz Israel. No zho nzhen spad, nogaa zho nzhen yag. ⁴⁸ Biaanniele Judas zho diidz zha glu Judas cho nac Jesús, rëb Judas lo zho zha ne gan zho gow Judas bzhid cuas, lëe me ga, ligier so zho gnaaz zho me. ⁴⁹ Zigne bdziin Judas pquiaabdiuzh Judas me, blozhse ga wbig Judas dow Judas bzhid cuas me. ⁵⁰ Dzigo rëbchaa me lo Judas:

—Judas, ¿pe ziaadgun luu nu?

Lëëled wbig be grë zha co, bzhen zho me. ⁵¹ Horco biet tib zha ne rzënie me ga, bdob zho zhispad zho psilaa zho tib niaw, bliengaa zho diag tib zha ne rquia xtsiin men ne nac pxoz nroob. ⁵² Dzigo rëb Jesús lo zha ne pquiaaw ga:

—Blootsow zhispad luu, ib gundraa luu squi cob luuw. Sac gon zha ne rdil con spad, noxtseeb ne low guet zho. ⁵³ ¿Niacxe nan to na grieelod gnab naa lo Pxoz naa niina cxeel me tsiipchop partid xanjil me guiaadla ne nu? ⁵⁴ Per telne sca gun naa, ¿zha dzigo gac mine zhoobnee lo Xtiidz Dios, zaatne raquiet mine noyac nu?

⁵⁵ Dzigo rëbchaa me lo grë zha ne bdziin ga:

—¿Pe nacne squitaa rac to? ¿Niacxe naa cho zha ntseeb, ne squitaa nzhen to spad, nzhen to yag ziadnaaz to naa? Blactaa name gon to noseed naa miech len yadoo, ¿pe nacne bnaazde to naa ga? ⁵⁶ Per ible laa grë ncuuan rii gon noyac, zeena grieequia grë mine bzeet grë zha ne biadteed xtiidz Dios lo miech padzeela.

Horco grëse zha ne nac xpëëdscuel me laa zho bzhooon, tipse me psan zho ga.

Güeynie zho Jesús lo zhiwxtis zha Israel

(Mr. 14:53-65; Lc. 22:54-55, 63-71;

Jn. 18:12-14, 19-24)

⁵⁷ Ga brieenie zho Jesús bdziinne zho me lidz Caifás, men ne nac pxoz nroob. Grë zha ne rnabey lo menguedz Israel, laa zho ndxiele ga. ⁵⁸ Ye Pedr maase zit zit nal

Pedr laa Pedr bdziin xley men co. Bdziin Pedr güeyso bga Pedr lo grë zha ne ndxienap, quiambëz Pedr dien zha gun zho Jesús.

⁵⁹ Grë pxoz ne rnabey, grë zha ne nac zha non lo menguedz, grëse zha ne nac wxtis, laa zho ndxie nëz len yu co, quiaguib zho zha ne gzhixcuua maase diidzguizh ycaadz zho Jesús, parne gdeeda diidz gnab zho guet me. ⁶⁰ Ndal zha ne sca been, per brieequiad xtiidz zho, sac zhaase zhaase rnee zho. Tibaque zeene guso chop zho, ⁶¹ rëb zho:

—Bdzion no gon rnee me laa me ctixche yadoo ne zob lad guiedz nu, zaatne riodzian ne Dios, lozh ga tsonaque ngbidz gzaalo me stiba.

⁶² Dzigo hor co bzoli men ne nac pxoz nroob, rëb me lo Jesús:

—¿Pe nacne rquiaabd luu? ¿Pe nli sca rnee luu, te nlida ye?

⁶³ Gon pxoz nroob co rquiaabduque Jesús, rëbchaa me:

—Zig zob Dios mban ne no gbaa, laa naa rnab lo luu bneeli lo no dien cho nac luu. Bnë tel nli Xpëed Dios nac luu, Men ne zëëble diidz ga cxeel me.

⁶⁴ Dzigo pquiab Jesús rëb me:

—Scaw gon, naa nac men co. Naa ne nac naa Mgui ne pxeel Dios, bii zan to ganle zeene laa naa zoob cue Dios nëz derech, ni zeene laa naa guieet gbaa zialzëeb naa lo xcow.

⁶⁵ Horco ptsiez pxoz nroob co xab me, sac blëe me bin me sca rëb Jesús.

—¿Pe mazdraa textigw ne racladz ne? —rëb me—. Laa to binle ganle zha rzëtaa xtiidz me noguitnie me Dios. ⁶⁶ Nana waa, ¿pe gnë to zha dziuun ne me?

Pquiab be zho rëb zho:

—¡lb rieguial guet me!

⁶⁷ Dzigo hor co psilo zho nosacsi zho me. Zha ne rtsuc lo me, zha ne rdeed puñet me, nogaa zho rgap lo me, ⁶⁸ rlozh ga rzhidznie zho me rnee zho:

—Luu ne nac luu men ne pxeel Dios, ¿bnë dien cho ga bdiin luu?

Rëb Pedr runbeyd Pedr Jesús

(Mr. 14:66-72; Lc. 22:56-62; Jn. 18:15-18, 25-27)

⁶⁹ Horco laa Pedr bii zob nëz ley. Ga zob Pedr, güey tib ndzooop ne quia dziin lidz men rnabey co; rëb ndzooop lo Pedr:

—¿Ye luu lëe rzënie Jesús, men Galilé ne bdziinne zho i?

⁷⁰ Per bneelid Pedr. Squi zob grë zha co, rëb Pedr:

—Riend naa dien cho men rnee luu.

⁷¹ Laa Pedr ziele nëz ro puert ne quia ro nëz, zeene gon stib ndzooop ne rquia dziin ga Pedr, rëb ndzooop lo zha ne ndxie ga:

—Ye mgui qui gon nacgrë meñ Nazaret ne bdzinnie zho i.

⁷² Scaque bneelid Pedr, haxta rzeet Pedr Dios rëb Pedr runbeyd Pedr me. ⁷³ Wdzeepaaw, rëb zha ne ndxie ga lo Pedr:

—Ne nligaa ye luu rzënie meñ ne bdzin i. ¡Rlupaa name zig rnee zha nëz Galilé rnee luu!

⁷⁴ Dzigo psilo Pedr rzeet Pedr Dios rnee Pedr runbeyd Pedr Jesús, haxta rnee Pedr:

—Dios zobwi ganle, telne led diidzlid nu rne naa, maase cuibdee naa.

Loxaque blozh sca brieer ro Pedr zeene laa tib gall pcedz. ⁷⁵ Horco psoladz Pedr xtiidz Jesús zeene rëb me lo Pedr: “Gardle ycuedz gall, tsonle vuelt rëb luu runbeyd luu naa.” Dzigo mbanse rac Pedr. Brieer Pedr ga, psilo Pedr biin Pedr guielnë co.

27

¹ Ziadyiinile liuw, wbiire pcaalsa grë pxoz rnabey, grë zha non lo menguedz, bneditz zho dien zha gnabey zho guet Jesús. ² Blozhse bzodiidz zho, dzigo laa zho bzobdoo me blee zho me ga ziesañ zho me lo Pilat, meñ ne nac gobernador.

Gut Judas

(Mr. 15:1; Lc. 23:1-2; Jn. 18:28-32)

³ Laa Judas Iscariot zha ne pto Jesús ga, zeene bin Judas laa zho rnab guet me, lëëléd güey Judas lo grë pxoz rnabey co, lo grë zha non lo menguedz ga, zietsire Judas dimi ne bdiidz zho Judas ga. Mban rac Judas, ⁴ bdzin Judas rëb Judas lo zho:

—Naraa rien naa lëda nu beñ naa. ¡Tib dol nrooble nu, znu bialto naa tib meñ ne peet xtold!

Pquiab zho rëb zho:

—¡Mincotaa gon ndiond no! ¡Xcuentzhe luu ga!

⁵ Horco pchel Judas dimi co len yadoo. Lo guielnë co brieer Judas ga güey Judas lëëque Judas pxiiyan Judas.

⁶ Grë zha ne nac pxoz rnabey ga, güey zho ptop zho dimi co. Per blozh ga, riend zho dien zha gun zhow.

—¿Zha dziuun ne dimi rii? —rëb zho—. Telne guiaana yadoo, per rdzieelda, sac gon xchen tib miech bdzëew.

⁷ Dzigo bzodiidz zho dien zha gaca, nacne mazd pquinn zhow bzhii zho tib lë liu, zatne rdieen yu ne riaa grë ncuuan psin ne rquinn; parne lo liu co ygueets grë zha zit ne guet Jerusalén. ⁸ Nacne brieelë liu co “Liu ren”, ni sca runbey zhow len dze rii. ⁹⁻¹⁰ Ga brieequia mine bzeet zha ne biadteed xtiidz Dios padzeela, zeene rëb zho: “Galptsii pes plat ne bzhii zha Israel meñ nziuu co, dimi co bzhii zho tib lë liu, zaatne rdieen yu ne riaa grë ncuuan psin ne rquinn. Sca në Dios lo naa.”

Bnab zho guet Jesús

(Mr. 15:2-20; Lc. 23:3-5, 13-25; Jn. 18:33-19:16)

¹¹ Bdzinnie zho Jesús lo Pilat, ga bnabdiidz Pilat lo Jesús rëb Pilat:

—Bnë dien, ¿pe nli luu nac zhirey zha Israel?

Pquiab me rëb me:

—Nliw.

¹² Grë zha ne nac pxoz rnabey ga, ni grë zha ne nac zha non lo menguedz, rzadraa ncuuaane rquiaqui zho me; per ni tib diidz rtsired me lo zho. ¹³ Dzigo rëbchaa Pilat lo me:

—¿Pe nacne rquiaabd luu? ¿Pe ib rond luu grëtaa ncuuaane rquiaqui zho luu i?

¹⁴ Bzee zdoo Pilat gon Pilat, ible rquiaabd me.

¹⁵ Gzobse iz, zeene ral lni Pascw rnabey Pilat rlaa tib zha ne no ladzguiib, zha ne gnabtaa menguedz laa. ¹⁶ Len dze co no tib zha ntseeb ladzguiib lë Barrabás, zëeb xtiidz zho. ¹⁷ Nacne rëb Pilat lo grë zha ne ndxie ga:

—¿Cho racladz to csilaa naa? ¿Pe silaa naa Barrabás, te silaa naa Jesús ye, meñ ne nac diidz pxeel Dios lo to?

¹⁸ Sca rëb Pilat sac bien Pilat loxaque porne ndal miech nobig lo Jesús min co ne rlëënie zho me, bnabey zho bgaa me.

¹⁹ Laa Pilat zob lo xcan ne run me guielwxtis, zeene bdzin tib mandad rëb lo me:

—Znu në tsiel luu: bzhiguel peet gund luu meñ qui, rlu peet xtold me; sac nieewdze me nroob pteb mcaal tsiel luu.

²⁰ Grë zha rnabey co, bio zho pquill zho menguedz gnab zho csilaa Pilat Barrabás, ni gnab zho guet Jesús. ²¹ Zeene wbiire Pilat bnabdiidz Pilat stib, dien chopaa racladz zho laa, grëse zho nguiedz pquiab be zho, rëb zho:

—¡Barrabás psilaa!

²² Dzigo rëbchaa Pilat:

—Meñ ne waa nac diidz pxeel Dios lo to nu, ¿zha gun naa me?

Pquiab zho rëb zho:

—¡Bnabey yquia me lo cruz!

²³ —¿Per pe nacne yquia meñ rii lo cruz? —rëb Pilat—. ¡Ni tib dol rapd me!

Biireque zho nguiedz roptsie zho rnab zho yquia me lo cruz. ²⁴ Gonse Pilat rquiaa-diagd zho xtiidz me, lel mazdraa rac zho, dzigo bnab me nis, squi ndxie zho bdiib me nia me, rëb me lo zho:

—¡Nanle to nasca, led xtoldraa naa nu ne laa xchen meñ rii gzhiee, sac nanpaa naa peet falt rapd me!

²⁵ Pquiab be zho rëb zho:

—¡Peet nacd ga! ¡Zhits no grë xpëed no cuib dol co, na no guiotizha!

²⁶ Dzigo bnabey Pilat blaa Barrabás, laa Jesús racse me bnabey me zha ne bdiñ Jesús, blozhse ga laa me psan Jesús ladznia mennguib ne tsiequiaa me lo cruz.

²⁷ Biire grë mennguib co bzëëbnie zho me nêz leñ yulow, ga pcaalsa grëraa mennguib ne nacgrë zho, brin zho igose me. ²⁸ Blee zho xab me, bgacw zho me tib lar nizhnie nlaan, zig rna lar ne racw grë rey, ²⁹ bzieecw zho bla lë yag guiets, bzoob zhow guic me zig rzob coron guic zha ne nac rey, ni bloo zho tib lë goobgui nia me. Runnguzee zho me, rquitsgzhib zho lo me, rnee zho:

—¡Golwi ganle zha ractaa zhirey zha Israel!

³⁰ No zho rtsuc zho lo me, rgob zho goobgui ne no nia me ga, rdeed zhow guic me.

Güeyquiaa zho Jesús lo cruz

(Mr. 15:21-32; Lc. 23:26-43; Jn. 19:17-27)

³¹ Blozhse sca bdiitnie zho me, blee zho lar nizhnie co lad me, bgacw zho me xab me stib, dzigo laa zho brieenie me ga zienie zho me zaatne yquia me lo cruz. ³² Nêz zienie zho me bdiieel zho tib men Ciren lë Simón, bnabey zho men co bi me zhicruz me.

³³ Zeene bdzin zho zaatne nac “Gui Beer-guic Ngutoo” (Gólgota), ³⁴ ga bdeed zho nziu lo me notsa tiblo guizh nlayag, per zeene pquiaaro mew bien me nziu cow, bnéd me nie mew.

³⁵⁻³⁶ Blozhse pquiaa zho me lo cruz, bzhen zho tib xab me pchug zhow biaananie zho tib légaw, laa stiba bio zho rif; dzigo laa zho bzob ga, bzobnap zho. ³⁷ Guic zhicruz me, ga pquiaa zho bla lan diidz zaatne rnee: “LÉË JESUS NU, MEN NE NAC ZHIREY ZHA ISRAEL.” Sca pquiaa zho, sac minco pquiaqui sca pquiaa zho me lo cruz. ³⁸ Ye chop ngbaan pquiaagza zho me lo cruz, tibga zhicruz zho bzo tib nêz cho zhicruz me. ³⁹ Grëse miech ne rdedtaa ran zho laa me quia ga, rzhidznie zho me, haxta rdzi zho guic zho ⁴⁰ rnee zho lo me:

—Led rëb luu lëë laa luu ntsil yadoo, ni tsonaque ngbidz nzaalo luu stiba, ¿pe nac dzigo rrieelod luu guiet luu i? Telne nli Xpëed Dios nac luu, biet lo qui.

⁴¹ Scaque grë pxoz rnabey, grë maistr ley, grë zha farisé ni grë zha ne nac zha non lo mennguedz, rzhidznie zho me, rnee zho:

⁴² —Stib miech scataa beenguiaac me, stib miech scataa bla me, ¿pe nac dzigo rrieelod me gla me me? ¡Gooñ me name nac zhirey ne, guiet me i sca zho; zeena dziuunbey ne men rnabey nac me! ⁴³ ¡Conque tant rnalno me Dios, haxta rnee me Xpëed Dios nac me, guiaadsilaa Dios me i nazho!

⁴⁴ Ye ngbaan ne quiagza me lo cruz ga, mincoque rbidzgo zho lo me.

Gut Jesús

(Mr. 15:33-41; Lc. 23:44-49; Jn. 19:28-30)

⁴⁵ Zig goñ dzew, tibaque zeen goc tib ncow dipse lo guidzliu, haxta las tres biala biini stib. ⁴⁶ Horco nguiedz zëëb tsi Jesús, rnee me:

—Elí, Elí. ¿Lama sabactani?

Diidz co nac zig nac ne rnee ne: Luu nac xDios naa, luu nac xDios naa. ¿Pe nacne psaan luu naa?

⁴⁷ Zha ne ndxie ga, zeene bin zho sca rbedz me, no zho rëb Lí, men ne biadteed xtiidz Dios padzeela, men co rbedz me.

⁴⁸ Dzigo rias tib zho güeygad zhib lë zhiil lo nziu bla, bzoob zhow tib guic goobgui pquiaa zhow ro me. ⁴⁹ Laa zla zho rnee:

—Psaan, nu dzian ne dieñ pe ziaad Lí guiaadlit Lí me i.

⁵⁰ Tibaque zeene pquiaa me stib redz nroob, znuse blozh me.

⁵¹ Horne nolozh me ga, hor co briez nzoli lar nroob ne quia leñ yadoo, groltaa goca; psilo bni tib zhodox, grë quie masaque wbiła, ⁵² nzian ro baan grë zha ne bnao Dios mazd padzeela bzhiäl. ⁵³ Zeen goñ dze ne brieeban me, ye zho laa zho brieeban, brie zho leñ baa, bzëëb zho lad guiedz; nzian miech ne goñ zho.

⁵⁴ Grë mennguib ne quianap me ga, ni zha ne rnabey lo zho, zeene goñ zho bni zho co, ni goñ zho grë ncuanea goc ga, per nli bdzieb zho.

—¡Ne nlipagaa —rnee zho—, Xpëed Dios nac men qui!

⁵⁵ Nzianlaa men wnaa, zit zo zho rwi zho. Lëë grë men wnaa co güeynal zhits Jesús, been zho xyudar me dipse leñ dze ne pseed me miech, desde dze ne psilo me nêz Galilé. ⁵⁶ Lad co no Marí Magdal, Marí tsiel Zebedé, ni Marí ne nac xniala Jacob grop José.

Bgueets Jesús

(Mr. 15:42-47; Lc. 23:50-56; Jn. 19:38-42)

⁵⁷⁻⁵⁸ Zhile sëëb ngbidza, zeene bdzin tib mgui lë José lo Pilat, bnab me diidzbey tsielit me xcuerp Jesús lo cruz; tib zha ricwa, men guiedz Arimaté nac me, ye me zianal zhiwseed Jesús. Nacne pxeel Pilat diidz lo zha ne quianap Jesús ga, parne siguiel zho glit José me lo cruz.

⁵⁹ Dzigo güey José. Blozhse blit José me lo cruz, laa José neyle tib lë lar cub, pchel José me lar co, ⁶⁰ güeyxob José me tib leñ baa ne nacchen José ndieen tib cho quie gax ga; tib baa cuba. Blozhse bdzig José tib quie nroob bioog ro baa co, laa José zey. ⁶¹ Laa Marí Magdal bii biala ga, grop me stib Marí ne nacgrop me ga; zobse zho gax ro baa co.

⁶² Biini liu co, pcaalsa grë pxoz rnabey, grë zho zha farisé, güey zho lo Pilat, ⁶³ rëb zho:

—Gun luu dispensar, laa no ziaadaque lo luu stib. Naraa rsoladz no, len dze ne bii mban men ntseeb ne sca biaadquidie miech ga, rëb me, zeene gac tson ngbidz guet me laa me grieaban. ⁶⁴ Gane ziaad no lo luu, bzhiguiel pxeel zha ne yquiaanap ro baan me haxta gac tson ngbidz co; sac nend tsie zha ne nac xpëëdsuel me tsiebee zho me, lozh ga guiab zho laa me brieaban. Nanle luu ganle, tel gac min co, cho gnë peraa gzhixcuaa zho.

⁶⁵ Dzigo rëbchaa Pilat lo zho:

—Telne sca racladz to, laa tib partid menguiib ndxie i. Goltsienie zho, golguiab lo zho yquiaanap zhow tel zha racladz to.

⁶⁶ Dzigo laa zho zie zienie zho grë menguiib co. Bdziñ zho bloo zho tib bey cho quie ne niog ro baan Jesús ga, par glu tel cho zha ne tsiegaala, ni biaan grë menguiib co yquiaanapa.

28

BRIEEBAN JESUS

(Mr. 16:1-8; Lc. 24:1-12; Jn. 20:1-10)

¹ Zna dze goc dze ne rdziiladz zho lo dziin ga, biini liu, dze ne rsilo zhmal, silgaw zie Mari Magdal grop me stib Mari co zieso zho ro baan Jesús.

² Lëëtaaque hor co bni tib zhodox, lo zho co biet tib xanjil Dios gbaa bdoob me quie nroob ne niog ro baa co, bdiix mew tib lad, bzobga me lada. ³ Masaque rlu me zigne rlu belye, xab mew, nquitsbie rnaw, zig rlu zaatne ndxie guieg. ⁴ Grë menguiib ne quianap ro baa ga, zeene gon zho anjl co, per nli bdzieb zho, rzhidz zho. Lo dzeb co, pcowgash zho, grëse zho biab liu. ⁵ Zeene laa grop wnaa co bdziñ, rëbchaa anjl co lo zho:

—Gdziebde to. Nanle naa Jesús men ne pquiaa zho lo cruz ga, men co ziaadguib to. ⁶ Per guienle me nu, jlaa me brieabanle zigne bneele me ga! Golwi ganle nu nac zaatne pxob zho me. ⁷ Niinagash goltsie goltsienie diidz lo xpëëdsuel me, golguiab lo zho laa me brieabanle. Galilé me cuëz me zho, ga gan zho me. Laa to nanlew nasca.

⁸ Lëëled briece grop wnaa co ga, rias zho laa zho zienie diidz lo xpëëdsuel me; lala rdzieb zho, ni lala rley zho. ⁹ Laa zho zie, tibaque zeene gon zho laa Jesús zole lo zho, ine pquiaabdiuzh me zho. Horco wbig zho pquitsgzhib zho lo me, bdeedz zho ni me. ¹⁰ Dzigo rëbchaa me lo zho:

—Gdziebde to. Goltsie goltsienie diidz lo grë zha bets naa, golguiab lo zho tsie zho Galilé, ga gan zho naa.

¹¹ Horcoraa laa bla zhaguiib ne pquianap ro baan Jesús ga bdziñ lad guiedz. Güey zho lo grë pxoz rnabey, bzodiidz zho zha gon zho bzhial ro baa co. ¹²⁻¹³ Dzigo pcaalsa

grë pxoz co grë zho zha ne nac zha non lo menguedz, dien zha gun zho. Nacne biaan zho diidz, mazd gdeed zho dimi lo grë menguiib co, parne gneelid zho, sinque guiab zho, segur xpëëdsuelaque me güeybee me len baa, per biend zhow sac nixguies zho. Nroob dimi bdeed zho lo grë menguiib co, ¹⁴ rëb zho:

—Peet tsienied guic to, niicle telne gon gobernadora na no guionee lo me, zeena peet gund me to.

¹⁵ Dimi co pcaania zho, dzigo laa zho psilo pxoon diidz co zigne rëbse grë zha co lo zho. Grë zha Israel ne bina len dze co, masaque bliladz zho nli sca goca, jni haxta lo nadze sca zienie guic zho!

¹⁶ Zeene bdziñ dze ne gdieelo Jesús xpëëdsuel me nëz Galilé, briece gza tsiptib zha ne bzo gaxpaa lo me ga, güey zho nëz co; bdziñ zho guic gui ne rëble me ga gdieelo me zho. ¹⁷ Zeene gon zho me pquitsgzhib zho liu.

Lo grë zha ne ndxie ga, no zho rienpaa lëë me ga, nogaa zha ne bii racchop guic. ¹⁸ Dzigo wbig me lo zho, rëb me:

—Laa to gonle nasca naa rnabey. Grëse ncuaane no gbaaw, nogaa guidzliuw, ladz-nia naa psan Pxoz naaw. ¹⁹ Niina nagon, laa naa rsan diidz lo to: goltsie dipse lo guidzliu, goltsieseed miech gac zho zha ne sëëb xnëz naa, golchoobnis zho, golguiab lo zho lëë min co rnabey Pxoz naa, rnabey naa ne nac Xpëed me, ni rnabeygaa Espiritu Sant. ²⁰ Golseed zho gban zho, grëse mine bnabey naa to gun to. Min co rsan naa diidz lo to gun to; ni gacnan to ganle, ib csaand naa to, gzataa dzew niicle haxta dze ne nitlo guidzliuw, naa gacnie to.

XTIIDZ NDZON DIOS MIÑE PQUIAA MARCW

¹ Nu ganle laa naa csilo gzodiidz naa, miñe been Jesús, Men ne bneee Dios cxeel me lo guidzliu.

² Lo guits ne pquiaa Isá, tib men ne bi-adteed xtiidz Dios padzeela, lo co zhubnee ganle ible laa Dios no cxeel me. Rneew, glo cxeel me tib zha ne tedner, guiaadnie diidz. Znu zhubnee lo guits co:

Sxel naa tib zha ne tedner lo luu, zeena zha co gzhixcuua nēz ne ted luu.

³ Dan tso zho,

zon miech zeene laa tsi zho zēeb gnee zho:

“Golzhixcuua nēz ne ted men ne rnabey, golsaan grē guieIntseeb ne run to.”

⁴ Ni nligaa scase goca, zeene laa Juan Bautist baaad, dan bio me rchoobnis me miech; rnee me lo zho csaan zho xquieIntseeb zho gbig zho lo Dios, ni chobnis zho, zeena csilaa Dios zho lo grētaa xtoł zho.

⁵ Dzigo rriee miech grē guiedz ne ngab Judé, dib lad guiedz Jerusalén, rieuquiaadiag zho zhiwseed me; ni rxobdoł zho grē xtoł zho, dzigo rchoobnis me zho len guiubee Jordán.

⁶ Guits lad camell niaa xab me, ncuuañe rzhidoo len me guid niaaw ni niapse nguzhanch ni dzin dan row me. ⁷ Zeene rseed me grē miech co, rnee me lo zho:

—Iraa ziaad men ne mazdraa non lo naa. Tel naa peet nond naa, tib guieInzaac nroob ga yгаа naa telne niaca miñe griello maase lab me glit naa; per na ni min co rdziñd naa.

⁸ Laa naa rchoobnis to niina con nis; sangue me con Espiritu Sant choobnis me to.

Brobnis Jesús

(Mt. 3:13-17; 4:1-17; Lc. 3:21-22; 4:1-15)

⁹ Len ngbidz coquew, laa Jesús briece guiedz Nazaret xtan zha Galilé, güey me pchoobnis Juan me len guiubee Jordán.

¹⁰ Laa me norieedze lo nis, zeene gon me laa zhan gbaa bzhial, laa men ne nac Espiritu Sant biet gbaa zig tib palom laa me ziad-zēeb guic me. ¹¹ Ni lēetaque zēeb tib tsi men co gbaa, rnee me:

—Xin, rleynie naa luu gon, nziuu luu lo naa.

¹² Zeene blozh brobnis me, dzigo güeynie Espiritu Sant me tib dan ngan, zaatne no grē ma ntseeb; ¹³ bio me ga choo ngbidz. Ga no me güey Satanás (ma ne rnabey lo grēse mendox), gocladz ma niungüet ma me.

Bdedse ga, güey grē xanjł Dios güeygan zho me.

¹⁴ Len ngbidz co bnabey Herod bio Juan ladzguib. Ladzguible no Juan zeene briece Jesús güeyted me grē guiedz ne ngab Galilé

güeyseed me miech Xtiidz Ndzon Dios, ¹⁵ rnee me lo zho:

—Laa dze ne gnabey Dios ziaadgaxle, laaw bdziñ dzele. jGolsaan grē xquieIntseeb to, gołnab perdon lo Dios; dib zdoos to gołiladz Xtiidz me!

Tap zha ne quia gooz me!

(Mt. 4:18-22; Lc. 5:1-11)

¹⁶ Tib dze zieded Jesús ro Nisdoos ne lē Galilé, gon me laa Simón grop Ndrés quia gooz mel lo nis co; sac ible dziin co nac xtsiin zho. Grop bets zho laa zho noron güey ne rgaa mel lo nis. ¹⁷ Dzigo bredz me zho, rēb me lo zho:

—jGolhtë, gołtēnał zhits naa! jLaa naa cxeel to tsi to stib gooz, tsietop to grē miech ne sēeb xnēz Dios!

¹⁸ Horcogazh psan zho guix ne rnaaz zho mel ga, laa zho zienał zhits me.

¹⁹ Zhisaque bzē Jesús ro nis co, gon me laa Jacob ni Juan no tib len barcw noquiaabdie zho guix ne rnaaz zho mel, lēē grop xingan Zebedé ga; ²⁰ dzigo bredz me zho. Zigne bredz me zho, zoque Zebedé lo barcw ga grē xmoz Zebedé, laa zho zienał zhits me.

Tib mgui ne nosacsi mendox.

(Lc. 4:31-37)

²¹ Laa zho bdziñ guiedz ne lē Capernaum. Zeene goł dze ne rdziiladz zho lo dziin nēz Israel, güey Jesús yadoo win ne zob lad guiedz co güeyseed me miech. ²² Grē miech ne ndxie len yadoo ga, rzee zdoos zho ran zho zha rnee me, sac rlu men rnabey nac me; led yed me rseed zigne rseed grē zha ne nac maistr ley.

²³ Lad grē miech co no tib mgui ne nosacsi mendox, tibaque zeene nguedz pcooptsie ma mgui, ²⁴ rnee ma:

—jPe gun luu no Jesús Nazaren? jZiaad luu lēē par gnitlo luu no? Runbey naa luu, tib men peet xtołd nac luu ni Dios pxeel luu.

²⁵ Dzigo goctox Jesús lo ma, rēb me:

—jPsiog ro luu! jNa zeena psaan men qui!

²⁶ Horco masaque beenxkidz ma mgui co, ni rquiaadan ma redz laa ma psaan mgui. ²⁷ Grēse miech ne ndxie ga, bzee zdoos zho rnabdiidzlsa zho rnee zho:

—jBay cho nac men qui? jWseed cub i gon ziaadnie me! jRlu zha rnabey nac me, zha haxta menđox rdzieb zeene ractox me lo ma!

²⁸ Znuse brieets bliaał diidz zha beenguiaac Jesús mgui co; grēse guiedz ne ngab Galilé gocnañ miecha.

Biac xniadzoop Simón Pedr

(Mt. 8:14-17; Lc. 4:38-41)

²⁹ Ga briece Jesús güey me lidz Simón grop Ndrés gza me Jacob ni Juan. ³⁰ Bdziñ zho, lēetaque laa xniadzoop Simón nix rlan xlēē, nacne rēb zhow lo me. ³¹ Dzigo bded me

zaatne nix zhuz co, bzheñ me nia me, blische me me. Horcogazh laa zhixlëë me blëz, guche me ga psilo me beenlo ncuuañe dow zho.

³² Ziedzele dzew, laa ngbidz rzëëblew, zeene psilo grë miech co zo zo rdzinnie zho grë meñ rzacnë, grë zha ne nosacsi mendox ne; bioogse ro yu co ndxie miech. ³³ Zootle zig grëse miech ne no lad guiedz co pcaalsa ga.

³⁴ Ndal grë meñ rzacnë co zhaase zhaase guelguidz ne rzac zho, per beenguiac Jesús zho; zha ne nosacsi mendox, beñcxooñ me grë mendox ne nosacsi zho. Goctox me lo ma, ib bdeete me diidz nee ma cho nac me, sac runbey ma me.

*Pseed Jesús miech Galilé
(Lc. 4:42-44)*

³⁵ Silgaw, scase bii ncow rnaw guche Jesús brieë me lad guiedz co, güey me zaatne guiendraa miech, güeyzodiidznie me Dios. ³⁶ Zeene rnit me choof guiend; dzigo brieë Simón ni zla zha ne nacgza Simón güeyguib zho me. ³⁷ Zeene bdziel me, rëbchaa zho lo me laa grë miech co quiaquible me.

³⁸ Dzigo pquiab me rëb me lo zho:
—¡Sca ye! Per ib laa ne none gon guio grëraa guiedz ne ndxie dib gax nu, zeena ye grë guiedz qui gnee naa Xtiidz Dios lo miech; sac ible min co pxeel me naa zial naa lo guidzliu.

³⁹ Dzigo güey zho grëse guiedz ne ngab Galilé. Zaatne rdziñtaa zho, rie me grëse yadoo win ne zob lad guiedz rseed me grë miech co Xtiidz Dios, ni runcxooñ me grë mendox ne nosacsi miech.

*Biac tib mgui ne rlan lepr
(Mt. 8:1-4; Lc. 5:12-16)*

⁴⁰ Tib vuelt, wbig tib mgui ne rlan guiedz-dox ne lë lepr lo Jesús (masaque riaa) dipse guid lad mgui), pquiitsgzhib mgui lo me, rëb mgui:

—Tebaa siguiëel luu gunguiac luu naa.
⁴¹ Pquia zdoo Jesús mgui, pxobnia me guic mgui rëb me:
—Zunguiac naa luu. ¡Niinagazh laa luu guiaanmbel!

⁴² Zigne sca bnee me laa mgui co biac, mbese biaan xcuerp mgui. ⁴³ Blozh ga bzonëz me mgui, ni pso me diidz lo mgui ⁴⁴ rëb me:

—Bina ganle, choot lo gzodiidz luu gon zha biac luu. Bzë, güey lo pxoz, güeyson gon ne rnabey xley Moisés gdeed luu; zeena gan zho ganle laa luu biacle.

⁴⁵ Ni zigne brieë mgui ga, psilo mgui grë lo miech bzodiidz mgui zha biac mgui. Grëse miech gočnaña, nacne brielodraa nenlo ndziñ Jesús grë lad guiedz co. Mine been me, blëz me zaatne choot miech guiend;

per niicle scaw, miech guizhiu ne rrieë grë guiedz co rdziñ lo me.

2

*Biac tib meñ ne gutoo
(Mt. 9:1-8; Lc. 5:17-26)*

¹ Goc bla dzew, laa Jesús biire bdziñ lad guiedz Capernaum stib. Zeene bin zho laa me bdziñ ro yu, ² miech guizhiu ne pcaalsa zaatne no me ga, haxta ro yu ndxie grë miech co; dzigo psilo me noseed me zho Xtiidz Dios.

³ Laa grë miech co ndxie ga, zeene bdziñ tap zha bgui ney zho stib meñ bgui, zhoobse me lo yag, ib gacd së me sac dipse me gutoo. ⁴ Ni ne scataa miech guizhiu ne ndxie, gacd ted zho nëz ro yu gdzinnie zho me lo Jesús, nacne biepaque zho guic yu. Pخال zho ngali zaatne zob Jesús, dzigo ga pteed zho meñ co dib yag ne zhoob me ga. ⁵ Zeene gon Jesús ne nli dib zdoo zho riladz zho me gunguiac meñ rzacnë co, dzigo rëbchaa me lo meñ co:
—Xin, niinagazh laa naa gun perdon grëse xtoñ luu.

⁶ Blalaa zha ne nac maistr ley zob ga, zeene bin zho sca rëb me lo meñ rzacnë co, bzachaa zdoo zho: ⁷ “¡Lëda i gon squi rnee meñ qui! Quiaquitnie me Dios i squi rzë xtiidz me. ¡Tibaque meñ ne run perdon xtoñ miech, ni lëë meñ co nac Dios!”

⁸ Bienga Jesús sca rza zdoo zho, dzigo rëbchaa me:

—¡Pe nacne rlëë to ron to mine rne naa?
⁹ Parga nli, cholze zha ne zac guiab: “Laa naa gun perdon grëse xtoñ luu.” ¹⁰ Per laa naa glu lo to ganle, naa ne nac naa Meñ ne pxeel Dios zial naa lo guidzliu, ible naa no gun miech perdon.

Dzigo bnee me lo meñ rzacnë co, rëb me:
¹¹ —¡Guche i, bi yag ne bzhoob luu i, zeen bzë!

¹² Zigne sca bnee me laa mgui co bzoli, blis me yag co, grop lo grë miech co gon zho laa me brieë ga, laa me zey. Grëse zho rzee zdoo zho, rleynie zho Dios rnee zho:

—¡Nasi laa ne nodzian ncuuañe gard dzian ne!

*Bredz Jesús Leví
(Mt. 9:9-13; Lc. 5:27-32)*

¹³ Blozh ga, laa Jesús brieë ga laa me zie nëz ro nisdoo stib; nzian miech ne pcaalsa lo me ga, dzigo pseed me zho.

¹⁴ Ro nis co ziezë me gon me Leví, xingan Alfé, zob Leví zaatne rietizh zho contribution, dzigo bredz me Leví tsienal Leví zhits me. Guso Leví ga, laa Leví zienal.

¹⁵ Bded ga, bredz Leví me güey me tib wagw lidz Leví. Grë zha ne nac recaudador, grë zha ne zëëb diidz nac zha yozh, tipse lo mezh bzobnie me zho grë xpëëdscuel me; sac ndal grë zha co zienal zhits me.

¹⁶ Blalaa maistr ley ne nacgrê zha farisé, gon zho sca tipse noyownie Jesús grê zha co; bded ga, rêbchaa zho lo xpëëdsuel me:

—iMod sca na rownie xmaistr to grê zha ngoopdol, grê zha beed ne nac recaudador!
¹⁷ Dzigo rêbchaa Jesús lo zho:

—Nanle to ganle, men ne run rmed, zaatne no zha ne rzacnê, ga rquiin zho, çniacxe squiin zho zaatne no zha ne ndip ndaan? Ni min co rac niina, tel naa zialguibd naa miech wen, sinque laa naa zialguib miech ngoopdol.

*çPe nacne rcuand xpëëdsuel Jesús?
(Mt. 9:14-17; Lc. 5:33-39)*

¹⁸ Lëëtaaque dze co nocuan xpëëdsuel Juan Bautist, grê zho zha farisé. Dzigo bdzin bla zha ne bnabdiidz lo Jesús, rêb zho:

—çPe nac waa ib rcuand xpëëdsuel luu? Zha grê xpëëdsuel Juan Bautist ni grê zha farisé, rcuan zho.

¹⁹ Pquiab Jesús, rêb me:

—Zaatne nadien noyac tib guieltsieel, çpe niacxe lega csilo grê zha ne ndxie lo lni tso zho guielnê, ycuan zho ni ran zho laa mgui ne notsieelnia mban? ²⁰ Per zdziñ dze zeene laa mgui co gbiche; ni zeene laa dze co gdziñ, dzigosi nagon rieguial tso zho guielnê, rieguial ycuan zho.

²¹ Ranle to ganle, zha ne rquiaabdie tib lê lar, rquiaad zho lar cub lad lar gox, sac zha ne sca gun paat yquiind wquiaabdie co. Zeene laa lar cub gbe, lëëque lëëw gunnat zaatne nriez lar gox. ²² Scaque tsod zha ne cotsow vin cub tib len guid ne padzeelale noquiin, sac stsiez vin cuba; dzigo nicle guid cow, niicle vingaa w laaw nitlo ga. Gacxe, tel vin cuba none len guid cubaque tsotsowa.

*Ptop xpëëdsuel Jesús mzion zhobxtil
(Mt. 12:1-8; Lc. 6:1-5)*

²³ Tib dze ne rdziiladz zho lo dziin nêz Israel, bdednie Jesús xpëëdsuel me zaatne zëëb zhobxtil, dzigo zigse zieded zho pchoo zho palal mzion zhobxtil co. ²⁴ Gon zha farisew, dzigo rêbchaa zho:

—iLêda i gon noyun to! iGolguien ganle dze nda nac dze rii!

²⁵ Dzigo pquiab Jesús, rêb me:

—çPe gard glab to zaatne ziaad ganle zha been rey David tib dze zeene pcaabedz me grê me zha ne ziegza me, ni zienied zho pe gow zho? ²⁶ Rneew, bzëëb me len yadoo güey nab me quietxtil ne nac gon, downie me grê zha ne ziegza me ga, ni loxaque zha ne nace pxoz row quietxtil co. Len iz co nac men ne lê Abiatar pxoz nroob. ²⁷ Golgacnañ sca ganle, biaan dze rii par csacsi miech xcuerp zho, sinque ne rleynie Dios miech gane psan mew. ²⁸ Naa ne nac naa Men ne pxeel Dios zial naa lo guidzliu, naa rnabey

dze rii, nanpaa naa pe nac mine nonguiel gac.

3

*Biac tib mgui ne mband tib nia
(Mt. 12:9-14; Lc. 6:6-11)*

¹ Gol stib dze ne rdziiladz zho lo dziin, güey Jesús len yadoo win ne zob lad guiedz co. Lad grê miech ne no len yadoo co, no tib mgui ne mband tib nia. ² Nzian zha ne ndxie ga, quialeets zho Jesús dien pe zunguiac me nia mgui co dze ne rdziiladz zho lo dziin. Quiambëz zho dien pe gun me, par gdziel pe yquiaaqui zho me. ³ Dzigo bredz me mgui co, bnabey me bzo mgui groltaa lo grê zha ne ndxie ga; ⁴ blozh ga rêbchaa me lo zho:

—çPe nadien rzac to nonguiel gun ne dze rii? çPe nonguiela gun ne ncuaane yquiin, te nonguiela gun ne guielntseeb ye? Zig nac samiech ne zha ne noxtseeb xquielmban, çpe maase csaan ne guet zho?

Ni tib zho pquiabd. ⁵ Dze bui me lo zho grêse zho, wbinladz guic me, ni mban goc zdo me gon me scataa ntseeb zdo zho; dzigo rêb me lo mgui co:

—Bzigaa nia luu.

Zigne bzigaa mgui nia mgui, laaw biac.

⁶ Grê zha farisé, ni grê zha ne nacnie rey Herod, zigne brieë zho ga laa zho psilo bnediidz dien zha gdeeda diidz gut zho Jesús.

⁷ Len dze co, tib vuel t bdziñ Jesús ro nidoo grê xpëëdsuel me. Miech guizhiu ne nal zhits zho, ga zie grê zha ne ziaad nêz Galilé, grê zha ne ziaad nêz Judé, ⁸ grê zha Jerusalén, grê zha ne ziaad nêz Idumé, grê zha no dib nêz dan ro guibee Jordán, grê zha ne no dib gax guiedz Tiro ni guiedz Sidón. Miech guizhiuw, sac ron zho grêtaa milagr ne run me.

⁹ Dzigo bnabey Jesús xpëëdsuel me, yguib zho tib len barcw zaatne gac so me zeena ctaagwd grê miech co me. ¹⁰ Zëëble diidz ndal miech ziyunguiac me, dzigo grêse zha ne rlan pe guielguidz, rbigbe zho dien zha grielo maase lad xab me xen zho.

¹¹ Grê mendox ne noguitnie miech, zeene ran ma me, runquitsgzhib ma zha ne noguitnie ma lo me ni rquiaadan ma redz rnee ma:

—iXpëëd Dios nac luu!

¹² Per ractox me lo ma, rsaand me gnee ma parne xoobnend cho nac me.

*Ble Jesús gza tsiipchop xpëëdsuel me
(Mt. 10:1-4; Lc. 6:12-16)*

¹³ Blozh ga biep me tib guic gui win zob ga, ga bredz me zha ne gocladzse me. Zeene pcaalsa zho grê zho, ¹⁴ dzigo lad co ble me tsiipchop zha ne sênie me, zha ne cxeel me tsieseed miech Xtiiidz Dios. Lëë zha co

bleelë me poxtl, ¹⁵ ni bdeed me poder lo zho guñcxoon zho mendox.

¹⁶⁻¹⁹ Znu lë gza tsiipchop zha ne ble me ga: Simón (lëë Simón co bleelë me Pedr), Jacob ni Juan (xingan Zebedé, zha ne bleelë me “Zhin Nguzi” “Boanerj”).

Ndrés,

Lip,

Bartol,

Matew,

Mazh,

Jacob (xingan Alfé),

Tadé,

Simón (zha ne nacgrë zha ne racladz cuee zha Roma xtan zho)

ni Judas Iscariot (zha ne güeyto me).

Rëb zho mendox nacie Jesús

(Mt. 12:22-32, 46-50; Lc. 8:19-21; 11:14-23; 12:10)

²⁰ Wbire Jesús ga, laa me bdzin ro yu grë me zho. Scaaque ndal miech ne pcaalsa ga stib, ni rdeetew diidz gownie me zho. ²¹ Zeene bin menlidz mew, dzigo briece zho zixi zho me, sac rëb zho bod rzhinle guic me.

²² Haxta grë maistr ley, zha ne briece nëz Jerusalén bdzin ga, rnee zho:

—Beelzebú, ma ne rnabey lo mendox, ma co nacie me gane rrieelo runcxoon me mendox.

²³ Dzigo bredz me zho bzodiidz me tib cuent lo zho, rëb me:

—¿Pa nan to na grieelo lëëque mendox guñcxoon samendox ma? ²⁴ Tel tib guiedz nadien gac miech chop dii, csilo zho tilsa zho, ¿niacxe nitlod guiedz co? ²⁵ Tib diigaa miecha, tel csilo zho lëëque zha tilnie menlidz zho, ¿niacxe nitlod zho? ²⁶ Scaaquegaa mendox nagon, telne lëëque lëë ma tilnie samendox ma, ipe nale na bnitlo ma! ²⁷ Masaque nac mendox zig tib zha ne no xfuers, zha ne gacladz cuee grë ncuaañe no lidz zha co, none cxidoogazh zho zho.

²⁸ Gneli naa lo to ganle, grëse dol ne run miech, grë tel zha rguie zho, rdzibdee zho, bii zun Dios zho perdon min co; ²⁹ sangue zha ne gneenë Espiritu Sant, dol nroob ga run zho, gdzind dze ne guñ Dios zho perdon.

³⁰ Sca rëb me lo zho, sac sca quianee zho rëb zho mendox nacie me.

³¹ Horco laa xniaa me ni zha bets me bdzin, per leyse blëz zho; dzigo pxeel zho zha ne zietsedz me. ³² Blalaa zha ne zob gaxpaa lo me, zha co been vis rëb zho:

—Laa xniaa luu gon, ni zha bets luu ziaadguib luu.

³³ Pquiab me rëb me:

—¿Xnia naa ye, bets naa ye?

³⁴ Dze bui me lo grë zha ne ndxie ga, dzigo rëbchaa me:

—To gon nac xnia naa, to nac bets naa. ³⁵ Sac grëse zha ne run mine racladz Dios, lëë bets naa ga, lëë bzian naa ga, lëë xnia naa ga.

4

Xcuent zha ne güey gon

(Mt. 13:1-23; Lc. 8:4-15)

¹ Dze coquew, laa Jesús psilo quiaseed miech zaatne nac ro Nisdoo Galilé ga. Miech guizhiu ne pcaalsa lo me, nacie güeytsep me tib len barcw ne zo ro nis co, ga bzob me laa grë miech co bre tib ro nis. ² Ndal grë ncuaañe pseed me zho, per niapse con cuent rnee mew lo zho. Lëë tib cuent ne bzodiidz me ga nu, rëb me:

³ —¡Golquiaadiaga ganle! Tib mgui name, briece me güey me gon zhoxtil. ⁴ Zeene laa me quialaal zho co, mine bliaal gax ro nëz; znuse güey grë mguin güeytow maw.

⁵ Laa mine bliaal zaatne nac lo quie, znuse znuse blana; ⁶ per zeene laa lo ngbidz briece, znusaque bgoola blozh ga bidzgaw; sac guien nroob low. ⁷ Laa mine bliaal zaatne nac len yag guiets, zeene laa grë yag guiets co broob znuse bnitlo yag guietsa, pasëw niac. ⁸ Sangue grë mine bliaal zaatne nac lo liu naal, blana, brooba ni goca; lo tib tib zho co no mzion co briece galptsii zho, now briece tsongala, nogaaw briece haxta tib gayoow.

⁹ Blozh ga, rëbchaa me lo zho:

—Zha ne racladz guien mine rne naa, yquiaadiag zhow.

¹⁰ Zeene laa grë miech co zey, laa gza tsiipchop xpëedscuel me, ni zla zha ne rzënie me, laa zho bnabdiidz lo me dien zha nac cuent co. ¹¹ Dzigo rëbchaa me lo zho:

—Tel to, Dioszhal rlu lo to zha rnabey me, niicle ncuaañe mazdraa ngeetsa; laa lo grëraa miech ne gard gbig lo me niapse con cuent rzodiidz naaw lo zho parne guien zhow. ¹² Per niicle scaw, nzhal diag zho ron zho, per peet riend zho; nzhal lo zho rwi zho, per peet rand zho; ib nëd zho gbig zho lo Dios, gnab zho guñ me zho perdon.

¹³ Nana to, telne biende to zha nac cuent co, ¿zha guien to grëraa mine gne naa dzigo? Golquiaadiaga ganle, znu gon naca: ¹⁴ Mgui ne güeylaal zho ga, rrieequia lëë zha ne rienne Xtiidz Dios lo miech ga, laa zhoxtil co nac Xtiidz Dios. ¹⁵ No miech nac zig nac ro nëz ne bliaal palal zho co: rquiaadiag zho Xtiidz Dios, rlozh ga lëëlëd rdzin mendox rquiil ma zho, rsaanga zhow. ¹⁶ Nogaa zho nac zigne nac lo quie co: zeene rquiaadiag zho Xtiidz Dios, ine rley zho rcaania zhow, ¹⁷ per led dib zdood zho rcaania zhow; gane zeene laa miech rsilo rlëë lo zho, laa miech rtsidil zho porne rliladz zhow, laa miech rtsidil zho porne rliladz zhow, rsaanga zhow. ¹⁸ Zzhisgaa zho nac zigne

nac len yag guiets co: nli rquiaadiag zho Xti-idz Dios,¹⁹ per rsilo zho lej grē ncuaaane no lo guidzliu rii mazdraa rionie guic zho, rquidie grē dimi zho, rzoobladz zho yquianie zho grēse ncuaaane racladz zho. Grē ncuaaan co rioxcoraa zho, laa ne tsonie Xtiidz Dios guic zho, min co rquiaqui ib runđ zho mine rnabey me.²⁰ Laa nogaa zho nac zigne nac liu naal co: rquiaadiag zho Xtiidz Dios, dib zdoo zho riladz zhow, ni rban zhow zigne naca. Grē zha co, no zho nac zig mzion ne briece galptsii zhob ga, no zho nac zig mine briece tsongala, nogaa zho nac zig mine briece tib gayoow ga.

Xcuent biini ni midz moxtaz

(Mt. 13:31-32, 34-35; Lc. 8:16-18; 13:18-19)

²¹ Blozh ga, biire pcaalsa miech lo me, dzigo rēb me lo zho:

—¿Pa dien rquiin biini? ¿Pe rquiaqui w par tsolana tib len guin o soogaaw tib zhan lon? Led zeene rquiaqui w lēē, zaatne grieelo gzi-iniw ga rzoob zhow.²² Scaque nagon grēse ncuaaane rac ngeuetsa, grēse ncuaaane rnee miech zhliiaana, ib none xoobneña.

²³ Telne racladz to guien to mine rne naa, golquiaadiaga; ²⁴ ni zigne ron tow scagaa goltsoxco golguña. Telne tsoxco to guin tow, scagaa zioquicraa tow.²⁵ Sac zha ne tsox-cow, zdedraa Dios guielbiini lo zho; sangue zha ne tsoxcoda, haxta tel palalse guielbiini ne bdeed me lo zho stiche mew.

²⁶ Ni rēb me lo zho:

—Znu gon nac zha ne ngab lo Dios; nac zho zig bni ne ran miech.²⁷ Zha ne rielaal bni co, liu row, liu riini, laa zho raaguies, laa zho rieche. Sca sca laa dze zie, laa bni co ratslo, laaw rlan, laaw roob, per riend zho zha nacne laaw roob.

²⁸ 'Zhal guidzliu rdeeda guielnzaac co, guizh nac zhob co zeene rлана, rac palal dzew laaw rlan mzion.²⁹ Laa zeene laaw ral, dzigo laa zho rietiitsa, sac laa dze bdziñle ne laaw tsas.

³⁰ ¿Zha ganle gni naa lo to zeena guien to zha nac xquielrnabey Dios? —rēb Jesús—. ¿Pa tib cuent ganle gzodiidz naa lo to zeena guien to zha naca? ³¹ Naca gon zigne nac tib midz moxtaz ne ran miech dan rii. Midz moxtaz nac midz ne mazdraa win,³² ni tel gacbniw, rrooba, ni lēēw rroobraa lo grē guizh ne ran zho ro yu, haxta grē mguin riezaa zhiptsieez ma low sacne ncala.

³³ Nzian grē cuent rii pquiin me par cseed me grē miech co, ni laa me bnee mine rgebey me guien zho.³⁴ Niapse sca rseed me zho, laa zha ne nac xpēēdsuel me, zeene zhasew rnee mew lo zho zigne naca.

Pcuēz Jesús tib medox

(Mt. 8:23-27; Lc. 8:22-25)

³⁵ Zeene bdze dze co, rguetsle liuw rēbchaa me lo xpēēdsuel me:

—Golgotsaa dieedquia ne stib nēz lo nis rii.

³⁶ Blozhse bnee me lo grē miech co, laa zho biepe len barcw ne zob me ga grē me zho, laa zho zie. Ye blalaa barcw ne zob lo nis co zianał.

³⁷ Laa zho zie, tibaque zeene laa tib medox psilo briece, masaque rlis me lo nis co; zeene riasoli low riechoona len barcw, laa barcw psilo noyodzēle nis.³⁸ Dzigo güey zho güeycuuan zho Jesús, sac lēētaque laa me nixguies nēz zhan barcw ncoogse me tib lmad.

—¡Maestro! —rēb zho—. Bui ganle, ¿pe znuse csaan luu nitlo ne nu?

³⁹ Dzigo guche Jesús, bnee me lo me co, bnee me lo nis co, rēb me:

—¡Lēēw ga na! ¡Golcuedze!

Zigne sca bnee me, laa me co blēz, niicle nis cow laaw bredze.⁴⁰ Dzigo rēbchaa me lo zho:

—¿Pe nacne squitaa rdzieb to? ¡Gardaque dzigo lēē giladz to cho nac naa!

⁴¹ Riendraa zho zha guñ zho lo dzeb co, ni rnabdiidzlsa zho rnee zho:

—¿Bay cho nac me, zha nacne haxta me, haxta nisdoo ron xtiidz me?

5

Men Gadar ne nosacsi mendox

(Mt. 8:28-34; Lc. 8:26-39)

¹ Bdziñ Jesús nēz dan ro nisdoo co gza xpēēdsuel me, ga nac xtan zha Gadar.² Laa me bietdze len barcw, zeene laa tib mgui ne nosacsi mendox bdziñ lo me. Len baa briece mgui co bdziñ me ga,³⁻⁴ sac len baa nac zaatne rbēz me. Miech ne lēbd zho low, nzian vuelt ziezoob zho caden nia me, ni me ne, per znuse rchug mew, rzhooñga me. ¡Choot rlēbd lo me! ⁵ Dze, guieel quianzē me grē dan co, rietto me grē len baa. Ropt-siedan me, ni lēēque me rzhen quie rchug me guidlad me.⁶ Laa dze co, zitraa gon me Jesús, rias me bdziñ me pquitsgzhib me lo Jesús.⁷⁻⁸ Dzigo goctox Jesús lo mendox ne noguitnie me, rēb Jesús:

—¡Mendox, psaan men qui!

Horco pcooptsiedan mendox co mgui co, ni rnee ma lo Jesús:

—¿Pe guñ luu naa Jesús? Runbey naa luu, Xpēēd Dios ne no gbaa nac luu. ¡Ne nli pagaa been guielnzaac csacsid luu naa!

⁹ Dzigo bnabdiidz Jesús lo ma dien cho lē ma. Pquiab ma rēb ma:

—Legion lē no, sac nzian nac no.

¹⁰ Rnab grē mendox co lo Jesús, gzonēzd me ma zit.¹¹ Gaxaque zhan gui co ndxie tib dzoon nguts noyow,¹² dzigo bnab ma lo Jesús, rēb ma:

—Bzhiguiel lose grē nguts qui bzonēz no.

¹³ Bdeed Jesús diidz. Dzigo laa grē mendox co psaan mgui co, laa ma zie bzëëb ma zdoo grē nguts ne ndxie ga; psilo grē nguts co rquiaa ma corr güeypix ma glaa tib ro yee ne quia ro nisdoo co, bliaa ma haxta lo nis. Ga biep ma nis, grëse ma gut. Rгаа ma zig chop mil.

¹⁴ Zha ne quianap grē nguts co, gzase zho bzhooñ güeyzodiidz zhow lad guiedz, ni grëraa yu ne zob gax ga. Brieë grē miech co, zieso zho. ¹⁵ Zeene bdziñ zho, per nli bdzieb zho, sac gon zho laa mgui ne sca bdziitnie mendox ga zobse lo Jesús, laa mgui nacwx-able, rlu ndzinle nac guic mgui. ¹⁶ Psilo grē zha ne gon zha biac mgui co, ni zha goc grē nguts co, psilo zho rzodiidz zhow lo grē zha ne bdziñ ga. ¹⁷ Miñ co bin grē zha co, mazd bnab zho lo Jesús siguiel me gbi me xtan zho.

¹⁸ Zeene laa Jesús zie sëëb me leñ barcw, dzigo laa mgui co wbigaque lo me, nañ mgui nziguie me nienal mgui zhits me. ¹⁹ Per bdeete me diidz, rëb me:

—Wbire, güey güeyzodiidz lo grē menlidz luu ganle pa lotaa pquia zdoo Dios luu, zha nactaa milagr nroob ne been me beenguiac me luu.

²⁰ Dzigo wbire mgui. Güey mgui dib xtan zha Decápolis, güeyzodiidz mgui lo grē miech co zha beenguiac Jesús mgui. Grëse zha ne rona, rzee zdoo zho.

*Brieëban xpëdwnaa tib men lë Jair
(Mt. 9:18-26; Lc. 8:40-56)*

²¹ Zeene laa Jesús biire brieëquia stib nëz ro nisdoo co, miech guizhiu ne pcaalsa lo me ga. ²² Ga zo me zeene laa tib men ne nacgrë zha ne rnabey yadoo lë Jair bdziñ. Zigne bdziñ me lo Jesús pquiitsgzhib me, ²³ rëb me:

—Been tib guieInzac gotsaa guio ne gunguiac luu xpëëd naa. Laa win rlozhle; nanpaa naa telne cxobnia luu guic win, ziac win.

²⁴ Dzigo laa Jesús zie nëz lidz men co. Ndal miech ne zienal zhits me, haxta rtaagw zho me. ²⁵ Lad grē miech co zienal tib wnaa, gocle tsiipchop iz rlan me tib guieIguidz, rzac me zigne rzac men wnaa gzob mëë, tibaque rlan mew ib rbëzda. ²⁶ Nzianle lo men ne run rmed ziye me, grëse ncuaañe rap me bloozh me lo rmed; per laa ne cuëz guieIguidz co, leI znu rzhizhooraaw. ²⁷⁻²⁸ Ziyonle me grë milagr ne run Jesús. Bza zdoo me rëb me: “Totsaque yгаа maase lad lar ne mbix me xeen naa, ziaclae naa.” Dzigo bded me lad grē miech co, wbig gax me nëz zhits Jesús, bzheñ me lad lar ne mbix Jesús. ²⁹ Nligaa hor cogazh laa guieIguidz co blëz, bien me laa me biac.

³⁰ Zeene bien Jesús ne laa me beenguiac wnaa co, dzigo ptsire lo me rwi me lo grē miech co, rëb me lo zho:

—¿Cho ga bzheñ lad xab naa?

³¹ Rëbchaa xpëëdsuel me:

—¿Zha nan luu glu dien cho bzheñ lad xab luu, ni squitaa ndaagw ziaad luu lad grē miech qui?

³² Per laa me rwi lo grē miech co dien chow. ³³ Nanpaa wnaa co ne me ga, rdzieb me, rzhidz me laa me wbig pquiitsgzhib me lo Jesús bneeli me zha nacne sca been me.

³⁴ Dzigo rëbchaa Jesús lo me:

—Xin, laa luu biac sacne bliladz luu naa. Bzë na, peet tsieniedraa guic luu, laa guieIguidz co bichele.

³⁵ Laa Jesús bii quianeeque, zeene laa bla zha ne ziaad nëz lidz Jair bdziñ, rëb zho lo Jair:

—Csodziindraa luu lo men qui, laa xpëëd luu gutle.

³⁶ Zeene gon Jesús sca rëb zha co, dzigo bnee me lo Jair rëb me:

—Peet tsienied guic luu. Dib zdoo luu bliladz naa.

³⁷ Psaandraa me cho grē miech co nienal zhits me, loxaque Pedr, Jacob ni Juan bets Jacob; zha cose zienie me.

³⁸ Zeene bdziñ zho lidz men co, tib ruid ne rac, nguidz zëëb tsi zho roon zho no zho xquieInë mëëd co. ³⁹ Dzigo bzëëb Jesús len yu, rëb me lo zho:

—¿Pe nacne squitaa roon to? Goonde to, gon led gute ndzoop win rii, nixguies ndzoop.

⁴⁰ LeI rzhidznie grē miech co me, bin zho sca rëb me. Dzigo bnabey me brieë zho ley grëse zho, loxaque pxoz mëëd co, xnгаа win ni gza tson xpëëdsuel me zha ne nal zhits me ga bzëëbnie me leñ yu ne nix win. ⁴¹ Wbig me bzheñ me nia win, rëb me lo win:

—¿Guche i na, ndzoop yeen! (Talita, cumi.)

⁴² Zigne sca bnee me laa mëëd co guche, laa win bzë. Tib mëëd tsiipchop iza. Grëse miech co per nli rzee zdoo zho. ⁴³ Dzigo pso me diidz lo zho choot lo gneed zhow; blozh ga bnabey me bdeed zho ncuaañe dow mëëd co.

6

Güey Jesús ladz me

(Mt. 13:53-58; Lc. 4:16-30)

¹ Ga brieë Jesús grë xpëëdsuel me, laa me bdziñ Nazaret zaatne nac ladz me.

² Laa zeene goI dze ne rdziiladz zho lo dziin, laa me bdziñ leñ yadoo, psilo me pseed me grē miech co. Per nli rzee zdoo zho ron zho grē miñe rnee me, rnabdiidzla zho rnee zho:

—¿Pazhe waa squitaa pseed men qui? ¿Zha nac guieIbiini ne squitaa rap me i, ne rnee miech ndal grë milagr ne run me? ³ Tib

ngurëyagse name nac me. Led lëë xingan Mari i, bets me name nac Jacob, nac José, nac Judas ni Simón, grë bzian mew, nu no zho grë zho.

Ib beencasd zho me. ⁴ Zeene gon me sca rac zho, dzigo rëb me lo zho:

—Zha ne rteed xtiidz Dios, mazd wen rnee miech lo zho stib dan, stib guiedz, lëdle ladz zho, ni menlidz zho ni menladz zho nëd gunbey zho.

⁵ Brielod niun me nzian milagr ga, blase zha rzacnë pxobnia me guic, beenguic me. ⁶ Bzee zdoo me gon me scataa ndip zdoo zho, ib bliladz zho cho nac me.

Blozh ga mazd güey me grë guiedz ne ndxie gax ga, güeyseed me miech.

Pxeel Jesús xpëëdsuel me tsieseed zho miech

(Mt. 10:5-15; Lc. 9:1-6)

⁷ Tib dze, bredz me gza tsiipchop xpëëdsuel me, bnabey me zho tsieseed zho miech. Pxeel me zho chopga chopga zho, ni bdeed me poder lo zho par guncxoon zho menodox. ⁸ Pso me diidz lo zho güeyd zho pe yquini zho nëz, lëë gdib tib lë yag ne gzoxca zho güey zho. Zig nac ncuanea gow zho, zig nac dimi, pe tib bziuudgaa, güeyd zhow. ⁹ Lab zho, miñe quiaise ni zho; xab zho, miñe nacwse zho mincose tsienie zho. ¹⁰ Ni rëb me lo zho:

—Guiedz ne gdziñ to, zha ne gneedz zatne cuëz to, lidz zha co golcuëz haxta gdziñ dze ne gbi to guiedz co. ¹¹ Laa zaatne ne ib gneedzd zho pa cuëz to, niicle nëdgaa zho yquiaadiag zho miñe gnee to, dzigo gollit grë yudie co ni to, golrieegazh ga, zeena guien zho ganle lëda ga beñ zho.

¹² Dzigo laa zho brieë, laa zho zie. Güey zho, güeynee zho lo grë miech csaan zho xquieintseeb zho, gbig zho lo Dios. ¹³ Nzian zha ne nosacsi menodox, beñcxoon zho menodox co; grë zha ne rzacnë, bdëëb zho nceit guic zho, beenguic zho zho.

Gut Juan Bautist

(Mt. 14:1-12; Lc. 9:7-9)

¹⁴ Bin rey Herod rzeet zho Jesús, sac tel pa lotaaw zëëb diidz grëtaa milagr ne run me. Grë miech co, no zho rzac brieëban Juan Bautist lëë me ga nac Jesús, gane run me grëtaa milagr co; ¹⁵ nogaa zho rnee Liw, meñ ne biaad pteed Xtiidz Dios padzeela; zzhisgaa zho rnee, no cho stib meñ ne ziaad noteed Xtiidz Diosa, zig biaad grë zha ne biaad padzeela.

¹⁶ Zeene ron Herod sca rnee miech, dzigo rnee me:

—Nligaa Juan ga. Naa bnabey pchug zho yan me, per lëë me ga brieëban.

¹⁷⁻¹⁸ Sca rnee Herod sac rsoladz me zha beñ me Juan. Me bnabey bgaa Juan bio Juan ladzguilib, loxaque ne rnee Juan lo me

nonguielda ga lëëque Herodí ptsieelnia me; sac tsieelpaa bets me Lip nac Herodí.

¹⁹ Blëënie wnaa ne nac Herodí ga Juan, rzac me tebaa zha gut me Juan; per rdeetew diidz, ²⁰ sac rdzieb Herod lega pe gun me Juan, rien me tib zha ne zienañ miñe nac diidzli, tib zha ne peet xtoId nac Juan; dzigo ib rdeete me diidz pe gun wnaa co Juan. Niicle ne cadque zeene rnee Juan lo me, rio me zhgab riend me dien zha gun me, per rdziladz me rquiaadiag me grë miñe rnee Juan.

²¹ Laa tibtaa dze laa miñe no guic Herodí ga goc. Dze ne bloozh Herod stib iz, bnabey Herod goc tib lni nroob, bredz me grë zha ne nacie me dziin, grë zha ne zo lo menquuib, ni grë zha non lo zha Galilé. ²²⁻²³ Laa zho no mezh noyow zho, zeene bzëëb xindzoo Herodí psilo ndzoo biee ndzoo. Bdziladz Herod gon me zha biee ndzoo, grë zha ne zob lo mezh ga ne. Dzigo rëb Herod lo ndzoo, tel petaa gnab ndzoo zdeed mew; haxta brieë ro me rëb me:

—Ncuanea gacladztaa luu gnab luu, niicle zig groI grë ncuanea rap naaw, znedz naaw.

²⁴ Rias ndzoo güeynabdiidz ndzoo lo xniaa ndzoo. Dzigo rëbchaa me lo ndzoo:

—Bnab lo me gnabey me tsiechug zho guic Juan gneedz zhow lo luu.

²⁵ Bdziñ ndzoo lo Herod rëb ndzoo:

—Racladz naa xooB guic Juan Bautist tib len plat, gneedz luuw lo naa niinagazh.

²⁶ Zeene bin Herod sca rëb ndzoo, mbanse rac me; per rdeetraaw diidz niab me grieloda, sac grëse zha ne zobnie me ga, bin zho rëb me zdeed me ncuanea gnabtaa ndzoo. ²⁷ Dzigo racse me pxeel me tib menguuib ne tsiechug guic Juan.

²⁸ Güey menguuib co len ladzguuib pchug zho guic Juan. Bdziñ zho, zhoobsew tib len plat bdeed zhow lo ndzoo, dzigo güey ndzoo güeydeed ndzoo pa lo xniaa ndzoo.

²⁹ Zeene bin xpëëdsuel Juana, dzigo güey zho güeylis zho me ga güeyqueets zho me.

Bguiaan Jesús gaay mil miech

(Mt. 14:13-21; Lc. 9:10-17; Jn. 6:1-14)

³⁰ Zeene laa gza xpëëdsuel Jesús bdziñ lo me stib, psilo zho bzodiidz zho lo me grëse tel zha güey zho, grëse tel zha güeyseed zho miech. Per miech guizhiu ne ndxie lo me, zha ne rbi, zha ne rdziñ; haxta ni riobd gow me grë xpëëdsuel me. Dzigo rëb me lo zho:

³¹ —Mazd golgotsaa guio ne tib zaatne zit-laa lo grë miech rii, zeena grielo gdziiladz to niip.

³² Dzigo bzëëb me tib len barcw grë me zho, laa zho zie. ³³ Nzian zha ne gon zie me, beñbey zho ne mew. Dzigo ndal miech ne no grë guiedz gax co brieë, rias zho zie zho glole zho bdziñ zaatne no gdziñ me. ³⁴ Zeene biet me len barcw, gon me laa grë

miech guizhiu co ndxiele ga. Pquia zdo me zho gon me scataa ndxie zho zootle grē mēcwxiil yeen ne guiend xbaxtor, dzigo psilo me nzian grē ncuaaṅe pseed me zho.

³⁵⁻³⁶ Goḷ bdze dze co, wbig xpēēdsuel me lo rēb zho:

—Mazd gudz lo grē miech qui guey zho na, zeena guiob tsie zho grē guiedz ne ndxie dib gax i, tsiesi zho ncuaaṅe gow zho; sac gonṅ laa dze bdzele, ni choot miech guiend nu.

³⁷ Pquiab me rēb me lo zho:

—To goldeed ncuaaṅe gow zho.

Rēbcha zho lo me:

—¿Pe zhi zhe dimi ne yquiiṅ gziuu guietxtil ne gow grētaa miech qui?

³⁸ Dzigo bnabdiidz me lo zho, rēb me:

—¿Bla guietxtil ziaadnie to? ¡Goḷwi dien!

Zeene biire zho güeyso zho, rēbcha zho lo me:

—Loxaque gaay guietxtil ziaad, ni ziaad chop meḷ.

³⁹ Dzigo bnabey me bzob grē miech co, wdzeepaaw bioogse lo guizh nguia ne zēēb ga ndxie zho. Tib dzoonga tib dzoonga zho bre, ⁴⁰ zaatne bre tib gayoo zho, zaatne bregaa groḷ gayoo zho.

⁴¹ Dzigo bzheṅ me gza gaay guietxtil co, ni grop meḷ co, blis lo me bui me nēz gbāa, bdeed me xquizh lo Dios. Blozh ga, beengroḷ me guietxtil co, zigse rdeed mew lo xpēēdsuel me, scase scase noguiiz zhow lo grē miech co. Scaque been me grop meḷ co. ⁴² Grēse miech co, dow zho haxta za-atne bieltaa zdo zho. ⁴³⁻⁴⁴ Miech tafa, zha bguise rgaa zig gaay mil; ni zeene blozh dow zho, scase ncuaaṅe nroob biaan, biodzē tsipchop chicuid bio grē guietxtil co, bio grē meḷ co.

Rzē Jesús lo nisdo

(Mt. 14:22-27, 34-36; Jn. 6:16-21)

⁴⁵ Zeene blozh ga, bnabey Jesús xpēēdsuel me bzēēb zho leṅ barcw, zeena zienerga zho tedquia zho stib nēz ro nis co, gdziṅ zho guiedz ne lē Betsaid; laa me bii blēz ga, nozonēz me grē miech co. ⁴⁶ Blozhse bzonēz me zho, dzigo güey me tib guic gui zob gax ga, güeyzodiidznie me Dios.

⁴⁷ Zig rguets liuw, laa barcw ne zie xpēēdsuel me ga no lo nis co. Laa me zo ga tipse me, ⁴⁸ ran me rlu ib gacd csēēniob zhow, sac rriee me rtsire mew. Merle guimbe liuw, tibaque zeene gon zho laa me bdziṅ zaatne zie zho ga; tib lo nis co ziezē me, rac me zig nac zeene tibted me lo zho.

⁴⁹ Zeene gon zho laa men co sca ziaad-zē lo nis co, bdzieb zho, broptsie zho rnee zho: —¡Tib ndziin i gon ziaad i!

⁵⁰ Sac grēse zho ranlo zho laa me sca ziezē lo nis co. Dzigo bnee me lo zho rēb me:

—¡Gdziebde to, naa zial nu!

⁵¹ Zeene laa me bieṅ leṅ barcw ne zie zho ga, laa me co blēz; dzigo mazdraa bzee zdo zho. ⁵² ¡Per ib rienṅ zho cho nac me, niicle ne gonle zho been me milagr nroob co bguiaaṅ me miech guizhiu co!

⁵³ Zeene laa zho bdziṅ stib nēz ro nis co, zaatne nac xtan zha Genesaret, dzigo laa zho pxidoo xbarcw zho ro nis ga. ⁵⁴ Loxaque biet me leṅ barcw laa grē miech co beenbeyle me. ⁵⁵ Rias zho güey zho grē guiedz co, güeynie zho diidz laa me bdziṅ ga. Dzigo psilo grē miech co rxob zho zhimguidz zho lo yag, rdziṅnie zho zho lo me zaatne rontaa zho no me. ⁵⁶ Zaatne gdziṅtaa me, niicle guiedz nrooba, niicle guiedz lasa, rbee grē miech co zhimguidz zho rienie zho zho zaatne nac leṅ guiedz; ga rnab zho lo me siguiel me maase ni lar ne mbixse me xēṅ grē men rzacnē co. Ni grēse zha ne rzheṅ xab me, riac zho.

7

Ncuaaṅe runctal xtoḷ miech

(Mt. 15:1-20)

¹ Tib dze, bdziṅ bla zha farisé, ni zla maistr ley ne ziaad nēz Jerusalén, lo Jesús. ² Dzigo gon zho blalaa zha ne nac xpēēdsuel Jesús, zeene laa zho row rguibdz zho nia zho zigne nacpaa grē zhiwseed xmengol zho.

³ (Nac zha farisé, ni grēsegaa zha Israel telne tsard nia zho zigne nac xcostumbr xmengol zho, ible rowd zho; sac zienaldox zho miṅe nac costumbr. ⁴ Zeene rbire zho lo lgui, ib no mod ne riar nia zho dzigoraa rzob zho row zho. Nzian grē wseed co psan xmengol zho zienal zho, zig nac zha riar grē tas, grē cant, grē xtsiin rotie zho miṅe niaa guib, ni grē lo bangw ne rzob zho row zho.)

⁵ Dzigo rēb zho lo Jesús:

—¿Pe nacne zienald xpēēdsuel luu miṅe blu xmengol ne? ¿Pe nacne squize nia beed zho i row zho?

⁶ Pquiab Jesús rēb me lo zho:

—Nlipaa miṅe bnee Isá, men ne biaad pteed Xtiidz Dios, zeene znu pquiaa me: Grē miech rii, rquiaalose zho runnon zho naa,

rond zho diidz gun zho miṅe rnabey naa. ⁷ Paat rquiind riaad zho riaadgan zho naa; sac niapse guicle zho riab grē wseed ne quialu zho lo miech.

⁸ Sac tel to gon, nosaan to grē miṅe rnabey Dios, lel grē xcostumbr miech zienal to.

⁹ Xcostumbr to nac miṅe mazdraa rioxco to, laa miṅe rnabey Dios quiasan to tib lad. ¹⁰ Led znu gon rnee ley ne bdeed Dios lo Moisés: “Gon pxoz luu, gon xniaa luu”, ni no stib miṅe rnee: “Zha ne quie pxoz, quiegaa xniaa, ib none guet zho.” ¹¹ Laa to lel rnee to, zac gunṅ miech xyudar xmengol zho, telne bloogonle zho pe nac ncuaaṅe rieguijal

gdeed zho lo me. ¹² Tole rdeete diidz ga guñ zho xyudar pxoz zho, xyudar xniaa zho. ¹³ Tib ladle gon rsan to Xley Dios ga sca run to, lëëpaaze grë costumbr ne biaanne to, ni quiasangaa to lo zha ne ziaadquia, miñ co noxcoraa to. Ni nzianraa grë falt ne squi quiaayun to.

¹⁴ Dzigo bnee me lo grëraa miech ne ndxie ga, rëb me lo zho:

—Golquiaadiag miñe gni naa lo to nu, ni goltsoxco guien to zha naca. ¹⁵⁻¹⁶ Golgacnan ganle: Grë ncuaañe rdziñ zdoos miech, led miñcod runctal xtoł zho; sinque grë ncuaañe ntseeb ne rza zdoos zho, miñ co nac miñe runctal xtoł zho.

¹⁷ Laa zeene laa me bdziñ ro yu grë xpëëdsuel me, dzigo bnabdiidz zho lo me dien zha nac diidz ne sca rëb me lo grë miech co. ¹⁸ Rëbchaa me lo zho:

—¿Pe niicle to riendaquew dzigo lëë? ¿Pe riende to, grë ncuaañe row miech, led miñcod runctal xtoł zho? ¹⁹ Sac grë ncuaañe row zho rdziñda len zdoomban zho, zhaa zaatne rdziña. Grë guielwagw, len bziuud zdoose zho, len zhitripse zho rieteda, rlozh ga rriegaw xcuerp zho.

Ga blu me lo zho ganle, grëse ncuaañe nac guielwagw lëda runctal xtoł miech. ²⁰ Ni rëb me lo zho:

—Mine rza zdoomban miech, miñ co nac miñe runctal xtoł zho. ²¹ Sac zdoomban zho rza grë ncuaañe ntseeb ne run zho, zig nac: zeene rio zho grë zhgab yozh, zeene run zho grë guielyozh, zeene rban zho,

zeene rut zho samiech zho,

²² zeene rionie zho zha ne nacd tsieeld zho, zeene rzoobladz zho ncuaañe rap stib miech,

zeene run zho grë guielntseeb,

zeene rquidie zho,

zeene rien zho run zho grë ncuaañe ndzinlid,

zeene në rac zdoos zho ran zho cho zha ne stibnoded,

zeene rzhixcuaa zho diidzguizh,

zeene racniats zho,

zeene run zho grëraa ncuaañe paat rquiind.

²³ Grëse ncuaañe ntseeb rii, zdoomban miech rzaw, ni lëew nac miñe runctal xtoł zho.

Biac xpëëd tib wnaa zit
(Mt. 15:21-28)

²⁴ Ga briece Jesús, laa me zie nëz Tiro. Zeene bdziñ me nëz co ga bdziel tib yu ne blëz me, gocladz me choot niacnand ne laa me no ga; per brieloda, znuse bien diidza.

²⁵⁻²⁶ Zeene bin tib wnaa Sirofenis laa Jesús bdziñ ga, dzigo güey me, sac noguitnie mendox tib xpëëd me. Zigne bdziñ me pquiitzghib me lo Jesús, rnab me tsieguncxoon

Jesús mendox co. Tib wnaa zit nac wnaa co; ²⁷ dzigo rëbchaa Jesús lo me:

—Blëz niip dien. None glo mëed gow, nonguiëlda cuee ne guiet nia mëed gdeed new lo mëcw.

²⁸ Pquiab wnaa co, rëb me:

—Nli scaw, zigne rnee luu i; per niicle mëcwa led rio ma zhan mezh rtop ma grë miñe rrieengaa nia mëed.

²⁹ Dzigo rëbchaa Jesús:

—¿Squiw nagon! Lëëgazha i rnee luu. Peet tsieniedraa guic luu naa sca; bzë, laa mendox ne nosacsi xpëëd luu bichele.

³⁰ Laa wnaa co zey. Zeene bdziñ me lidz me, gon me ine laa xpëëd me nixse lo lon, per laa mendox co psaanle win.

Biac tib men ne rcuaat

³¹ Ga briece Jesús, güeyted me nëz Sidón. Sidón briece me bdziñ me ro Nisdoos Galilé stib, zaatne nac xtan zha Decápolis. ³² Ga bdziñnie zho tib mgui lo me, rcuaat mgui ni nca rnee mgui; bnab zho lo me cxobnia me guic mgui gunguiac me mgui.

³³ Dzigo bleec me mgui lad grë miech ne ndxie ga. Zitlaa güeynie me mgui, ga psëëb me mzhugnia me gropsse len diag mgui ni bdëeb me zhindzuc me lo ludz mgui.

³⁴ Blozh ga, blis lo me bui me nëz gbaa, bneeladz zdoos me, dzigo rëb me:

—¿Bzhial! (¿fata!)

³⁵ Zigne sca bnee me, laa diag mgui co bzhial, niicle ludz mguiw laaw wban, laa mgui psilo bneenal. ³⁶ Dzigo pso Jesús diidz lo grë miech co, choot lo gzodiidz zho zha biac mgui co.

Per laa ne rso me diidz lo zho, dzigole nëzrii, nëzrec rzodiidz zhow; ³⁷ sac rzeedox zdoos zho gon zho mine been me ga.

—¿Ncuaañe gzee zdoos ne i been men qui! —rnee zho—. Zha haxta nguaat, haxta ngop, runguiac me.

8

Bguiaan Jesús tap mil miech
(Mt. 15:32-39)

¹ Len dze co, miech guizhiu ne biire pcaalsa lo Jesús stib. Zeene goc tson ngbidza, guienndraa ncuaañe gow zho. Dzigo bredz me xpëëdsuel me, rëb me lo zho:

² —Rquia zdoos naa grë miech rii, tsonle ngbidz ga rac blanso zho nu, ni na quianiedraa zho ncuaañe gow zho. ³ Telne squise zho gzonëz naa zho, glëbd zho, scow zho nëz, sac no zho zit briece zho ziaad zho nu.

⁴ Pquiab zho rëb zho:

—¿Per pe yguiaan ne zho? ¿Pa guioxi ne guietxtil ne gow grëtaa miech qui dan rii, naca zaatne guiennd miech?

⁵ Dzigo bnabdiidz me lo zho, rëb me:

—¿Bla guietxtil ziaadnie to i?

—Gadzaquew —rëb zho.

⁶ Dzigo bnabey me grëse miech co bzob zho liu. Blozh ga bzhen me gza guietxtil co, bdeed me xquizh lo Dios; blozhse bdeed me xquizh lo Dios, zigse noyungrol mew, scase scase rdeed mew lo xpëëdsuel me rguiz zhow lo grë miech co. ⁷ Zienie zho zla mel las; bzhen me gza mel co bdeed me xquizh lo Dios, blozh ga bnabeyaue me zho bdiiz zho ma.

⁸⁻⁹ Grëse miech co, dow zho haxta zaatne bieltaa zho dzigo laa me bzonëz zho. Rgaa zho maase tap mil, ni zeene blozh dow zho bii bdrop gadz chicuid mine biaan.

¹⁰ Blozh ga, laa me bzëëb leñ barcw grë xpëëdsuel me, laa zho zie nëz xtan zha Dalmanut.

Racladz zha farisé gan zho milagr
(Mt. 16:1-12; Lc. 12:54-56)

¹¹ Blalaa zha farisé ne no nëz co, zeene bin zho laa me bdiiz ladz zho, güey zho rzadraa ncuuaane rlisqui zho lo me. Rnab zho glu me cho nac me, rëb zho lo me:

—Racladz no dzianlo no gun luu tib milagr, telne nli gbaa ziaad luu.

¹² Zeene gon me sca rac zho, bio me guielne; dzigo haxta bneeladz zdoos me, rëb me lo zho:

—Zha rnaraa milagr ne racladz to gan to? Gneli naa lo to ganle, ni stib milagr gon gandraa to.

¹³ Blozhse sca rëb me lo zho, ndxieque zho ga laa me bzëëb leñ barcw laa me zie stib nëz ro nis co.

¹⁴ Zeene briece zho ga, zoladzd xpëëdsuel me ney zho ncuuaane niow zho, lëë gdib tib guietxtil zienie zho leñ barcw. ¹⁵ Laa zho zie, tibaue zeene rëb me lo zho:

—Golguien gon, napaa noyac-wet to lo zhincobi zha farisé, lo zhincobigaa rey Herod.

¹⁶ Zeene bin zho sca rëb me, bza zdoos zho rnee zho:

—Ne gon me nagon ziaadnied ne guietxtil gane squi rnee me.

¹⁷ Bien me sca rnee zho, dzigo rëbchaa me lo zho:

—ZPe nacne rnee to ziaadniede to guietxtil? ZRiende to lëë zha rne naa? Ndiip nac zdoos to gane riende tow. ¹⁸ ZPa rquiin lo to, pa rquiin diag to ne laaw zob? ¹⁹ ZPe rso-ladzde to zeene gaayaue guietxtil ni bgaaw bguian naa gaay mil miech? ZBla chicuid biodzë mine biaan hor co?

Pquiab zho rëb zho:

—Tsiipchopa.

²⁰ Dzigo rëbchaa me:

—Zeene waa gadzaue guietxtil co, ni bguian naa tap mil miech, Zbla chicuida biaan?

—Gadz chicuida —rëb zho.

²¹ Dzigo rëb me lo zho:

—ZPe niicle nana rien daque to pe rne naa?

Biac tib men ne rcow lo

²² Bdiiz Jesús guiedz ne lë Betsaid, ga güeynie zho tib mgui ne rcow lo lo me, bnab zho cxobnia me guic mgui gunguiac me mgui. ²³ Dzigo bzhen me nia mgui güeynie me mgui zaatne nacle ro guiedz co. Ga bdëëb me zhinzuc me leñ bziaalo mgui, ni pquiaania me zhits guidlo mgui; blozh ga bnabdiidz me lo mgui dien pe ranle mgui palal.

²⁴ Zeene laa mgui bui, rëbchaa mgui:

—Ranle naa niina nagon laa miech ziezë; per masaque ran naa zho zig rlu grë yag.

²⁵ Dzigo biire pquiaania me zhits lo mgui. Zeene laa mgui bui stib, ndiple rwi mgui laa lo mgui biacle. Grëse ncuuaane ran mgui, niicle zitraaw niini ran mguiw.

²⁶ Dzigo bzonëz Jesús mgui nëz lidz mgui, pso me diidz lo mgui tib nëz guey mgui, choot lo tsiezodiidz mguiw lad guiedz.

Bnee Pedr cho nac Jesús

(Mt. 16:13-20; Lc. 9:18-21)

²⁷ Blozhse ga, laa Jesús briece ga grë xpëëdsuel me laa zho zie nëz Cesarea de Filipino, zieted zho grë guiedz las ne ndxie nëz co. Laa zho no nëz, tibaue zeene bnabdiidz me rëb me lo zho:

—ZCho dien ron to rnee miech nac naa?

²⁸ Pquiab zho, rëb zho:

—No zho rnee Juan Bautista, no zho rnee Liw, men ne biadteed xtiidz Dios padzeala; nogaa zho rnee no cho stib men ne ziadteed xtiidz Dios.

²⁹ Dzigo rëb me lo zho:

—ZTo waa, cho rzac to nac naa?

Pquiab Pedr, rëb Pedr lo me:

—jLuu nac Men ne zëëble diidz ga cxeel Dios guiaad lo guidzliu!

³⁰ Dzigo pso me diidz lo zho choot lo gneed zhow.

Bzeet Jesús zha gun miech me

(Mt. 16:21-28; Lc. 9:22-27)

³¹ Bded ga, psilo Jesús bzeet me lo grë xpëëdsuel me zha csacsi miech me. Rëb me nroob grë ncuuaane cteed zho me; grë zha non lo menguiedz, grë pxoz nroob, grë zha ne rseed miech ley, ible stsidil zho me, ni haxta zut zho me; per zeene gac tson ngbidz gut me laa me grieeban. ³² Grëse mine ted me, laaw nozodiidz me lo zho.

Gon Pedr sca rnee me, dzigo bredz Pedr me, blisqui Pedr lo me dien pe nacne rnee me laa me guet. ³³ Zeene gon me zha rzë xtiidz Pedr; zoque Pedr ga biecw me bui me lo grëraa xpëëdsuel me, goctox me rëb me:

—jBiche lo naa nu mendox! Zienied guic luu mine rnabey Dios, sinque laa guic luu zienie mine racladz luu.

³⁴ Dzigo blunia me lo grë miech ne ndxie ga, yquiaadiag zho mine gnee me; rëb me:

—Zha ne racladz sëëb xnëz naa, none cueeladz zho zho, none lëb zho guiaad-nał zho miñe rnabey naa, niicle tel min co yquiaaqui csacsi miech zho. Nodne yquia zdoo zho xquielmban zho. ³⁵ Sac zha ne yquia zdoo xquielmban, leł znu nitlo zho; sangue zha ne sca cueeladz xquielmban porne rleynie zho naa, porne rleynie zho grë Diidz Ndzon rii, zha co yгаа tib guielmban ne mazdraa ndzon. ³⁶ Nana, tel zha ne guñlo grëse ncuaañe no lo guidzliu rii. ¿Pa yquiiñ grë ncuaañe co lo zho, tel lëëw yquiaaqui laa zho guey gabil? ³⁷ ¿Niacxe zrieelo gdziib zho dimi co laa zho len gabil? ³⁸ Naa ne nac naa Men ne pxeel Dios zial naa lo guidzliu, zha ne ctoladz guiab zho lo grë miech ngoopdol rii laa zho no xnëz naa, o ctoladzniegaa zho xtidz naa, scaque naa stoladznie naa zho gal dze ne laa naa guial stib. Dze ne guialnie naa grë anł, ni glu naa grë guielndzon ne rap Dios.

9

¹ Ni rëb me lo grë miech co:

—Gneli naa lo to ganle, nzian grë zha ne ndxie nu niina ib tedsod gardaque guet zho, bii zan zho ganle zeene laa Dios glu ne nli men rnabey nac me.

Bdzëëlo Jesús

(Mt. 17:1-13; Lc. 9:28-36)

² Goca xoop ngbidz, briece Jesús gza me Pedr, Jacob ni Juan, güey zho bzoquia zho tib guic gui glaa.

Bdziñ zho glaa guic gui co, tibaque zeene gon zho laa me bdzëëlo. ³ Masaque rquiabni xab me, nquitsbie rnaw; ni tib miech grielod scataa mbe quiiñ lar. ⁴ Gonlo zho zeene laa Lí ni Moisés (grop zha ne biadteed xtiidz Dios glo) bdziñaque, laa zho nozodidznie me. ⁵ Dzigo rëbchaa Pedr lo me:

—Maestro, jne nligaa wena guiaañ ne nu! Laa no gzaa tson yu yag xiid win nu tso to: tiba tso luu, tiba tso Moisés, stiba tso Lí.

⁶ Rdzieb Pedr gza Pedr schop zha co, lo dzeb co niicle rien daque Pedr pe rnee Pedr. ⁷ Tibaque znuse bdop tib xcow pquia ngali zaatne zo zho ga; dzigo bin zho zëëb tib tsi men co lo xcow co, rnee me:

—Lëë xpëed naa i gon, rleynie naa me. Golgon miñe rnee me.

⁸ Lëëlëd biecw lo zho rwi zho, choot gondraa zho, Jesússe zo lo zho ga.

⁹ Blozhse ga, laa zho wbi que ga. Laa zho ziezëëb dan noyot zho cho gui co, zeene rëb me lo zho:

—Miñe gon to gon, choot lo gneede tow. Golcuëz haxta gal dze ne grieeban Men ne pxeel Dios.

¹⁰ Nacne choot lo bneed zhow, per psilo zho gza tson zho rnabdiidzlsa zho, zha mod grieeban tib zha ne gutle.

¹¹ Dzigo bnabdiidz zho lo me, rëb zho:

—¿Bay zha nacne rnee maistr ley, glo Lí no guiaad stib, dzigora guiaad Men ne zëëble diidz ga cxeel Dios?

¹²⁻¹³ Pquiab me rëb me lo zho:

—Nliw, ible nacle diidz ne glo Lí guiadseed miech gon zho xtiidz Dios, per laa me biaadle; ni zigne bzeetse grë zha ne biadteed xtiidz Dios ted me, scase been miech me. Scaque Men ne cxeel Dios ga, rnee lo Xtiidz Dios nroob csacsi miech me, ible gandz zho me.

Biac tib niib ngop

(Mt. 17:14-21; Lc. 9:37-43)

¹⁴ Zeene bdziñ Jesús zaatne biaan grëraa xpëëdsuel me ga, gza me Pedr Jacob ni Juan; gon zho miech guizhiu ne ndxie lo zho; blalaa zha ne nac maistr ley zo lo zho ga, nodiidiidznie zho. ¹⁵ Grë miech co, zeene gon zho Jesús, rley zho, rias zho güeydzieelo zho me güeyquiaa bdiuzh zho me. ¹⁶ Dzigo bnabdiidz me rëb me:

—¿Pe nadien squitaa nodiidiidz to?

¹⁷ Lad grë miech co pquiab tib zho, rëb:

—Maestro, lo luu zialnie naa tib xpëed naa guñguiac luu win; ib gacd gnee win sac noguitnie mendox win. ¹⁸ Tel pataa zo win, zeene laa ma rzëëb zdoo win rron ma win liu; ga nix win rdzib mtsiñ ro win, ni row lay win; nrooble noyo win lëbdraa win së win. Blansonie naa win nu, dzigo bnab naa lo xpëëdsuel luu guñcxoon zho mendox co, per brieelod zho.

¹⁹ Dzigo rëbchaa Jesús lo zho:

—jPe na squitaa miech nad nac to, ib rnalode to Dios! ¿Palal tiemp ne so naa gne naa lo to? jNcuaañe cxeewdraa naa lo to squi nac to! jGoltënie mëedwin qui nu!

²⁰ Güey zho güeynie zho mëedwin co lo me. Zigne gon mendox co me, psilo beencxidz ma win, znuse biab win liu, rtiibxto win ni rdzib mtsiñ ro win. ²¹ Dzigo bnabdiidz me lo pxoz win, goc palal dze psilo sca rac win.

Rëbchaa pxoz win:

—Bii mëdyeen win psilo squi rac win. ²² Pe zhidaa vuilt zieron mendox qui win lo gui, zieron ma win lo nis ne, racladz ma gut ma win. Bzhiguiel telne zrieelo guñguiac luu xpëed naa, jquia zdoo naa, been tib guielnzaac beenguiaac win!

²³ Rëbchaa Jesús lo me:

—¿Zha rnee luu “telne zrieelow”? jZha ne dib zdoo rnal Dios, grëse ncuaañe racladz zho, zaca!

²⁴ Lëëlëd pquiab pxoz mëed co, rëb me:

—Rnalo naa Dios, per bzhiguiel been xyudar naa, j dib zdoo naa gnalo naa me!

²⁵ Zeene gon Jesús laa grë miech co rbigberaa, dzigo goctox me lo mendox ne noguitnie mëed co, rëb me:

—Mendox, luu gon psan ngop mëed rii, luu psan nguaat win. ⁱNiinagazh psaan win, ib gbiiredraa luu ygaal luu win!

²⁶ Horco biire beenxidz ma mëed co stib, masaque roptsiedan ma laa psaan win, nixtaque win ga, zootle gutle win. Nzian grë miech co, tibaque nan zho gutle win. ²⁷ Laa zeene bzhën Jesús nia win, blis me win ga, laa win bzoli.

²⁸ Zeene bdziñ Jesús len yu ne rbëz me grë xpëëdsuel me, bñabdiidz zho lo me rëb zho: —¿Bay pe nacne brieelod no ndziunxoon no mendox co?

²⁹ Dzigo rëbchaa me lo zho:

—Grë mendox ne sca nac, rquiin dib zdoon ne gnab ne lo Dios dzigo zrieelo gunxoon ne ma.

Bzeet Jesús laa miech csacsi me

(Mt. 17:22-23; Lc. 9:43-45)

³⁰⁻³¹ Brieë Jesús ga grë xpëëdsuel me, laa zho wbiire nëz xtan Galilé stib. Racladzd me cho gacnan pa lo no me; sac len dze co nzian grë ncaaane noseed me zho. Haxta bzeet me zha csacsi miech me, rëb me:

—Naa ne nac naa Men ne pxeel Dios, ible ziaab naa ladznia miech, ni zut zho naa. Per zeene gac tson ngbidz gut naa, laa naa grieeban.

³² Per ib riend zho pe nacne sca rnee me, niicle gnabdiidzгаа zho rdzieb zho gnabdiidz zhow lo me.

¿Cho nonraa?

(Mt. 18:1-5; Lc. 9:46-50)

³³ Bdziñ zho guiedz ne lë Capernaum; grëse zho laa zho ndxie len yu ne blëz zho, tibaque bñabdiidz Jesús lo zho, rëb me:

—Golnë dien, ¿pe scataa nodiidiidz to zeene ziaad ne nëz?

³⁴ Ni tib zho ib pquiabd, sac zeene ziaad zho nëz quianeelsa zho dien cho nac zha ne nonraa.

³⁵ Dzigo bzob me, bredz me zho gza tsiipchop zho rëb me lo zho:

—Zha ne racladz gac zho zha non, none guiaanwin zho gac zho zig tib ngundziin lo samiech zho.

³⁶ Dzigo bzo me tib mëëdbgui win glowtaa lo zho; blozh ga bdeedz me win ni rëb me lo zho:

³⁷ —Zha ne ngab xnëz naa, ni gleynie zho tib mëëdwin zig mëëdwin rii, gun naa cuent naa ga rleynie zho; ni zha ne sca rleynie naa, yele men ne pxeel naa ga rleynie zho.

³⁸ Blozh ga, rëbchaa Juan lo me:

—Maestro, bdzion no gon bzeet tib zha co lë luu zeene benxoon zho mendox; nacne nli blisqui now lo zho, sac gon, led yed zho nacgré ne.

³⁹ Dzigo pquiab me rëb me lo zho:

—¿Gunscade to! Sac gon zha ne sca rzeet lë naa zeene run zho milagr, niacxe lëëque zha glëë lo naa. ⁴⁰ Zha ne nacnie ne, glëëd zho lo ne.

⁴¹ 'Golgaacnan sca ganle, grëse zha ne gdeed maase tib zhigaque nis guie zha ne ngab lo naa, ib tedsod stisire Dios miñe been zho ga. ⁴² Sangue zha ne yguib gunctal zho xtol zho ne nac zho zig tib mëëdas yeen; mazd lëëtaa miñe ted zha co sobdoo tib quie molin zhoxtil yquiaaw yan zho tsieron zho zho nisdoon.

Choot gdeete diidz guiab lo dol

(Mt. 18:6-9; Lc. 17:1-2)

⁴³⁻⁴⁴ 'Zha ne rien nia zho nac miñe rquiaqui runctal zho xtol zho, mazd cchuggazh zho nia co zho. Peet nacd maase tibaque nia zho zob totsaque yгаа zho guielmban ndzon ne gdziñd dze lozh, lëdle zob gropa ni laa zho guey gabil, lo beldox ne gdziñd dze guuu. ⁴⁵⁻⁴⁶ Telne riengaa zho ni zho nac miñe rquiaqui runctal zho xtol zho, mazd cchuggazh zho ni co zho. Peet nacd maase tibaque ni zho zob totsaque yгаа zho guielmban ndzon ne gdziñd dze lozh, lëdle zob gropa ni laa zho guey gabil, lo beldox ne gdziñd dze guuu. ⁴⁷ Tel tib logaa zho nac miñe rquiaqui runctal zho xtol zho, mazd cueegazh zho bziaalo co zho. Peet nacd maase tibaque bziaalo zho zob totsaque yгаа zho guielmban ndzon co, lëdle zob grop bziaalo zho ni laa zho guey gabil. ⁴⁸ Zaatne nac gabil, ib gdziñd dze ne guuu lo bel co; grë mziog ne ndxie ga, gdziñd dze ne nitlo ma. ⁴⁹ Grëse zha ne gdziñ ga, masaque cuib gui lad zho zig rbib zed lad bëel.

⁵⁰ 'Zig nac zed, rquiindoxa zeene nzhiw, per zeene nzhida, ¿pa dien yquina? Scauegaa to nagon golgac zig zed ne nzhi, zeena yquiin to lo guidzliu rii; niowse golbannie samiech to, glëëlsade to.

10

Zha ne rsëbtsieel

(Mt. 19:1-12; Lc. 16:18)

¹ Brieë Jesús Capernaum güeyted me grë guiedz ne ndxie nëz xtan zha Judé, grë guiedz ne ndxie nëz dan ro guiuabee Jordán. Miech guizhiu ne rcaalsa lo me, dzigo rsilo me reseed me zho zigne runtaque me.

² Tib vuel t bdziñ bla zha farisé gocladz zho niungüet zho me, par dien pe nzind me tib diidz; bñabdiidz zho rëb zho:

—Maestro, mgui ne racladz csëbtsieel, ¿pe gnë luu pe zrieelo csëbtsieel zho?

³ Pquiab me rëb me lo zho:

—¿Zha zho psan Moisés diidz lo to?

⁴ Pquiab zho rëb zho:

—Tel Moisésa, bdeed me diidz csëbtsieel zha ne racladz csëbtsieel, lëëraasi none yquia

tib guits gdeed zho lo wnaa zaatne raquiet ne laa zho psaan wnaa.

⁵ Dzigo rëbchaa me lo zho:

—Ne squicxe waa miech nad nac to ib ronde to diidz, miñ co nacne biaan ley co. ⁶ Per ib nodne csëbtsieel miech; sac goñ, zeene psan Dios grëtaa ncuuaane no, tib nëz miech bzaa me: tib mgui ni tib wnaa. ⁷⁻⁸ Gacxe waa, mgui ne rtsieelna ib none grieezhaa zho lo pxoz zho, lo xniaa zho, par gbannie zho wnaa ne nac tsieel zho; laa zho gactipse grop zho. Nacdraa zho chop miech, sinque laa zho rac tibaque. ⁹ Dios nac meñ ne psan ycatsieel miech, cho dzigo nac miech par quiits zho miñe rnabey me.

¹⁰ Laa zeene bdziñ me leñ yu ne rbëz zho, dzigo bnabdiidzaque xpëëdsuel me miñ co lo me stib. ¹¹ Dzigo rëbchaa me lo zho:

—Mgui ne rsëbtsieel ni rbannie zho stib wnaa, noguitnie zho wnaa ne gocpaa tsieel zho ga, ni dol ga run zho. ¹² Niicle wnaa-gaaw, wnaa ne rsëbtsieel ni rbannie zho stib mgui, lëëque dołaque ga run zho.

Beenlay Jesús mëëdlas

(Mt. 19:13-15; Lc. 18:15-17)

¹³ Tib vuelt nzian meñ ne bdziñ bdziñnie zho xpëëdlas zho lo Jesús, par cxobnia me guic win gunlay me win. Grë zha ne nac xpëëdsuel me, leñ psilo zho ndox zho lo grë zha ne bdziñnie grë mëëdlas co.

¹⁴⁻¹⁵ Zeene goñ me sca quiayun zho, wbiñladz guic me, dzigo rëb me lo zho:

—Ctsirede to grë mëëdlas yeen qui, golsaan guiaad win lo naa. Sac goñ grë mëëdlas yeen, ni zha ne nac zigne nac win, zha co nac zha ne sëëb ygab lo Dios.

¹⁶ Blozhse sca bnee me, dzigo psilo me bdeedz grë mëëdlas co, ni pxobnia me guic win beenlay me win.

Bzodiidznie tib zha ricw Jesús

(Mt. 19:16-30; Lc. 18:18-30)

¹⁷ Laa Jesús nole nëz tsie me stib guiedz, zeene rias tib niib nguieg bdziñ pquiits-gzhib lo me, rëb niib lo me:

—Nan naa luu nac tib meñ ne noseed miech, ni tib meñ wen nac luu; ÷bnë dien pe nac miñe gun naa zeena yгаа naa guiełmban ndzon ne gdziñdraa dze lozh?

¹⁸ Rëbchaa Jesús lo niib:

—Rnee luu lëë tib meñ wen nac naa. ¡Nli-gaaw, Diosse nac meñ wen! ¹⁹ Nanle luu ganle zha nac Xley Dios, rneew:

Gute luu samiech luu, telne nole tsieel luu, tsonied luu zha ne led tsieeld luu,

cuand luu samiech luu, yquiadiidzguizhd luu samiech luu, yquidieed luu samiech luu, goñ pxoz luu, goñ xniaa luu; bin miñe rnabey me luu.

²⁰ Dzigo pquiab niib rëb niib lo me:

—Maestro, grësew zigne bzeetse luuw i, ni tiba gard quits naa wlal ne nac naa zha nguieg.

²¹ Dze rwi Jesús lo niib, rleynie me niib.

—Stibaque miñe rquiin gun luu —rëb me—, güeyto grëse ncuuaane quianie luu, dzigo bdiiz dimi co lo grë zha mban ne guieñd pe yquiin; sca nroobraa guiełnzaac ne yгаа luu gbaa. Lozh ga, bleeladz xquiełmban luu dënal zhits naa.

²² Zeene bin niib co sca rëb Jesús, biab guiełnë niib, mbanse rac niib laa niib zey; sac ne nligaa nroob ncuuaane quianie niib.

²³ Dze rwi me goñ me laa zha nguieg co zey, dzigo rëb me lo xpëëdsuel me:

—¡Grë zha ne squi rapchen, rzacxuu zho par sëëb zho xnëz Dios gnabey me zho!

²⁴ Zeene bin zho sca rëb me, rzee zdoo zho. Dzigo biire me bnee me rëb me lo zho:

—Xin, ¡ne nligaa tib miech ne ndziib rap chen, rzacxuu zho sëëb zho xnëz Dios gnabey Dios zho! ²⁵ Mazd znuse rded tib camell guieer guzh, lëdle sëëb tib zha ricw xnëz Dios.

²⁶ Zeene bin zho sca rëb me, mazdraa bzee zdoo zho, rnabdiidzlsa zho rnee zho:

—Bay, ÷chose dzigo nac zha ne zrieelo sëëb xnëz Dios?

²⁷ Dze rwi me lo zho, dzigo rëbchaa me:

—Par miech zootle tsod zha ne grieeło sëëb xnëz me. Sangue me, nan me no zho; sac tsod ncuuaane grieełod gun me.

²⁸ Dzigo rëb Pedr lo me:

—Tel no, grëse ncuuaane rdziaap no laa no psana, laa no ziaadnal zhits luu.

²⁹ Pquiab me rëb me:

—Grëse zha ne psan lidz, psan zho bets zho, bzian zho, xniaa zho, pxoz zho, xpëëd zho, liun zho, porne riladz zho naa ni riladz zho Xtiidz Ndzon Dios; ³⁰ nli nroob guiełnë gan zho, per gneli naa lo to ganle: grëse ncuuaane sca psan zho ga, lo guiełmban riique laa zho gbiire gana stib tib gayoogaw tib tiba; ni ib tedsod zgaa zho tib guiełmban ndzon ne gdziñdraa dze lozh.

³¹ Nli zig nac niina, no zha ne rzac zha non nac zho, per zeene gal dze co peet gacnond zho; laa zha ne rzac zho peet nond, gal dze co lalga gac zho grë zho.

Biire bzeet Jesús laa miech csacsi me

(Mt. 20:17-28; Lc. 18:31-34)

³² Briece Jesús ga laa me zie Jerusalën. Nzian grë zha ne zienal zhits me, nerse me lo zho laa zho zie. Grë zha ne nac xpëëdsuel mew, rzee zdoo zho; laa grëraa miech co per nli rdzieb zho. Dzigo bredz me gza tsiipchop zha ne nac xpëëdsuel me ga, psilo me bzeet me grëse tel zha ziaadyob ted me, rëb me lo zho:

³³ —Bii zan to ganle, naa ne nac naa Meñ ne pxeel Dios, niina ne laa ne gdziñ

Jerusalén ible zielo zho naa ladznia grè zha ne nac pxoz nroob ni grè zha ne rseed miech ley. Grè zha co gnab guet naa, ni san zho naa ladznia grè zha ne nacdraa zha Israel. ³⁴ Xidznie zho naa, stsuc zho lo naa, zguin zho naa, ni haxta zut zho naa; per dze ne gac tson ngbidz gut naa laa naa grieegan.

³⁵ Dzigo wbig gax Jacob grop Juan (xingan Zebedé) lo me, rëb zho:

—Maestro, laa no gnab tib favor lo luu, per racladz no siguiel luu gun luuw.

³⁶ Dzigo rëb me:

—¿Pe favor ne racladz to gun naa lo to?

³⁷ Rëbchaa zho:

—Laa no racladz, siguiel luu zioob no cue luu gal dze ne laa luu nac rey rnabey luu, tib no nëz derech stib no nëz revës.

³⁸ Pquiab Jesús, rëb me lo zho:

—¡Ni to gon riend pe rnab to! ¿Pe zlëb to gan to grè guielnë ne gan naa, pe zlëb to ted to grè mine teed naa?

³⁹ Rëbchaa zho:

—¡Zlëëb no!

Dzigo rëbchaa me lo zho:

—Ni zan to guielnë ne gan naa, ni zded to mine teed naa; ⁴⁰ per ne gnedz naa diidz sob to cue naa nëz derech o nëz revës, led naad raguial min co; laa lugar co biaanle par zha ne nole diidz ygaaw.

⁴¹ Grëraa zha ne nac xpëëdsuel me, zha ne nacza Jacob ga grop Juan, zeene bin zho zha rzë xtiidz Jacob grop Juan blëë zho lo zho. ⁴² Dzigo bredz Jesús zho grëse zho, rëb me lo zho:

—Ran to ganle zha run grè zha ne rnabey grè guiedz ne ndxie lo guidzliu, ni grè zha ne nac zha non, masaque rnabey zho samiech zho zigne racladzttaa zho. ⁴³ Sañgue to gon, guñcade to. Lo gza to, zha ne racladz gac zho zha non lo to, laa ne glu zho zha non zho, none glo zho guiaanwin gac zho zig tib ngundziin lo to. ⁴⁴ Saquega, zha ne racladz gnabey lo to, none glo cseed zho gun zho mine gnabey to zho. ⁴⁵ Golgan ganle, niicle naa ne nac naa Men ne pxeel Dios, ziald naa par gnabey naa miech, sinque laa naa zial par gac naa tib ngundziin lo zho, ni gded naa xquielmban naa zeena laa zho lo grëtaa ncuaañe ngadoo zho. Ni nanpaa naa miech guizhiu ne laa.

Biac tib men lë Bartimé

(Mt. 20:29-34; Lc. 18:35-43)

⁴⁶ Sca no grè miech guizhiu co nëz, laa zho bdzin guiedz Jericó. Laa zeene laa grè miech taf co zierie ro guiedz co, laa tib ngui ciegw lë Bartimé zob ga rtop gon (xingan tib men lë Timew). ⁴⁷ Zeene bin Bartimé ye Jesús (Nazaren) ziaad ga, psilo me nguiedz rbedz me, rnee me:

—¡Jesús, men xti rey David, pquia zdoo naa!

⁴⁸ Nzian grè miech co ndox lo me nan zho guioog ro me, per dzigole mazdraa nguiedz roptsie me, rnee me:

—¡Jesús, pquia zdoo naa!

⁴⁹ Dzigo pçuëzni Jesús, bnabey Jesús güeytsedz zho me. Bdzin zho lo me, rëb zho:

—¡Ligier guso i! Dë ganle laa me rbedz luu.

⁵⁰ Zeene bin mew, haxta squi bron me lar ne mbix me, guso me ga laa me bdzin lo Jesús. ⁵¹ Dzigo rëbchaa Jesús lo me:

—Bnë nadien, ¿pe racladz luu gun naa?

Pquiab me rëb me:

—Maestro, racladz naa guiac lo naa.

⁵² Dzigo rëbchaa Jesús:

—¡Ninagazh laa lo luu gan! Laa luu biac, sacne dib zdoo luu bnalo luu naa. Ligier na bzë.

Horcogazha laa lo men co psilo bui, laa me zienal zhits Jesús.

11

Bdzin Jesús Jerusalén

(Mt. 21:1-11, 18-19; Lc. 19:28-40;

Jn. 12:12-19)

¹ Zhile gdzin zho Jerusalén, laa zho zie gax zaatne riaan guiedz Betfage ni guiedz Betain, nëz dan squi riaan Gui Oliv, zeene bredz Jesús chop xpëëdsuel me ² rëb me lo zho:

—Goltsie guiedz win ne ndxie danse lo ne i. Zigne sëëb to lad guiedz, laa tib burr quiadoo ga, ni tib miech gard sob lad ma; dzigo golxadz ma, goltënie ma nu. ³ Tel cho gnabdiidz pe nacne noxadz to ma, dzigo golguiab: men ne rnabey ne men co rquiin ma, na zigne lozh xtsiin ma guiaadsan no ma.

⁴ Laa zho zie, nligaaw laa zho güeydziel burr co quiadoo ma tib ro nëz, gax tib ro yu. ⁵ Blalaa zha ne zo ga, zeene gon zho laa zho noxadz ma, rëbchaa zho:

—¿Pe gun to burr qui dzigo na, ne noxadz to ma?

⁶ Dzigo pquiab zho zigne rëbse Jesús lo zho ga, nacne bdeed men co diidz laa zho zienie ma.

⁷ Bdzinie zho ma lo Jesús lëëque lar ne rbix zho pxob zho lad ma, bzobga me ma.

⁸ Nzian grè miech co zigse zie Jesús, scase scase ner zho rta zho lar ne rbix zho rded me, nogaa zho rchoo nia grè pe yag rdziin zho zaatne rded me. ⁹ Grëse zho, niicle zha ne ner lo mew, niicle zha ne nal zhits mew, rley zho nguiedz roptsie zho, rnee zho:

—¡Zha ndzontaa men qui pxeel Dios lo ne!

¹⁰ ¡Zha wentaa ziaad me gac me zhirey ne! ¡Me gnabey zigne bnabey pxozgol ne rey David! ¡Zha ndzontaa Dios ne zob gbaa!

Sca nguiedz roptsie zho rleynie zho me, laa me bdzin Jerusalén.

¹¹ Bdzin me Jerusalén, güey me güeyso me len yadoo. Blozhse bui me dipse len yadoo, laa me brieque ga laa me zie nēz Betain grē xpēēdsuel me, sac bdzele dzew.

¹² Biini liu, loxaque zieriee zho Betain laa me psilo rcaabedz. ¹³ Zitlaa ziaad me gon me tib zhan yag guigw, nxii nac low zēēb zhíblaga; dzigo zie me zieso me dien pe gdziel tib guigw low gow me. Bdzin me zatne zoba, ni tib guigw guiend low loxaque zhíblagsew scataa zēēb, sac gardpaa gdzin mēē ne rquia guigw. ¹⁴ Dzigo rēb me lo yag guigw co:

—¡Squitaa nagon guiaan luu! ¡Gdzindraa dze yquia nex lo luu gow miech!

Grēse xpēēdsuel me, bin zho sca bnee me lo yag co.

Blee Jesús miech len yadoo

(Mt. 21:12-17, 20-22; Lc. 19:45-48; Jn. 2:13-22)

¹⁵ Bdzin zho Jerusalén, bzēēb me len yadoo. Psilo me blee me grēse miech ne quiaayun lgui ga, zigtaa zha ne no wtow, zigtaa zha ne no wzii. Grē zha ne no wto palom, grē zha ne notsēē dimi, ptiixche me xmezho zho. ¹⁶ Blozh ga, pso me diidz choot nodraa sēēbnie grē ncuuan co len yadoo, ¹⁷ rēb me lo zho:

—Led znu gon rnee lo Xtiidz Dios: “Zaatne nac lidz naa nu, nu guiaad grēse miech ne ndxie lo guidzliu sodiuidznie zho naa.” Laa to gon quiaayun to lugar rii zig tib zhíbliee ngbaan.

¹⁸ Grē zha ne nac pxoz nroob ni grē zha ne rnabey lo maistr ley, bin zho sca rēb me, dzigo psilo zho rguib zho dien zha gdeeda diidz gut zho me. Per rdzieb zho lega gnaaz zho me, sac ndal miech ne rley rquiaadiag zhiwseed me. ¹⁹ Zeene laa liu pcow, laa me wbiqee Jerusalén stib grē xpēēdsuel me.

²⁰ Biini liu co, laa zho zieded zaatne zob yag guigw ne sca güeyguib me nex lo ga, gon zho laaw bidzle dib low. ²¹ Dzigo beencsoladz Pedr mew, rēb Pedr:

—Maestro, bui ganle laa yag guigw ne bdzibdee luu ga bidzle.

²² Pquiab me rēb me:

—Zha ne dib zdoo rnalos Dios, ²³ gneli naa lo to ganle: Niicle ncuuaane mazdraa ngan gnab zho lo me, zun mew; lēēraasi none dib zdoo zho gliladz zho zac mine rnee zho, ni palal gacchopd guic zho. ²⁴ Golgona sca ganle, grēse ncuuaane gnab to lo Dios, dib zdoo to golliladz ne zneedz mew, dzigo sca zac mine rnab to. ²⁵ Ni zeene gnab to lo Dios, golsoladz dien pe no cho rlēēnie to, dzigo golgun zho perdon; zeena scagaa, Pxoz to men ne zob gbaa zun me to perdon tel pe nactaa xtol to. ²⁶ Sac telne gunde to samiech to perdon, dzigo niicle megaa, gund me to perdon.

Cho rnabey Jesús

(Mt. 21:23-27; Lc. 20:1-8)

²⁷ Blozh ga, laa zho bdzinaque Jerusalén stib. Lēētaaque laa Jesús quiaawi dib len yadoo, zeene bdzin bla zha ne nac pxoz nroob, bla zha ne nac maistr ley ni zha ne nac men non lo menguietz, ²⁸ rēb zho lo me:

—¿Cho dien nac luu ne squitaa zi-aadnabey luu len yadoo? ¿Cho rnabey luu?

²⁹ Pquiab me rēb me lo zho:

—Laa naa gun tib wnabdiidz lo to. Telne stsire to low, dzigo gni naa lo to ganle cho rnabey naa ne laa naa noyun grē ncuuaane noyun naa. ³⁰ Golnē dien, ¿cho pxeel Juan biaad me pchoobnis me miech? ¿Pe Dios pxeel me, te miechsew ye?

³¹ Psilo zho rnabdiidzlsa zho, rnee zho:

—Telne dzieets ne Dios pxeel Juan, dzigo laa me gnē: “¿Pex nac dzigo waa bliladzde to mine bnee Juan?” ³² Tel na dzieetsгаа ne: “Miechse pxeel Juan, grieequiadaque ne.”

Rdzieb zho niab zho miech pxeel Juan, sac grēse menguietz nan ne nli Dios pxeel Juan biadteed Juan xtiidz Dios lo miech. ³³ Dzigo mazd mine been zho, rēb zho:

—Ndiond no dien cho pxeel Juan.

Dzigo rēbchaa me lo zho:

—Niicle naagaa nagon, grieelod gni naa lo to cho rnabey naa quiaayun naa grē ncuuan rii.

12

Xcuent zha ne pqianap liu

(Mt. 21:33-46; Lc. 20:9-19)

¹ Dzigo psilo Jesús bzodiidz me tib cuent, rēb me:

—Tib mgui name, nroob lbē uv beenbni me lo liun me. Psilo me ptse me igose liu co, bzaa me zaatne gzhii grē uv co, ni bzaa me tib yu glaa zaatne sob zha ne yquiaanapa. Blozh ga, blediin me liu co lo bla zha ne ran liu, dzigo laa me briece ga, laa me zey zit.

² Zeene gol mēē ne ral uv, pxeel me tib xmoz me lo zha ne quianap liu co, parne gdeed zho uv ne rieguial me ycaa me. ³ Per lel bnaaz zho moz co, bdiin zho zho; blozh ga, scase bzonēz zho zho.

⁴ Dzigo biire men ne nacchen liu co pxeel me stib moz, scasaque been zho: gocntseeb zho lo moz co, pqiaaago zho zho, bdiin zho zho, blē zho guic zho.

⁵ Biireque me pxeel me stib zho, zha cole beet zho. Ni bii pxeel me nzianraa zho, no zho psiwee zho, nogaa zho beet zho.

⁶ Tibaque zeene loxaque xinganse me riaan. Rleyniedox me xpēēd me, per laa me pxeel me, bza guic me rēb me: “Ganse zho xpēēd naaw, zon zho mine gnee me.”

⁷ Zeene gon zho laa xpēēd me bdzin, rēbchaa zho: “¡Lēē zha qui nagon guiaannie liu rii! ¡Golgotsaa dziuut ne zho zeene guiaana lo ne!” ⁸ Dzigo bnaaz zho men co,

beet zho me, güeyga zho güeyron zho me tib lad lo liu co.

⁹ 'Sca nagon —rëb Jesús—, been zha ne quianap liu co. Golnëse nadien, çpe nac mine gun bizhuan liu co? Ib tedsod zeene laa me guiaad, znitlo me zha co; zhaale lo zha ne csañ me liun me.

¹⁰ 'Golsoladz ganle znu rnee lo Xtiidz Dios: Quie ne psëeb zha ne nozaa yu, ni nand zho lëepaa quie co nac mine rnazdzits yu.

¹¹ ¡Ncuaañe gzee zdoo new! Sac Dios bnabey sca goca.

¹² Zeene gon zho sca bnee me, gocladz zho naazgazh zho me ga; sac bien zho mine run zho ga bzeet me. Per bnaazd zho me, sac rdzieb zho grë miech guizhiu ne ndxie ga, nacne zeega zho.

*Pe nonguiel quizh miech contribucion
(Mt. 22:15-22; Lc. 20:20-26)*

¹³ Zhisaque goca, laa zho pxeelaque zla zha farise, ni zla zha ne nacie Herod, zie zho ziegunguet zho Jesús par dien zha cxin me tib diidz; zeena sca gdeeda diidz tsiezo zho me lo wxtis. ¹⁴ Bdzin zho lo me, rëb zho:

—Maestro, ndion no niapse diidzli rnee luu, led lega gun d luu mine rnee tib miech, sac tibeyse nac miech lo luu, ni laa luu ziana cseed zho mine nac diidzli zeena sëeb zho xnëz Dios. Min co nagon, nacne racladz no gnë luu lo no dien, çpe nonguiela ga rdeed no dimi ne razh lo rey te nonguielda ye? çPe zdizhraa no dimi co, te mazd dizhdraa now ye?

¹⁵ Bienga Jesús racladz zho gunguet zho me, dzigo rëbcha me lo zho:

—çPe nacne racladz to gunguet to naa? Golguuid tib xpes to nu ganle.

¹⁶ Dzigo bdeed zho tib pes lo me. Blozh ga, rëbcha me lo zho:

—Golnë lo naa dien, çcho nu quia lo pes rii? çCho lë nu quia low?

Pquiab zho rëb zho:
—Lëe rey Roma i, lëe lë me i quia low.

¹⁷ Dzigo rëb me lo zho:

—Mine nonguiel ycaa rey, goldeeda lo rey; scaquega mine nonguiel ycaa Dios, lo Dios goldeeda.

Zeene gon zho sca ptsire me lo xtiidz zho, rdzieldraa zho zha gun zho.

çPe nli zrieeban miech?

(Mt. 22:23-33; Lc. 20:27-40)

¹⁸ Bdzinaque zla zha saducë, rëb zho lo me:

¹⁹ —Maestro, znu pquiaa Moisés lo libr ley ne psañ Moisés lo no: tel glo mguì guet lo wnaa ne nac tsiel mguì ni gopd wnaa mëed, dzigo none betsaque zho ctsieelnia wnaa co stib, zeena gap wnaa mëed ne guiaa xlugar xpëed zha ne gut ga.

²⁰ Bio tib dii zha co znu bzhaac, gadz bets nac zho. Ptsieelnia zha ne nac zha gol, zeene

laa zho gut, biaan d xpëed zho. ²¹ Dzigo ptsieelnia stib bets zho wnaa co, blozh ga gutaque zha co, pasë zho nsañ mëed. Ptsieelniaque me stib zho, goc zho tson, niicle zha co psandaque mëed. ²² Sca sca haxta bza gza gadzse zho ptsieelnia me, per ziese zho ni tib zho psand mëed; tibaque zeene yeque me, laa me gut. ²³ Mine racladz no gacndion no, çchopaa dzigo gac tsiel wnaa co ga dze ne laa zho grieeban; sac gza gadzse zho ptsieelnia me?

Sca bnabdiidz zho, sac nac zha saducë rliladz zho ne nli zdzin dze grieeban zha ne ret.

²⁴ Dzigo pquiab Jesús rëb me lo zho:

—I nagon laa to rxin. Mine naca riende to zha nac Xtiidz Dios, niicle rliladzde to zrieele me gun me ncuaañ ro ne gard gan miech. ²⁵ Sac gon, zeene ga dze ne laa grë miech grieeban, niicle mguiw niicle wnaaw led yedraa hor co dien cho ctsieelnia zho; sac hor co laa zho gac zig nac grë anjl ne no gbaa. ²⁶ Stiba, ible nli zrieeban mengut. çPe gard ganle glab to lo guits ne pquiaa Moisés, zaatne ziaad zeene bin Moisés tsi Dios tib lo yag zarz ngua ne noyazbel? Rëb Dios lo Moisés: “Naa nac Dios ne rliladz Abraham, naa nac Dios ne rliladz Isaac, naa nac Dios ne rliladz Jacob.” ²⁷ Niicle ne gutle gza zha co hor co, per zeene sca bnee Dios, gase rlu ne mban zho no zho lo me. Sac tel Dios, nacd me xDios mengut sinque xDios zha mban nac me. Ise nagon rlu, peet riende to gane squi rnee to.

*Xley Dios mine mazdraa non
(Mt. 22:34-40)*

²⁸ Zeene sca nozodiidznie Jesús zha saducë co, gon tib maistr ley niapse diidzli ptsire me lo xtiidz zho. Dzigo wbig maistr ley co, bnabdiidz me lo Jesús, rëb me:

—Bzhiguiel bnë lo naa dien, lo grë xley Dios, çpa min nac mine mazdraa non?

²⁹ Pquiab Jesús rëb me:

—Min rii nac mine mazdraa non, znu rneew: “Grëse to men Israel, golquiaadiaga ganle: men ne nac Dios ne rliladz ne, tibaque me ni me nac men ne rnabey ne.

³⁰ Dib zdoo to, dib xalm to, dib guielbiini ne no guic to, dipse xfuers to golleynie me.” Lëe tiba nu, ³¹ laa stiba znu rnee: “Bleynie samiech luu zigne rleynie luu luu.” Tsodraa stib ley ne mazdraa non lo grop ley rii.

³² Dzigo rëbcha maistr ley co lo Jesús:

—Diidzli rnee luu maestro, tibaque Dios no. ³³ Ni none dib zdoo ne, dib guielbiini ne no guic ne, dipse xfuers ne gleynie ne me; ni gleynie ne samiech ne zigne rleynieque ne ne. Min co nac mine mazdraa non, lëde gzëg ne pe cos cogon ne lo me o dien peraga gun ne.

³⁴ Zeene gon Jesús sca niini rzë xtiidz me, rëbchaa Jesús lo me:

—Zhile runfalt sëëb luu xnëz Dios, gnabey me luu.

Blozh ga, grëse zha ne ndxie ga, ni stib zho biazhdraa zho pe nabdiidz zho lo me.

¿Cho xpëëd nac Crist?

(Mt. 22:41-46; Lc. 20:41-44)

³⁵ Sca noseed Jesús miech len yadoo ga, zeene bnabdiidz me lo zho, rëb me:

—¿Bay zha nace nree grë maistr ley, lo xtií rey David ga griequia Men ne nacle diidz ga cxeel Dios? ³⁶ Sac zeene bdeed Espíritu Sant guielbiini lo rey David, znu bnee David:

Bnee Dios lo men ne rnabey naa, rëb Dios lo me:

“Cue naa nëz derech, nu bzob, nieeda lozh gnaz naa grëse zha ne rlëë lo luu, csañ naa zho ladznia luu.”

³⁷ Gase nagon telne nli zha xtií David gac Men ne nole diidz cxeel Dios ga, ¿zha nac dzigo ne lëëque David rnee ne me rnabey David?

Grë miech guizhiu ne ndxie ga noquiaadiag zhiwseed me, per nli rley zho ron zho zha rnee me.

Zha run grë maistr ley

(Mt. 23:1-36; Lc. 11:37-54; 20:45-47)

³⁸ Laa me noseed grë miech co, zeene pso me diidz lo zho rëb me:

—Ible tsienalde to mine run maistr ley gon. Sac grë zha ne nac maistr ley, rdziladz zho racw zho lar nool haxta zhits ni zho rriba, rdziladz zho ndooladz yquiaabdiuzh miech zho zeene gdzieel zho zho dib ro nëz.

³⁹ Zig nac len yadooow, zha nac zha ne rzob lo xcan zaatne rzob grë zha non, zeene tsiegaa zho tib lni lidz miech, lëëpaaze zha nac zha ne rzob groj mezh zeene laa wagw gac. ⁴⁰ Ni rlozh ga, rio zho rla zho tel pe ncuuaane rapse grë wnaa viud; ni parne peet guiabd miech lo zho, xtse rzo zho rzadraa pe lay ne gool zho.

‘Sca gon nac zho, per ib tedsod zeene laa grë miech ngoopdoj quizh xfalt, zha nac zha ne mazdraa nroob caxtigw ygaa.

Gon ne bdeed tib wnaa viud

(Lc. 21:1-4)

⁴¹ Blozh ga, güey Jesús güey sob me gax zaatne zhoob grë alcančí. Dzese rwi me ran me zha riesañ miech gon len grë alcančí co; ndal grë zha ricw rdzin, nroob dimi rsañ zho.

⁴² Tibaque zeene bdziñ tib wnaa viud, tib men prob nac me, ye me laa me psañ chop gaay win len alcančí co.

⁴³ Dzigo bredz Jesús xpëëdscuel me, rëb me lo zho:

—Gneli naa lo to ganle, mazdraa gon nroob non gon ne bdeed wnaa viud qui, lëdle gon ne bdeed grëraa zha qui. ⁴⁴ Sac zha, dimi ne riaanle lo zho i rgogon zho; sañgue wnaa prob qui gon, centav yeen ne quianiese me mine rnalopaa me gziuu pe gow me, per laa me bloogona.

13

jNsin go!so!

(Mt. 24:1-28; Lc. 17:22-24; 21:5-24)

¹ Laa Jesús zieriee len yadoo nroob co grë xpëëdscuel me, zeene rëb tib zho lo me:

—Maestro, ¡bui ganle zha niaataa yadoo rii! ¡zha rnataa grë quie ngol ne niaaw!

² Pquiab me rëb me lo zho:

—Nligaa lëë zha niaataaw. Per niicle squitaa gon ran tow niina, zdziñ dze ne nitlow dib nacew. Ni stib quie qui guiaandraa zigne squi zhobxcuaaw i.

³ Brieë me ga, laa me zie gza me zho. Bdziñ zho cho Gui Oliv, ga bzob zho grë zho. Nienepaa ro yadoo co zaatne zob zho ga; dzigo wbig Pedr, Jacob, Juan ni Ndrës lo me, gza tap zho bnabdiidz lo me rëb zho:

⁴ —Bzhiguel bnë lo no dieñ, ¿pa hor dzigo gac mine bzeet luu ga? ¿zha nac señ ne tso zeene laaw csilo gac?

⁵ Dzigo psilo me bnee me lo zho, rëb me:

—Nsin go!so zeena choot yquidiede to.

⁶ Sac nzian zha ne griequia gnë zho zha nac Men ne zëëble diidz cxeel Dios; ni nzian miech ne yquidie zho.

⁷ Zeene gon to nëzrii nëzrec noyac dil, ib gdziebde to; sac ible none gac grë min co, ni lëdsew ga. ⁸ Sac garaa csilo grë dilox, grë guiedz nroob laaw tilnie saguiedz nrooba; grë zha ne rnabey grë guiedz nroob, laa zho tilnie sazha rnabey zho. Nëzrii nëzrec csilo gni grë zhodox, nzian zaatne gan miech gbin. Ni lega loxaque mine rsilosew ga, sac nroobraa guielnë ne gan miech lozh ga.

⁹ Zeene laa grë ncuuañ rii rsilo noyac, jnsin go!so! Sac hor co laa miech tsiezo to lo zha ne rnabey yadoo, ni lëëque len yadoo ga quin zho to; ziezo zho to lo grë zha non, lo grë zha rnabey, loxaque ne no to xnëz naa. Ga nagon gdeeda diidz gnee to Xtidz naa lo grë zha co, ¹⁰ sac ib none briets bliaallew lo grëse miech zeene gal dze ne laa guidzliu nitlo. ¹¹ Zeene tsiezo zho to lo wxtis, tsode to zhgab dieñ pe guiab to lo wxtis; sac Espíritu Sant nac men ne gacnieñ to, ni mine csiab me guic to min co gnee to.

¹² Len dze co, zio zha ne lëëque zha tsielo bets zho ladznia zha ne gut zho; zio zha ne lëëque zha tsielo xpëëd zho ladznia zha ne gut zho; scaquegaa mëëda, zio zha ne lëëque zha gut pxoz zho, lëëque zha gut xniaa zho. ¹³ Ible gandzed miech to, grëse zho glëë lo to sacne rililadz to naa; per scagaa, grëse zha

ne dziits so haxta lozh grē guielnē co, ible scaania Dios zho.

¹⁴ Zeene gan to laa ncuane ziaad gnitlo zo zaatne rieguiald sow, zigne bzeet profet Daniel (zha ne glaba, none guien zho zha naca), hor co golquib dien zha xoon to. Zha ne no grēraa guiedz ne ngab Judé, none tsie zho dan, ga tsietsolan zho. ¹⁵ Zha ne no glaa guic yu, none lëëlēd xoon zho, ib quiaab zho sëëb zho len yu tsiebee zho ncuane nachen zho. ¹⁶ Zha ne zogaa dana, ib gund zho ne laa zho tsie ro lidz zho tsixi zho xab zho. ¹⁷ ¡Prob grē men wnaa ne lëëtaque len dze co zoney xpëëd, men ne quianiegaa mëdyeen ne bii radz! ¹⁸ Golnab lo Dios gande to guielnē co len mëë ne rac nal, sac ne nligaa guielnē nrooba. ¹⁹ Wlal ne biaan guidzliu haxta lo nadze, gard gan miech tib guielnēdox sca, ni gdzindragaa dze ne gan zhow stib. ²⁰ Telne csaan Dios nroob dze gac guielnē co, ni stib miech rii guiaandraa; per na por grē zha ne bzooblo me sëëb xnëz me, gdeete me diidz gaca nroob dze.

²¹ Len dze co, tel cho zha gnē lo to: “Golwi ganle, lëë men rii nac Men ne nole diidz ga cxeel Dios”, gnëga zho: “Golwi nec ganle, lëë me i”, giladzde tow. ²² Sac ndal grē zha ne grieequia guiaadquidie miech, no zho gnē zha nac men co, nogaa zho gnē zha ziadteed Xtiiidz Dios lo miech; ni zun zho grē milagr parne yquidie zho miech, parne yquidie zho haxta grē zha ne ngable lo Dios. ²³ ¡Nsin sca gols! Ib cxende to, benque laa naa nilew lo to.

Ziaad Jesús stib

(Mt. 24:29-35, 42, 44; Lc. 21:25-36)

²⁴ Zeene lozhse gan miech grē guielnēdox co, laa lo ngbidz ycow, gziinidraa mëë. ²⁵ Grē mel ne ndziib gbaa, laa ma glial; grēraa ncuane no gbaa, masaque nēzrii nēzrec gaca. ²⁶ Horco bii zan zho ganle, zeene laa Men ne pxeel Dios ziad-zëëb glaa lo xcow con grē guielndzon con grē poder ne rap me. ²⁷ Lozh ga laa me gnabey grē xanj me, tsie zho tsietop zho grēse zha ne ngab lo me, niicle zaatne mazdraa zit lo guidzliuw, mazdraga zit gbaaw.

²⁸ Golzoob cuidad zha nac yag guigw. Led nanle to ganle, zeene laa grē zhicwa racnieen, ni rsilo rdzib zhiblaga, gase rlu ne laa mëë nëëg ziaadgaxle. ²⁹ Scaquegaa nagon, zeene gan to laa grē mine rne naa lo to nu rsilo noyac, dzigo nanle to lëë dze co ziaadyoble. ³⁰ Gneli naa lo to ganle, nzian miech ne mban niina bii zan zho zeene laa grē ncuaan co csilo gac; sac ible ncuane gaca. ³¹ Zdzin dze nitlo gbaa, nitlo guidzliu, sangue mine rne naa lo to nu, nitloda, ible laaw none gac. ³² Lëëraasi choot nand dien pa dzew, dien pa horgaaw, per ni grē anjl ne no gbaa, per ni naa nanda; loxaque Pxoze

naa nana. ³³ Gacxe waa, nsin gols, golnab lo Dios; sac gon nande to dien pa hora.

³⁴ ‘Nac cuent rii zig nac tib zha ne rriee zie tib guiedz zit. Zeene laa zho rriee, rсанse zho diidz dien pe gun tib tib moz ne guiaa ro lidz zho, ni rso zho diidz lo zha ne rquianap ro puert nsin so zho, ib gaguiesd zho. ³⁵ Scadaa to nagon nsin gols, sac zig bizhuan yu co scaquegaa naa nande to pa hor guial naa, yase glanso naa tib bdze dze, tib grol guieel, wxingaa horne rcuedz gall, o ziaadyunmbegaa liu. ³⁶ Nsin gols, zeena ine zobna to zeene laa naa glanso. ³⁷ Mine rne naa lo to nu, laaw rne naa par grēse miech.

14

Bnediudz zho dien zha gnaaz zho Jesús

(Mt. 26:1-5; Lc. 22:1-2; Jn. 11:45-53)

¹ Schop ngbidz runfalt csilo lni Pascow, lni ne row zho quietxtil ne riotsd ncobi; grē pxoz nroob ni grē maistr ley, laa zho noguib dien zha ngeetsse gnaaz zho Jesús gut zho me, ² rnee zho:

—Laa me no ygaa, per lëëraasi gnaazd ne me mer dze lni, sac miech guizhiu ne ndxie lo lni dze co; zrieequia nzian zha ne glisquiw.

Pchoob tib wnaa nceit nex guic Jesús

(Mt. 26:6-16; Lc. 22:3-6; Jn. 12:1-8)

³ Len dze co, laa Jesús no guiedz Betain. Lëëtaaque laa me no mezh lidz Simón ne blan guiedz lepr; zeene bdzin tib wnaa bdziñnie tiblo nceit nex, nowew tib len ncuaan win niaa niapse quie rbebni, tiblo nceit niiazha. Dzigo blë wnaa co ncuaan win co, blozh ga pchoob me nceit co guic Jesús.

⁴ Blalaa zha ne zobgrē Jesús ga, zeene gon zho sca been wnaa co, blëë zho, rëb zho:

—¿Pa rieguiala squi pxin zhlë wnaa qui nceit qui? ⁵ Telne niaca mine ndow, nguizhpaa zhow tson gayoo pes plat, nquinnpaa dimi co ngaaza lo grē zha mban ne guieñd pe yquiin.

Laa zho nolisquiw lo wnaa co, ⁶ dzigo rëbchaa Jesús lo zho:

—Golsaan me. ¿Pe nacne rlisqui tow lo me? Led lega pxind mew, tib guielnzaac nroob i been me lo naa. ⁷ Telne nli rquia zdoo to zha ne guieñd pe yquiin, zac ygad to lo zho stib dze, sac tibaque ran to zho; sangue naa zdziñ dze ne gbiche naa lo to, gandraa to naa. ⁸ Laa wnaa qui been mine brieelo lo me, laa me pchoob nceit nex rii guic naa zeena nzhixcuuale xcuerp naa gal dze ne laa naa ygueets. ⁹ Gneli naa lo to ganle, dipse lo guidzliu zaatne cseedtaa miech Xtiiidz Dios, ible soladz zho wnaa rii, seet zho mine been me nu.

¹⁰ Lo gza tsiipchop zha ne nac xpëëdscuel Jesús ga, brieë zha ne lë Judas Iscariot güeyzodiidznie Judas grē zha ne nac pxoz

nroob, rëb Judas laa Judas guñ me ntregar.
 11 Zeene bin zhow, per nli rley zho ni rëb zho zdeed zho dimi lo Judas. Dzigo psilo Judas noguib Judas dien pa hor gdeeda diidz guñ Judas me ntregar.

Dowxtseenie Jesús xpëëdsuel me

(Mt. 26:17-29; Lc. 22:7-23; Jn. 13:21-30; 1 Co. 11:23-26)

12 Mer dze ne rsilo lni Pascw, dze ne rowxtsee zho tib carner, ni rsilo zho row zho guietxtil ne rquiad ncobi lad, dze co bn-abdiidz xpëëdsuel Jesús dien pa lo racladz me tsiegunlo zho ncuuaane gowxtseenie me zho wdze co. 13 Dzigo pxeel me chop zho Jerusalén, rëb me lo zho:

—Goltsie Jerusalén. Ga gan to tib mgui nzobyan tib re nis, dzigo goltsienal zhits me. 14 Yu ne gan to sëëb me, golguiab lo bizhuan yu co: “Znu në maestro: ¿Pa len yu me gneedz luu gac zaatne gowxtseenie me xpëëdsuel me wdze rii?” 15 Dzigo ga glu me tib len yu nroob ne riaan glaa, nzhixcuaale lena, grële ncuuaane yquiin no ga; dzigo ga golgunlo zhixtsee ne.

16 Laa grop zha co brie, laa zho zie. Bdziñ zho lad guiedz Jerusalén, nligaa laa zho bdziel yu co zigne rëbse me lo zho ga, dzigo psilo zho beengroñ zho xtsee co.

17 Bdze dzew, laa me bdziñ len yu co grë xpëëdsuel me.

18 Laa me no mezh noyownie me zho, zeene rëb me lo zho:

—Laa naa gni lo to ganle, lëëque tib zha ne gon noyownie naa nu tsielo naa ladznia zha ne gut naa.

19 Zeene bin zho sca rëb me, mban rac zho, dzigo psilo zho tibga tibga zho r nabdiidz lo me, rnee zho:

—¿Pe naaw?

20 Pquiab me rëb me lo zho:

—Ladaque to no zho, zha ne nosëëb xcuun len xquien naa, lëë zho ga. 21 Naa ne nac naa Men ne pxeel Dios, niina laa miech gut naa zigne raquietsew lo Xtiidz Dios; per, ¡probsaxe zha ne tsielo naa ladznia zho! ¡Mazd wen nie zho, ib niacd zho miech lo guidzliu!

22 Laa zho noyow zeene bzhen Jesús tib guietxtil, bdeed me xquizh lo Dios, blozh ga beengroñ mew dzigo bdiiz mew lo zho, ni rëb me:

—Golquiina, lëë xcuerp naa i gon.

23 Ni bzhen me tib cop nroob vin, bdeed me xquizh lo Dios, blozhse bdeed me xquizh, dzigo bdeed me cop co lo zho, grëse zho go vin co. 24 Ni rëb me lo zho:

—Lëë xchen naa i, mine gzhiee par grëse miech ne sëëb xnëz Dios, sac lëë stib mod cub nu psan Dios parne sëëb miech xnëz me. 25 Lëë lultm vult nu guie naa vin rii, sac

zhaale stib vin cub ne guie naa zeene laa naa gdziñ zaatne r nabey Pxoza naa.

Dzigo psilo me biil me bla salm gza me zho.

Bzeet Jesús zha guñ Pedr

(Mt. 26:30-35; Lc. 22:31-34; Jn. 13:36-38)

26 Blozhse biilnie me Dios grë me zho, dzigo laa me brieenie zho ga zienie me zho nëz Gui Oliv.

27 —Ible saan to naa nawdze rii —rëb me lo zho—, sac scale ziaad lo Xtiidz Dios zaatne rnee: “Zdeed Dios diidz csiwee zho baxtor, lozh ga nëzrii nëzrec gliaal mëcwxiiil.”

28 Sca guñ zho naa, per zeene laa naa grieen-ban glole naa ga Galilé, ga cuëz naa to.

29 Dzigo rëbchaa Pedr lo me:

—Niicle telne saan grë zha qui luu, sangue naa gon csaand naa luu.

30 Pquiab me rëb me lo Pedr:

—Gneli naa lo luu ganle, guieel riigazh, gardle grop gall tsonle vult rëb luu runbeyd luu naa.

31 Per tibaque nac xtiidz Pedr, rnee Pedr lo me:

—Niicle tel zaatne guet luu guet naa, per gunscad naa. ¿Pe nacne guiep naa runbeyd naa luu?

Scaque rnee grëraa zho.

Bzodiidznie Jesús Pxoza me Getsemani

(Mt. 26:36-46; Lc. 22:39-46)

32 Bdziñ Jesús zaatne lë Getsemani gza me zho, dzigo rëbchaa me lo zho:

—Nuse nagon golsob, laa naa ga gazodidznie naa Pxoza naa.

33 Horco psilo mban rac zdoo me, ri-abguieñe me, dzigo bredz me Pedr, Jacob ni Juan, bzënie me zho palal 34 dzigo rëbchaa me lo zho:

—Mban rac zdoo naa, zootle zig zet naa lo guieñe rii. Nuse nagon golguiaan, per golsobna.

35 Bzë me spalal, dzigo pquiitsgzhib me haxta bdziñ lo me lo liu; psilo me bnaab me lo Dios ne telne zrieelow mazd tete me grë guieñe ne no gan me, 36 rëbchaa me:

—¡Papá, par luu grëse cos zrieelo guñ luuw! ¡Bzhiguiel psilaa naa lo guieñe rii! Per telne grieloda, mine gnëtaa luu, sca gaca.

37 Zeene biire me bdziñ me zaatne biaan gza tson zha co, gon me gzase zho nixguies; dzigo rëbchaa me lo Pedr:

—Simón, ¿nixguies luu lëë? ¿Pe ni palal blëëb luu nzobna luu? 38 Golsobna, golnab lo Dios zeena yquiid mendox to. Niicle ne squi lëbdraa xcuerp to sobna to, per golnab lo Dios, sac gon min co nac mine racladz zhiespíritu to.

39 Dzigo biire güey me stib, güeyzodiidznie me Dios; scaque mine bnaab me glo mincoque bnaab me stib. 40 Zeene bdziñ me lo zho, gon

me laa zho bii nixguies. Ni rdziold zho pe guiab zho lo me.

⁴¹ Laa zeene goc tson vuelte biire me güeynab me lo Dios, rëbcha me lo zho:

—Lëew nagon, zacle na gagueies to, zacle gdziiladz to. Naa ne nac naa Men ne pxeel Dios, naataa laa hor bdziñ zeene laa grë miech ntseeb rii guiadnaaz naa. ⁴² Goltsieso, zeena zio ne; sac gon laa zha ne glu naa lo zho ziaadde nu.

Bnaaz zho Jesús

(Mt. 26:47-56; Lc. 22:47-53; Jn. 18:2-11)

⁴³ Laa Jesús bii quianeeque, zeene laa Judas (tib zha ne nac xpëedscuel me) bdziñ, bdziñnie Judas tib dzoon zha ne pxeel grë pxoz ne rnabey, grë maistr ley ni grë zha non lo menguedz Israel. No zho nzhen spad, nogaa zho nzhen yag. ⁴⁴ Biaanniele Judas zho diidz zha glu Judas cho nac Jesús, rëb Judas lo zho:

—Nanle to gon, zha ne gow naa bzhid cuas, lëe me ga; ligier golso golxen me, ib csaande to xoon me.

⁴⁵ Nlagaaw, zigne bdziñ Judas bredz Judas Jesús; blozh ga dow Judas bzhid cuas me.

⁴⁶ Horco wbig grë zha ne zienal zhits Judas ga bzhen zho me. ⁴⁷ Lo grë zha ne nacgza Jesús ga, hor co biasaque tib zho bdob zho zhispad zho pchug zho tib diag xmoz men ne nac pxoz nroob.

⁴⁸ Dzigo rëbcha Jesús lo grë miech co:

—¿Niacxe naa cho ngbaan, zha nac ne squitaa nzhen to spad, nzhen to yag ziadnaaz to naa? ⁴⁹ Blactaa dze name gon to noseed naa miech len yadoo, ¿pe nacne bnaazde to naa ga? Per ible laa grë ncuiaan rii gon noyac zeena gac grë mine raquiet lo Xtiiidz Dios.

⁵⁰ Grë zha ne nac xpëedscuel me ga, grëse zho bzhoon, tipse me psan zho ga.

⁵¹ Tibaque mgui nguieg bii güeynal zhits me, tib lëse lar nquits mbix mgui; dzigo bnaaz zho mgui gocladz zho ye mgui nienie zho; ⁵² per znuse briece mgui len lar co, bzhoon mgui coletse mgui.

Güeynie zho Jesús lo zhiwxtis zha Israel

(Mt. 26:57-68; Lc. 22:54-55, 63-71;

Jn. 18:12-14, 19-24)

⁵³ Ga brieenie zho Jesús bdziñnie zho me lidz men ne nac pxoz nroob. Grë pxoz rnabey, grë zha ne rnabey lo maistr ley ni grë zha non lo menguedz, laa zho pcaalsa ga.

⁵⁴ Ye Pedr, maase zit zit nal Pedr laa Pedr bdziñ xley men co. Bdziñ Pedr, güeysobga Pedr lo grë zha ne ndxienap, lëétaque laa zho quiazdëe lo gui.

⁵⁵ Grë pxoz co, grë zha ne nac zhiwxtis zha Israel, laa zho ndxie nëz len yu co, quiauib zho dien pe yquaaqui zho gnab zho guet Jesús, quiauib zho dien pe dol ne ycaadz zho me; per rdziold zho dien pew.

⁵⁶ Nzian zha ne pquidie rëb zho znu znu nac ncuane noyun me, per rrieequiad xtiidz zho; sac zhaase zhaase rnee zho. ⁵⁷ Tibaque zeene guso blalaa zho, bnexuu zho rëb zho:

⁵⁸ —Bdzion no gon rëb me laa me ctixche yadoo, lozh ga tsonaque ngbidz gzaalo me stiba; per led miechdraa nzaaw.

⁵⁹ Niicle scaw, rzëdaque xtiidz zho tipse.

⁶⁰ Dzigo hor co bzoli men ne nac pxoz nroob, bzo me glowtaa lo grë miech co, bnabdiidz me lo Jesús rëb me:

—¿Pe nacne rquiabd luu? ¡Dizli dzigo lëe nac grë mine rnee zho!

⁶¹ Dzese zo Jesús ib rquiabd me. Biireque men co bnabdiidz me stib rëb me:

—¿Nlaga cho nac luu? Bnë tel nli Xpëed Dios nac luu, Men ne nacle diidz ga cxeel me lo guidzliu.

⁶² Dzigo pquiab Jesús rëb me:

—Nliw, naa nac men co. Naa ne nac naa Men ne pxeel Dios, bii zan to ganle zeene laa naa zoob cue Dios nëz derech, ni zeene laa naa guieet gbaa zialzëeb naa lo xcow.

⁶³ Horco ptsiez pxoz nroob co xab me, sac blëe me bin me sca rëb Jesús.

—¿Pe mazdraa textigw ne racladz ne? —rëb me—, ⁶⁴ laa to binle ganle zha rzëtaa xtiidz me noguitnie me Dios. ¿Pe gnë to na zha gac me?

Grëse zho pquiab rëb zho, ib rieguiala guet me.

⁶⁵ Dzigo hor co blalaa zho laa zho psilo notsuc lo me. Pxiidoo zho lo me ni rdeed puñet zho me, lozh ga rnee zho:

—Bnë dien, ¿cho ga bdiñ luu?

Ye grë zha ne quianap ga, rgap zho lo me.

Rëb Pedr runbeyd Pedr Jesús

(Mt. 26:69-75; Lc. 22:56-62; Jn. 18:15-18, 25-29)

⁶⁶ Laa Pedr bii zoque ley. Ga zo Pedr, zeene laa tib wnaa ne nac zhicriad men rnabey co bdziñ; ⁶⁷ gon me laa Pedr zob gax lo gui nodzëe Pedr. Dze rwi me lo Pedr, tibaque zeene rëb me:

—¿Ye luu lëe rzënie Jesús, men Nazaret ne bdziñnie zho?

⁶⁸ Per bneelid Pedr.

—Dieen pe rool luu —rëb Pedr—. Runbeyd naa men co.

Brieega Pedr zie Pedr nëz ro zawan, lëétaque hor co pucedz tib gall. ⁶⁹ Dzeque rwi wnaa co lo Pedr, dzigo rëbcha me lo grë zha ne ndxie ga:

—¡Lëew, zha ne rzënie me nac mgui qui!

⁷⁰ Biire Pedr rëb Pedr runbeyd Pedr me. Wdzeepaa goca, biire zha ne ndxie ga rëb zho lo Pedr:

—Ne nliga, ye luu rzënie men co. ¡Zha Galilé name nac luu!

⁷¹ Dzigo psilo Pedr rzeet Pedr Dios rnee Pedr runbeyd Pedr Jesús, haxta rnee Pedr:

—¡Dios zobwi ganle, telne rned naa diidzli, maase cuibdee naa!

⁷² Lëëtaaque hor co laa gall pcuedz stib. Dzigoraa psoladz Pedr xtiidz Jesús zeen rëb me lo Pedr: “Gardle grop gall, tsonle vuelt rëb luu runbeyd luu naa.” Dzigo mbanse rac Pedr, psilo Pedr biin Pedr guielnë co.

15

Güeynie zho Jesús lo Pilat

(Mt. 27:1-2, 11-14; Lc. 23:1-5;

Jn. 18:28-38)

¹ Ziadyiinile liuw, scase bii nchool r naw, wbiire pcaalsa grë pxoz non grë zho zha ne rnabey lo maistr ley, grë zha non lo menquiedz ni grë zha ne nac zhiwxtis zho. Blozhse bnediidz zho, laa zho pxidoo Jesús güeynañ zho me lo Pilat men ne nac gobernador.

² Bdzin me lo Pilat, bnabdiidz Pilat rëb Pilat lo me:

—¿Pe nli na luu nac zhirey zha Israel?

Pquiab me rëb me:

—Nliw.

³ Tibaque quia grë zha ne nac pxoz non, rzadraa grë ncuanae rcaadz zho me. ⁴ Nacne wbiire Pilat bnabdiidz Pilat lo me, rëb Pilat:

—¿Pe nacne rquiabd luu? Bui ganle zha nactaa grë ncuanae rcaadzdoñ zho luu.

⁵ Bzee zdoos Pilat gon Pilat ible pquiabd me.

Bnab zho guet Jesús

(Mt. 27:15-31; Lc. 23:13-25; Jn. 18:38-19:16)

⁶ Gzobse lni Pascw rsilaa Pilat tib zha ne no ladzguuib, tel cho zha ne gnabtaa menquiedz laa. ⁷ Len dze co no tib mgui lë Barrabás ladzguuib, ni zla zha ntseeb ne nacgza me, laa zho no ga sac nzian zha ne beet zho zeene gocntseeb zho lo gobiern. ⁸ Nacne psilo grë miech co, rnab zho lo Pilat csilaa Pilat tib zha ne no ladzguuib zigne runtaque Pilat grëraa iz.

⁹ Dzigo bnabdiidz Pilat lo zho, rëb Pilat:

—¿Cho racladz to csilaa naa? ¿Pe silaa naa men ne rnee zho zhirey to nu?

¹⁰ Sca rëb Pilat lo zho, sac nanle me niapse por rlëë grë pxoz non co ran zho Jesús gane bnabey zho bgaa me güeynañ zho me ga. ¹¹ Per lel psilo grë miech co rnab zho csilaa Pilat Barrabás; ni lëëque grë pxoz co pquuil zho. ¹² Dzigo rëb Pilat lo zho:

—¿Zha dzigo racladz to gac men rnee zho zhirey to nu?

¹³ Pquiab be grë miech co, roptsie zho rnee zho:

—¡Bnabey yquia me lo cruz!

¹⁴ —¿Pe nac falt ne been me? —rëb Pilat—. ¿Pe nacne racladz to yquia me lo cruz?

Biire zho roptsie zho rnee zho:

—¡Bnabey yquia me lo cruz!

¹⁵ Gon Pilat zha rac zho ni racladzaque me guiannziiu me lo zho, nacne mazd bzoob me xtiidz zho, bnabey me blaa Barrabás; laa Jesús, blozhse bnabey me bdiñ zho Jesús laa me been Jesús ntregar lo grë menquib ne tseiquiaa me lo cruz.

¹⁶ Biire grë menquib co bzëëbnie zho Jesús nëz len yulow, ga pcaalsa grëraa menquib ne nacgrë zho. ¹⁷ Psilo zho rguitnie zho me, bgacw zho me tib lar morad zig rna lar ne racw grë rey, ni bzieecw zho bla lë yag guiets bzoob zhow guic me, zig rzob coron guic grë rey. ¹⁸ Dzigo psilo zho nguiedz roptsie zho rnee zho:

—¡Golwi ganle zha ractaa zhirey zha Israel!

¹⁹ Bzhen zho tib goobgui, rdeed zhow guic me, rtscu zho lo me, rquiaaalo zho rquitsgzhib zho lo me zig rquitsgzhib zho lo zha non.

Güeyquiaa zho Jesús lo cruz

(Mt. 27:32-44; Lc. 23:26-43; Jn. 19:17-27)

²⁰ Blozhse sca bdiitnie zho me, laa zho blea lar morad ne nacw me ga, biire zho bgacw zho me mine nac xab me; dzigo laa zho brienie me ga zienie zho me zaatne yquia me lo cruz.

²¹ Nëz zienie zho me, bdiieel zho tib mgui Ciren lë Simón (lëë pxoz Lejandr ga grop Ruf), znu ziaad me wbiire me dan. Dzigo bnabey zho me bi me zhicruz Jesús.

²² Zeene bdiiznie zho Jesús zaatne lë Gólgota (nac diidz co zig nac ne rnee ne “Gui Beerguic Ngutoo”); ²³ ga bdeed zho nziu notsa guizh rmed ne lë mirr, nan zho nie mew, per god mew. ²⁴ Dzigo laa zho pquiaa me lo cruz.

Blozhse pquiaa zho me lo cruz, bzhen zho tib xab me pchug zhow, biaanñie zho tib lëgaw tib tib zho, laa stiba bio zho rif. ²⁵ Zig hor wxeeeren ga pquiaa zho me lo cruz.

²⁶ Glaa guic cruz ne pquiaa zho me ga, ga pquiaa zho bla lan diidz zaatne rnee pe nacne sca psacsi zho me, rneew: “LËË MEN RII QUIA NU, PORNE NAC ME ZHIREY ZHA ISRAEL.” ²⁷ Ye chop ngbaan pquiaagza zho me lo cruz, tibga zhicruz zho bzo tib nëz cho zhicruz me. ²⁸ [Ga brieequia mine raquiet lo Xtiidz Dios, zaatne rnee: “Bloo zho me lad zha ntseeb.”]

²⁹ Grë miech ne rded zaatne quia me lo cruz ga, runnguzee zho me, rzhidnie zho me, haxta rdzi guic zho rnee zho lo me:

—¡Pe led rëb luu lëë, laa luu ntsil yadoo ni tsonaque ngbidz nzaalo luuw stib! ³⁰ Nana zho, ipe gacd lëëque luu bla luu lo caxtigw qui, biet lo cruz qui!

³¹ Scasaque grë pxoz non ni grë maistr ley, rzhidnie zho me; rnee zho:

—Stib miech scataa beenguiaic me, stib miech scataa bla me, pe nac dzigo rrieelod

me gla me me. ³² ¡Te!ne nli me nac Men ne zëëble diidz ga cxeel Dios, telne nli me nac zhirey ne, niinagazh quiet me lo cruz; zeene gliladz ne me!

Ye zha ne quiagza me lo cruz ga, rbidzgo zho lo me.

Gut Jesús

(Mt. 27:45-56; Lc. 23:44-49; Jn. 19:28-30)

³³ Go! gro! dzew, tibaque zeene goc tib ncow dipse lo guidzliu, haxta las tres biao biini stib. ³⁴ Horco nguiedz zëëb tsi Jesús, rnee me:

—¡Eloi, Eloi! ¿Lama sabactani?

(Diidz co nac zig nacne rnee ne: ¡Luuse name nac xDios naa! ¿Pe nacne psaan luu naa?)

³⁵ Grë zha ne ndxie ga, zeene bin zho sca rbedz me, no zho nan Lí, men ne biadteed xtiidz Dios padzeela, men co rbedz me. ³⁶ Dzigo rias tib zho güeygadz tib lë zhiil lo nziu bla, bzoob zhow tib guic goobgui pquiaa zhow ro me.

—¡Gotsaa csaan —rnee zho—, nu dzian ne dien pe ziaad Lí guiaadlit Lí me lo cruz!

³⁷ Tibaque zeene pquiaa me stib redz nroob, znuse blozh me.

³⁸ Lëëtaaque laa me nolozh, zeene briez nzoli lar nroob ne quia len yadoo, groltaa goca. ³⁹ Gax lo me ga zo men ne rnabey lo grë menguiib co, zeene gon men co zha gut me, rëbchaa me:

—¡Ne nligaa, Xpëed Dios nac men qui!

⁴⁰ Ye blalaa men wnaa güeyso ga, zit zo zho rwi zho; lad co no Marí Magdal, Salomé ni Marí ne nac xniaa Jacob niab grop José.

⁴¹ Nzianlaa nac zho, lëë grë wnaa co been xyudar me len dze ne güeyted me dib xtan zha Galilé; ni zlagaa zha ne güeynal zhits me zeene bdziñ me Jerusalén.

Bgueets Jesús

(Mt. 27:57-61; Lc. 23:50-56; Jn. 19:38-42)

⁴²⁻⁴³ Lëëtaaque dze co nac vispr dze ne rdziiladz zho lo dziin. Zeene laa dze bdzepaa, dzigo güey José (men Arimaté) lo Pilat bnaab me diidzbey tsiequeets me Jesús. Glo zoot me tsied me, per tibaque bloo me tib valor güey me; niicle ne tib zha non nac me lad zhiwxtis zha Israel, ye me quiambéz gdziñ dze ne gnabey Dios.

⁴⁴ Bzee zdoo Pilat zeene bin me laa Jesús gutle. Nnabey me gocredz zha ne rnabey lo menguiib ne quiapan Jesús; ⁴⁵ haxta bdziñraa men co rëb nliw, dzigoraab deede me diidz tsielit José Jesús lo cruz.

⁴⁶ Nacne güey José, güey si me tib lë lar nroob. Zeene blozh blit me Jesús lo cruz pchel me Jesús lar co, dzigo güeyxob me me tib len baa ne ndieen tib cho quie. Blozh ga, psodan me tib quie nroob psioog me ro baa co.

⁴⁷ Ga zo Marí Magdal ni Marí xniaa José, gon zho pa lo bguets me.

16

BRIEEBAN JESUS

(Mt. 28:1-10, 16-20; Lc. 24:1-53;

Jn. 20:1-23)

¹ Bdze dze dze ne rdziiladz zho lo dziin, güey Marí Magdal, Salomé, ni Marí xniaa Jacob güey si zho grë nceit nex ne tsietëëb zho lad xcuerp Jesús. ² Laa zeene biini liu, dze ne rzobni zhmäl, silgaw loxaque ziaadlan ngbidza laa gza wnaa co brieel laa zho zie ro baan Jesús.

³ Nëz no zho, rnabdiidzla zho dien zha gdioob quie nroob ne nioog ro baa, cho siguiel coba. ⁴ Ni zeene bdziñ zho, gon zho laa quie co bdiiooble.

⁵ Laa zho bzëëb len baa, zeene gon zho nëz derech laa tib mgui nguieg zob ga, nacw me tib lar nool, dib nquitsbiese rna lar co. Bdzieb zho gon zho me; ⁶ dzigo rëbchaa me lo zho:

—Gdziebde to. ¿Jesús lëë, men Nazaret ne pquiaa zho lo cruz, men co ziaadguib to? Guiendle me nu, ¡laa me brieebanle! Go!wi ganle nu nac zaatne pxob zho me. ⁷ Go!tsie, golguiab lo Pedr ni lo grëraa xpëedscuel me tsie zho Galilé, ga tsiedzieel zho me zigne rëble me lo zho glo.

⁸ Rias gza wnaa co laa zho brieel ga, masaque rzhidz zho rdzieb zho. Lo zzeb co ni par gnee zho gaccl.

⁹ [Dze ne rzobni zhmäl ga, sil co brieeban Jesús, ni Marí Magdal nac zha ne glopaa gon me; lëë Marí co ga beenguiac me zeene benccoön me gadz mendox ne nosacsi Marí. ¹⁰ Dzigo güey Marí güeynie Marí diidz lo grë zha ne bzënie me ga. Lëëtaaque laa zho ndxie mban rac zho, roon zho no zho xquienë me. ¹¹ Niicle bin zho rëb Marí laa me brieebanle, gonlo Marí me; per bliladz zhow.

¹² Bded ga, brieequia me lo scho xpëedscuel me lëëtaque no zho nëz zie zho dan. ¹³ Dzigo güey zho güeynie zho diidz lo grëraa zha ne nacgza zho; per niicle xtiidz grop zha co bliladz zho.

¹⁴ Laa stibtaa vuel, lëëtaque ndziib zho lo mezh no zho wagw gza tsüptib zho, tibaque zeene laa me brieequia; dzigo goctox me lo zho sac gon me ib bliladz zho xtiidz me; ni gon me scataa nad zdoo zho, sac niicle güey zha ne gon me güeynie zho diidz ne nli brieeban me, ni bliladz zhow. ¹⁵ Ni rëb me lo zho:

—Go!tsie dipse lo guidzliu, go!tsieseed miech Xtiidz Ndzon Dios. ¹⁶ Grëse zha ne dib zdoo gliladza ni chobnis zho, scaania Dios zho; sangue zha ne gliladzda, laa zho bnitole ga. ¹⁷⁻¹⁸ Grë zha ne sca dib zdoo gliladz naa: znee zho stib diidz ne

rneed zho. Niicle xen zho grë meel ntseeb,
 concuaangaa miech zho, ib peet gacd zho.
 Ni zeene cxobnia zho guic grë men rzacnë,
 zunguiac zho zho; grë mendox ne noguitnie
 miech, zeene gzeet zho lë naa zuncxooñ zho
 ma.

¹⁹ Blozhse sca bnee me lo zho, laa me zey
 gbaa bzob me cue Dios nëz derech.

²⁰ Dzigo grëse xpëëdsuel me laa zho brieë,
 brieets bliaal zho zieseet zho miech Xtiidz
 Dios. Ni me nac men ne noyacniën zho run
 zho grë milagr nroob, zeena glu ne nli Xtiidz
 me nac miñe noseet zho miech.]

XTIIDZ NDZON DIOS MIÑE PQUIAA LUC

¡Diuzh Tiofl!

¹ Nanle luu ganle, nole bla zha ne bioxco pquiaa zho grè ncuane gac zeene biaad Jestüs men ne pxeel Dios ga. ² Ncuane nli-paa goca, grè ncuane pquiaa zho ga, laaw pquiaa zho zigne rzodiidzse miecha len dze rii, zigne rzodiidzsegaa zha ne bženiepaa mew, zha ne pso me noneew lo miech.

³ Yeque naa pquiaa naa wen wen bnabdiidz naa, bleeni naa diidz grèse dien zha psilo grè ncuana co; ni niina laa naa rquiaw zigne gocsew laaw rxel naa lo luu. Sac rien naa ib nonguiela gacnañ luuw; ⁴ zeena lozh gacnañ luu zha nac diidzli rii, wseed ne blu zho lo luu i.

⁵ Len dze ne nac Herod rey rnabey me dib xtan zha Judé, len dze co no tib pxoz lè Zacari, me nac tib zha ne nacgrè “Zha Abí”. Niicle tsiel mew, zha xtii pxoz Aaron ziaad wnaa co, lè me Lisabet.

⁶ Zigtaa Zacariw, zigtaa Lisabeta, noxco me miñe rnabey Dios, mban mew zigne naca, ni tib xley Dios rguitsd me. ⁷ Men golve nac me grop me, per ni tib mèed quianied me, sac niaad Lisabet gapd me mèed.

⁸ Laa tib dzew bgaa grè zha ne nacgrè Zacari gun zho dziin len yadoo. ⁹ Nac xcostumbr grè zha ne nac pxoz, rio zho tib rif dien chopaa yгаа tsiaelaaz goxyaal len yadoo, dzigo bgaa Zacari. ¹⁰ Goxyaal co no-laadz me len yadoo, laa grè miech ne ndxie nèz ley nonabgaa lo Dios, ¹¹ tibaque zeene brieequia tib xanjil Dios bzo cue pcoog nèz derech, zaatne nozèeg me yaal ga. ¹² Zeene gon me anjl co bdzieb me, rdzieldraa me zha gun me lo dzeb co. ¹³ Dzigo rëb anjl co lo me:

—¡Gdziebd luu! Diidzse zialnie naa lo luu, gacnañ luu ganle miñe bnab luu lo Dios ga, pquiaadiag mew; gane niina laa tsiel luu gap tib mèedbgui. Zeene gal win, Juan cueelè to win. ¹⁴ Tib guielbley nroob gac win lo to, niicle lo grèragaa miecha, ¹⁵ sac tib men nziuu gac win lo Dios. Zeene gac win zha broob, ni tib ro nziuu guied win, per ni vin yquiaarod win; ansraa gal win, laa Espiritu Sant nacniele win. ¹⁶ Win gac men ne co guic nzian grè zha Israel, gbiire gbig zho lo Dios, men ne rnabey zho. ¹⁷ Zigne goc Li, men ne biaad pteed xtiidz me padzeela, sca gac win tedner win lo me, nroob poder ne gap win. Win gnee lo grè miech rii, gbiire gleynie zho me zigne goc xmengol zho zha ne bleynie me; csaan zho

grè xquielntseeb zho, gban zho zigne racladz me; zeena niowse gac zho ycaania zho me.

¹⁸ Pquiab Zacari rëb Zacari lo anjl co:

—¡Ncuane gacd i gon rnee luu! Zigtaa naaw, zigtaa tsiel naaw, mengol-le nac no.

¹⁹ Rëbchaa anjl co:

—Bien ganle anjl Gabriel nu quianee lo luu, anjl ne tibaque zo lo Dios. Me pxeel naa zialnie naa diidz rii. ²⁰ Per ne squi riladzd luuw, na laa luu guiaañ ngop, haxta gal dze ne gac miñe rne naa lo luu nu, dze co glan xtiidz luu stib.

²¹ Grè miech ne ndxie quianab lo Dios ga, quiambèz zho Zacari, rnabdiidzlsa zho pe goc me, sac ran zho rriede me zaatne ziezèeg me yaal ga. ²² Zeene briece me, gon zho gacdraa gnee me, dzigo bien zho no pe blu Dios lo me ga. Tel pe racladz me gnee me, niapse señ rlu me.

²³ Bzase dze ne been me dziin len yadoo, dzigo laa me zeylidz me. ²⁴ Goca bla ngbidz, laa mèed co pquialo zdoo tsiel me.

Dipse len gaay mèe bio zhuz co ro yu, ib briede me, rley me rnee me:

²⁵ —¡Zha wentaa Dios, bneedz me diidz bdziñ dze yquianie naa mèed rii, zeena gzhidzniedraa miech naa!

Güeynie tib anjl diidz laa Jesús gac mèed

²⁶ Goc xoop mèe zoney Lisabet mèed, pxeel Dios anjl co stib güey me Nazaret, guiedz ne ndxie xtan zha Galilé. ²⁷ Ga no tib ndzoop nguieg lè Mari, len dze co no xtiidz ndzoop co ctsieelna ndzoop tib zha xtii rey David, lè José. ²⁸ Bdziñ anjl co zaatne no ndzoop, pquiaabdiuzh me ndzoop, rëb me:

—¡Dichos luu gon, sac tib zha nziuu nac luu lo Dios! Me quianap luu.

²⁹ Zeene gon Mari anjl co, ni gon Mari zha rnee me, bzee zdoo Mari, riend Mari dien pe nac scataa rzè xtiidz me. ³⁰ Dzigo rëbchaa me lo Mari:

—¡Gdziebd luu! Laa Dios gon bzooblo luu yгаа luu tib guielnzaac nroob. ³¹ Zdoo luu yquiaalo tib mèedbgui, zeene laa win gal, JESUS cueelè luu win. ³² Tib men nroob gac win, zien miech ganle Xpèed Dios ro ne no gbaa nac win; ni so me win gnabey win zig bnabey xmengol win David. ³³ Win gnabey lo grèse zha Israel, ni gdziñ dze ne lozh xquielrnabey win.

³⁴ Pquiab Mari rëb Mari lo anjl co:

—¿Mèed ye? ¿Per zha grieelo gap naa mèed, ni tib naa zo nu?

³⁵ Rëbchaa anjl co:

—Niapse por poder ne rap Dios gac min co. Zeene laa Espiritu Sant guiaad gacnie luu, hor co laa poder co gacnie luu, laa mèed co yquiaalo zdoo luu; gacxe waa Xpèed Dios gunbey miech win, miñe rnabey Dios min co gun win. ³⁶ Ye belyeen luu Lisabet, niina lo guielgol-le laa tib mèed pquialo zdoo me;

zëeb diidz ib grieelod gap me mëed, per na racle xoop mëe zoney me mëed, ³⁷ sac par Dios tsod ncuuaane grieelod gac.

³⁸ Dzigo rëb Marí:

—Teļ scaw, miñe rnee luu i, maase gaca. Laa naa zo nu par guñ naa miñe gnabeytaa Dios naa.

Blozhse ga, laa anjl co zey.

Güeygañ Marí Lisabet

³⁹⁻⁴⁰ Goc bla dzew, briece Marí ga zie me ziegañ me Lisabet tib guiedz win ne ndxie gui glaa ne nac xtan zha Judé. ⁴¹ Bdziñ me, wbig me pquiaabdiuzh me Lisabet. Bdiuzh co bnee me, zeene biasoli xpëed Lisabet zdoo Lisabet; dzigo hor co bdeed Espiritu Sant guieļbiini lo Lisabet, ⁴² nguiedz bnee Lisabet rëb me lo Marí:

—¡Dichos luu Marí bгаа luu guieļnzaac qui! Sac goñ, lo grëraa no nac no meñ wnaa, luu bzooblo Dios. Mëed ne zoney luu i, zha nziuu nac win lo me. ⁴³ ¡ib guiaañladz naa dze rii, znu biaad luu nac luu xniaa meñ ne rnabey naa, biaadgañ luu naa! ⁴⁴ Haxta mëed ne zoney naa nu, rley win biasoli win zdoo naa, zeene pquiaabdiuzh luu naa. ⁴⁵ ¡Dichos luu, bin luu miñe në Dios, ni bliladz luu zuñ mew!

⁴⁶ Dzigo hor co bnee Marí rëb me:

¡Meñ nroob nac Dios! ¡Gdib zdoo naa roolñie naa me!

⁴⁷⁻⁴⁸ Rleynie naa me nac me meñ ne psilaa naa,

sac goñ niicle peet nond naa, tib nguñdziin winse nac naa lo me,

per laa me bzooblo naa.

Grë miech, zigtaa leñ dze riiw, zigtaa leñ dze ne ziaadragaaw,

ziab zho naa nac tib wnaa ne mazdraa dichos.

⁴⁹ Ne nligaa zha nactaa guieļnzaac rii bneedz me lo naa.

Meñ ro, meñ nroob nac me, ¡guieñdraa cho zig me!

⁵⁰ Grëse miecha, zha ne rioxco rquiaadiag miñe rnabey me,

tibaque racnie me zho, ib rsaand me zho.

⁵¹ ¡Goļwi gañle zha nactaa grë ncuuaane ruñ me!

Grë ncuuaane no guic zha niats guñ zho, bñitlo mew,

⁵² pñiche me grë zha ne zob rnabey.

Laa grë zha ndooladz, zha ne rzac miech peet nond,

beēñnon me zho.

⁵³ Grë zha mban ne guiend pe yquiiñ, nroob guieļnzaac ne bdeed me lo zho,

laa grë zha ne rapcheñ, scase bzonëz me zho.

⁵⁴ ¡Pe zhidaa ziyacnie me grë zha ne nac xtiñ Israel, meñgol ne goc zig tib nguñdziin

lo me ga! ¡Tibaque rlu me rleynie me zho!

⁵⁵ Ib biaanladz me xtiidz me miñe bnee me lo pxozgol ne Abraham,

zeene rëb me gdziñd dze ne csaan me Abraham, ni grëraa zha ne grieequia lo xtiñ Abraham.

⁵⁶ Maase tsoñ mëe biaan Marí ga blëz me lo Lisabet, dzigoraa wbi me ga bdziñ me lidz me stib.

Gol xpëed Lisabet

⁵⁷ Bdziñ dzew, laa xpëed Lisabet bza mëe, laa me gop win. ⁵⁸ Grë zha ne no gax lidz me, grë zha ne nac menlidz me, zeene bin zho scataa pquiaa zdoo Dios me bdeed Dios mëed co lo me, rley zho güeygañ zho me.

⁵⁹ Dze ne goc mëēdbgui yeeñ co xon ngbidz, blalaa zha ne güeynaļ zhits pxoz win, zhits xniaa win güeynie zho win bio win bey ne rio xpëēdbgui zha Israel, parne glu lo Dios ngab win. Tibaque nañ zho Zacarí nrieelë win, zigne lëque pxoz win, haxta scale nonee zho lo win, ⁶⁰ per hor co rëb Lisabet, led scad gac lë win, Juan grieelë win.

⁶¹ Dzigo pquiab zho rëb zho:

—¿Pe nacne sca grieelë win? Ni tib menlidz to lëd Juan.

⁶² Bñabdiidzaque zho lo pxoz win, blu zho señ lo me dien zha racladz me gac lë win.

⁶³ Dzigo bñab me bdeed zho tib lë lo zatne yquiaa me; bzee zdoo zho zeene blozh pquiaa me goñ zho rnee lo co: “Juan grieelë win.” ⁶⁴ Loxaque blozh dze sca pquiaa me, zeene laa me wbiire bnee stib, psilo me rdeed me xquizh lo Dios. ⁶⁵ Grë zha ne zo ga, zha ne runbey me, zeene goñ zhow, per nli rzee zdoo zho.

(Nëzrii nëzrec bzhoon diidz laa mëed co gol, grëse guiedz ne ndxie gui glaa co gocnañ miecha. ⁶⁶ Zha ne rona, rza zdoo zho rnee zho: “¿Bay cho gac mëdyeeñ co?” Sac nligaa rlu nacnie Dios win.)

⁶⁷ Horco bdeed Espiritu Sant guieļbiini lo Zacarí, psilo me bnee me rëb me:

⁶⁸ ¡Xquizh xquieļnzaac meñ nroob ne rnabey, meñ ne nac xDios ne nac ne zha Israel!

Sac goñ laa me ziaad, ziaadgañ me ne, ziad-bee me ne lo xquieļnë ne.

⁶⁹ Nasī laa me pxeel meñ nroob ne ziaadsi-laa ne,

lëe meñ co ga no grieequia lo zha xtiñ David, meñ ne beēñ xtsiñ me ga.

⁷⁰ Padzeleale bzeet me cxeel me meñ co, grë zha ne biaad pteed xtiidz me, bzeet zhow.

⁷¹ Rëb zho, ib sxeel me meñ ne guiaadsilaa ne ladznia zha ne nosacsi ne, zha ne rlëe lo ne.

⁷² Sac ib gdziṅd dze csaan me grē zha xtiṅ pxoṅgol ne, rquianēpaa zdoo me zho. Ib guiaanladz me miṅe rēb me lo Abraham, ⁷³ zeene rēb me laa me cxeel meṅ ne csilaa ne,

⁷⁴ zeena dziodzbeddraa ne lo zha ne rlēē lo ne, lo zha ne rsacsi ne; sinque iṅe tibli gac ne dziuun ne miṅe rnabey me.

⁷⁵ Gzataa dze ne gneezd me guielmban lo ne, iṅe mbe zdoo ne, dziuun ne miṅe rleynie me.

⁷⁶ Luu goṅ xin, bzooblo Dios ro ne zob gbaa, cteed xtiidz me lo miech, luu tedner tsienee luu lo zho, laa meṅ co no guiaad.

⁷⁷ Luu gnee lo grē zha Israel, guieṅ zho ganle zha guṅ Dios zho perdon, parne ycaania me zho.

⁷⁸ Ne nligaa rleynie me ne, rquia zdoo me ne,

gane laa me cxeel Xpēēd me, meṅ co gac zig tib biini,

⁷⁹ Biini co gziini lo grē zha ne mban lo guielcow,

zeena biini co glu nēz lo ne, guio ne nēz ne peet zhgab, peet dzeb guieṅd.

⁸⁰ Zigse zie dzew, scase scase zieroob mēdyeeṅ co, ni scaquegaa dib zdoo win rleynie win Dios. Zeene laa win broobpaa, dzigo güey win bio win tib dan zit, haxta bdzin dze ne laa win psilo pseed miech laa win blulo lo zho.

2

GolJesús

(Mt. 1:18-25)

¹ Lēētaaque leṅ dze co, laa August, rey nroob ne zob Roma, bnabey top lē grēse miech ne no dib dan ne rnabey me, par gacnaṅ me dien palal zho. ² Lēē primer vuelṅ ga ptop zho lē miech, lēē iz co zob meṅ ne lē Cirein zobnabey me guiedz Siria.

³ Bnabey August grēse miech zha ne no stib ladz beṅ, laa zho no tsie zaatne nacpaa ladz zho tsiedeed zho lē zho, parne ga ygab zho. ⁴ Miṅ co nagon nacne briece José guiedz Nazaret (xtan Galilé) grop me Marí zie me Belén (xtan Judé). Laa me zie ga, sac ga goc ladz xmengol me rey David. ⁵ Gard ctsieelnipaa me Marí, per nole xtiidz me grop me. Leṅ dze co ziaadyobpaa gal xpēēd Marí.

⁶⁻⁷ Bdziṅ me Belén, bgaadraa me zaatne nrieelo mbēz me leṅ yu, lega nac ti leṅ lidz ma bdeed zho blēz me. Lēētaaque bdziṅ me ga, laa mēēd co gol. Racse Marí pcheṅ me win lar, bdiix me win tib leṅ yag ne row ma guizh; lēē mēēdglō ga lo me.

⁸ Guieel co, blalaa zha ne nac baxtor, laa zho ndxie quianap zho xpēcwxijl zho dan, ⁹ tibaque zeene briecequia tib xanjl Dios lo

zho, dipse zaatne ndxie zho ga biab tib biini nroob. Zeene gon zho anjl co, gon zho biini nroob co, per nli bdzieb zho. ¹⁰ Dzigo bnee anjl co, rēb me lo zho:

—jGdziebde to! jGolgon diidz cub ne ganle zialnie naa lo to nu! jTib guielbley nroob gac diidz rii lo grēse miech! ¹¹ Meṅ ne gon quiambēz to ga guiaad csilaa to, laa me blansole lo guidzliu. Me nac Meṅ ne zēēble diidz ga cxeel Dios, me nac meṅ ndzon ne rnabey. Belén, zaatne goc ladz rey David, ga gol me naguieel. ¹² Goltsie, zaatne tsiedziel to tib mēēdbgui yeeṅ, nrieṅse win lar zhoob win leṅ yag ne row ma guizh, lēē me ga.

¹³ Tibaque zeene gon zho laa stib dzoon anjl briecequia gocgrē anjl ne quianee lo zho ga, psilo grē anjl co roolnie zho Dios, rnee zho:

¹⁴ jHaxta zaatne glaaraa gbaa, nozhoobnen ganle pa lotaa meṅ nroob nac Dios!

jNasi, grēse miech zrieelo guiaanwen zho lo me; zdoo me rala laa me nobedz zho!

¹⁵ Zeene laa grē anjl co zey gbaa stib, psilo grē baxtor co rnee zho:

—jNiinaga golgotsaa guio Belén! jGotsaa guiowi ne dien, zeena dzian ne miṅe biaadnie anjl co diidz lo ne nu!

¹⁶ Lēēlēd bio zho nēz laa zho zie. Bdziṅ zho zaatne blēz José ga grop Marí, nligaa laa mēdyeeṅ co nix ga, nixse win tib leṅ yag ne row ma guizh. ¹⁷ Dzigo bzodiidz zho grēse zha rēb anjl co lo zho, zeene güeynie me diidz laa win gol.

¹⁸⁻¹⁹ Grē zha ne bina, per nli rzee zdoo zho; laa Marí nosew zdoo me, tibaque rso-ladz mew.

²⁰ Blozh ga, laa zho bio nēz ziequianap zho xma zho stib. Iṅe roolnie zho Dios, rdeed zho xquizh lo me sca pxeel me xanjl me güeynie diidz lo zho, rley zho sac brieelo gon zho mēdyeeṅ co.

²¹ Dze ne goc xon ngbidz gol win, dze co bio win bey ne rio xpēēdbgui zha Israel, par glu xnēz Dios ngab zho; dze coquew bleelē zho win JESUS, zigne rēb xanjl Dios zeene güeynie me diidz ne laa win gac mēēd lo Marí.

Güeynie zho Jesús yadoo

²²⁻²⁴ Nac ley ne psan Moisés lo zha Israel, wnaa ne sca rap mēēdbgui, zeene rac zho tap zhmal, none tsienie zho chop ma cogon zho leṅ yadoo; yase tsienie zho tib nēz coc, tib nēzga palom. Ni rnabeya: “Grēse mēēdbgui ne rac mēēdglō, ib none gdeed zho win gac win tib zha ne guṅ xtsiṅ Dios.” Nacne zeene bza dze co, dzigo briece Marí zie me Jerusalén grop me José, zienie me mēdyeeṅ co yadoo csaṅ me win ladznia Dios; lēē nēzle ga zienieque me gon ne no gdeed me ga.

²⁵ Lēētaaque dze ne bdziṅnie zho win leṅ yadoo, laa tib meṅ lē Simeón no ga. Meṅ

Jerusalén nac men co, rleyynie me Dios, ri-oxco me mban me zigne rnabey Dios, ni nacie Espíritu Sant me. Quiambêz me gan me Men ne nole diidz ga cxeel Dios csilaa zha Israel, ²⁶ sac rêble Espíritu Sant lo me ible laa me no gan men co. ²⁷ Laa dze co, Espíritu Santaque psiaab guic me zie me yadoo. Nacne lêêtaque no me len yadoo, laa zho bdziñnie mëdyeen co ga, ziesan zho win ladznia Dios zigne rnabey ley. ²⁸ Dzigo me wbig bdeedz win, rdeed me xquizh lo Dios, rêb me:

²⁹ Xquizh xquielnzaac luu Dios, mine në luu lo zhingundziin win luu nu, laaw goc.

¡Nasi zacle nagon guiaad-xi luu naa, haxta gley naa gbi naa lo guidzliu rii!

³⁰⁻³¹ ¡Men ne nacle diidz cxeel luu guiaadsilaa miech lo xtol zho, grop lo naa laa naa ran me niina!

³² ¡Grêse miech ne ndxie lo guidzliu, me nac biini ne gziini lo zho!

¡Me csanziuu zha Israel, ne nac zho zha ne ngab lo luu!

³³ Zeene gon Marí grop José scataa rzê grê diidz ne rnee Simeón rzeet Simeón mëdyeen co, bzee zdoo me. ³⁴ Dzigo bñab Simeón lo Dios gacnieñ Dios me gza me mëdyeen co. Blozh ga, rêbchaa Simeón lo xniaa win:

—Tib guielbley nroob ne gac mëed rii lo zha Israel, por win ndal zho gree lo guielcow ne no zho, laa zho gbig lo Dios. Ni scagaa zrieequia zha ne glêënie win, per lêëque zha csacsi zho ga. Mban gac zdoo luu, nroob guielnê ne tso luu gan luu zha sac miech win. ³⁵ Ga glu ganle zha nac zdoo tib tib miech.

³⁶⁻³⁷ Ye tib zhuz gol lê An zo ga hor co. Tibaque no me yadoo, dze guieel roolnie me Dios, rcuan me ni rzodiidznie me Dios. Tib zhuz gola, len dze co rac tapgal tap iz biaan me viud. Nguieg me ptsieelnia me, per loxaque gadz iz wbannie me tsiel me. Lêê pxoz me ga brieelê Fanuel, lêê zhey co ga nac zha xtiu Aser. Tib men ne rteed xtiidz Dios lo miech nac me, ³⁸ dzigo wbigaque me, psilo me rdeed me xquizh lo Dios; ni bzodiidz me lo grê zha ne ndxie ga, rêb me lêê mëdyeen co ga nac men ne quiambêz zho ga guiaadsilaa zho.

³⁹ Blozhse been José mine rnabey xley Dios grop me Marí, dzigo laa me wbi ga. Bdedraa ga, beynie me mëed co Nazaret, zaatne nac ladz me. ⁴⁰ Ga broob win, zigse zierooob win scase scase rac macis win, scase riabiiniraa win. Tibaque nacie Dios win.

Biaan Jesús len yadoo

⁴¹⁻⁴² Zeene bloozh Jesús tsiipchop iz, dzigo güey José grop me Marí güeynie me win lni Pascw, lni nroob ne run zho Jerusalén. Gzobse iz rie me grop me, per iz cotaa laa

me güeynie win, sac nac zhiwseed zha Israel, mëëdbgui ne rap lalga iz, zrieelele tsie zho lo lni co.

⁴³ Zeene laa lni co bded, laa me bio nêz grop me laa me wbi ga. Ib biend me biaan win Jerusalén, ⁴⁴ tibaque güeynie guic me lad grêraa miech ne wbire lni, lad co zienal win. Laa me no nêz, zeene bdzetaa dzew, laa me psilo rguib win, bnabdiidz me lo grê zha lidz me, lo grê zha ne runbey me, ⁴⁵ per ni tib zho choot rdeete win diidz. Nacne wbireque me nêz Jerusalén stib, zieguib me win.

⁴⁶ Dze ne racle tson ngbidz blozh lniw, dzigoraa güeydziel me win len yadoo, laa win zob lo grê zha ne nac maistr ley, no-quaadiaq win grê zhiwseed zho ni nzian grê ncuaane rnabdiidz win lo zho. ⁴⁷ Rzee zdoo zho ran zho scataa nixbiini win, niicle zeene rnee wina, zeene rtsiregaa win lo xtiidz zho. ⁴⁸ Zeene gon me laa win zob lad grê men co, bzee zdoo me; dzigo rêbchaa xniaa win lo win:

—Xin, ¿pe nacne squi been luu? Ptseeb luu no gon, quia no grop no pxoz luu noguib no luu.

⁴⁹ Pquiab win rêb win:

—Nguibde to naa. ¿Pe rande to ib none gun naa xtsiin Pxoz naa?

⁵⁰ Ib biend me pe nacne sca rêb win.

⁵¹ Dzigo laa win zienal zhits me, laa me zeynie win Nazaret; nose grê min co zdoo xniaa win.

Tib mëed nguzobdiidz nac win, ron win xtiidz me. ⁵² Zigse zie dzew, laa win riabiiniraa, laa win noroobraa; rleyynie Dios win, niiclegaa miecha rleyynie zho win.

3

Psilo Juan Bautist noseed me miech

(Mt. 3:1-12; Mr. 1:1-8; Jn. 1:19-28)

¹⁻² Bdziñ dzew, laa Juan psilo pseed miech. Lêê len iz co rac tsiin iz zob men ne lê Tiber nac me rey, rnabey me grê guiedz ne ngab lo zha Roma. Len dze co zob Pilat rnabey me grê guiedz ne ndxie nêz Judé, laa Herod zob rnabey grê guiedz ne ndxie nêz Galilé. Len dze coque zob bets Herod, men ne lê Lip rnabey me grê guiedz ne ndxie nêz Iturê ni nêz Traconit; laa Lisian rnabey grê guiedz ne ndxie nêz Abilin. Zha ne nac zhipxoz nroob zha Israel len dze co, nac Anás ni Caifás. Len dze copaa nagon güeynee Dios lo Juan (xpêed Zacari) dan ngan ne no Juan ga.

³ Nacne hor co psilo Juan güeyted me grê guiedz ne ndxie ro guubee Jordán, rnee me lo grê miech co, csaan zho xquielntseeb zho gbig zho lo Dios ni chobnis zho, zeena csilaa Dios zho lo grê xtol zho. ⁴ Ga brieequia mine bnee Isá, men ne biaad pteed xtiidz Dios, zeene znu pquiaa me:

Bii zon miech ganle zeene laa tib tsi men zëeb tib dan ngan, rnee me:

“Golzhixcuuaa nêz ne ted men ne rnabey, golsaan grê guielntseeb ne run to.

⁵ Zaatne nac len blê, golcodzëew, grê gui glaa, grê gui las, golsiaablow. Nêz ne niecw, nêz ne quiaya quiaguiet nac, golzhixcuuaw.

⁶ Grêse miech, laa zho gan men ne pxeel Dios ga ziaadsilaa zho.”

⁷ Zeene ran Juan laa miech rdzin lo me cchoobnis me zho, rnee me lo zho:

—iMiech ngoopdol, masaque nac to zig nac mee! Nan to na lëe, loxaque chobnis to laa to laale lo grê guielnëdox ne ziaadyob guiaad. ⁸ Led scada gon, none ndzinli gban to zeena glu nlpaa psaan to xquielntseeb to. Ni gacniatsde to guiab to, loxaque por nacse to zha xtii Abraham, laa Dios csilaale to; sac gneli naa lo to ganle, telne gacladz Dios, haxta grê quie zac gnabey me tsaalow miech ne gac zha xtii Abraham. ⁹ Nanle to ganle, grê yag nex ne rquiad nex lo, zeene ran zho sca naca, rchug zhow, rzëeg zhow; scadaa nagon sac grê zha ne gband zigne racladz Dios, ib tedlaad zho lo gui; sac rrieequia laa me nzhenle xquiiybag me, cchug me grê yag ne sca nac.

¹⁰ Dzigo rnabdiidz zho lo Juan, pe no gun zho parne ygaad zho grê guielnë co. ¹¹ Dzigo rquiab me rnee me lo zho:

—Telne quianie to chop lar ne racw to, none gdeed to tiba lo zha ne guien d xab; telne quianiegaa to ncuuane gow to, none gdeed to palala yquiiin zha ne quianieda.

¹² Wbigaque bla recaudador ne zie chobnis, rnabdiidz zho dien pe gun zho. ¹³ Pquiab Juan, rëb Juan lo zho:

—Cuandraa to samiech to, mine rieguialse zho quizh zho, min co golnab lo zho.

¹⁴ Ye zla menguiib wbig, rnabdiidz zho rëb zho:

—¿Telzhe no waa, pe nac mine dziuun no? Rquiab Juan rnee Juan lo zho:

—Ndzinli golgac, ib ctsebdet to samiech to par dien pe gla to lo zho; zha ne peen xtold, ib yquiaaquide to zho ncuuane beend zho. None sac zdoo to dimi ne quiaayazh to.

¹⁵ Nzian grê miech co quiambëznë zho gacnan zho dien pe lëele Men ne bzooblo Dios ga cxeel me nac Juan. ¹⁶ Dzigo rëb Juan lo zho:

—Tib wrobnisse nu rnedz naa lo to, sanque men ne no guiaad ga Espiritu Sant gdeed me lo zha ne gliladz me; ni scagaa zha ne gliladz me, sonëz me zho zaatne nitlo zho. Ne nligaa men non nac me, tel naa peet nond naa, per ni par tib ngundzin ne glit lab me ni me, raguiald naa gac naa.

¹⁷ Laa me guiaad zig tib zha ne rbeeguizh zho zho rrotsow zhow, laa paj rlaal zho lo gui,

ga reca. Per gui ne gzëeg grê paj ne guiadbee me ga, gdzind dze guiuuw.

¹⁸ Sca rnee me lo zho, par guien zho zha nac Xtiidz Dios. ¹⁹ Tib vuelt haxta lo rey Herod goctox me, sac lëeque Herodí, wnaa ne nac tsiel bets Herod nonie Herod; grê guielntseeb ne quiaayun Herod, blisqui mew.

²⁰ Per laa ne nion Herod diidz, lel been me stib guielntseeb, bnabey me bgaa Juan bio Juan ladzguuib.

Brobnis Jesús

(Mt. 3:13-17; Mr. 1:9-11)

²¹ Len dze ne nochoobnis Juan miech ga, tib dzew laa Jesús bdzin lo Juan ga, ye me bnab cchoobnis Juan me. Blozhse brobnis me, laa me quiazodiidznie Dios, tibaque zeene bzhiial zhan gbaa, ²² laa men ne nac Espiritu Sant biet, rlu me zig rlu tib palom, laa me bdzin guic Jesús, hor co blu zëeb tib tsi men co nêz gbaa, rnee me:

—Xin, rleynie naa luu gon, nziuu luu lo naa.

Xmengol Jesús

(Mt. 1:1-17)

²³ Galptsii iz rap Jesús, laa me psilo xtsiin me pseed me miech. Zha ne runbey me, rzoob zho xpëed José nac me,

²⁴ José goc xpëed Elí,

Elí goc xpëed Matat,

Matat goc xpëed Leví,

Leví goc xpëed Melqui,

Melqui goc xpëed Jan,

Jan goc xpëed José,

²⁵ José goc xpëed Matatí,

Matatí goc xpëed Amós,

Amós goc xpëed Nahúm,

Nahúm goc xpëed Esli,

Esli goc xpëed Nagai,

²⁶ Nagai goc xpëed Maat,

Maat goc xpëed Matatí,

Matatí goc xpëed Semei,

Semei goc xpëed José,

José goc xpëed Judá,

²⁷ Judá goc xpëed Joan,

Joan goc xpëed Resa,

Resa goc xpëed Zorobabel

Zorobabel goc xpëed Salatiel,

Salatiel goc xpëed Neri,

²⁸ Neri goc xpëed Melqui,

Melqui goc xpëed Adi,

Adi goc xpëed Cosam,

Cosam goc xpëed Lmodam,

Lmodam goc xpëed Er,

²⁹ Er goc xpëed Josué,

Josué goc xpëed Liezer,

Liezer goc xpëed Jorim,

Jorim goc xpëed Matat,

³⁰ Matat goc xpëed Leví,

Leví goc xpëed Simeón,

Simeón goc xpëed Judá,

Judá goc xpëed José,

José goc xpëed Jonán,
 Jonán goc xpëed Liaquim,
³¹ Liaquim goc xpëed Melé,
 Melé goc xpëed Mainán,
 Mainán goc xpëed Matata,
 Matata goc xpëed Natán,
³² Natán goc xpëed David,
 David goc xpëed Isái,
 Isái goc xpëed Obed,
 Obed goc xpëed Booz,
 Booz goc xpëed Salmon,
 Salmóngoc xpëed Naasón,
³³ Naasón goc xpëed Minadab,
 Minadab goc xpëed Aram,
 Aram goc xpëed Srom,
 Srom goc xpëed Far,
 Far goc xpëed Judá,
³⁴ Judá goc xpëed Jacob,
 Jacob goc xpëed Isaac,
 Isaac goc xpëed Abraham,
 Abraham goc xpëed Taré,
 Taré goc xpëed Nacor,
³⁵ Nacor goc xpëed Serug,
 Serug goc xpëed Ragau,
 Ragau goc xpëed Peleg,
 Peleg goc xpëed Heber,
 Heber goc xpëed Sala,
³⁶ Sala goc xpëed Cainán,
 Cainán goc xpëed Rfaxad,
 Rfaxad goc xpëed Sem,
 Sem goc xpëed Noé,
 Noé goc xpëed Lamec,
³⁷ Lamec goc xpëed Matusalén,
 Matusalén goc xpëed Enoc,
 Enoc goc xpëed Jared,
 Jared goc xpëed Mahalaleel,
 Mahalaleel goc xpëed Cainán,
³⁸ Cainán goc xpëed Enós,
 Enós goc xpëed Set,
 Set goc xpëed Adán.
 Adán goc zig tib xpëed Dios.

4

*Gocladz mendox niungüet ma Jesús
 (Mt. 4:1-17; Mr. 1:12-15)*

¹ Zeene blozh brobnis Jesús guiubee Jordán ga, nacie Espíritu Sant me, dzigo güeynie me Jesús tib dan ngan, zaatne choot miech guiend. ² Ga bio Jesús, ni tib lé peet dowd me; gzase dze pquianal mendox niungüet ma me niun me miñe racladz ma. Zeene goc choo dze no me ga, gon ma lébdraa me rcaabedz me, ³ dzigo rëbchaa ma lo me:

—Telne nli Xpëed Dios nac luu, nbabey tsaalo grë quie rii ncuaane gow luu.

⁴ Dzigo pquiab me rëb me lo ma:

—Znu zhobnee lo Xtiidz Dios: “Niapse por xtiidz Dios mban miech, yquiamband zho loxaque guielwagwse.”

⁵ Blozh ga güeynie ma me glaa tib guic gui, ga znuse blu ma grëse guiedz ne ndxie dib lo guidzliu lo me, ⁶ rëb ma:

—Bui ganle, grëse guiedz ne gon ran luu i, chen naaw, zrieelo gded naaw lo zha ne racladztáa naa. Grësew, dib guielndaan ne no low, znedz naaw lo luu ⁷ telne squitsgzhib luu lo naa, gunnon luu naa.

⁸ —jBiche lo naa nu mendox! —rëb me lo ma—. Znu gon zhobnee lo Xtiidz Dios: “Diosse nac men ne rnabey, mese none gunnon luu, lo me rieguial yquitsgzhib luu; ni miñe rnabey me min co none gun luu.”

⁹ Blozh ga güeynieque ma me lad guiedz Jerusalén, ga blep ma me zaatne mazdraa glaa guic yadoo nroob ne zob lad guiedz co, rëb ma lo me:

—Telne nli Xpëed Dios nac luu, bringaa nu, ¹⁰ benque led znu rnee lo Xtiidz me: “Znabey Dios grë xanjl me yquiaanap luu, ¹¹ zguedz zho luu, zeena ni tib quie ycaand ni luu.”

¹² Dzigo rëb me lo ma:

—Psoladz ganle noque stib zaatne znu rnee lo Xtiidz Dios: “Bien, Dios nac men ne rnabey luu, nodne quitnie luu me gnab luu lo me gun me ncuaane nod gun me.”

¹³ Gonse ma rdzielz zha gungüet ma Jesús, dzigo biche ma lo me palal dze.

¹⁴ Blozhse ga, dzigo laa Jesús wbi ga bdzin me nêz Galilé, scaque nacie Espíritu Sant me. Znuse beenbey miech me por grëtaa ncuaan ro ne run me, grëse guiedz ne ndxie nêz co, rzeet zho me. ¹⁵ Zaatne rdziñtaa me, rie me xyadoo zho, rseed me zho Xtiidz Dios, rleynie zho me, rley zho ron zho grë miñe rnee me.

Güey Jesús Nazaret

(Mt. 13:53-58; Mr. 6:1-6)

¹⁶ Tib dzew, laa me bdzin Nazaret, zaatne broob me. Gol dze ne rdziiladz zha Israel lo dziin, güey me xyadoo zho zig runaque me grëraa zaatne ziye me. Zeene gol horne rlab zho Xtiidz Dios, dzigo bded me, ¹⁷ bdeed zho miñe pquiaa Isá glab me. Pخال me low, lëetse zaatne znu rnee blab me:

¹⁸ ZhiEspíritu Dios nacie naa, ible Dios bzooob naa, gnee naa Diidz Nd-zon ne nac xtiidz me lo grëse zha ne rquinnëw.

Laa me pxeel naa gne naa lo grë zha ne ngadoo lo ncuaane nosacsi zho, zeena guien zho zha gree zho lo grë ncuaan co.

Laa me pxeel naa gziini naa lo grë zha ne no lo guielcow,

grë zha ne rzac guendraa zha gree zho lo zhizhgab zho, laa me pxeel naa, naa cuee zho lo zhgab co.

¹⁹ Laa naa zialnie diidz lo miech, gacnan zho pa lotaa noxco Dios gunlay me grëse zha ne bgib lo me.

²⁰ Blozhse blab me lo co, pti**b**ed mew bdeed mew lo zha ne quianapa, dzigo laa me bzob. Gr**e**se zha ne no len yadoo ga, dze rwi zho lo me, ²¹ dzigo bnee me lo zho, r**e**b me:

—Gr**e** diidz ne blozh blab naa lo to nu, len dze rii gon laaw noyac cumplir.

²² Gr**e**se zho rleynie zho me, rlozhd gzee zdoo zho ron zho gr**e**taa diidz ndzon ne rnee me. Rnabdiidzlsa zho rnee zho:

—¿Bay zha squitaa pseed men qui? ¡Led l**e**é xingan José i!

²³ Dzigo r**e**b me lo zho:

—No tib diidz ne rnee: “Zha ne racnie stib miech, none guien zho glo menladz zho gacnie zho.” Rien paa naa gon, min co racladz to gn**e** to lo naa; quiamb**e**z to gan to gr**e** milagr ne ziyon to ben naa guiedz Capernaum.

²⁴ Gneli naa lo to ganle: Zha ne riaad rteed xtiidz Dios, ible znu ranzed menladz zho zho; gane rrielod pe gun zho. ²⁵⁻²⁶ Golsoladz ganle zeene b**i**aad Li, bio tib tiemp ne biabd guie tson iz grol, tib gbinox ne gon miech Israel nu. Ndal wnaa viud ne nac menladz me mban bded zho, guien pe nquini zho, per brielod niun me xyudar zho; le**l** xyudar tib wnaa Sarept pxeel Dios me g**u**eygun me, guiedz ne ndxie gax Sid**o**n. ²⁷ Scaque zeene b**i**aad Lis**e**w, ndal zha Israel rlan guiedzdox ne nac lepr, per ni tib zho beenguiacd me; le**l** tib zha Siria l**e** Naamán, men co beenguiac me.

²⁸ Zeene gon zho sca rnee me, bl**e**é zho. ²⁹ Gusobe zho, ble**e** zho me lad guiedz, g**u**eynie zho me tib ro yee ne quia glaa guic gui ne ndxie guiedz co. Laa zho nole par cti**h** zho me ga, ³⁰ zeene znuse bded me lad zho, ziega me.

*Biac tib mgui ne nosacsi men**d**ox
(Mr. 1:21-28)*

³¹ Ga wbi Jesús, bdzin me guiedz Capernaum stib, guiedz ne ndxie n**e**z Galilé. Gzobse dze ne rdziiladz gr**e** miech co lo dziiin, rie me xyadoo zho rieseed me zho. ³² Rzee zdoo zho ron zho gr**e** zhiwseed me, gr**e**se min**e** rnee me, rlu zha rnabey nac me.

³³ Tib vult, lad gr**e** zha ne noseed me ga no tib mgui ne nosacsi men**d**ox; roptsie men**d**ox co rnee ma lo me:

³⁴ —¡Psaan no! ¿Pe gun luu no Jesús Nazaren? ¿Ziaad luu l**e**é par gnitlo luu no? ¡Runbey naa luu, luu nac men ndzon ne pxeel Dios!

³⁵ Dzigo goctox me lo ma, r**e**b me:

—¡P**s**ioog ro luu! ¡Na zeena psaan men qui! Horco, squi ndxie gr**e** miech co bron ma mgui co liu, min**c**ose be**e**n ma, laa ma brie**e** laa ma zie. ³⁶ Rlozhd gzee zdoo gr**e** miech co, rnabdiidzlsa zho rnee zho:

—¿Zha nac xtiidz men qui, zha nacne haxta men**d**ox rdzieb ma me, rzhoo**n** ma zeene laa me ractox lo ma?

³⁷ Gr**e**se guiedz ne ndxie gax ga, zigse zie dze rzhoo**n** diidz scataa milagr ne run me.

Biac xniadzoop Pedr

(Mt. 8:14-17; Mr. 1:29-39)

³⁸ Brie**e** Jesús len yadoo, zie me n**e**z lidz Sim**o**n. Bdzin me l**e**é**t**aque laa xniadzoop Sim**o**n nix rlan xl**e**é, nzho**o** rac me; dzigo wbig zha ne be**e**n vis laa zhuz co rzac**n**e, bnab zho lo me gunguiac me me. ³⁹ Nacne bded me zaatne nix zhuz co, goctox me lo xl**e**é co. Horcogazha laaw bl**e**z, guche zhuz co ga, be**e**no me ncua**a**ne dow zho.

⁴⁰ Laa ngbidz rz**e**éblew, zeene bdzin gr**e** miech co lo Jesús, bdzin**n**e zho gr**e** zhimguidz zho. Zhaase zhaase guielguidz ne rzac tib tib nguidz co, per gr**e**se zho zigne rxobnia me guic zho laa zho riac. ⁴¹ Nzian zho be**n**c**x**oo**n** me men**d**ox ne nosacsi zho, zeene laa ma rrie**e**, nguidz roptsie ma rnee ma lo me:

—¡Rdziiunbey no luu, Xp**e**éd Dios nac luu!

Dzigo ractox me lo ma, rsaand me gnee ma cho nac me, sac wen wen na**n** ma me nac Men ne nacle diidz ga cxeel Dios.

⁴² Biini liu co, silgaw brie**e** Jesús lad guiedz co g**u**ey me tib zaatne choot miech guien**d**. Zeene bnit me lo gr**e** miech co, brie**e** zho g**u**eyguib zho me haxta b**d**ziel me lo zho; rnab zho lo me Capernaumse ga cu**e**z me, paat tsiedraa me. ⁴³ Dzigo r**e**b**ch**aa me lo zho:

—Grieeloda, ib none ga naa gr**e**raa guiedz, gaseed naa miech gacna**n** zho zha racladz Dios gban zho; sac ible min co pxeel me naa zial naa.

⁴⁴ Nligaaw, gr**e**se guiedz ne ndxie n**e**z Galilé ga g**u**eyt**e**d me, g**u**ey me yadoo ne zob tib tib guiedz co, g**u**eynee me Xtiidz Dios lo gr**e** miech co.

5

*Nroobdox mel**l** bgaa*

(Mt. 4:18-22; Mr. 1:16-20)

¹ Tib vult miech guizhiu ne p**c**aalsa lo Jesús ro Nisdo**o** Genesaret, haxta rtaagw zho me; gr**e**se zho racladz yquiaadiag zho Xtiidz Dios. ² Gax ga zo chop barcw, blalaa ngooz mel**l** biet lena, laa zho no lo nis ga noguiib zho guieb ne rnaaz zho mel**l**. ³ Nacne g**u**ey me biep me tib len barcw co, bnabey me Sim**o**n ps**e**é Sim**o**na bz**e**éba lo nis palal; sac l**e**é xbarcw Sim**o**n ga. Dzigo leen co bzob me pseed me gr**e** miech co.

⁴ Zeene blozh bnee me lo zho, r**e**b**ch**aa me lo Sim**o**n:

—Nana ganle zeeynie barcw rii guionie new zaatne gu**i**etlaa nis, zeena gon to guieb ne rgaa mel**l** i gnaaz to palal ma.

⁵ Pquiab Sim**o**n r**e**b Sim**o**n:

—Dib guieel-le bdzio no lo nis rii, per ni tib meļ bnaazd no; per lega ne luu rneew, na dien laa no groņa stib.

⁶ Bron zho guieḡ co lo nis, zeene laa zho cueew, ya zig zrieza, biodzēse leņa no meļ.
⁷ Horco blunia zho lo grēraa zha ne nacgrē zho no stib leņ barcw co, parne tsie zho guḡ zho xyudar zho. Bdziḡ zha co gocgza zho, gropsle leņ barcw co pcodzēē zho grē meļ co; ya zig zdedquiew lo nis.

⁸ Zeene goḡ Simón scataa meļ taf ne bgaa, pquitsgzhīb me lo Jesús, rēb me:

—Bzhiguieļ mazd psaan naa, tib miech ngoopdoļ nac naa, rdzieeld so luu lo naa nu.

⁹ Zigtaa Simóna, zigtaa zha ne ziegza mew, rzee zdoo zho ni rdzieb zho scataa nac mi-lagr ne goḡ zho ga. ¹⁰ Scasaque rac Jacob ni Juan (xingan tib meḡ lē Zebedé), zha ne nacgza Simón.

—Gdzieebd luu —rēb Jesús lo Simón—. Zigne squi goḡ rioxco luu riaad luu gooz meļ niina, desde nadze laa luu tsoxco guḡ luu stib gooz; laa naa cxeļ luu tsietop luu grē miech ne sēēb xnēz Dios.

¹¹ Zigne bdziḡnie zho barcw co ro nis, bzo zhow ga, laa zho zienaļ zhits me.

Biac tib zha ne rlan guiedz lepr
(Mt. 8:1-4; Mr. 1:40-45)

¹² Laa Jesús no tib guiedz co, tib dzew, bdziḡ tib mgui ne rlan guiedzdox ne lē lepr lo me, pquitsgzhīb mgui haxta bdziḡ lo mgui luu, rēb mgui lo me:

—Tebaa siguieel luu guḡguaiac luu naa.

¹³ Dzigo pxobnia me guic mgui, rēb me:

—Zuḡguaiac naa luu. iNiinagazh laa luu guiaanmbe!

Horcogazha laa mgui biaanmbe lo guiedz co. ¹⁴ Dzigo pso Jesús diidz lo mgui, choot lo gzodiidz mgui zha biac mgui; ni rēb me lo mgui:

—Bzē, güey lo pxoz, güeyṣaṅ gon ne rn-abey xley Moisés gdeed luu; zeena gaṅ zho gaṅle laa luu biacle.

¹⁵ Niicle sca nēd me gacnaṅ miecha, per znuse znuse rliaaļ diidz grētaa milagr ne ruṅ me; miech guizhiu ne rdziḡ lo me, zha ne zie yquiaadiag zhiwseed me, zha ne ziee-gaa guḡguaiac me zho tel pe guielguidz ne rzac zho. ¹⁶ Zhiga, zhiga rbiche me lo miech, rie me zaatne choot guieḡ riezodiidznie me Pxoḡ me.

Biac tib zha ne gutoo xcuerp
(Mt. 9:1-8; Mr. 2:1-12)

¹⁷ Stib dzew, miech guizhiu ne ndxie lo Jesús noquiaadiag zho zhiwseed me. Nzian grē zha farisé, grē maistr ley, zha ne brieed dib nēz Galilé, dib nēz Judé, zha ne brieegaa Jerusalén, ye zho laa zho no lad co noquiaadiag zho grē miṅe rnee me.

¹⁸ Laa grē miech co ndxie ga, zeene bdziḡ bla zha bgui, ney zho stib meḡ bgui,

zhoobse me lo yag, ib gacd sē me sac dipse me gutoo. Gocladz zho nzēēbnie zho me leṅ yu ne no Jesús ga, ndziḡnie zho me lo me. ¹⁹ Per ib gocd nded zho lad grē miech co. Nacne biepaque zho guic yu, pxal zho tiblē guic co, ga pteed zho meḡ rzacnē co dib yag ne zhoob me ga, bdziḡ me lo Jesús.

²⁰ Zeene goḡ Jesús ne nli dib zdoo zho rnaloo zho me, me guḡguaiac meḡ rzacnē co, rēbchaa me lo meḡ co:

—Peet tsienied guic luu, niinagazh laa naa guḡ perdon grēse xtoļ luu.

²¹ Zeene bin grē zha farisé co, grē maistr ley co sca rēb me, rneechnaa zho gza zho: “¿Cho dzigo rzac mgui qui nac me? ¡Falt i goḡ noyun me lo Dios! ¡Tibaque meḡ ne ruṅ perdon xtoļ miech, ni lēē meḡ co nac Dios!”

²² Bienga Jesús sca quianee zho, dzigo rēbchaa me:

—¿Pe nacne rzac to laa naa quiaayun falt? ²³⁻²⁴ Nli cholze zac guiab laa zho guḡ perdon xtoļ miech, per grielod guḡguaiac zho zho. Golwi gaṅle laa naa guḡguaiac mgui rii, zeena gacnaṅ to naa ne nac naa Mgui ne pxeel Dios, ible rap naa poder par guḡ naa miech perdon.

Dzigo bnee me lo meḡ rzacnē co, rēb me:

—iNiinagazh guche i, bi yag ne bzhoob luu i, zeen bzē!

²⁵ Zigne sca bnee me, laa mgui co bzoli, squi ndxie grē miech co laa me blis yag co, iṅe roolnie me Dios laa me zey. ²⁶ Psilo zho grēse zho, roolnie zho Dios; lala rzee zdoo zho, lala rdzieb zho, rnee zho:

—iNadzesi, laa ne bdziḡn ncuaneaṅ gard dzian ne!

Bredz Jesús Leví

(Mt. 9:9-13; Mr. 2:13-17)

²⁷ Blozh ga, laa Jesús brieed ga. Ro nēz zieded me goḡ me tib meḡ lē Leví, zobse meḡ co lo mezh ne rietizh zho dimi ne razh lo zha Roma, sac me rtop dimi co. Dzigo bredz Jesús me tsienal me zhits Jesús. ²⁸ Biaanaque xmez h me ga, guso me ga, laa me zienaļ.

²⁹ Bded ga, güeynie me Jesús tib wagw lidz me. Grē zha ne ruṅ dziin co, ni grēragaa zha ne bdziḡ ga, tipse brenie Jesús zho grē xpēēdsuel me.

³⁰ Blalaa zha farisé, ni zla maistr ley, rlēē zho goḡ zho sca zobnie Jesús grē zha co, bded ga rēbchaa zho lo xpēēdsuel me:

—¡Lēda i goḡ ruṅ to! ¿Pe nacne sca tipse rownie to grē zha ngoopdoļ co, grē zha beed ne nac recaudador ga?

³¹ Dzigo rēbchaa Jesús lo zho:

—Naṅle to gaṅle, zha ne ruṅ rmed, zaatne no zha rzacnē ga rquīn zho, žiacxe squīn zho zaatne no zha ne ndip ndaan? ³² Scaque naa nagon, ziaļguibd naa zha wen, sinque

laa naa zialguib grë zha ngoopdol, zeena bgig zho lo Dios.

*¿Pe nacne rcuand xpëëdsuel Jesús?
(Mt. 9:14-17; Mr. 2:18-22)*

³³ Bdzinaque bla zha ne bnabdiidz, rëb zho lo Jesús:

—¿Pe nac waa ib rcuand xpëëdsuel luu, tibaque quaiyow zho, tibaque quaiye zho? Zha xpëëdsuel Juan, zha xpëëdsuel farisé, rdziañ no tibaque nocuan zho, tibaque nonab zho lo Dios.

³⁴ Pquiab Jesús rëb me lo zho:

—Zaatne nadien noyac tib guieltsieel, ¿ni-acxe znabey to ycuand grë zha ne ndxie lo lni, ni ran to laa mgui ne notsieelna zo lo zho? ³⁵ Per zdziñ dze zeene laa mgui co gbiche, ni zeene laa dze co gdziñ, dzigosi nagon rieguial ycuand zho.

³⁶ Blozhse sca bnee me, rëbaque me lo zho:

—Zha ne rquiaabdie lar, tsod zha ne ct-siez xab cub cuee zho tib lë lar ne yquiaab-die zho tib xab gox zho. Sac tiba, znitlo zho xab cub zho ga, ni stiba rdzieeld yquia tib lë lar cub lad lar gox. ³⁷ Scaque zha ne rgot-sow vin, tsod zha ne cotsow vin cub tib len guid ne padzeelale noquün, sac stiez vin cuba; lozh ga zigtata vina, zigtata guid cow, laaw nitlo ga. ³⁸ Gacxe waa, tel vin cuba none len tib guid cubaque tsotsowa.

³⁹ 'Nac cuent rii zig rzac miech vin, zha ne bienle rie vin ne padzeelale notsow, rdzi-ladzd zho guie zho vin cub; sac biaanle guic zho rnee miech: "Vin ne padzeela notsow, miñ co nizhrra rdioow."

6

*Dze ne rdziiladz zha Israel lo dziin
(Mt. 12:1-8; Mr. 2:23-38)*

¹ Tib vult, lëetse dze ne rdziiladz zho lo dziina, bded Jesús zaatne zëeb zhobxtil grë xpëëdsuel me; psilo zho pchoo zho mzion zhobxtil co, zigse runmbe zho zhob co, scase row zhow. ² Gon blalaa zha farisé sca no zho, dzigo rëbcha zho:

—¡Lëda i gon noyun to! Golguien ganle dze nda nac dze rii.

³ Pquiab Jesús rëb me lo zho:

—¿Pe gard glab to zaatne ziaad ganle zha been rey David, tib dze zeene pcaabedz me grë me zha ne ziegza me, ni zienied zho pe gow zho? ⁴ Rneew, bzëeb me len yadoo güeynab me grë guietxtil ne nac gon, downie me grë zha ne ziegza me ga; ni loxaque zha ne nacse pxoz, zha cose row guietxtil co.

⁵ Ni rëb me lo zho:

—Gacan to ganle naa ne nac naa Mgui ne pxeel Dios, naa rnabey dze rii, nanpaa naa pe nonguiel gac.

*Biac tib mgui ne mband tib nia
(Mt. 12:9-14; Mr. 3:1-6)*

⁶ Gol stib dze ne rdziiladz zho lo dziin, güey Jesús len yadoo win ne zob lad guiedz co, psilo me noseed me miech. Lad grë miech ne no len yadoo ga, no tib mgui, mband nia derech me. ⁷ Blalaa zha farisé, blalaa maistr ley no lad co, quialeets zho Jesús dien pe zunguiac me mgui co, dze co; sac quiambëz zho tel laa me gunguiac mgui, dzigo min co yquiaaqui zho tsiezo zho me lo zhiwxtis zho.

⁸ Bien Jesús sca no guic zho, dzigo bredz me mgui co, bnabey me bzo mgui groltaa lo grë zha ne ndxie ga; ⁹ blozh ga rëbcha me lo zho:

—¿Pe nadien rzac to nonguiel gun ne dze rii? ¿Pe nonguiela gun ne ncuane yquün, te nonguiela gun ne guielntseeb ye? Zig nac samiech ne zha ne noxtseeb xquielmban, ¿pe maase csaan ne guet zho?

¹⁰ Dze rwi me lo zho tib tib zho, dzigo rëbcha me lo mgui co:

—¡Bzigaa nia luu!

Zigne bzigaa mgui co nia mgui, laaw biac.

¹¹ Zeene gon zho sca beenguic me nia mgui, per nli rlëe zho, psilo zho quianediidz zho dien zha gun zho me.

*Bzo Jesús zha ne tsienee xtiidz me
(Mt. 4:23-25; 10:1-4; Mr. 3:13-19)*

¹² Tib vult, güey Jesús tib guic gui, dipse guieel blëz me ga bzodiidznie me Dios.

¹³ Biini liu co, bredz me grëse zha ne nac xpëëdsuel me, dzigo lad co ble me tsiipchop zho, zha ne tsiepaa tsienee xtiidz me lo miech. ¹⁴⁻¹⁶ Znu lë gza tsiipchop zha co:

Simón (zha ne bleelë me Pedr),

Ndrés (bets Pedr),

Juan,

Jacob,

Lip,

Bartol,

Matew,

Mazh,

Jacob (xingan Alfé),

Simón (zha ne no lad grë zha ne racladz cuee wxtis Roma Israel),

Judas (bets Jacob),

ni Judas Iscariot (zha ne güeyto me).

¹⁷ Cho gui co biet me grë xpëëdsuel me, bdziñ zho tib ro lets. Loxaque bdziñ zho ga, laa stib dzoon xpëëdsuel me bdziñaque lo me ga; zhiits co nal stib dzoon miech, no zho racladz yquiaadiag zhiwseed me, no-gaa zho zie ga par gunguiac me zho. Miech guizhiuw, zha ne ziaad nëz Judé, zha ne ziaad nëz Tiro, zha ne ziaad nëz Sidón, zha ne brieegaa Jerusalén.

¹⁸ Nzian grë zha co nosacsi mendox, grëse zho beenguic me zho. ¹⁹ Rbig be grë miech co racladz zho xen zho lad xab me, sac ran zho, zha ne rzhen lad xab me, tel pe

guielguidztaa rzac zho, runguiac me zho por grëtaa poder ne rap me.

*Cho nac zha ne wen zie
(Mt. 5:1-12, 38-48; 7:1-5, 12)*

²⁰ Dzigo dze bui Jesús lo grëse zha ne nac xpëëdsuel me, rëb me lo zho:

—jWen zie zha ne rien none gbig zho lo Dios, sac ib zdziñ zho zaatne rnabey me!

²¹ jWen zie zho! Sac niicle telne noyan zho gbin, per me gdeed ncuuañe yquini zho; niicle tel no hor mban rac zho roon zho; per zdziñ dze ne gdeed me tib guielbley nroob lo zho.

²² Zig nac to, zeene csilo miech glëënie zho to, gunxoon zho to, yquiaago zho to, gneenë zho to, sac zho haxta ni lë to gondraa zho, loxaque ne nac to zha ne no xnëz Mgui ne pxeel Dios nu, jwen zie to ga! ²³ jNley golco zdoo to dze co, nguieel golgac, sac gon tib guielnzaac nroob ne gneedz Dios lo to! Golsoladz ganle, scaque been pxozgol zho grë zha ne pxeel me padzeela biadnee xtiidz me.

²⁴ Sangue grë zha ne rzac grëse ncuuañe rquini zho quianie zho, ib rquiind zho gbig zho lo Dios, jprobsaxe zho, sac lo guidzliu riise gac ncuuañ co guielbley lo zho!

²⁵ jProbsaxe zho, sac niicle ne grëw quianie zho niina, per zdziñ dze gan zho ganle zha nac gbin; rlozhd gzhidz zho, rlozhd gley zho niina, per zdziñ dze laa zho gan ganle zha nac guielné!

²⁶ Padzeela, biaad bla zha ne pquidie rëb zho Dios pxeel zho, bio pxozgol to bleyne zho zho, jprobsaxe to telne yguib to sca gleyne miech to!

²⁷ Golquiaadiaga ganle: Zha ne rlëë lo to, golleyne zho, tel pe nac xliadz zho golgacnie zho. ²⁸ Zeene rdziibdee zho to, gohnab lo Dios gunlay me zho; zeene rsacsigaa zho to, gohnab lo Dios yquia zdoo me zho. ²⁹ Tel gneedz zho tib puñet lo to, gzoobd nia to, golsaan zho maase yquiaa zho stiba.

Zha ne gla xabnal to, golsaan maase ye biaagw güey zho. ³⁰ Zha ne gnabtaa pe cos lo to, goldeeda; tel scasegaa xen zhow, ib gnabde tow lo zho. ³¹ None zaacse gac to lo miech, zeena scagaa zha, zaacse gac zho lo to.

³² Sac gon, tel loxaque zha ne ndzieeldidz to, zha cose rleyne to, jed ncuuañ nroobd ga run to! Haxta grë zha ntseeb run min co. ³³⁻³⁴ Tel loxaque zha ne runsegaa favor lo to, lo zha cosegun to favor; zeene rungaa to tib pexatd, lo zha ne rgobeyse to zguizh lo to, lo zha cose runxtad to, jni lalnu peet nond ncuuañe run to ga! Sac gon haxta grë zha ntseeb run min co.

³⁵ Golguien sca, none gleyne to zha ne rlëë lo to, none gacnie to zho lo xliadz zho. Zha ne guiaad tib pexatd lo to, goldeed

ncuuañe rnab zho, ib guiabde to nend lega scase gun to favor co lo zho. Zha ne gun grë min rii, nroob guielnzaac ne gdeed Dios lo zho, ni ga glu zho ganle nli xpëëd me nac zho; sac gon tel me wen me lo grëse miech, niicle zha ne run falt lo mew, niicle zha ne riendgaa gdeed xquizh lo me, rsaand me zho. ³⁶ Ndzinli sca golgac, zigne sca wen Pxoz to lo grëse miech, scaque none wen gac to lo zho.

³⁷ Ib gunde to në gac zdoo to, zeene ran to ncuuañe nonguield ne run stib miech, sac to tozhal gunquizh zhow; zeena scagaa Dios gunscad me to. Golguien none gun to samiech to perdon, zeena scagaa Dios zun me to perdon; ³⁸ sac grëse ncuuañe run miech, mincoque caania zho. Grëse ncuuañe gun to, scaania tow, ni haxta ndzi-ibraa mine ycaania to. Sac ncuuañe gun to lo samiech to, mincoque gun Dios to.

³⁹ Blozh sca bnee me, dzigo rëbchaa me:

—Golwi ganle, zig nac zha ne rold lo, jni-acxe zrieelo glu zho nëz lo stib zha ne rold lo? Zha ne sca gun, tel griel ni tib zho zaatne nac tib ro blë, ib tedsod grop xcuaa zho tsietsobe ga.

⁴⁰ Grë zha ne nac mëëdsuel, tsod zha ne racraa lo zha ne noseed zho; haxta csiaalraa zho zhiwseed zho, ni telne tosoxco zhow, zdziñ zho medid co.

⁴¹ jLëda ga gon tso to lozhd gzee zdoo to dien cho pe run, ni nenda mazdraa mine run to! ⁴² jPe ro to glisqui to mine run stib zho, ni tel mazdraa nac mine run to? jGolguien sca glude to ncuuañe nacde to! jGlo goltsoxco ndzinli gac to, dzigo lozh ga zac tsienee to zha gacndzinli stib zho!

*Nex rlu zha nac tib tib yag
(Mt. 7:17-20, 24-27; 12:34-35)*

⁴³ Tib tib yag rdeedsew xnexa. Griee lod yquia nex ncuuañ tib lo yag ne rdeed nex wen; griee lodgaa yquia nex wen tib lo yag me rquia nex ncuuañ. ⁴⁴ Tel zha nac nex ne rquia lo yag, gase rlu zha nac yag. Tsod yag guiets ne yquia guigw lo; ni tsodgaa lbë zarz ne gdeed uv. ⁴⁵ Scadaa nagon nac miech, zha ne wena, ncuuañ wen run zho, diidz wen rnee zho, sac desde zdoo zho no guielwen co; laa zha ne ntseeb, niapse ncuuañe ntseeb run zho, niapse diidz dox rnee zho, sac desde zdoo zho no guielntseeb co. Gacxe waa, tel zha rzë xtiidz tib miech, gase rlu zha nac zdoo zho.

⁴⁶ Griee lod lega gnee to, naa rnabey to, sac zha ne rneew ib none gun zho mine rnabey naa. Nzian zha ne rnee, naa rnabey zho, ni rund zho mine rne naa.

⁴⁷ Zha ne rquiaadiag mine rne naa, ni rioxco zho rban zhow zigne naca, ⁴⁸ rrieequia nac zho ga zig tib zha ndzielguic ne guiet blee xcimient lidz, psilo zhow haxta zaatne

bgaa lo quie. Niicle riab guiedox, peet racd lidz zho, nis naal ne raclo rded zaatne zoba ga, per rbixcheda. ⁴⁹ Laa zha ne rquiaadiag xtidz naa, ni rioxcod zho gban zhow, ziaad gag zho zig tib zha nxen ne güeyzoob lidz glaase lo liu. Znuse bnitlo lidz zho, sac zeene biab guiedox, lo nis naal ne goclo bded zaatne zoba, znuse bixchew, ni stib lëw biaand.

7

Biac tib zha ne rquia dziin tib lo menguiib (Mt. 8:5-13)

¹ Zeene blozh bnee Jesús lo grë miech co, dzigo laa me wbi ga, bdziin me Capernaum. ² Lëëtaaque len dze co rzacnë tib zha ne run dziin lo tib men ne rnabey lo xmenguiib zha Roma, no guiedz co; nzho rac zho zootle laa zho guetle. Rleyniodox men co zho, ³ zigne bin me laa Jesús bdziin, lëëlëd pxeel me bla zha ne nac zha non lo menguiidz Israel, güey zho güeynee zho lo Jesús siguiel Jesús tsiegunuiac Jesús zhingundziin me. ⁴ Bdziin zho bnab zho lo Jesús siguiel me tsie me.

—Bzhiguiel been xyudar me —rëb zho—. Tib zha wen nac me, ⁵ rleynie me menladz ne, haxta bzaa me tib xyadoo no lad guiedz nu.

⁶ Dzigo zienal Jesús zhits zho. Zhile gdziin zho lidz men rnabey co, zeene bdzieelo zho bla zha ne ndzieeldiidz me, zienie tib xtiidz me lo Jesús. Rzë xtiidz me, rëb me:

—Bzhiguiel mazd guiaate luu. Naraa rien naa choot nacd naa, par csodziin zha lo luu guiaad luu haxta ro lidz naa. ⁷ Nligaa rien naa tib zha winse nac naa par gbig naa lo luu, gane niicle biald naa nialdzieel naa luu. Nanpaa naa, zaatne ziaad luu i, con tib lan xtiidz luu zac gnabey luu guiac zhingundziin naa. ⁸ Sca rnee naa, sac tel naa no zha ne rnabey lo naa, zeene rnabey zho naa none gon naa mine rnee zho; scaque zhaguiib ne rnabey naa, zeene rne naa tib lo zho: “Güey nu”, rie zho; zeene rnegaa naa: “Dë nu”, riaad zho; zha ne nacgaa zhingundziin naaw, mine rnabeytaa naa zho, run zhow.

⁹ Zeene bin Jesús sca rzë xtiidz men co, bzee zdoo me, ptsire lo me, rëb me lo grë zha ne zienal zhits me:

—Golwi ganle pa lotaa rnalo men qui Dios. Lo grë zha Israel gon, ni tib zho gard gan naa squitaa dib zdoo gnalo Dios.

¹⁰ Grë zha ne güey mandad ga, zeene bdziin zho gon zho laa ngundziin co biacle.

Rrieeban xpëed tib wnaa viud

¹¹ Bded ga, güey Jesús tib guiedz lë Nain grë xpëedscuel me, miech guizhiu ne zienal zhits zho.

¹² Zeene bdziin zho gax ro guiedz co, lëëtaaque bdzieelo zho tib dzoon miech

ziqueets xpëed tib wnaa viud; lëëse mëed ga lo wnaa co. ¹³ Gon Jesús zha rac me, pquia zdoo Jesús me, wbig Jesús rëb Jesús lo me:

—jGoondraa luu!

¹⁴ Dzigo bzhen Jesús yag ne zhoob ngutoo co. Zeene gon gza zha ne nxobyan yag cow, hor co bzodze zho; dzigo bnee me lo mëed co rëb me:

—Xin, iguche i!

¹⁵ Horcogazha brieegan niib co, zbzobli niib, laa niib psilo bnee.

Rley xniaa niib, pcaania me niib.

¹⁶ Zeene gon grë miech co sca brieegan mëed co, lala rdzieb zho, lala rdeed zho xquizh lo Dios, rnee zho:

—jTib men nroob ne gon ziadteed xtiidz Dios i, ziaad lo ne! jLaa ne bdzian niina ganle, laa Dios ziaadgan ne, ziadbee me ne lo xquielnë ne!

¹⁷ Gdipse nëz Judé, ni grëraa guiedz ne ndxie dib gax ga, gocnan miech milagr nroob ne been Jesús ga.

Zha ne pxeel Juan Bautist (Mt. 11:2-19)

¹⁸ Bin Juan Bautist grëtaa milagr ne run Jesús ga, sac rie xpëedscuel Juan riezodiidz zhow lo Juan. Dzigo pxeel Juan chop zho, ¹⁹ zienabdiidz lo Jesús, dien pe me nac Men ne nole diidz ga cxeel Dios, te dzigoraa gdziin men co ye.

²⁰ Bdziin zho lo Jesús, wbig zho lo me, rëb zho:

—Laa Juan pxeel no ziaadnabdiidz no lo luu, dien pe lëële Men ne nacle diidz ga cxeel Dios i nac luu, te naraa guiaad me ye.

²¹ Lëëtaaque ndal miech ndxie lo me ga, quiauynguiac me grë men rzacnë. Nzian zho, tel pe guielguiidztaa rzac zho, no zho nosacsi mendox, no zho rold lo, grëse zho runguiac me zho. ²² Dzigo rëbchaa me lo zha ne pxeel Juan ga:

—Grëse mine bin to rne naa, grëgaa ncuuane gon to quiauyun naa, goltsie golzodiidza lo Juan. Ran to ganle, grë zha ne rold lo, zha ne në ni, zha ne rlan guiedz lepr; zha ne rcuaat, grëse zho laa zho riac, haxta grë mengut, rrieegan. Grësew golzodiidza lo me, golguiab lo me ganle blactaa zha ne rquiiin gbig lo Dios, laa zho noquiaadiag xtiidz Dios; ²³ ni golguiab lo me: dichos zha ne tiblucie riladz cho nac naa.

²⁴ Zeene laa xpëedscuel Juan zey, dzigo psilo me bzeet me Juan lo grë miech guizhiu ne ndxie ga, rëb me lo zho:

—Zeene dien güey to dan ngan ne bio Juan ga, jzha güeynie guic to nian to me? jPe rëb to rlu me zig tib goobgui ne nëzrii nëzrec rey me, ²⁵ te rëb to ye masaque grë lar niazh ne racw zha non nacw me? Per nanle to ganle, zha ne scataa racwaxab, len grë yu ne

rzob zha rnabey, ga rio zho. ²⁶ Nligaa cho güeynie guic to nac me, ¿te rëb to ye tib men ne noteed xtiidz Dios?

‘Gacnañ to ganle, tib men ne noteed xtiidz Dios gon nac me, ni me nac tib zha ne mazdraa nroob lo grë zha ne ziyun dziin co. ²⁷ Me ga raquiet lo Xtiidz Dios, zaatne znu rnee: “Sxel naa tib zha ne tednerga lo luu, zha co gzhixcuaa nëz ne ted luu.” ²⁸ Ne nligaa lo grëse mgui ne zieded lo guidzliu, gard grieecquia tib zha ne mazdraa non lo Juan Bautist; per zha ne gon winraa zaatne rnabey Dios, nonraa zha co lo me.

²⁹ Len dze ne nochoobnis Juan miech ga, ndal zha ne bin zhiwseed me, haxta grë zha ne rtop dimi ne razh lo zha Roma, bien zho nonguiela gun zho miñe rnabey Dios, güey zho pchoobnis Juan zho. ³⁰ Sañgue grë maistr ley ni grë zha farisé, pe liaadz zho nion zho miñe rnabey Dios, ib güeyd zho nchoobnis Juan zho.

³¹ Blozhse sca bnee me, rëbchaa me:

—Nac grë miech rii, ib rienñ zho pepaa racladz zho. ¿Cho ganle run zigne run zho?

³² Lëë zho run miñe run grë mëëdlaa ne rio wguit dib ro nëz. Niicle rool xcompañer win di nguieel, rieed win; niicle roolga zho di ngan, roond win. ³³ Sac gon, ziaad Juan, ran zho rowd me grë ncuaaane nac xquielwagw zho, niicle vina ried mew; dzigo rnee zho mendox nacie me. ³⁴ Blozh ga, ziaad Mgui ne pxeel Dios, ran zho row me, rie me, laa zho rneeque lega rowcho me, lega riecho me vin; ib rienñ me cho rtsieelsa me, haxta grë zha yozh ne rtop dimi ne razh lo zha Roma, haxta grë zha ngoopdol rzënie me.

³⁵ Sca rnee zho, sañgue zha ne rgaa guielbiini ne rdeed Dios, rien zho cho nac zha ne ziaadgun xtsiin me.

Güey Jesús lidz tib zha farisé

³⁶ Tib dze bredz tib zha farisé Jesús güey me tib wagw lidz zho. Bdzin me, bded me bzob me lo mezh.

³⁷ Lad guiedz co no tib wnaa ro nëz, bin me laa Jesús bdzin lidz zha farisé co, dzigo bi me tib bot nceit nex, tiblo nceit niazha, brie me zie me nëz lidz zha co. ³⁸ Bdzin me ga, wbig me zaatne zob Jesús, psilo me roon me. Zigse roon me, lëëque nis ne riet lo me ga, bdiib me ni Jesús, ni pcuiidz mew con guits guic me. Dzigo ptsieelro mew, blozhse ga blee me nceit co bdëëb mew.

³⁹ Zeene gon zha farisé co sca been wnaa co, bza zdoo zho rëb zho: “Telne niaca miñe nli men ne ziadteed xtiidz Dios nac men qui, nien me ganle tib wnaa ngoopdol i, ndeete me diidz squitaa nguëëbnia zho zhits ni me.”

⁴⁰⁻⁴¹ Dzigo bnee Jesús lo zha farisé co yquiaadiag zho chop lan xtiidz me, rëb me:

—Pquiaadiaga ganle Simón: Chop mgui name, quia zho guielqui lo men ne blediin

dimi lo zho. Tib zho zëëb gaay mil pes plat, stib zho zëëb gaay gayoow. ⁴² Gonse men co ni tib zho rdzielz zha quizh zho dimi co, dzigo mazd pquia zdoo me zho, beenquizhd me zho xquielqui zho. Bnë nasca dien, lo grop zha co, ¿cho mazdraa sac zdoo miñe been men co?

⁴³ Dzigo pquiab Simón, rëb Simón:

—Par naa, zha ne nroobraa xquielqui ga, zha co sacraa zdoo miñe been me.

—Scaw gon —rëb Jesús—. ⁴⁴ ¡mñcopaa nagon squi rac wnaa prob qui! Gon ganle zeene bzëëb naa lidz luu, bneedzd luu nis niar ni naa; mazd me gon bdiib me ni naa, maase niicle con nis ne biin me bdiib mew, ni haxta pcuiidz mew con guits guic me.

⁴⁵ Zeene blanso naa per ni tib bzhid bneedzd luu nquiaabdiuzh luu naa, laa me gon wlal ne blanso me nu tibaque quiatsieelro me ni naa. ⁴⁶ Nac costumbr none nchoob luu nceit guic naa, per beend luuw; mazd mele gon biaad biadtëëb me nceit nex rii zhits ni naa.

⁴⁷ Laa me noyun min rii, sacne nlipaa rzac zdoo me ben naa me perdon grëtaa doldox ne nzëëb me. Zigne rneeque ne ga, tel zha ne zhis xtolá, zhi rzac zdoo zho zeene laa zho rac perdon.

⁴⁸ Dzigo bnee Jesús lo wnaa co, rëb Jesús peet tsienied guic me, laa Jesús beenle perdon grëse xtol me. ⁴⁹ Zha ne zobgza Jesús lo mezh ga, zeene gon zho sca rëb Jesús psilo zho rnabdiidzlsa zho, rnee zho:

—¿Cho dzigo rzac mgui qui nac me? ¿Zha nacne guiab me laa me been perdon xtol wnaa qui?

⁵⁰ Horco biire Jesús bnee me lo wnaa co, rëb me:

—Laa naa psilaa luu lo xtol luu, sac dib zdoo luu bnalo luu naa. Bzë naa, peet tsieniedraa guic luu.

8

Güeyseed Jesús miech dipse Galilé

¹ Bded ga, brie Jesús grë xpëëdsuel me güey me grëraa guiedz ne ndxie nëz Galilé ga, zigtaa guiedz nrooba, zigtaa guiedz wina, güey me güeynee me lo miech zha racladz Dios gban zho.

²⁻³ Ye blalaa men wnaa güeynal zhits zho, tel pe ncuaaane quianie grë men wnaa co, rdeed zhow run zho xyudar me; sac rzac zdoo zho beenguiac me zho. No zho beenguiac me lo guielguidz, nogaa zho benxoon me mendox ne nosacsi zho. Ga güeynal tib wnaa lë Marí Magdal (lëë wnaa co benxoon Jesús gadz mendox ne nosacsi me), ga güeynal stib men lë Zhuan (lëë tsiel Chuz ga, men ne quianap grë lo xtsiin rey Herod) ni stib men lë Susan.

*Nac Xtiidz Dios zig zhoxtil
(Mt. 13:1-23; Mr. 4:1-20)*

⁴ Tib dzew, miech guizhiu ne pcaalsa lo Jesús; nzian guiedz ne briece zho bdziñ zho lo me. Laa me noseed zho, zeene bzodiidz me tib cuent rii lo zho, rëb me:

⁵—Tib mgui name, briece zho güey zho gon zho bxtil. Zeene laa zho quialaal zho co liu, now bliaal gax ro nëz, now bliaal lad quie, nogaaw bliaal len yag guiets. Mine bliaal ro nëz ga, zha ne bded bzëni zhow, blozh ga güeyaque grë mguiñ dow maw. ⁶ Mine bliaal zaatne nac lad quie, blana per znuse bidza sac guiend gop ga. ⁷ Mine bliaal len yag guiets co, zigne blana blanaque stib dzoon yag guiets, znuse bnitlo yag guietsa. ⁸ Sañgue mine bliaal zaatne nac niapse lo liu, blana, brooba, ndzon goca, tib tib zhoz ne biab liu ga now goc haxta tib gayoo zhoz.

Blozhse bzodiidz me cuent co, nguiedz bnee me lo zho rëb me:

—jZha ne racladz guien mine rne naa, yquiaadiag zhow!

⁹ Dzigo wbig grë zha ne nac xpëëdsuel me, bnabdiidz zho lo me dien zha nac cuent co. ¹⁰ Rëbcha me lo zho:

—Tel to, Dioszhal rlu lo to ganle zha rnabey me, niicle ncuaañe mazdraa nguetsa; sañgue grëraa zha ne squi gard gbig lo me, niapse con cuent rzodiidz naaw lo zho, parne guien zhow; per niicle scaw, ib rzoobdiagd zhow, ib riogued zho zha naca.

¹¹ 'Znu gon nac cuent co: Zhobxtil co nac Xtiidz Dios. ¹² Ro nëz ne sca bliaal zhoz co, ga rlu ganle zha rzac zha ne rquiaadiag Xtiidz Dios, per znusaque rdziñ mendox rquuil ma zho gliladz zhow, zeena laad zho lo dol. ¹³ Lad quie ne bliaal spalala ga, ga rlu zha rzac zha ne rley rquiaadiag Xtiidz Dios, rley zho rcaania zhow, per rcaaniad zhow dib zdoo zho. Nli riladz zhow palal dze, per zeene ran zho zha run miech zho, zha rnee miech lo zho, rsaanga zhow. ¹⁴ Nogaa zho nac zig len yag guiets co. Rquiaadiag zho Xtiidz Dios, per laa ne tsoniew guic zho, lel rsilo zho grë zhgab ne dien zha gapchen cho, dien zha gdeedgux xcuerp zho lo guidzliu rii, min co rionie guic zho; pa së zho gban zigne rnabey Dios. ¹⁵ Laa lo liu naal co, ga rlu ganle zha rzac zha ne nguudz zdoo. Zeene rquiaadiag zho Xtiidz Dios, dib zdoo zho rcaania zhow, dib zdoo zho riladz zhow. Grëse ncuaañe run zho, ndzinli rrieequiaw; sac tiblique rac zho.

Xcuent biini

(Mt. 12:46-50; Mr. 3:31-35; 4:21-25)

¹⁶ Blozh ga, bnee me lo grë miech ne ndxie ga, rëb me lo zho:

—Tsod zha ne yquiaagui tib biini, lozh ga ctoos zho pe cos low, gzolangaa zhow tib zhan lon. Sac biini ne rquia, glaa rzoba par gziiniw len yu, zeena guiab biini lo grëse zha ne sëëb len yu. ¹⁷ Scaque nagon,

grë ncuaañe rac nguets, grë ncuaañe rnee miech zhliian, none xoozna.

¹⁸ 'Wen wen golquiaadiag mine rne naa, ni goltsocow. Sac zha ne tsoxcow, zdeedraa Dios guielbiini lo zho; sañgue zha ne tsoxcoda, haxta tel palase guielbiini ne rzac zho quianie zho, stiche mew.

¹⁹ Dze co, scaque noseed me miech, zeene bdziñ xnial me ni zha bets me ziegañ zho me. Per brieelod ndziñ zho haxta lo me, sac miech guizhiu ne ndxie lo me ga. ²⁰ Dzigo rëb tib zho lo me:

—Laa xnial luu gon, ni zha bets luu bdziñ ley ziaadguib zho luu.

²¹ Pquiab me rëb me:

—jXnia naa ye, bets naa ye? Grëse zha ne gon rquiaadiag Xtiidz Dios ni rioxcow zho mban zhow, lëë zha co nac xnial naa, zha co nac bets naa, zha co nac bzian naa.

Pcuëëz Jesús tib medox

(Mt. 8:23-27; Mr. 4:35-41)

²² Tib bdze dze, bzëebnie Jesús xpëëdsuel me tib len barcw, rëb me lo zho, tedquia zho stib nëz ro nis co.

²³ Laa zho zie lo nis co zeene laa me gootguies. Tibaque zeene psilo briece tib medox, masaque riasoli lo nis co, zootle laa barcw ne no zho ga yguitsle len nis. ²⁴ Zeene gon zho scataa ntseeb rac lo nis co, lëëlëd güey zho güeycuuan zho me.

—jMaestro! —rëb zho—. jBlee mcaallo luu ganle, laa ne nonitlo lo nis rii niina!

Dzigo guche me bnee me lo me co, ni bnee me lo nis co. Zigne bnee me, dzese biac me, dzese bre nis co. ²⁵ Dzigo rëbcha me lo zho:

—jPe nacne rdzieb to? jNiacle riladzde to Dios dib zdoo to?

Ne nligaa rdzieb zho, ni lala rzee zdoo zho, rnabdiidzlsa zho rnee zho:

—jBay cho nac me? jZha nacne haxta me, haxta nis ron xtiidz me?

Men Gadar ne nosacsi men dox

(Mt. 8:28-34; Mr. 5:1-20)

²⁶ Bdziñ zho stib nëz ro nis co, ga nac xtan zha Gadar. Zo zho ga, nëz dan squi riaan xtan zha Galilé. ²⁷ Laa Jesús bietdze len barcw, zeene laa tib mgui ne no nëz co bdziñ lo me. Mban rlu mgui co nosacsi mendox me, niicle xab me nacwdraa me; ib rbëzd me lidz me, niapse grë len xpaan gutoo rio me. ²⁸ Zeene gon me Jesús, masaque roptsie me bdziñ me pquiitgzhib me lo Jesús, zëëb tsi me rnee me:

—jPsaan naa Jesús! Nanpaa naa gon Xpëëd Dios nroob ne zob gbaa nac luu. jBzhiguiel csacsid luu naa!

²⁹ Per mendox co sca rnee, sac hor co laa Jesús bnabeyle ma csaan ma me. Ziele dze sca nosacsi ma me, ntseeb rac me, niicle rzoob zho caden ni me, rzoob zho caden nia me, parne paat tsied me, znuse rchug mew;

dzigo rienie men̄dox co me rquianzë me grë dan ngan, zaatne choot miech guënd.

³⁰ Dzigo bnabdiidz Jesús lo ma dien̄ cho lë ma. Pquiab ma rëb ma:

— Legion lë no.

Sca rëb ma sac nzian nac ma no ma zdoo m̄gui co. ³¹ Ni bnab ma lo Jesús gzonëzd me ma lo ncowdoo ne noraa ma ne nacgrë ma. ³² Gaxaque ga ndxie tib dzoon nguts notop lag, bnab ma gdeed me diidzbey lose grë nguts co gdziñ ma. Dzigo bdeed me diidz.

³³ Horco laa grë men̄dox co psaan m̄gui co, güeysëeb ma zdoo grë nguts co. Psilo grë nguts co rquiaa ma corr, güeypix ma tib ro yeedox ne quia ro nis co, bliaa! ma haxta lo nis; grëse ma gut.

³⁴ Grë zha ne quianap nguts co, bzhoon zho, rias zho güeyzodiidz zhow lad guiedz, ni grëraa yu ne zob gax ga. ³⁵ Nacne brieë grë miech co ziewi zho. Zeene bdziñ zho, per nli bdzieb zho gon̄ zha laa men̄ co zob gax lo Jesús, laa me nacwaxable, rlu niinile nac guic me. ³⁶ Psilo grë zha ne gon̄ zha biac me rzodiidz zhow lo grë zha ne bdziñ ga. ³⁷ Mazdraa bdzieb grë miech co bin zhow, dzigo mazd bnab zho lo Jesús siguiel me gbi me xtan zho.

³⁸ Zeene laa Jesús zie sëeb me len̄ barcw par gbi me ga, dzigo wbig m̄gui co rnab me lo Jesús siguiel Jesús tsienal me zhits Jesús; per bzhiguiel̄ Jesús nienal me, rëb Jesús lo me:

³⁹ —jBiaa! Güey, güeyzodiidz lo grë men̄lidz luu ganle zha nactaa milagr ne been̄ Dios beenguiac me luu.

Dzigo wbire men̄ co. Güey me lad guiedz, grëse lo miech güeyzodiidz me zha nactaa guiel̄nzaac ne been̄ Jesús ga, beenguiac Jesús me.

Brieëban tib xpëdwnaa tib men̄ lë Jair

(Mt. 9:18-26; Mr. 5:21-43)

⁴⁰ Zeene laa Jesús biire bdziñ stib nëz ro nis co, miech guizhiu ne quiambëz me ga, rley zho gon̄ zho laa me bdziñ. ⁴¹ Loxaque bdziñ me, laa tib men̄ ne rnabey yadoo lë Jair wbigle pquitsgzhib lo me. Rnab Jair siguiel me tsienal me lidz Jair tsiegun̄guic me tib xpëdwnaa win Jair.

⁴² Nzho rac mëed co, tib mëed tsiipchop iza, ni lëese mëed ga lo me.

Dzigo laa Jesús zie nëz lidz men̄ co. Miech guizhiu ne zienal zhits me, haxta rtaagw zho me. ⁴³ Lad grë miech co zienal tib wnaa rzacnë, gocle tsiipchop iz rlan me tib guiel̄guidz, rzac me zigne rzac grë men̄ wnaa gzob mëë; tibaque rlan mew ib rbëzda. Grële ncuaañe rap me bloozh me lo grë men̄ ne run̄ rmed, per ni tib zho run̄guic me. ⁴⁴ Laa me no lad co, tibaque wbig gax me nëz zhits Jesús, bzhen̄ me ni lar ne mbix Jesús; hor cogazha laa me biac. ⁴⁵ Bien̄ Jesús sca

bzhen̄ wnaa co lad xab me, dzigo rëbchaa me:

— Çho ga bzhen̄ lad xab naa?

Grëse zho rnee led zhada. Dzigo rëbchaa Pedr lo me:

— Maestro, wi ganle zha ndaagwtaa ziaad luu lad grë miech rii, haxta rcheep zho luu, çzha nan̄ luu choot xen̄d lad xab luu?

⁴⁶ — Per no cho bzhen̄ lad xab naa — rnee me —, sac bien̄paa naa beenguiac naa zho.

⁴⁷ Zeene gon̄ wnaa co bien̄ Jesús sca bzhen̄ me lad xab me, rdzieb me laa me wbig pquitsgzhib me lo Jesús. Squi ndxie grë miech co, bzodiidz me zha nacne sca been̄ me, ni zha zigne bzhen̄ me lad xab Jesús laa me biac. ⁴⁸ Dzigo rëbchaa Jesús lo me:

— Xin, laa luu biac sacne dib zdoo luu bnalo luu naa. Bzë na, peet tsieniedraa guic luu.

⁴⁹ Laa Jesús bii quianeeque lo wnaa co, zeene laa tib zha ne nac mandad ziaad nëz lidz Jair bdziñ, rëb zho lo Jair:

— Csodziindraa luu lo men̄ qui, laa xpëed luu gutle.

⁵⁰ Zeene gon̄ Jesús sca rëb zha co, rëbchaa me lo Jair:

— Peet tsienied guic luu. Dib zdoo luu bnalo Dios, zeena peet gacd xpëed luu.

⁵¹ Bdziñ zho lidz Jair, psandraa Jesús nal̄ grë miech co zhits me ndziñ zho zaatne nix mëed co. Loxaque Pedr, Jacob, ni Juan, pxoz win ni xniaa win bzëebnie me len̄ yu ne nix win. ⁵² Grë miech ne ndxie ga, roon zho no zho xquiel̄në win; dzigo rëbchaa Jesús lo zho:

— Goonde to; sac gon̄ nixguiesse mëedwin rii, gute win.

⁵³ Psilo zho lel̄ rzhidznie zho me, sac nan̄paa zho gutle win. ⁵⁴ Dzigo wbig me, bzhen̄ me nia win, nguedz bnee me lo win, rëb me:

— jGuche i na, ndzooop yeen!

⁵⁵ Zigne sca bnee me, laa mëed co brieëban, laa win guche ga; dzigo bnabey me bguiaañ zho win.

⁵⁶ Zigtaa pxoz wina, zigtaa xniaa wina, per nli rley me. Dzigo pso Jesús diidz lo me, choot lo gzodiidz me zha brieëban win.

9

Pxeel Jesús xpëedscuel me güeyseed zho miech

(Mt. 10:5-15; 14:1-12; Mr. 6:7-29)

1-2 Tib dze bredz Jesús gza tsiipchop xpëedscuel me, pxeel me zho tsienee zho lo miech gacnan̄ zho zha racladz Dios gban zho; bdeed me poder lo zho gun̄cxoon zho grë men̄dox ne nosacsi miech, ni gun̄guic zho grë men̄ rzacnë.

³ — Gol̄tsie — rëb me lo zho —. Per ib güeyde to ncuaañe yquiin to nëz. Zig nac dimi,

zig nac ncuuaane gow to, pe bziuud, pe bax-tongaa, güeyde tow; xab tow, miñe nacwse to miñcose gołtsienie. ⁴ Guiedz ne gdziñ to, zha ne gneedz zaatne cuëz to, lidz zha co gołcuëz, haxta gdziñ dze ne gbi to guiedz co. ⁵ Per telne gdziñ to tib guiedz, nêd miech yquiaadiag zho miñe zienee to, dzigo gołlit grê yudie co ni to, gołrieegazh ga, zeena guien zho ganle doł ga been zho lo Dios, nêd zho ycaania zho xtiidz me.

⁶ Dzigo laa zho briece, laa zho zie. Grêse guiedz ne ndxie dib gax ga, güey zho güeynee zho Xtiidz Dios lo miech, ni beenguiaic zho grê men rzacnê.

⁷ Bin rey Herod rzeet zho Jesús, sac tel pa lotaaw zêëb diidz grêtaa milagr ne run me. Grê miech co, no zho rzac Juan Bautist ga brieaban, lëe me ga nac Jesús; ⁸ nogaa zho rnee bod Lív, men ne biadteed xtiidz Dios padzeela, me ziaad stib; zzhisgaa zho rnee no cho stib men biadteed xtiidz Dios padzeelaw, sinque brieaban me gane ziaad me stib.

⁹ Zeene ron Herod rnee grê miech co lëe Juan ga, rio me zhgab, rnee me:

—¿Bay cho nac men co? Per gacda Juan; naazhal name bnabey pchug zho yan Juan.

Racladz Herod tebaa zha gan me Jesús.

Bguiaan Jesús gaay mil miech

(Mt. 14:13-21; Mr. 6:30-44; Jn. 6:1-14)

¹⁰ Goc bla dzew, laa grê zha ne pxeel Jesús ga wbiere bdziñ lo me. Blozhse bzodiidz zho lo me grêse tel zha güey zho, dzigo güeynie me zho tib lugar riaan gax guiedz Betsaid.

¹¹ Zeene bin grê miech co laa me briece, dzigo brienał zho me, bdziñ zho lo me ga. Zeene gon me zho, rley me pcaania me zho, bnee me lo zho zha racladz Dios gban zho, ni beenguiaic me grê zha ne rzacnê. ¹² Laa dze rdzelew, wbig gza tsiipchop xpêëdsuel me rêb zho lo me, mazd gnee me lo grê miech co gbi zho ga; zeena guiob tsie zho grê guiedz las, grê yu ne riaan gax ga, yguib zho dien pa cuëz zho, yguib zho dien pe gow zho; sac choot miech nod ga.

¹³ Dzigo rëbchaa me lo zho:

—To goldeed ncuuaane gow zho.

Pquiab zho rëb zho:

—Gaayaque guietxtil ni chop mel ziaadnie no nu, ipe rnase ncuuan co lo grêtaa miech qui! Niicle niaca miñe gziuu ncuuaane gow zho, pe zhidaa dimi yquuin, ¿pa guioxi now?

¹⁴⁻¹⁵ Nligaa miech tafa, zig gaay mil rgaa loxaque zha bguise. Dzigo bnabey me zho güey zho, güeynee zho lo grê miech co sob zho, cue zho grol gayooga, grol gayooga zho tib lugar. ¹⁶ Laa grê miech co bzob, dzigo bzheñ Jesús gza gaay guietxtil co ni grop mel co, blis lo me nêz gbaa, bdeed me xquizh lo Dios. Blozhse ga, beengrol me gza guietxtil

co, mel co ne, dzigo zigse rdeed mew lo xpêëdsuel me, scase scase rguiz zhow lo grê miech co. ¹⁷ Grêse zho dow haxta zaatne bieltaa zdoo zho; ni zeene blozh dow zho, biodzê tsiipchop chicuid bio grê miñe biaan.

Bnee Pedr cho nac Jesús

(Mt. 16:13-19; Mr. 8:27-30)

¹⁸ Tib dze biche Jesús lo miech palal, güey me tib zaatne güeyzodiidznie me Dios; loxaque xpêëdsuelse me güeynał zhits me. Ga bnabdiidz me lo zho rëb me:

—¿Cho dien ron to rnee miech nac naa?

¹⁹ Pquiab zho rëb zho:

—No zho rnee Juan Bautista, nogaa zho rnee Lív (men ne biadteed Xtiidz Dios padzeela); nogaa grol zho rnee no cho stib men ne biadteed Xtiidz Dios padzeelaw, sinque brieaban me gane ziaad me stib.

²⁰ —¿To waa? —rëb me lo zho—. ¿Cho rzac to nac naa?

Horco pquiab Pedr, rëb Pedr lo me:

—¡Luu nac Men ne zêëble diidz ga cxeel Dios!

²¹ Dzigo pso me diidz lo zho choot lo gneed zhow.

Bzeet Jesús zha gun miech me

(Mt. 16:21-28; Mr. 8:31-9:1)

²² Tib vuelt bzeet Jesús lo grê xpêëdsuel me zha csacsi miech me. Rëb me, nroob grê ncuuaane cteed zho me; grê zha ne lo menguiedz, grê pxoz rnabey, grê zha ne rseed miech ley, ible stsidil zho me, ni haxta zut zho me; per zeene gac tson ngbidz gut me laa me grieeaban.

²³ Ni rëb me lo grê miech ne ndxie lo me ga:

—Zha ne racladz sêëb xnêz naa, none cueeladz zho zho, none lëb zho gzataa dze guiaadnał zho miñe rnabey naa, niicle tel miñ co yquiaaqui csacsi miech zho. Nodne yquia zdoo zho xquielmban zho, ²⁴ sac zha ne yquia zdoo xquielmban, lel znu nitlo zho; sangue zha ne sca cueeladz xquielmban porne no zho xnêz naa, ib zgaa zho tib guielmban ne gdziñd dze lozh. ²⁵ Zha ne zienie guic loxaque gapchen, ¿pa dien yquina lo zho, tel por lëew rsacsi zho zho, tel lëew yquiaaqui guey zho gabil? ²⁶ Naa ne nac naa Mgui ne pxeel Dios, zha ne ctoladz guiab zho laa zho no xnêz naa, ctoladzniegaa zho xtidz naa; scaque naa stoldalznie naa zho gal dze ne laa naa guial stib. Dze ne guialnie naa grê xanjł Pxoze naa, guiallu naa guielndzon ne rap me.

²⁷ Blozhse sca bnee me, rëbchaa me lo grê miech co:

—Ni gni naa lo to ganle, nzian grê zha ne ndxie nu niina, ib tedsod bii zan zho zeene laa Dios glu zha rnabey me.

*Bdzëëlo Jesús**(Mt. 17:1-8; Mr. 9:2-8)*

²⁸ Goca maase xon ngbidz, güey Jesús tib guic gui gza me Pedr, Jacob ni Juan; laa me zie ga ziezodiidnie me Dios.

²⁹ Laa me nozodiidnie Dios, zeene laa me bdzëëlo. Masaque biinidoo ne rree lo me, xab mew, nquitsbie rnaw, haxta rquiab-niw. ³⁰⁻³¹ Tibaque brieequia Lí grop Moisés bdziñ lo me ga, psilo zho nozodiidnie zho me grë guielné ne cteed miech me Jerusalén, zeene laa me gbi lo guidzliu. Masaque biinidoo ne riab, ncuaane gzee zdoo new.

³² Laa zha ne zienal zhits me, rcow zho mcaal zob zho ga; per zeene biab biini nroob co, hor co bzhial lo zho gon zho zha rlu me gza me Lí ni Moisés. ³³ Laa grop men co ziebiche lo Jesús, zeene rëb Pedr lo me:

—Maestro, iwena gon tebaa gbiaaz ne nu! Na maase gzaa no tson yu yag xiid win, tiba cuëz luu, tiba cuëz Moisés, stiba cuëz Lí.

Per niicle Pedr riendaque dien pe nacne sca rnee Pedr.

³⁴ Laa Pedr bii quianeeque, zeene bre tib xcow zaatne zo zho ga; per nli bdzieb zho gon zho laa zho biaan leñ xcow co. ³⁵ Dzigo bin zho zëëb tib tsi men co lo xcow co, rnee me:

—Lëë Xpëed naa i gon, rleynie naa me. Golgon mine rnee me.

³⁶ Zeene blozh bin zho tsi men co, gon zho losaque Jesússe zo ga.

Grëse mine gon zho ga, ib choot lo bneed zhow leñ dze co.

*Biac tib mëed ne nosacsi mendox**(Mt. 17:14-21; Mr. 9:14-29)*

³⁷ Biini liu co, laa Jesús wbi guic gui co gza me zha ne güeynie me ga. Miech guizhiu ne güeydzieelo me. ³⁸ Lad grë miech co brieet tib mgui, wbig me lo Jesús rëb me:

—Maestro, bzhiguiel bui ganle zha rac xpëed naa. Tibaque mëëdbgui rii nac mëëd lo naa, ³⁹ ni na laa mendox nosacsi win. Zeene rdziñ ma rcoptsiedan ma win, rron ma win liu, ga nix win runcxidz ma win, ni masaque rdzib mtsiin ro win; nen rsaan ma win. ⁴⁰ Blansonie naa win nu, bnab naa lo xpëëdsuel luu guncxoon zho mendox co, per brielod zho.

⁴¹ Dzigo rëbchaa Jesús:

—iPe nac squitaa miech ntseeb nac to, ib nëde to gnalo to Dios! iPa lal dze ne so naa gne naa lo to? iNcuaane cxecwdraa naa lo to squitaa nac to! Dënie xpëed luu nu —rëb me lo men co.

⁴² Zeene laa mëëd co ziegax lo Jesús, hor co bron mendox co win liu, nix win ga masaque rzhidz win. Dzigo goctox Jesús lo ma, bencxoon me ma. Horcogazh biac mëëd co, laa me bdeed win lo pxoz win. ⁴³ Grë

miech ne ndxie ga, per nli rzee zdoo zho gon zho scataa nroob poder ne rap Dios.

Grëse miech ne ran grëtaa milagr ne run Jesús, rzee zdoo zho.

*Bzeet Jesús stib laa miech csacsi me**(Mt. 17:22-23; Mr. 9:30-32)*

⁴⁴ Biire Jesús bzeet me lo xpëëdsuel me zha gon miech me, rëb me:

—Wen wen golquiaadiag mine gni naa lo to nu ganle. Naa gon ne nac naa Mgui ne pxeel Dios, ible ziolo zho naa ladznia miech.

⁴⁵ Per ib riend zho zha nacne sca rnee me, sac gard gdeed Dios diidzbey hor co guien zho zha naca; niicle par gnabdiidzga zho, rdzieb zho gnabdiidz zhow lo me.

*iCho nonraa?**(Mt. 18:1-5; Mr. 9:33-40)*

⁴⁶ Horco psilo zho noneelsa zho dien cho tib zho gac zha non.

⁴⁷ Bien Jesús sca no zho, dzigo bnee me lo zho, bredz me tib mëëdbgui win, ⁴⁸ rëb me:

—Grë zha ne no xnëz naa, zha ne gunças tib mëëdwin zig mëëd rii, gleynie zho win, rrieequia naa ga rleynie zho. Ni zha ne gleynie naa, rrieequia men ne pxeelle naa ga rleynie zho. Telne racladz to gacnañ to dien cho nac zha non, gacnañ to ganle, zha ne tsoxco gac zig tib ngundziin lo samiech, zha co nac zha non.

⁴⁹ Blozh ga, rëbchaa Juan lo me:

—Maestro, bdziñ no tib zha co gon bzeet zho lë luu zeene bencxoon zho mendox, nacne nli blisqui now lo zho, sac led yed zho nacgrë ne.

⁵⁰ Dzigo pquiab me, rëb me:

—iGunscade to! Sac gon zha ne racnie ne, grielod lëëque zha glëënie ne.

*Ndox Jesús lo Juan grop Jacob**(Mt. 8:19-22)*

⁵¹ Leñ dze ne ziaadyob gbi Jesús lo guidzliu rii, leñ dze co bio me nëz laa me zie nëz Jerusalén. Tiblique bio guic me, ib pquiad zdoo me, laa me zie. ⁵² Zeene bdziñ me xtan Samar, pxeel me bla zho bdedner zie zho tib guiedz win ne ndxie nëz co, par dien pa lo gdeed miech co cuëz me. ⁵³ Bdziñ zho guiedz co, choot bzhiguield ndeed zaatne mbëz me; sac bien zho nëz Jerusalén tsie me. Nac zha Samar, rlëënie zho zha Israel.

⁵⁴ Zeene bin Jacoba grop Jacob Juan, blëë guic zho, rëbchaa zho lo me:

—Maestro, imadz tibaque gotsaa gnab ne glial gui lad grë miech rii, zeena nitlogazh zho!

⁵⁵ Biecwaque me, goctox me lo zho rëb me:

—Riende to lëë zhapaa nac men ne nacnie to. ⁵⁶ Golguien ganle, naa ne nac naa Mgui ne pxeel Dios, ziald naa par gnitlo naa miech, sinque laa naa ziald silaa naa zho lo dol.

Ga brieë zho güey zho stib guiedz.

⁵⁷ Nêz zie zho, zeene wbig tib mgui co rëb me lo Jesús, laa me racladz tsienal me zhits Jesús, tel pa lotaa nac zaatne tsie Jesús. ⁵⁸ Dzigo pquiab Jesús rëb Jesús lo me:

—Gocnaa ganle, ne nae nac naa Mgui ne pxeel Dios, peet rapd naa nu, mazd zig nac grë mëz, grë mguin, rap ma zhibliee ma, rap ma zhiptsieez ma; per naa per ni zaatne gaguies naa quianied naa.

⁵⁹ Laa zha ne bredz me tsienal zhits me, pquiab zho rëb zho:

—Sënal naa zhits luu, per bzhiguiel bneedz diidz bey cuëz naa, gangazh naa tsoliu pxoz naa.

⁶⁰ Rëbchaa me lo zho:

—Nzian grë zha gut no, psaan tsow tsie samengut zho tsiequeets zho. Sangue luu zhits naa dënal, zeena tsie luu tsienee luu lo miech, gacnaa zho zha racladz Dios gban zho.

⁶¹ Pquiab stib zho rëb lo me:

—Maase sënal naa zhits luu, per bneedz diidz ganiegazh naa diidz lo grë menlidz naa.

⁶² Dzigo rëbchaa me:

—Zha ne xen nia rad ni csilo zho gwi zho nêz zhits zho, niacxe zrieelo ygan zho ngon. Scaque zha ne sëëb xnêz Dios, griee lod sëëb zho telne mazdraa rleynie zho grë ncuuaa lo guidzliu rii.

10

Güey tsongaltsii zha ne güeynee Xtiidz Dios (Mt. 11:20-24)

¹ Tib dze, ble Jesús tsongaltsii zha ne rquiaadiagle zhiwseed me, bnabey me tedner zho lo me tsie zho grë guiedz ne no ted me, pxeel me zho chopga chopga zho.

² —Golnab lo Dios —rëb me—, cxeelraa me zha ne gun xtsiin me. Sac ne nligaa ndalduo miech ne quiambëz yquiaadiag Xtiidz me, zha ne gneelew lo zho rgaad. ³ Goltsie sca, per nsin nsin golso. Golguien ganle rrieequia nac to zig cho mëcwxiil yeen, ni laa naa rxel to zaatne no grë coyot dox. ⁴ Peet güeyde to, güeyde to dimi, güeyde to ncuuaane gow to, lab tow, miñe quiase ni to mincose goltsienie.

⁵ Miech ne yquiaabdiuzh to nêz, sode to dieen zharaa yquiaabdiuzh to zho. ⁶ Zeene yguib to zaatne cuëz to, yu ne gdziñtaa to, golnab gunlay Dios grë zha ne no yu co. ⁷ Telne squiaadiag zho miñe rnee to, zunlay me zho; telne nêdgaa zho yquiaadiag zhow, dzigo toque gunlay me. ⁸ Zha ne gneedz zaatne cuëz to, lidzse zha co golcuëz, tsiede to stib yu stib yu; guielwagw ne gneedz zho lo to, ctoladzde to golgowa; sac gon zha ne run dziin, ib none ycaa zho miñe non xtsiin zho.

⁹ Guiedz ne yquiaadiag miech miñe zienee to, zaacse golgac lo zho, tel pe guielwagw

ne gneedz zho, golquina; ⁹ golgunguiac grë men rzacnë ne no ga. Golguiab lo zho, laa dze ne nolu Dios zha sëëb miech xnêz me, laa dze co bdziñle. ¹⁰ Sangue guiedz ne siguiel miech yquiaadiag zho miñe zienee to, golree grë ro xnêz zho, ¹¹ ganlo zho glit to grë yudie co ni to, zeena guien zho ganle nêz ne nitlo zho ga zie zho. Golguiab lo zho, zha bguiba, sac binnpaa zho zha griee lo sëëb zho xnêz Dios ni nêd zho gon zho didz. ¹² Gacnaa zho ganle, gal dze ne gun Dios xquielwxtis me, lëëtaa gac guielnë ne tsieguial zha Sodom, mazdraa nac guielnë ne tsieguial zho.

¹³ Scadaa nac zha Corazín ni zha Betsaid. jProbsaxe zho, sac gon gonpaa zho grë milagr ne run Dios, per ib psaaand zho xquielntseeb zho! Tel niaca miñe ngaa grë men Tiro, grë men Sidón, nian grë milagr ne gon zho, ib ndedsod mban niac grë zha co nio zho guielnë, zëëb nsaan zho xquielntseeb zho mbig zho lo Dios. ¹⁴ Gacnaa zho ganle, gal dze ne gun Dios guielwxtis, lëëtaa caxtigw ne yгаа zha Tiro ni zha Sidón, mazdraa miñe yгаа zho. ¹⁵ Scaque zha Capernaum, masaque rzac zho niina zha nziuuraa lo Dios, per gacnaa zho ganle haxta guiet len gabil ga guey zho.

¹⁶ Blozhse sca bnee me, rëbchaa me lo zho:

—Grëse zha ne yquiaadiag miñe gnee to, rrieequia naa ga rcaania zho. Zha ne nêdgaa ycaania to, rrieequia naa ga nêd zho ycaania zho; ni zha ne nêd ycaania naa, rrieequia men ne pxeel naa ga nêd zho ycaania zho.

Wbire tsongaltsii zha ne pxeel Jesús ga (Mt. 11:25-27; 13:16-17)

¹⁷ Zeene laa gza tsongaltsii zha co wbire, rley zho bdzin zho lo Jesús. Rëb zho haxta grë mendox bdzieb ma zho, zeene bzeet zho lë me.

¹⁸ Dzigo pquiab me rëb me lo zho:

—Haxta ma ne rnabey lo ma, gonpaa naa gon bringaa ma, biab ma zig riabse tib belye. ¹⁹ Laa naa bneedz poder qui lo to, parne gdeete to diidz gun ma miñe racladz ma; grë meeldox, grë meegu ntseeb, niicle guoobni to ma, peet gacde to. ²⁰ Nli laa to runcxoon mendox niina, per gleyde to por min co, sinque mazd golley porne laa lë to zhooble lo Dios, laa to ngable lo me.

²¹ Horco baaad tib guielbley nroob zdoos Jesús, bnee me lo Dios, rëb me:

—Papá, luu nac men ne rnabey gbaa, luu nac men ne rnabey guidzliu, rmedz naa xquizh lo luu, sac grë miñe noyuu luu nu niina, bdeete luu diidz niacnaa grë zha raca, sinque laaw blu luu lo grë zha ne nac zig grë mëëdlaas. Sca quiaayuu luu, sac ib scale racladz luu gaca.

²² Blozh ga rëb me lo grë miech ne ndxie lo me ga:

—Grëse ncuuañe ran to quiayun naa, Dios men ne nac PxoZ naa, me bneedz poder rii lo naa; sac ib laa me bzo naa, naa guña. Xpëed me nac naa, wen wen runbey me naa, scagaa naa wen wen runbey naa me. Choot runbeyd me zigne runbey naa me, per zha ne gded naa diidz gunbey me, zunbey zho me.

²³ Dzigo rëbchaa me lo xpëëdsuel me:

—Dichos to bgaa to noyan to grë min rii.

²⁴ Sac gon blactaa zha ne biadteed xtiidz Dios padzeela, haxta grë zha ne bnabey len dze co, bzoobladz zho nian zho grë ncuuañe noyan to, bzoobladz zho nquiaadiag zho grë ncuuañe noquiaadiag to.

Xcuent tib zha Samar

²⁵ Tib dze wbig tib zha ne nac maistr ley lo Jesús, bnabiidz zho lo me, rëb zho:

—Maestro, bnë lo naa dien, ¿pe nac mine gun naa parne grieelo ygaa naa guielmban ndzon ne gdzind dze lozh?

²⁶ Pquiab Jesús rëb me:

—¿Zha dien zho bnee lo ley? ¿Pe rnabeya?

²⁷ Rëbchaa maistr ley co:

—Znu rneew: “Dib zdoo luu, dib nacse luu, dib guielbiini ne no guic luu, dipse xfuers luu, bleynie Dios; ni bleynie samiech luu, zigne rleynie luu luu.”

²⁸ —Min qui nagon bioxco gun luu —rëb Jesús—, zeena ygaa luu guielmban ndzon ne gdzind dze lozh ga!

²⁹ Per par glud ne noxcd me gun me mine rnabey ley, dzigo pquiaalo me rëb me lo Jesús:

—¿Chopaa dzigo nac samiech naa, zha ne no gleynie naa?

³⁰ Dzigo bzodiidz Jesús tib cuent lo me, rëb Jesús:

—Tib men wladz name brie me Jerusalén zie me guiedz Jericó. Néz zie me briequia ngbaan, bdiñ ngbaan me, mer niut ngbaan me; grëse ncuuañe ney me, haxta xab me blan ngbaan. ³¹ Laa me nix ga, zeene laa tib pxoz bded. Zigne gon pxoz me, biacwga pxoz bded pxoz tib lad. ³² Wdzeepaaw, zeene laa tib zha ne runaque dziin len yadoo ziaad ga; scaque zigne gon zho me, tib tib bded zho. ³³ Sca nix me ga, zeene laa tib zha Samar bdiñ. Zeene gon zho me, wbig gax zho lo me; pquia zdoo zho me gon zho zha rna me. ³⁴ Gagaz been zho me rmed, blee zho vin bdiñ zho lo grë rid ne ney me, bdëeb zho nceita, pxidoo zhow. Blozhse ga, blis zho me bzoob zho me lad xcuay zho laa zho zienie me, haxta bdiñnie zho me tib yu ne rbëz miech ne zo nëz; ga blëznie zho me, pquianap zho me.

³⁵ Biini liu, zeene laa zho brie ga, blee zho palal dimi, lal ne non chop xtse zha ne rie dziin, bdeed zhow lo bizhuan yu co,

parne yquiaanap me men co, rëb zho: “Peet tsienied guic luu, telne nroobraa gun luu gaxt, na zeene gbire naa dzigo quizh naaw.”

³⁶ Blozhse bzodiidz me cuent co, rëbchaa me lo maistr ley co:

—Lo gza tson zha ne nadien bded zaatne nix men co, ¿cho tib zho bien samiech zho ga nac me?

³⁷ Pquiab maistr ley co rëb me:

—Zha ne bion bded gaw, sac zha co pquia zdoo me.

Dzigo rëbchaa Jesús lo me:

—Sca nagon none gun luu.

Blëz Jesús lidz Mart ni Martí

³⁸ Laa Jesús no nëz gza xpëëdsuel me. Bdiñ me tib guiedz win, ga no tib wnaa lë Mart, dzigo men co bdeed zaatne blëz zho.

³⁹⁻⁴⁰ Bdiñ zho lidz Mart, lëelëd bzëeb Mart ro tie. Zhixco ro tie no Mart, laa tib bel Mart lë Mari zob noquiaadiag grë zhiwseed Jesús. Gon Mart rgaadraa nia Mart, dzigo wbig Mart rëb Mart lo Jesús:

—Bzhiguiel bnee lo bel naa guiaad me gun me xyudar naa. Bui ganle tipse naa psan me ro tie.

⁴¹ Pquiab Jesús rëb Jesús lo me:

—Aque luuw nli Mart, squita noxco luu dien zha gax xtsiñ ro tie luu. ⁴² No tib ncuuañe mazdraa none tsoxco luu, ni lëe min co nu gon noyan Mari; gane grieelod ycaa naa mine quiayun me.

11

Zha none gzodiidznie ne Dios

(Mt. 6:9-15; 7:7-11)

¹ Tib vult, loxaque blozh bzodiidznie Jesús Dios, wbig tib xpëëdsuel me rëb lo me:

—Maestro, bzhiguiel blu lo no dien zha gzodiidznie no Dios, zigne been Juan Baptist pseed me xpëëdsuel me zha gzodiidznie zho Dios.

² Dzigo rëbchaa Jesús:

—Zeene gzodiidznie to Dios, golguiab:

Dios, luu nac PxoZ no, zob luu gbaa; luuse nac men me mazdraa ndzon. Luu nac men ne gnabey no, mine gnabeytaa luu, zigne raca gbaa, scaque none gaca lo guidzliu nu.

³ Been guielnzaac bneedz ncuuañe dioow no nadze.

⁴ Bzhiguiel been no perdon grëse dol ne ziodziun no luu, zigne rdziun no samiech no perdon grë falt ne run zho lo no.

Gdeete luu diidz yquuil men dox no, been guielnzaac bla no lo ma.

⁵ ‘Sca nagon gnee to —rëb Jesús—. Ncuuañe gnab to lo me zneedz mew. Samiechse to name, gzoob ne wxina, lega nacle glanso tib zha ne ndzieeldiiz to ni guienp ne gdeed to gon zho. Dzigo tsie

to lidz stib zha ne ndzieeldiidz to guiab to lo zho: “Bzhiguiel beexntad tsonaque xcuun luu lo naa. ⁶ Lega nacle blanso tib zha ne runbey naa, na guiend pe gded naa yquuin zho.” ⁷ Segur znë zho: “Gunnëete luu naa nu, dziitsle niogo ro lidz naa, nataa nixguies grë xpëed naa; grielod gache naa gnedz naa ncuuane racladz luu.” ⁸ Per telne sonaad to ga, ganse zho tibaque quianee to, gnid naa zho tsieched zho gneedz zho ncuuane racladz to. Per gneedzd zhow porne ndzieeldiidz to zho, sinque laa zho gneedza porne gon zho tibaque quianab tow. ⁹ Scaque nagon none gon to, zeene pe gnab to lo Dios. Ncuuane rquuin to, golnaba lo me, scagaa me zneedz mew. Golguib tel pe racladz to, me nac men ne gacnie to gdziel tow. Golcuedzlë me, scagaa me scaania me to. ¹⁰ Sac grëse zha ne rbig lo me rnab zho ncuuane rquuin zho, rdeed mew. Zha ne rguib ncuuane racladz zho, racnie me zho rdziel zhow. Zha ne rbedzlë me, rcaania me zho.

¹¹ Golguien ganle, zig nac to, zeene rnab xpëed to tib mel gow win, çniacxe ziazh to co to tib meel nia win? ¹² Zeene rnabgaa win tib dzit, çniacxe zgo to tib meegu nia win? ¹³ Led rioxco to lëë niapse ncuuane wen rdeed to lo xpëed to, niicle ne miech ntseeb nac to. Telne sca rioxco to xpëed to, pelej Pxoaz to dzigo, men ne zob gbaa, tsoxcod me to. Ib tedsod grëse zha ne gnab lo me gdeed me ncuuane rquuin zho, zdeed mew; haxta zha ne gnab cxeel me Espiritu Sant gacnie zho, zun me miñe gnab zho.

*Rëb zho mendox nacie Jesús
(Mt. 12:22-30, 43-45; Mr. 3:20-27)*

¹⁴ Tib vuelnt beñcxoon Jesús mendox ne nosacsi tib mgui co. Ib gacd gnee mgui, sac psan ngop ma mgui. Dzigo zigne beñcxoon Jesús ma, laa mgui psilo bnee. Grë miech ne ndxie ga, bzee zdoz zho gon zhow. ¹⁵ Nogaa zho rnee, Beelzebú ma ne rnabey lo mendox, ma co nacie me gane rrieelo ruñcxoon me mendox. ¹⁶ Brieequia spalal zho, rnab zho lo me gon me pe stib milagr, parne gliladz zho nli Dios pxeel me.

¹⁷ Bien Jesús zha rza guic zha ne noneenë me ga, dzigo rëbchaa me lo zho:

—jNcuuane gacd gon rnee to! Tel tib guiedz nadien, csilo miech, lëëque zha tilnie menladz zho, çniacxe nitlod guiedz co? Tib diigaa miecha, tel lëëque zha tilnie menlidz zho, led znuse lëë nitlo dii co. ¹⁸ Scaque mendox nagon, telne lëëque lëë ma guncxoon samendox ma, jpe nale na bnitlo ma! Laa naa rne miñ rii lo to, porne rnee to ma ne rnabey lo mendox nacie naa, gane rrieelo ruñcxoon naa ma. ¹⁹ Nana telne sca rzac to, çzha ne nacgrë to dzigo, cho nacie zho ne ye zho ruñcxoon ma? Gase naganle rlu dollox

i quiayun to squi rnee to. ²⁰ Sangue tel naa, Dios nacie naa ruñcxoon naa mendox, ni ga rlu ganle laa Dios pxeelle men ne gnabey lo to.

²¹ jMasaque nac mendox zig tib zha ne no xfuers! Tib zha ne no xfuers, tel tibaque ney zho xquuib zho, çcho dien lega sëeb lidz zho gla ncuuane quianie zho? ²² Per zeene rrieequia stib zha ne mazdraa no xfuers, zha cole rtiche zha co, ruñcxoon zho zho, riaanne zho grë ncuuane gopchen zho. ²³ Golgacnan sca ganle, zha ne rlëë lo naa, ga rlu nacie zho naa; ni zha ne racnie naa lo xtsin naa, paat yquind zho.

²⁴ Mendox ne rsacsi miech, zeene laa ma rsaan zho, rie ma riequianzë ma dan zaatne choot miech guiend, rguib ma dien pa cuëz ma; ranse ma rdziel zaatne cuëz ma, rnee ma: “Mazd gbire naa guia naa lidz naa stib.”

²⁵ Dzigo rbire ma, zeene rdzin ma lo zha ne psacsi ma ga, masaque rzac ma zho zig rzac miech tib yu ne griin blioob, tib yu ne iñe nzhixcuua len. ²⁶ Dzigo rie ma riexi ma zgadz samendox ma, ma ne mazdraa ntseeb, rdzin ma gza ma rzëëb ma zdoz zha co, rsilo ma rsacsi ma zho. jHorcole mazdraa mban run ma zho!

²⁷ Sca quianee Jesús, zeene nguiedz bnee tib wnaa ne no lad grë miech ne ndxie lo me ga, rëb wnaa co:

—jDichos wnaa ne gop luu, wnaa ne bgadz luu!

²⁸ Pquiab Jesús rëb me:

—jMazdraa dichos zha ne gon, yquiaadiag Xtiidz Dios ni tsoxco zho gban zhow zigne naca!

*Zha ne rliadz cho nac Jesús
(Mt. 5:15; 6:22-23; 12:38-42; Mr. 8-12)*

²⁹ Miech guizhiu ne quiazdizraa lo me ga, dzigo bnee me rëb me:

—Nadzpaat ntseeb zdoz to nac to miech ne mban len dze rii. Tibaque quia to racladz to gan to pe stib milagr, parne gliladz to Dios pxeel naa, çzha nraraa milagr ne racladz to gan to? Gacnan to ganle, stibaque milagr gon gan to, tib miñe csoladz to zha goc Jonás.

³⁰ Haxta dzigoraa nagon guien to nli Dios pxeel naa. Sac tel Jonás, zeene goncan zha Nínive zha bzhaac me, dzigo biladz zho nli Dios pxeel me. ³¹ Ni gacnan to ganle, zeene gal dze ne laa Dios gon xquielwxtis me, zieso wnaa ne goc rein nëz Sabá, steedquie me to. Sac gon pa na ga brie me, biaad me biadquiaadiag me grë xtiidz Salomón; ni to, lo to nu zo men ne mazdraa non lo Salomón, ni nëd to gon to xtiidz me. ³² Scaque grë zha Nínive, steedquie zho to; sac gon zeene güeynee Jonás lo zha Nínive, znuse bin zho diidz psaan zho xquielntseeb zho wbig zho lo Dios; ni to, lo to nu zo men ne mazdraa non lo Jonás, ni ib ruñcasde to me.

³³ Tsod zha ne yquiaagui tib biini, lozh ga ctoos zho pe cos low, gzolanga zhow zaatne ngueets. Sac biini ne rquia, glaa rzoba par gziiniw len yu, zeena guiab biini lo grëse zha ne sëëb len yu. ³⁴ Rrieequia nac bziaalo miech zig nac tib biini. Telne niapse lo grë ncuaañe ndzinli rwi zho, dzigo gdipse xcuerp zho no lo guielbiini. Laa telne loxaque lo grë ncuaañe nonguielgdga rwi zho, dzigo gdipse xcuerp zho no lo guielcow ga. ³⁵ Golguien sca pa lo rwi to, napaa laa ne tso to lo biini, lel lo guielcow no to. ³⁶ Sac gon, tel dipse xcuerp to no lo guielbiini, ni tib lëw no lo ncow, zupaa to; sac masaque nac to ga zig tib zha ne zo gax tib lo biini nroob.

Güey Jesús lidz tib zha farisé

(Mt. 23:1-36; Mr. 12:38-40; Lc. 20:45-47)

³⁷ Zeene blozhse bnee Jesús lo grë miech co, dzigo bredz tib zha farisé me güeynie zho me tib wagw lidz zho.

Bdzin me lidz zho, bded me bzob me lo mezh, ³⁸ psilo me dow me, per bdiibd me nia me zigne nacpaa xcostumbr grë zha Israel. Zeene gon zha farisé cow, rlozhd gzee zdoos zho; ³⁹ dzigo rëbchaa me:

—Grë to ne nac to zha farisé, laglaase rlu to miech wen nac to, per zdoos to ntseeb to, sac niapse guielntseeb, niapse guielgbaan run to; masaque nac to gon zig tas, zig plat ne nëz zhtisse mbe rna, laa nëz lena rnadraa di beed. ⁴⁰ jNadzpaacow nac guic to! jPe riende to racladz Dios ne laglaase glu miech wen nac to, sinque racladz me desde zdoos to gac to miech wen? Sac dib nace to psan me to. ⁴¹ Laa ne squi no to noban to, mazd goldeed ncuaañe nacchenpaa to lo grë zha ne guienp pe yquiin, zeena gac to miech ne nlipaa wen.

⁴² jProbsaxe to! Rzac to demas nguzobdidz to lo Dios, rio to haxta grë guizh bitxtil, grë guizh rud, ni grëragaa guizh ne ran to, rdeed to xdiezm to yadoo; per rioxcodet to gban to zigne rnabey Dios, ib rioxcodet to gleynie to samiech to. Ible none tsoxco to min rii, ni bii scaquegaa tsoxco to gdeed to xdiezm to. ⁴³ jProbsaxe to! Rdziladz to gacnon to lo miech, zeene rie to yadoo, zaatne glupaa non to, ga rzob to; scaque ndooladz racladz to gnee miech bdiuzh lo to, zeene rdzieel zho to dib ro nëz. ⁴⁴ jProbsaxe to, lëëtaa rdzieel to grë to maistr ley! Masaque nac to zig nac grë baa ne rludraa pa nac. Tel baa cow, zeene rded zho zaatne niaaw, ib riend zho lad grë ncuaañ noyodz ga, noded zho.

⁴⁵ Horco pquiab tib maistr ley, rëb zho lo me:

—Maestro, çye no dzigo lëë rzoob luu squi nac?

⁴⁶ Pquiab Jesús rëb me:

—Ye to gon. jProbsaxe to! Rio to rzadraa ley ne rnabey to gun miech, ni per ni to rioxcodet to siquier csilo to gun tow. ⁴⁷ jProbsaxe to! Paat rquinda gon squi rio to, rlozhd dieen paraa rzhixcuua to ro xpaa grë zha ne biadteed ttiidz Dios padzeela. ⁴⁸ jIgalntseeb to grë pxozgol to! Sac gon, zha beet grë zha co, laa to no rzhixcuua to ro baa. ⁴⁹ Nanle Dios squitaa ntseeb zdoos to, mine run to ga bnee me, zeene rëb me: “Sxel naa grë zha ne tsieteed xtidz naa lo zho, sxel naa zha ne tsieneew lo zho, per nanle naa gandzed zho zho, haxta zut zho groj zho.” ⁵⁰ Gacnan to sca ganle, grë to miech ne mban len dze rii, grë to gunquizh Dios xchen grë zha ne pxeel me biadteed xtidz me wlal ne ndxie guidzliu, ⁵¹ desde Abel haxta Zacari men ne beet pxozgol to len yadoo zaatne nac gax lo pcoog. jNe nligaa grëse dol co gon, to quizha! ⁵² jProbsaxe to maistr ley squi nac to, ib rneede to diidzli lo miech! Nac diidz to cseed miech guien zho zha nac Xtiidz Dios, per nede to gliladz tow, ni niicle nëëdga to gliladz zha ne racladz ycaaniaw.

⁵³⁻⁵⁴ Blozhse ga, laa me brieeg ga. Grë zha farisé, grë maistr ley, per nli rlëë zho bin zho sca rëb me. Psilo zho nzian grë ncuaañe rnabdiidz zho lo me, rguib zho dieñ zha gunglëë zho me, par dieñ pe cxind me pe tib diidz, zeena min co yquiaaqui zho tsiezoob zho xdemand me.

12

Grë ncuaañe rac ngueets zhliian

(Mt. 10:19-20, 28-33; 12:32)

¹ Miech guizhiu ne pcaalsa lo Jesús, haxta rcheeplsa zho. Dzigo bnee me lo xpëëdsuel me, rëb me:

—Golguien gon, gunde to mine run zha farisé, tel zha rquiaalose zho miech wen nac zho. ² Sac grëse ncuaañe sca ngueets rac, grëse ncuaañe rlud miech, zdziñ dze ne xoobnëa.

³ Zig nac grë ncuaañe zhliianse rnee to lo ncow niina, zdziñ dze ne gon miecha zobna ngbidz; grë ncuaañe rnee to len yuse, zdziñ dze ne dib lad guiedz gacnan miecha.

⁴ Golgona ganle bets: Ib gdziebde to zha ne gacladz gut to. Nli zrieelo gut zho xcuerp to, per peet grieelodraa zho gun zho. ⁵ Golguien, Dios nac men ne mazdraa nroob, mine rnabey me min co none gon to. Sac tel me, zrieelo me gnitlo me miech dib xcuerp zho, ni lozh ga zrieelo me gzonëz me zho nëz len gabil.

⁶ Nligaa gdziebde to miech, csaand Dios lega pe gac to. Golwi ganle, zig nac grë mguin, niicle ne rzac miech peet nond ma, haxta chop ma rto zho por tib gaay centav; per tel Dios, ib rsaanladz me ma. ⁷ Pelel to dzigo csaan me, haxta guits guic tow, grësew

ngaba lo me. Gdziebde to sca, golguien ganle nonraa to lo tib dzoon mguin.

⁸ Ni gni naa lo to ganle, zha ne glulo miech nacie zho naa, scaque naa ne nac naa Mgui ne pxeel Dios, zeen gal dze co zlu naa lo grē xanj Dios, nacie naa zho. ⁹ Sangue zha ne ctoladnie naa lo miech, scaque naa ziep naa lo grē anjl co runbeyd naa zho. ¹⁰ No zha ne rneenē naa, per zun Dios zho perdon dol co; sangue zha ntseeb ne gneenē Espiritu Sant, ib gundraa me zho perdon.

¹¹ Zeene tsiezo miech rii to lo grē zha ne rnabey xyadoo zho, tsiezogaa zho to lo grē zha ne nac wxtis, tsode to zhgab dien pe gnee to; ¹² sac zeene sca tsiegala, Espiritu Sant csiaab guic to pe nac mine gnee to lo zho.

Zha ne loxaque rapchen

¹³ Horco wbig tib zha ne no lad grē miech co, rēb zho lo Jesús:

—Maestro, bzhiguiel bnee lo bets naa glē zho ncuuaane psan pxoz no, gneedz zho mine raguial naa yca naa.

¹⁴ —Aque luuw nli —rēb Jesús—, zcho nē lo luu laa naa noyun guielwxtis co? Ziald naa gon par quiiz naa ncuuaane rap miech.

¹⁵ Dzigo bnee me lo grē miech co, rēb me: —jGolguien gon, gzoobladzde to demas gapchen to! Sac niicle naziibraa gapchen miech, grieeled por grē ncuuaan co ndzon gac lo xquielmban zho. ¹⁶ Znu gon bzhaac tib men ne nroob gopchen. Nat liu quianie me, zeene rlaap me grē ncuuaane ran me, nroob ncuuaane rlis me low. ¹⁷ Bdziñ tib dze rgaadraa pa tsotsow grē ncuuaan co, dzigo bzob me dien zha gun me. ¹⁸ Tibaque zeene rēb me: “Mine naca laa naa gun nroob grē yu qui, zeena zigtaa grē guielnzaac quiw, grēragaa ncuuaane rap naa, ga tsotsowa grēsew. ¹⁹ iPe zhidaa iz ne lēb grē ncuuaan co! Peet tsieniedraa guic naa, ine guxt sob naa, gow naa, guie naa ncuuaane gacladztāa naa.” ²⁰ Min co rza guic me, tibaque zeene rēb Dios lo me: “Nadzpaan xnen luu. Guieel riigazh gon laa luu guet. jZhaale zha ne guiaanne grētaā ncuuaane beenlo luu i!”

²¹ Zeene blozh bzodiidz Jesús cuent co, rēbchaa me:

—Sca nagon rzac grē zha ne loxaque dien zha gapchen zho zienie guic zho. Ncuuaan cose rionie guic zho, ib rioxcod zho gun zho ncuuaane non nēz lo Dios.

Rsaand Dios zha ne no xnēz me

(Mt. 6:19-21, 25-34)

²² Blozh ga, rēbchaa me lo xpēēdscuel me: —Gacxe waa, gni naa lo to ganle: Tsode to zhgab dien zha gban to lo guidzliu rii, pa griee pe gow to par gban to, pa gdzielgaa ncuuaane gdze xcuerp to. ²³ Mazd golconie

guic to dien zha gac xquielmban to, dien pa tsiebannie to xcuerp to.

²⁴ Golwi lo grē nga ganle, led yed ma ran, led yed ma rlaap, led yed ma rgotsow pe guielgon, per row ma; sac Dios rdeed ncuuaane row ma. iTel to gon, mazdraa non to lo grē mguin col ²⁵ Ni lalnu paat rquiinda tant tso to zhgab. Telne guiab to tso to zhgab dien zha gacnool xtse to spalal yeense, zniacxe zrieelo to gunnool tow? ²⁶ Nanle to ganle led ncuuaane grieeled ga. zPe nac dzigo tant tso to zhgab ncuuaane mazdraa nroob? ²⁷ Zig nac lar, zpe nacne tant tso to zhgab dien pe gacwxab to? Pe rwide to lo grē guiee dzil ne ganle zēēb dan, zha rrooba, niow rluw, ni led yeda rio zhgab dien zha gacwxaba; ni gni naa lo to ganle, per ni rey Salomón con grē xab niazh me, blud me scataa niow. ²⁸ Gase na ganle golwi, niicxe grē guiee dan co na, zna dze zob nguiaaw, gzhe widz laaw bidzle, laaw tsecle, ni scataa niow rgacwxab Dios; zpe lel to dzigo ygacwxabd me, niicle ne squi gard guien to dib zdoo to gnalo to me?

²⁹ Tsodraa to zhgab sca, guiab to: “zPa griee pe diow ne, pa griee pe dio ne?” ³⁰ Grē miech ne runbeyd Dios, tibaque zhgab co rio zho. Sangue to, golsoladz ganle Pxoz to men ne zob gbaa, nanle me pe nac grē xli-aadz to. ³¹ Me nac men ne gneedz ncuuaane yquiin to, per ib none glo tsoxco to gban to zigne rnabey me.

³² Nli zhis to, pale tib dzoon win mēcwxiil yeen, per gdziebde to. Sac niicle zhis to, per rley Pxoz to men ne zob gbaa, laa me rneedz grēse ncuuaane rap me lo to. ³³ Gacxe waa, laa ne tsonie guic to dien zha gacnroob ncuuaane rap to, mine quianie to gołtow, dzigo goldeed dimi co yquiin zha ne rappaa liaadz; zeena sca nroobraa guielnzaac ne ygaa to gbaa. Guielnzaac cosi, led yeda nitlo, led yeda grē, led yeda tsoxtseeb lo ngbaan, tsoxtseebgaa lo mxil.

³⁴ Sca golgun, sac gon guielnzaac ne gunlo to, zaatne gunlo tow, ga gdziñ to.

jNsin golso!

(Mt. 5:25-26; 10:34-36; 16:1-4; 24:45-51; Mr. 8:11-13)

³⁵ Nsin sca golso —rēb me lo zho—, ³⁶ Golgac zig tib ngundziin ne rquiambēz gbire men ne rnabey zho zeene pa rie me tib lo guieltsieel. Nsin rzo zho, zigne rdziñ me, rxal zho ro yu rzēēb me.

³⁷ Dichos zha ne nsin zo zeene laa men ne rnabey zho glanso. Ib tedsood, steed me zho nēz len yu, soob me zho lo mezh, csilo me mezhaldzidiib ncuuaane gow zho. ³⁸ Nligaa dichos zha ne sca nsin so, horne glanso-taa me; niicle tel wxiña, ziadyiinigaa liuw. ³⁹ Golgan ganle, telniaca mine gacnan miech laa ngbaan tsieban lidz zho guieel, per nand

zho dien pa horpaaw, ðniacxe zaaguies zho? Led sobna zho lëë, nsin nsin so zho parne csaand zho sëëb ngbaan lidz zho. ⁴⁰ Scaque to nagon, none sca nsin so to, sac gon lega naclew zeene gan to laa Mgui ne pxeel Dios ziaadle.

⁴¹ Zeene blozh sca bnee me, rëbchaa Pedr lo me:

—Maestro, miñe blozh bnee luu i, ðpe par nose naca, te ye par grëraa miecha ye?

⁴² Pquiab me rëb me:

—Laaw rne naa, par grëse zha ne ziene guic zaacse gun zho miñe rnee meñ ne rnabey zho. Nligaa nsin none so zho, sac laa zho guiaannie zha ne nacgrë zho, zig riaannie tib ngundziin sangundziin zho parne gdeed zho ncuuaane gow zho.

⁴³ Dichos zho, telne iñe niowse noyuy zho dziin co zeene laa meñ ne rnabey zho glanso. ⁴⁴ Zeene gan mew, ib tedsod so me zho, zha gnabey grëse ncuuaane quianie me. ⁴⁵ Per tel tsienie wguic guic zho guiab zho gbireniobd me, csilo zho lel csacsi zho grë zha ne biaannie zho, tso zho loxaque gowcho zho, loxaque gzudz zho, ⁴⁶ tibaque zeene gan zho laa me zole lo zho; ib tedsod hor cogazh ctiche me dziin co lo zho, gzonëz me zho guey zho zaatne no grëraa zha ne rond diidz. Nroob caxtigw ne cteed me zho.

⁴⁷ Sac gon zha ne sca nanle pe nac miñe racladz meñ ne rnabey zho, ni tsoxcod zho gun zhow; ible nroob nac caxtigw ne ted zho. ⁴⁸ Mazd lëëtaa caxtigw ted zha ne peet nand, niicle guñd zho miñe rnabey me. Grëse zha ne nanle pe nac miñe no gun zho, ib none gun zhow; nac cuent rii zig tib zha ne rcaania pe cos, tel palal miñe pcaania zho, none haxta nroobraaw ctsire zho.

⁴⁹ Niina ne laa naa zial, rrieequia zialzobgui naa lo guidzliu. iNi zoot naa gon, tebaa ranle naa laaw quiayzbel! iTebaa psiaalle naa lo dziin ne zialgun naa! ⁵⁰ Per na naraa none teed naa tib guielñe nroob, ni mbanse gon rac zdoo naa quiambëz naa gdziñ dze co. ⁵¹ iMasaque nan to na lëë, laa naa zial loxaque par cuin wense miech? Lëda gon, ye zial naa zialgunctil naa zho. ⁵² Sac desde len dze rii, yu ne no gaay miech, laa zho ctsolsa. Tel sëëb chop zho xnëz naa, laa ston zha ne guiaan ga, ctsidil zho; tel sëëbgaatson zho, scaque grop zha ne guiaan ga, gandzed zho zho. ⁵³ Mëed ne gan laa pxoz zho, laa xniaagaa zho bzëëb xnëz naa, gandzed zho pxoz zho, gandzed zho xniaa zho; scaquegaa zha ne quianie mëëda, zeene gan zho laa xingan zho, laa xindzoopgaa zho bzëëb xnëz naa, gandzed zho zho. Zha ne nac nguzhizha, zlëënie xniaa tsiel zho zho; tel xniaagaa tsiel zhow, zlëënie zho me.

⁵⁴ Blozhse sca bnee me, rëbchaa me lo grë miech ne ndxie ga:

—iPe nlipaa rnee to riende to pe nac grë ncuuaane noyac len dze rii! Zha zeene ran to rquia xcow nëz ne rzëëb ngbidz, znuse rien to laa guie guiab. ⁵⁵ Zeene rangaa to ziaad me nëz ne rzë ngbidz len mëë nal, nanle to laa nëëg gac. ⁵⁶ iGuie!wquiaalo i lo to gon! Zha zëëb dzigo runbey to grë señ ne rlu zhan gbaa, rlugaa lo guidzliu, laa grë miñe quiayan to len dze rii riende to.

⁵⁷ iNone guien to tozhäl cobey dien pe nac miñe nonguie! gun to! ⁵⁸ Gzoob ne bdilnie to tib samiech to, laa to nole nëz zie to lo wxtis grop to. None guien to, laga no to nëz mazd golguiaan mpas, lëdle tsiezo zho to lo wxtis; sac tel laa to gdziñ lo wxtis, ib znabey wxtis zha ne co to ladzguuib. ⁵⁹ Ni nanle to ganle, grieede to ga, haxtaque lozh quizh to tel palal gac mult ne gnab zho lo to.

13

Grëse miech, ngoopdol nac zho

¹ Len dze co, bdziñ bla zho lo Jesús bzodidz zho lo me zha bnabey Pilat gut bla zha Galilé, lëëtse zeene no zho len yadoo noyut zho ma ne nogogon zho lo Dios. ² Dzigo rëbchaa Jesús lo zho:

—Segur na lëë, rëb to mazdraa ngoopdol grë zha co lo grëraa zha ne no nëz Galilé, gane sca bdzieelo zho. ³ iLëda gon! Zigtaa ngoopdol zha co, scaque to ngoopdol nac to; telne csaande to xquielntseeb to gbig to lo Dios, ye to znitlo to. ⁴ Scaque tsiimtson zha ne bgaadze yuglaa ne bixche Siloé, masaque rëb to nagon mazdraa ngoopdol zho lo grëraa zha Jerusalén, gane sca gut zho. ⁵ Per gacnan to ganle, iLëda! iZig rne naa ga, ye to miech ngoopdol nac to, ni telne csaande to xquielntseeb to gbig to lo Dios, ye to zdziñ dze ne nitlo to!

⁶ Dzigo bzodiidz me tib cuent lo zho, rëb me:

—Tib meñ name, zob tib zhan yag guigw lo xcuaa me zaatne quianie me lbë uv. Cad rdziñ mëë ne rquia guigw, rie me rieguib me nex low, per ib peet rquiad. Zeene goctaa tson iz, gon me sca rdeetew nex, ⁷ dzigo bnabey me zha ne quianap liu co cchuggazh zhow, rëb me: “iPchuggazh yag yozh qui, zhlëse zoba i! Nale rac tson iz ziyal naa rguib naa nex low, ni peet nex rneedzda.” ⁸ Dzigo pquiab zha ne quia dziin lo me ga, rëb zho: “Psaan dien guiaana stibtaa iz rii, na laa naa glë zhana, na laa naa gdziñ beeba. ⁹ Telne yquidaaque nex low iz ne ziaad, maase cchug new dzigo.”

Biac tib zhuz ne nosacsi mendox (Mt. 13:31-33; Mr. 4:30-32)

¹⁰ Tib dze ne rdziiladz zha Israel lo dziina, bdziñ Jesús len yadoo, psilo me noseed me miech.

¹¹ Lad grê zha ne noseed me ga, lad co no tib men wnaa nlenkw nac zhits, gogle tsiimtson iz sca nosacsi mendox me, ib gacd gacnli me. ¹² Zeene gon Jesús me, dzigo bredz me me, pxobnia me guic me, rëb me lo me:

—jNiinagazh gon, laa luu guiac!

¹³ jHorcogazh laa zhits me ga gocnli, rley me, psilo me rdeed me xquizh lo Dios! ¹⁴ Laa zha ne rnabey yadoo, zeene gon zho sca beenguiac Jesús me dze co, blëe zho, rëb zho lo zha ne ndxie ga:

—Zha ne racladz guiac pe lo guielguidz, pe gacd guiaad zho len dze ne rac dziin, jled tsod zho guiaad zho guiac zho dze nda rii!

¹⁵ Dzigo pquiab Jesús rëb me:

—jNazdpaa ntseeb to! Rquiaalo to ib peet dziin runde to dze rii. jPezhe ga waa run to zeene rsilaa to xcon to, rsilaa to xpurr to dze rii rieguie to ma nis? ¹⁶ Zha nac dzigo rzac to, nonguielda nu ben naa beenguiac naa wnaa rii, dze rii. Golwi ganle zha xtii Abraham nac me, len tsiimtson iz goc sca nosacsi mendox me.

¹⁷ Zha ne rlëe ga, zeene bin zho sca rëb me, ptoladz zho; laa grëraa zha ne ndxie ga, rley zho ran zho grëtaa milagr ne run me.

¹⁸ Blozh ga, bnee me rëb me:

—jZha ganle racnroob lo xtiiin Dios lo guidzliu rii? ¹⁹ Racnrooba gon zig rroob tib midz moxtaz ne ran zho dan rii. Tel midz moxtaza niicle tib midz winsew, zaatne racbniw, rrooba, raca tib yag nroob; haxta rie grë mguin riezhixcuaa ma zhiptsieez ma low.

²⁰ Ziaadaque gon gaca, zig ncobi. ²¹ Sac tel ncobiw, niipaquew rcots men wnaa tson lmud rin, ni dib nacle ncob co rzibe.

Zha ne ycaania Dios (Mt. 7:13-14, 21-23)

²² Laa Jesús no nëz zie me nëz Jerusalén. Guiedz ne rdedtaa me rseed me miech; zigtaa guiedz rrooba, zigtaa guiedz wina. ²³ Tib vuelt bnabdiidz tib zho lo me, dien pe zhis nac miech ne ycaania Dios. Dzigo pquiab me rëb me:

²⁴ —Nligaa zhis zho, sac masaque naca zig tib puert niase. Golsoxco sca niinasraa golsëeb xnëz me ycaania me to, sac zdziin dze ne nzian zho gacladz sëeb, per grielo-draaw. ²⁵ Deque laa men ne rnabey csioog ro yu, telne biaan to nëz ley, niicle cuedzraa to me gnab to siguiel me cخال me ro yu sëeb to, per cxaldræa mew. “Runbeyd naa to”, gnë me, “nand naa dien cho zha to.” ²⁶ Niicle guiab to runbey me to, biaadpaa me ladz to pseed me miech, haxta downie to me. ²⁷ “Laa naa nile”, gnë me, “runbeyd naa to. jGunnætraa to naa, ib rdziguieend naa grë miech yozh, miech ngoopdol ne nac to!”

²⁸ Mban gac to zeene gan to laa Abraham, laa Isaac, laa Jacob ni grëraa zha ne biadteed xtiidz Dios, laa me pcaania zho, laa to biance nëz ley. Nligaa mbandox gac to, zoon to, haxta zow lay to lo guielne co. ²⁹ Ni mazdraaw gon, zeene gan to pa lo guidzliu brieë grë miech ne bdziin ga, ine zobnie me zho lo xmez h me noyownie me zho. ³⁰ Grë zha ne rzac to niina peet nond, lëetse zha co yгаа guielnzaac co; laa grë zha ne rzac non zho niina, peet ygad zho.

Bzeet Jesús zha nac zha Jerusalén (Mt. 23:37-39)

³¹ Dze coquew, bdziin bla zha farisé rëb zho lo Jesús grieeniob me ga, sac laa Herod racladz gut me. ³² Dzigo rëbchaa me lo zho:

—Goltsie golguiab lo mëz win co cxecw me spalal, nadzese ni gzhe gunguiac naa miech nu, zigtaa zha ne rzacnëw, zigtagaa zha ne nosacsi mendoxa; gal widz guieñde naa nu. ³³ jNligaa nadzesew ni gzhe, widz laa naa gdziinle Jerusalén zaatne za naa! Sac ible Jerusalén, ga rut zho grëse zha ne riadteed xtiidz Dios lo miech.

³⁴ jAque tow men Jerusalén! jPe nacle squitaa nac to, rut to zha ne ziadteed xtiidz Dios lo to, rgoquie to grë zha ne rxeel me lo to? Bactaa gocladz naa niacnie naa to, nquiianaap naa to zig run nguid rgueedz ma xpëed ma, per bzhiguielde to. ³⁵ Gacnan to ganle, nadzetaa gon laa lidz to guiaan ngan, sac gandraa to naa, haxta gal dze ne guiab to: “jZha ndzontaa men qui pxeel Dios lo ne!”

14

Biac tib men ne rrieie gui

¹⁻² Tib dze ne rdziiladz zha Israel lo dziina, güey Jesús lidz tib zha farisé ne nac zha non, sac bredz zho me tib wagw lidz zho. Bdzinaque tib men bgui, rzacnë me, gdipse me no gui. Grëraa zha farisé ne ndxie ga, quialeets zho Jesús quiambëz zho dien pe zunguiac me mgui co. ³ Dzigo rëbchaa Jesús lo zho, ni lo grë maistr ley ne ndxie ga:

—Golnë dien, jpe nonguieñla gunguiac naa miech dze rii, te nonguielda ye?

⁴ Ni tib zho pquiabd. Horco pxobnia me guic mgui co, beenguiac me mgui. Blozhse bzonëz me mgui, ⁵ rëbchaa me lo zho:

—jPe nli na peet dziin runde to dze rii? Tel zha tsietsobe tib xpëed to, tib xmagaa to tib len guiuu dze rii, jniacxe tsiebeegazhde to xpëed to, tsiebeegazhdgaa to xma to ga?

⁶ Loxaque lo zho rac, ib bdziidz zho pe nquiab zho.

⁷ Grëraa miech ne nodziin ga, no zho rguib zho dien zha yгаа zho zaatne nzhixcuaaraa sob zho. Gon Jesús zha rac zho, dzigo bnee me lo zho, rëb me:

⁸ —Golguieñ gon, zeene znu cuedz miech to, zig nac tsie to tib wagw zaatne noyac tib

guiel⁹tsieel, ib gunde tsiesob to zaatne nzhix-cuaaraa. Sac gon, nenda glanso tib zha ne nonraa lo to, ⁹ lozh ga, laa zha ne bredz to lo lni guiaadliso to ga, gnê zho: “Guso i dien sob men rii.” Led tib guiel¹⁰to ga par to, racse to laa to tsieso ga, tsiesob to zaatne rialle ro beel. ¹⁰ Mazd ganle, zeene sca pa lo tsie to tib lo lni, ndooladz golgac, tib lad golsob. Zha ne bredzle to lo lni, zeene gan zho laa to zob ga, ziaad zho ziaad-xi zho to tsiesobnie zho to zaatne nzhixcuaa. Zha ne zoble lo mezh ga, zeene gan zhow, ziannziuu to lo zho. ¹¹ Gol¹¹soladz ganle: grê zha ne lëêque zha runnon zho, lel¹¹ riaanwin zho; laa zha ne riaanwin, runnon miech zho.

¹² Blozh ga, rëbcha me lo men ne nac lidz ga:

—Scaque luu gon, zeene cuedz luu miech guiaad zho tib wagw lidz luu, tsod luu loxaque zha ne ndzieeldiidz luu, loxaque zha bets luu, zha lidzse luu, lo grêga zha ne no gax lidz luu zha ne rapchense, zha cose cuedz luu; sac gon ib tedsod zbedzaque zho luu lo zhilni zho, stsire zho miñe been luu ga. ¹³ Mazd bredz grêse miech, zig nac zha ne guiend pe yquiiñ, zig nac zha ne guiend tib nia, zha ne guiend tib ni, zha ne roldga lo; ¹⁴ zeena gal dze ne grieeban grê zha ne bioxco wban zigne racladz Dios, iñe gley luu yгаа luu guiel¹⁴nzaac ne tsieguiel¹⁴ luu gneedz me lo luu.

¹⁵ Lad zha ne zobgrê me lo mezh ga, pquiab tib zho rëb:

—Dichos grê zha ne sca yгаа tsiesob lo mezh, tsietownie zho Dios zaatne rnabey me!

¹⁶ Pquiab Jesús rëb me:

—Tib men name, nzian zha ne bredz me tsie tib wagw lidz me. ¹⁷ Zeene gol¹⁷dze ne laa guiel¹⁷wagw co gac, pxeel me tib zhingundziin me zixi grê zha co. ¹⁸ Per pasê zho nie, zhaase zhaase ncuane pquiaqui zho. Tib zho rëb: “Grieeod sê naa, sac laa naa pca tib lë liu, ni lëêtse nadze no gaso naa low; bzhiguiel¹⁸ gudz lo me gun me naa dispenser.” ¹⁹ Stib zho rëb: “Niina wriin pca naa gaay nêz ngon, laa naa no ganie ma dien zha run ma dziin, gudz lo me yquiambêzd me naa.” ²⁰ Laa stib zho rëb: “Grieeod sê naa, sac niina wriin ptsieelnia naa, bzhiguiel²⁰ gudz lo me gacd guial²⁰ naa.”

²¹ Bdzin ngundziin co bzodiidz zho lo me zha rzê xtiidz grê zha co. Zeene bin mew, wbiñladz guic me, bnabey me zho güey zho dib lad guiedz güeyxi zho grê zha ne guiend pe yquiiñ, grê zha ne guiend nia, zha ne guiend ni, zha ne rold lo, grêse zho bdziñnie zho ga. ²² Blozh ga, rëbcha zho lo me: “Laa naa wbiñle xmandad luu gon, per scase nora zaatne cue miech.” ²³ Dzigo pxeel me zho stib, rëb me: “Güey dib ro guiedz, zha ne gdzieeltaa luu, dënie zho nêz rii, bloo guic

zho guiaad zho; ib none tsodzêse miech lidz naa. ²⁴ Sac grê zha ne bredz naa glo ga, ni lalnu racladzdraa naa yгаа zho guiel²⁴wagw rii.”

*Zha ne racladz sêeb xnêz Jesús
(Mt. 10:37-38)*

²⁵ Laa Jesús no nêz zie me nêz Jerusalén, miech guizhiu ne nal zhits me. Tibaque ptsire lo me bui me lo grê miech co, rëb me lo zho:

²⁶ —Lo grê to ne ziaadnal to zhits naa, gacnal to ganle zha ne racladz ygab xnêz naa, ib none gleynie zho miñe rnabey naa. Sac zha ne mazdraa rleynie pxoz, mazdraa rleynie xnïaa, mazdraga rleynie zho tsieel zho, xpêêd zho, bets zho, bziangaa zho, xquiel²⁶mban zhow, rquia zdoo zhow, peet xtsiind grê zha co par sêeb zho xnêz naa. ²⁷ Sac ni tib zha ne sca yquia zdoo cueeladz zho zho guiaadnal zho zhits naa, grieeod ygab zho lo naa. ²⁸ Antes ne yquiabladz to sêeb to xnêz naa, none wen wen sob to dien pe zleb to ted to miñe rieguiel²⁸ to. Zig nace tib zha ne gzaa tib yu glaa ne gac chop tson xcuaa, led rzobgash zho rbee zho cuent dien pe zгаа xtimi zho tsaalow. ²⁹ Sac gon nenda loxaque cueeze zhow, ni lozh ga grieeod gzaalo zhow. Miech ne gana laa zho gzhidznie zho, ³⁰ guiab zho: “Gol³⁰wi lo zha qui ganle, loxaque bleeze zho lidz zho, na blêbd zho nzaalo zhow.” ³¹ Scaque rey ne no tilnie stib rey, led none sobgash zho gan zho dien pe zleb tsii mil xmenguiib zho tsietilnie gal mil xmenguiib stib rey co. ³² Telne rgobey me lëbd me, laga bii zit ziaad stib rey co, rxeel me bla zha ne tsie tsienee dien zha gataa cuêz lo xtil zho.

³³ Scaque to nagon none glo gwi to pe nac grê ncuane no csaan to, parne grieeo ygab to xnêz naa. ³⁴ Sac gon zed ne nzhid, zpa dien yquiiina? ³⁵ Per ni par gaca beeb peet xtsiinda; miñe ractaaw, laaw rziaab. Zha ne no liaadz guien zho pe rnee naa, yquiaadiag zhow.

15

*Zha rzac Dios zha ne zozit lo me
(Mt. 18:10-14)*

¹ Zeene rseed Jesús miech, nzian grê zha ne rtop dimi ne razh lo zha Roma, ni grê zha ne rzoob miech nac zha yozh, ye zho rbig zho rquiaadiag zho zhiwseed me. ² Nacne grê zha farisé ni grê maistr ley, rneenê zho me, rnee zho lëda ga run me sca rtsieelsa me grê zha co, rownie me zho. ³ Dzigo bnee me lo zho, rëb me:

⁴ —Togase nadien, gzoob ne quanie to tib gayoo mëcwxiil, ni lega naclew rziaab tib ma, zha dien run to? Led rsan to ma ne ndxie lo to ga lëê, laa to rie rieguiñ to ma ne bziaab ga, haxta rdziel to ma. ⁵ Zeene rdziel

ma lo to, lo guielbley co haxta rxobyayn to ma rziznie to ma ro yo. ⁶ Lëëled rzodiidz tow lo zha ne ndzieeldiidz to, lo zha ne no gax lidz to, sac rley to laa xpëcwxiil to brieequia. ⁷ Gni naa lo to ganle, scadaa nagon rzac Dios, tib guielbley nrooba lo me, zeene ran me laa tib zha ngoopdol rsaan xquielntseeb, laa zho rbig lo me. Ne nligaa tib guielbley rac zha co lo me, lëdle zha ne rzac miech wenle nac zho lo me.

⁸ 'Zig rzacga laa tib men wnaa, gzoob ne nzen me tsi gayoo pes, ni lega naclew rsëeb me tib gayoow, zha dien run me? Led hor cogazh lëë rquiaa me biini, rsilo me dzega dzega rloob me len lidz me haxta rdziel me dimi co. ⁹ Zeene rdziel mew, rley me rzodiidz mew lo grë zha ne ndzieeldiidz me, lo grë zha ne no gax lidz me. ¹⁰ Zig rne naa ga, scadaa nagon rzac grë xanjil Dios, tib guielbley nrooba lo zho zeene ran zho laa tib zha ngoopdol rsaan xquielntseeb, laa zho rbig lo Dios.

¹¹ Dzigo psilo Jesús bzodiidz me tib cuent lo zho, rëb me:

—Tib men name quianie me chop mëëdbgui. ¹² Tib dze, rëb zha ne nac zha niab lo me: “Papá, tel pe nac ncuaañe no gneedz luu lo no, bzhiguiel niinaga beengrola, zeene gneedz luu mine raguijal naa.” Dzigo beengrol me ncuaañe rap me, bdeed mew lo zho.

¹³ 'Zhisaque goca, pto zha niab co grëse ncuaañe bial zho, briece zho laa zho zie. Bdzin zho stib dan, ga been zho grë guelyozh ne gocladztiaa zho, grëse xtimi zho pxin zho ga. ¹⁴ Tibaque zeene laa xtimi zho blozh, mbanse rac zho guendraa pe gow zho, ni lëëtaque len dze co laa tib gbin psiloque nëz co. ¹⁵ Dzigo race zho guelyguib zho dziin lad guiedz co, ga brieequia tib men co bree zho, pxeel me zho yquiaanap zho nguts. ¹⁶ Lo gbin ne noded zho ga, rzac zho tebaa cho gdeed maase grë duuzhye dan ne row grë nguts co gow zho, per ni min co choot rdeete lo zho.

¹⁷ 'Sca no zho ga, tibaque zeene biao zho biini psoladz zho nzian zha ne quia dziin lo pxoz zho, grë ncuaañe raclow row grë zha co, haxta riaana, ni laa zho sca noded ga; rëbchaa zho: ¹⁸ “Mazd mine naca laa naa guia gdziin naa lo pxoz naa stib, guiep naa lo me gun me naa perdon grëtaa falt ne ben naa lo me, falt ne bengaa naa lo Dios. ¹⁹ Maase sacdraa me naa zig xpëed me, siguiel me ycaania me naa gac naa zig tib zha ne quiaze dziin lo me.” ²⁰ Horco bio zho nëz laa zho zey nëz lidz pxoz zho. Zitraa ziaad zho laa me gonle zho, pquia zdoo me zho gon me zha rac zho; rias me güeydzieelo me zho bnaaz me nia zho, bdeedz me zho.

²¹ “Papá”, rëb zho lo me, “rien naa nroob falt ne ben naa lo Dios, bengaa naa lo luu. Rieguijal draa sac luu naa zig tib xpëed luu.”

²² 'Ni blëzd me nlozh nee zho, lëëled bredz me zha ne quia xtsiin me, rëb me: “iNa gohtënie tib nëz lar wen nu gacw xpëed naa! iGohtënie tib nil wen tso nia me, tib nëz guielguid cub yquia ni me!” ²³ Bnabey me zho güeyxi zho tib ngon ne mazdraa ndaan, beet zho, rëb me: “iib none gac tib lni, none dioow ne, none dio ne! ²⁴ iSac gon gun naa cuent, brieeban xpëed rii naa! iBnitte me ga, na laa me bdziel!” iLaa lni psilo!

²⁵ 'Lni co noyac, zeene laa stib xpëed me zha ne nac zha gol ga, wbiro lo dziin dan. Bdzin zho gax ro yu, rlu rquia di, haxta wiee rlu noyac; ²⁶ dzigo bredz zho tib zha ne quia dziin lo pxoz zho ga, bnabdiidz zho dien pe lni ne noyac. ²⁷ Dzigo rëbchaa zha co: “Bets luu blanso, gane squitaa bnabey pxoz luu noyac lni; rley me gon me mban zho laa zho blanso. Bnabey me gut tib ngon ne mazdraa ndaan.” ²⁸ Blëë zha gol co bin zhow, lo guielblëë co bzëëbd zho ro yu. Nacne briece pxoz zho, bnee me lo zho sëeb zho ro yu. ²⁹ Dzigo rëbchaa zho lo me: “iLëdraaw i gon papá noyun luu! Bui ganle blactaa iz ne quia yun naa dziin lo luu, wlalaa gard quits naa tib xtiidz luu. Ni zha rna tib dze, siquier tib chiv yeen ygad luu lo naa, gownie naa grë zha ne ndzieeldiidz naa. ³⁰ Cho dzigo nac zha qui, blozhse güeyloozh zho xtimi luu lo grëtaa guelyozh ne been zho, na no luu beet luu ngon ne mazdraa ndaan, noyun luu zhilni zho.” ³¹ Dzigo rëbchaa me lo zho: “Nliw xin, ni lalnu gard csaan luu naa, gacxe waa grëtaa ncuaañe quianie naa, luu guiaañiew. ³² Per niina ne laa bets luu blanso, ib nonguiela znu dziuun ne tib lni gleynie ne me; sac gon bnit me, ni na laa me bdziel. iDziuun ne cuent brieeban me nu!”

16

Ligier miech par lo guielntseeb

¹ Tib vult bzodiidz Jesús tib cuent lo xpëëdsuel me, rëb me:

—Tib men name nroob rapchen me, quianie me tib zha ne zo lo grëtaa ncuaañe rap me; tib dzew, lega nacle bded diag me zhliian noxin zha co xtimi me. ² Dzigo bredz me zho, rëb me lo zho: “Lëda i gon squi run luu, lega noxin luu xtimi naa. Niinaga racladz naa guiaadnie luu cuent nu dien zha quia yun luu dziin; sac grieelodraa so luu lo grë ncuaañe rap naa.”

³ 'Wbiro zho ga, rëb zho: “Zha na ganle gun naa, telne guiab ne ga naa dziin dan, lëbdraa naa gun naa dziin co; tel guiaabga ne na ga naa gatop naa gon, rtoladz naa gnab naa gon lo miech.” ⁴ Tibaque zeene biab guic zho rëb zho: “iLaa naa bienle zha

gun naa, zeena tso zha ne gun xyudar naa zeene laa naa grie lo xtsiin men rii!”

⁵ Dzigo psilo zho bredz zho zha ne quia guielqui lo men ne quia zho xtsiin ga. Bdzin tib zha co bnabdiidz zho lo zho dien palal nzëeb zho lo me. ⁶ Rëb zha co: “Tib gayoo tamb nceit nac mine nzëeb naa lo me.” Dzigo rëbcha zho: “Nliw, lalga quia lo tib val ne psan luu nu. Ledaa val co nu, zac ctsieez luuw; bzhixcuua stiba, pquiaa lo co, groj tamba zëeb luu.” ⁷ Bdzinaque stib zha co, bnabdiidz zho lo zho dien palal nac xquielqui zho lo men co. Zha co rëb zëeb zho tib gayoo sac zhobxtil. Dzigo rëbcha zho: “Nliw, lalga raquiet lo val ne psan luu; per na zac ctsieez luu min rii, bzhixcuua stiba, pquiaa lo co tapgalaque saca zëeb luu.”

⁸ Zeene bien men co zha noyun zho, bzee zdoo me gon me scataa ndzielguic zho. Ncuua ne ntoladza, per grëse miech ne ziana ncuua lo guidzliu rii, ndzielguic zho par gun zho grë guielntseeb. Par min co ndziibraa ndzielguic zho lo zha ne no xnëz Dios. ⁹ Sañgue to gzoobladzde to gun to min co, ncuua ne rap to lo guidzliu rii, golquiina per par gun to xyudar samech to. Zeene laa ncuua ne co grë, nenda zacnie zho to, per mine mazdraa non Diosi ible zacnie me to, zneedz me tib lugar ndzon cuëz to, led yedraa ga pe nitlo.

¹⁰ Zha ne ndzinli rundziin tel palal yeene ncuua ne riaanne zho, scaque ndzinli gundziin zhow zeene guiaanne zho nrooba. Laa zha ne ndzinlid, mine gon zho zeene guiaanne zho ncuua ne zhis, mincoque gun zho zeene guiaanne zho ncuua ne nroob. ¹¹ Nana zha ne sca gac ne ndzinlise gundziin zho ncuua ne no lo guidzliu rii, zha dzigo grieeo gundziin zho ncuua ne ndzon ne gdeed Dios lo zho zaatne no me? ¹² Stiba, tel sca ndzinlide to lo chen ben, zpe naczhe ncuua ne gun to tib ncuua ne chenpaa to? ¹³ Golgona ganle, grieeod gon gleynie to dimi ni gleynieque Dios. Ib none telne Dios rlyenie to, me none gleynie to, togo dimigaaw, dimi golleynie.

¹⁴ Grë zha ne nac farisé zeene gon zho sca rnee me, lel rzhidznie zho me, sac tel zhaw rlyeniedox zho dimi. ¹⁵ Dzigo rëbcha zho lo zho:

—Masaque rzac to nalëe nli miech wen nac to nëz lo Dios, sañgue me gon, wen wen nan me zha nac zdoo to. Nli miech ne ran to, zha wen rzoob zho to; sañgue Dios ni lalnu rzacd zdoo me mine run to.

¹⁶ Len dze ne gard guiaad Juan Bautist, niapse xley Moisés ni grë mine bnee zha ne biadteed xtiidz Dios, min co nac mine güeynal to. Per zeene psilo Juan pseed me miech, desde hor co laa miech quiaacnan stib mod ne grieeo yгаа zho zaatne rnabey Dios; gane na nzian zha ne noxco yгаа lugar

co. ¹⁷ Per guiabde to togo nondraa ley, sac grëse mine zhobnee lo ley, jib laaw none gac! jzig nac guidzliu, zig nac gbaa zrieelo nitlow, sañgue ley nitloda, tibaque naca! ¹⁸ Gacxe waa, grë zha bgui ne rsëbtsieel niina ni rtsieelnia zho stib wnaa, zha ne rtsieelni-agaa tib wnaa ne psëëbtsieel, dol ga quiaayun zho; zigtaa dola padzeela, scaque niina dola.

Xcuent tib zha prob lë Lazh

¹⁹ Tib ricw name —rëb Jesús—, niapse grë lar niazh racw me, gzobse dze run me lni lidz me. ²⁰ Zaatne noque me ga, guiedz co no tib zha prob lë Lazh, lala prob me ni rlanaque me guiedz, gdipse lad me noy-acnë guiedz co. Riese me riesob me ro lidz zha ricw co, ²¹ rquiambëz me dien pe grieeod gow me maase ncuua ne rriee-gaale lo xmezhen men co; ga zob me haxta rdzin grë mëcw rzëeludz ma lo guiedz ne rlan me ga.

²² Bdzin dzew laa Lazh gut, dzigo biet xanj Dios beynie zho me lo Abraham, za-atne rdzin grë zha wen. Goc palal dzew, laa men ricw co gutaque, blozhse pquianap zho me, laa zho güeyqueets me; ²³ zeene biao me biini laa me nole gabil. Lëbdraa me no me lo guielnë co, lega naclew blis lo me, zit squi gon me Abraham, laa Lazh zobnie Abraham ga. ²⁴ Horco bnab me lo Abraham siguiel Abraham cxeel me Lazh, maase guic mzhugniase Lazh yquiaa Lazh nis tsiegadz Lazh lo ludz me; sac lëbdraa me lo guidox ne no me ga. ²⁵ Dzigo rëbcha Abraham lo me: “Xin, psoladz ganle zeene wban luu lo guidzliu, ncuua ne gocladztaa luu pquianie luuw; laa Lazh mbanse bded me. Nagaa na, me nac men ne nogaa noyan guielbley, laa luu bgaa squi no luu lo guielnë qui. ²⁶ Stiba, zha ne no nëz rii gac guiaad zho i, niicle zha ne nogaa iw, gac guiaad zho nëz rii; sac no tib yeedox ne rtse.” ²⁷ “Bzhiguiel sca”, rëb men ricw co, “pxeel Lazh tsie me lidz pxoz naa, ²⁸ tsienie me diidz lo zgaay bets naa zha ne biao, guiab me lo zho ib gund zho mine ben naa, zeena guiaate zho nu yгаа zho lo guielnëdox rii.” ²⁹ Pquiaabcha Abraham, rëb Abraham: “Tel mincow, tsow glab zho lo grë ley ne psan Moisés, lo grë mine bnee grë zha ne güeyteed xtiidz Dios, benque lo co zhobnee zha no gban zho.” ³⁰ “Nliw”, rëb me, “per tel squi tib men ne gutle tsie tsienee lo zho, rien naa znuse csaan zho xquielntseeb zho bgib zho lo Dios.” ³¹ Dzigo rëbcha Abraham: “Telne rond zho mine rnabey grë ley ne psan Moisés, grë mine bnee zha ne güeyteed xtiidz Dios, scaque gond zho diidz niicle tsie tib zha ne brieebanle tsienee lo zho.”

17

Zha ne guñtal xtol stib zho

(Mt. 18:6-7, 21-22; Mr. 9:42)

¹ Tib vuelte rëb Jesús lo xpëédscuel me:

—Nac lo guidzliu rii, ib gunfalte ncuuaane rrogui miech guñtal zho xtol zho, iper prob-saxe zha ne rquiiil samiech runctal zho xtol zho! ² Mazd zhi guielnëw lo zho ygadoo tib quie molin zhobxtil yan zho tsieron zho zho nisdoos, lëdle guielnëdox ne gan zho; sac gon dol nroob ga gun zho yquiiil zho zha ndooladz ne no xnëz naa. ³ ¡Golguien sca ndzinli golgac! Tib bets tow, zeene pe tib falt gun zho lo to, golnee lo zho gundraa zhow; telne gnab zho perdon, golgun zho perdon. ⁴ Niicle telne nzian vuelte sca gun zho falt lo luu tib dze, been zho perdon zeene laa zho rbig rnaab zho perdon lo luu.

⁵ Stib dzew, rëb zha ne rzënie me lo me:

—Bneedz guiebini lo no dib zdoora no gnalo no Dios.

⁶ Pquiab me rëb me:

—Tel niaca miñe gzoob ne rnalote to Dios siquier lal tib midz moxtaz, niicle ncuuaane mazdraa ngañ gnab to lo me, zun mew.

⁷ '¿Pe ran to ganle, zha nac zha ne run xtsiin ben? Zeene rbire zho dan, yase güey zho gon, güeyгаа zho güeyquianap zho ma, pe liaadz men ne quia zho xtsiin ga, guiab me lo zho: "Na bded, zbob, zeena gowxtsee luu." ⁸ Mine run me, gloque rnaabey me zho gunlo zho ncuuaane gowxtsee me, gdziib zhow lo me; rlozhras row me, dzigoraa rowxtsee zho. ⁹ Niicle scataa ron zho miñe rnaabey me, ni rlozh ga, per ni xquizh rdeete me lo zho. ¹⁰ Scaque to nagon, zeene lozh gun to grë dziin ne pso Dios to gun to, peet yquiambëzde to, golguien tib ngundziinse nac to, miñe rieguial to ga, min co been to.

Biac tsii zha ne rlan guiedz lepr

¹¹ Laa Jesús no nëz zie me nëz Jerusalén. Laa me zieded tib guiedz win ne riaan zatne ndzieel xtan Samar xtan zha Galilé, ¹² zeene brieequia tsii zha ne rlan guiedz lepr. Zit zo zho, ¹³ nguiedz rbedz zho me, rnaab zho lo me yquia zdoo me zho. ¹⁴ Zeene gon me zho, rëbchaa me lo zho:

—¡Goltzie, goltzielulo lo pxoz, zeena gan zho ganle laa to biacle!

Dzigo laa zho zie. Nëz no zho laa zho biaanmbe lo guiedz co. ¹⁵⁻¹⁶ Lo gza zho, hor co rias tib zho wbiere, nguiedz rnee zho:

—¡Zha ndzontaa Dios! ¡Golwi ganle laa me beenguiacle naa!

Zigne bdzin zho lo Jesús, pquitsgzhib zho lo me, haxta bdzin lo zho lo liu, rdeed zho xquizh lo me. Tib zha Samara, zha zit nac zho. ¹⁷ Dzigo rëbchaa Jesús:

—¿Yoraazhe grë zha co waa? Conque tsii zho name beenguiac naa. ¹⁸ ¿Tibaque zha zit

rii dzigo lëe rzac zdoo miñe been Dios lo zho?

¹⁹ Dzigo bliso me zha co ga, rëb me lo zho:

—Porne dib zdoo luu gon bnalo luu Dios, gane biac luu. Bzë, peet tsieniedraa guic luu.

Zeene gbiere guiaad Mgui ne pxeel Dios

(Mt. 24:23-28, 36-41)

²⁰ Tib dze bnabdiidz zha farisé lo Jesús, rëb zho:

—¿Poc dzigo csilo gnabey Dios lo ne?

Dzigo pquiab me rëb me lo zho:

—Gacnañ to ganle, nacd min co ncuuaane ganlopaa miech. ²¹ Grielod guiab zho laaw psilo nec, laaw psilolegaa nëz rii; sac gon tel niina laa me quianabeyle nu.

²² Bded ga, rëbchaa me lo xpëédscuel me:

—Zdizin dze, gacladz to tebaa zha znu so naa lo to maase tibaque dze, per gacdraaw.

²³ Len dze co, zio zha ne gnë lo to: "Goltrë ganle laa Mgui ne pxeel Dios bdzin nu"; gnëгаа zho pa stib lugar none tsie to par gan to naa; tsienalde to, gliladzde to xtiidz zho. ²⁴ Sac zeene gbiere guial naa, grëse miech gana. Zig nac tel quiab tib belye nroob ne glu zhan gbaa desde nëz ne rlan ngbidz haxta nëz ne rzëeb ngbidz, zniacxe gand grëse miecha? ²⁵ Per ansraa ne gac min co, ible nroob guielnë ne cteed miech rii naa, ni lalnu gandzed zho naa. ²⁶⁻²⁷ Len dze ne guial naa ga, grë miech ne ndxie lo guidzliu gal hor co, zhaa grë ncuuaane tsonie guic zho. Rsoladz to ganle zha rac miech len dze ne biaad Noé, lel lo grë zhilni zho no zho, zha ne notsieelnia, zha ne nobediin xpëed, tibaque zeene biaa zho biini laa guiedox co psilole. Laa Noé nole len barcw, laa zho biaan grëse zho bnitlo lo nis co. Scadaa nagon no miech len dze ne guial naa. ²⁸ Zig racгаа miech Sodom len dze ne brie Lot ga. Scaque, loxaque ncuuañ lo guidzliu rii noxco zho, zha ne no lo zhilni, zha ne no zhiwto, zha ne nozigaa, zha ne quia gon, zha ne quiazhixcuaagaa lidz. ²⁹ Lega naclew, zeene laa Lot brie, hor co laa tib guidox biet gbaa, notsa zufr bliaala lad guiedz co, grëse miech co bnitlo lo guidox co. ³⁰ Scapaa nagon rac miech ne ndxie lo guidzliu len dze ne laa naa guial.

³¹ 'Zha ne lëetaque hor co no glaa guic yu, ib guiabd zho sëeb zho len yu tsiebee zho ncuuaane no len lidz zho, zha ne quiaagaa lo dziin dana, ib guiabd zho gbi zho guey zho ro yu. ³² ¡Golsoladz ganle zha bzhaac wnaa ne goc tsieel Lot! ³³ Grëse miech, zha ne sca rquianë zdoo grë ncuuaane rap zho, ible znitlo zho xquielmban zho; sangue zha ne rquiad zdoo grë ncuuañ co, haxta xquielmban zho rbeeladz zhow, nitlod zho. ³⁴ Gal hor co, zaatne tipse nixguies chop zho, tib zho sënal zhits naa, laa stib zho

guiaan. ³⁵⁻³⁶ Zaatne tipse quiayot chop wnaa, zaatne tipsegaa quia chop mgui lo dziin dana, tib zho sēnal zhits naa, laa stib zho guiaan.

³⁷ Dzigo rēbchaa xpēēdsuel me lo me:

—¿Pa lo dzigo gdziñ grē zha co?

Pquiab me rēb me:

—Horco bii zlu ganle paw. Zig nac grē pech, zaatne nix magut ga rdziñ ma.

18

Zha ne rnab lo Dios

¹⁻² Stib dzew, bzodiidz Jesús tib cuent lo xpēēdsuel me, par guieñ zho ib guiaannd zdo zho zeene racniobd miñe quianab zho lo Dios, rēb me:

—Tib guiedz name, no tib men co nac me wxtis, ni palal rquiad zdo me samiech me, per ni Dios rdziehd me. ³ Guiedz coque no tib zhuz viud, gzobse dze rie zhuz co rienab zhuz guñ me guielwxtis, cuedz me tib zha co riēē lo zhuz. ⁴⁻⁵ Glo ib rquiaa-diagd me miñe rnab zhuz co, per zeene goc palal dze gon me tibaque quia men co quianab me gac guielwxtis, dzigotaa rēb me: “Ncuaañe lēbdraa gac zaa lo men rii, tibaque squi quia me. Nli rdziehd naa Dios, niicle nodgaa naa liaadz pe rzac miech, per parne guiadgunneetraa me naa, miñe naca mazd laa naa guñ guielwxtis ne rnab me.”

⁶ Blozhse bzodiidz Jesús cuent co, rēbchaa me lo zho:

—Telne sca bdziñ dze ne pquiaadiag zha ntseeb co miñe bnab wnaa viud co, ⁷ ¿pe lel Dios dzigo yquiaadiagd xtiidz zha ne ngab lo me, tel tibaque gnab zho miñe racladz zho? ⁸ ¿Nligaa, ib tedsod zun me miñe rnab zho! Per segur zhis zho quiambēz gac xquielwxtis me, zeene laa naa guial stib.

⁹ Laa grē zha ne riats, zha ne rzac masaque zha wen nac zho nēz lo Dios, haxta rbix zdo zho ran zho grēraa miech, bnee Jesús lo zho, rēb me:

¹⁰ —Chop zha name, bdziñ zho len yadoo ziezodiidznie zho Dios. Tib zho nac zha farisé, stib zho nac zha ne rtop dimi ne razh lo rey Roma. ¹¹ Zha ne nac farisé ga, psilo zho rnee zho: “Dios, rnedz naa xquizh lo luu, sac nacd naa zigne nac grē miech ngoopdol, zig nacsē zha ne zo i. Wlaltaa rund naa guielgbaan, rund naa guielntseeb, niicle rquiangoobd naa stib wnaa. ¹² Haxta chop vult rcuan naa tib len zhmal, grēse ncuaañe run naa gan, run naaw tsi lal, rnedz naa tib lal miñe rieguial luu.” ¹³ Laa zha ne rtop dimi ne razh Roma ga, gaxaque ga zo zho, per nquiitrunse zho liu. Mban rac zho, quiase nia zho zdo zho, rnee zho lo Dios: “¿Dios, rnab naa lo luu pquia zdo naa znutaa miech ngoopdol nac naa!”

¹⁴ ¿Gneli naa lo to ganle —rēb Jesús—, mazdraa gon wen biaan recaudador co lo Dios, lēdle zha farisé co. Sac zha ne lēēque zha runnon zho, racnond zho lo Dios, laa zha ne rriañwin, runnon me zho.

Beenlay Jesús mēēdlas

(Mt. 19:13-15; Mr. 10:13-16)

¹⁵ Tib dze, nzian men ne bdziñ lo Jesús, bdziñnie zho xpēēdlas zho lo me, parne cxobnia me guic win gunlay me win. Grē zha ne nac xpēēdsuel me, lel psilo zho ndox zho lo grē zha ne bdziñnie grē mēēdlas co. ¹⁶ Zeene gon me sca quiayun zho, dzigo bredz me zho, rēb me lo zho:

—¿Ctsirede to grē mēēdlas yeen qui! ¿Golsaan quiaad win lo naa! Sac gon grē mēēdlas yeen qui, ni zha ne nac zig nac win, zha co nac zha ne sēēb ygab lo Dios. ¹⁷ Nligaa zha ne gacndooladz, zha ne gliladz dib zdo, zigne run grē mēēdlas, grielod gdziñ zho zaatne rnabey Dios.

Ncuaañe run dimi

(Mt. 19:16-30; Mr. 10:17-31)

¹⁸ Tib vult, wbig tib men ne nac zha non lo menquiedz Israel, rēb me lo Jesús:

—Nan naa luu nac tib men ne noseed miech, ni tib men wen nac luu, ¿bnē lo naa dien, pe nac miñe guñ naa parne grielo yгаа naa guielmban ndzon ne gdziñd dze lozh?

¹⁹ Pquiab Jesús rēb me:

—Rnee luu lēē tib miech wen nac naa. ¿Nligaan, Diosse gon nac men wen! ²⁰ Telne nli racladz luu yгаа luu guielmban co, none tsoxco luu gban luu zigne nac Xley Dios. Nanle luu ganle zha naca, rneew: Tsonied luu zha ne led tsielld luu, gute luu samiech luu, cuand luu samiech luu, yquiadiidzguizhd luu samiech luu.

Gon pxoz luu, gon xniaa luu, cued luu xquielto me.

²¹ Dzigo rēbchaa men co:

—Maestro, grēse miñe bzeet luu i, ni tiba gard quits naa wlal ne nac naa zha nguieg.

²² Horco rēb Jesús lo me:

—Stibaque miñe rquiin gun luu. Güey, güeyto grēse ncuaañe quianie luu, dzigo bdiiz dimi co lo grē zha mban ne guieñd pe yquiin; sca nroobraa guielnzaac ne yгаа luu gbaa. Lozh ga, dē, dēnal zhits naa.

²³ Zeene bin men co sca rēb Jesús, mbanse rac me laa me zey; sac nroob ncuaañe quianie me. ²⁴ Dzigo rēbchaa Jesús lo xpēēdsuel me:

—¿Zha ngantaa lēē, rzac zha ne squi rapchen sēēb zho xnēz Dios gnabey me zho! ²⁵ Mazd ngandse rded tib camell guieer guzh.

²⁶ Grē zha ne ndxie ga, zeene bin zho sca rēb me, rneechaa zho:

—Telne scataa ngañ sèëb miech xnèz Dios, ÷chösezhe dzigo waa nac zha ne zrieelo sèëb xnèz me?

²⁷ Dzigo rëbchaa Jesús:

—Nligaa par miech, zootle tsod zha ne grieelo sèëb xnèz me; sangue me nañ me no zho. Sac tel me, tsod ncuaañe grieelod gun me.

²⁸ Horco pquiab Pedr, rëb Pedr lo me:

—Tel no, grë ncuaañe rdziaapwe no psan now, laa no ziaadnañ zhits luu.

²⁹ Pquiab me rëb me:

—Golgacnana ganle, grëse zha ne psan lidz, psan zho tsiel zho, psan zho xpëed zho, psan zho pxoz zho, psan zho xniaa zho, psan zho bets zho, bziangaa zho, porne bzëëb zho xnèz Dios, ³⁰ na lo guielmban ri-ique, mazdraa nroob miñe gan zho, ni lozh ga ib tedsod zgaa zho guielmban ndzon ne gdziñdraa dze lozh.

Bzeet Jesús stib zha csacsi miech me
(Mt. 20:17-19; Mr. 10:32-34)

³¹ Ne sca no Jesús nêz zie me nêz Jerusalén, tibaque bredz me gza tsiipchop zha ne rzëniëpaa me ga, bzeet me lo zho zha gun miech me, rëb me:

—Grëse miñe bzeetle zha ne biadteed xti-idz Dios padzeela teed naa, niina ne laa ne gdziñ Jerusalén, laaw gac cumplir. ³² Ga gnaaz zho naa, tsielo zho naa ladznia grë zha ne nacdraa zha Israel, xidznie zho naa, squiaago zho naa, stsuc zho lo naa, ³³ zgüin zho naa, ni haxta zut zho naa. Per zeñe gac tson ngbidza, zriebaan naa.

³⁴ Per ib biend zho dieñ zha nacne sca rnee me.

Biac tib zha ne rold lo
(Mt. 20:29-34; Mr. 10:46-52)

³⁵ Laa Jesús bzëëb ro guiedz Jericó, miech guizhiu ne nañ zhits me. Ro nêz co zob tib meñ ne rold lo, rnab me gon. ³⁶ Zeñe bien me rlu nzian miech noded ga, dzigo bnabdiidz me dieñ pe nacne scataa ziaad grë miech co ga. ³⁷ Dzigo rëb zho lo me, Jesús, meñ Nazaret ziaad ga, zhits me ziaadnañ grë miech co. ³⁸ Horco psilo me nguiedz rbedz me, rnee me:

—iJesús, meñ xtií rey David, pquia zdoo naa!

³⁹ Grë zha ne ner, psilo zho ndox zho lo me parne guioog ro me, per lel hor cole nguiedzraa rbedz me Jesús, rnab me yquia zdoo Jesús me. ⁴⁰ Nacne zeñe bdziñ Jesús gax zaatne zob me, blëz Jesús, bnabey Jesús güeyxi zho me. Bdziñ me lo Jesús, rëbchaa Jesús lo me:

⁴¹ —iPe nadien gun luu naa?

Pquiab me rëb me:

—iRacladz naa guiac lo naa!

⁴² Dzigo rëbchaa Jesús:

—iNiinagazh gon laa luu gan stib! Laa luu biac, sacne dib zdoo luu bnalo luu naa.

⁴³ Horcogazh laa meñ co psilo bui, ine rley me roolnie me Dios, laa me zienañ zhits Jesús. Haxta grë miech ne zienañ ga, zeñe gon zhow, ye zho roolnie zho Dios.

19

Güey Jesús lidz tib meñ lë Zaquew

¹⁻² Guiedz Jericó, ga no tib meñ ne rnabey lo grë zha ne rtop dimi ne razh lo rey Roma, lë me Zaquew. Zeñe laa Jesús zieded lad guiedz co, ³ brieë me, ziewi me, sac racladz me gunbey me Jesús. Bdziñ me, pasëse me gan me Jesús, sac lala miech guizhiu ne nañ zhits Jesús, ni lala ndopse me. ⁴ Miñe been me, rias me bdedner me güeytsep me tib lo yag guigw zob ro nêz co, par gdeeda diidza gan me Jesús, zeñe laa Jesús ted ga. ⁵ Zeñe laa Jesús bded ga, blis lo Jesús gon Jesús laa me zob ga, dzigo bredz Jesús me, rëb Jesús lo me:

—Zaquew, na zeña biet i. Sac racladz naa, lidz luu cuëz naa nadze.

⁶ Rley Zaquew gon Zaquew sca rëb Jesús, lëëled biet me lo yag co, laa me zienie Jesús nêz lidz me.

⁷ Zeñe gon grë miech cow, rlëë zho, rnee zho:

—iPe lëëtaa lidz zha ngoopdol qui ziebëz me!

⁸ Laa Zaquew, ine rley zobnie Jesús. Tibaque bzoli Zaquew, rëb Zaquew:

—Gacnañ luu gon, lo grë ncuaañe rap naa, laa naa gded goñla ygaaz lo grë zha ne guiend pe yquiin, ni tel nogaa zha ne ndzi-ibraa miñe beenquizh naa zho, naa maase ctsiree naa tap lal miñe blan naa zho ga.

⁹ Horco pquiab Jesús, rëb me lo zha ne ndxie ga:

—I nagon rlu laa meñ qui wbigle lo Dios, parne ycaania Dios me. Nli zha xtií Abraham nac me, per bzonziaab me ¹⁰ ni naa ne nac naa Mgui ne pxeel Dios, ible laa naa zial zialsilaa naa grë zha ne zonziaab.

Zha ne biaanñie dimi

¹¹ Grë miech ne zienañ zhits Jesús ga, rzac zho zigne laa me gdziñ Jerusalén, laa me sob gac me zhirey zho; nacne bzodiidz me tib cuent rii, rëb me lo zho:

¹² —Tib xpëed zha non name, no me tib guiedz win, nacle diidza laa me no tsie zaatne zob meñ nroob ne rnabey, parne gzo zho me gac me rey guiedz ne no me ga. ¹³ Zeñe laa dze co bdziñ, dzigo bredz me tsií zha ne quia xtsiin me, nroob dimi ne psan me lo zho tib tib zho, parne gunziin zhow, mientras gbire me.

¹⁴ 'Nzianlaa zha ladz me, rlëë zho ran zho me, dzigo pxeel zho bla zha ne güey lo meñ ne rnabey ne zie me ga, güeynaab

zho gdeete meṇ co dziin co lo me. ¹⁵ Per niicle sca güey grê zha co, peet brieelod niun zho. Blozhse bzo rey co me, laa me bdziṇ ladz me. Zeene bdziṇ me, bredz me gza zha ne biaanne xtimi me ga, par dien palal yaca. ¹⁶ Bdziṇ tib zho, rêb zho: "Laa xtimi luu nu gon, tsii lal miṇe psan luu ga naca niina." ¹⁷ Rley me rêb me lo zho: "¡Zha squi nagon racladz naa! ¡Wen brieequia xtsiin luu! Niicle zhis ncuane psan naa lo luu, per bien luu niowse bendziin luuw. Na nagon, laa naa gzo luu, gnabey luu tsii guiedz." ¹⁸ Bdziṇ stib zho, rêb zho: "Laa xtimi luu nu gon, gaay lal mine psan luu lo naa ga naca niina." ¹⁹ Scaque rley me. Bzo me zho gnabey zho gaay guiedz. ²⁰⁻²¹ Zeene bdziṇtaa tib zho, rêb zho: "Ni bendziin naa xtimi luu, sac nanle naa zha nac luu, nicle paraa niundziin naaw, grêse miṇe niuna gan lo luu niaana; gane mazd pquia naaw tib lê lo lar, blootsow naaw, ledaaw nu." ²² Blêë guic me, rêb me lo zho: "¡Biche nu, paat rquiind naa miech yozh ne squi nacl Conque nanle luu zha nac naa, ²³ ¿pex nac dzigo waa bioxad luu maase mbediin luu dimi qui, ndziniaaw palal ncaania naaw niina?" ²⁴ Dzigo rêbchaa me lo grê zha ne ndxie ga: "Niinagazh golcob dimi qui nia zha qui, goldeeda lo zha ne ziaadnie tsii lala i." ²⁵ Pquiab zho rêb zho: "Per pe nacre zha coque ycaaniaw, ni nrooblew beenlo zho." ²⁶ "¡B sca no gaca", rêb me, "sac zha ne rien zha gundziin zho ncuane rcaania zho, nroobraa ncuane ycaania zho. Laa zha ne squi nac, haxta miṇe pcaaniale zho, zdiooba lo zho. ²⁷ Sangue zha ne sca ptsidil niac naa rey, goltsixi zho, niinaga racladz naa ganlo naa gut to zho."

Bdziṇ Jesús Jerusalén

(Mt. 21:1-17; Mr. 11:1-11, 15-19; Jn. 2:13-22; 12:12-19)

²⁸ Blozhse bzodiidz Jesús cuent co lo zho, laa zho bio nêz stib, nerse me lo zho. ²⁹ Zeene bdziṇ zho gax Gui Oliv, zaatne ndxie guiedz Betfagé ni guiedz Betain, pxeel me chop xpêedsuel me, ³⁰ rêb me lo zho:

—Goltsie guiedz win ne ndxie danse lo ne i. Ga gdziṇ to zaatne quiadod tib burr yeen ne choot gard sob lad, dzigo golxadz ma, golténie ma nu. ³¹ Tel cho gnabdiidz lo to pe nacre noxadz to ma, golguiab lo zho: meṇ ne rnabey ne, meṇ co rquiin ma.

³² Laa zho zie. Bdziṇ zho, zaatne quiadod burr co, ³³ nligaa, lèetaque noxadz zho ma, zeene laa bizhuan ma bdziṇ.

—¿Pe gun to xpurr naa? —rêb me lo zho—.
¿Pe nacre noxadz to ma?

³⁴ Dzigo rêbchaa zho:

—Meṇ ne rnabey ne, meṇ co rquiin ma.

³⁵ Bdziṇnie zho ma lo Jesús, pxob zho lar ne rbix zho lad ma, bzob me ma. ³⁶ Zigse

zie me, no grê miech guizhiu co rta zho xab zho ro nêz rded burr ne zob me ga. ³⁷ Grêse miech co, rleynie zho me. Laa zho xiuxto dze cho gui Oliv, zeene psilo zho nguiedz zêëb tsi zho, rley zho roolnie zho Dios, por grêtaa milagr ne ziyān zho ruṇ Jesús; ³⁸ rnee zho:

—¡Nasi laa Dios pxeel zhirey ne! ¡Zha ndzontaa Dios! ¡Haxta gbaa noyac guielbley dze rii!

³⁹ Blalaa zha farisé ne zienal ga, zeene gon zho zha roolnie grê miech co me, wbig zho lo me, rnab zho gnee me lo zho guioog ro zho. ⁴⁰ Dzigo rêbchaa me:

—¡Zac guioog ro zho, per hor co dzigo laa grê quie rii csilo goolniew naa!

⁴¹ Zeene bdziṇ me zaatne nieenpaa Jerusalén, psilo biab guielnê me, biin me gon me guiedz co, ⁴² rêb me:

—¡Prob to meṇ Jerusalén! ¡Tebaa ye to niin niunbey to men ne needz guielbley rii lo to! Per na ib biende tow, masaque rzac to zig zha ne nioug lo. ⁴³ Na nagon laa dze co bdedle. Grê zha ne riêë lo to, ible ziaad zho ziadsioug corral zho to, ni tib nêz tedlaade to lo zho, ⁴⁴ haxta guiab to ladznia zho, grê xpêed to. Znitlo zho ladz to, nêzrii nhêrec glaal zho grê quie ne niaa grê lidz to i; sac squi been to ib pcaaniade to Dios, zeene bíaadpaa me nsilaa me lo to xtol to.

⁴⁵ Bdziṇ me Jerusalén, güey me yadoo, psilo me blee me grêse zha ne noyun lgui ga, rêb me lo zho:

⁴⁶ —Znu zhoobnee lo Xtiidz Dios: "Zaatne nac lidz zha, ga none guiaad miech gzodiidznie zho naa." Laa to gon, quiayun to lugar rii zig tib zhibliee ngbaan.

⁴⁷ Bded ga, gzobse dze rie me rieseed me miech len yadoo ga. Nacre psilo grê pxoz ne rnabey, grê maistr ley, ni grê zha ne nac zha non lo menguedz, quiaguib zho dien zha gdeeda diidz gut zho me. ⁴⁸ Per rdzielz zho dien zha gun zho, sac tibaque ndxie miech lo me, grêse zho rquiaadiag zho zhiwseed me.

20

Bnabdiidz zho cho nac Jesús

(Mt. 21:23-27; Mr. 11:27-33)

¹ Len dze ne sca noseed me miech len yadoo, nonee me lo zho zha nac Xtiidz Dios, tib vuelz bdziṇ bla zha ne nac pxoz ne rnabey, grê zho bla maistr ley ni zla meṇ ne nac meṇ non lo menguedz, ² rnabdiidz zho lo me dien cho nac me, cho rnabey me, zha nacre sca quiayun me. ³ Dzigo rêbchaa me lo zho:

—Ye naa laa naa gun tib wnabdiidz lo to. ⁴ Golnê dien cho pxeel Juan zeene biad-choobnis Juan miech, ¿pe Dios pxeel Juan, te miechsew ye?

⁵ Psilo zho rhabdiidzlsa zho dien zha ct-sire zho lo xtiidz me, rnee zho:

—Telne dzieets ne Dios pxeel Juan, dzigo laa me gnë: “¿Pex nac dzigo waa bliladzde to miñe bnee Juan?” ⁶ Tel na dzieetsgaa ne, miechse pxeel Juan, grieequiadaque ne; zgoquie menquiedz ne, sac grëse zho rililadz Dios pxeel Juan.

⁷ Dzigo mazd lëe gdib miñe been zho, rëb zho nand zho dien cho pxeel Juan. ⁸ Nacne rëbchaa Jesús lo zho:

—Niicle naagaa nagon, grieelod gni naa lo to cho rnabey naa quiaayun naa grë min rii.

Xcuent zha ne pquianap liu

(Mt. 21:33-46; 22:15-22; Mr. 12:1-17)

⁹ Blozhse ga, biire psilo me noseed me grë miech co. Bzodiidz me tib cuent rii lo zho, rëb me:

—Tib men name, nrooblbë uv beenbni me lo liun me. Blozh ga blediin me liu co lo bla zha ne ran liu, dzigo laa me brieegaa, zey me stib dan.

¹⁰ Zeene gol mëe ne laa nex co gol, pxeel me tib zha ne quia xtsiin me zie lo zha ne quianap liun me ga, parne gdeed zha co nex ne rieguial me ycaa me. Per lel bnaaz zho zha ne pxeel me ga, bdiñ zho zho, blozh ga scase bzonzë zho zho. ¹¹ Wbiire pxeel me stib zho, scaque peet bdeete zho lo zho, lel ndox zho lo zho, bdiñ zho zho. ¹² Pxeelaque me stib zho, goc zho tson, scasaque been zho, haxta psiwee zho zho. ¹³ Quianie me tib mëed, rleynie me mëed co. Zeene gon me sca been zha co, rëbchaa me: “Miñe naca laa naa cxel xpëed naa, zeene gan zho xpëed naaw, peet gund zho me, nend zon zho xtiidz me.”

¹⁴ Pex guien zho cho nac xpëed me, zeene gon zho men co, rëb zho: “¿Lëe zha qui nagon guiaanñie liu rii! ¿Golgotaa dziuut ne zho, zeena guiaana lo ne!” ¹⁵ Bnaaz zho xpëed me, güeynie zho me zaatne nac tib lad lo liu co, ga güeyzat zho me.

¿Zha sca dien rzac to gun bizhuan liu co gza zha ntseeb co? ¹⁶ Ib tedsod lëe, zeene gbire me, znitlogazh me zho. Lozhse ga, cuediinga me liun me lo zla zha ne gundzina. Zeene bin zho sca rëb me, rneechnaa zho:

—¿Ib lic Dios qui, dziuunscad no!

¹⁷ Dze bui me lo zho, dzigo rëbchaa me:

—Per led znu lëe, zhobnee lo Xtiidz Dios: “Quie ne psëeb zha ne nozaa yu, ni nand zho lëepaa quie co nac miñe rnaazdziits yu.”

¹⁸ Ni quie co gon, zha ne tsietsobe low, zac zho zig tib ncuaañe rac tson tap lë; laa tel lëegaaw tsoe lad zho, zac zho zig tib ncuaañe die die rac.

¹⁹ Grë zha ne nac pxoz ne rnabey, ni grë maistr ley, hor co bien zho miñe nac zho ga, bzeet me lo cuent co. ¿Gocladz zho gagazh naaz zho me! Per bdzieh zho, niacntseeb

grë miech ne ndxie ga. ²⁰ Dzigo miñe been zho, pxeel zho bla zha ne zie ziegunget me par cxin me tib diidz, dzigo min co yquiaaqui zho tsiezo zho me lo zhiwxtis zha Roma. Rquiaalo zha co, no zho laadz dien zha gzoobdiag zho xtiidz Dios, ²¹ bdzin zho lo me, bnabdiidz zho rëb zho:

—Maestro, ndion no niapse diidzli zienal luu, ni scagaa zeene rseed luu miech, rguibd luu guiaanñiuu luu lo zho, sinque niapse miñe nac diidzli, miñe rlu zha sëeb zho xnëz Dios, min co rnee luu lo zho. ²² Gane niina, racladz no gnë luu dien pe nonguiela ga rdeed no dimi ne razh lo rey Roma, te nonguiel da ye.

²³ Bienga me racladz zho gunget zho me, dzigo rëbchaa me lo zho:

²⁴ —¿Golneedz tib xpes to nu ganle!

Dzigo bdeed zho tib pes lo me. Blozh ga, rëbchaa me lo zho:

—¿Cho nu? ¿Cho lë nu quia lo pes rii?

Pquiaab zho rëb zho:

—Lëe rey Roma i, lëe lë me i quia lo qui.

²⁵ Dzigo rëb me lo zho:

—Miñe rieguial sca ycaa rey Roma, goldeeda lo rey Roma; scaquegaa miñe rieguial ycaa Dios, lo Dios goldeeda.

²⁶ Bzee zdoos zho gon zho sca ptsire me lo xtiidz zho. Mazd dzese bre zho, sac bdzielz zho zha niunguet zho me; gocladz zho squi ndxie miech nxin me pe tib diidz, per brieelod niunguet zho me.

¿Pe nli zrieeban miech?

(Mt. 22:23-33; Mr. 12:18-27)

²⁷ Blozh ga, güeyaque zla zha saducé lo Jesús. Nac zha saducé rililadz zho zdzin dze grieeban miech; bdzin zho, rëb zho lo me:

²⁸ —Maestro, znu psan Moisés diidz: telne glo mgui guet lo wnaa ne nac tsiel mgui, ni gopd wnaa mëed, dzigo none betsaque zho ctsieelnia wnaa co stib, zeena gap wnaa mëed ne guiaan xlugar xpëed zha ne gut ga.

²⁹ Bio tib dii zha co znu bzhaac, gadz bets nac zho. Ptsieelnia zha ne nac zha gol, zeene laa zho gut, biaanp xpëed zho. ³⁰ Dzigo ptsieelnia wnaa co stib bets ngutoo co. Blozh ga, gutaque zha co, pa së zho nsan mëed.

³¹ Ptsieelniaque me stib zho, goc zho tson, niicle zha co psandaque mëed. Sca sca haxta bza gza gadzse zho ptsieelnia me, ³² tibaque zeene yeque me laa me gut. ³³ Miñe racladz no gacndion no, ¿chopaa dzigo gac tsiel wnaa co, zeene laa zho grieeban, ne sca gza gadzse zho ptsieelnia me?

³⁴ Pquiaab Jesús rëb me:

—Tiba, gacnan to ganle, lo guielmban riise rtsieelnia miech. ³⁵ Zeene grieeban zho, zig nac zha ne yгаа guielnzaac gdzin zho zaatne no Dios, led yedraa ga ctsieelnia zho. ³⁶ Sac laa zho mbanle ga, gdzindraa dze guet zho. Masaque laa zho gac zig nac grë xanj me,

mëed gac zho lo me. ³⁷ Laa stiba, gacnaŋ to ganle ible zrieeban grë mengut. Golwi ganle, zeene bzeet Moisés zha rëb Dios lo me zeene gon me tib yag zarz ne noyazbel ga; ga rlu rrieeban mengut. Rëb Dios lo me: "Naa nac Dios ne riladz Abraham, naa nac Dios ne riladz Isaac, naa nac Dios ne riladz Jacob." Zeene sca rëb me, ga rlu ganle mban zha co. ³⁸ Sac tel me, nacd me xDios mengut, sinque xDios zha mban nac me. iPar me, grëse zha ne ngab lo me, zha mban nac zho!

³⁹ Blalaa maistr ley zo ga, gon zho sca rëb me lo zha co, dzigo rëbchaa zho lo me:

—Maestro, nli squi naca zigne rnee luu i.

⁴⁰ Dzigotaa ni stib zho beendraa pe nabdiidz zho lo me.

¿Cho xpëed nac Crist?

(Mt. 22:41-46; 23:1-36; Mr. 12:35-40;

Lc. 11:37-54)

⁴¹ Horco bnabdiidz Jesús lo zho, rëb me:

—¿Zha nac dien ne rnee zho tib xpëedaque rey David gac Men ne nacle diidz cxeel Dios ga? ⁴² Led Davitaque name znu bnee tib lo salm ne pquaa me:

⁴³ Bnee Dios lo men ne rnabey naa, rëb Dios lo me:

"Cue naa nëz derech, nu bzob, nieeda lozh gnaz naa grëse zha ne riëe lo luu, csaŋ naa zho lадznia luu."

⁴⁴ Gase ganle rlu, led scada; telne nli zha xtii David gac men co, ¿zha nac dzigo ne lëëque David rnee ne me rnabey David?

⁴⁵ Squi ndxie grë miech co noquiaadiag zho, zeene bnee me lo xpëedsuel me, rëb me:

⁴⁶ —Golguien gon, ib tsienalde to mine ruŋ maistr ley. Sac grë zha ne nac maistr ley, rdziladz zho racw zho lar nool, haxta zhits ni zho rbiba, rdziladz zho ndooladz rquiaabdiuzh miech zho zaatne rdzieel zho zho ro nëz. Zig nac len yadoow, zha nac zha ne rzob lo xcan zaatne rzob grë zha non; zeene riegaa zho tib lo lni lidz miech, lëëpaaze zha nac zha ne rzob gröl mezh zeene laa wagw rac. ⁴⁷ Ni rlozh ga, rio zho rla zho tel pe ncuane rapse grë wnaa viud; ni parne peet guiabd miech lo zho, xtse rzo zho rzadraa pe lay ne rool zho. Sca ruŋ zho, ijer ib tedsod nroob caxtigw ne ygaa zho!

21

Gon ne bdeed tib wnaa viud

(Mt. 24:1-2; Mr. 12:41-44; 13:1-2)

¹ Laa Jesús no len yadoo ga noseed me miech. Ga no me, gon me zha rdziŋ grë zha ricw, nroob dimi rsaŋ zho len alcanci ne zob ga. ² Tibaque zeene bdziŋ tib wnaa viud, tib men proba, ye me laa me psan chop gaay win len alcanci co. ³ Zeene gon Jesús, rëbchaa me:

—Gneli naa lo to ganle, mazdraa gon non gon ne bdeed wnaa viud qui, lëdle grë gon ne psan grë zha qui. ⁴ Sac tel zha, dimi ne riaangle lo zho i rgogon zho; saŋgue wnaa prob qui gon, centav yeen ne quianiese me, mine nralopaa me gziuu pe yquini me, per laa me bloogona.

⁵ Laa Jesús zieriee ga, zeene psilo bla zha ne nac xpëedsuel me, rlozhd gwi zho zha niaa yadoo co, rzee zdoo zho ran zho grë quie ne niaaw, grë ncuane ngalguiee lena. Zeene gon mew, rëbchaa me lo zho:

⁶ —Niicle squitaa gon ran to niaaw niina, per zdziŋ dze ne nitlow, dib nacsew. Ni stib quie qui guiaandraa zigne squi zho bxcuaaw i.

iNsin golso!

(Mt. 24:3-28; Mr. 13:3-23)

⁷ Bded ga, bnabdiidz zho lo me, rëb zho:

—Maestro, ¿poc dzigo gac mine bzeet luu ga? ¿Zha glu zeene laaw ziaadyob gac?

⁸ Dzigo rëbchaa me lo zho:

—Nsin golso, zeena choot yquidiede to. Sac nzian zha ne grieequia, guiab zho laa dze co bdziŋle, guiab zho zha nac Men ne zëëble diidz ga cxeel Dios. ijb gliladzde tow! ⁹ Zeene gon to pa lo ndxiidil tib guiedz, pa lo noyagaa grë dillox, ib gdziebde to. Ib none gac grë ncuane co, per lega loxaque mine csilosew ga.

¹⁰ Grë guiedz nroob, laaw tiŋnie saguiedz nrooba; grë zha ne rnabey grë guiedz nroob, laa zho tiŋnie sazha rnabey zho. ¹¹ Nëzrii nëzrec csilo gni grë zhodox, nzian zaatne gan miech gbin, zaatne glaangaa zho grë guielguidzdox. Nzian grë ncuane glu zhan gbaa, nzian grë ncuane co, ncuane ctseb miecha. ¹² Per ansraa gac grë ncuane co, stsidil miech to, squianaŋ zho to; znaaz zho to, tsiezo zho to lo wxtis ne rnabey yadoo, zha co co to ladzguiib, ni haxta ziezo zho to lo wxtis ne rnabey guiedz, loxaque porne nac to zha ne no xnëz naa. ¹³ Ga nagon gdeeda diidz gnee to lo grë zha co, gacnaŋ zho ganle cho nac naa. ¹⁴ Ib gunde to tso to zhgab dien pe guiab to lo zho, zeene laa to ctsire lo mine rquiaqui zho to; ¹⁵ sac naa gnedz guielbiini lo to, zeene laa to gnee guien to pe guiab to. Zha ne gona, squiaadiag zhow, per ni gdzielz zho pe ctsire zho lo to.

¹⁶ Haxta pxoz to, xniaa to, bets to, grë menlidz to, grë zha ne ndzieeldiidz to, stsidil zho to, lëëque zha tsielo to ladznia zha ne csacsi to. Lo grë to, zio zha ne haxta zet ladznia grë zha co. ¹⁷ Grëse miech glëe gan to porne nac to zha ne no xnëz naa. ¹⁸ Nli stiche zho xquielmban to lo guidzliu rii, per, iŋi tib guits guic to, grielod zho gnitlo zho! ¹⁹ Tiblique sca golgac, sozite to lo naa, zeena ygaa to guielmban ndzon ne gneedz Dios.

²⁰ Zeene gan to igose guiedz Jerusalén ndxienan menguiib, nanle to len dze co laaw nitlo. ²¹ Grè zha ne no guiedz ne ngab Judé, none xoon zho tsie zho nêz yagui, ga tsietsolan zho. Zha ne no Jerusalén nu, none grieeniob zho. Grègaa zha ne quia dziin dana, ib guiabd zho gbire zho lad guiedz. ²² Tib guielnêdox ne csiaab Dios gan grè miech rii len dze co, ga gac grè mine raquiet lo Xtiidz me ted zho. ²³ jProb grè men wnaa ne lêtse len dze co zoney xpêed, men ne quianiegaa mêed ne bii radz! jMbandox ted miech, guielnêdox ne csiaab Dios gan zho guiedz rii! ²⁴ Zutxuu miech zho, zha ne tedlaagaa lo guielgut zeyzhoo miech zho, zhaase zhaase dan ne gueynie zho zho. Horco laa grè zha zit co, sêeb gunchen Jerusalén; haxta gdziñ dze ne gnabey Dios griee zho.

Ziaad Jesús stib

(Mt. 24:29-35, 42-44; Mr. 13:24-37)

²⁵ Nzian grè ncuuaane glu lo ngbidz, glu lo mêe, glu lo mel. Mbanse gac miech, zdziebdox zho zeene gon zho bidox ne tso tsasoli nisdo. ²⁶ Nzian zha ne haxta scow zho lo dzeb, zeene laa zho gan grêtaa ncuuaane noyac lo guidzliu len dze co. Grè ncuuaane no zhan gbaa, nêzrii nêzrec gaca. ²⁷ Horco bii zañ zho ganle zeene laa naa zialzêeb tib lo xcow con grè guielndzon, con grè poder ne rap naa. ²⁸ Zeene gan to laa grè ncuuaan co rsilo noyac, nley golco zdoo to; jsac hor co laa Dios ycaania to!

²⁹ Golzooob cuidad ganle zha nac yag guigw, beelzegaa pe stib yag. ³⁰ Led ran to ganle, zeene laa grè zhicwa racnieen, laa zhiblaga rsilo rdzib, gase runbey to laa mêe nêeg ziaadgaxle. ³¹ Scaque nagon zeene gan to laa grè mine rne naa lo to nu rsilo noyac, dzigo nanle to laa dze ne csilo gnabey Dios ziaadgaxle. ³² Gneli naa lo to ganle, nzian grè miech ne mban niina, bii zañ zho zeene laa grè ncuuaan co gac; sac ible ncuuaane gaca. ³³ Zdziñ dze ne nitlo gbaa, nitlo guidzliu, sangue mine rne naa lo to nu nitloda; ible laaw none gac. ³⁴⁻³⁵ jNsin sca golso, zaacse golgac! jAdel gal dze ne laa naa guial, lel lo grè ncuuaane ndzinlid, lel lo guielgonziu, lel lo grè zhgab ne rac lo guidzliu rii no to, zigne gun grêraa miech! Sac gon, lega naclew glanso naa. ³⁶ Nligaa nsin golso. Tibaque golnab lo Dios, gacnieen me to peet gacde to lo grè guielnê co, ine peet xtolde to zeene laa to gacredz lo naa.

³⁷⁻³⁸ Gzase len dze co pseed me miech. Silgaw, miech guizhiu ne rdziñ len yadoo, parne yquiaadiag zho zhiwseed me. Guidze sca rseed me zho, laa pcow liu riebêz me cho Gui Oliv.

22

Bnediizd zho dien zha gnaaz zho Jesús

(Mt. 26:1-5, 14-16; Mr. 14:1-2, 10-11; Jn. 11:45-53)

¹ Ziaadyoble lni Pascwa, zhilni nroob men Israel, lni ne row zho quietxtil ne rquiad ncobi lad. ² Grè zha ne nac pxoz rnabey ni grè maistr ley, len dze co laa zho no quiaguib zho dien zha gut zho Jesús. Noguib zho tib mod ne glisquid menguedza; sac rdzieb zho gacntseeb menguedz.

³ Tib dzew, laa mendox bzêeb zdoo Judas Iscariot, tib zha ne rzênepaa me ga, ⁴ rias Judas güey Judas lo grè pxoz rnabey co, lo grè men ne zo lo zha ne rquiapan yadoo, rêb Judas zha csan Judas Jesús ladznia zho. ⁵ Zeene bin zhow per nli rley zho, nacre biaan zho diidz quizh zho Judas. ⁶ Dzigo desde hor co psilo Judas noguib Judas dien zha gdeeda diidz guienð miech csan Judas me ladznia zho.

Dowxtseenie Jesús xpêedscuel me

(Mt. 26:17-29, 31-35; Mr. 14:12-25, 27-31; Jn. 13:21-30, 36-38; 1Co. 11:23-26)

⁷ Mer dze ne rsilo lni Pascwa, len dze ne sca row zho quietxtil ne rquiad ncobi lad, ni rut zho carner yeen ne rowxtsee zho. ⁸ Dze co bnabey Jesús Pedr grop Juan tsiegunlo zho xtsee ne gownie me zho wdze co. ⁹ Dzigo bnabdiidz zho lo me, rêb zho:

—jPa lo racladz luu guio no guiozdziunlo now?

¹⁰ Rêbchaa me lo zho:

—Goltsie Jerusalén. Zeene sêeb to lad guiedz, ga gan to tib mgui nzobyan tib re nis, goltsienal zhits me. Yu ne gan to sêeb me, ¹¹ golguiab lo bizhuan yu co: “Znu nê Maestro, jpa len yu me gneedz luu gac zaatne gowxtseenie me xpêedscuel me wdze rii?” ¹² Ga glu me tib len yu nroob ne riaan glaa, nzhixcuaale lena, dzigo ga golgunlo zhixtsee ne.

¹³ Dzigo laa zho zie. Güey zho zaatne pxeel me zho ga, ga beenlo zho xtsee co.

¹⁴ Wdze co, zeene gol hor xtsee laa Jesús bded lo mez h gza me gza tsiipchop xpêedscuel me. Xtsee co no zho, ¹⁵ zeene rêb me lo zho:

—jBlactaa gon pquiambêz naa gdziñ dze rii, znu gowxtseenie naa to nawdze rii, ansraa csaci miech naa, gut zho naa! ¹⁶ Lêe lultm vult nu gon teed naa lni Pascw rii, haxta gdziñ dze ne laa Dios csilo gnabey, dze ne glupaa ganle zha nac xtsee rii.

¹⁷ Dzigo bzhen me tib cop nroob no vin, bdeed me xquizh lo Dios, blozh ga bdeed me cop co lo zho, rêb me:

—Golquiin vin rii gza to. ¹⁸ Gneli naa lo to ganle, lêe lultm vult nu guie naa vin rii, haxta gdziñ dze ne laa Dios csilo gnabey.

¹⁹Ni bzhēn me guietxtil, bdeed me xquizh lo Dios, blozh ga beengrol mew bdiiz mew lo zho, rēb me:

—Golquiina, rrieequia gon lēē xcuerp naa i, sac gon znu gun zho xcuerp naa parne csilaa naa to grē to. Zeēne gdeedtaaw diidz, golgun min rii parne glu to ganle tibaque rsoladz to naa.

²⁰Blozhse dowxtseenie me zho, scaque bzhen me stib cop no vin, blozhse bdeed me xquizh, rēb me lo zho:

—Lēē stib trat cub nu gon riaan Dios grē me miech, rrieequia xchen naa nu nac vin rii, ren ne gzhiee xcent to, ren ne tso firm trat co par glu nona. ²¹Ni gacnan to ganle, lo mezhaque nu gon zob zha ne tsielo naa ladznia zha ne gut naa. ²²Naa ne nac naa Mgui ne pxeel Dios, nli, ible none guet naa, parne gac mine pxeel Dios naa zialgun naa, jper probsaxe zha ne tsielo naa ladznia zha co!

²³Horco psilo gza zha ne zobnie me ga, rnabdiidzlsa zho dien cho nac zha ne rzeet me ga; ²⁴haxta psilo zho nodiidiidz zho dien cho gac zha ne gacnon lo zho. ²⁵Dzigo bnee me lo zho, rēb me:

—Nli grē zha ne rnabey guiedz ne ndxie lo guidzliu, masaque rnabey zho miech zig nac zeene bzhii zho zho, per zha gunraa miech, lēē gdib rxcw zho, haxta rnee zho nroob quiayun zha co xyudar guiedz. ²⁶Sangue to gon, zha ne gnabey lo to, none guien zho gac zho zig tib ngundziin lo to; zha ne racladzgaac gacnon, none guien zho guiaanwin zho. ²⁷Lo guidzliu rii, zha ne rnabey, rzobse zho, zha ne nac ngundziin, zha co rdziib ncuuane row zho. jSangue lo ne, led scad naca! jGolwi ganle, tib ngundziin nac naa lo to!

²⁸Tose goc zha ne tibaque gocnie naa lo grētaa mine bdeed naa len dze rii. ²⁹Gane niina, laa naa gneedz tib guielnzaac nroob lo to ygaa to gdziin to zaatne bneedz Pxoaz naa gnabey naa; ³⁰zeēna ine znu tipse zioob ne lo xmezha naa ga, dioow ne, dio ne. Haxta so naa to, to gac zha ne cobey, pe nac mine been gza tsiipchop dii ne nac menladz to nu.

³¹Horcoque bnee me lo Pedr rēb me:

—Bina ganle Pedr, racladz Satanás gon ycuuib ma to, zigne run zho zhozbxtil. ³²Per laa naa bnable lo Dios, gacnien me luu, csaand me sozitpaa luu lo naa. Gacxe waa, zeēne guien luu lēda ga been luu, luu gnee lo grēraa zha qui, parne tibaque dib zdoo zho gnalo zho naa.

³³Pquiab Pedr rēb Pedr:

—Niicxe peraa waa gac, csaand naa luu. Telne co zho luu ladzguuib, ye naa tso ga, jtelne gutgaa zho luu, zaatne guet luu, ga guet naa!

³⁴—Bina ganle Pedr —rēb Jesús—. jGuieel riigazh gon, gardle ycuedz gall, tsonle vuelt rēb luu runbeyd luu naa!

³⁵Dzigo bnee me lo zho gza zho, rēb me:

—Led rsoladz to ganle zeene pxel naa to güeyseed to miech, scase güey to, peet dimi bide to, per ni ncuuane gow to, per ni lab to bide to. jPe beenfalt ncuuane nquiin to hor co?

Pquiab zho rēb zho:

—Beenfaltetew.

³⁶Dzigo rēbchaa me:

—Horco nagon peet bide to, sangue niina zha ne quanie dimi, zha ne quaniegaa ncuuane gow zho, none güey zhow. Niina nagon none laa to yquuin spad. Zha ne quanieada, none maase tib xab zho cto zho, si zho tiba. ³⁷Sac nataa nagon, laa miech cteed naa mine zhoznee lo Xtiidz Dios, zaatne rnee: “Bnabey zho gut me, zigne rut zho grē zha ntseeb.” Grēse mine zhoznee teed naa, ib laaw none gac niina.

³⁸Pquiab zho rēb zho lo me:

—jBui ganle laa chop spad nule!

Dzigo rēbchaa me:

—jMazd peet gnedraa naa lo to!

Bzodiidznie Jesús Pxoaz me Getsemani
(Mt. 26:36-46; Mr. 14:32-42)

³⁹Blozhse ga, laa me brieze zie me nēz Gui Oliv, zaatne rietaque me; zienalaque gza xpēēdsuel me zhits me. ⁴⁰Bdziin zho ga, rēbchaa me lo zho:

—Golnab lo Dios gacnien me to, zeēna yquuuld mendox to.

⁴¹Bzē me spalal, bdziin me zig zaatne riab tib gzie ne rchel ne nia ne, dzigo ga pquuitsgzhib me, psilo me bnab me lo Dios, ⁴²rēb me:

—Papá, laa naa rnab lo luu, telne zala zdoo luu, psilaa naa lo grē guielnē rii. Per telne grieeloda, mine gnēaa luu sca gaca.

⁴³Horco biet tib anj gbaa bdziin pchoobladz zdoo me. ⁴⁴Mban rac me laa me nozodiidznie Pxoaz me, per hor cole mazdraa rnab me lo Pxoaz me; lo guielnē ro co haxta rzonis me, masaque zēbdzuun grē nis co lo me zootle ren.

⁴⁵Zeēne laa me guso ga, bdziin me zaatne biaan xpēēdsuel me, gon me gzase zho laa zho nixguies. Ye zho mban rac zho, lo guielnē co bguudz zho mcaal. ⁴⁶Dzigo pcuuan me zho, rēb me lo zho:

—jNixguies to ye? Lēda i gon, jgolsobna! Golnab lo Dios, gacnien me to, zeēna yquuuld mendox to.

Bnaaz zho Jesús

(Mt. 26:47-58, 67-75; Mr. 14:43-50, 53-54, 65-72; Jn. 18:2-18, 25-27)

⁴⁷Laa Jesús quanieeque, zeēne laa Judas bdziin bdziinie Judas tib dzoon miech.

Zigne bdzin Judas, wbig Judas lo me, dow Judas bzhid cuas me.

⁴⁸ —jJudas! —rëb me—. ¿Con tib bzhid dzigo lëë glu luu naa lo grë zha qui?

⁴⁹ Zeene bien xpëëdsuel me, me zienaaz grë miech co, rëbchaa zho lo me:

—Maestro, ¿zha dziuun ne? ¿Pe zdeed spad no zho?

⁵⁰ Znuse biet tib zho pchel zho tib nia spad, pchug zho diag tib xmoz meñ ne nac pxoz nroob. ⁵¹ Dzigo bnee Jesús lo zho rëb me:

—Gojsaan zho, ndzinli gojgac.

Horco wbig me bzhen me diag zha co, beenguiac mew, lëëtse min derecha.

⁵² Lad grë miech co no ndal grë pxoz ne rnabey, grë zha ne zo lo zha ne rquianap yadoo, ni spalal meñ ne nac zha non lo menguedz; dzigo bnee Jesús lo zho, rëb me:

—¿Pe nacne squitaa ziaad to, nzhen to yag, nzhen to spad ziadnaaz to naa? ¿Niacxe naa cho ngbaan? ⁵³ Blactaa dze name gon to no naa len yadoo, ni bnaazde to naa ga. Per nole guic to nagon nawdze rii gnaaz to naa; grë minë racladz to grë to menëox, niina laaw gac.

⁵⁴ Horco wbig be zho bnaaz zho me, laa zho zienie me nëz lidz meñ nac pxoz nroob.

⁵⁵ Bdzin zho lidz meñ co, bre zho xley me, bzëëg zho gui, laa zho no nodzëë zho. Ye Pedr maase zit zit nal Pedr, laa Pedr bdzin ga; laa Pedr wbig bzob lo zho ga. ⁵⁶ Zeene gon tib wnaa ne quia xtsiin meñ co laa Pedr zob ga, dze rwi me, tibaque rëb me:

—jYe mgui qui gon rzënie meñ ne blansonie to i!

⁵⁷ —¿Naa ye? —rëb Pedr—, iper ni runbeyd naa meñ qui!

⁵⁸ Wdzeepaaw, laa tib zha ne zo ga, gonaque Pedr, rëb zho lo Pedr:

—¿Segur lëë ye luu nacnie meñ ne bgaa i? Scaaque bneelid Pedr. ⁵⁹ Wdzeelaaque goca, zeen laa stib zho brieëquia, rëb zho:

—Lëë tib zha ne nacnie meñ qui nu gon. jRlu zha galilé nac zho!

⁶⁰ Pquiab Pedr, rëb Pedr:

—jRiend naa gon, pe nacne squi rnee luu!

Gardle lozh grieë diidz co ro Pedr, zeene laa tib gall pcedz. ⁶¹ Gall co nocuedz, zeene ptsire lo Jesús, dze lui me lo Pedr; dzigora a psoladz Pedr zeene rëb me lo Pedr: “jGuieel riigazh gon, gardle yuedz gall, tsonle vuelt rëb luu runbeyd luu naa!” ⁶² Mbanse rac Pedr. Brieë Pedr ga, psilo Pedr biin Pedr guieñe co.

⁶³ Grë zha ne zopaa quianap Jesús, nzian grë ncuaañe run zho me, psilo zho noyuunguzee zho me. ⁶⁴ Pxidoo zho lo me, ni rguin zho me, rlozh ga, rnee zho:

—Luu ne nac luu meñ ne ziadteed xtiidz Dios, ¿bnë sca dien cho ga bdiñ luu?

⁶⁵ Nzian grë ncuaañe rgoredz zho lo me.

Güeynie zho Jesús lo zhiwxtis zho

(Mt. 26:59-66; Mr. 14:55-64; Jn. 18:19-24)

⁶⁶ Zeene biini liu, pcaalsa grë meñ ne nac zha non lo menguedz, grë zho pxoz rnabey, ni grë zha ne nac maistr ley, güey zho güeynie zho Jesús lo zhiwxtis zho. Bdzin me ga, bnabdiidz zho lo me rëb zho:

⁶⁷ —Bnë lo no dien, ¿pe lëë Meñ ne nacle diidz cxeel Dios lo guidzliu ga i nac luu?

Pquiab me rëb me:

—Niicle telne gni naa lo to nli lëë meñ co nu nac naa, gliladzde tow, ⁶⁸ tel pe gnabdiidzga naa lo to, ctsirede to low; sac gliladzde to minë nac diidzli. ⁶⁹ Naa ne nac naa Mgui ne pxeel Dios, zhile laa dze gdzin zeene laa naa sob cue Dios nëz derech, meñ nroob ne rrieelo run grëse ncuaañe racladz me.

⁷⁰ Horco grëse zho pquiab, rëb zho lo me:

—¿Xpëed Dios dzigo lëë nac luu?

Dzigo rëbchaa me:

—Tozhal name rnee, nli Xpëed me nac naa.

⁷¹ Horco rëb zho:

—jPe mazdraa textigw ne racladz ne! jLaa ne bdzionle ganle mezhall rnee Xpëed Dios nac me!

23

Güeynie zho Jesús lo Pilat

(Mt. 27:1-2; 11-14; Mr. 15:1-5;

Jn. 18:28-38)

¹ Horcogazh pcaanie zho Jesús nëz, bdzinne zho me lo Pilat, meñ ne nac gobernador ne nzoob zha Roma ga. ² Ga psilo zho nzian grë ncuaañe rquiaqui zho me, rëb zho:

—Laa no bnaaz meñ rii gon ziaadnie no me lo luu, sac bgaa me noquuil me menladz no gacntseeb zho. Rnee me lo zho nonguiel da gdeed zho dimi ne razh lo zhirey ne, meñ ne zob Roma; haxta rnee me mele nac rey ne gunbey zho, sac Dios pxeel me ziaad me.

³ Dzigo bnabdiidz Pilat lo me, rëb Pilat:

—¿Pe nli na luu nac Rey ne rnabey lo zha Israel?

Pquiab me rëb me:

—Nliw, rey nac naa zigne rnee luu i.

⁴ Dzigo rëbchaa Pilat lo grë zha ne nac pxoz rnabey co, ni grë miech ne ziegrë zho ga:

—jNi tib dol rapd meñ rii!

⁵ —¿Zha gapd me dol? —rëb zho—. Ni zaatne zieetaa me noquuil me miech gacntseeb zho lo zhirey ne. jDible nëz Judé nu güeyted me; desde nëz Galilé brieë me ziaad me haxta nu!

⁶ Gon Pilat sca rëb zho, dzigo bnabdiidz me dien pe zha Galilé nac Jesús. ⁷ Zeene gonañ me zha nëz co nac Jesús, dzigo pxeel me Jesús lo Herod, sac Herod rnabey nëz Galilé;

lëëtaque len dze co laa Herod no Jerusalén ga.

⁸ Rley Herod zeene gon Herod me, sac ziyon Herod grëtaa mine run me; quiambëz Herod gdziñ dze ganlo Herod me, ganlo Herod gon me pe tib milagr. ⁹ Psilo Herod nzian grë ncuaañe rnabdiidz Herod lo me, per ni tib lo wnabdiidz co ib pt-sired me. ¹⁰ Zeene gon Herod rquiabd me, ni gon Herod noque grë pxoz rnabey co, grë maistr ley co, ib rioogd ro zho rzadraa pe yquiaaqui zho me, rnab zho cteed Herod me caxtigw, ¹¹ nacne leļ psilo Herod grë mxenguiib Herod rzhidznie zho me, runguzee zho me. Bgacw zho me tib lar ne racw rey, sca nacw me lar co biire pxeel Herod me lo Pilat. ¹² Glo ib rdzieeld xtiidz Herod grop Pilat, laa dze co laa zho psilo bneewen stib.

Bnab zho guet Jesús

(Mt. 27:15-26; Mr. 15:6-15; Jn. 18:39-19:16)

¹³ Dzigo bnabey Pilat pcaalsa grëse pxoz rnabey, grë zha ne nac zhiwxtis zha Israel, ni grëraa menguietz, ¹⁴ rëb Pilat lo zho:

—Laa zho biad-zoob xdemand men rii lo naa nu, nac diidz noquuil me miech gacntseeb zho lo zhirey ne. Nacne pquiep naa me, ni blalagaa to gona; par naa peet dol rapd me. ¹⁵ Niiclegaa Herod, ye Herod gon ni tib dol rapd me; gane pxeelaque Herod me lo naa. Quiayund me ncuaañe guiab ne rieguial guet me. ¹⁶ Mine gaca, laa naa gnabey ted me tib caxtigw, lozh ga dzigo laa naa csilaa me.

¹⁷ Nac costumbr, gzobse lni Pascw rsilaa zho tib zha ne no xcuent lo wxtis. ¹⁸ Per zeene bin grë miech co laa Pilat csilaa Jesús, grëse zho nguiedz roptsie zho, rnee zho:

—jCsilaad luu men qui, bnabey guetgazh me! jBarrabás psilaa!

¹⁹ Barrabás lë tib men co no ladzguuib len dze co, sac bgaa me zo me lo tib dii zha ne noyactseeb lo rey len guiedz Jerusalén ga, ni zëebaque me tib ngutoo. ²⁰ Bguib Pilat dien zha nrieelo nsilaa me Jesús, ²¹ per psilo grë miech co nguiedz roptsie zho, rnee zho:

—jNone guetgazh men qui! jLo cruz bnabey yquia me!

²² —Per, zpe nacne gnabey naa yquia me lo cruz? —rëb Pilat stib—. zPe nac falt ne rap me? Laa naa pquieple me, ni tib dol rapd me, parne gnabey naa guet me. Laa naa nile lo to, laa naa gnabey ted me tib caxtigw, lozh ga laa naa csilaa me.

²³ Psiloque grë miech co stib, nguiedzraa roptsie zho, rnab zho yquia Jesús lo cruz; haxta goc mine racladz zho. ²⁴ Racse Pilat, laa Pilat bdeed diidz. ²⁵ Blozhse bnabey Pilat psilaa zho Barrabás, zha ntseeb ne no ladzguuib ga, dzigo laa Pilat psan Jesús ladznie zho.

Güeyquiaa zho Jesús lo cruz

(Mt. 27:32-44; Mr. 15:21-32; Jn. 19:17-27)

²⁶ Horco laa zho brieenie Jesús laa zho zienie me zaatne yquia me lo cruz. Nëz zienie zho me, bdziel zho tib men Ciren lë Simón wbiere lo dziin dan, pcuëez zho men co, bnabey zho me bi me zhiczuz Jesús; nãse me zhits Jesús, laa zho zienie Jesús. ²⁷ Miech guizhiu ne zie ga, ndal grë men wnaa psilo zho roon zho no zho xquielnë me, ²⁸ dzigo dze lui me lo zho, rëb me:

—Xin, nac to men Jerusalén rii, goonde to xquielnë naa. Mazd golgoon por grëtaa guielnë ne no gan to, por grëtaa guielnë ne no gan xpëed to; ²⁹ sac zeene gal dze co grë men wnaa ne quianie mëed, ziab zho: “Mazd wenaque zie zha ne quianied mëed, zha ne nanđ zha radz mëed, zha ne niaadgaa gap mëed.” ³⁰ Horco grë miech, laa zho gnab tebaa zha pixche grë gui guiaan zho zhana. ³¹ jGolwi ganle, telne znutaa mine noodeed naa nac naa zig tib yag nguia, peleļ to dzigo ne nac to zig tib yag bidz!

³² Ye schop zha ne nac ngbaan, zienie zho ga yquiaagza zho me lo cruz. ³³ Zeene bdziñ zho zaatne nac “Gui Beerguic Ngutoo”, ga pquiaa zho me lo cruz gza me ngbaan co. Tibga zhiczuz zho bzo tib nëz cue zhiczuz me. ³⁴ Lo cruz co quia me, zeene nguiedz bnee me rëb me:

—jPapá! Ncuaañe quiayun grë miech rii nu, bzhiguieļ guñquizhd luu zhow; sac riend zho pe run zho.

Gza menguiib ne bdziñ ga yquiaanap me, hor co tib tib zho bzhenşe zho tib lëx ab me, laa stiba bio zho rif. ³⁵ Ndal miech ne ndxie quiawi. Haxta grë zha ne nac wxtis zo ga, no zho rzhidznie zho me, rnee zho:

—Stib miech scataa beenguiac me, stib miech scataa bla me. zPe rac me na ne riete me i? jGuiet me i zho, telne nli me nac Men ne zëëble diidz cxeel Dios, telne nli Dios bzooblo me ziaad me!

³⁶ Whig menguiib co rdeed zho nziu bla guie me, rzhidznie zho me, rnee zho:

³⁷ —jZhirey zha Israel name nac luu! Psi-laa luu lo guielnë qui nazho.

³⁸ Glaa guic zhiczuz me quia choplan didz ne pquiaa zho, rneew: “LËË ZHIREY ZHA ISRAEL NU.”

³⁹ Grop ngbaan ne quianie me lo cruz ga, psilo tib zho ye zho rzhidznie me, rnee zho lo me:

—jLed rëb luu lëë, luu nac Men ne zëëble diidz ga cxeel Dios! jBlu nazho nli men co nac luu, psilaa ne lo guielnë rii!

⁴⁰ Horco pquiab stib zha co, rëb zho lo zho: —jPsiog ro luu! zPe niicle niina ne laa luu guetle ib rdzieebd luu Dios? ⁴¹ Bien ganle, jtel ne ible miñ rii rioguial ne grop ne, nu

nodizh ne grë guielntseeb ne bdziuuñ ne; sangue men qui, peet dol rapd me!

⁴² Dzigo rëb zho lo me:

—jBzhiguiel zeene guiaad luu gnabey luu, ib csañd luu naa tib lad!

⁴³ Pquiab me rëb me lo zho:

—Peet tsienied guic luu, nadzegazh laa luu së guioo ne zaatne nac lo xquielbley Pxoza naa.

Gut Jesús

(Mt. 27:45-56; Mr. 15:33-41; Jn. 19:28-30)

⁴⁴⁻⁴⁶ Goj grol dzew, tibaque zeene goc tib ncow dipse lo guidzliu. Ni palal rlud xbiini ngbidz, haxta las tres diaa biini stib. Horco pquiada Jesús tib redz nroob, rëb me:

—Papá, laa naa rsañ zhiesspiritu naa ladz- nia luu, luu pcaaniaw.

Diidz co brieer ro me, znuse blozh me. Laa me quialozh, zeene laa lar nroob ne quia len yadoo Jerusalén ga briez nzoli, groltaa goca.

⁴⁷ Zha ne rnabey lo zhaguib ne pquiada me lo cruz ga, zeene gon zho zha blozh me, bien zho Dios been min co, rëb zho:

—jNe nlipagaa tib men peet xtold goc men qui!

⁴⁸ Scaque grë miech ne goclo ga, zeene gon zho zha blozh me, biabguieñe zho, mbanse rac zho laa zho wbi ga. ⁴⁹ Laa grë zha ne runbey me, zha ne gocnie me, zig nac grë men wnaa ne gocgrë zha ne brieenal zhits me zeene brieer me nëz Galilé, grë zho laa zho ndxiee tib lad rwi zho.

Bgueets Jesús

(Mt. 27:57-61; Mr. 15:42-47; Jn. 19:38-42)

⁵⁰ Lad grë zha ne nac zhiwxtis men Israel ga, no tib men guiedz Arimaté lë me José; lëe guiedz co ndxie xtan Judé. Tib miech wen nac me, noxc me mine rnabey Dios, ⁵¹ ye me quiambez gdzñ dze ne csilo gnabey Dios. Zeene bnabey zha ne nacgrë me dziin ga zha gac Jesús, ni lalnu biod me conform mine bnabey zho. ⁵² Nacne hor co güey me lo Pilat, bnab me diidzbey tselit me xcuerp Jesús lo cruz. ⁵³ Dzigo güey me, blozhse blit me cuerp co lo cruz, pchej me me tib lo lar nroob, güey me güeyquets me me tib len baa cub ndieen tib cho quie gax ga.

⁵⁴ Lëe bdze dze co no zho xco ne laa dze ne gdziiladz zho lo dziin sëeb. ⁵⁵ Grë men wnaa ne sca nacga grë zha ne brieenal zhits me zeene brieer me nëz Galilé ga, ye zho güeynal bgueets me, gon zho pa lo bio me. ⁵⁶ Blozhse bgueets me, laa zho zey. Bdziñ zho bzhixcuaa zho, tiblo zënex ne tsietëeb zho lad xcuerp me; dzigo laa zho bdziiladz zigne rnabey ley no gun zho.

24

BRIEEBAN JESUS

(Mt. 28:1-10; Mr. 16:1-8; Jn. 20:1-10)

¹ Laa zeene goj dze ne rzobni zmal, silgaw laa gza men wnaa co brieer, bi zho grë zënex ne bzhixcuaa zho ga, laa zho zie ro baan Jesús.

² Bdziñ zho, gon zho laa quie ne bioog ro baan me ga bdiooble; ³ bzëeb zho len baa gon zho, niicle xcuerp me guieñde ga. ⁴ Laa zho zo ga, rienñ zho dieñ pe nacne sca nialse ro baa co, pe nacne niicle xcuerp me guieñd len co. Tibaque zeene gon zho laa chop men bgui zole lo zho ga, masaque riaazbel lad xab grop men co. ⁵ Horco per nli bdzieb zho, lo dzeb co mine been zho laa zho pquitsgzhib haxta bdziñ lo zho lo liu. Dzigo rëb grop men bgui co lo zho:

—jPe nacne ziaadguib to men mban za- atne rio mengut? ⁶ jLaa me brieerbanle! jGuieñde me nu! Golsoladz ganle zha në me lo to len dze ne no me nëz Galilé, ⁷ në me: “Mgui ne pxeel Dios, ible none guiab me ladznia grë miech ngoopdol, squiaa zho me lo cruz, per zeene gac tson ngbidza, laa me grieerban.”

⁸ Dzigoraa psoladz zho, nligaa sca bnee me, ⁹ hor co lëëlëd güeynie zho diidz lo gza tsiptib zha ne nac xpëedscuel me, ni lo grëraa zha ne nacga zho ga. ¹⁰ Nziaanlaa nac men wnaa co, lad co no Mari Magdal, no Zhuan, ni Mari ne nac xniaa Jacob.

¹¹ Niicle bzodiidz zhow lo xpëedscuel me, per con rnee zho led ncuane gac ga, ni lalnu bliladz zhow. ¹² Tibaque zeene brieer Pedr, rias Pedr laa Pedr zie nëz ro baa. Bdziñ Pedr bdiixlo Pedr len baa co, gon Pedr nligaa, jloxaque lar ne briel me zhoob len co! Blozh ga, laa Pedr zeyaque, rzee zdoos Pedr gon Pedr nli guieñde xcuerp me ga.

Gon zho Jesús nëz Maús

(Mr. 16:12-13)

¹³ Dze co brieer chop xpëedscuel me zie zho tib guiedz win lë Maús. Gax Jerusalén rianañ guiedz win co, maase chop hor rzë zho rdziñ zho ga. ¹⁴ Nëz no zho nozodiidz zho grë mine pteed miech Jesús ga, ¹⁵ tibaque zeene bien zho laa zho bgaa tib lo men co, gocza me zho laa zho no nëz, per; jib biend zho lëe Jesús ga! ¹⁶ Ranlo zho laa me ziegza zho ga, per ni lalnu beenbeyd zho ne mew, sac zig nac zeen pe tib ncuane ptse lo zho. ¹⁷ Dzigo rëb me:

—jPe squitaa nozodiidz to? jPe nac squi rac to, zig nac zeene pe guieñe no to?

Dzigo bzodze zho. Mban rac zho, haxta lo zho rlu nroob guieñe no zho. ¹⁸ Pquiab tib zha ne lë Cleof, rëb zho:

—jNiacxe bind luu ganle zha nactaa ncuane goc Jerusalén len dze rii? Grëe zha ne name güey Jerusalén, gocnaña.

¹⁹ —Nligaa —rëb me—, jpe dieñ goc ga?

Rëbchaa zho:

—Leñ dze rii psacsi zho meñ Nazaret ne lè Jesús. Tib meñ ne biadteed xtiidz Dios lo miech nac me, nzian grè milagr nroob ne been me; miech guizhiu ne bley pquiaadiag zhiwseed me. Rlu tib meñ nziuu nac me lo Dios. ²⁰ Per leñ brieer grè pxoz rnabey, grè zho zha ne nac wxtis, bnaaz zho me, bnaab zho gut me, pquiaa zho me lo cruz. ²¹ Tibaque rdzieets no, me niac tib meñ ne nsilaa zha ladz ne ladznia zha Roma. Pasèse min co niac, nadzele rac tson ngbidz beet zho me. ²² Per riend no dien zha nac cuent co, sac nasil güey bla meñ wnaa ne nacgrè no ro baan me, ²³ zeene wbiere zho bzodiidz zho lo no nè zho guieñdle xcuerp me leñ baa, loxaque chop anjl brieequia lo zho ga, rëb anjl co mban me. ²⁴ Blozh ga, güeyaque bla zha bgui ne nacgrè no, gon zho nligaa guieñdle xcuerp me ga.

²⁵ Dzigo rëbchaa me lo zho:

—¡Nadzpaan ncow nac guic to, nadzpaan ndip nac zdoo to! ¿Riladzde to grè mine dzigo lèe bzeet zho padzeela ted Meñ ne nole diidz ga cxeel Dios? ²⁶ Bzeetle zha co name ible no csacsi miech me, antes ne gbire me lo guieñdzon ne no me.

²⁷ Dzigo psilo me bnee me lo zho pa lo zho bnee grè mine bdeed me ga, psilo me desde grè mine pquiaa Moisés, haxta grè mine pquiaa grèraa zha ne biadteed xtiidz Dios. ²⁸ Sca no zho nèz laa zho bdziñ Maús. Bdziñ zho ga, rac me zig nac zeene tib ted me, ²⁹ dzigo quia zho rnab zho lo me cuéz me ga, sac laa dze bdzele, zhile laa liu ycow. Nacne blèz me.

³⁰ Laa zho zob lo mez h gowxtsee zho, bzhen me guietxtil bdeed me xquizh lo Dios, blozh beengrol mew bdeed mew lo zho. ³¹ Dzigoraa zig nac zeene bzhiäl lo zho, laa zho beenbey me. Per par nianraa zho me, znuse bnit me lo zho, gondraa zho me. ³² Horco per nli rley zho rnee zho:

—Con razon zeene sca ziaadgza ne me nèz nonee me lo ne zha raquiet lo Xtiidz Dios, masaque tib guieñbley nroob ne biaadnie xcodiidz me zdoo ne.

Sca rnee zho, sac bien zho bdziñ tib guieñbley nroob zdoo zho, zeene sca nonee me lo zho. ³³ Lèèlèdaque brieer zho ga, bio zho nèz wbiere zho Jerusalén stib. Bdziñ zho lo gza tsiipitb zha ne bzèniepaa me ga, ni grèraa zha ne nacgrè zho, ³⁴ rëbchaa zha co lo zho:

—¡Tebaa gan to ganle nli brieeban xmaistr ne! ¡Laa Pedr gonle me!

³⁵ Psiloque zho grop zho bzodiidz zho zha gon zho me no zho nèz, per haxta horne no zho xtsee, zeene laa me beengrol guietxtil dzigoraa beenbey zho me.

*Brieequia Jesús lo grè xpèdscuel me
(Mt. 28:16-20; Mr. 16:14-20; Jn. 20:19-23)*

³⁶ Lèètaaque sca nozodiidz zho, tibaque zeen gon zho laa Jesús zole lo zho ga, pquiaabdiuzh me zho, rëb me lo zho, peet tsieniedraa guic zho. ³⁷ Leñ rdzieb zho, haxta rzhidz zho lo dzeb co, sac rëb zho bod ndziin ga ran zho. ³⁸ Dzigo bnee me lo zho rëb me:

—¿Pe nacne rdzieb to? ¿Pe nacne riladzde to naa nu? ³⁹ Golwi leñ nia naa, golwi zhits ni naa ganle. Golxeen naa, zeena gliladz to ganle nli naaw; sac tel ndziina, mese naca, gacd xen tow.

⁴⁰ Sca quiaanee me, blu me nia me, blu me ni me lo zho, zaatne biaz me clav. ⁴¹ Per nli rley zho, rzee zdoo zho, per riladzdaque zho dien pe nli paa lèe me ga. Gon me sca rac zho, nacne bnaab me ncuane gow me lo zho. ⁴² Dzigo bdeed zho tib lè mel bguie lo me, ⁴³ bnaaz me mel co, squi ndxie zho gon zho dow me ma. ⁴⁴ Dzigo rëb me lo zho:

—¿Pe ib rsoladzde to nile naa laa grè min rii no gac? Led ni naa lo to, grèse mine bzeet Moisés, grèse mine bzeet grè zha ne biadteed xtiidz Dios, mine raquietgaa lo Salm teed naa, ible laaw none gac.

⁴⁵ Psilo me clar nonee me lo zho, parne guieñpaa zho zha zho bnee lo grè guits co, ⁴⁶ rëb me:

—Ible lo co zho bnee sca teed naa ne nac naa Mgui ne pxeel Dios, rneew ib no gut miech naa, per zeene gac tson ngbidza, laa naa grieban. ⁴⁷ Rneew, Jerusalén nu, nu csilo gacnan miech ible none csaan zho xquieñtseeb zho, gnalo zho naa, parne gon Dios zho perdon. ⁴⁸ Ni to gon ganle grèse min co, goca. ⁴⁹ Na leñ dze ne ziaadaque nu, laa naa cxeel Espiritu Sant gacnieñ to, sac ib scale nac xtiidz Pxoz naa. Per guiabde to niinaga griee to tsienee to lo miech, Jerusalense nu golcuéz, haxta nieeda yгаа to poder ne gneedz Espiritu Sant lo to.

⁵⁰ Zeene gol dze ne laa me guey gbaa, dzigo güey me güeynie me zho nèz Betain. Bdziñ zho ga, blis me nia me, psilo me noyunnlay me zho. ⁵¹ Laa me quiaunnlay zho, tibaque zeene laa me bias lo guidzliu, igonlo zho laa me bzoquia gbaa!

⁵² Horco pquitsgzhib zho liu, beennon zho me, rnee zho grè diidz ndzon lo me; blozh ga ñe rley zho laa zho wbi ga, bdziñ zho Jerusalén stib. ⁵³ Psilo zho gzataa dze rie zho yadoo roolnie zho Dios, rdeed zho xquizh lo me.

XTIIDZ NDZON DIOS MIÑE PQUIAA JUAN

¹⁻² Jesús, men ne nac Diidz Ndzon, nole me zeene baa grëtaa ncuuañe no; lo Dios no me ni Diosaque nac me. Notaque me, tibaque nac me: me ni Dios. ³ Me bzaa grëtaa ncuuañe no, tsod ncuuañe lega scase niaan; sac me bzaaw grësew. ⁴ Ladznia me no guielmban ne gdziñd dze lozh, nac guielmban co zig tib biini ne rziini lo miech. ⁵ Me nac biini ne quiazini zaatne nac lo guielcow, ni rrieelod guielcow ctsew lo biini co.

⁶⁻⁷ Bio tib mguì brieelë Juan, Dios pxeel Juan biadnee Juan lo miech cho nac Jesús, zeena grëse zho gliladz Jesús. ⁸ Led ni menladz me, niicle ne lopaa zho bdziñ me ib gondzed zho me; tib chop zha ne blëzlo me. ¹² Ni grë zha ne sca bleyne me, grë zha ne dib zdoo gliladz cho nac me, grëse zha co laa me bzo zho gac zho xpëed Dios. ¹³ Grëse zho, rreequia gol zho stib! Per guiabd ne togo gol zho zigne ral grë miech guidzliu rii, sinque laa zho gol zigne racladz Dios; gane niina xpëed me nac zho.

¹⁰ Jesús nac biini, me nac Diidz Ndzon co. Me bzaa guidzliu, per zeene baaad me lo guidzliu ib biend miech cho nac me. ¹¹ Per ni menladz me, niicle ne lopaa zho bdziñ me ib gondzed zho me; tib chop zha ne blëzlo me. ¹² Ni grë zha ne sca bleyne me, grë zha ne dib zdoo gliladz cho nac me, grëse zha co laa me bzo zho gac zho xpëed Dios. ¹³ Grëse zho, rreequia gol zho stib! Per guiabd ne togo gol zho zigne ral grë miech guidzliu rii, sinque laa zho gol zigne racladz Dios; gane niina xpëed me nac zho.

¹⁴ Zeene bdziñ dze ne laa men ne nac Diidz Ndzon ga goc miech baaad me lo guidzliu, grop lo no bdziñ no me, ni bzianie no me. Blu me pa lotaa nqualadz me miech, ni niapse diidzli bnee me. Bdziñ no xquielndzon ne ne nac me tibpaa mëed lo Dios, men ne nac Pxoze.

¹⁵ Zeene bzeet Juan Bautist me lo miech, tib vuelt haxta blu Juan me lo zho, rëb Juan: "Lëe men rii ga gon rzet naa lo to zeene rne naa: Iraa ziaad tib men ne mazdraa non lo naa, sac notaque me; nole me zeene blanso naa lo guidzliu."

¹⁶ Nqualadzdox Jesús ne, grëse ne gzataa dze laa ne nogaa grëtaa guielnaac ne rsi-aab me. ¹⁷ Zeene psañ Moisés ley, loxaque bnabeya ne; sangue niina ne laa Jesús baaad, laa me baaadnie miñe nacpaa diidzli ni baaadlu me ganle pa lotaa nqualadz Dios miech.

¹⁸ Wlaltaa ib choot gard gan Dios; sangue niina ne laa Xpëed me Jesús baaad, men co baaadlu ganle zha nac Dios; sac zaatne no Dios gaque no me.

Rnee Juan Bautist cho nac Jesús

(Mt. 3:11-12; Mr. 1:7-8; Lc. 3:15-17)

¹⁹ Tib dze pxeel grë zha ne nac zha non Jerusalén, bla zha ne nac pxoz ni zla zha ne rquianap yadoo, zienabdiidz zho lo Juan dien cho nac Juan.

Bdziñ zho bnabdiidz zho lo Juan. ²⁰ Dzigo bneeli Juan lo zho, rëb Juan:

—Golgacnañ ganle, led naad nac Men ne quiambëz to ga cxeel Dios.

²¹ —¿Cho nac luu waa? —rëb zho—. ¿Te luu ye nac Lí, men ne biadteed xtiidz Dios padzeela?

Pquiab Juan rëb Juan:

—Lëda, led Lid naa.

Biire zho bnabdiidz zho, rëb zho:

—¿Te luu ye nac men ne bzeet Dios padzeela cxeel me guiadteed xtiidz me?

Pquiab Juan rëb Juan:

—Zhaa men co, led naad nac men co.

²² —¿Cho dzigo nac luu? —rëb zho—. Bñe dien cho nac luu; sac gon ib none gdziñne no tib xtiidz luu lo zha ne pxeel no.

²³ Dzigo pquiab Juan, rëb Juan lo zho:

—Naa nac mguì ne bzeet Isá, men ne biadteed xtiidz Dios padzeela, zeene znu bnee me: "Zon to zëëb tsi tib mguì dan rnee me lo miech: ¡Golgun nguudz zdoo to, sac gon ile ziaad men ne rnabey ne!"

²⁴ Horco laa zha ne pxeel zha farisé pquiab, rëb zho lo Juan:

²⁵ —Telne led luud nac Men ne zëëble didz ga cxeel Dios, niicle led luud nac Lí, niicle nacdgaa luu cho stib zha ne pxeel Dios ziadteed xtiidz me, zha nac dzigo ne nochoobnis luu miech?

²⁶ Pquiab Juan rëb Juan:

—Tel naa niab nis rchoobnis naa miech, per no tib men ne gard gunbey to. ²⁷ Tib men non nac me, per ni par gac naa tib ngundziin win ne glit lab me ni me raguiald naa; ni merle csilo gun me dziin ne pxeel Dios me gun me.

²⁸ Betain lë tib guiedz ne riaan gax ro guiubee Jordán, nëz ne rlan ngbidz; ga no Juan nochoobnis me miech zeene scataa pquiep zho me.

¿Cho nac Jesús?

²⁹ Biet stib dzew, laa Jesús bdziñ zaatne no Juan ga. Zeene gon Juan me, rëbchaa Juan lo grë miech ne ndxie ga:

—¡Golwi ganle, lëe men qui gon csilaa miech lo grëtaa xto! zho! ¡Me gac zig tib carner yeen ne guet tsozon lo Dios par guiaanmbe miech lo do! ³⁰ Lëe men rii ga nagon rzet naa lo to zeene rne naa: "Iraa ziaad tib men ne mazdraa non lo naa, sac notaque me; nole me zeene blanso naa lo guidzliu." ³¹ Len dze co niicle naa runbeyd naa me; per laa naa nochoobnis miech sac

iblee laa naa zial par glu naa me lo grë zha Israel.

³² Dzigo bzodiidz Juan lo zho, zha gonlo Juan biet Espiritu Sant gbaa, rlu me zigne rlu tib palom blëz me guic Jesüs.

³³ —Ne nligaa runbeyd naa me —rëb Juan—. Per zeene pxeel Dios naa zialchobnis naa miech, hor co në me lo naa: “Zeene gan luu guiet Espiritu Sant gbaa cuëz me guic tib mgui ne nochoobnis luu, dzigo gocnañ lëe men co nac men ne rxeel Espiritu Sant zdoo miech.” ³⁴ Gonlo naa blëz Espiritu Sant guic me; gane nanween naa ne nli Xpëed Dios nac me.

Zha ne glopaa goc xpëedscuel Jesüs

³⁵ Biini liu co, laa Juan zoque ga zonie me chop xpëedscuel me. ³⁶ Ga zo me, gon me laa Jesüs zieded ga; dzigo rëbchaa me lo zho:

—iGolwi ganle! ÿlëe men qui gon nac Xcarner yeen Dios!

³⁷ Zigne bin zhow, laa zho zienal zhits Jesüs. ³⁸ Zeene ptsire lo me, gon me laa zho nalte zhits me; dzigo rëbchaa me lo zho:

—ÿPe nac ziaadnal to zhits naa?

—Maestro —rëb zho—, laa no racladz gacndion no dien pa rbëz luu.

³⁹ Dzigo rëbchaa me lo zho:

—Na ganle guio ne, zeena gan to paw.

Nacne güeynal zho zhits me, gon zho pa lo no me; dzigo blëz zho lo me ga. Ga blozh ptse zho dze, sac ziedzele dze zie zho.

⁴⁰ Ndrës lë tib zha ne güeynal zhits me ga; lëe Ndrës co nac bets Simón Pedr. ⁴¹ Dzigo zigne brieë Ndrës ga güey Ndrës güeyguib Ndrës Simón. Bdzin Ndrës rëb Ndrës lo Simón:

—iNasi gon laa no bdzion Men ne nacle diidz ga cxeel Dios!

⁴² Dzigo güeynie Ndrës Simón zaatne no Jesüs ga. Zeene gon Jesüs Simón, rëbchaa me lo Simón:

—Bina ganle, nli Simón nac lë luu ni xingan Jonás nac luu, sangue niina laa luu grielé Cef.

(Cef rnee zha Israel quie, laa xtiidz zha Gres rnee zhow Pedr.)

⁴³ Biet stib dze co, laa Jesüs no nëz tsie me nëz Galilé. Laa me zieriee dze ga, zeene bdzieel me tib mgui lë Lip; dzigo rëbchaa me lo Lip:

—Dënal zhits naa.

⁴⁴ Zha Betsaid nac Lip, ni zha coque nac Ndrës grop Simón.

⁴⁵ Dzigo güey Lip güeyguib Lip Natanael; rëb Lip lo Natanael:

—iLaa no bdzion Men ne nacle diidz ga cxeel Dios! Men ne rzeet Moisés lo libr ley ne psañ me, men ne scataa bzeet grë zha ne biadteed xtiidz Dios padzeela. ÿLaa no bdzion me, tib men Nazareta, lëe me ga nac Jesüs, xingan José!

⁴⁶ Pquiab Natanael, rëb Natanael:

—ÿNazaret ye? ÿGard grieequia tib zha non Nazaret!

—Gotsaa guio ne ganle —rëb Lip—, zeena ganzhal luu me.

Dzigo laa zho zie. ⁴⁷ Squi ziaad Natanael, zeene gon Jesüs Natanael rëbchaa me:

—iGolwi ganle, lëe zha qui gon nac merpaa zha Israel, sac mesi ib rquidied me!

⁴⁸ —ÿZha nacne runbey luu naa? —rëb Natanael.

Pquiab me rëb me:

—Glole naa beenbey luu, dzigoraa bredz Lip luu. Zeene zob luu tib zhan yag guigw, hor co gon naa luu.

⁴⁹ Rzee zdoo Natanael, rëb me lo Jesüs:

—iNlique nagon luu nac Xpëed Dios! ÿLuu nac zhirey zha Israel!

⁵⁰ Dzigo rëbchaa Jesüs lo Natanael:

—ÿPe ne binse luu ni naa gon naa zeene zob luu tib zhan yag guigw, ÿ mincose laa luu bliladz cho nac naa? ÿNaraa ganle gan luu ncuane mazdraa nroob!

⁵¹ Ni rëb me lo grë zha ne ndxie ga:

—Gneli naa lo to: zanaque to ganle zeene laa zhan gbaa gzhal, zlupaa grë xanjl Dios, zha ne ziad-zëeb zha ne zieuquia, quiyayun zho dziin lo naa, nac naa Mgui ne pxeel me.

2

Güey Jesüs tib lo guiełtsieel

¹ Goc tson ngbidza, bio tib guiełtsieel guiedz Caná, xtan zha Galilé ga. Dzigo bredz zho xniaa Jesüs lo lni co, ² ni bredz zho me; nacne bional no zhits me grëse no ne nac no xpëedscuel me.

³ Laa lni noyac, tibaque zeene laa vin blozh. Dzigo güey xniaa Jesüs rëb me lo Jesüs:

—Laa xvín men rii blozh. ÿGuiendrea pe quiz zho!

⁴ Pquiab Jesüs rëb me:

—ÿPe nacne rnee luuw lo naa? Gon ganle naraa gdzin dze ne gacnañ miech cho nac naa.

⁵ Niicle sca rëb Jesüs lo me, güey me lo zha ne quiaquiz vin ga rëb me lo zho:

—Míne gnabeytaa me to, golguña.

⁶ Lidz men co ga ndxie xoop guies ne niaa quie; zaatne rio nis ne rquiin zha Israel riar nia zho, zigne nac grë xcostumbr zho. Tib tib guies co, rio maase xoopga re nis lena.

⁷ Dzigo bnabey Jesüs zha ne rguiz vin ga pcodzëe zho nis len gza guies co. ⁸ Blozhse guiel guiel pcodzëe zhow, rëbchaa me lo zho:

—Golcuee niip nis qui, goltsieniew lo men ne zo lo lni.

Zeene laa zho blee niip nis co tsienie zho, laaw nacle vin. ⁹ Ni lalnu ib güeynieed guic men co pa brieë vin co (loxaque zha ne nacse ngundziin ga, zha ne blee nis ga, zha

cose gon pa brieew), zeene pquiaaro mew, bredz me ngui ne notsieelnia ga, rëb me:

¹⁰ —jZha nan luu naraa cuee luu vin rii! Grëtaa zaatne znu rac lni, glo rgaaz vin ni-azh, zeene nrooblew noye zho, dzigo rgaaz vin ligase. Laa luu gon lej naraa bnabey luu brieew vin niazh.

¹¹ Milagr ne been Jesús guiedz Caná ga, ga glopaa blu me lo miech ganle nli tib men nroob nac me. Grëse no ne nac no xpëedsuel me, zeene bdzion now, hor co biladz no nli me nac Men ne zëëble diidz ga cxeel Dios.

¹² Zeene blozh guieltsieel co, laa no wbire guiedz Capernaum stib grë no me, xniaa me, ni zha bets me ne. Bdziñ no Capernaum, ga bliaaz no blalaa ngbidz.

Blee Jesús grë zha ne noyun lgui len yadoo (Mt. 21:12-13; Mr. 11:15-18; Lc. 19:45-46)

¹³ Len dze ne ziaadyob lni Pascw, lni nroob ne run zha Israel rsoladz zho zha psilaa Dios zho Egipt, len dze co brieew Jesús zie me nëz Jerusalén.

¹⁴ Bdziñ me Jerusalén, güey me len yadoo nroob ne zob lad guiedz co. Zeene bzëëb me, gon me nzian miech ne ndxie ro yadoo co, zha ne no wto ngon, zha ne no wto mëcwxiiil, zha ne no wto palom ne, haxta zha ne rtsëë dimi ndxie ga. ¹⁵ Dzigo bzhixcuua me tib lë doo zig ríaa dooguid ne rcaa ma, bzhen me doo co benxoon me zho ga grë xma zho; blozh ga, ptiixche me xmez zha ne notsëë dimi ga, nëzrii nëzrec blaaj me xtimi zho.

¹⁶ —jNiinagazh golcuae grë ncuuan qui nu! —rëb me lo zha ne rto palom—. jGolguien ganle lidz Pxoaz naa nu! jNacda yu lgui parne tso to wto nu!

¹⁷ Dzigo psoladz no zha ziaad lo Xtiidz Dios, zaatne rnee: “Rbinladz guic naa, sac ne nligaa racladz naa yqiaanap naa lidz luu.”

¹⁸ Blalaa zha non lo menguedz Israel, zeene gon zho sca benxoon me grë miech co, wbig zho lo me rëb zho:

—jCho nac luu ne squitaa noyun luu grë ncuuan qui? jBeen tib milagr, dzigo zliadz no men rnabey nac luu!

¹⁹ —Telne racladz to milagr —rëb me—; goltsil yadoo rii, ni gni naa lo to ganle ngbidz tsona laa naa bzaalolew stib.

²⁰ Pquiab zho rëb zho:

—jNcuuañe gliladzdraa no rnee luu! jLen choopxoopraa iz name bíaa yadoo rii! jZhazhe gun luu, tsonaque ngbidz gzaa luuw stib?

²¹ Per zeene sca bnee Jesús lo zho, xcuerp me ga nac yadoo ne bzeet me. ²² Gane zeene brieewan me, hor co psoladz no zeene znu bnee me, dzigo bien no ne me ga bzeet me ni bien no ne me ga raquiet lo Xtiidz Dios zaatne scaque rnee.

²³ Len dze lni Pascw co, nzian miech zeene gon zho grëtaa milagr ne run me, biladz zho ne nli me nac Men ne zëëble diidz ga cxeel Dios. ²⁴ Per ib pxend me lo zho, sacne nanwen me zha nac zho tib tib zho. ²⁵ Pquiind me chopaa niab lo me zha nac zho; sac nanwen me zha nac tib tib miech ni nan me pe rza zdoo zho.

3

Jesús ni Nicodem

¹ Ziecowle liuw, bdziñ tib zha farisé lë Nicodem zaatne rbëz Jesús; tib zha non nac me lo menguedz Israel. Bdziñ me rëb me lo Jesús:

² —Maestro, ndion no ible Dios pxeel luu ziadseed luu no. Grë milagr nroob ne run luu, ga rlu ne Dios nacnie luu.

³ —Gneli naa lo luu ganle Nicodem —rëb Jesús—, grëse miech, telne gald zho stib grieelod grziñ zho zaatne rnabey Dios.

⁴ Pquiab Nicodem, rëb Nicodem:

—jGal zho stib ye? jZha grieeol gal miech stib? Tib zha ne nacle mengol, jniacac zrieelo sëëb zho zdoo xniaa zho gbiire gal zho?

⁵ Rëbchaa Jesús:

—Ible none gal miech, none gal zho zigne racladz Dios. Sac telne chobnisd zho ni ygaad zho Espiritu Sant, grieelod sëëb zho zaatne rnabey Dios. ⁶ Grëse miech zeene ral zho glo, miechse nac zho; sangue zeene ral zho stib, Espiritu Santle nac men ne rnabey zho. ⁷ Gacxe waa, gzeed zdoo luu znu rne naa: “Grëse miech, ib none gal zho stib.” ⁸ Nac cuent rii zig nac me ne rtop xcw, zeene rree me, nëzrii nëz rec zie me, ron luu razh zhoob me; per rand luu dien pa nëz zie me dien pa nëz ziaadga me. Scaque nagon nac zha ne ral stib, grieelod guien miech zha rnabey Espiritu Sant lo xquiejmban zho.

⁹ —Riend naa zha rnee luu —rëb Nicodem—. jRiend naa dien zha grieeol gac grë mine rnee luu!

¹⁰ Rëbchaa Jesús:

—jRiend luu ye zha rne naa? jMen rseed miech name nac luu lo menguedz Israel!

¹¹ Mine rne naa nu ncuuañe rien naaw, ncuuañe gon naaw, ni riende to zha naa. ¹² Telne riend luu zha nac grë mine rne naa nu zeene rzet naa ncuuañe rac lo guidzliu, jzha dzigo guien luu mine gne naa telne gzet naa grë ncuuañe rac gbaa?

¹³ Wlaltaa gard tso tib zha ne soquia gbaa, per no tib men ne biet gbaa, men cosi soquia me gbaa, sac ga nac zaatne no me; ni lëë men co nu nac naa. ¹⁴ Ni zigne pquianga Moisés tib meel brons tib guic yag zeene nonie me zha Israel dan zit co; scaque none yquianga naa tib lo yag, ¹⁵ zeena grëse miech, zha ne gbig dib zdoo

zho gnalo zho naa, zgaa zho tib guielmban ne gdzind dze lozh. ¹⁶ Sac gon rleyniedox Dios grëse miech ne ndxie lo guidzliu; gane niicle tib naa nac mëëd lo me per laa me pxeel naa lo guidzliu; zeena grëse zha ne gnalo naa, zgaa zho tib guielmban ne gdzind dze lozh; led yed zho nitlo. ¹⁷ Laa Dios pxeel naa lo guidzliu par csilaa naa miech lo dol, ziald naa par gdziibdol naa miech. ¹⁸ Sac grëse zha ne dib zdoo gnalo naa ne naa csilaa zho lo dol, nitlod zho. Sangue zha ne gnalod naa, laa zho bnitole ga, sac gon Xpëed Dios nac naa ni bliladz zho naa. ¹⁹ Laa zho bnitole, sac gon biaadpaa biini lo guidzliu ni laa ne nleynie zho biini, lel guielcow bleynie zho, sac guielntseeb nac mine zienal zho. ²⁰ Grëse zha ne run guielntseeb, rlëë zho ran zho biini. Ib rbigd zho lo biini, sac racladz zho xoobnen grë guielntseeb ne quiayun zho. ²¹ Sangue zha ne run mine rnabey Dios, haxta rley zho rbig zho lo biini, zeena glu ganle zienal zho mine rnabey me.

Rzeet Juan Bautist Jesús tib

²² Ga brieë Jesús güeynie me no nëz xtan zha Judé. Xtselaa bliiaz no ga grë no me, rchoobnis me grë miech co.

²³⁻²⁴ Len dze co gard guiab Juan Bautist ladzguuib; dzigo ye me nochoobnis miech zaatne lë Enón gax Salim; sac ga no naal nis. Nzian miech ne rdziñ lo me ga, rchoobnis me zho.

²⁵ Tib dzew, wbig tib zha Israel lo zla xpëëdsuel Juan, psilo zho nodildiidz zho dien cho zhiwrobnis nonraa; pe zhiwrobnis Jesús, te zhiwrobnis Juana ye. ²⁶ Blozhse bdildiidz zho, wbig xpëëdsuel Juan lo Juan, rëb zho:

—Maestro, men ne gon bzodiidznie luu ro guiubee Jordán ga, men ne scataa bzeet luu lo miech, iye me laa me quiachoobnis miech niina, ni ndal miech niapse lo me zie zho, zaaatraade zho nëz rii!

²⁷ Pquiab Juan rëb Juan:

—Ib Dios rdeed diidz zha gun miech tib tib xtsiin me, gacd ne lega zhal zho gun zho pe cos. ²⁸ Mine pso Dios naa, laaw ben naa: laa naa biallu ganle cho nac Men ne zëëble diidz ga cxeel Dios. Ni bneeli naa lo to ganle led naad nac men co; laa naa zial loxaque par gzet naa me lo miech zeena gunbey zho me. ²⁹ Ible lo me none gdziñ miech. Nac me niina zig tib mgui ne notsieelnia: Mgui ne notsieelnia, led zha lëë rzobnie ndzooop ne notsieelnia zho! Ni grë zha ne ndzieeldiidz zho, rley zho ran zho laa xamigw zho notsieelnia, rley zho ron zho pe rnee xamigw zho. Scadaa nagon rzaac naa niina: rley naa ron naa grë ncuane run me. ³⁰ Zigse zie dze, laa me gacnonraa; scagaa naa, zigse zie dze laa naa guiaawinraa.

³¹ Nëz gbaa ziaad me, min co ne mazdraa non me lo grë miech. Tel naa tib miech guidzliuse nac naa, ni ncuane riense tib miech lo guidzliu min co rne naa; ³² sangue me, niapse grë mine bin me, grë mine gon me min co rnee me lo miech; jni choot rililadzda! ³³ Zha ne rililadzse xtiidz me, rien zho ganle niapse diidzli rnee Dios. ³⁴ Xtiidz Dios rnee me lo miech; sac Espiritu Sant rdeed guielbiini lo me, ni Dios nac men ne pxeel me. ³⁵ Rleyniedox Dios me, nac me Xpëed Dios; gane grëtaa ncuane no gbaa, no lo guidzliu, ladznia me psan Diosa. ³⁶ Grëse zha ne gnalo me, laa zho bgaale tib guielmban ne ib gdziñ dze lozh; sangue zha ne gond xtiidz me, gdziñ zho gbaa, zaatne ygaa zho guielmban co. jGrëse zha co, ible zgaa zho guielnedox ne csiaab Dios!

4

Tib wnaa Samar

¹ Zeene bien Jesús laa zha farisé gocnanle ndalraa miech zienal zhiwseed me, ni ndalraa miech ne quiachoobnis me lo Juan ² (niicle ne led medpaa rchoobnis, sinque zha ne nac xpëëdsuel me zha co rchoobnis), ³ nacne brieë me xtan zha Judé ga, wbiere me nëz xtan men Galilé stib.

⁴ Par gdziñ me Galilé, none ted me xtan men Samar. ⁵ Xtan men Samar zieded me, zig groj dzew, laa me zie gax guiedz ne lë Sicar, ⁶ dzigo güeytie me zaatne quia guiuu ne rnee zho “Zhibzie Jacob”; lo liu ne psan Jacob lo xpëed me José padzeela. Rdzag me ziaad-zë me lo nëëg co, bdziñ me bzob me ro guiuu co; ⁷⁻⁸ ga blëz me, laa no zio lad guiedz Sicar zioxi no ncuane dioownie no me.

Ro guiuu co zob me bdziñ tib wnaa Samar zixi nis ga; dzigo rëbchaa me lo wnaa co:

—Bzhiguiel bzoladz niip zhis luu guie naa.

⁹ Bzee zdoo wnaa co gon me bnaab Jesús nis lo me, sac rlëëdox zha Judé ran zho zha Samar, per ni rneed zho lo zho.

—jNcuane gliladz naa! —rëb me—. jTi zha Judé gnab nis lo ti zha Samar!

Dzigo rëbchaa Jesús:

¹⁰ —Tel niaca mine guien luu ganle cho rnab nis lo luu, ni guien luu zha nactaa ncuane rzoladz Dios lo miech, haxta znab luu nis lo naa. Ni naasi gon, znedz naa nis ne rdeed guielmban.

¹¹ Pquiab wnaa co, rëb me:

—Per ni nzhend luu name pe cuee luu nis, zpa dzigo tsiebee luu nis ne rdeed guielmban ga? jGon ganle, guietdox bzie rii! ¹² Stiba, zniacxe mazdraa dzigo nac luu que pxozgol ne Jacob, men ne psan bzie rii? Nu name go me nis grë xma me; niicle grë xpëed mew, nuque go zho nis.

¹³ —Grëse zha ne rie nis rii —rëb Jesús—, rbiire rnaab zhis zho; ¹⁴ sangue nis ne rded naa, zha ne guiew gdziñdraa dze gnab zhis zho. Sac nis ne gded naa, masaque gdziba zdoos zho zig rdzib nis tib ro zhlian, ni nis co gdeed tib guielmban ne gdziñ dze lozh lo zho.

¹⁵ Dzigo rëbchaa wnaa co lo Jesús:

—Bzhiguiel bneedz nis co guie naa, zeena gnabdraa zhis naa, zeena guialxidraa naa nis nu.

¹⁶ —Güeygazh —rëb Jesús—, güeyxi tsieel luu, dzigo goltë prop to.

¹⁷ —Guiend tsieel naa —rëb wnaa co—. Gard ctsieelnia naa.

—Nli rnee luu —rëb Jesús—; ¹⁸ sac gaay mgui ne zibannie luu, ni tib zho ptsieelniad luu, niicle mgui ne nonie luu niinaw, ptsieelniadaque luu zho. ¡Nli miñe rnee luu!

¹⁹ Zeene bin wnaa co sca rëb Jesús, rëbchaa me:

—Zootne tib zha ne ziadnee xtiidz Dios lo miech nac luu. ²⁰ Tel scaw, bzhiguiel bnë dien, ¿zha nacne rnee grë meñ Israel ne leñ yadoo nroob ne zobpaa Jerusalén, gapaa none tsiegan miech Dios? Sac no ne nac no meñ Samar, rnee no ne ib guic gui ne zob nu, ga none tsiegan miech Dios; sac grë xmengol no ga güeygan zho Dios.

²¹⁻²⁴ Pquiab Jesús rëb me:

—Bina ganle, zdziñ dze zeene yquindraa ne goon guic gui riipaa, o Jerusalénpagaa tsie to tsiegan to Dios meñ ne nac Pxoos ne. ¡Ni laa dze co ziaadgaxe! Gacdraaw ne dien pa lo tsie ne tsiegan ne Dios, sinque zha ne nliipaa racladz gleynie me, none dib zdoos zho gleynie zho me; zigne gdeedse Espiritu Sant guielbiini lo zho.

‘Choot griielod gan Dios; gacxe waa zha ne gleynie me, none gleynie zho me zigne rdeed Espiritu Sant guielbiini lo zho; ni none dib zdoos zho gleynie zho me. Ni zha ne sca gleynie me, zha co rguib me. Tel to laa to rieganse Dios ni runbeyde to me; sangue no rdziuunbey no meñ ne riogan nu, sac gon lo xti meñ Israel ziaad meñ ne guiaadsilaa miech lo dol.

²⁵ —Nenda —rëb wnaa co—, per nan naa ib ziaad Meñ ne zëëble diidz ga cxeel Dios, meñ ne lë Crist; ni zeene laa me guiaad, me gnë diidzli lo no.

²⁶ Pquiab Jesús, rëb me:

—¡Naa gon nac meñ co! Lëe me nu nonee lo luu.

²⁷ Lëëtaaque hor co grëse no ne nac no xpëëdsueel me laa no bdziñ. Bzee zdoos no bdzioon no laa me nozodiidznie wnaa co, per ni tib no bnabdiidz lo me dien pe quianabdiidz me, dien pegaa quiazodiidznie me wnaa co.

²⁸ Laa wnaa co, zoque xche me ga, rias me laa me zie nëz lad guiedz. Bdziñ me, rëb me lo grë miech co:

²⁹ —¡Goltë ganle gunbey to ti meñ co! ¡Bzeet me grëse zha nac lo xquielmban naa! ¿Bay pe lëdle Meñ ne nole diidz cxeel Dios ga?

³⁰ Horco brieer grë miech co lad guiedz, ziaad zho zaatne gon wnaa co Jesús.

³¹ Laa no, quia no rdeed no ncuane gon me, per nëd me.

³² —Gowd naa —rnee me—. No stib xquielwagw naa miñe runbeyde to.

³³ Dzigo rnabdiidzla no, rnee no:

—Bod no cho biaadnie pe dow me, lal ne bio ne lad guiedz.

³⁴ Nëchaa me lo no:

—Lëe xquielwagw naa nac ne gon naa miñe rnabey Dios naa, ni csiaal naa dziin ne pxee me naa zialgon naa. ³⁵ To lëe rnee to: “Leñ stapraa mëe csilo gac wlaap.” ¡Per golwi lo grëtaa miech qui ganle, nac zho niina zig grë guielgon ne golle gliiap! ³⁶ Gacxe waa, ib none tsie to tsieleap to, tsietop to zho, zeena yгаа zho tib guielmban ne gdziñ dze lozh. Ni zigne razh zha ne rie wlaap, scaque zguizh Dios to tsietop to zho. ¡Ti guielbley nrooba, zigtaa par zha ne rana, zigtagaa par zha ne rlaapa! ³⁷ Ible nli diidz ne znu rnee: “Zhaa zha ne rie gon, stible zha ne rie wlaap.” ³⁸ Zig nac niina, laa naa rxel to tsieleap to zaatne ni tib xtsiin to psëëbde to; zhaa zha ne güey gon, na tole tsie wlaap.

³⁹ Laga laa me sca quianee lo no, laa grë menladz wnaa co no nëz ziaad zho nëz lo no ga. Nzian grë miech co, zeene bin zho rëb wnaa co bzeet Jesús grë ncuane ziyun me, biladz zho Jesús. ⁴⁰ Laa zeene blanso zho ga, bnaab zho lo me cuëz me ladz zho zhis. Dzigo nacne blëz me lo zho chop ngbidz. ⁴¹ Nzianraa grë miech co biladz me, zeene bin zho grë zhiwseed me.

⁴² —Nasi nagon laa no riladz me —rnee zho lo wnaa co—, sac nozhaldz bdzioon me, ni bdzioon no grë miñe rnee me. Nliw, ible me nac meñ ne ziaadsilaa grëse miech lo xtol zho.

Biac xpëëd tib zha ne quia dziin lo rey

⁴³ Zeene goc chop ngbidz co, laa no brieer ga gza no me, laa no bdzio nëz stib zio no nëz Galilé. ⁴⁴ Niicle ne bzeetle me: grëse zha ne ziadteed xtiidz Dios, ib randzed miech zho zaatne nac ladz zho; per ⁴⁵ zeene bzëëb me grë guiedz ne ngab Galilé, wen pcaania grë miech co me. Nzian zho güey lni Pascoo co Jerusalén, gon zho grëtaa milagr ne been me ga.

⁴⁶ Nëz no no bdziñ no Caná, zaatne sca bzaalo me nis vin. Ga bdzieelo me tib zha Capernaum, tib zha ne rquiaa dziin lo rey; lëëtaaque leñ dze co rzacné xpëëd me.

⁴⁷ Bin me laa Jesús brieë xtan meñ Judé, laa me no gdziñ Galilé. Dzigo biaad me biad-dzieelo me Jesús ga, bñab me lo Jesús tsienal Jesús zhíts me Capernaum, tsiegunguiaç Jesús xpëed me; sac nzhoò rac win. ⁴⁸ Dzigo rëbçhaa Jesús lo me:

—¿Pe haxta gan to dzigo guñ naa milagr, dzigoraa gliladz to naa?

⁴⁹ —Been tib guieñzaac gotsaa guionioò ne —rëb meñ co—, nend znuse lozh xpëed naa.

⁵⁰ Rëbçhaa Jesús:

—Bzë, tsod luu guieñné. ¡Laa xpëed luu biacle!

Dib zdoò meñ co bliladz me xtiidz Jesús, laa me bio nëz laa me zey. ⁵¹ Zhilew gdziñ me lidz me, zeene bdzieelo me bla zha ne quia xtsiñ me, rëb zho laa xpëed me biacle. ⁵² Dzigo bnabdiidz me lo zho, maase pa hor biac win. Rëbçhaa zho:

—Nieeg, zig rwe ngbidza, tibaque znuse brieë zhixlëé win.

⁵³ Dzigo psoladz me zig hor cotaque rëb Jesús lo me, laa xpëed me biacle. Dzigo dib zdoò me bliladz me Jesús, tsiel me, xpëed me, meñlidz me ne, grëse zho dib zdoò zho bliladz zho Jesús.

⁵⁴ Ga goc brop milagr ne been Jesús lo zha Galilé. Miñ co been me zeene wbiere me nëz Judé.

5

Biac tib meñ ne gacð grial

¹ Goc palal dzew, laa stib lni nroob rac Jerusalén, dzigo nacne güey Jesús Jerusalén stib.

² Ro guiedz Jerusalén, gax zaatne quia puert ne rded mëcwxiil, ga niaa tib pil nis rnee zho Betesd. Igo ro pil co niaa tib nsaap, rap nsaap co gaay arcw.

³ Lo nsaap co, ga ndxie nzian meñ rzacné, no zho rold lo, no zho në ni, no zho ib gacð grial [grëse zho laa zho ndxie ga quia mbëz zho gni lo nis ne no len pil co, ⁴ sac nac diidz poc poc riet tib xanj] Dios riesini lo nis co, dzigo zha ne znuse sëëb lo nis co, tel pe guieñguidztaa rzac zho, riac zho].

⁵ Ga nix tib mgui, gogle galptsiipton iz rzacné me. ⁶ Laa zeene gon Jesús me, ni bin Jesús scataale nroob dze rzacné me, rëbçhaa Jesús lo me:

—¿Pe racladz luu guiaac luu?

⁷ —Racladz naa —rëb me—, per guieñd cho csëëb naa len pil qui zeene laa lo nis rni. Zeene racladz naa sëëb naa, zhaale stib zha ne glo rzëëb.

⁸ Dzigo rëbçhaa Jesús lo me:

—¡Nasca zeena guche i! ¡Bzoli, bi yag ne bzhoob luu i, zeena bzë!

⁹ Zigne sca rëb Jesús, laa meñ co biac. Horcogazh blis me yag co, nzëni me laa me brieë ga.

Ni ne dze co nac tib dze nda lo zha Israel, ¹⁰ zeene gon zho ney me yag ne bzhoob me, rëbçhaa zho lo me:

—¡Pe rienñ luu nda nadze! ¡Lëda i gon squi yquianlan luu ncuuan qui dze rii!

¹¹ Pquiab me rëb me:

—Meñ ne beenguiac naa, mezhäl në lo naa, güey naaw.

¹² —¿Cho meñ sca në lo luu? —rëb zho.

¹³ Niicle me rienñaque dieñ chow, sac ndaldox miech ne ndxie ga; hor co laa Jesús bzëëble lad grë miech co. ¹⁴ Haxta len yadooraa bdzieel Jesús me, dzigo rëbçhaa Jesús lo me:

—Nana gon ne squi laa luu biacle, bien gunctaldraa luu xtol luu. Sac telne gond luu diidz, nend dzigole glaan luu tib guieñguidz ne mazdraa ntseeb.

¹⁵ Zeene laa me brieë ga, güey me lo zha ne rnabey lo zha Israel ga, rëb me lo zho Jesús nac meñ ne beenguiac me. ¹⁶ Nacne psilo zho quianal zho dieñ zha gnaaz zho Jesús pe nacne runguiaç me miech dze nda. ¹⁷ Blisqui zhow lo me, dzigo rëbçhaa me:

—Tel Pxoç naa gzataa dze quia yun me dziin; ni mincoque nac mine quia yun naa.

¹⁸ Zeene gon zho sca rëb me, mazdraa blëë zho lo me rzac zho tebaa zha gutgazh zho me. Rlëë zho, sac zienald me dieñ pa dze nda; mazdraa zeene rëb me Dios nac Pxoç me, sac ga rlu me ne lalga nac me con Dios.

Meñ nroob nac Xpëed Dios

¹⁹ Ni rëb me:

—Gneli naa lo to ganle: peet griee lod guñ Xpëed Dios lega guicse me, sinque ncuuane ran me run Pxoç me, miñ co run me. ²⁰ Nquialadzdox Dios me, grëtaa dziin ne run Dios rlu Diosa lo me; gane zun me milagr nroob ne mazdraa gzee zdoò to; ncuuane palalse i gon to niina ne biac meñ qui. ²¹ Sac telne gacladz me cueeban me tib mengut, zbeeban me zho, zigne rbee-banaque Pxoç me mengut. ²² Ni bzo Dios me, me guñ guieñwxtis, ²³ zeena grëse miech guieñ ganle zigne nonaque Pxoç me, scaque meñ non nac me, ni sca none gunnon zho me. Sac tel zha ne gunnon me, yele Pxoç me ga (meñ ne pxeel me) runnon zho.

Ni rëb me:

²⁴ —Gneli naa lo to ganle: Zha ne gliladz xtidz naa, ni gliladz zho meñ ne pxeel naa, laa zho bgaale tib guieñmban ne gdziñd dze lozh. Led yedraa zho yгаа guieñëdodox ne yгаа grëraa miech ntseeb; sac laa zho brieële ladznia guieñgut ga, bdziñ zho lo guieñmban co. ²⁵ Zdziñ dze zeene ye grë mengut, zon zho xtiidz Xpëed Dios; ni grëse zha ne gzoobdiaga, zban zho. ¡Ni lëë dze co

bdziñ niina! ²⁶ Sac gon, zigne rdeed Dios guielmban lo miech, scaque zrieelo gded naa guielmban lo miech. ²⁷ Ni bzo me naa, naa gun guielwxtis, gded naa mine tsieguial tib tib miech.

²⁸ ¡Gzeed zdo to! Sac ne nligaa, zdziñ dze, grèse mengut ne no len baa, laa zho grieeban ²⁹ zeene gon zho tsi naa. Grèse zha ne ndzinli wban, hor co laa zho yгаа tib guielmban ndzon; sañgue zha ne been guielntseeb, hor co laa zho guey lo guielnēdox ne rieguial zho.

³⁰ Per grieeelod gun naa guielwxtis naase, ib none gacnañ Pxož naaw. Grèse guielwxtis ne gun naa, laaw gun naa zigne gnabey Pxož naa, laaw gun naa zigne nonguiela, sac gon gunñ naa mine guiaabtaa guic naa, sinque laa naa gun mine racladz Pxož naa.

³¹ Telne niaca mine naase rne cho nac naa, zrieequia zha ne guiab nlida. ³² Per na, no stib men ne rzeet naa lo miech; ni nan naa diidzli rnee me. ³³ Haxta Juan Bautist, zeene pxeel to bla zha ne gueynabdiidz lo me, grèse mine reb me lo zho ga, diidzliw. ³⁴ Laa naa rzet min rii lo to, zeena gliladz to cho nac naa, zeena sca laa to lo xto! to; sac rquiindpaa dien cho miech guidzliu rii gnee cho nac naa. ³⁵ Zeene biaad Juan, goc me zig tib biini bziini me lo to palal dze zeena gunbey to naa; ni bley to pquiaadiag to mine bnee me. ³⁶ Nli bnee me cho nac naa; per gre milagr ne run naa min co quiaxobnenraa ganle cho nac naa. Pxož naa rneedz diidz run naaw; ni ga rlu ganle ne me pxeel naa. ³⁷ Haxta ye me mezhai qialu ganle cho nac naa, parga nli gard gan to me, niicle gard gon to tsi me. ³⁸ Ronde to pe rnee me, sac rililadzde to naa; sac gon me pxeel naa zialne naa xtiidz me.

³⁹ Nli rioxco to rseed to gre guits ne ziaad Xtiidz me, sac rien to ga ziaad dien zha yгаа to guielmban ne gdziñ dze lozh. Ni niicle ne lo co zhoobnee ganle cho nac naa, ⁴⁰ per nēde to gbig to lo naa, zeena yгаа to guielmban co. ⁴¹ Nēde to gunbey to naa, nēde to guien to cho nac naa, per peet nacd min co; ⁴² runbey naa to, ni lalnu rleyniede to Dios. ⁴³ Sac gon, me pxeel naa zial naa lo to, ni rlēe to ran to naa; mazd zha ne lega ziaadse, zha cosi lēēlēd rcaania to zho. ⁴⁴ Min co gon, ib rililadzde to cho nac naa! Sac laa guic to zienie loxaque dien zha gunnon samiech to to, ib rguibde to zha gacnon to lo Dios. ⁴⁵ Ni guiabde to togo naapaa gazo to lo Pxož naa, glisqui naa gre ncuaañe run to. Moisés gon sac men ne glisquiw; sac ley ne psan me, mine rnalō to csilaa to lo xto! to, lēew glu ganle pe nac grētaa ncuaañe quiaayun to. ⁴⁶ Sac gon, telne niaca mine nlipaa rililadz to gre mine pquiaa Moisés, zililadz to dzigo cho nac naa; golgan ganle, lo gre guits ne pquiaa me, ga rzeet me naa. ⁴⁷ Rlu rililadzde to gre mine pquiaa

Moisés ga, gane rililadzde to mine rne naa lo to.

6

Row gaay mil miech

(Mt. 14:13-21; Mr. 6:30-44; Lc. 9:10-17)

¹ Bded ga, tib dzew brieē Jesús bdedquia me nēz dan ro Nisdoo Galilē (lēēque nisdoo co ga rnee zho Nisdoo Tiberias).

² Miech guizhiu ne brieeñal zhits me, sac ziañ zho grētaa milagr ne run me, runguiac me gre men rzacnē. ³⁻⁴ Nzian zho nac zha ne zie lni Pascw, lni nroob ne rac Jerusalēn gzobse iz.

Grèse no ne nac no xpēēdscuel me, laa no nal zhits me. Zeene bdieedquia no ro nis co, dzigo bdzieep no tib cho gui win zob gañ ga. Loxaque laa no bzioob ga gre no me, ⁵ zeene bdziñ no miech guizhiu ne ziaadquia cho gui co, laa zho glansole lo no ga. Dzigo rebchaa me lo Lip:

—Lip, ¿pa guioziu ne ncuaañe gow grētaa miech qui?

⁶ Per lega scase reb me lo Lip, par dien pe guiab Lip; sac nanle me pe nac ncuaañe gun me.

⁷ —¡Ne nligaa pe zhidaa zho! —reb Lip—. Niicle telne niaca mine gziuu nzian gayoo guietxtil, ni ygaad ncuaañ co yгаа zho tiblē wingaw tib tib zho.

⁸ Dzigo pquiaab Ndrēs, bets Pedr, stib zha ne nacgza no; reb Ndrēs:

⁹ —Nu zo tib mēēdbgui win ney gaay guietxtil cebad ni schop mel win. ¿Per pa yгаа ncuaañ co lo grētaa miech qui?

¹⁰ —Golnee lo zho dien —nē me lo no—. Golguiab lo zho sob zho.

Ndzon zēē guizh nguia ga, dzigo laa grē miech guizhiu co bzob lo guizh nguia co (zig gaay mil rgaa loxaque zha bguise). ¹¹ Dzigo bnaaz me gza guietxtil co, bdeed me xquizh lo Dios. Blozhse ga, zigue rneedz mew lo no scase scaze rguiz now lo grē miech co; scaque been me grop mel co. ¡Grèse miech co, dow zho zaatne bieltaa zho! ¹² Blozhse dow zho, nēchaa me lo no:

—¡Goltsietop grèse mine biaan i, zeena nitloda!

¹³ Psilo no ptop no grē guietxtil ne biaan ga, zeene blozh bdopa, ¡lo gaay guietxtil cebad co, biodzē tsiipchop chicuid biow!

¹⁴ Zeene gon grē miech co milagr ro ne been Jesús ga, rneechaa zho:

—¡Ne nlipagaa, lēē men qui ga quiambi-aaz ne! ¡Me nac Men ne zēēble diidz ga cxeel Dios lo guidzliu guiaadteed xtiidz me!

¹⁵ Bienga Jesús racladz zho, zhoo tsienie zho me gac me zhirey zho, nacne bzoquia me guic gui win co, tipse me.

Rzē Jesús lo nis

(Mt. 14:22-27; Mr. 6:45-52)

¹⁶ Rguetsle liuw, bzhixuto no dan bdziñ no ro nisdoos co; ga bliiaaz no me. ¹⁷ Bdzionse no choot riansod ni laa liu rcowraa, dzigo mazd laa no bziaab len canó, laa no zio nêz Capernaum.

¹⁸ Laa no zionie canó co lo nis, tibaque zeene psilo rriee me, ntseeb riasoli lo nis co. ¹⁹ Maase gaay kilómetro o xoopgaaw goc zio no, tibaque zeene bdziñ no laa me ziaadzê lo nis co, gaxle lo no ga. Zeene bdziñ no sca ziaadzê me lo nis, bdzieeb no. ²⁰ Dzigo bnee me, nê me lo no:

—¡Gdziebde to! ¡Naa zial! nu!

²¹ Dzigoraa rley no bdziñ no laa me bzêeb len barcw; tibaque zeene bieñ no laa no brieequiale zaatne no gdziñ no ga.

²² Biini liu co, grê miech ne biaan stib nêz ro nis co, laa zho bdziñ zaatne nac ro nis ga, quiaambêz zho gañ zho me. Sac gon zho tibaque barcw zo ga, ni zeene wbii no ga, loxaque nose wbii. ²³ Gax zaatne bguiaañ me zho ga, ga bdziñ bla barcw ne ziaad nêz Tiberias; ²⁴ dzigo gonse zho niicle me niicle no ne nac no xpêêdsucel me, choot guieñd ga, nacne bzêebaque zho len barcw ne bdziñ ga ziaad zho nêz Capernaum.

Jesús nac men ne rdeed guieñmban

²⁵ Zeene blanso zho Capernaum, laa Jesús zole lo no ga; dzigo rêbchaa zho lo me:

—Maestro, ¿pa horzhe waa blanso luu nu?

²⁶ Dzigo rêbchaa me:

—¿Naa lêe ziaadguib to? Per ziaate to porne rien to cho nac naa, sinque laa to ziaad porne gon to bnedz naa ncuuañe pquiin to. ²⁷ ¡Golguieñ, tsienied guic to loxaque ncuuañe gowse to, sac znuxe rnitlo grê ncuuañ co! Sinque, goltoxooc golgun miñe racladz Dios, zeena ygaa to tib guieñmban ne ib gdziñd dze lozh. Ni naa ne nac naa Mgui ne pxeel me, naa gneedz guieñmban co lo to; sac ible miñ co pxeel me naa.

²⁸ Dzigo bnabdiidz zho lo me, rêb zho:

—¿Zha dzigo dziuun no miñe racladz Dios? ¿Pe nac ncuuañe dziuun no?

²⁹ Pquiab me rêb me:

—Miñe racladz Dios gon to: gliladz to cho nac men ne pxeel me.

³⁰ —Telne scaw —rêb zho—, none dzianlo no gon luu nzian milagr; zeena gliladz no luu. ¡Nligaa peet milagr nroob gard dzian no gon luu! ³¹ Tel grê pxozgol ne, zeene wban zho grê dan bidz co padzeela, gobse dze biet tiblo quietxtil zhan gbaa, dow zho; rnee lo Xtiidz Dios: “Moisés rdeed quietxtil co lo zho.”

³² Pquiab me rêb me:

—Golgancañ ganle led Moisésd bdeed guieñxtil co, sinque Pxoos naaw. Ni niina gon laa me quiaaneedz merpaa quietxtil gbaa lo to. ³³ Sac gon, me pxeel men ne biet gbaa

ziaddeed guieñmban lo grê miech rii; men co nac quietxtil gbaa co.

³⁴ —Been tib guieñnzaac sca —rêb zho—, ¡gzataa dze bneedz quietxtil co dioow no!

³⁵ Pquiab me rêb me:

—Naa gon nac quietxtil ne rdeed guieñmban ga. Grêse zha ne gbig lo naa sêeb zho xnêz naa, gdziñdraa dze ne ycaabedz zho; grêse zha ne gliladz cho nac naa, gdziñdraa dze ne gnab zhis zho. ³⁶ Laa to gon, zigne bnelegaa naa lo to ga, jniicle ran to naa, per riladzde to cho nac naa! ³⁷ Grêse zha ne rxeel Pxoos naa, rlanso lo naa; ni tib zho tsireed naa. ³⁸ Sac gon, laa naa bieet gbaa zialgun naa miñe racladz Pxoos naa (men ne pxeel naa); bieete naa par gon naa miñe gacladztaa naa. ³⁹ Ni miñe racladz me, grêse zha ne bneedz me lo naa, ni tib zho nitlod, sinque cueeban naa zho gal dze ne laa guidzliu nitlo. ⁴⁰ Sac racladz me: grêse zha ne gbig lo naa ni gliladz zho naa dib zdoo zho, grêse zho ygaa tib guieñmban ne ib gdziñd dze lozh, ni cueeban naa zho gal dze ne nitlo guidzliu.

⁴¹ Dzigo psilo grê zha Israel rneenê zho me, loxaque ne rêb me, me nac quietxtil ne biet gbaa; ⁴² rnee zho:

—Men rii ga name rnee zho Jesús, me nac xingan José. Rdziuunbey ne xniaa me, rdziuunbey ne pxooz me. ¿Zha nac dzigo ne rnee me gbaa biet me?

⁴³ Dzigo rêbchaa me lo zho:

—Lêewga na, golsioog ro to. Nodne squitaa gzee zdoo to miñ co. ⁴⁴ Laa Pxoos naa pxeel naa zial naa lo guidzliu, per ni tib miech gon grieelod gbig lo naa telne niaca miñe cuedzd me zho; ni zig rnele naa ga, zha ne gbig, naa cueeban zho gal dze ne laa guidzliu nitlo. ⁴⁵ Znu rnee lo Xtiidz Dios, zaatne pquiiaa grê zha ne biadteed xtiidz me padzeela, rneew: “Laa Dios cseed grêse miech.” Ni lêe miñ co rac niina; gacxe nagon waa, grêse zha ne rquiaadiag miñe rnee Pxoos naa ni rseed zhow, grêse zha co lo naa rlanso zho. ⁴⁶ Zha ne rlanso lo naa, guiabde to togo gonlo zho me; ni tib choot gard gan me, naase nac men ne ziyañ me, sac zaatne no me ga brie naa zial naa lo to. ⁴⁷ Golliladz miñe gni naa lo to nu sca: ¡Grêse zha ne dib zdoo zho gliladz zho cho nac naa, zgaa zho tib guieñmban ne gdziñdraa dze lozh! ⁴⁸ Ne nligaa naa nac quietxtil ne rdeed guieñmban ga. ⁴⁹ Grê pxozgol to, zeene sca bio zho grê dan bidz co, nli dow zho quietxtil ne biet gbaa ga, per bdeetew guieñmban lo zho, sac grêse zho gut. ⁵⁰ Sangue quietxtil ne rne naa lo to, gbaa bieta ni grêse zha ne yquina zgaa zho tib guieñmban ne gdziñd dze lozh. ⁵¹ Xcuerp naa nac quietxtil ne biet gbaa, miñe rdeed guieñmban ga; grêse zha ne gow quietxtil co, zgaa zho tib guieñmban ne gdziñd dze lozh. Lêew gded naa zeena

grieelo yгаа grëse miech lo guidzliu rii stib guieľmban.

⁵² Psilo grë zha Israel co stib, quianeelsa zho, rnee zho:

—¿Zha nacne squi rnee meñ qui? ¿Zootne rnee me none dioow ne xcuerp me!

⁵³ —Gneli naa lo to ganle —rëb me—, telne gowde to xcuerp Mgui ne pxeel Dios, ni guiede to xchen me, ygaade to stib guieľmban co. ⁵⁴ Sangue zha ne gow xcuerp naa, ni guie zho xchen naa, ib zгаа zho guieľmban ndzon ne gdziñd dze lozh ga, ni naa cueeban zho gal dze ne laa guidzliu nitlo; ⁵⁵ sac xcuerp naa nac mine mazdraa rquín gow miech, ni xchen naa nac mine mazdraa rquín guie zho. ⁵⁶ Grëse zha ne row xcuerp naa, ni rie zho xchen naa, mbannie zho naa, niiclegaa naaw mbannie naa zho. ⁵⁷ Meñ mban nac Pxoз naa, meñ ne pxeel naa, me nac meñ rneedz guieľmban lo naa; ni scaquegaa zha ne gow xcuerp naa, naa gded guieľmban lo zho. ⁵⁸ Naa nac guietxtil ne nlipaa biet gbaa. Grëse zha ne gow guietxtil rii, zгаа zho guieľmban; led yed zho guet zig gut grë pxozgol to, zha ne sca dow guietxtil co.

⁵⁹ Lëë grë min rii bnee Jesús zeene pseed me miech len yadoo win ne zob Capernaum.

Diidz ne rdeed guieľmban

⁶⁰ Nzian grë zha ne rzënie Jesús, zeene bin zho grë mine bnee me ga, rneechaa zho:

—Zha ngandoxtaa nac grë diidz ne rnee me i. ¿cho gnë dien pe bnee me!

⁶¹ Bien Jesús sca nonee zho, dzigo rëbchaa me lo zho:

—¿Pe rlëë guic to bin to mine rne naa ga? ⁶² ¿Pe guiabzhe to dzigo zeene gan to laa Mgui ne pxeel Dios soquia gbaa, gbiire guey me zaatne no me glo? ⁶³ Espiritu Sant rneedz guieľmban lo to, telne guiend espíritu peet nond xcuerp to, sac bëëse naca. Ni grë diidz ne bne naa lo to, lëëw nac Espiritu, ni lëëw gneedz tib guieľmban ne gdziñd dze lozh lo to; ⁶⁴ sinque to, bii no zla to riladzd cho nac naa.

Sca rëb me sac desde psilo bzënie zho me, rienle me cho nac zha ne ib riladzd me, ni cho nac zha ne tsieto me.

⁶⁵ —Runbey naa to —rëb me—, gane ni naa lo to ni tib miech grielod gbig lo naa sëëb zho xnëz naa, telne niaca mine cuedzd Pxoз naa zho.

⁶⁶ Nzian zha ne rzënie me, hor co laa zho bzozit lo me, bzënedraa zho me. ⁶⁷ Dzigo bnee me lo no gza tsiipchop no ne nac no xpëëdsucel me, në me:

—To waa, ¿pe led yede to racladz gbiche lo naa?

⁶⁸ Pquiab Simón Pedr, rëb Simón:

—¿Per cho lora nadien guio no? Luuse nac meñ ne rseed miech diidz ndzon ne rdeed guieľmban ne gdziñd dze lozh. ⁶⁹ Laa no biladzle cho nac luu, laa no goncionle ne luu nac Meñ Ndzon ne pxeel Dios.

⁷⁰ —Nliw —rëb me—, ni naa bzooblo to gza tsiipchop to, per na gon laa tib to bzëëble xnëz menđox.

⁷¹ Zeene sca rëb me, lëële Judas ga bzeet me (zhin Simón Iscariot); sac ye Judas nacga no lo tsiipchop no ne bzooblo me ga, ni Judas nac zha ne güeyto me.

7

Riladzd menlidz Jesús cho nac me

¹ Bded ga, loxaque grë guiedz ne ndxie xtan zha Galilé, gase rietet Jesús. Sac grë zha Israel ne no xtan zha Judé, zha ne rlëë lo me, racladz zho gut zho me. ² Laa zeene bdziñ dze ne run zha Israel lni ne rzhixcuaa zho grë yu guizh, ni rbëz zho lena; ³ rëbchaa zha bets me lo me:

—¿Pe nacne ib rried luu nu? Brie zho, güey dib xtan zha Judé, zeena ye grë zha ne racnie luu ga gan grëtaa ncuanea run luu. ⁴ Sac gon, zha ne racladz guñbeyraa miech zho, grë ncuanea rac zho, rund zhow ngueets zhlian zigne run luu. Rac luu name run luu grë milagr nroob, beena za-atne gan nzian miecha.

⁵⁻⁶ Sca rnee zho lo me, sac niicle zha riladzd cho nac me; dzigo rëbchaa me:

—Griyelod ga naa niina, sac gard gdziñ dze co; zhaa nac to, zac tsie to zeene gadladz-taa to. ⁷ Tel to, rlëënie miech to; sangue naa rlëënie zho naa, sac rne naa lo zho pe nac grë guieľntseeb ne run zho. ⁸ Goltsie, tedse lni rii dzigo ga naa; sac gard gdziñ dze ne glu cho nac naa.

⁹ Dzigo laa me biaan ga. ¹⁰ Per loxaque brie zho zie zho, yeque me brie zho me; lëëraasi ngueetsse bdziñ me.

¹¹ Grë zha Israel ne rlëë lo me, quiaguib zho me lo lni co.

—¿Bay yo meñ co? —rnee zho—. ¿Pe nacne ib choot gard dzian me?

¹² Grë zha ne ndxie lo lni, loxaque me rzeet zho. No zho rnee: “Tib miech wen nac me”; nogaa zho rnee: “Pe miech wen na zho gac me, loxaque noquidie me miech.” ¹³ Per zhlianse rzodiidz zho rzeet zho me, sac rdzieb zho grë zha Israel ne rlëë lo me.

¹⁴ Goc chop tson ngbidz ne noyac lni, tibaque zeene laa me bzëëb len yadoo nroob ne zob lad guiedz ga, psilo me pseed me grë zha Israel ne no len yadoo ga. ¹⁵ Zeene gon zho zha rseed me, rzee zdo zho rnee zho:

—¿Zha nac squitaa rac meñ qui, ni laa me psee me grë zhiwseed yadoo?

¹⁶ Pquiab me rëb me:

—Led naad nobeebey grë miñe quiaseed naa miech, sinque laa naa quiaseed zho miñe rnabey meñ ne pxeel naa. ¹⁷ Teñe yquiablaz to guñ to mine rnabey me, ga guien to dien pe nli xtiidz Dios rseed naa miech, te miñe riab guic naaw ye. ¹⁸ Sac grë zha ne rnee grë miñe riab guicse zho, laa zho ruña zeena gacnziuu zho lo miech; sangue zha ne rioxco glu ne non meñ ne pxeel zho, zha cosi niapse diidzli rnee zho, rund zho ne yquidie zho miech. ¹⁹ Laa Moisés psan ley lo to, per, jni tib to gon zienald miñe rnabeya! ¿Pe nac dzigo racladz to gut to naa?

²⁰ Pquiab be grë miech co, rëb zho:

—¡Men dzable i gon noguitnie guic luu! ¿Chozhe racladz gut luu?

²¹ Rëbcha me:

—Tib vult, loxaque gon to beenguiaac naa tib meñ rzacné dze ne rdziiladz to lo dziin, na grëga to squitaa rac lo naa. ²² Ni to gon, no hor par guñ to miñe rnabey ley run to dziin dze co; zig nac zeene rio tib mëed bey (niicle ne rirole pxozgol to bey co, zeene laa ley biaan). ²³ ¡Gase na ganle golwi! Rquia to rgo to tib mëed bey haxta dze ne rdziiladz to lo dziin, loxaque par quitsde to xley Moisés. ¿Pe nac dzigo ne riëe to lo naa loxaque ne beenguiaac naa tib miech dze co? ²⁴ Golguien ganle, nonguield ne lega gdziibdol to tib miech. Goltsocxo goltsienal miñe nac diidzli.

¿Cho nac Jesús?

²⁵ Blalaa meñ Jerusalén ndxie ga, dzigo psilo zho rnabdiidzlsa zho rnee zho:

—¿Pe led meñ riid ga zho scataa quiaguib zho gut zho? ²⁶ Pa zotaa me gon quianee me lo grë miech qui, ni choot peet rund me. ¿Pe goon bliladzle zhiwxtis ne naye ne me nac Meñ ne zëëble diidz ga guiaad lo guidzliu? ²⁷ Per gacda meñ qui. Teñ meñ quiw, rdziuunbey ne me, ndion ne cho zha nac me; sangue Meñ ne zëëble diidz guiaad ga, zeene gal dze ne laa me guiaad, choot gacnand dien cho zha me.

²⁸ Bin Jesús sca nonee zho. Squi ndxie grë zha ne noquiaadiag zhiwseed me len yadoo ga, nguietz bnee me rëbcha me:

—Ah, conque runbey to naa dzigo, jnan to pa nëz zial naa! Per led zhaald naa gon zial naa, no tib meñ ne pxeel naa per runbeyde to me; meñ co nac meñ ne rnee niapse diidzli. ²⁹ Sangue naa runbey naa me, sac lo me brie naa, me pxeel naa zial naa lo to.

³⁰ Dzigo gocladz zho naaz zho me ga, per ni tib zho wbigd nzhën zho me; sac gard gal dze co.

³¹ Grë zha ne ndxie ga, ndal zho bliladz me.

—Teñe led med nac Crist —rnee zho—, niacxe zuñ me grëtaa milagr nroob ne run

me. ¡Tsodraa zha ne guñ grëtaa milagr ne run me!

³² Bin zha farisé nozeet grë miech co Jesús, dzigo bnediidzaque zho grë zho pxoz ne rnabey, pxeel zho bla zhaguib zie zienaaz me. ³³ Bdzin grë zhaguib co, rëbcha me lo zho:

—¡Golxewc zniip! Zhile dze ne cuëz naa lo to; ib laa naa none gbiire guia naa lo meñ ne pxeel naa. ³⁴ Zguib to naa, per gdzieldraa to naa, ni grielod gdzin to zaatne guia naa.

³⁵ Grë zha ne ndxie ga, zeene bin zho sca rëb me, rzee zdoo zho.

—¿Pa naczhe zaatne tsie me? —rnee zho—. ¿Zha nacne ib gdziel ne me? Nend grë zha ladz ne tsieseet me, grë zha ne no stib ladz ben. ³⁶ ¿Zha nacne rnee me, zguib ne me per gdziel me lo ne, niicle grielodgaa guio ne zaatne guey me?

Nis ne rdeed guielmban

³⁷ Zeene gol dze ne laa lni co lozh (dze co nac dze ne mazdraa nroob), miech guizhiu ne ndxie; dzigo nguietz bnee Jesús lo grë miech co, rëb me:

—Grëse zha ne racladz guiaanwen zdoo, rzac zho zig nac zeene rnab zhis zho, guiaad zho lo naa, naa gded nis ne guie zho. ³⁸ Sac grëse zha ne dib zdoo gliladz cho nac naa, rnee lo Xtiidz Dios, masaque rrieequia tib nis ndzon ne gdzib zdoo zho, pale tib guiubee nroob; nis co gdeed tib guielmban cub lo zho.

³⁹ Sca bzeet Jesús Espíritu Sant. Ga bzeet me, grëse zha ne gliladz cho nac me zacnie Espíritu Sant zho. Gard guiaad Espíritu Sant len dze co, sac gard gbire Jesús lo guielndzon ne no me gbaa hor co.

⁴⁰ Blalaa zha ne ndxie ga, zeene bin zho sca bnee me, rneehaa zho:

—Ne nli pagaa, lëe meñ qui ga no guiaad antes ne glanso Meñ ne nacle diidz cxeel Dios ga.

⁴¹ Rrieequia zla zha ne rnee:

—¡Lëda! ¡Lëëgazh me i! Meñ qui nac Meñ ne zëëble diidz ga cxeel Dios guiaad lo guidzliu.

Rquiab zla zha ne rnee:

—Meñ Galilé nac meñ qui. ¿Niacxe lo xtií grë zha co grieequia Meñ ne cxeel Dios ga?

⁴² Pe led rnee lo Xtiidz Dios lo xtií rey David, ga grieequia me ni Belén ga gal me, zaatne gocaque ladz rey David.

⁴³ Zhaase zhaase rnee zho; leñ psilo zho nodiidiidz zho dien cho nac me. ⁴⁴ Brieequia bla zho gocladz naaz me, per ni tib zho wbigd nzhën zho me.

⁴⁵ Grë zhaguib ne zienaaz me ga, scase zho laa zho bdzin. Zeene gon grë pxoz rnabey co, grë zha farisé co choot bdzinied zho, rëbcha zho:

—¿Pe nac dzigo ne ziaadniede to me?

⁴⁶ Pquiab zho rëb zho:
—¡Wlaltaa gard dzian no tib men ne scataa ndzon rnee!

⁴⁷ Rëbchaa zha farisé:
—¡Pe nliipaa rnee to! ¿Yelaque to dzigo beengüet me? ⁴⁸ ¡Pe rwide to, niicle zhiwxtis new, niicle now, ni tib choot rliadz ne me nac Men ne zëëble diidz cxeel Dios ga? ⁴⁹ Grë zha nxen ne rliadz ne nli Dios pxeel me, ¡miech ndziibdeele nac zho, sac gon riend zho zha rnee lo ley!

⁵⁰ Ga zob Nicodem, men ne güeyzodiidznie Jesús ga glo, ye me nacgza grë zha rnabey co, dzigo guso me bnee me lo zho, rëb me:

⁵¹ —Golguien ganle nonguelda ne lega pe gnee ne. Sac gon, zig nac xley ne, rnabeya none gacndiongazh ne zha nac xtiidz tib miech, dien pe nac mine quiayun zho, dzig-oraac gac guielwxtis.

⁵² Pquiab zho rëb zho:
—¿Zootne ye luu lëe nacgza grë zha Galilé ne rleynie me? ¡Grë zha ne cxeel Dios, ni tib zho grieequiad Galilé! ¡Luuzhal bguiba lo grë guits ne ziaad Xtiidz Dios ganle, zeena gliladz luu!

⁵³ Blozh ga, grëse zho laa zho wbi, tib tib zho zeysse zho lidz zho.

8

Tib wnaa ro nëz

¹ Ga briece Jesús güey me zaatne rnee zho Gui Oliv.

² Zeene biini liu co, silgaw laa me bdzin len yadoo co stib. Nzian miech ne goclo lo me ga, nacne bzob me psilo me pseed me zho. ³ Laa me noseed grë miech co, zeene bdzin bla maistr ley, ni zla zha farisé, bdzinmie zho tib wnaa ne nole tsiel ni bgaant me stib mgui; dzigo bzo zho wnaa co glowtaa lo grë miech ne ndxie ga.

⁴ —Maestro —rëb zho lo Jesús—, laa wnaa rii bгаа nonie me stib mgui. ⁵ ¡Pe gnë luu dien zha gac me? Sac zig nac ley ne psan Moisés, rnabeya gdeedquie no grë wnaa ne squi nac, haxta guet zho.

⁶ Sca rëb zho, sac laa zho quiaguib dien zha cxin me tib diidz, zeena sca grieeo tsiezo zho me lo wxtis. Per zeene bin me sca rëb zho pquiitsrunga me liu, psilo me con mzhugna me noquiaa me lo liu.

⁷ Ran zho rquiabd me, wbiire zho bnabdidz zho lo me stib; haxta blis lo me, rëb me lo zho:

—Peet nacda, goldeedquie me. ¡Lëëraasi, zha ne rien ni tib dol rapd, zha co csilo gdeedquie me!

⁸ Blozh ga biire pquiitsrun me, psilo me stib noquiaa me lo liu. ⁹ Zeene bin zho sca rëb me, mazd mine been zho laa zho briece ga, sac bien zho miech ngoopdol nac zho. Zha ne nacpaa zha gol lo zho bner, blozh ga

zo zo briece zho grë zho; loxaque wnaa cose biaan ga.

¹⁰ Dzigo bzoli me, rëb me lo wnaa co:
—¿Yo grë zha ne scataa baaad-zo luu nu? ¿Ni tib zho lëe beenquizhd luu xtol luu?

¹¹ —Ni tib zho —rëb wnaa co.
—Niicle naa —rëb Jesús—, gunquizhd naa luu xtol luu. Bzë, per bien gbiiredraa luu gun luu grë ncuaaane gunctal xtol luu.

Jesús nac zig tib biini

¹² Bded ga, tib dze nonee Jesús lo grë zha ne noquiaadiag zhiwseed me, rëb me lo zho:

—Nac naa zig nac tib biini ne rziini lo miech. Grëse zha ne gbig lo naa, led yed zho soriel ni lo ncow, sac naa gziini lo zho zeena ygaa zho tib guielmban ndzon.

¹³ Zeene bin zha farisé sca rëb me, psilo zho nguiedz roptsie zho rnee zho:

—¡Cho gliladz xtiidz luu! ¡Lëëque luu rnee cho nac luu!

¹⁴ Pquiab me rëb me:
—Niicle ne naaque rne dien cho nac naa, per diidzli nac mine rne naa. Rien naa pa nëz zial naa, pa nëzгаа za naa; sangue to gon peet riende to, ¹⁵ gacxe waa, rcaadzdol to naa ncuaaane ni nacd naa; ncuaaane rcaadz-
dol to naa, niapse guic to riaba. Tel naa, zig nac niina noyund naa guielwxtis ¹⁶ per zeene gdzin dze co, tib tib miech mine been zho min co glu dien pe nac mine tsieguial zho; sac Pxo z naa men ne nacnie naa, me gnë zha gon naa guielwxtis. ¹⁷ ¡Pe nacne rliadzde to mine rne naa? Led rnee lo xley to zeene tipse rzë xtiidz chop miech, ga rlu ne diidzli rnee zho. ¹⁸ Zig nac niina, naa nac tib zha ne rne cho nac naa, laa stib zho nac Pxo z naa men ne pxeel naa; sac gon ye me rnee ganle cho nac naa.

¹⁹ Pquiab zho rëb zho:
—¿Yo Pxo z luu na? ¿Pa no me?

—Runbeyde to me —rëb Jesús—, sac niicle naa runbeyde to naa. Telne niaca mine runbey to naa, runbeyle to me na.

²⁰ Gax zaatne riesan miech gon len yadoo nroob ne zob lad guiedz Jerusalén, ga zob Jesús zeene sca rëb me; per choot bnaazd me, sac gard gal dze co.

Grieeod gdzin to zaatne guia naa

²¹ Bded ga, biire Jesús rëb me:
—Laa naa guia nagon. Squiaguib to naa, per lëëque lo xtol to i nitlo to, sac zaatne guia naa grieeod gdzin to ga.

²² Grë zha Israel ne ndxie lo me ga, rneechaa zho:
—¿Pe goon lëëque me naye gut me? Zha nacne squi rnee me goon grieeod gdzin ne zaatne guey me.

²³ —Tel to —rëb me—, zha nëz lo guidzliu nac to; laa naa gon zha nëz gbaa nac naa. Men guidzliu rii nac to, sangue naa nacd naa zha guidzliu rii. ²⁴ Gane ni naa lo to lëëque

lo xtol̄ to i nitlo to. Ne nligaa, tel̄ne gliladzde to ne naa nac men̄ ne nac naa, ible lëëque lo xtol̄ to nitlo to.

²⁵ —¿Cho dzigo nac luu? —rëb zho.

Rëbchaa me:

—Blactaale rne naaw lo to. Haxta zeene psilo naa xtsin̄ naa, laa naa rne lo to gan̄le cho nac naa. ²⁶ Ndal grë ncuuaane zac glisqui naa lo to nu niina, ni ndal ncuuaane racladz naa gne naa lo to, per laa naa noyun̄ mine rnabeyse men̄ ne pxeel̄ naa; ni men̄ co nac men̄ ne rnee diidzli.

²⁷ Per ib riend̄ zho ne Dios ga rzeet me lo zho. ²⁸ Dzigo bnee me lo zho stib, rëb me:

—Nieeda gal̄ dze ne yquiaa to naa tib lo yag, dze co gun̄bey to gan̄le ne naa nac Mgui ne pxeel̄ Dios ga, dze co guien̄ to gan̄le led guicd̄ naa riab grë mine quiayun̄ naa; sinque mine pseed me naa, min̄ co rne naa lo to. ²⁹ Dios pxeel̄ naa ni tibaque nacie me naa, ib rsaand me naa, sac tibaque noxco naa run̄ naa mine rdziladz me.

Zha ne nac xpëed̄ Dios

³⁰ Grë zha Israel ne ndxie ga, zeene bin zho sca rëb me, bliladz zho ne me nac men̄ ne no cxeel̄ Dios ga. ³¹ Dzigo bnee me lo zho, rëb me:

—Tel̄ne racladz to gac to xpëed̄suel̄ naa, zha ne nlipaa ygab xnëz naa, none guiaadnal̄ to grëse zhiwseed naa. ³² Sac sca gun̄bey to mine nacpaa diidzli, ni lëew glu lo to zha laa to ne squi nac to zig tib ngundziin.

³³ Pquiab zho rëb zho:

—iNgundziin ye! iTel̄ no, zha xtiipaa Abraham nac no, wlaltaa gard gac no ngundziin lo miech! ¿Pe lo dzigo laa no, ne rnee luu laa xtiidz luu csilaa no?

³⁴ Dzigo rëbchaa me:

—Gol̄quiaadiaga gan̄le: zha ne tibaque noyunc̄tal̄ xtol̄, rrieequiacxe waa tib ngundziin nac zho lo dol̄ ga, sac lëëlew rnabey zho. ³⁵ Ni zha ne nac ngundziin lëë, zig run̄ miech nëz rii, grieelod xoon zho lo men̄ ne rree zho; san̄gue zha ne nac mëed̄, choot lo ngadood zho. ³⁶ Gacxe waa, tel̄ csilaa Xpëed̄ Dios to, dzigosi choot lo ngadoodraa to. ³⁷ Nli lo xti Abraham ziaad to; per laa to quia gon̄ quiaguib to dien̄ zha gut to naa, sac racladzde to yquiaadiag to zhiwseed naa. ³⁸ Laa naa rne grë mine blu Pxozaa lo naa, zeene no naa lo me; san̄gue to gon̄, laa to zienal̄ mine rnabey men̄ ne nac pxoz to.

³⁹ Pquiab zho rëb zho:

—iNi Abraham gon̄ nac pxoz no!

—iNlid ga nagon! —rëb me lo zho—. Tel̄ne niaca mine nli zhin̄paa Abraham nac to, zun̄ to grë mine been̄ me. ⁴⁰ Per na gon̄ lel̄ racladz to gut to naa, loxaque ne rseed naa to mine nac diidzli, mine blu Dios lo

naa. iTel̄ Abraham led squid been̄ Abraham! ⁴¹ Ni lalnu zienald̄e to mine been̄ Abraham, sinque laa to noyun̄ mine run̄ zha ne nlipaa nac pxoz to.

Pquiab zho rëb zho:

—iLed-xe mëed̄ ro nëzd no waa! Tibaque men̄ ne nac pxoz no, ni lëë men̄ co nac Dios.

⁴² Dzigo rëbchaa me lo zho:

—Tel̄ne niaca mine nli zhin̄ Dios nac to, nleynie to naa, sac gon̄ lo me brie naa zial̄ naa lo to nu. Led zhaald̄ naa zial̄ naa, me nac men̄ ne pxeel̄ naa. ⁴³ Ib rioguidc̄de to zha nac grë mine rne naa, ib riende tow, sacne ib nëde to yquiaadiag tow. ⁴⁴ Gol̄gacnañ sca gan̄le, lëë pxoz to ga gon̄ nac mëndox, lo ma ngab to, gacxe waa rdziladz to run̄ to grë ncuuaane run̄ ma. Tel̄ mëndox, haxta zeene biaan̄ guidzli tibaque nonitlo ma miech, ni ib rneed ma mine nac diidzli, sac ib nand̄ ma zha nac diidzli. Ible lëë xtsiin̄ ma ga nac guielwquidie, gacxe waa ma nac pxoz zha ne rquidie. ⁴⁵ iMin̄ co nagon̄, niicle diidzli nac grë mine rne naa lo to, per ib rililadzde tow! ⁴⁶ Ni tib to choot grieelod gnë laa naa noquidie, sac niapse diidzli rne naa. ¿Pe nac dzigo rililadzde to mine rne naa? ⁴⁷ Grëse zha ne nlipaa ngab xnëz Dios, rley zho rquiaadiag zho xtiidz Dios; per to gon̄ led xnëzd me ngab to, gacxe waa nëde to yquiaadiag tow.

⁴⁸ Horco pquiab zho rëb zho lo me:

—iPsiog ro luu men̄ Samar ngoopdol̄! iNlique mine rnee no ga nagon̄, ne mëndox noguitnie luu!

⁴⁹ —Choot mëndzab noguitnied naa —rëb Jesús—, sinque laa naa noxco xoobnëñ gan̄le pa lotaa men̄ nroob nac Pxozaa; laa to gon̄ lel̄ rsanwin̄ to naa. ⁵⁰ Noguibd̄ naa dien̄ zha guiaan̄non naa, per Dios gon̄ racladz me ne sca gaca; ni mesi nan̄ me pe run̄ me. ⁵¹ Gneli naa lo to gan̄le: iGrëse zha ne gzoob xtidz naa, gdziind̄ dze ne guet zho!

⁵² Pquiab zho rëb zho:

—iPer nlique nagon̄ mëndox noguitnie luu! Zig nac Abraham name gut me, grë zha ne biadteed̄ xtiidz Dios ne, grëse zho gut zho. ¿Zha nac dzigo rnee luu, zha ne gzoob xtiidz luu, gdziind̄ dze guet zho? ⁵³ ¿Pe mazdraa dzigo nac luu lo pxozgol ne Abraham, lo grëga zha ne biadteed̄ xtiidz Dios ga? ¿Cho rzac luu nac luu?

⁵⁴ Rëbchaa me:

—Tel̄ne lëëque naa noyunc̄non naa, nlid mine rne naa dzigo. Per na gon̄, Pxozaa, men̄ ne nac Dios ne rnee to rililadz to, me rlu gan̄le ne nli men̄ non nac naa. ⁵⁵ Tel̄ naa run̄bey naa me, ni run̄ naa mine rnabey me; san̄gue to gon̄, nlid run̄bey to me. Tel̄ gni naa run̄beyd̄ naa me, yelee naa ga dzigo noquidie zigne rquidie to. ⁵⁶ Pxozaa lo Abraham, bley me zeene gocnañ me laa naa znu guial̄

lo guidzliu rii. Ni zeene bdeed Dios diidz gon me naa, mazdraa bley me.

⁵⁷ Zeene bin zho sca rëb me, rëbchaa zho: —¿Gon luu Abraham ye? ¡Ni chooptsii iz name rapd luu! ¡Zha dzigo gon luu Abraham!

⁵⁸ —Gneli naa lo to ganle —rëb me—, no-taque naa; nole naa zeene gol Abraham.

⁵⁹ Horco ptop zho quie laa zho gdeedquie me, per znuse bded me lad zho brie me len yadoo, gondraa zho me.

9

Biac tib mgui ne rold lo

¹ Zieded Jesús tib lugar co, gon me tib mgui ne rcow lo, scale nac lo men co zeene gol me. ² Dzigo bnabdiidz xpëedscuel Jesús rëb zho:

—Maestro, ¿bay zha nacne squi golvie men qui guieñe qui? ¿Pe no pe xtol mew, te xtol mengol mew ye?

³ —Lëda —rëb Jesús—, led por xtold zhow; sinque squi gol me, zeena zeene laa me guiac, ga gan miech ganle zha nactaa grë ncuaañe run Dios. ⁴ Zhile laa liu ycow. None dzioxco ne dziuñ ne xtsiin men ne pxeel naa laga nasraa bii zho ngbidz, sac deque ycow liu choot grieelodraa gun dziin. ⁵ Laga bii no naa lo guidzliu rii, naa nac zig tib biini ne rziini lo grë miech rii.

⁶ Blozhse sca bnee me, ptsuc me lo liu, bzhixcuaa me niip beñ, dzigo bdëeb mew zhits guidlo mgui ne rcow lo ga; ⁷ blozh ga, rëbchaa me:

—Güey na, güeytiib lo luu ro pil Siloé.

(Siloé nac zig nacne rnee ne Pxeel zho zho.)

Dzigo güey mgui co güeytiib me lo me, zeene laa me wbiere laa me ranle.

⁸ Grë zha ne no gax zaatne no me, ni grë zha ne runbey me; zeene gon zho me, rneechaa zho:

—¿Mgui rii ga lëe rzob gdib i rnab gon?

⁹ No zho rnee mew, nogaa zho rnee led meda.

—Squidaa rlu me —rnee zho—, per led med i.

Nacne pquiab me mezhale rëb lo zho:

—Naaw, naa nac mgui co.

¹⁰ Dzigo bnabdiidz zho zha biac lo me. Rëbchaa me:

¹¹ —Men ne rnee zho lë Jesús, men co bzhixcuaa niip beñ dzigo bdëeb mew zhits guidlo naa, blozh ga pxeel me naa biatiib naa lo naa ro pil Siloé; zeene laa naa wbiere laa lo naa biacle.

¹² —¿Yo men co niina na? —rëb zho.

—Dieenda —rëb me—, nañd naa dien yo me.

¹³ Dzigo güey zho güeynie zho me lo grë zha ne nac zha farisé; ¹⁴ sac lëetse dze

ne rdziiladz zho lo dziin, lëetse dze co sca beenguiac Jesús lo me.

¹⁵ Grë zha farisé co, biire zho bnabdiidz zho lo me dien zha biac me; dzigo bzodiidz me lo zho zha bdëeb Jesús niip beñ lo me, blozh ga güeytiib me lo me, zeene laa me wbiere laaw biacle.

¹⁶ Blalaa zha farisé ne ndxie ga, psilo zho rnee zho:

—Nlid ne Dios pxeel men co, gacxe waa niicle runbeydraa me pa dze nac dze nda.

Pquiab zla zho rnee:

—Tel cholze miech ngoopdol nac me, ¿ni-acxe zrieelo gun me grë milagr qui?

Zhaase zhaase rnee zho.

¹⁷ Dzigo wbiere zho bnabdiidz zho lo me, rëb zho:

—Luu waa, ¿cho rzac luu nac men ne beenguiac lo lü ga?

Pquiab me rëb me:

—Ible Dios pxeel me. Tib men ne ziadteed xtiidz Dios lo miech nac me.

¹⁸ Per ib riladz grë zha wxtis co ne biac lo me, sac riladz zho ne rold lo me glo; dzigo bnabey zho gocredz pxoz me, gocredz xnäa me. ¹⁹ Bdzin grop mengol co, rëbchaa zho:

—¿Pe nli xpëed to nac men rii? ¿Pe nli na rold lo me zeene gol me? Tel nli rold lo me, ¿zha biac lo me ne laa me ran niina?

²⁰ —Nli xpëed no nac me —rëb grop mengol co—. Ni nli rold lo me zeene gol me; ²¹ per ndiond no dien zha biaca ne laa me ran niina, niicle ndiondgaa no dien pe no cho beenguiac. Benque zha gol-le nac me, mazd lo me gonabdiidz, mezhale gnë dien zha biac lo me.

²²⁻²³ Sca rëb grop mengol co, sac rdzieb zho grie zho xyadoo zho. Biaanle grë zha rnabey co diidz: zha ne guiab Jesús nac Men ne zëëble diidz ga cxeel Dios lo guidzliu; csaandraa zho sëeb zho yadoo.

²⁴ Wbiere zho bredz zho men ne biac lo ga, rëb zho:

—Bien ganle Dios zobwi, bnë diidzli lo no; sac tel no ndion no cholze miech ngoopdol nac men co.

²⁵ —Dieenda —rëb me—. Nañd naa dien pe miech ngoopdol nac me, te men wena ye. Per me gon beenguiac lo naa, sac rold lo naa glo.

²⁶ Dzigo biire zho bnabdiidz zho stib dien zha beenguiac Jesús lo me. ²⁷ Pquiab me rëb me:

—Ledaaw nile naa lo to, per ib riladzde tow. ¿Zha nac dzigo ne racladz to gonaque tow stib? ¿Te racladz to ye, ye to sëeb xnëz me?

²⁸ Dzigo psilo zho ndox zho lo me, rëb zho:

—Luuzhe tel xnëz me no luu, sangue tel no zhiwseed Moisés, min co zional no. ²⁹ Sac tel

Moisés, ndion no nli Dios pxeel Moisés, per mgui co ni ndiond no dien pa briece me.

³⁰ Pquiab me rëb me:

—Ncuaane gzeegaa zdoo ne i runbeydaque to cho nac me, ni ron to me beenguiac lo naa! ³¹ Ndion ne ganle rquiaadiagd Dios xtiidz cholze miech ngoopdoj, sinque laa me rquiaadiag xtiidz zha ne rien ne nli men nroob nac me, ni run zho mine rnabey me. ³² Stiba, wlaltaa gard dzion ne cho zha beenguiac lo tib miech ne znu gol rold lo. ³³ Telne niaca mine nacdien Dios men co, nrieelod me niunguiac me lo naa.

³⁴ —Psiioog ro luu! —rëb zho lo me—, jib racladzd no guiaad tib ngoopdoj nu guida-seed no!

Horco wbig zho, blee zho me ga.

Zha ne rold lo

³⁵ Bin Jesús sca blee zho me ga, dzigo zeene bdzieel Jesús me, rëbchaa Jesús lo me:

—Pe riladz luu men ne nac Xpëed Dios?

³⁶ Pquiab me rëb me:

—Bzhiguiel bnë lo naa dien cho nac men co, zeena gliladz naa me.

³⁷ —Gonle luu me —rëb Jesús—. Naa gon nac men co, lëe me nu nozodiidznie luu niina.

³⁸ Dzigo pquitsgzhib me lo Jesús, ni rëb me:

—Dib zdoo naa riladz naa ne nli Xpëed Dios nac luu.

³⁹ Blozh ga rëbchaa Jesús:

—Laa naa zial lo guidzliu rii, zeena glu dien cho rap doj, dien chogaa rapd doj; sac zha ne rzac miech peet riend, laa zho tsaa biini; laa zha ne rzoob zho niini, laa xquielrien zho ycow, guiaan zho zig tib zha ne rold lo.

⁴⁰ Blalaa zha farisé zo ga, zeene bin zho sca rëb me, rëbchaa zho lo me:

—Rzë diidz qui na lëe ye lo no rold?

⁴¹ Dzigo pquiab me rëb me lo zho:

—Tel niaca mine nlipaa zha ne rold lo nac to, grieelod gni naa rap to doj. Per na, ne masaque rzac to rolraa lo to, gane grëse ncuaane quiaayun to xtol to noyaca, to zëeba.

10

Mëcwxiił ni zha ne rquianap ma

¹ Ni rëb Jesús:

—Golquiaadiaga ganle: grëse zha rded stib nëz zeene rzëeb zho len lidz mëcwxiił, laa ne ted zho nëz ro puert, gase rlu ngbaan ga nac zho; ² sac tel men ne noyan maw, nëz ro puert nëz co rzëeb me. ³ Zha ne rquianap ro lidz ma, ga rxal zho rded me; niicle magaw, zeene ron ma tsi me, grëse ma rdziņ lo me; dzigo rbedz me ma, rneelë me ma tib tib ma, laa me rbee ma ga. ⁴ Rlozhse rbee me grë ma ne nac xma me, laa me rner lo ma; grëse ma laa ma rnal zhits me sacne

runbey ma tsi me. ⁵ Rienałd ma zhits stib miech, zeene ran ma zho znuse rzhoon ma; sac runbeyd ma tsi zho.

⁶ Grë zha ne ndxie lo me ga, ib biend zho zha nac godiidz co; ⁷ dzigo wbiire me bnee me lo zho, rëb me:

—Golquiaadiaga ganle: Naa gon nac zig ro Puert, zaatne rded mëcwxiił ga. ⁸ Grëse zha ne biaad glo rnee zho zha nac Men ne nacle diidz cxeel Dios ga, grëse zha co ngbaan ga nac zho, loxaque psaci zho par grieele cuan zho; ni grëse mëcwxiił ne nac-paa xpëcwxiił naa, güeynałd ma zhits zho. ⁹ Sangue naa, laa naa nile lo to ganle: Naa nac zig ro Puert, zaatne rded mëcwxiił ga. Grëse zha ne gbig lo naa, zlaa zho, peet lo tsoxtseebdraa zho; pale grë mëcwxiił ne zozëeb zorree ro lidz, ni rdziel ma guizh nguia, guizh ndzon row ma. ¹⁰ Zha ne nac ngbaan, zeene riaad zho loxaque rban zho ni rut zho; sangue naa, laa naa zial zeena yгаа to tib guielmban ne mazdraa ndzon, tib guielmban ne gdziņd dze lozh.

¹¹ 'Naa nac Baxtor ne nquialadzpaա xpëcwxiił. Sac zha ne nquialadzpaա xpëcwxiił, rquiad zdoo zho xquielmban zho, rsilaa zho ma lo guielxtseeb ne notaa ma. ¹² Per tel noyac-wree zha ne noyan ma, rquiad zdoo zho ma, zigne ran zho palo ziaad tib coyot ntseeb, ndxieque mëcwxiił ga laa zho rzhoon; sac led chend zho ma, led zhad nac xbaxtor ma. Zeene rdziņ coyot, nëzrii nëzrec rtsieets coyot ma, nogaa ma rgaa lo coyot. ¹³ Rzhoon zho, sac dimise nonie guic zho, peet liaadz nod zho ma. ¹⁴⁻¹⁵ Naa nac Baxtor ne nquialadz xpëcwxiił. Zigne runbey Pxoз naa naa ni runbey naa me, sca runbey naa grëse xpëcwxiił naa, niicle magaw runbey ma naa. Grëse ma, rleynie naa ma, laa naa rbeeladz xquielmban naa tosaque cuee naa ma lo guielxtseeb ne no ma.

¹⁶ 'No spalal xpëcwxiił naa, ma ne ngabd len corral rii; grëse ma co, ible zon ma tsi naa sac laa naa no gaxi ma, zeena tipse gac ma grë ma yquianaap naa ma.

¹⁷ Men ne nac Pxoз naa, rleynie me naa sac laa naa rbeeladz xquielmban naa; per ible zriebaan naa. ¹⁸ Naazhal rbeeladz xquielmban naa, choot grieelod lega ctiche xquielmban naa. Rap naa poder gded naa xquielmban naa, ni rap naa poder gbire gban naa stib. Dios bneedz diidzbey co lo naa.

¹⁹ Grë zha Israel ne ndxie ga, zeene bin zho sca rnee me, laa zho goc chop dii stib. ²⁰ No zho rnee:

—Yase mendox noguitnie guic men qui, o rzhinlegaa guic me. Pe nacne rquiaadiag to xtiidz me?

²¹ Rquiaab stib zho rnee:

—Niini rzë xtiidz meñ qui, led squid rac zha ne noguitnie mendox. Stiba, žniacxe zrieelo mendox gunguiac ma tib lo zha ne rold lo?

Rnee Jesús Xpëed Dios nac me

²² Leñ mää ne rac nała, leñ dze co noyac tib lni Jerusalén, lni ne ruñ zho rsoladz zho dze ne glopaa psilo quiaquiin yadoo. Ye Jesús bdziñ Jerusalén len dze co. ²³ Laa me zieded tib leñ nsaap ne quia cho yadoo co, nsaap ne rnee zho zhiNsaap rey Salomón; ²⁴ zeene wbig bla zha ne rnabey Israel, bn-abdiidz zho lo me rëb zho:

—¿Poc dzigo gdziñ dze ne gnë luu diidzli lo no? Telne nli luu nac Meñ ne zëëble diidz ga cxeel Dios guiaad lo guidzliu, niinagazh bnëw lo no.

²⁵ Pquiab Jesús rëb me:

—Blactaale zine naaw lo to, per riladzde tow. Stiba, pe zhidaa milagr ne ziyan to ruñ naa, gase rlu ganle cho nac naa; sac Dios meñ ne nac Pxoaz naa, meñ co rac-nien naa ruñ naaw. ²⁶ Ib riladzde tow, sacne led yede to ngab lo naa. ²⁷ Tel zha ne ngab lo naaw, ruñbey zho naa; niicle naagaaw ruñbey naa zho, ni zhits naa rzënal zho. ²⁸ Grëse zho, rded naa tib guiełmban ne gdziñ dze lozh lo zho, ni gdziñ dze nitlo zho. Choot grielod ctiche zho lo naa, ²⁹ sac meñ nroob nac Pxoaz naa meñ ne pxeel zho lo naa; choot grielod cuee zho ladznia me. ³⁰ Ni tibaque nac no grop no me.

³¹ Zeene bin grë zha rnabey co sca rëb me, psilo zho ptop zho quie nañ zho ngoquie zho me. ³² Dzigo rëbchaa me lo zho:

—Lo grëtaa milagr ne quiaacnien Pxoaz naa naa quiaayun naa lo to. Golnë dien, žpa miñ rlisqui to ne laa to racladz gneedzquie to naa?

³³ Pquiab zho rëb zho:

—iCoquiedaxe no luu waa por grë milagr ne ruñ luu, sinque laa no coquie luu por grë diidz ne rnee luu i, quiauitnie luu Dios! jTib miech beñse name nac luu, ni rnee luu laa luu nac Dios!

³⁴ Dzigo rëbchaa me lo zho:

—iLo xlibr ley to name zhonee zha rzac Dios zha ne pcaania xtiidz me, rëb me dios nac zho! ³⁵ Ni ndion ne ganle, grëse miñe rnee lo Xtiidz Dios, diidzliw; gacxe waa tel sca rëb me lo zha ne pcaania xtiidz me ga, ³⁶ žniacxe rguitnie naa me ga, zeene rne naa Xpëed me nac naa, ni mezhaz bzooblo naa pxeel me naa lo guidzliu rii? ³⁷ Telne ruñd naa milagr ne rlu Dios pxeel naa, ib gliladzde to naa. ³⁸ Per telne ran to rlu ne me nacnie naa, maase gliladzde to naa totsaque goliladz ne me nacnie naa; tsow guien to ganle ne tibaque nac no grop no me, zigtaa nacnie me naa, scaque nacnie naa me.

³⁹ Horco gocladz zho stib naaz zho me, per znuse brieer me nia zho. ⁴⁰ Dzigo brieer me ga güey me ro guibee Jordán, zaatne bio Juan pchoobnis Juan miech; ga blëz me palal dze. ⁴¹ Nzian miech ne güey lo me ga, rnee zho:

—Nli beend Juan ni tib milagr nroob, per grëse miñe bnee me zeene bzeet me meñ rii, zigne bneese me laaw norieequia niina.

⁴² Nzian grë miech ne güeyquiaadiag zhi-wseed me ga, dib zdoo zho bliladz zho ne me nac Meñ ne zëëble diidz ga cxeel Dios.

11

Gut Lazh

¹ Leñ dze co blanguidz tib mguie ne no guiedz Betain, lë Lazh; ni chop bzian Lazh tib zho lë Mart stib zho lë Mari. ² (Lëë Mari rii pchoob tiblo nceit nex ni Jesús, ni pcuiidz mew con guitsguic me.) ³ Dzigo pxeel grop wnaa co diidz lo Jesús, gacnañ me laa Lazh rzacne, sac nañ zho rleyndiox me Lazh.

⁴ Zeene blanzo diidz, nëchaa me:

—Peet tsienied guic to, niicle tel blanguidz me per nacda par guet me, sinque par glu ganle pa lotaa meñ nroob nac Dios. Ga glu ganle pa lotaa meñ nroob nac Xpëed me.

⁵ Zigtaa Mariw, zigtaa Marta, zigtagaa Lazha, nquialadz Jesús zho gza zho, ⁶ per ib biobladz me; leł blëz me schop ngbidz zaatne no me ga. ⁷ Dzigoraa në me lo no:

—Laa ne guio nëz xtan meñ Judë stib.

⁸ Dzigo rdzieets no:

—Maestro, žracladz luu tsie luu nëz co stib ye? Pense name goc bla ngbidz ga gocladz zho ngoquie zho luu ga.

⁹ Nëchaa me:

—Tsiipchopraa hor name rziini ngbidz, ni laga niini rna zac tibiladz zia ne, noxtseebd ne lega pa griel ni ne; ¹⁰ loxaque pcow luu, noxtseeb pa griel ni ne; sac ncow rna.

¹¹ Blozh ga në me:

—Laa xamigw ne Lazh nixguiesle, per na laa ne guio zeena gabee naa zhimcaalo me.

¹²⁻¹³ Tibaque ndion no nli nixguies Lazh, dzigo rdzieets no lo me:

—Telne raaguiesle me, zac-wen me sca.

Ib biend no ne gutle Lazh, gane sca rnee me. ¹⁴ Dzigoraa clar bnee me lo no, në me:

—Laa Lazh gutle. ¹⁵ Ni rley naa gon ne guieñd naa ga dze co, zeena sca grielo lozh gliladz to ganle cho nac naa. Golgotsaa guio ne nëz lo me ga niina sca.

¹⁶ Laa Mazh, zha ne rnee zho “Mëedgrop”, zeene bin Blanz sca në me, rneechna Mazh lo no:

—Guiend rson, golgotsaa cchoob zdoo ne guionał ne zhits me dien. Tel gut zho me, maase gut zho ne.

Jesús rbeeban ni me rdeed guiełmban

17-19 Gax Jerusalén riaan Betain. Zha ne rree Jerusalén, maase grol hor run zho nêz rdzin zho Betain. Nzian grê zha Jerusalén rdzin riequiaabdiuzh zho Marí grop Mart, riechoobladz zho zdo me lo xquielnê me ga.

Dze ne rac tap ngbidz bioliu Lazh, dzigo-
raa laa Jesús bdzin.

20 Gon Mart pa lo ziaad Jesús, dzigo brie
me biaad-xinêz me Jesús; laa Marí biaan ro
yu.

21 —Jesús —rêb Mart—, telne niaca mi
ne nu no luu segur niete bzian naa; 22 sac na
naa, grêtaa ncuane rna luu lo Dios, run
me mi ne rna luu.

23 —Peet tsienied guic luu —rêb Jesús—,
ible zriebean bzian luu.

24 Pquiab Mart, rêb Mart:

—Nliw, naapaa naa ible zriebean me ga
dze ne laa guidzliu rii nitlo, zeene grêse
mengut, laa zho griebean.

25 Dzigo rêb Jesús:

—Naa nac men ne rbeeban grê mengut,
ni naa nac men ne rdeed guielmban lo grê
miech. Grêse zha ne dib zdo gliladz naa,
niicle guet zho zig ret grêraa miech rii, dzin
dze ne gban zho stib. 26 Sac grêse zha ne
dib zdo rliadz naa, laa zho bgaale tib
guielmban ndzon ga, guiaan zho ladznia
guielgut. ¿Led rliadz luu lêê Mart, ne sca
gaca?

27 —Rliadz naaw —rêb Mart—. Rliadz
naa ne luu nac men ne bzooblo Dios ga, luu
nac Xpêêd Dios, Men ne zêêble diidz ga cxeel
me guiaad lo guidzliu.

28 Blozhse ga, wbiere Mart zie Mart zi-
etsedz Mart Marí. Bdzin Mart zhlianse
bredz Mart Marí (sac nzian zha ne ndxie ga
ziequiaabdiuzh Marí) rêb Mart:

—Niinapaale blanso Maestro, na laa me
rbeedz luu.

29 Zigne bin Marí sca rêb Mart, brie
nguzhoon Marí laa Marí zie nêz co. 30 (Bdzin
Marí, laa Jesús bii zo zaatne güeydzieel Mart
me ga; gase blêz me, bzêêd me lad guiedz.)
31 Grê men Israel, zha ne ndxie lidz Marí ga
ziechoobladz zdo me, zeene gon zho sca
lêêlêd brie me, naaque zho zhits me; sac
na zho bod ro xpaa bzian me ziegoon me.

32 Zigne bdzin me zaatne zo Jesús ga, pqui-
itsgzhib me lo Jesús.

—Jesús, luu ne nac luu men ne rna
bey —rêb me—, telne niaca mi ne nu no luu zeene
blanguidz bzian naa, niete me.

33 Psilo Marí roon Marí. Zeene gon Jesús,
niicle Mariw, niicle grê zha Israel ne bdzin
ga, mban rac zho, grêse zho roon, dzigo ye
me biab guielnê me. 34 Bnabdiidz me rêb
me:

—¿Pa lo pqueets to me?

—Dê ganle —rêb zho—, zeena gan luu pa
lo bguets me.

35 Horco psilo Jesús biin me. 36 Grê zha
Israel co, zeene gon zho roon me, rneehaa
zho:

—¿Golwi ganle, blactaa nquialadz me
Lazh!

37 Laa zla zho rnee:

—Led me name beenguiac lo mgui ne rold
lo ga, ¿pe nrieelod zha niun me, zeena niete
Lazh?

Briebean Lazh

38 Zeene laa Jesús bdzin ro baan Lazh,
biere biab guielnê me.

Zig nac tib bliee niaa baa co; rna tib quie
nroobntse zaatne rsêêb zho ngutoo; 39 dzigo
bnabey Jesús cob zho quie co.

Pquiab Mart, bzian ngutoo co rêb me:

—¿Mazd gdiobda! ¿Nadze rac tap ngbidz
gut me, mbanle na rlaa me!

40 Dzigo rêbchaa Jesús:

—Led laa naa nile lo luu, telne dib zdo
luu rliadz luu naa, bii zan luu ganle zha
nactaa grê ncuane ndzon ne run Dios.

41 Zeene blozh bdoz zho quie co, dzigo blis
Jesús lo me nêz gbaa, ni rêb me:

—Dios, luu ne nac luu Pxoz naa, xquizh
xquielnzaac luu sac rquiaadiag luu mi ne rne
naa. 42 Nan naa tibaque rquiaadiag luu
mi ne rnee naa, per laa naa rzeta niina,
zeena grêse miech ne ndxie nu gliladz zho
ganle ne nli luu pxeel naa.

43 Dzigo nguiedz bredz me, rêb me:

—¿Lazh, brieel!

44 Zigne sca bnee me, laa ngutoo co brie
ga, scase nriêl lar dib nia me, dib ni me ne,
ni nioog stib lê lar lo me. Dzigo rêb Jesús:

—¿¿Golxad grê lar ne nriêl me i, zeena guey
me!

Rguib zho dien zha yгаа Jesús

(Mt. 26:1-5; Mr. 14:1-2; Lc. 22:1-2)

45 Grê men Israel ne güeynal zhits Marí ga,
zeene gon zho sca bleeban Jesús Lazh, nzian
zho biladz ne nli Dios pxeel me. 46 Nogaa
zho lel güey zho güeyzodiidz zho lo grê zha
farisé zha bleeban me Lazh. 47 Horco lêêlêd
pcaalsa grê pxoz ne rna bey, ni grê zha
farisé, rêb zho:

—¿Pe gnê to dien zha gaca? ¿Zha dziun
ne mgui ne rnee zho Jesús ga, sac gon pe
zhidaa milagr ne quiayun me? 48 Telne
squisse csaan ne me, mbe grêse miech sêêb
xnêz me; lozh ga, zeene gacnan men rna bey
ne zob Romaw, laa me cxeel grê xmen guib
me guiaadnitlo zho xyadoo ne, guiaadnitlo
zho ladz ne.

49 Dzigo pquiab Caifás, men ne nac pxoz
nroob len iz co, rêb me lo zho:

—¿Ni lal nu lêê peet riende to! 50 ¿Pe riende
to mazd wena yгаа tib zha guet zho, zha
quizh par gdib guiedz, lêdle grêse zha ladz
ne nitlo?

⁵¹ Zeene sca rëb Caifás meñ ne nac pxoz nroob ga, ga bzeet me ible no guet Jesús par csilaa me grëse miech lo dol; per led guicd me biaba, sinque Dios psiaaba guic me. Ga goquiet ne laa Jesús guet, par csilaa me grëse zha Israel, ⁵² ni grëragaa zha ne no dipse lo guidzliu, zeena tipse gac grëse zha ne nac xpëëd Dios.

⁵³ Dzigo grëse zha ne nac wxtis ga, laa zho biaan diidz ne ible no yгаа Jesús gut zho me.

⁵⁴ Nacne briedraa Jesús ne nenlo nian zho me; dzigo mazd laa me brieenie no xtan zha Judé, güeynie me no zaatne wzhi no miech, bdziñ no tib guiedz win lë Efraín, ga bliaaz no grë no me.

⁵⁵ Len ngbidz co, ziaadyob lni Pascw. Nzian grë miech ne no grë guiedzlas ne ndxie dib ga, laa zho rsilo quiariee zie zho nëz Jerusalén; sac ansraa csilo Pascw nzian zho rie yadoo run zho grëse miñe rnabey ley par guiaanmbe zho lo xtol zho. ⁵⁶ Grëse zha ne rdziñ, len yadoo no zho rnabdiidzla zho dieñ pe zdziñ Jesús lo lni; sac grëse zho racladz gan me.

⁵⁷ Laa grë pxoz ne rnabey, ni grë zha farisé, laa zho bnabeyle, zha ne gantaa Jesús, tsienie zho diidz parne tsie zha ne tsienaaz me.

12

*Pchoob tib wnaa nceit nex guic Jesús
(Mt. 26:6-13; Mr. 14:3-9)*

¹ Sxoop ngbidz gdziñ dze lni Pascwa, güey Jesús guiedz Betain, zaatne no Lazh, meñ ne bleeaban me ga. ² Sac grëse menlidz Lazh, beenlo zho tib xtsee, gownie zho me.

Mezh no zho, laga laa Lazh zobnie me, laa Mart nodziib ncuane gowxtsee zho lo mezh, ³ tibaque zeene bzëëb Marí bzëëbnie Marí tib lo nceit nex ne rriee guiee ne lë nard, tib lo nceit niacza, rgaaw maase grol boté. Zigne bdziñ Marí bdëëb Marí nceit co ni Jesús, blozh ga con guitsguic Marí pcuiidz Marí ni me. Dipse len yu zëbqlaa nceit co.

⁴ Laa Judas Iscariot, tib zha ne nacgza no (zha ne bded ga pto me) zeene gon Judas sca bdëëb Marí nceit co ni Jesús, rneechaa Judas:

⁵ —Mazd tebaa zha ndo nceit qui. Nguizh-paa zhow maase tson gayoo pes plat, dzigo needz zho dimi co ngaaza lo grë zha mban ne guieñd pe yquiin.

⁶ Sca rnee Judas, per nliid ne rquia zdoo Judas zha ne guieñd pe yquiin, sinque laa Judas rguib dieñ zha cuan Judas dimi co, sac Judas ngotsow bziuud ne no dimi; zigse raclo dimi len bziuud co, zhlianse rbee Judas dimi co.

⁷ Dzigo rëbchaa Jesús:
—Psaan me. Ib laa me bdëëb nceit qui ni naa, zeena nzhixcuaale xcuerp naa gal dze ne laa naa ygueets. ⁸ Telne racladz to guñ

to xyudar zha ne guieñd pe yquiin, tibaque ranlsa to grë to zho, zac tsow ygad to lo zho; sangue naa zdziñ dze gandraa to naa.

⁹ Ndal grë zha Israel, zeene bin zho laa Jesús no guiedz Betain, bio zho nëz güey zho lo me ga, ni güeyso zho lo Lazh, meñ ne bleeaban me ga.

¹⁰ Zeene gon grë pxoz rnabey cow, nacne bnediidzaque zho ye Lazh none gut zho; ¹¹ sac por Lazh, nzian grë zha non, laa zho rbig nëz lo Jesús, laa zho riladz ne nli me nac Men ne zëëble diidz ga cxeel Dios.

*Bzëëb Jesús Jerusalén
(Mt. 21:1-11; Mr. 11:1-11; Lc. 19:28-40)*

¹² Biini liu co, dipse lad guiedz Jerusalén zhoob diidz laa Jesús gdziñ ga dze co. Grë miech guizhiu ne bdziñ ga zie lni Pascw, ¹³ psilo zho brieer zho ziaad-xinëz zho me; tib tib zho nzhenze zho tib lë zin. Lo guiebley co, zeene gon zho me, psilo zho nguiedz roptsie zho, rnee zho:

—Zha men nroobtaa nac Dios! Zha nd-zontaa men rii pxeel Dios ziaad lo ne! Jlëë men rii gnabey Israel!

¹⁴ Laa Jesús, zobse me lad tib burr yeen, zigne raquiet lo Xtiiidz Dios zaatne rnee:

¹⁵ Grëse to meñ Israel, gdziebde to.
JGolwi ganle, laa men ne rnabeyladz to ziaad i,

zobse me lad tib burr yeen!

¹⁶ Grëse no ne nac no xpëëdsuel me, ni tib no biend hor co ne grëse ncuane noyac ga, raquietlew lo Xtiiidz Dios; sinque haxta zeyle me gbaa, dzigoraa psoladz no nzian grë ncuane raquiet lo Xtiiidz Dios ga, gonlo no goca; ni bien no Jesús raquiet ga.

¹⁷ Lad grë miech guizhiu co no nzian zha ne gon zha bleeaban me Lazh, dzigo nguiedz rzodiidz zhow lo grë miech co. ¹⁸ Ni nzian grë miech co, laa zho blanso ga ziaad-xinëz zho me, sac bin zho zha been me milagr nroob co. ¹⁹ Grë zha farisé, zeene gon zho grë miech guizhiu co, rneechaa zho:

—Pe zhidaa grë miech qui racnie men qui! JPeraa nadien dziuun ne!

Rguib bla zha Gres Jesús

²⁰ Lad grë miech ne bdziñ Jerusalén ga, ziegan Dios len ngbidz Pascw co, lad co no blalaa zha zit ne nacd zha Israel, ²¹ dzigo bnee zho lo Lip (zha Betsaid nac Lip) rëb zho:

—Bzhiguiel bnë dieñ pa lo no Jesús, laa no racladz dzian no me.

²² Dzigo güey Lip rëb Lipa lo Ndrés, blozh ga güey zho grop zho güeynie zho diidz lo Jesús.

²³ Dzigo rëbchaa me lo zho:
—Naa ne nac naa Mgui ne pxeel Dios, niinataa nagon laa dze bdziñ zeene laa naa gbire guia gbaa stib. ²⁴ Golquiaadiaga ganle: Tib zhoxtil, telne tsoda liu tibaque zhoob

naca; per zeene laa zhoob co rio liu, nzian raca. Scaque naa nagon, none guet naa, none tsoliu naa, zeena gacnzian zha ne ygab xnêz naa. ²⁵ Sac zha ne rquia zdoo xquielmban, znitlonie zhow; sangue zha ne cueeladz xquielmban, zha cosi zgaa zho tib guielmban ndzon ne ib gdziñd dze lozh. ²⁶ Zha ne racladz sêeb xnêz naa, none guñ zho miñe rnabey naa; ni zaatne gdziñ naa yeque zho no gdziñ ga. Ni grêse zha ne sêeb xnêz naa ni gon zho xtidz naa, zunnon PxoZ naa zho. ²⁷ Mban rac zdoo naa niina. Per lêda ga guñ naa, telne guiep naa lo PxoZ naa csilaa me naa lo grêtaa guielnê ne no teed naa. ¡Sac par miñcopaa zial naa lo guidzliu rii!

²⁸ 'Dios, luu ne nac luu PxoZ naa —rêb me—. Blu lo grê miech rii ganle ne men nroob nac luu.

Dzigo bin zho zêeb tib tsi men co gbaa, rêb me:

—Laaw blule naa, ni niina laa naa gbire gluw stib.

²⁹ Nzian grê miech ne ndxie ga, zeene bin zho tsi men co, bzhaac zho nguziw; zha ne bien led nguzida, rnee zho:

—Xanj! Dios ga gon bnee lo me.

³⁰ Dzigo rêbchaa me lo zho:

—Laa to bin ganle laa PxoZ naa bnee, ni por to gon bnee me, zeena gon to tsi me ni gliladz to ne me pxeel naa. ³¹ Laa dze nagon bdziñ zeene laa Dios gunquizh naa xtol grêse miech guidzliu rii; lêe dze bdziñ zeene laa men dox piche gnabeydraa ma lo guidzliu rii zigne rnabey ma niina. ³² Sac zeene laa naa quia glaa lo cruz, ga cuedz naa grêse miech zeena sêeb zho xnêz naa.

³³ Ga bzeet me zha gut miech me. ³⁴ Grê miech ne ndxie ga, zeene bin zho sca rêb me, rêbchaa zho:

—¿Guet luu ye? Lo Xtiidz Dios name rnee, ib guete Men ne cxeel Dios ga. ¿Zha nac dzigo ne rnee luu laa luu guet? ¿Chopaa dzigo nac luu?

³⁵ Dzigo pquiab me rêb me lo zho:

—Naa nac zig tib biini ne noziini lo miech; ni ngabse dze ne cuêz naa lo to. Laga noziini naa lo to, golsêni zaatne riab biini zeena ygaade to guielcow; sac zha ne rzê lo ncow rien zho palo zie zho. ³⁶ Niina ne rdeeda diidz goliladz cho nac naa, zeena gac to zha ne nliipaa no lo biini.

Blozhse sca rêb me laa me biche ga, blulodraa me lo zho. ³⁷ Niicle gonlo zho nzian milagr ne been me, per ib rililadz zho ne nli Dios pxeel me. ³⁸ Ni ib scalegaa no gaca, sac ga brieequia miñe bzeet Isá (tib men ne biadteed xtiidz Dios) zeene znu rêb me: Dios, bui ganle ni tib choot nêd gliladz xtiidz luu,

niicle ran zho grêtaa milagr ne run luu.

³⁹ Ni nligaa ib brieelod nliiladz zho me; sac zeene pquiaa Isá, znu rêb me:

⁴⁰ Ncow psan Dios lo zho, ni been dip me zdoo zho;

zeena gand zho me, niicle guien dgaa zho zha gbig zho lo me csilaa me zho lo xtol zho.

⁴¹ Zeene znu bnee Isá, ible Jesús ga bzeet me; sac gon me grêtaa guielndzon ne rap Jesús.

⁴² Ndal zho sca ib bliladz me, per noquegaa zha ne bliladz me; zig nac grê zha ne rnabey lo zha Israel, ndal zho bliladz ne nli Dios pxeel me, per ib pxobnen zhow; sac rdzieb zho cuee zha farisé zho yadoo. ⁴³ ¡Ni stiba rdziladzraa zho guiaannon zho lo miech, laa ne guiaannon zho lo Dios!

⁴⁴ Len dze co, tib vuelt nguiedz bnee Jesús, rêb me:

—¡Grêse zha ne rililadz naa, yele PxoZ naa ga rililadz zho! ⁴⁵ ¡Ni zeene rwi zho lo naa, yele men ne pxeel naa ga ran zho! ⁴⁶ Naa nac zig tib biini ne rziini lo miech, ni grêse zha ne dib zdoo gliladz cho nac naa, zriee zho lo guielcow ne no zho. ⁴⁷ Grêse zha ne gon Xtidz naa, ni gband zho zigne rnabeya, led naad gunquizh zho dol co; sac ziald naa par gdziibdol naa miech, sinque laa naa zial par csilaa naa zho lo dol. ⁴⁸ Xtidz naa gac ley ne gunquizh zhow; zigtaa zhaw zigtagaa grê zha ne nêd gunbey naa, grê zha ne nêd yquiaadiag xtidz naa. ⁴⁹ Sac grêse ncuaane pseed naa miech, led guicd naa biaba, sinque PxoZ naa men ne pxeel naa, men co rnabey naa pe nac miñe cseed naa zho. ⁵⁰ Ni nanpaa naa, grêse diidz ne rnabey PxoZ naa naa rne naa, lêew rlu zha ygaa miech tib guielmban ndzon ne gdziñd dze lozh; gacxe waa, grêse miñe rnabey me gne naa, zigne racladz me scase rne naaw lo to.

13

Rguiib Jesús ni xpêèdsuel me

¹ Guieel ne rsilo lni Pascw; wdze co pcaal-sanie Jesús no grêse no ne nac no xpêèdsuel me, laa no nodiowtsee. Rienle me ne gataa laa dze co bdziñ, zeene laa me gbi lo guidzliu rii gbire me lo PxoZ me stib. Grêse zha ne ngab lo me, rleynie me zho; ne nligaa rleynie me zho haxta bdeed me xquielmban me psilaa me zho. ²⁻⁴ Rien me grêtaa ncuaane no, ladznia me psan PxoZ mew; lo PxoZ me briece me ziaad me lo guidzliu, ni lo PxoZ me gdziñ me niina ne laa me gbi lo guidzliu.

Laa no zioob no no mezh, tibaque zeene guso me blee me lar ne mbix me, bdziñlen me tib lê lar nool. Par hor co, laa men dox pquiil-le Judas, zhin Simón Iscariot, parne tsieto Judas me. ⁵ Dzigo blaas me nis tib len bandej laa me psilo noguiib me ni grê zha ne nacga no, zigse rlozh rguiib me ni tib zho

scase scase rcuiidz mew con lar ne ndxie len me ga. ⁶ Zeene laa me zie quuib me ni Simón Pedr, rëbchaa Simón lo me:

—jLëda i gon! ¿Pe nacne lej luu quuib ni naa?

⁷ Pquiab me rëb me:

—Griee lod guieñ luu niina, pe nacne quuib naa ni luu; haxta tedraa nu dzigo ganle guieñ luuw.

⁸ —jNend scaw! —rëb Pedr—, jPer naasi gon gnedzd naa diidz quuib luu ni naa!

Dzigo rëbchaa me:

—Griee lod sca ygab luu xnëz naa, telne siguiel luu quuib naa ni luu.

⁹ Horco pquiab Simón, rëb Simón:

—Bzhiguiel sca, niinagazh bdiib ni naa, per led loxaque nidse naa, sinque dib nia naa, dib guic naa bdiib.

¹⁰ Dzigo rëbchaa me:

—Zha ne gozle, nise zho riar; sac mbele zho. Scaque to nagon, mbele to grë to. Grë to rne naa, niicle ne led gzadpaa to mbe.

¹¹ Sca rëb me, sac rienle me cho tsieto me.

¹² Blozhse bdiib me ni no, wbiire wbix me xab co me, bzob me lo mezh; dzigo në me lo no:

—¿Pe bien to na pe nacne znu bdiib naa ni to? ¹³ Golwi ganle: To lëe, Maestro rnee to lo naa, ni rnee to naa nac men rnabey; ni nonguiela gon, sac ne nligaa scaw. ¹⁴ Golgan sca, niicle ne maistr naa, niicle ne naa nac men ne rnabey, per laa naa bdeed zig tib ngundziin win bdiib naa ni to. Nana sca, scaque golgac lo samiech to. ¹⁵ Laa naa blule lo to zha gun to, nana sca goltsienal min co. ¹⁶ Gneli naa lo to ganle, lo grë zha ne nac ngundziin, tsod zha ne nonraa lo zha ne rnabey zho; scaque grë zha ne rie mandad, tsod zha ne nonraa lo zha ne rxeel zho. ¹⁷ Laa to nanlew nasca. Gacxe waa, telne tsienal to wseed rii, zaacse gac lo xquielmban to.

¹⁸ Golquiaadiag ganle, grëse mine none naa nu, led par grëde tow. Naa bzooblo to, nanween naa zha nac to tib tib to, ni nanween naa zha rnee lo Xtiidz Dios, rneew: “Lëëque tib zha ne rownie naa, grieequia tsielo naa ladznia zha ne gut naa.” ¹⁹ Laaw rnegazh naa lo to niina, zeena zeene gaca, gliladz to ganle ne nli naa nac men ne rne naa nac naa. ²⁰ Ni golgona ganle, grëse zha ne ycaania Espiritu Sant, men ne cxel naa, naale ga noocaania zho; ni zha ne rcaania naa, yele men ne pxeel naa ga rcaania zho.

Rëb Jesús ne Judas nac zha ne tsieto me
(Mt. 26:20-25; Mr. 14:17-21; Lc. 22:21-23)

²¹ Horco psilo rlupaa mban goc zdoo Jesús, dzigo bneeli me lo no në me:

—Gneli naa lo to ganle, lëëque tib to gon tsielo naa ladznia zha ne gut naa.

²² Zeene bdzion no sca rnee me, psilo no rwillolsa no, rien d no dieñ cho nac zha ne rzeet me ga.

²³ Cuepaa me, ga zoob naa (rleynie me naa niicle ne raguiald naaw); ²⁴ dzigo blunia Pedr lo naa, gnabdiidz naa lo me dieñ cho nac zha ne rzeet me ga. ²⁵ Nacne wbix gag naa, bnabdiidz naa lo me.

²⁶ Dzigo nëchaa me:

—Laa naa cobie tib lë guietxtil, ni lo zha ne gan luu gded naa guietxtil co, lëe zho ga.

Dzigo bzhen me tib lë guietxtil, blozhse bloobie me guietxtil co, laa me bdeeda lo Judas. ²⁷ Zigne bnaaz Judas guietxtil co, laa mendox bzëeb zdoo Judas. Dzigo rëbchaa Jesús lo Judas:

—Mine no guic luu gun luu, na zeen nawdzegazh beena.

²⁸⁻³⁰ Zigne blozh dow Judas guietxtil co, lëëlëd briece Judas ley; pcowle luuw.

Lo grë no ne ziobnie no me lo mezh ga, ni tib no biend pe nacne sca rëb me lo Judas. No zho nan bod no pe ncuuane rquin lo lni co, rxeel me Judas tsiesi Judas, o nogaa pa tsiesan Judas palal dimi lo grë zha ne guieñ pe yquiiñ; sac Judas nac zha ne ngotsow bziiud win ne no dimi.

³¹ Gonse Jesús laa Judas briece ley, dzigo nëchaa me lo no:

—Niina nagon bdziñ dze zeene glu ganle zha nroobtaa guieñdzion ne rap Mgui ne pxeel Dios, ni ga glu ganle pa lotaa nac guieñdzion ne rap Dios. ³² Ni scaque Dios, zlu me ganle pa lotaa nac guieñdzion ne rap Mgui ne pxeel me ga. ³³ Xin yeena, jzhile cuéz naa lo to nu! Squiaguib to naa, per zigne rep naa lo grë zha Israel co, laaw rneque naa lo to niina: Griee lod sēnal to zaatne ga naa. ³⁴ Gane laa naa rsan tib diidz cub rii, ni laa naa rnabey to gun tow: Tib tib to, golleynie zha ne nacgrë to, golgantsi zho. Zigne rleynie naa to, sca golleynie zho. ³⁵ Zeene gan miech, ne nligaa dib zdoo to rleynie to samiech to, dzigo zien zho xpëedsuel naa nac to.

Ible ziab Pedr runbeyd Pedr Jesús

(Mt. 26:31-35; Mr. 14:27-31; Lc. 22:31-34)

³⁶ Dzigo bnabdiidz Pedr lo Jesús, rëb Pedr:

—Maestro, ¿pa dzigo nac zaatne tsie luu? Dzigo rëbchaa me:

—Zaatne ga naa, griee lod sēnal luu niinagazh; per ib laa luu no guiaadnal.

³⁷ Pquiab Pedr, rëb Pedr:

—¿Per pe nacne griee lod sēnal naa zhits luu niina? jSēnal naa zhits luu gon, niicxe maase gut zho naa waa!

³⁸ Dzigo rëbchaa me:

—¿Goon csaand luu naa ye Pedr, niicle gut zho luu? Nlid ga gon. Gneli naa lo luu ganle, zeene laa gall ycuedz tsonle vuelte rëb luu runbeyd luu naa.

14

Niapse por Jesús gdzin miech lo Dios

¹ Tsode to zhgab, tsode to guielnë. Tiblique golgun guic to, zigne dib zdoo to rililadz to Dios, scaque dib zdoo to golliladz cho nac naa. ² Golgona ganle: Zaatne nac lidz PxoZ naa, ndaldao zaatne cuëz miech no ga, tel niaca mine guieñd zaatne cuëz to, nile naaw lo to na. Gacxe waa, niina laa naa ga, gzhixcuuaa naa zaatne cuëz to ga. ³ Ni zeene lozh gzhixcuuaa naa zaatne cuëz to, hor co laa naa gbire guial stib, dzigosi laa to sènal zhits naa; zeena tibaque zaatne gbiaaz ne. ⁴ Laa to nanle nasca pa lo ga naa, ni nanlegaa to nëz ne.

⁵ Pquiab Mazh rëb Mazh lo me:

—Maestro, pelej nëz na gacndion no, ni per ni zaatne tsie luu ndiond no.

⁶ Dzigo rëbchaa Jesús:

—Naa nac nëz co, naa rseed miech mine nac diidzli, ni naa rded tib guielmban ndzon ne ib gdziñd dze lozh. Lo grëse miech, zha ne gliladz cho nac naa, zha co gdziñ lo PxoZ naa; guieñdraa stib mod ne gdziñ zho lo me. ⁷ Telne runbey to naa, dzigo runbeyaue to PxoZ naa. Ni runbeylegaa to me, sac tibaque ran to me.

⁸ Dzigo rëbchaa Lip lo me:

—Bzhiguieñ mazd blu PxoZ luu lo no. Tot-saque dzian no me, lëëlew ga dzigo.

⁹ Pquiab Jesús, rëb me:

—Blactaale dze ga name Lip no naa lo to, ni gardaque ye gunbey luu naa. jGrëse zha ne ran naa, lëëque PxoZ naa ga ran zho! jZha nac dzigo ne racladz luu glu naa me lo to? ¹⁰ jNiacxe rililadz luu dzigo ne tibaque nac no grop no PxoZ naa? Grëse mine rseed naa to, led guicd naa riaba; grëse ncuuane run naa, me rnabeya, me runa sac tibaque nac no grop no me. ¹¹ Golliladz sca ne tibaque nac no grop no PxoZ naa. Telne goon rililadzdgaa tow zigne rnee naa lo to nu, siquier lo grë dziin ne nodziuun no, ga golgan ganle ne nli tibaque nac no grop no me.

¹² Ne nligaa, gneli naa lo to ganle: Grëse zha ne rililadz cho nac naa, ye zho zun zho grë milagr ne run naa, ni haxta nroobraa ncuuane gun zho; sac tel naa, laa naa no guia zaatne no PxoZ naa. ¹³ Ncuuane gnabtaa to lo PxoZ naa, totsaque glu to ne nli rililadz to naa, zun naaw; zeena ga gan miech ganle me nac men ne mazdraa nroob, me nac men ne mazdraa non. ¹⁴ Ne nligaa, telne rnalo to naa, ncuuane gnabtaa to zun naaw.

Sxeel Jesús Espiritu Sant

¹⁵ Telne nli rleyynie to naa, golgun grë mine rnabey naa to sca. ¹⁶ Scagaa naa, laa naa gnab lo PxoZ naa cxeel me tib men ne tibaque gacnien to, tibaque cchoobladz

zdoo to; ib gdziñd dze ne csaan me to. jLëë men co ga nac Espiritu Sant, men ne rlu pa min nac diidzli; ni ible sxeel PxoZ naa me! ¹⁷ Zha ne ngabd xnëz naa, grieelod ycaania zho me, sac ran zho me niicle runbeyd zho me; sangue to, runbey to me sac me quianap to niina, ni zbëzga me zdoo to.

¹⁸ Ib csaanladzd naa to, zbire naa guial naa lo to stib. ¹⁹ Nli zhilew, zeene gandraa grë miech naa, sangue to gon bii zan to naa; sac zriebaanaa naa, ni scaquegaa to zgaa to tib guielmban ndzon ne gdziñd dze lozh. ²⁰ Gal dze co, zeene gan to laa naa grieeban, ga gliladz to ganle ne nli tibaque nac no grop no PxoZ naa, zigne tibaque nacie naa to ni naciega to naa. ²¹ Zha ne runbey zha nac grë mine rnabey naa, ni rban zhow zigne naca, ga rlu ne nli rleyynie zho naa; ni zigne rleyynie zho naa, scaque PxoZ naa zleyynie me zho; niicle naagaaw zleyynie naa zho, ni zlu naa lo zho ganle cho nac naa.

²² Dzigo pquiab Judas (zhaa Judas Iscariot), rëb Judas lo me:

—jPe nac waa lose no glu luu cho nac luu? jTelzhe grëraa miech waa?

²³ Pquiab me rëb me:

—Zha ne run mine rnabey naa, lo zha co glu naa cho nac naa; sac rlu zho ne nli rleyynie zho naa. Ni haxta ziaad no grop no PxoZ naa gbannie no zho; sac zigne rleyynie zho naa, scaque zleyynie me zho. ²⁴ Sangue zha ne rund mine rnabey naa, jzha dieñ glu naa lo zho cho nac naa? Sac rlu rleynied zho naa. Golsoladz ganle: grëse diidz ne ron to rne naa, led guicd naa riaba, xtiidz PxoZ naaw. ²⁵ Laa naa rne grë min rii, laga bii zo naa lo to nu, ²⁶ per zeene laa PxoZ naa cxeel Espiritu Sant men ne guiaad cchoobladz zdoo to (men co guiaad xcuent naa), men co lozh cseed to, ni guncsoladz me to grëse mine bne naa lo to.

²⁷ Laa naa guia, per laa naa rsan tib guielbley zdoo to, zeena zigne tibliladz rac zdoo naa, scaque tibliladz gac zdoo to. Sac guielbley ne rmedz naa lo to nu, nacda zig nac guielbley ne runbey grëraa miech guidzliu rii. Tsode to zhgab sca, niicle gdziebde to. ²⁸ Laa to binle ganle, laa naa no guia lo PxoZ naa per zbire naa guial naa lo to stib. Telne nli rleyynie to naa ine nley golgac, niina ne ron to laa naa guia lo me, sac gon men nroobraa nac me lo naa. ²⁹ Laa naa rne grë min rii lo to niina, zeena zeene gaca, ga lozh guien to ganle cho nac naa.

³⁰ Led nroobdraa sodiidznie naa to, sac ile ziaad mendox, men ne rnabey lo guidzliu rii. Peet grieelod gun mendox naa, ³¹ per ible none gon naa xtiidz PxoZ naa men ne pxeel naa, zeena gan miech ganle ne nli rleyynie naa me. jGoltsieso nasca, zeena zio ne!

15

Jesús nac zig tib lbë uv

¹ Naa nac zig tib zhan lbë uv, laa to nac zhicwa, laa PxoZ naa nac zig tib zha ne quianapa. ² Grëse zhicw lbë co mine rquiad nex lo, rchug mew; laa grë mine rquia nex lo, ine rsanmbe me low, rbelaan me low zeena yquiaraa nex low.

³ Zig nac to gon, laa Dios psanmbele to sacne zianal to grë xtidz naa mine pseed naa to. ⁴ Gbichede to lo naa sca, sinque tibaque golgacnie naa zigne nacnie naa to. Gogan ganle, zig nac tib zhicw lbë uv, peet nex grielod yquia low telne tibnëzle nixa; scaquegaa to nagon, grielod gun to grë ncuaañe rdziladz naa, telne nacniede to naa. ⁵ Golsoladz ganle: Naa nac zig nac lbë co, laa to nac zhicwa. Zha ne tibaque gacnie naa, grëse ncuaañe gun zho dzdiladz Dios; ⁶ sac tel piche zho lo naa, laa zho nacle zig tib zhicw lbë co mine nixle tib nëz, laaw nixle ga, ga gbidza; lozh ga laaw tsec. ⁷ Telne tibaque gacnie to naa, ni tibaque tsoxco to grë mine pseed naa to, dzigosi ncuaañe gacladzttaa to golanaba, ni scagaa scaania tow.

⁸ 'Gollu sca ne nli xpëedscuel naa nac to, golsannon PxoZ naa, niapse ncuaañe rdziladz me min co golanun.

⁹ 'Ne nligaa rleyniadox naa to. Golanun ganle, zigne rleynie PxoZ naa naa, scaque rleynie naa to. Golanun sca tibaque golanun mine rnabey naa. ¹⁰ Sac gon, zha ne gun mine rnabey naa, gzataa dze zleynie naa zho; sac sca rleynie PxoZ naa naa ne run naa mine rnabey me. ¹¹ Laa naa rzet min rii lo to, zeena guiaad tib guielbley zdo to. Ne nligaa, zeena guiaad tib guielbley nroob zdo to; ni naa gnedz guielbley co lo to.

¹² 'Laa naa rnabey to, laa naa rnab lo to: ¡Golleynie samiech to, zigne rleynie naa to! Tel naa, golanun ganle pa lotaa rleynie naa to, ¹³ sac led lega gdeedse tib zha xquielmban zho par csilaa zho samiech zho, sinque ga rlu zho ganle pa lotaa rleynie zho zho.

¹⁴ 'Ni to gon, telne gon to grë mine rne naa lo to, dzigosi nli rleynie to naa. ¹⁵ Led yedraa niina nac to zig tib ngundziin, sac zha ne nac ngundziin nand zho pe run men ne rnabey zho. Ne nligaa rleynie naa to, sac grëse mine rnabey PxoZ naa, grëse zigne rnee me, laaw bzodiidzle naa lo to. ¹⁶ Golanun ganle, led tod gon bzooblo naa, sinque, ¡naa bzooblo to! Ni laa naa bzooblo to zeena gun to niapse ncuaañe rdziladz Dios; dzigosi ncuaañe gnabtaa to lo PxoZ naa, ne nac to zha ne no xnëz naa, zneedz mew. ¹⁷ Laa naa rso diidz lo to: Golleynie samiech to. ¹⁸ Niicle rlëë zho ran zho to, golsoladz ganle, desde naa squi rlëë zho ran zho. ¹⁹ Rlëë zho ran zho to, sac laa naa bleele to lad zho, zianaldraa to ncuaañe rleynie

zho; laa telne nagon bii nac to zigne nac zho, dzigosi zëëb gleynie zho to. ²⁰ Golsoladz ganle, zeene znu ni naa lo to: ¡TsoD ngundziin ne ndziibsrara non lo zha ne rnabey zho! Tel naa, pquianañ miech naa, ¿pe lel to dzigo gandze zho? Nana, zigne brieecuiaagaa palal zha ne bliladz xtidz naa, scaque zrieecuia zha ne yquiaadiag mine gnee to.

²¹ 'Ible squianañ miech to ne nac to zha ne ngab xnëz naa, sac runbeyd zho Dios men ne pxeel naa. ²² Tel niaca mine niald naa, niicle ned naa lo zho, zac guiab ne peet xtold zho, sac riend zho pe run zho. Per na gon, guien pe yquiaaqui zho; sac bial naa bne naa lo zho. ²³ Zha ne rlëë ran zho naa, ye le PxoZ naa ga rlëënie zho. ²⁴ Ne nligaa telne niaca mine nianñ zho grëtaa milagr nroob ne run naa, zac guiep naa peet xtold zho; per na gon, blactaa milagr ne gon zho ben naa, ni laa zho bii rlëë ran zho no grop no PxoZ naa. ²⁵ I nagon norieecuia mine raquiet lo Xtiidz Dios, zaatne znu rnee: "Peet guielntseeb quiaayund naa lo zho, per rlëënie zho naa."

²⁶ 'Laa naa nile lo to ganle, ible sxel naa Espiritu Sant gacnie to, niapse diidzli rnee me. Lo PxoZ naa griee me guiaad me, me cchoobladz zdo to, ni me gneedz guielbiini lo to lozh guien to cho nac naa. ²⁷ Ni scagaa to, ye to laa to none sodiidz lo grëraa miech gacnan zho cho nac naa; sac gon tibaque bzënie to naa desde ne psilo naa xtsin naa.

16

¹ 'Laa naa rne grë min rii lo to zeena peet tsienied guic to, tibaque dib zdo to gnalo to naa. ² Sac gon zunxoon zho to, zbee zho to yadoo; ni zdziñ dze haxta zut zho to, sac masaque sac zho lëë mine racladz Dios ga noyun zho. ³ Laa zho gun grë min co, sac niicle PxoZ naaw, niiclegaa naaw, runbeyd zho no.

⁴ 'Laa naa rzodiidz grë min rii niina, zeena zeene gal dze ne laaw noyac, csoladz to ganle grësew bzodiidzle naaw lo to. Bzodiidz naaw lo to go, sacne hor co laa naa bii zo lo to. ⁵ Laa niina nagon laa naa gbiche lo to, laa naa gbire guia lo men ne pxeel naa, per ran naa ni tib to zienied guic gnabdiidz dien pa nac zaatne ga naa, dien pe nacgaa ne laa naa ga. ⁶ Lëë gdib mine run to, riab guielné to ron to grë mine rne naa nu.

⁷ 'Gneli naa lo to ganle: Mazd wen gon tsie to zeene laa naa guia lo men ne pxeel naa, sac telne cuëz naa nu, grielod guiaad men ne guiadchoobladz zdo to ga. Sangue telne guia naa, dzigo naazhal cxel me. ⁸ Ni zeene laa me guiaad, me gunquien miech ganle grëse zho zha ngoopdol nac zho, me gunquien zho zha laa zho lo dol co guiaanwen zho lo Dios, ni guien zho ne nli zdziñ tib dze zeene laa Dios gun xquielwxtis me. ⁹ ¡Pe nacne nac zho miech ngoopdol!

Miech ngoopdo] nac zho, sacne riladzd zho cho nac naa. ¹⁰ ¿Zha grieelo laa zho lo do] co guiaanwen zho lo Dios? Zrieelow, mincocxe waa nacne bial naa, ni na laa naa guia zatne zob Pxo naa, gandraa to naa. ¹¹ ¿Zha rlu ne nli zuñ Dios guielwxtis? Nli zuñ mew, sac gon laa me bnabeyle zha nac grè guielnèdòx ne ygaa menòdòx, men ne quianabey lo guidzliu rii.

¹² ¡Nzianraa ncuuañe racladz naa sodiidz naa lo to! Per rien naa grielod tso guic to zha naca niina. ¹³ Zeene guiaad Espiritu Sant, me gneedz guielbiini lo to guien to grèraa ncuuañe no gacnañ to, ni grèga ncuuañe naraa gac. Niapse diidzli gnee me, sac led guicd me guiab grè mine gnee me, sinque mine nac xtiidz Pxo naa, min co gnee me. ¹⁴ Ga glu me lo miech ganle ne nli men nroob, men non nac naa. ¹⁵ Rne naa ga glu me, sac grètaa ncuuañe rnabey Pxo naa, yeque naa rnabeya. ¹⁶ Zhilew zeene laa naa gbiche lo to gandraa to naa; per gacdaquew xtse zeene laa to gbiirelaque gan naa stib.

¹⁷⁻¹⁸ Zeene bdzion no sca rnee me, blalaa no psilo no rnabdiidzlsa no rnee no:

—¿Bay zha nacne squi rnee me? ¿Zha nacne rnee me, zhilew dziandraa ne me, per gacdaquew xtse laa ne dzianlaque lo me stib? Ni rneeque me laa me guey lo Pxo me.

¹⁹ Bien me racladz no gnabdiidz no lo me, dzigo nè me lo no:

—¿Racladz to lèè gacnañ to zha nacne znu rne naa? ²⁰ Golquiaadiaga sca ganle: Zeene gdziñ dze co, laga noyoon to no to guielnè ne laa naa biche lo to, laa grèraa miech haxta zley zho ne laa naa wbiche lo zho. Nli nroob guielnè ne tso to, per zeene laa to gan naa stib, guielbley nroob ne tso to. ²¹ Nac cuent rii zig rzac tib men wnaa ne ral xpèèd. Glo yoob ro, yoobdòx ne rquia me, per deque laa mèèd co ralse, ni rsoladzdraa me yoob co; sac mazdraa nroob nac guielbley ne rio me ran me laa xpèèd me blanso lo guidzliu. ²² Scadaa nagon rzac to, nli mban rac to niina, per zeene laa to gan naa stib, dzigosi tib guielbley nroob ne tso to, ni choot grielod ctiche guielbley co lo to.

²³ Zeene gal dze co, yquiindraa to pe gnabdiidz to lo naa. Ncuuañe gnabtaa to, lo Pxo naa gnab tow, ni zneedz mew, sac xnèz naa ngab to. ²⁴ Haxta lo nadze peet gard gnab to, niicle ne xnèz naa ngab to; laa niina laa naa rne lo to ncuuañe rquiin to glnaba lo me, ni ible zneedz mew gon. Nroob guielbley ne tso to hor co. ²⁵ Nzian grè ncuuañe zine naa lo to, rned naaw clar; per laa dze bdziñ zeene grèse ncuuañe gne naa, clar gne naaw lo to, zig nac zeene gzetaa Pxo naa. ²⁶ Ni zig nile naa ga, hor cosi ncuuañe gnabtaa to lo me, zneedz mew, sac xnèz naa ngab to. Yquiindpa gne naa lo me gneedz me ncuuañe gnab to lo me, ²⁷ sac ye

me rleynie me to. Rleynie me to, sac gon rleynie to naa ni riladz to ne nli lo me brie naa bial naa lo guidzliu. ²⁸ Ni nligaa, lo me brie naa bial naa lo guidzliu; ni niina ne laa naa gbi, loque me gdziñ naa.

²⁹ Dzigo rdzieets no lo me:

—¡Nasi nagon rien no zha rnee luu! Sac clar rnee luu, rneedraa luu zigne rnee luu glo. ³⁰ Nasi rien no grèse ncuuañe nan luu, sac zig nac niina pquiindpa nabdiidz no lo luu. Gacxe waa, nasi nagon riladz no ne nli lo Dios brie luu.

³¹ Pquiab me, nè me:

—¡Wen ga telne riladz to niina cho nac naa! ³² Per lèè hor co nagon bdziñ; ni niina, grèse to laa to csaan naa, tib tib to zhaase zhaase nèz ne xen to. Per guiaand naa loxaque naase, sac tibaque nacnie Pxo naa naa. ³³ Grèse ncuuañe bne naa lo to nu, laaw bne naa zeena peet tsienied guic to, benque nanle to ganle tibaque nacnie naa to. Parga nli, laga no to lo guidzliu rii, nzian grè guielnè ne ted to, per gdziebde to; sac gon naa rnabey, ladznia naa no grètaa ncuuañe no lo guidzliu.

17

Rnab Jesús gacniñ Dios xpèèdsuel me

¹ Blozhse sca nè me lo no, blis lo me bui me nèz gbaa.

—Dios, luu ne nac luu Pxo naa —rèb me—, niina nagon laa dze co bdziñ. Blu ganle men nroob nac naa ne nac naa Xpèèd luu, zeena ga glu naa lo miech ganle pa lotaa men nroob nac luu. ² Zigne psan luu grèse miech ladznia naa, ni gdeed naa tib guielmban ndzon ne gdziñ dze lozh lo grèse zha ne bneedz luu ngab xnèz naa; scaque niina blu ganle men nroob nac naa. ³ Lèè guielmban co ygaa grèse zha ne gunbey luu, ne nli luuse nac Dios nguia mban, ni guien zho cho nac naa, ne pxeel luu naa bial naa lo guidzliu rii. ⁴ Grèse ncuuañe bnabey luu naa, laaw noyun naa; ni ga rlu naa lo grè miech rii ganle pa lotaa men nroob nac luu. ⁵ Scagaa luu ne nac luu Pxo naa, niina ne laa naa glanso lo luu, blu ganle men nroob nac naa; sac desde mazd glo zeene gard tsa grètaa ncuuañe no, tibaque nac lo guielndzon ne bdzio ne haxta dze ne blanso naa lo guidzliu rii.

⁶ Grèse zha ne ble luu lad grè miech rii bneedz luu lo naa, laa naa pseed zho gunbey zho luu; ni scagaa zha, bliladz zho xtiidz luu. Chen luu zho per laa luu bneedz zho lo naa. ⁷ Zig nac niina, grèse ncuuañe bneedz luu lo naa, nanle zho ne luu bneedza, ⁸ sac pseed naa zho grèse wseed ne bneedz luu lo naa, ni bliladz zhow. Wen wen goncañ zho ne lo luu i brie naa zial naa lo guidzliu rii, ni riladz zho ne luu pxeel naa. ⁹ Laa

naa rnab lo luu gacniën luu zho. Rnabd naa par grëse miech guidzliu rii, sinque laa naa rnab por grë zha ne bneedz luu lo naa; sac gon chen luu zho, ¹⁰ ni zha glu ganle pa lotaa men nroob nac naa. Grëse zho chen luu zho; sac grëse ncuaañe nac-chen naa, chen luuw; ni grësegaa ncuaañe nacchen luu, chen naaw. ¹¹ Rieñ naa, led nroobdraa cuéz naa lo guidzliu rii, laa naa gbile guial naa lo luu i; per zha, laa zho guiaaanaque nu. Gane niina, luu ne nac luu PxoZ naa, luu ne nac luu tib men ne guiend xtoł, laa naa rnab lo luu: pquianap zho ne nac zho zha ne bneedz luu lo naa, zeena ni tib zho nitlod, sinque tibaque gac zho gza zho zigne tibaque nacne grop ne. ¹² Leñ dze ne bléz naa lo zho nu, zigne racladz luu sca pquianaap naa zho. Ni scagaa ni tib zho bnitlod; zha ne bnitlo ga, nole ne sca nitlo zho, zeena sca grieequia miñe raquiet lo Xtiidz luu.

¹³ Zhilew laa naa glanso zaatne no luu i; per leñ dze ne bléz naa lo zho nu, nzian grë ncuaañe bne naa lo zho, zeena ye zho tso guiełbley nroob no no naa. ¹⁴ Pseed naa zho miñe nac xtiidz luu; per na rlëë grëraa miech ran zho zho, sacne zienałdraa zho grë ncuaañe ndzinlid ne rac lo guidzliu rii. Nac zho zigne nac naa, rleyniend naa grë ncuaañe co. ¹⁵ Per rnabd naa cuee luu zho lo guidzliu rii, sinque laa naa rnab csaand luu gun zho ncuaañe racladz menđox. ¹⁶ Sac niicle zhaw, niicle naaw, choot zionałd grë ncuaañe ndzinlid ne rac lo guidzliu rii. ¹⁷ Bzhiguiel sca bdeed guiełbiini lo zho guien zho zha nac Xtiidz luu, sac Xtiidz luu nac diidzli; zeena dib zdo zho tsoxco zho gban zho zigne rnabey luu. ¹⁸ Sac gon, niina laa naa rxel zho lo grëraa miech guidzliu rii, zigne ne pxeelaque luu naa. ¹⁹ Ni niina, dib zdo naa laa naa gun miñe rnabey luu, zeena ye zho guien zho none dib zdo zho gun zho miñe rnabey luu.

Rnab Jesús por grë zha ne ygabraa xnëz me

²⁰ Laa naa rnab gacniën luu zho, ni gacniën luu zha ne naraa gliladz naa, zeena laa zho tsieseed zho; ²¹ zeena tibaque gac zho, zigne tibaque nac ne grop ne. Ni scaquegaa gacnie zho ne, zeena gliladz grëraa miech ganle ne nli luu pxeel naa. ²² Laa naa psañnon zho zigne psañnonaque luu naa, ni tipse gac zho zigne tibaque nac ne grop ne. ²³ Zigne nacieñ luu naa, scaque nacieñ naa zho. Bzhiguiel gocniën zho, tibaque gac zho grëse zho, zeena gan grëraa miech ganle ne nli luu pxeel naa, ni guien zho ganle zigne rleynie luu naa, scaque tibaque rleynie luu grëse zha ne ngab lo naa. ²⁴ Papá, grëse zha ne bneedz luu lo naa nu, racladz naa ye zho guiaad zaatne glanso naa i, zeena gan zho lo

grëtaa guiełndzon ne no naa. Lo guiełndzon ne bneedz luu lo naa, sac rleynietaque luu naa haxta zeena gard tsaa guidzliu.

²⁵ Papá, luuse nac men ne rapd ni tib dol, niicle ne runbey grë miech rii luu, sangue naa runbey naa luu; ni scaquegaa grë zha ne bneedz luu lo naa nu, nanle zho ne luu pxeel naa. ²⁶ Laa naa pseedle zho gocnan zho cho nac luu ni bii seedragaa naa zho, guien zho ganle pa lotaa rleynie luu naa; zeena scaque guien zho gleynie zho samiech zho, ni gacnie zho naa.

18

Bnaaz zho Jesús

(Mt. 26:47-58; Mr. 14:43-50, 53-54; Lc. 22:47-54)

¹ Zeena blozh bnab Jesús lo Dios, laa me brieenie no ga bdieedquia no nëz dan ro psë ne rnee zho Psë Cedron. Ga no tib zaatne zëeb niapse yag nex, dzigo ga bliiaz no gza no me.

² Judas zha ne pto me ga, wen wen runbey Judas lugar co, sac nzian vuelt ziyenie me no ga. ³ Dzigo zeena laa Judas blanso ga, laa Judas blansoniele tib dzoon menguiib, ni zla zha ne rquianap yadoo; no guierbel nia zho blanso zho ga, zha ne nzhen yag, zha ne nzhenaa spad. (Lëë grë zha co pxeel grë pxoz rnabey, ni grë zha farisé.) ⁴ Loxaque blanso zho, laa Jesús brieequiale, rëb me lo zho:

—¿Cho rguib to?

Sca rëb me sac rienle me pe nacne zie zho ga, nanle me pe nac grëtaa ncuaañe ted me.

⁵ Pquiab zho, rëb zho:

—Men Nazaret ne lë Jesús, men co ziaadguib no.

Dzigo rëb me:

—Naa nac men co, tel me ziaadguib to.

⁶ Zeena bin zho rëb me: “Naa nac men co”, wbire rzhitsaque zho, grëse zho biab liu. Ye Judas no lad co. ⁷ Wbiire Jesús bnabdiidz me lo zho, rëb me:

—¿Cho zho rguib to?

Pquiab zho rëb zho:

—Men Nazaret ne lë Jesús, men co rguib no.

⁸ —Laa naa nile lo to —rëb me—. Naa nac men co. Telne naa ziaadguib to, golsaan sca guey grë zha ne zo lo naa nu.

⁹ Ga brieequia xtiidz me zeena rëb me: “Lo grë zha ne bneedz luu lo naa, ni tib zho bnitlod.”

¹⁰ Laa Simón ney tib spad, hor co bdobaque Simón spad co psilaa me tib niaw, bliengaa me diag derech tib mgui lë Malcw. (Lëë mgui co quia xtsiñ men ne nac pxoz nroob.) ¹¹ Zeena gon Jesús, rëbcha me:

—¡Blootsow spad qui Pedr! ¡Biën ganle Pxoꝝ naa rnabey znu teed naa! ¿Niacxe gond naa miñe rnabey me naa dzigo?

¹² Horco laa grë menguiib co, grë zho zha ne rnabey lo zho, ni grë zha ne rquianap yadoo ga, laa zho wbigbe bnaaz zho me. Blozhse bzobdoo zho me, laa zho zienie me.

¹³ Sca nzobdoo me, laa zho bdziñnie me lidz meñ ne lë Anás, pxozdzoop Caifás. Caifás nac pxoz nroob leñ iz co, ¹⁴ ni me ga rëb lo grë meñ non lo zha Israel, ne mazd wena tibaque zha ne ygaa guet, quizh zho par dib guiedz.

Rëb Pedr runbeyd Pedr Jesús

(Mt. 26:69-70; Mr. 14:66-68; Lc. 22:55-57)

¹⁵ Zhiits co, ga nañ lo grop no Pedr. Ni ne runbey naa Caifás meñ ne nac pxoz nroob ga, zeene bdziñ no ro lidz Anás, loxaque naa brieelo bzëeb nëz ley. ¹⁶ Laa Pedr, zaatne nactaa ro yu par gdziñ zaatne nac ley, gataa biaan Pedr. Nacne brieque naa bnee naa lo wnaa ne zonap ro yu, dzigoraa bdeed wnaa co diidz bzëeb Pedr. ¹⁷ Dzigo rëbchaa me lo Pedr:

—¿Bod ye luu dzigo lëe nac xpëedscuel meñ ne bdziñnie zho i?

—Coo, led yed naa —rëb Pedr.

¹⁸ Grë zha ne quia xtsiin meñ co ni grë menguiib ne ndxie ga, laa zho bzëegle gui. Grëse zho, laa zho ndxidzëe lo gui ga, sac rac nañ. Ye Pedr bdziñ lo zho ga nodzëe Pedr.

Rquiep Anás Jesús

(Mt. 26:59-66; Mr. 14:55-64; Lc. 22:66-71)

¹⁹ Laa nëz leñ yu, laa Anás psilo noquiep Jesús dien yo grë xpëedscuel me, ni dien pe nac grë wseed ne nolu me lo miech. ²⁰ Dzigo pquiab Jesús, rëb me:

—Grëse miech, nanwen zho ganle pe nac zhiwseed naa. Sac zeene pseed naa zho, beñ naa ne ngeutes zhliana nseed naa zho; sinque zaatne rcaalsa nzian miech, ga bne naa lo zho. No hor pseed naa zho leñ grë yadoo win, nogaa hor pseed naa zho leñ yadoo nroob ne zob lad guiedz nu. ²¹ Nana bod rieguialda ne lo naa rnabdiidz luu. Mazd lo grë zha co ganle bnabdiidz, zha bin grëtaa ncuaañe bne naa.

²² Loxaque blozh sca pquiab Jesús, zeene bias tib menguiib ne rquianap yadoo zo gax ga, bdap me lo Jesús.

—¡Biën ganle! —rëb me—. ¡Led squid goñ none yquiab luu lo meñ ne nac pxoz nroob!

²³ Dzigo rëbchaa Jesús:

—Telne rzac luu beñ naa falt, bnë dien pe nac diidz ne pxin naa. ¿Te wañ rdziladz luu ye, rguin luu zha ne rnee diidzli?

²⁴ Blozh ga scaque nzobdoo Jesús pxeel Anás me lo Caifás, meñ ne nac pxoz nroob.

Rnee Pedr stib runbeyd Pedr Jesús

(Mt. 26:71-75; Mr. 14:69-72; Lc. 22:58-62)

²⁵ Horco laa Pedr bii zodzëeque lo gui nëz ley. Dzigo wbiire zho bnabdiidz zho lo Pedr, rëb zho:

—¿Bod xpëedscuel meñ ne blansonie zho i lëe nac luu?

Laane neeli Pedr, leñ pquiab Pedr rëb Pedr:

—¡Lëda! ¡Zha gaczhe naa xpëedscuel meñ qui!

²⁶ Ye tib zhalidz Malcw, zha ne pchug Pedr diag ga, laa zho zodzëe lo gui ga, sac ye zho quia xtsiin pxoz nroob co; dzigo rëbchaa zho:

—Ni goñ naa name, ye luu no lad zha ne zonie me leñ yag oliv ga.

²⁷ Wbiire Pedr rëb Pedr runbeyd Pedr me, ni lëetaque hor co laa tib gall pcuedz.

Güeynie zho Jesús lo Pilat

(Mt. 27:1-2, 11-14; Mr. 15:1-5; Lc. 23:1-5)

²⁸ Ziadyiinile liuw, zeene laa zho brieenie Jesús lidz Caifás, zienie zho me zaatne nac xyulow Pilat, meñ ne nac gobernador. Zeene bdziñ zho, ni tib zho bzëebd leñ yulow, sac racladz zho quiits zho miñe rnabey xley lay zho; parne grieelo yquiin zho guielwagw ne row zho lni Pascw co. ²⁹ Nacne brie Pilat bnabdiidz Pilat lo zho, rëb Pilat:

—¿Pe nacne ziaadnie to meñ qui nu? ¿Pe rquiaqui to me?

³⁰ Pquiab zho, rëb zho:

—¡Por grëtaa guieñtseeb ne noyuu me, gane ziaadnie no me! ¡Telne niac me meñ ndzinli, niacxe lega guiaad-zo no me lo luu!

³¹ Dzigo rëbchaa Pilat:

—Golsënie me, tose golgunquizh me miñe been me; zigne nac xley to.

—Racladz no guetgazh me —rëb zho—. Ni nanle luu ganle, no ne nac no meñ Israel, grieelod ne nose gnabey guet tib miech.

³² Ga brieequia miñe bnee Jesús, zeene bzeet me ible zut miech me. ³³ Dzigo bzëeb Pilat leñ yulow, bnabey me gocredz Jesús. Dzigo bnabdiidz me lo Jesús, rëb me:

—¿Pe nli luu nac zhirey meñ Israel?

³⁴ —Ne squi rnee luu —rëb Jesús—. ¿Pe guic luu biaba, te no cho nëw lo luu ye?

³⁵ Pquiab Pilat, rëb Pilat:

—Nanle luu ganle led zha Israeld naa. ¿Pe nac sca ne ziaadnie zho luu nu? ¿Pe been luu? Sac goñ zha ladzaque luu grë zho zha ne rnabey lo zhipxoꝝ zho, zha biaadsañ luu nu.

³⁶ Dzigo rëbchaa Jesús:

—Nli reynac naa, per led lo guidzliu riida, telne niaca miñe lo guidzliu riw, dzigosi grëse zha ne nacnie naa niacntseeb zho, nsaand zho naaz zha Israel naa. Per na, zhaa zaatne nac naa rey.

³⁷ Pquiab Pilat, rëb Pilat:

—¿Rey luu dzigo lëë?

—Scaw gon —rëb Jesús—, nli rey naa; zigne rnee luu i. Ible miñ co nacne bial naa gol naa lo guidzliu rii, ni bial naa bialseed naa miech gunbey zho miñe nac diidzli. Ni zha ne zienal miñe nac diidzli, zha co ngab lo naa.

³⁸ —¿Diidzli ye? —rëb Pilat.

Bnabey Pilat tsiegut zho Jesús
(Mt. 27:15-31; Mr. 15:6-20; Lc. 23:13-25)

Zigne blozh sca rëb Pilat, brieë Pilat ga güeynee Pilat lo grë zha ne bdzinnie me ga, rëb Pilat lo zho:

—Ni tib dol gon rapd men rii. ³⁹ Per gzobse lni Pascw rii, rnab to rlaa cholze tib zha ne no ladzguuib. ¿Pe gnë to sca, mazd csilaa naa men ne nac zhirey to nu?

⁴⁰ Pquiabbe zho, rëb zho:

—¿Cilaad luu me! ¡Mazd psilaa Barrabás!
Ni laa Barrabás tib ngbaan nac Barrabás.

19

¹ Zeene gon Pilat sca rac zho, dzigo bnabey Pilat bla menguiib, bdeed dooguid zho Jesús. ² Bzieecw zho bla lë yag guiets bzoob zho guic me, ni bgacw zho me tib lë lar nizhnie nlaan. ³ Dzigo psilo zho runnguzee zho me, nguiedz roptsie zho rnee zho:

—¡Bley na ganle, laa luu nacle zhirey zha Israel!

Ni rgap zho lo me.

⁴ Wbiire Pilat brieëquia Pilat zaatne ndxie grë miech co, rëb Pilat lo zho:

—Golwi ganle laa naa cuee me, glu naa me lo to, per gacnan to ganle rieguiald guet me; laa naa pquieple me rlu ni tib guie!ntseeb beend me.

⁵ Zeene laa Jesús brieëquia, nzobguicse me coron yag guiets co, ni nacw me lar nizhnie co.

—Golwi na ganle —rëb Pilat—, lëë me nu.

⁶ Grë pxoz ne rnabey, ni grë menguiib ne rquianap yadoo, zeene gon zho me, psilo zho nguiedz roptsie zho rnee zho:

—¡None guet me! ¡Bnabey yquia me lo cruz!

Dzigo rëbchaa Pilat:

—¡Goltsienie me sca! ¡To golquiaa me lo cruz! Sanguë naa, grieelod yquia naa me lo cruz; sac laa naa gonle peet guie!ntseeb beend me.

⁷ Pquiab zho rëb zho:

—¡Rdziaap no xley no! Ni ley co rnabey ib none guet me, sac rquidie me rnee me laa me nac Xpëed Dios.

⁸ Zeene bin Pilat sca rëb zho, mazdraa bdzieb me. ⁹ Dzigo bzëëbnie me Jesús len yulow stib, bnabdiidz me lo Jesús, rëb me:

—¿Bnë dien cho menpaa nac luu? ¿Pa nac ladz luu?

Per ib pquiabd Jesús lo xtiidz Pilat.
¹⁰ Dzigo rëb Pilat:

—¿Pe nacne rquiabd luu? ¿Gon ganle naa rnabey, zrieelo csilaa naa luu, o gnabeygaa naa yquiaa luu lo cruz?

¹¹ Pquiab Jesús, rëb me:

—Nli luu nac zha rnabey niina, per telne niaca miñe needzd Dios guie!rnabey qui lo luu, grieelod ne luu gnabey zha gac naa. Miñcocxe waa, zhi nac xto!luu, mazdraa nac xto! zha ne biaadlo naa nia luu.

¹² Dzigo gocladz Pilat nsilaa me Jesús, per bzhiguield grë zha ne güeysan me ga.

—Telne laa luu csilaa mgui qui gon —rëb zho—, rrieëquia dzigo ye luu rlëënie César. Sac gon, grëse zha ne racladz gac rey, lo César ga racndaan zho.

¹³ Zeene bin Pilat sca rëb grë miech co, bnabey Pilat brieë Jesús nëb ley stib. Dzigo güeysob Pilat lo xcan ne zo ley co, zaatne rzob me run me guie!wxtis. (Dipse ley co, niapse quie lag now; gane rnee zha Israela Gabata.) ¹⁴ Lëë dze vispr lni Pascw co ga nagon, zig gro!le dzew noyac grë miñ co. Dzigo rëb Pilat lo zho:

—Laa zhirey to nu gon. ¡Golsënie me!

¹⁵ Psilo zho stib, nguiedz roptsie zho, rnee zho:

—¡Beetgazh men qui! ¡Bnabey yquia me lo cruz!

Rëbchaa Pilat:

—Zhirey to nac me, ¿ni racladz to ye gnabey naa yquia me lo cruz?

Pquiabbe grë pxoz ne rnabey rëb zho:

—¡Tibaque men ne nac zhirey no, ni lëë men co nac César!

¹⁶ Dzigitaa mazd laa Pilat bloo Jesús nia zha ne tsiequiaa me lo cruz.

Pquia Jesús lo cruz

(Mt. 27:32-44; Mr. 15:21-32; Lc. 23:26-43)

¹⁷ Zeene laa Jesús brieë ga, rna tib cruz nroob ney me; laa zho zienie me. Bdzinnie zho me ro guiedz, zaatne rnee zho “Gui Beerguic Ngutoo”; ¹⁸ ga pquiaa zho me lo cruz. Ni pquiaa zho schop zha ntseeb, tibga zhicruz zho bzo cue zhicruz me.

¹⁹⁻²⁰ Bnabey Pilat pquia bla lan diidz guic zhicruz me, rneew: “LËË JESUS MEN NAZARET NU, MEN NE NAC ZHIREY ZHA ISRAEL.” Pquiaw xtiidz zha Israel, xtiidz zha Roma ni xtiidz zha Gres. Nzian zha Israel gon sca quia guic zhicruz me, sac gaxpaa ro guiedz nac zaatne pquiaa zho me lo cruz ga. ²¹ Nacne güey grë pxoz rnabey, güeylisqui zhow lo Pilat, rëb zho:

—¿Pe nacne pquiaa luu guic zhicruz mgui co, ne me nac zhirey zha Israel? Pe gacd nquiaa luu: “Rnee me, me nac zhirey zha Israel.”

²² Pquiab Pilat rëb Pilat:

—Mīne pquia naa, laaw pquiale ga. Ni sca none guiaaṅa.

²³ Laa grē menguiib ne pquiaa Jesús lo cruz ga, zeene blozh pquiaa zho me lo cruz, bzhen zho xab me been zhow tap lē, tib lēga bīaanne zho tib tib zho. Laa lar ne rbix me, tiblagaque naca, ndiibda; ²⁴ dzigo rēbcha zho:

—Mīnritaa nagon dziuungrold ne. Mīne naca gotsaa dzio new rif, dzigo zha ne grieequia zha co guiaaṅniew.

Ga brieequia mīne raquiet lo Xtiidz Dios, zaatne rnee: “Xab naa, mīne racw naa nzian lē been zhow bgaaza lo zho; laa mīne rbiix naa, bio zhow rif.” Ni scadaa been gza menguiib co.

²⁵ Gax zaatne zo zhicruz Jesús ga, zo blalaa meṅ wnaa. Ga zo xniaa Jesús, zo tib bej xniaa me, zo Mari tsiel Cleof, ni Mari Magdal. ²⁶ Gaxaque ga zo naa. Zeene gon Jesús xniaa me, ni gon me naa, rēbcha me lo xniaa me:

—Been cuent nagon lēē xpēēd luu i zo i.

²⁷ Laa lo naa nē me:

—Been cuent lēē xniaa luu i gon. Bzhiguiel luu gaṅ me.

Dzigo desde dze co, pcaania naa xniaa me bianie naa me lidz naa, pteedlo naa me.

Gut Jesús

(Mt. 27:45-56; Mr. 15:33-41; Lc. 23:44-49)

²⁸ Rienle Jesús ne gataa laa me psiaal dziin ne pxeel pxoz me me guṅ me, ni par grieequia grēse zigne rzeet lo Xtiidz Dios ted me, hor co bredz me rēb me:

—Rnab zhis naa.

²⁹ Gax lo grē menguiib ne quianap me ga, ga zo tib cant win no nziu bla. Zeene bin zho sca rēb me, rias tib zho bgadz zho tib lē zhiil lo nziu co, bzoob zhow guic tib goobgui nool güeyquiaa zhow ro me. ³⁰ Zeene bdziṅ nziu co ro me, pquiin me niipa, dzigo rēbcha me:

—Lēēw nagon, nataa laaw bza.

Zeene blozh sca bnee me, znuse pquianrun guic me; laa me blozh.

³¹ Guini liu co nac tib dze ne mazdraa nda lo zha Israel. Nacne güey grē zha ne rnabey lo menguiidz güeynee zho lo Pilat, gnabey Pilat tsietiits zho gzhibni Jesús ni zha ne pquiagza me lo cruz ga, zeena guietgazh zho lo cruz dze co; sac racladzd zho scaque quia zho lo cruz zeene laa dze nda co gdziṅ.

³² Dzigo pxeel Pilat bla menguiib. Zeene bdziṅ zho, glose güeytiits zho ni tib zha ne quiaza Jesús lo cruz ga; blozh ga, güeytiitsaque zho ni stib zho. ³³ Zeene bdziṅ zho zaatne zo zhicruz Jesús, gon zho laa me gutle; nacne bdiitsd zho ni me.

³⁴ Horco wbig tib menguiib co, bliz zho xlanz zho ro xcuxti me. Zeene bdoob zho lanz co, nis ne, ren ne brie ga.

³⁵ Naazhal gon znu been zho me. Laaw rne naa lo to zigne gocsew. Golliladza, sac ne nligaa diidzliw. ³⁶ Ga brieequia mīne raquiet lo Xtiidz Dios, zaatne rnee: “Ni tib dzit ne no me quiitsd zho.” ³⁷ Ni stib lugar, zaatne rnee: “Bii zaṅaque zho gaṅle cho nac meṅ ne bliz lanz zho ga.”

Bguets Jesús

(Mt. 27:57-61; Mr. 15:42-47; Lc. 23:50-56)

³⁸ Laa José, tib meṅ Arimaté, zeene bin me laa Jesús gutle, dzigo güey me lo Pilat güeynab me diidzbey par grieeelo tsielit me xcuerp Jesús lo cruz. Ye me xpēēdsuel Jesús nac me, per pxobneṅd me ne ye me nacgza Jesús; sacne rdzieb me grē meṅ Israel ne rlē lo Jesús. Dzigo bdeed Pilat diidzbey.

³⁹ Nicodem, meṅ ne güeyzodiidznie Jesús ga tib pcow liu, ye me güeynal zhits José; güeynie me zig galptsiitap kil tiblo zēnex ne rīaa yaal ne lē mirr ni yaal ne lē áloe. ⁴⁰ Zeene blozh biet Jesús lo cruz, psilo zho bdēēb zho zēnex co xcuerp me; blozh ga, pchel zho me tib lar nquits; sac sca rqueets grē meṅ Israel zhingutoo zho.

⁴¹ Gax zaatne pquia Jesús lo cruz ga, nīaa tib corral no niapse yag nex. Leṅ corral co, ga ndieṅ tib baa tib cho quie, ni tib ngutoo gard yguets leṅ baa co; ⁴² dzigo nacne gase güeyquets zho me, sac zhile runfalt sēēb dze nda co, ni baa cose nac mīne rīaan gax ga.

20

BRIEBAN JESUS

(Mt. 28:1-10; Mr. 16:1-8; Lc. 24:1-12)

¹ Goj dze ne rzobni zhmala, silgaw, scase bii ncow rnaw, brie Mari Magdal zie me ro baan Jesús. Zeene bdziṅ me, gon me laa quie ne niioog ro baa co bdiooble, laaw zole tib nēz.

² Horco lēēléd wbiere nguzhoon me, biaad me zaatne no no grop no Pedr, biaadnie me diidz lo no, nē me laa zho güeybeele Jesús leṅ baa, dieṅ palo güeysan zho me.

³ Dzigo lēēléd, brie no grop no Pedr, zioso no ro baa. ⁴⁻⁵ Zeene bdziṅ naa ro baa, blēz naa niip, dzigo bdiixlo naa leṅ baa gon naa laa lar ne briel me zhoob ga; per bzēēbd naa. Laa naa blozhdze bdiixlo leṅ baa, zeene laa Pedr blanso. ⁶ Zigne blanso Pedr bzēēb Pedr leṅ baa, gon Pedr nligaa laa lar co zhoob ga, ⁷ niicle lar ne briel guic mew, laaw zhoobaque ga; ndibēdsēw, zhooba tib lad.

⁸ Nacne bzēēbaque naa. Zeene gon naa zha zhoob lar co, dzigoraa bliladz naa ne nli brieaban me. ⁹ Sac hor co, bii gard tsoguic naa zha rnee lo Xtiidz Dios; sac ga raquiet ne ible zrieaban me!

Gon Mari Magdal Jesús

(Mr. 16:9-11)

¹⁰ Ye Marí biire blanso ro baa ga stib. Zeene wbii no ga grop no Pedr; laa Marí bii zo ro baa ga.

¹¹ Ga name zo Marí roon me. Sca roon me, tibaque zeene bui me nēz leñ baa co, ¹² gon me laa chop anjl zob leen co. Dib nquitsbiese rna xab grop anjl co, tib me zob nēz ne bzhooob guic Jesús, stib me zob nēz ne bio ni me; ¹³ dzigo rēbchaa me lo Marí:

—¿Pe nacne roon luu?

—Roon naa —rēb Marí—, sac laa zho biadbee xcuerp Jesús nu, na dieen pa güeyсан zho me.

¹⁴ Loxaque blozh sca bnee me, zeene pt-sire lo me gon me laa tib meñ co zo gax zhits me. ¡Per ib beenbeyd me ne Jesús!

¹⁵ —¿Pe nacne roon luu? —rēb Jesús—. ¿Cho rguib luu?

Leñ güeynie guic Marí rēb me bod meñ ne rquianap gaw, dzigo rēbchaa me:

—Bzhiguiel, telne luu biadbee me nu, bnē dieñ pa lo güeyсан luu me; zeena ga naa gaxi naa me.

¹⁶ Horco bneelē Jesús Marí, bredz me me. Zeene bin Marí lē me, lēelēd biecw me; dzig-ora a beenbey me Jesús.

—¡Maestro! —rēb me—. ¡Mod luu i!

Laa me zie gbig me lo Jesús. ¹⁷ Dzigo rēbchaa Jesús:

—¡Xeend luu naa! Sac gard guia naa lo Pxo z naa gbaa. Miñe naca, güey güeynie diidz lo grē zha ne bzēnal zhits naa; gudz lo zho: Laa naa nōle nēz guia naa lo meñ ne nac Pxo z ne, meñ ne nac Dios ne rdziuunbey ne.

¹⁸ Horco lēelēd wbi Marí ga, ziaadnie me diidz lo no. Blanso me bzodiidz me zha gon me Jesús, ni nē me lo no zigne rēbse Jesús lo me ga.

Brieequia Jesús lo xpēēdsuel me

(Mt. 28:16-20; Mr. 16:14-18; Lc. 24:36-49)

¹⁹ Pcow liu dze dmingw co, grēse no ne nac no xpēēdsuel me laa no pcaalsa; lox-ague Mazh runfalt. Dziits nquiaa no yag yu, sac rdzieeb no grē zha Israel ne rlēēnie me. Laa no ndxie ga, tibaque zeene brieequia me bzo me glowntaa lo no; pquiaabdiuzh me no. ²⁰ Blozhse pquiaabdiuzh me no, dzigo blu me leñ nia me lo no, zaatne biaaz clav zeene pquia me lo cruz, ni blu me ro xcuxti me. ¡Grēse no per nli rley no zeene bdzion no ne nli mew! ²¹ Blozh ga, nē me lo no:

—¡Laa naa rnedz tib guielbley zdo o to, zeena peet tsienied guic to! Zigne pxeel Pxo z naa naa bial naa, scagaa niina laa naa rxel to.

²² Dzigo blub me lo no grēse no.

—Gołcaania Espiritu Sant —nē me—. ²³ Ni zeene gon gun to tib miech perdon, scaque Dios zun me zho perdon; laa telne siguiel

zho gun to zho perdon, laa zho biaanle lo xtol zho ga.

Gon Mazh Jesús

²⁴⁻²⁵ Zeene bdzion no Mazh (Mazh ne rnee zho “Mēēdgrop” ga), bzodiidz now lo Mazh, per bililadz Mazha, rnee Mazh:

—Rliladz naa miñe rnee to i gon. Zliladz naaw, per haxta ganlo naa me, haxta gan naa leñ nia me zaatne biaaz clav, ni cteed-xug naa ga; ni csēēbnia naa ro xcuxti me zaatne biaaz lanz ga.

²⁶ Goc xon ngbidza, laa no pcaalsaque leñ yu co stib; hor cosi yele Mazh ndxiegrē no ga. Scaque dziits nsioog no ro yu, per tibaque zeene bdzion no laa Jesús bzēēb leñ yu ga stib, bzo me glowntaa lo no, pquiaabdiuzh me no. Blozhse pquiaabdiuzh me no, ²⁷ rēbchaa me lo Mazh:

—Wbig na Mazh, bui leñ nia naa, psēēb mzhugnia luu nu. Dieñ nia luu nu, psēēbnia ro xcuxti naa. Gacchopdraa guic luu, sinque bililadz ganle ne nli mban naa.

²⁸ Dzigoraa bililadz Mazh ne nli mban me. —Nasi rliladz naa mban luu —rēb Mazh—. Luu nac meñ ne rnabey naa, luu nac xDios naa.

²⁹ Pquiab Jesús rēb me:

—Laa luu rliladz niina, lēēcxe laa luu gonle naa waa. ¡Dichos zha ne gliladz ne nli mban naa, niicle ranđ zho naa!

¿Pe nacne pquia grē diidz rii?

³⁰ Lo lal ne bzēnie Jesús no, ndaldoo milagr ne bdzion no been me, led grēda raquiet lo guits rii. ³¹ Miñe pquiase naa nu, laaw pquia naa zeena zeene glab tow, guien to ganle ni gliladz to: Jesús nac meñ ne biaadsi-laa ne lo xtol ne, Dios bzooblo me biaad me, ni Xpēēd Dios nac me; sac zha ne dib zdo o gliladz cho nac me, zгаа zho tib guielmban ndzon ne gđiñd dze lozh.

21

Gon zho Jesús Galilé

¹ Bded ga, wbiire brieequia Jesús lo no stib, zaatne nac ro nisdoo nroob ne rnee zho Tiberias.

² Tib bdze dzew, tipse ndxie no gza no Simón Pedr, Mazh, Natanael (meñ ne nac men Caná ga), bets naa Jacob ni schop zha ne nacgza no. ³ Tibaque zeene nē Pedr, laa Pedr tsie gooz mel. Dzigo rdzieets no:

—Yeque no sca zia guio ne.

Dzigo bziaab no tib leñ barcw win gza no, laa no zio.

Dipse guieel bdzionie no barcw co lo nis, per ni tib mel bgaad. ⁴ Laa liu ziaadle lozh guini, zeene bdzion no laa tib meñ co zo ro nis, per ni tib no bdziuunbeyd me. ⁵ Dzigo bnee meñ co lo no, nē me:

—Yo to dieñ xin, ¿pe bгаа ma?

Pquiab no rdzieets no lo me:

—Choot ma bgaad.

⁶Dzigo nëchaa me:

—Golron guix ne rgaa ma i nëz derech ganle, znaaz to ma.

Dzigo bron no guix co nëz derech. Zeene laa no cueew lo nis, ib lëbd no glis now; ndaldao meḷ ne biodzë lena.

⁷—jPedr! —rep naa—. jBina ganle, xmaistr ne i gon!

Zeene bin Pedra, lëëlëd wbix Pedr xab Pedr; biab Pedr lo nis; psilo Pedr bzhoobnis Pedr brieequia Pedr ro nis. ⁸Laa no biaan len barcw ga; nole bdzinniew zaatne nac ro nis. Maase tapgaltsii metr sca bdioobniu no guix co lo nis.

⁹Zeene briece no len barcw, bdzion no laa gui noyecele, laa tib meḷ zhooble lo gui co, ye guietxtil ne. ¹⁰Dzigo në Jesús lo no:

—Goltënie bla meḷ ne blozh bnaaz to i nu dien.

¹¹Dzigo güey Pedr biepe me len barcw, güeyxadz me guix ne no meḷ ga; dzigo bdoobniu mew bdzinniew mew haxta zaatne nacpaa ro nis. Meḷ tafa, niapse ma mbeew, zeene bgab ma rgaa ma tib gayoo chooptsipton lo grë ma; niicle scataa nzian ma, per blëb guix co, briezda.

¹²Blozh ga, bredz me no, në me:

—jGoltë na, zeena gowxeren to!

Ni tib no bnabdiidzd lo me dien pe ni mew; sac, irienpaa no ne nli mew!

¹³Dzigo wbig me bdiiz me guietxtil co lo no, bzheḷ me meḷ ne, bneedz me ma lo no.

¹⁴Ga bion vuelte brieequia me lo no wlaḷ ne brieeban me.

Bzodiidznie Jesús Pedr

¹⁵Blozhse bdioowxeren no, bredz Jesús Pedr; psilo zho bzë zho grop zho; dzigo rëb me lo Pedr:

—Simón (xingan Jonás), çpe nli dzigo rleynieraa luu naa que grë zha qui?

—Nquialadz naa luu —rëb Pedr—, ni nanlegaa luuw ganle.

—Pteedlo grë xpëcwxiil win naa sca —rëb me.

¹⁶Wbiire me, rëb me lo Pedr:

—Simón (xingan Jonás), çpe nlipaa dzigo rleynie luu naa?

—Nquialadz naa luu —rëb Pedr.

Dzigo rëb me:

—Pquianap xpëcwxiil naa sca.

¹⁷Wbiireque me stib rëb me lo Pedr:

—Simón (xingan Jonás), çpe nlipaa nquialadz luu naa?

Zeene bin Pedr sca rëb me, mban goc zdoḷ Pedr; sac gale rac tson vuelte zinabdiidz me lo Pedr, dzigo rëb Pedr:

—Luu nac meḷ ne rnabey, luu nana grësew, nan luu ganle nquialadz naa luu.

Dzigo rëb me:

—Telne nli nquialadz luu naa, yquiaanap luu xpëcwxiil naa sca.

¹⁸Zeene gon bii nguieg luu, led rsoladz luu ganle luuzhal racw xab luu, rrieelo rie luu zaatne racladztaa luu; per zeene gon laa luu gac mençolraa, loxaque nia luu glis luu zhaale zha ne ygacwxab luu, ni zienie zho luu zaatne ni racladzd luu.

¹⁹Zeene znu rëb me lo Pedr, ga bzeet me zha nac guielgut ne ygaad Pedr, ni ga glu Pedr ganle pa lotaa meḷ nroob nac Dios. Blozhse ga, rëbchaa me:

—jDënal zhits naa!

²⁰Dzigo nalaque naa zhits me grop me Pedr. Zeene ptsire lo Pedr, gon Pedr laa mëëdscuel ne scataa rleynie me ga, laa zho nal ga, zha ne zobpaa cue me ga lo xtsee co, zha ne wbigpaa bnabdiidz lo me dien cho nac zha ne tsielo me ladznia zha ne gut me; dzigo rëbchaa Pedr lo me:

²¹—Telzhe zha rii waa, çpe nac mine ted zho?

²²Rëbchaa me:

—çPe nadien guḷ luu ne racladz luu gacnan luuw? Telne gacladz naa, zrieelo gnabey naa gban mgui haxta len dze ne guial naa stib. Led xcuenta luu ga. jNa zeen dënal zhits naa!

²³Zeene gocnan grëraa zha ne rililadz Jesús sca bnee me, grëse zho tibaque güeynie guic zho gdzindraa dze guet naa. Per led scada, sinque znu naca, rëb me: jPe guḷ Pedr! Telne gacladz me, zrieelo gnabey me gban naa haxta gal dze ne guiaad me stib.

²⁴Grëse mine pquia naa nu gon, grop lo naa gon naaw, grëse zha ne nacgrë no nanpaa zho ganle ne diidzli rne naa.

²⁵Ndaldooraa grë ncuaaḷ nroob ne been Jesús, tel niaca mine yquiaaw grësew, ni ygaad dib lo guidzliu tsotsow grë guits ne yquiaaw ga.

MINÊ BEEN ZHA NE PXEEL JESÚS BNEE XTIIDZ ME

¡Diuzh Tioff!

¹ ¿Yose luu dien bets? Naa gon nac Luc, laa naa rxel stib guits rii lo luu. Minê pxel naa lo luu glo ga, lo co pquia naa grêse minê been Jesús, grêse wseed ne blu me lo miech zeene psilo me xtsiin me ² haxta gol dze ne psan me diidz pe nac ncuane gun grê zha ne bzooblo me tsie tsienee Xtiidz me. Espiritu Sant bdeed guielbiini lo zho bien zho zha racladz me; lèê dze co ga zey me gbaa.

³ Nli psacsi miech me, beet zho me, per brieaban me. Ni par glu ganle ne nli brieaban me, dipse len choo ngbidz brieequia me lo grê zha ne sca bzooblo me tsienee Xtiidz me. Gzataa zeene rrieequia me lo zho, rnee me lo zho zha rnabey Dios.

⁴ Tib vuelt ndxie zho grê zho me, dzigo pso me diidz lo zho ible grieded zho lad guiedz Jerusalén, haxta quiet Espiritu Sant gdeed guielbiini lo zho zigne nacle xtiidz Pxoze me; ni biire rëb me lo zho:

⁵ —Golsoladz ganle laa naa nile lo to: nli laa Juan pchoobnis, per niab nisa; sangue to zgaa to guielbiini ne gneedz Espiritu Sant, rrieequia Espiritu co chobnis to; ni zhile gdziñ dze ne laa min co gac.

⁶ Len ngbidz ne sca nolulo me lo zho, tib vuelt bnabiidz zho lo me, rëb zho:

—Ndion no men rnabey nac luu. ¿Pe niina na so luu gnabey luu, zeena cuee luu zha Israel ladznia zha Roma?

⁷ Dzigo pquiab me rëb me lo zho:

—Dios, men ne nac Pxoze naa, ncuane gun me rieguialde to gacnañ tow, mese nan dien pa dzew, dien pa horgaaw; sac mese nac men ne grieelo gūa. ⁸ Sinque to, zeene laa Espiritu Sant gneedz guielbiini lo to, hor co laa to ygaa poder ne rap me, laa to csilo gnee lo grê zha Jerusalén cho nac naa; tsie to dib xtan zha Judé, dib xtan zha Samar, ni lo grêragaa miech, tsienee tow.

⁹ Blozhse sca bnee me lo zho, zowique zho lo me, dzega, dzega laa me bzoquia gbaa. Glaale ziequia me zeene znuse bdop tib xcow, laa me biongueetsse len xcow co, gonndraa zho me. ¹⁰ Laa zho bii quiaiwique zhan gbaa zaatne gon zho biongueets me ga, tibaque zeene bdziñ chop mgui zaatne to zho ga, dib nquitsbiese rna xab grop mgui co; ¹¹ rëb me lo zho:

—¿Pe nacne squitaa quiawi to zhan gbaa? Zigne gon to i nagon zey me gbaa niina, squique quiet me gbaa gal dze ne laa me guiaad stib.

¹² Blozh ga dzigo laa zho wbi guic gui co (lèê Gui Oliv ga). Zhisaque bzê zho laa zho bdziñle Jerusalén, lalse ne rzê zho dze ne rdziiladz zho lo dziin. ¹³ Bdziñ zho zaatne rbêz zho, biep zho len yu ne rianañ glaa; sac len yu glaa co ga no zho. Ga rbêz Pedr, rbêz Ndrés, Jacob, Juan, Lip, Mazh, Bartol, Matew, ni Jacob ne nac xingan Alfé; Simón Zelot, ni Judas menlidz Jacob. ¹⁴ Grêse zho tibaque rcaalsa zho rzodiidznie zho Dios grê zho zha bets Jesús, xniaa me Marí, ni grêraa men wnaa ne nacgrê zho.

Bzo zha ne gun dziin ne psaan Judas

¹⁵ Tib dze pcaalsa maase tib gayoo gal zho, dzigo guso Pedr bnee me lo zho, rëb me:

¹⁶ —Grêse to bets, grêse to bzian, golgacnañ ganle, minê been Judas zeene sca güeyto me Jesús, nole ne sca gaca. Lo Xtiidz Dios zhozneew, lèê min co pquiaa rey David zeene psiaab Espiritu Santa guic me. ¹⁷ Ye Judas gogcza no, ye me nac diidz niun dziin ne nodziun no niina.

¹⁸ Ni nligaa laa ne niun me dziin co, lel been me guelntseeb pto me Jesús, ni blozh ga lèêque lo liu ne bziiu dimi ne bdiizh zho me ga, ga güeytsobe me bzob guic me lo liu, whilgazh me, nêzrii nêzrec bliiaal len me. ¹⁹ Min co nacne zeene laa grê zha Jerusalén gocnañ, dzigo bleelê zho liu co “Liu Ren”.

²⁰ Zigne rneque naa ga —rëb Pedr—, ible lo Xtiidz Dios sca zhozneew; ni lèê min co ga raquiet zaatne znu rnee:

Ible ziaandets lidz zho,

ni stib choot gbandraa zaatne bio zho.

Ni rneequew:

Zhaale zha ne guiaañnie dziin ne no niun zho.

²¹⁻²² Min co nagon, ible nonguiela so tib zha ne guiaañ xlugar Judas, gacgza zho no guioxobnen no ne nli brieaban Jesús. Nana sca, lo grê zha ne nacgrê no psilo bzianie no me zeene pchoobnis Juan me, haxta gol dze ne laa me zey gbaa, lad co golgotsaa cue ne tib zha ne so gacgza no.

²³ Dzigo ble zho tib men ne lè José Barsabás (lèêque me ga rnee zho Just), ni stib men ne lè Matí.

²⁴ Blozh ga, bnab zho lo Dios, rëb zho:

—Dios, ndion no luu nac men ne rnabey no; ndion no luuse nac men ne runbey zdoz tib tib miech, gane niina laa no rnab lo luu, luu blu dien cho tib zha rii racladz luu so ²⁵ gun dziin ne psaan Judas; sac laa Judas zeyle zaatne rieguial Judas.

²⁶ Blozhse bnab zho lo Dios, laa grop zha co bio rif. Nacne brieequia men ne lè Matí ga, dzigo dze cotaa laa me gogcza stsiptib zha poxtl co.

2

Biaad Espiritu Sant

¹ Zeene goc gadz zhmäl gut Jesús, lëëtaque dze co run grë zha Israel lni ne rnee zho Pentecostés. Dze co grëse zha ne no xnëz Jesús, laa zho pcaalsa. ² Laa zho ndxie grë zho, tibaque zeene bio tib bi nroob zhan gbaa, zig nac zeene rriee tib medox, haxta len yu ne ndxie zho ga pquiab; ³ ni brieequia nzian biini, rluw zig nac ludz miech, tibga tibga biini co blëz guic zho grëse zho. ⁴ Horco grëse zho pcaania guielbiini ne bdeed Espiritu Sant, psilo zho rnee zho grë xtiidz stib miech mine rsiaabtaa me guic zho.

⁵ Len dze co nziandoo grë zha Israel ne no stib ladz ben bdzin Jerusalén, grë zha ne bii ziana xley Dios. ⁶ Laa zeene bio bi co, ye zho no lad grë miech guizhiu ne bdopbe zaatne zob yu co; tib tib zho zeene bin zho laa grë zha ne pcaania guielbiini co nonee xtiidz zho, per nli rzee zdoo zho. ⁷⁻⁸ Rlozhd gwi zho rnee zho:

—iPe nli diidz rii! ;Zha rrieelo rnee grë zha qui xtiidz ne, ni led zha Galilé nac zho? ;Tib tib ne ndxie ne nu, zhaase zhaase diidz ne rnee ne! ⁹⁻¹⁰ Nu ndxie grë men Part, men Media, men Elam, men Mesopotam, men Judé, men Capadós, men Pont, men Asia, men Frij, men Panfil, men Egipt, haxta grë men ne ziaad nëz África, delant guiedz Ciren; grë men Cret, men Arab, grë zha Israel ne ziaad nëz Roma, grë men Roma, zha ne ziana zhiwseed zha Israel.

¹¹ Pe zhidaa ne —rnee zho—, ni diidz ne rneepaa ne tib tib ne laa ne nodzion rnee zha qui grëtaa milagr nroob ne run Dios.

¹² Grëse zho per nli rzee zdoo zho, rdziield-raa zho zha gun zho, rnabdiidzlsa zho rnee zho:

—;Bay pe i? ;Ncuaane gard dzian ne!

¹³ Laa nogaa zho rhidznie, rnee zho:

—Rzudz grë zha qui, gane squi rzë xtiidz zho.

Bdeed Pedr tib lban

¹⁴ Dzigo bzoli Pedr gza me stsiptib zha ne nac poxtl ga, psilo me nguiedz bnee me lo grë miech ne ndxie ga, rëb me lo zho:

—Grëse to, zigtaa zha Jerusaléna, zigtagaa zha ne blanso Jerusalén nuw, golgona ganle. ¹⁵ No bla to quianee rëb to rzuudz no, per led rzuudz no. Griinpaale name blan ngbidz, niicle niaca zha ne riepaan nziu, niacxe goon nale laa zho gzudz. ¹⁶ Led rzuudz no, sinque niina nagon noyac grë mine bzeet Joel padzeela (tib men ne biadteed xtiidz Dios), zeene znu rëb me:

¹⁷ Znu rnee Dios:

Zeene wzhile runfalt gal dze co, laa naa cxel zhiEspiritu naa zdoo grëse miech; grë xingan zhow, grë xindzoo zhow, laa zho cteed xtidz naa,

grë zha nguieg, nzian grë ncuaane glulo lo zho, grë mengol, nzian grë ncuaane glu mcaal lo me.

¹⁸ Len dze co,

grëse zha ne nguzobdiidz lo naa, niicle mguiv, niicle wnaaw laa naa cxel zhiEspiritu naa zdoo zho, dzigo grëse zho cteed xtidz naa.

¹⁹ Nzian grë ncuaane gzee zdoo to glu naa zhan gbaa, scaque lo guidzliu, zan to ren, zan to bel, zan to grë goxdoo.

²⁰ Zeene zhile gdzin dze ne guiaad men ne rnabey ne, laa lo ngbidz ycow, laa mëë gna nizhnie zig rna ren.

Dze ne guiaad me ga,

dze co gac tib dze ne mazdraa nroob, tib dze ne mazdraa ndzon.

²¹ Grëse zha ne dib zdoo gnab lo Dios yquia zdoo me zho, grëse zha co scaania me zho.

²² ;Grëse to, golquiaadiaga sca ganle! Led nanwen to ganle Dios pxeel Jesús, men Nazaret ne biaad lo guidzliu rii, Dios bnabey been me grë milagr nroob, been me grë ncuaane bzee zdoo to; ga blu ganle ne nli Dios nacnie me. ²³ Laa zeene laa Dios bdeed diidz biab me ladznia to (sac ible xtiidzle Dios naca, nanle me zha nac ne sca ted Jesús), laa to bnaaz me, bzobdoo to me, rnabey to gut me. Led to gon bloo me ladznia grë zha ntseeb ne sca psacsi me pquiaa zho me lo cruz. ²⁴ Per bleeban Dios me, psilaa Dios me ladznia guielgut; sac lëbd guielgut ne lëw gnabey lo me.

²⁵ Zeene bzeet David Jesús, znu rëb me:

Men ne rnabey naa, ran naa tibaque quianap me naa;

tibaque zo me cue naa nëz derech, ;pe nac nadien ne lega pe gac naa?

²⁶ Gacxe waa, nley no zdoo naa, niicle ludz naaw, rleya roolnie naa me.

Ni gane tibladz rac naa;

²⁷ sac nan naa niicle guet naa, ib csaand me guiaan naa len baa, ib gdeete me diidz xin xpëel naa.

Naa nac tib ngundziin lo me, ni rleynie me naa.

²⁸ Me blu lo naa zha grieelo ygaa naa guielmban,

ni tib guielbley nroob ne ygaa naa zeene laa naa gdzin lo me.

²⁹ Bets, bzian, to ne nac to menladz naa, golgona ganle: led mine bdeete pxozgol ne David bnee me nu; sac gon, zeene gut me güey zho güeyqueets zho me, ni haxta lo nadze laa xpaan me bii niaa. ³⁰ Sinque mine bdeed Jesús ga bzeet me, sac gon tib zha ne biadteed xtiidz Dios goc me. Gocnanle me ne lo xti me grieequia Men ne nacled diidz ga

cxeeł Dios, ni meŋ co sob gnabey zigne bnabey me; sac scale rëb Dios lo me, ni haxta bzeet Dios lë Dios parne glu ne yquidied me. ³¹ Dzigo zig nac zeene ranle me grëtaa mine ted Jesús, nacne bzeet me ne ib zrieeban Jesús, rëb me guiaaŋd xcuerp Jesús zaatne rbëz grëraa meŋgut, niicle xiŋdgaaw.

³² Jesús ga goŋ bzeet me, sac zig nac Jesús grop lo no bdion no bleeban Dios me, ³³ ni niina gbaa zob me cue Dios nëz derech, sac me nac meŋ rnabey. Ni zigne nacle xtiidz Dios meŋ ne nac Pxoz me, laa me pxeel Espíritu Sant lo no; ni niina grëse ncuuaŋe noyaŋ tow, grëse ncuuaŋe noyongaa tow, xtsiŋ Espíritu Santow. ³⁴ Laa naa rbire rne lo to stib ganle, led miŋe bdete David ga bzeet David; sac goŋ, zeene gut David güeysohd David gbaa. Davitaque goc zha ne znu rëb:

Rëb Dios lo meŋ ndzon ne rnabey naa:

“Cue naa nëz derech, nu bzob,

³⁵ nieeda lozh gnaz naa grëse zha ne rlëe lo luu, csaŋ naa zho ladznia luu.”

³⁶ “Grëse to meŋ wladz, golgona sca ganle: Jesús goŋ, meŋ ne pquiaa to lo cruz ga, lëe meŋ co nac meŋ ne rnabey. Dios bzo me, ni Dios pxeel me biaad me lo guidzliu.

³⁷ Zeene bin grë miech ne ndxie ga sca bnee Pedr, biab guiełnë zho, psilo zho rnabdiidz zho lo Pedr ni lo grëraa zha ne nacgza Pedr ga, rëb zho:

—Bets, nana, ¿pe nac ncuuaŋe dziuŋ no?

³⁸ Dzigo rëb Pedr lo zho:

—Tib tib to, golsaan xquiełntseeb to, golbig lo Dios, ni none chobnis to zeena guiaaŋmbe to lo xtol to; scagaa ible sxeel Dios Espíritu Sant gacnie to. ³⁹ Sac psanle Jesús diidz ne ible sxeel me Espíritu Sant gacnie grëse zha ne cuedz me sëeb xnëz me; zigtaa tow, zigtaa xpëed tow, zigtagaa grëraa menzita.

⁴⁰ Nzianraa grë ncuuaŋe bzodiidz Pedr lo zho, ni pso me diidz lo zho csaan zho grëtaa guiełntseeb ne ruŋ miech lo guidzliu ri. ⁴¹ Lo grë zha ne bzoobdiag grë miŋe pseed me zho dze co, rga zho maase tson mil; blozh ga, grëse zho brobnis, laa zho gocgrë grë zha ne rililadzle Jesús ga.

Niowse mban zho

⁴² Grëse zha ne rililadz Jesús ga, dib zdoos zho zienal zho grë miŋe rseed grë zha poxtl co zho, tibaque rcaalsa zho rzodiidznie zho Dios, ni row zho guietxtil zigne psanle Jesús diidz guŋ zho. ⁴³ Grëraa zha ne zo stib lad, rdziej zho; laa grë zha poxtl co, nzian grë milagr nroob ne ruŋ zho.

⁴⁴⁻⁴⁵ Tipse rnee zho, rdeedlsa zho ncuuaŋe rquiin zha ne nacgrë zho; zha ne quianie liu, tel pe grëragaa ncuuaŋe quianie zho, haxta rto zhow, dzigo rguiz zho dimi co lo grë zha ne guieŋd pe yquiin.

⁴⁶ Gzataa dze rcaalsa zho len yadoo; rlozh ga, rcaalsaque zho lidz grë zha ne nacgrë zho row zho guietxtil zigne psan Jesús diidz ga; ine nley, ine ndooladz rbe zho grë zho rquiin zho guiełwagw ne ruŋlo zho, ⁴⁷ ni rley zho roolnie zho Dios. Grëse miecha, rley zho ran zho sca niowse mban zho; ni zigse zie dzew, scase scase laa Dios rbedzraa grë zha ne rzëeb xnëz Jesús, laa zho raczianraa.

3

Biac tib meŋ ne në ni

¹ Tib dze zig rbixwe ngbidza, brie Pedr grop Juan zie zho yadoo nroob ne zob Jerusalén, sac lëe hor co nac horne rie zho yadoo riezodiidznie zho Dios.

² Gax ro yadoo co quia tib puert rnee zho Puert Ndzon, ga rzob tib zhey gol ib gacd së, sac nële ni me zeene gol me. Gzobse dze, rie zha ne riezooob me ga rnab me gon lo grë zha ne rzëeb yadoo. ³ Laa dze co, zeene gon me laa Pedr grop Juan zieded ga ne laa zho sëeb yadoo, zëeb nia me rnab me gon lo zho. ⁴ Dze rwi zho lo me, tibaque rëb Pedr:

—Lo no bui.

⁵ Dzigo blis lo me bui me lo zho, naŋ me bod no pe dimi ne gdeed zho lo me. ⁶ Wbiire bnee Pedr lo me, rëb Pedr:

—Quianied naa dimi ygad naa lo luu. Ncuuaŋe grieełose gnedz naa, laaw gnedz naa niina, jniapse por Jesús (meŋ Nazaret), laa naa rnab lo luu, niinagazh guso i zeen bzëni!

⁷ Dzigo bzhen Pedr nia derech me bliso Pedr me, hor cogazh laa grop ni me ga bdaan, ⁸ laa me psilo bzë. Rley me laa me bzëeb len yadoo gza me zho, lo guiełbley co haxta rias me, ni roolnie me Dios.

⁹ Grë miech ne no len yadoo, zeene gon zho laa me rzële, ni scataa rley me roolnie me Dios, ¹⁰ bzee zdoos zho; sac ruŋbey zho me, naŋpaa zho rzëd me glo, tibaque ran zho me rzob me zaatne quia Puert Ndzon ga rnab me gon.

¹¹ Zeene laa Pedr grop Juan brie len yadoo nroob co, yeque me nal zhits zho ib rsaand me zho, laa zho bdziŋ stib nëz cho yadoo co zaatne quia tib nsaap nroob ne rnee zho zhiNsaap Salomón. Nałaque grë miech co, rlozhd gwi zho, rlozhd gzee zdoos zho. ¹² Dzigo rëbchaa Pedr lo zho:

—¿Pe rac to? ¿Pe nacne squitaa rzee zdoos to, squitaa rwi to lo no, zig nac zeene no bdziuunguiac meŋ ri, zig nac zeene por nguzodiidz no lo Dios gane brieelo psëe no me?

¹³ Golgacnaŋ ganle led scada; sinque Dios meŋ ne bliladz Abraham, meŋ ne bliladz Isaac, meŋ ne bliladz Jacob, meŋ ne bliladz grëraa xmengol ne, meŋ co blu lo to niina ne nli meŋ nroob nac Xpëed me Jesús. Lëe Jesús

co ga goṇ bnaaz to, bloo to me ladznia zhi-wxtis ne, ni zeene gocladz Pilat nsilaa Pilat me, pe liaadz to ndeed to diidz. ¹⁴ Bdeete to diidz nlaa men ne nac men ndzon, men ne peet xtoḷd; leḷ bnaob to blaa tib zha ntseeb ne nzēēb ngutoo. ¹⁵ Laa me, pquia to haxta beet to me, ni me nac men ne rdeed guielmban. Per bleeban Dios me, ni mban me niina; sac grop lo no bdzion no me.

¹⁶ Ni niina men ne ran to biac nu, niapse por Jesús biac me; led runbeyle to me nanle to ganle rzēd me glo. Ne dib zdoo no riladz no Jesús, gane brieelo bnaob no beenguiac Jesús me.

¹⁷ Grēse to bets, ne nac to menladz naa, rgobey naa niicle to ni niiclegaa grē zha ne nac zhiwxtis ne, lega laa to bnabeyse bgaa Jesús beet to me, niicle to biendaque dien pe nacne sca been to. ¹⁸ Laa Dios bneedz diidz been to grē guielntseeb co, sac sca goc grēse mine bzeet grē zha ne biadteed xtiidz Dios padzeela, zeene bzeet zho zha nac grē guielnē ne ted Jesús, Men ne nacle diidz cxeel Dios guiaad lo guidzliu.

¹⁹ Dol nroob ga goṇ been to, gacxe nana goṇ waa goḷsaan xquielntseeb to, goḷbig lo Dios; zeena csaambe me to lo xtoḷ to. Me gneedz guielbley lo to stib, ²⁰ ni zbiire cxeel me Jesús lo to stib, guiaadsilaa me to. ²¹ Gbaa no me niina, ni ga cūez me nieeda gal dze ne laa Dios blozh bnabey goc grēse ncuaaṇe none gac, zigne bzeetse grē zha ne pxeel me padzeela, biadteed xtiidz me. ²² Zig nac Moisés bzeet me laa Jesús guiaad, rēb me lo grē pxoz gol ne: “Dios men ne rnabey ne, ible znabey me ne lo xti to griequia tib men ne gac zig nac naa lo to niina. Zeene laa me guiaad, golgon xtiidz me; ²³ sac zha ne gond xtiidz me, ib tedsoo znitlo zho.” ²⁴ Scaque Samuel, ni grēraa zha ne biadteed xtiidz me, grēse zho bzeetle zho grē ncuaaṇe noyac len dze rii.

²⁵ Grēse to, xmengol to nac grē zha co, ye to ga rēb Dios gunlay me zeene znu biaan me diidz grop me Abraham, rēb me: “Niapse por tib men ne griequia lo xti luu, laa naa gunlay grēse miech ne ndxie gidbdoose lo guidzliu.” ²⁶ Ni niina ne laa Dios bleeban Jesús, gloque lo to pxeel me me, gunlay me to, zeena csaan to xquielntseeb to.

4

Güeyzo zho zho lo wxtis

¹ Laa Pedr grop Juan bii noneeque lo grē miech co, zeene laa bla zha ne nac pxoz bdzin ga, bdzinnie zho tib zha non ne quianap yadoo co ni zla zha ne nacgrē zha saducé. ²⁻³ Zigne bdzin zho bnaaz zho Pedr grop Juan, güeysēēb zho zho ladzguib; ni ne bdzele dzew, ga biaan zho dipse guieel co. Rlēē grē zha co, sacne laa Pedr grop

Juan quianee lo grē miech co zha bleeban Dios Jesús; ni rnee zho grēse mengut, scaque grieeban zho.

⁴ Niicle ne scataa rlēē grē zha rnabey co, per nzian zha ne ndxie ga biladz Jesús; zig gaay mil rgaa loxaque zha bgui.

⁵ Zeene biini liu co, grēse zha non, grēse zha ne rnabey lo menguedz, laa zho pcaalsa. ⁶ Ga bdzin Anás men ne nac pxoz nroob ne rnabey, ga bdzin Caifás, bdzin Juan, bdzin Lejandr ni grē zha ne nac menlidz pxoz ne rnabey ga. ⁷ Dzigo bnabey zho gocredz Pedr grop Juan, bzo zho zho glowtaa, bnabdiidz zho lo zho, rēb zho:

—Golnē nadien, zcho rnabey to, cho pxeel to ne squi no to?

⁸ Horco laa Espiritu Sant bdeed guielbiini lo Pedr, pquiab Pedr rēb Pedr lo zho:

—Grēse to ne nac to zha ne rnabey lo menguedz, grēse to ne nac to zha gol ne non xtiidz. ⁹ Telne mine rliisqui to nac ne dien zha bdziun no men rii ne laa ni me biac, ¹⁰ golsiguiel golquiaadiaga ganle, zeena gacnan tow ni gacnan grēragaa menguedza. Jesús goṇ, men Nazaret ne bnabey to gut lo cruz ga, men ne bleeban Dios ga, men co beenguiac men rii; ni laa to rangaa me laa me zo lo ne nu. ¹¹ Lēē Jesús ga raquiet lo Xtiidz Dios zaatne znu rnee: “Quie ne psēēb zha ne nozaa yu, ni nand zho lēēpaa quie co nac mine rnazdziits yu.” Ni scapaa nagon bzhaac to me. ¹² Loxaque me zrieelo csilaa ne lo xtoḷ ne, sac bzodraa Dios cho stib zha ne niaad lo guidzliu niaadsilaa miech.

¹³ Zeene goṇ grē zha wxtis co, scataa peet dzeb nod lo Pedr grop Juan, bzee zdoo zho; sac runbey zho Pedr, runbey zho Juan, nacd zho cho zha ne güey wseed nroob. Ga goṇ zho, pa lotaa guielbiini ne bgaa Pedr grop Juan ne bzēnie zho Jesús.

¹⁴ Peet brieelod nliisqui grē zha co, sac nli-gaa laa men ne biac ga zo lo zho ga. ¹⁵ Dzigo mazd bnabey zho brieed Pedr ley grop me Juan; laa zho biaan bzodiidz zho dien zha gun zho zho, ¹⁶ sac rien zho tib milagr nroob ga sca biac ni men co; niicle ne racladz zho yqueets zhow, per grēle menguedz bina. ¹⁷ Nacne biaan zho diidz, ctseb zho zho gbiiredraa zho cseed zho miech zhiwseed Jesús; zeena lozhd gacnan grēraa miech zha biac men co.

¹⁸ Dzigo bredz zho Pedr stib, grop me Juan, goctox zho lo zho.

—Laa no rso diidz lo to goṇ —rēb zho—, gbiiredraa to cseed to miech zhiwseed men ne rnee to Jesús ga.

¹⁹ Pquiab Pedr grop Juan, rēb zho:

—Zha dien rzac to, zpe nonguiela ga laa ne dziuun no mine rnabey Dios, leḷ mine rnee to i dziuun no? ²⁰ Grielod goṇ dziuun no mine rnee to i, sac grēse ncuaaṇe bdzion no,

grëse ncuuañe bdzionгаа no ib none gnee now, zeena gacnañ grëse miecha.

²¹ Dzigo wbiire grë zha rnabey co, ntseeb rac zho lo zho pso zho diidz csetraade zho miech; blozhse ga laa zho psilaa zho. Bdeetew diidz nsacsi zho zho, sac ndal miech ne rleynie Dios, rdeed zho xquizh lo me ne been me milagr ²² beenguiac me men co, ni choole iz rac sca gacd sè me.

Bnab zho lo Dios

²³ Zeene laa Pedr grop Juan bdzin lo grë zha ne nacgrë zho, bzodiidz zho grëse tel zha rëb grë zha rnabey co, zha rëb pxoz non co. ²⁴ Grë zha ne nacgrë zho ga, zeene bin zhow grëse zho psilo zho bnab zho lo Dios, rëb zho:

—Dios, luu nac men ro ne rnabey grëtaa ncuuañe no, luu bzaa gbaa, luu bzaa guidzliu, luu bzaa nisdoo, luu bzaa grëraa ncuuañe no. ²⁵ Padzeela zeene bdeed Espiritu Sant guielbiini lo pxozgol no David, men ne been xtsiin luu hor co; znu bnee me: ¿Pe nacne squitaa rac grë miech ne nacd zha Israel rlëenie zho Dios?

Racladz zho guñ zho ncuuañe ni grieelod lo zho.

²⁶ Grëse zha non ne rnabey grë guiedz, tipse rac zho laa zho racntseeb lo Dios rlëenie zho me, ni rlëenie zho men ne bzooblo me pxeel me lo guidzliu.

²⁷ Ni nligaa na scase goca. Guiedz Jerusalén nu, nu biaad rey Herod, biaad Pons Pilat, pcaalsa zho grë zho menladz no ni grë menzit, tipse bnediiz zho psacsi zho Jesús, men ndzon ne bzooblo luu pxeel luu biaadgun xtsiin luu lo guidzliu nu. ²⁸ Grëse zigne psanle luu diidz, scase been zho. ²⁹ Ni scaque niina, bui ganle zha racladz zho tseb zho no parne peet gnedraa no; luu nac men ne gocniën no ne nac no zha ne rdziuun xtsiin luu, zeena gdzieebd no cseed no miech xtiidz luu. ³⁰ Laa no rnab lo luu, beenguiac grë men rzacnë, been grë milagr nroob, blu grë ncuuañe gzee zdo miech; zeena gan zho ganle men nroob, men ndzon nac Xpëed luu Jesús.

³¹ Zeene blozh bzodiidznie zho Dios, masaque bzhidz zaatne ndxie zho ga; hor co grëse zho laa zho bgaaraa guielbiini ne bdeed Espiritu Sant lo zho; peet rdzieebdraa zho laa zho zieseed miech Xtiidz Dios.

³² Len dze co, grëse zha ne riladzle Jesús ga, tibaque nac zho, tibaque rnee zho, tibaque nac mine zienie guic zho. Nod zha ne guiab lose zho yquiin ncuuañe rap zho; sinque grëse ncuuañe quianie zho chen grë zho naca. ³³ Grë zha poxtl co, zeene rseed zho miech zha brieaban Jesús, nzian zha ne riladz me; rlupaa ne Dios nacie zho.

³⁴⁻³⁵ Ne nligaa tipse nac zho grë zho, nod zha ne guiab ne guiend pe yquiin, sac grëse zha ne quianie liu, zha ne quianie nzian yu, rto zhow dzigo rdeed zho dimi co rguiz grë zha poxtla lo zha ne rquiiina. ³⁶ Sca been tib men ne nacgrë zho lë José. (Zha xti Leví nac me, gol me tib lo guidzliu win ne no lo nisdoo lë Chipr; zha poxtl-le bleelë me Bernabé. Bernabé, nac zig nac ne rnee ne: Zha ne rchoobladz zdo miech.) ³⁷ Pto me tib lë liun me, dzigo bdeed me dimi co lo zha poxtl, bdiiz zhow.

5

Znu bzhaac Ananí grop Safir

¹⁻² Tib mgui lë Ananí, laa tsiel me lë Safir; ye me pto tib lë liun me. Gonlo tsiel me, tel palal dimi ne bdo liu co, bzheenga me zhisa. Zeene laa me ziesan mine biaan ga, lo poxtl, rëb me lëe grë dimi ne bdo liun me ga. ³ Dzigo rëbchaa Pedr lo me:

—Ananí, ¿pe nacne bdeed luu diidz bzëeb mendox zdo luu? Mendox i gon noquill luu nañ luu yquidiee luu Espiritu Sant, rnee luu lëe grë dimi ne bdo liun luu nu. ⁴ Bien ganle chen luu liu co. Dimi ne bdiizh zhow, chen luuw, niac niun luuw zigne niacladztaa luu, ¿pe nac dzigo ne racladz luu yquidiee luu? Gon ganle led nod noquidiee luu, Dios i gocladz luu nquidiee luu.

⁵ Loxaque sca bin Ananí bnee Pedr; znuse biab Ananí liu, gagazh gut Ananí. Grëse miech ne bina, bdzieb zho. ⁶ Dzigo güey bla zha ngueg pchel zho ngutoo co lar, blis zho me ga laa zho ziequeets me.

⁷ Wdzeelaaque goca zeene laa tsiel me bdzin, ni lalnu güeynied guic me ne laa tsiel me gutle. ⁸ Bnabdiiidzaque Pedr lo me, rëb Pedr:

—Bnë dien, ¿pe nli lëe grë dimi ne bdo liun to nu?

Pquiab wnaa co, rëb me:

—Nliw, laiñ pto now.

⁹ —¿Pa briece pensar qui lo to grop tsiel to? —rëb Pedr—. Ne squi tipse bnee to nañ to yquidiee to Espiritu Sant; dol nroob i gon been to lo Dios. Laa zha ne güeyqueets tsiel luu blansole ro yu nu, ni niina gon laa zho güeyaque luu.

¹⁰ Diidz co blozh briece ro Pedr; znuse biab wnaa co liu, guchedraa me ga. Zeene laa gza zha ngueg co bzëeb len yu, laa me nixle ga; gon zho gutle me, dzigo blis zho me güey zho güeyqueets zho me cue xpa tsiel me. ¹¹ Grëse zha ne gon sca goc men co grop me, zha ne bingaaw, zigtaa zha ne riladz Jesús a zigtagaa grëraa miecha, per nli bdzieb zho.

¹² Grë zha poxtl co, tibaque rcaalsa zho tib lo nsaap ne quia cho yadoo ga rnee zho zhiNsaap Salomón; nzian grë milagr ne rdeed Dios diidz ruñ zho. ¹³ Grëse miech

ne rcaalsa ga, rleyinie zho grë zha poxtl co, nzian zho rlladz mine rseed zho, per rbigd zho gacgrë zho zho.

¹⁴ Zigse zie dze, scase racndalraa miech ne rzëeb xnëz Jesús, mnguisaque wnaasaque laa zho rlladz me dib zdo zho. ¹⁵ Zhoob diidz scataa milagr ne run grë zha poxtl co. Dzigo psilo miech rbee zho grë men rzacnë, rguix zho me ro nëz, no me zhoobse lo xlon me, no me zhoob lo yag ne ney zho me; rquiambëz zho maase zhimlëse Pedr guiab lad grë men co zeene laa Pedr ted. ¹⁶ Haxta grë guiedz win ne ndxie gax Jerusalën ga, rrieë grë miech rdzinne zho grë men rzacnë, no grë men co noguitnie mendox; grëse zho runguiac zha poxtl co zho.

Bio grë zha poxtl ladzguiib

¹⁷ Zeene gon men ne nac pxoz nroob ne rnabey, ni grë zha saducé, scataa racnie miech grë zha poxtl co, per ni blëë zho, ¹⁸ bnabey zho bgaa zho psëeb zho zho ladzguiib stib. ¹⁹ Pcow liu co, guieela bdzin tib xanjl Dios pxal me ro ladzguiib, blee me zho ga; dzigo rëb me lo zho:

²⁰ —Goltsie len yadoo, grëse miech ne ndxie ga golnee lo zho, zeena gacnañ zho zha yгаа zho guielmban ndzon ne nodeed Dios niina.

²¹ Biinigazh liu, silgaw laa zho bdzinle len yadoo; psilo zho laa zho noseed grëse miech ne ndxie ga.

Laga laa zho noseed miech len yadoo, laa men ne nac pxoz nroob ga, grë me zha ne nacnie me, bnabey zho ycaalsa zha ne nac wxtis ni grë zha non lo menguedz.

Zeene laa grë zha co pcaalsa, dzigo pxeel zho zha ne ziebee grë zha poxtl co ladzguiib. ²² Bdzin zho ro ladzguiib, ni tib choot guiend len co; rzhitsaque wbiere zho güeynie zho diidz, ²³ rëb zho:

—jChoot guiend len ladzguiib! Dziits niooga bdzin no, ga zo zha ne quianap; per zeene bzhial ro ladzguiib bziaab no, bdzin no choot guiend len co.

²⁴ Grë pxoz ne rnabey, ni men ne zo lo menguiib ne rquianap yadoo, zeene bin zhow, rdzieldraa zho zha gun zho. ²⁵ Lëëtaaque sca no zho, zeene bdzin tib zho rëb:

—Zha ne gon bloo to ladzguiib ga, laa zho nolaque len yadoo noseed zho miech.

²⁶ Lëëled brieë men ne zo lo grë menguiib ne rquianap yadoo, brieenie me bla xaguiib me, güey zho niapse wen diidz güeyxi zho zha poxtl co len yadoo; sac rdzieb zho ngoquie grë miech co zho. ²⁷ Zeene bdzinne zho zho lo grë zha wxtis co, dzigo rëb men ne nac pxoz nroob ga lo zho:

²⁸ —¿Pe nacne ronde to diidz? Led pso no diidz lo to cseetraade to miech zhiwseed mgui ne nac Jesús ga. Ni na gon dible lad

guiedz nu nozhoobneñ zhiwseed to i, haxta rcaadzdoj to no ne no bdziuut me.

²⁹ Dzigo pquiab Pedr rëb Pedr:

—Rdzion no mine rnabey samiech no, per glo none dziuun no mine rnabey Dios no. ³⁰ Men co bliladz grë pxozgol ne, ni men co gon bleeban Jesús, men ne sca psacsi to beet to lo cruz. ³¹ Ni meque zeynie Jesús gbaa, bzoob me Jesús cue me nëz derech; sac Jesús nac men ne rnabey, men ne rsilaa miech lo dol. Ni Jesús gon, gdeed guielbiini lo grëse men Israel gbiere bgib zho lo Dios stib; zeena gunquizhd me zho xtöl zho.

³² Mine rnee no lo to nu diidzliw, nozhal bdziona, ni led loxaque nodsegaa; sinque ye Espiritu Sant men ne rxeel Dios racnieñ grë zha ne ron xtiidz me, ye men co quianee ganle ne nliw.

³³ Zeene bin zho sca rëb Pedr, blëëye zho, rzac zho tebaa gagazh gut zho gza zha poxtl co.

³⁴ Lad zha wxtis co no tib zha farisé lë Gamaliel, ye me rseed miech Xley Dios, tib zha non nac me lo menguedz; dzigo guso me bnabey me brieë grë zha poxtl co nëz ley, ³⁵ bnee me lo grëraa zha ne ndxie ga, rëb me:

—Grëse to menguedz, laa naa rso diidz lo to, golcobeey gon dien pe gun to zha qui. Golguien ganle, nonguielda ne lega mine gacladztaa to gun to zho. ³⁶ Golsoladz ganle, padzeela squi bio tib men ne brieelë Teudas, rëb me laa me niac tib zha ne nabey, ndal zha ne wbig lo me, goclo zho zig tap gayoo. Ni pasë me nabey, zeene laa me gut nëzrii nëzrec bliaal grë zha ne gocnie me ga. ³⁷ Laa len iz ne nodop lë miech, scaque brieëquia tib men Galilé brieelë Judas. Ndal zha ne gocnie me, per zeene laa me gut scasaque nëzrii, nëzrec bliaal grë zha ne gocnie me; brieelodaque pe niun me. ³⁸ Gane nagon rne naa lo to, mazd peet gunde to zha qui, golsaan zho squise golsilaa zho. Tsow glu telne guicse miech biab wseed ne ziaadnie zho i, dziciz dze ne nitlow. ³⁹ Laa telne nligaa Dios rsiaab guic zho squi rseed zho miech, niacxe zlëb to gnitlo to wseed ne ziaadnie zho. jTelne guiab to gnitlo tow, nande to nend Dios ga tilnie to!

⁴⁰ Grëse zha wxtis co bzoobdiag zho xtiidz Gamaliel, bien zho ne scataa nonguiel gaca. Dzigo biere bredz zho grë zha poxtl co, bdin zho zho, ni biere pso zho diidz lo zho gbiere-draa zho cseed zho miech zhiwseed Jesús. Blozhse ga, dzigo laa zho psilaa zho.

⁴¹ Zeene laa zho wbi ga, rley zho por grëtaa mine pteed grë zha non co zho loxaque ne rlladz zho Jesús. ⁴² Ib psand zho zhiwseed Jesús, gzobse dze rie zho yadoo ni rieque zho stib yu stib yu, rnee zho lo miech ne ni lëë Men ne zëëble diidz cxeel Dios lo guidzliu ga nac Jesús.

6

Bzo gadz zha ne guñ xyudar poxtl

¹ Ni ne len dze co quaiyac nzianraa miech ne rzëeb xnëz Jesús, dzigo psilo grë zha Gres rlişqui zho, rnee zho rdioond grë wnaa viud ne nac zha ladz zho zaacse; zeene rgaaz ncuuaane row zho, rgaad zho lal miñe rgaaz grë wnaa viud ne nac zha Israel.

² Dzigo nacne bredz gza tsiipchop poxtl co grëse zha ne nole xnëz Jesús ga, bnee zho lo zho rëb zho:

—Gacnañ to ganle, grieelodraa ne noque so dzian no dien zha ygaaz ncuuaane yquün to, sac goñ nonguielda csaan no miñe nac xtsiñ no, ib none guioseedraa no miech Xtiidz Dios. ³ Miñ co nagon, mazd gołz gadz zha bgui ne guñ dziin co, lëëraasi golguieñ cho gzo to; golguib zha ne ndzinli, zha ne nixbiini, zha ne nacie Espiritu Sant; ⁴ zeena sca guio lo no gzođiidznie no Dios, gnab no lo me, ni cseed no grëraa miech Xtiidz me.

⁵ Grëse zho rëb, wen sca gaca. Horcogazh psilo zho ble zho zha ne so guñ dziin co. Bzo zho tib meñ lë Lip, tib meñ lë Prócoro, tib meñ lë Nicanor, tib meñ lë Timon, tib meñ lë Parmen, tib meñ lë Xteb, rlpaa dib zdoo me riladz me Dios ni nacie Espiritu Sant me; ni tib meñ Antioquí lë Nic, mazd glo Nic goc tib zha ne bleyniedox grë zhiwseed zha Israel. ⁶ Dzigo güeynie zho gza zha co lo zha ne nac poxtl. Blozhse bnab poxtl lo Dios gacnieñ me zho, dzigo pxobnia poxtl guic zho, bnab zho lo Dios gdeed me guielbiini lo zho.

⁷ Zigse zie dze, laa Xtiidz Dios quiagaazraa dib Jerusalén. Nzian grë zha ne rzëeb xnëz Jesús, haxta grë men ne nac pxoz, nzian zho laa zho bliladz me dib zdoo zho.

Bnaaz zho Xteb

⁸ Goc palal dzew, nzian grë milagr nroob ne ruñ Xteb, sac tibaque sca dib zdoo me riladz me Jesús, ni nacie Espiritu Sant me.

⁹ Laa tib dze, briequia bla zha ne rie tib xyadoo win zha Israel, lë “Esclavos Libertados” gocladz zho ndiđiđidznie zho Xteb. Brieque zla zha Israel ne ziaad nëz Ciren, nëz Alejandrí, nëz Cilis, ni nëz Asia, ye zho gogza zha co rlëe zho lo Xteb. ¹⁰ Gonse zho rlëbd xtiidz zho lo Xteb, sac niapse Espiritu Sant rdeed guielbiini lo me, rien me pe rnee me lo zho; ¹¹ dzigo bdiizh zho bla zha ne ptsieets diidz, pquidie zho rëb zho bin zho laa Xteb noneenë Moisés ni rneenë me Dios.

¹² Zeene bin menguedza, blëe zho; nacne bnabeyaue zha ne rnabey lo menguedz bgaaz Xteb güeyzo zho me lo wxtis. ¹³ Ni güeynie zho bla zha ne lega bnexuu, rëb zho:

—Nliw, rtsidil mgui qui xyadoo ne, rtsidil me xley ne. ¹⁴ Bdzionppa no goñ quanee me laa Jesús meñ Nazaret ne quiazeet zho

dib i ctsil yadoo rii, ni ctsëe me ley ne psan Moisés lo xmengol ne.

¹⁵ Horco zeene laa grë zha wxtis co ni grëraa zha ne ndxie ga bui lo Xteb, goñ zho tib biini nroob ne riab lo me, masaque rlu me zig rlu tib xanjil Dios.

7

¹ Dzigo bnabdiidz meñ ne nac pxoz nroob ga lo Xteb, rëb me:

—¿Bnë dien pe nli quiaayun luu grë ncuuaane rnee zho i?

² —Grëse to ne nac to menladz naa —rëb Xteb—, laa naa rzaac to zig bets naa, zig pxozgaa naa. Golsiguiel golquiaadiag chop tson lan diidz ne gne naa lo to nu ganle: Padzeela, zeene bii no pxozgol ne Abraham dan ne lë Mesopotam, briequia Dios ndzon ne no gbaa lo me, rëb Dios ³ griee me ga, csañ me grë menlidz me, tsie me nëz ne glutaa Dios lo me.

⁴ Nacne brie me xtan zha Caldé ga, bey me nëz Harán, ga wban me zhis. Laa zeene laa pxoz me gut, dzigo laa Dios biaadnie me nëz rii, zaatne mban ne nu niina. ⁵ Niicle ne laa me blanso lo liu rii, ni tib lë win zaatne so ni me bdeete Dios lo me; per rëb Dios ib grë zha xpëed me guiaanniew. iNi laa me quianied mëed len dze co! ⁶ Rëbgazh Dios lo me, ib zieban grë zha xpëed me ga ladz beñ dipse len tap gayoo iz, ga csaci miech zho guñcun zho zho dziin. ⁷ “Per ib tedsod sacsi naa zha ne csaci zho ga”, rëb Dios, “ni ga griee zho glanso zho nu, nu goolnie zho naa.”

⁸ Ni parne glu ib zac miñe bnee Dios lo Abraham ga, dzigo psañ me diidz grëse mëedbgui ne grieequia lo xtií Abraham none tso tib bey lad zho. Miñ co nagon, zeene laa xpëed me Isaac goc xon ngbidz, laa me bloo Isaac bey co. Scaque been Isaac xpëed me Jacob, ni scaque been Jacob gza tsiipchop zha ne goc xpëed Jacob; lëe gza tsiipchop zha co nagon goc pxozgol ne.

⁹ Ziese pxozgol ne ga, blëenie zho bets zho zha ne lë José, pto zho José lo men ne zie wto nëz Egipt. Ni ne nacie Dios José, ¹⁰ psilaa me José lo grëtaa guielnë ne bded José, ni gocnieñ me José beenbey rey Egipt José. Ib psaañ me José, bdeed me guielbiini lo José. Zeene goñ rey co scataa meñ nixbiini nac José, dzigo rnabey me bzo José goc me tib meñ non ne bnabey dipse Egipt; haxta grë ncuuañ non ne no lidz rey, me bnabeya. ¹¹ Lëëtaaque len iz ne nac me dziin, biaad tib gbin; dipse xtan zha Egipt, dipse xtan zha Canaán mban bded miech. Grë zha ne goc pxozgol ne ga, guienndraa pe gow zho. ¹² Laa zeene bin Jacob laa zhoxbtil bii no Egipt, dzigo pxeel me zho güeyxi zho zhoz ga.

¹³ 'Zeene goc chop vuelst ziexi zho zhob Egypt, dzigora gocnan zho bets zho ga r-abey Egypt; niiclegaa rey cow, hor coraa beenbey me bets José. ¹⁴ Dzigo bnabey José güeyxi zho pxoz me Canaán, güeyxi zho tsieel zho, güeyxi zho xpëed zho. Lo grë zho rgaa zho tsongal tsiin, laa zho bdziñ Egypt.

¹⁵⁻¹⁶ 'Sca nacne laa Jacob bey Egypt. Ga gut me, dzigo güeyqueets zho me Siquem, tib len baa ne bzhii Abraham lo Hamor; scaque grë xpëed me zha ne goc pxozgol ne ga, ga gut zho. ¹⁷ Grë zha ne brieequia lo xti zha gol co, zha ne na guiel ne nac menladz ne, ndal iz ne bio zho Egypt ga, ni ndaldoo goc zho. Laa zeene ziaadyob cuee Dios zho ga zigne rëble me lo Abraham glo, ¹⁸ laa men ne nac rey Egypt len dze co, psilo ptsidil zho; sac rsoladzdraa me grëtaa dziin ne been José lo menladz me. ¹⁹ Psacsi me zho, been zho zigne gocladztaa me, haxta bnabey me grëse mëedbgui ne ral gandraa zho win parne guet win.

²⁰ 'Len dze copaa nagon gol Moisés, tib mëed niow nac win. Tson mëe bloolan xniaa win win, ²¹ laa zeene brieequidraa ngolan me win, dzigo güeysan me win tib ro guuube Egypt, ga bdziel tib xindzoop rey win. Wnaa co gon win, biaan win lo me zig tib xpëed me; ²² haxta bioxco me grëse wseed ne rac zha Egypt, pseed win. Zeene laa win broob, tib men nixbiini goc win, niicle ne gnee wina, niicle ncuuaane gungaa wina.

²³ 'Choo iz rap Moisés, zeene biab guic me güeyted me lo menladz me. ²⁴ Dzigo gon me laa tib zha Egypt quaguin tib zha Israel; nacne bzëebaque me bla me zho, beet me zha Egypt co.

²⁵ 'Sca been Moisés, nan me nien grë zha Israel ne Dios bzo me gacnie me zho, csilaa Dios zho ladznia zha Egypt; per biend zho ne scaw. ²⁶ Biini liu co, gon me laa chop zha Israel nodil, zie me nla me lo xtil zho, bnee me lo zho nonguield ga til zho, guien zho ganle menladzaque zho. ²⁷ Dzigo biasaque tib zha ne noquiaaw ga pcheep zho me, ntseeb rac zho rëb zho lo me: "¿Cho bzo luu guiaadnabey luu no, guiaadlisquigaa luu dien pe nodziun no?" ²⁸ ¿Te racladz luu ye gutaque luu no zigne beet luu zha Egypt co nieeg?"

²⁹ 'Zeene bin Moisés sca rëb zha co, hor co bzhoon me bey me nëz xtan zha Madián. Nëz co ptsieelnia me, ga gop tsieel me chop mëedbgui.

³⁰ 'Choo iz goc no me nëz xtan zha Madián, tib dze no me cho gui Sinaí, tibatque zeene gon me laa tib anjl zo groltaa tib lo yag zarz, masaque rso bel lo yag co. ³¹ Bzee zdoo me, lëetaque laa me zie gbiggax me, zeene bin me tsi Dios rëb Dios lo me: ³² "Naa nac Dios

ne bliladz pxozgol luu Abraham, pxozgol luu Isaac, pxozgol luu Jacob."

'Zeene bin Moisés tsi Dios, per nli bdzieb me; lo dzeb co per ni blisdraa me lo me nwi me. ³³ Dzigo bnee Dios stib, rëb me lo me: "Blit lab luu, sac gax lo naa i zo luu. ³⁴ Laa dze nagon bdzin ne laa naa csilaa grë zha Israel ladznia zha Egypt; sac ran naa zha nactaa grë guielne ne noded zho ga, ron naa blactaa roon zho nosacsi zha co zho. Ni luu bzooblo naa tsiebee zho ga."

³⁵ 'Dzigo laa Dios pxeel Moisés ziesilaa me zha Israel; niicle ne glo rëb zho lo me: "¿Cho bzo luu guiaadnabey luu no, guiaadlisquigaa luu dien pe nodziun no?" Per me bzo Dios bnabey lo zho, blee me zho Egypt.

³⁶ 'Nzian grë milagr, nzian grë ncuuaane nroob ne gzee zdoo ne been Moisés blee me zho ga; zigtaa len guiedz Egiptow, zigtaa lo Nisdoos Nizhniew, zigtagaa grë dan bidz ne bio zho dipse len choo iz ne bzënie me zho ga.

³⁷ 'Moisés ga bzeet lo pxozgol ne, ne laa Dios gnabey lo xtiique zho grieequia tib men ne xeeel me guiaadteed xtiidz me, zigne pxeel me Moisés.

³⁸ 'Zeene nonie Moisés zho grë dan bidz co, Anjl ne bnee lo me guic gui Sinaí, me pteed xtiidz Anjl co lo zho; me pcaania ley ne biaan lo ne ga, diidz ne rap guielmban. ³⁹ Per bi bind zho xtiidz me, lel gocladz zho mbiire ney zho Egypt stib, ⁴⁰ bnabey zho Aarón rëb zho: "Bzaa tib mdio tedner lo no gacnie no laa no guioo Egypt stib; sac loxaque biadbee Moisés no ga, na choot nand dien yo Moisés."

⁴¹ 'Dzigo bzaa zho tib ngon yeen goc zhimdio zho, haxta beet zho grë ma ne bloogon zho lo mdio co; bleynie zho ncuuaane bzaania zho. ⁴² Nacne wbinladz Dios, psaan me zho; psilo zho bleynie zho grë ncuuaane ran zho zhan gbaa. Been zho zigne bzeetse zha ne biadteed xtiidz me padzeela, zeene rëb zho:

Golsoladz ganle,
laa ne nleynie to naa dipse len choo iz ne bio to grë dan bidz co,

laa ne niut ma ne ngogon to lo naa,
⁴³ lel grë mdio ne bzaa to, mdio co bleynie to, lo mdio co pquitsgzhib to.

Mdio ne rnee to Moloc,
zaatne zietaa to tibatque ney to lidza,
zhmel mdio ne rnee to Renfán, pa csaan to ma.

Mincoxce waa, laa naa cuee to ladz to,
gzonëz naa to guey to grë dan ne riaan zitraa lo guiedz Babiloin.

⁴⁴ 'Len dze ne sca bio pxozgol ne grë dan bidz co, tib yu larse goc xyadoo zho, ga biotsow quie ne quia xley Dios. Dioszhal blu lo Moisés zha tsaa yu co. ⁴⁵ Goc bla iza, zeene

blozh bnitlo Dios grë guiedz ne briñ nu glo, laa Josué blansonieque yu co. Haxta len dze ne goc David rey, biñ lëew nac xyadoo zho.

⁴⁶ David goc tib rey ne gocziuu lo Dios, bleynie Dios me, dzigo gocladz me nzaa me tib yadoo nroob zaatne mbëzlo zho Dios. ⁴⁷ Per brieelod nzaa mew, Salomónraa goc rey ne bzaaw. ⁴⁸ Nli laa yadoo co biao, per tel Dios, men nroob nac me, led yed me cuëz len grë yu ne rzaa miech. ⁴⁹ Zigne zhoobneeque lo Xtiidz me, zeene znu rëb me: Gbaa nac zaatne zoob naa, laa lo guidzliu nac zaatne rzo ni naa.

¿Zha nadien nac yu ne nan to gzaa to cuëz naa?

¿Pa nadien guiab to gzaa to zaatne gdziiladz naa?

⁵⁰ ¿Niacxe led naad bzaa gbaa?, ¿niacxe led naad bzaa guidzliu?

⁵¹ Golgona sca ganle —rëb Xteb—, zigne beënaque grë pxozgol to ga padzeela, scadaaque gon quaiayun to niina. Miech nad, miech ntseeb zdoonac to; ib ronde to miñe rnee Espiritu Sant. ⁵² Tel pxozgol to, nëlto gondze zho grë zha ne pxeel Dios biadnee xtiidz me; haxta beet zho grë zha ne bzeet ne laa Dios cxeel tib men peet xtold ne bzooblo me guiaad lo guidzliu. Ni niina ne laa Dios pxeel men co, scasaque been to, ptsidiñ to me, bnabey to bгаа me beet to me. ⁵³ Tibaque squi quia to quia guiiis to Xley Dios; xanjlpaa me biaadsana lo to, ni runde to miñe rnabeya.

Beet zho Xteb

⁵⁴ Zeene bin zho sca rëb Xteb, blëeye zho haxta rowye ro zho rwi zho lo me. ⁵⁵ Laa me, ne nacie Espiritu Sant me, zeene blis lo me bui me nëz gbaa, gon me lo guielndzon ne no Dios, gonpaa me laa Jesús to cue Dios nëz derech. ⁵⁶ Dzigo bnee me, rëb me:

—Ranpaa naa niina gon nzhialse gbaa, laa men ne pxeel Dios biaad lo guidzliu ga, laa me zo cue Dios.

⁵⁷ Miñe been zho ptse zho diag zho, ni nguedz roptsie zho parne gondraa zho pe rnee me; laa zho wbigbe bnaaz zho me, güeynie zho me tib lad ro guiedz. ⁵⁸ Zha ne goc textigw ga, blee zho lar ne mbix zho, bdziin zhow tib lo mgui nguieg lë Saul, mgui co pquianapa; laa zho psilo bdeedquie me.

⁵⁹ Sca nodeedquie zho me, laa me rnab lo Dios rnee me:

—Jesús, luu ne nac luu men ne rnabey, luu pcaania zhiesspiritu naa.

⁶⁰ Dzigo pquitsgzhib me, ni pquiaa me stib redz nroob bnab me lo Dios, rëb me:

—Dios, luu ne nac luu men ne rnabey, dol ne quaiyun miech rui, laa naa rnab lo luu quñquizhd luu zhow.

Loxaque blozh sca bnee me, laa me gut. Ye mgui ne lë Saul ga, bdeed diidz sca beet zho me.

8

¹⁻² Dzigo pcaalsase bla zha bgui ne noxco rleynie Dios, güey zho güeyqueets zho Xteb; mban rac zho, bio zho xquielnë me.

Len dze co, psilo zha ne sca rlëenie zha ne rililadz Jesús, ptsidiñ zho grëse zha ne rililadz me; dipse len guiedz Jerusalén pquianal zho zho. Grëse zho bzhoon, zha ne zie grëraa guiedz ne ndxie nëz Judé ga, zha ne zieegaa nëz Samar; loxaque zha ne nacse poxtl biao Jerusalén. ³ Ntseeb rac Saul, rzac me tebaa zha gnitlogazh me grëse zha ne rililadz Jesús. Stib yu stib yu zie me, riebezho me zho lidz zho, mgui wnaasaque rey me riesëeb me zho ladzguuib.

Bdziñ Xtiidz Jesús nëz Samar

⁴ Laa grë zha ne bzhoon Jerusalén ga, zaatne zieetaa zho rnee zho Xtiidz Jesús lo miech. ⁵ Zig nac Lip, zeene bdziñ me tib guiedz nëz Samar, psilo me bnee me Xtiidz Jesús lo grë miech co. ⁶ Ndal zho rquiaadiag miñe rnee me, rzee zdoon zho ran zho grëtaa milagr ne run me. ⁷ Ndal grë zha ne noguitnie men dox, riac zho, rquiaadan grë men dox co redz zeene laa ma rzhoon; grë zha ne gutoo, grë zha ne nde ni, runguiac me zho. ⁸ Grëse miech ne no guiedz co, rley zho.

⁹⁻¹¹ Ga no tib men ne rool diidz dox, lë Simón. Ye me rzee zdoon miech grë ncauaan run me. Nzianle iz sca noquidie me zho, grëse men guiedz runbey me, haxta niats rac me rnee me guien draa cho zig me. Grëse zho, haxta grë zha non rbig lo me, rzac zho lëe poder ne rap Dios ga nacie me.

¹² Laa zeene bnee Lip lo grë miech co gocnan zho diidz ndzon ne nac Xtiidz Dios, bin zho zha racladz Dios gban zho, bin zho cho nac Jesús; grëse zha ne bliladz, mgui wnaasaque, laa zho brobnis. ¹³ Dzigo yeque men ne lë Simón ga bliladz Jesús, ye me laa me brobnis; zaatne zieetaa Lip nal me zhits Lip, rzee zdoon me ran me grëtaa milagr nroob ne run Dios.

¹⁴ Grë zha poxtl ne no Jerusalén, zeene gocnan zho scataa ndal zha Samar nocaania zhiwseed Jesús, dzigo pxeel zho Pedr grop Juan zie nëz co. ¹⁵ Laa zho zie gnab zho lo Dios ygaa grë zha ne bliladzle Jesús ga guielbiini chen Espiritu Sant; ¹⁶ sac zeene bliladz zho Jesús, loxaque brobnisse zho, gard ygaa zho guielbiini co. ¹⁷ Bdziñ zho pxobnia zho guic grë men co, bnab zho lo Dios; dzigo grëse men co laa me bгаа guielbiini ne rdeed Espiritu Sant.

¹⁸ Zeene gon men ne lë Simón ga, ne loxaque rxobniase zha poxtl co guic grë miech co laa zho rgaa guielbiini ne rdeed Espiritu Sant, dzigo laa me rdeed dimi, ¹⁹ rëb me:

—Go needz poder qui lo naa; zeena ye naa zha ne cxobniataa naa guic yгаа zho guie|biini ne rdeed Espiritu Sant.

²⁰ Pquiab Pedr rëb Pedr lo me:

—i|Bien ganle pe rnee luu! ¿Pa bin luu ye xpoder Dios zac si miech? i|Tebaa niinagazh nitlo luu grë xtimi luu i! ²¹ Ni lalnu rieguiald luu guñ luu dziin rii, ni gdziindгаа dze guñ luuw; sac mbed zdoo luu, zienied guic luu guñ luu miñe rnabey Dios. ²² Blee zhgab yozh qui guic luu, bnab lo Dios zeena togo squia zdoo me luu, guñquizhd me luu dol ne squi bza zdoo luu i; ²³ sac rlu niapse guie|ntseeb nonie guic luu, ni lëëque luu gon nosacsi luu ne squitaa noyunctal luu xtol luu.

²⁴ Pquiabse me rëb me:

—Golguñ guie|nzaac, golnab lo Dios yquia zdoo me naa, zeena ygaad naa grë guie|nëdox ne rnee to i.

²⁵ Blozhse bzodiidznie Juan grë miech co grop me Pedr, blozhse pseed zho zho Xtiidz Dios, laa zho wbre zey zho Jerusalén stib. Guiedz ne rdedtaa zho dib xtan zha Samar ga, rnee zho Xtiidz Dios lo grë miech co.

Bzodiidznie Lip tib men Etiopi

²⁶ Laa Lip no Samar ga, tib dze brieequia tib xan|l Dios lo Lip, rëb me tsie Lip nëz ne rrie Jerusalem zie nëz Gaza.

²⁷ Dzigo güey Lip nëz co. Tib dan ngana, lëëtaque laa tib men ne nac dziin lo rein ne lë Candás zie ga, dziin nroob nac me lo rein co, sac me ngotsow grëtaa dimi ne no Etiopí. ²⁸ Zobse me tib len carret nroob zie me ga; znu wbrele me Jerusalén güeygan me Dios. Laa me zob leen co qualab me lo Xtiidz Dios miñe pquiaa Isá, men ne biadteed xtiidz Dios padzeela.

²⁹ Dzigo bnabey Espiritu Sant Lip tsie Lip yгаа carret co lo Lip. ³⁰ Zeene bgaa carret co lo Lip, bin Lip pa lo nolab men co; nacne rëbchaa Lip lo me:

—¿Pe rien luu cho raquiet zaatne nolab luu i?

³¹ —Rien|d naaw —rëb me—, rquiin tib zha ne gnë lo naa dien zha naca.

Dzigo bredz me Lip bie|p Lip len carret co, güeyso|b Lip cue me.

³² Znu rnee zaatne nolab me ga: Zigne racse mëcwxii|l yeen zeene rnaaz zho ma rut zho ma,

scadaa ndooladz goc me, peet beend me zeene laa zho zienie me.

Ni zigne roptsied ma zeene rtsiib zho ma, scaque ni tib diidz ptsired me lo zho.

³³ Niicle ne gon zho scataa ndooladz me, per psacsi zho me.

i|Pa lotaa bdziñ guie|ntseeb ne been grë men|ladz me!

Sac gon, ptiche zho xquie|mban me lo guidzliu.

³⁴ Dzigo rëbchaa men co lo Lip:

—Bzhiguiel bnë lo naa dien, cho nu znu rzeet Isá lo rii. ¿Pe me bded miñ rii, te stib zhow ye?

³⁵ Dzigo rëb Lip lo me Jesús raquiet ga, ni bnab Lip grëraa miñe nac zhiwseed Jesús.

³⁶ Laa zho no nëz, tibaque zeene bdziñ zho tib lugar co no nis; rëbchaa me lo Lip:

—i|Bui ganle laa nis no nu! Mazd bzhiguiel pchoobnisgazh naa.

³⁷ [—Zaca —rëb Lip—, totsaque dib zdoo luu rliladz luu Jesús.

—Rliladz naa me —rëb men co—, rliladz naa ne nli Xpëed Dios nac me.]

³⁸ Dzigo bnabey me blëz carret co ga. Biet me leen co grop me Lip bzëëb zho lo nis co, ga pchoobnis Lip me. ³⁹ Blozhse ga, laa Espiritu Sant blis Lip gon|draa me Lip; per rley me laa me bio nëz stib, laa me zie.

⁴⁰ Zeene laa Lip brieequia, laa Lip nole guiedz ne lë Azot. Ga psilo me zigse zie me, guiedz ne rdedtaa me rnee me Xtiidz Dios lo grë miech co. Sca bio me nëz, haxta bdziñ me guiedz Cesarea.

9

Gon Saul Jesús

¹ Laa mguu ne lë Saul ga, per nli ntseeb rac me, tibaque ne laa guic me zienie gut me grëse zha ne rliladz Jesús. Güey me lo men ne nac pxoz nroob, ² bdeed pxoz co ti xtiidz me guey lo grë zha ne zo lo xyadoo zho nëz Damasc, parne gacnie zho Saul gnaaz zho grëse zha ne rliladz Jesús; zha ne ygaataa niicle mguiw niicle wnaaw, gzobdoo zho zho tsiesan zho ladzguuib Jerusalem.

³ Laa Saul bio nëz, laa Saul zie. Zhile gdziñ me guiedz Damasc, tibaque zeene brieequia ti biinidoo zhan gbaa biab zaatne zie me ga. Groltaa lo biinidoo co biaan me, biabgazh me liu. ⁴ Liu nix me, bin me zëëb ti tsi men co rnee lo me:

—Saul, Saul, ¿pe nacne quiana| luu naa?

⁵ —Been guie|nzaac —rëb me—, bnë dien cho luu.

Dzigo pquiab men co, rëb me:

—Naa nac Jesús men ne squi quiatsidil| luu. [Lëëque luu gon nosacsi luu i, rzac luu zigne rzac ngon ne rcaanni, ni lëëque lo guiib lots ne rtseb zho ma riecaanni ma.

⁶ Rdzieb Saul, rzhidz me lo dzeb co rëb me:

—Bzhiguiel bnë dien, ¿pe racladz luu guñ naa niina?]

Rëbchaa Jesús lo me:

—Guche i, güey Damasc, ga gnë zho ganle pe nac miñe no guñ luu.

⁷ Zha ne ziegza Saul ga per nli bdzieb zho, haxta ni gacdraa gnee zho; loxaque tsi men co ron zho zëëb, per choot rand zho.

⁸ Laa Saul guche ga. Zeene laa me pxal lo me gwi me ranraa me, jaa lo me pcowle! Zha ne ziegzale me ga bzhen nia me bdzin me Damasc. ⁹ Tson dze sca brieelod nian me, gzase dze co dowd me, niicle peet god me.

¹⁰ Guiedz Damasc ga, ga no ti mgui ne riladz Jesús lè Ananí; dzigo gon me Jesús, bredz Jesús me. Pquiab me, ¹¹ dzigo rëbchaa Jesús lo me:

—Güey nêz ne lè Derech, zaatne nac lidz ti mgui lè Judas; ga bnabdiidz men Tars ne lè Saul. Zeene quiazodiidznie me naa, ¹² blu naa lo me laa tib zha lè Ananí bdzin rxobnia guic me, zeena gbiire gan me stib.

¹³ Pquiab Ananí rëb Ananí:

—¿Saul ye? Ziyon naa name zha nac grëtaa ncuaañe noyun me Jerusalén, notsidil me grë zha ne riladz luu. ¹⁴ Haxta pxoz nroob ne rnabey bdeed diidzbezy gnaaz me grëse zha ne no nêz rii.

¹⁵ —Güey —rëb Jesús lo Ananí—, sac laa naa bzooblol me, ib me tsie grë guiedz zit tsieseed me miech xtudz naa, me gnew lo grë zha rnabey, ni lo grëgaa zha Israel. ¹⁶ Na naa glu lo me ganle zha nac grë guielnê ne gan me, zeene laa me quiaayunle xtsin naa.

¹⁷ Dzigoraa güey Ananí zaatne no Saul ga. Bdzin me, pxobnia me guic Saul, rëb me lo Saul:

—Saul, bina ganle bets, laa Jesús gon, men ne rnabey, men ne brieequia lo luu zeene ziaad luu nêz ga, laa me pxeel naa zial naa nu; zeena gnab naa lo me gunguiac me bziaalo luu, ni ycaania luu guielbiini ne rneedz Espiritu Sant.

¹⁸ Zigne sca bnee Ananí, laa lo Saul biacgagh; lega zigne nac xmed mel nac grë ncuaañ co brie lo me. Horcogagh laa me brobnis. ¹⁹ Blozh ga laa me dow stib, zhiga zhiga laa me whire pcaa fuerz.

Goc bla dze no Saul lo grë zha ne riladz Jesús Damasc ga, dzigo brie me ²⁰ güey me grë yadoo win ne no ga, rnee me lo grë miech co cho nac Jesús, rnee me lo zho ne nli Xpëed Dios nac Jesús.

²¹ Rzee zdoo grëse miech co ran zho sca rnee me, rneechaa zho:

—¿Led lëe men qui ga name scataa ntseeb rac Jerusalén, notsidil me grë zha ne riladz Jesús? Conque nac diidz min co ziaad me nu, ziadnaaz me zho tsiesan me zho lo grë pxoz ne rnabey.

²² Per zigse zie dze, mazdraa rac Saul tibaque ne rnee me lo grë miech co, lëe men ne zëëble diidz cxeel Dios lo guidzliu ga, nac Jesús. Grë zha Israel ne no ga, riendraa zho dien pe gliladz zho.

²³ Goc bla dze no me ga, laa grë zha Israel ne no ga blëe lo me; bnediidz zho rëb zho laa zho gut me. ²⁴ Dze guieel riesobnap zho gzaase zaatne rap biedz nroob ne ndze igo

guiedz co nêz, riequiambêz zho ted me, gut zho me. Per gocnan mew, ²⁵ nace gol ti pcow liu pcaalsa grë zha ne bliladz min bnee me, bloo zho me ti len chicuid nroob, bzoob zho doow dzigo blit zho me cho biedz nroob ne sca ndze igo guiedz co. Sca bdeeda diidz brie me ga.

Bdzin Saul Jerusalén

²⁶ Zeene bdzin Saul Jerusalén gocladz me ndzin me lo grë zha ne riladz Jesús ga, per lel bdiez zho zeene gon zho me, sac riladz zho ne nli yeke me bzëeb xnêz Jesús.

²⁷ Dzigo güeynie Bernabé me lo grë zha ne nac poxtl, bzodiidz Bernabé lo zho zha gon me Jesús zeene no me nêz zie me Damasc, zha rëb Jesús lo me; ni zha bdziebd me bnee me lo grë miech cho nac Jesús, len dze ne blëz me Damasc. ²⁸ Dzigoraa pcaania zho me. Laa zho gocgza me, zaatne ziaata zho zieseed zho miech, ib rdziebd me rnee me cho nac Jesús.

²⁹ Brieequia bla zha Israel ne rnee xtudz zha Gres bdildiidznie zho me. Zhisaque goca, laa zho gocladz niut zho me. ³⁰ Zeene gocnan grë zha ne riladz Jesús gaw, dzigo güeysan zho me guiedz Cesarea; ga brie me laa me zie nêz Tars, zaatne nac ladz me.

³¹ Len dze co, grëse miech ne no xnêz Jesús, zigtaa zha ne no Judé, zha ne no Galilé, zha ne nogaa Samar, nguieel rac zho peet lo guielxtseeb nodraa zho; zigse zie dze rioguicraa zho zha nac Xtiidz Dios. Grëse zho rioxco zho mban zho zigne rnabey me, tibaque nacnie Espiritu Sant zho. Ni scagaa, zigse zie dze ndal grë miech ne rzëëbraa rcaania Xtiidz Dios.

Rieted Pedr lo grë zha ne riladz Jesús

³² Len ngbidz coque, zie ziaad Pedr rieted me lo grëse zha ne riladz Jesús. Nacne güeyted me lo grë zha ne no Lida. ³³ Guiedz co, beenbey me ti mgui lè Ené, gogle xon iz nix mgui co, ib gacd sê me sac dipse me gutoo. ³⁴ Dzigo rëbchaa Pedr lo me:

—¡Ené, niinagagh gon laa Jesús gunguiac luu! Na zeen guche i blis xta luu.

Zigne sca bnee Pedr laa men co biac, laa me guche ga. ³⁵ Grëse men Lida, grëse men Sarón zeene gon zho sca biac men co, grëse zho bliladz Jesús.

³⁶ Gaxaque Lida riaan ti guiedz lè Jop. Jop ga no ti wnaa ne riladz Jesús, lè Tabit (laa xtiidz zha Gres rnee zho me Dorc). Nquialadz me miech, grë zha ne guieend pe yquiin, run me xyudar zho. ³⁷ Lega nacle blanguidz me, laa me gut.

Zha ne riladz Jesús ga, laa zho noxco dien zha yguets me. Bgaz zho me, blozhse ga güeyxob zho me sti len yu ne riaan nêz glaa. Xco co no zho, ³⁸ zeene bin zho laa Pedr no Lida. Pxeelaque zho chop zha bgui zienie diidz lo Pedr tsieniob Pedr Jop.

³⁹ Zigne bđziñnie zha co diidz, zianalgazh Pedr zhits zho. Bđziñ zho lidz meñ co, zolinēz güeynie zho Pedr zaatne zhoob me. Nzian grē wnaa viud ndxie ga, wbigbe zho lo Pedr, roon zho rlu zho grē lar ne bđib me. ⁴⁰ Dzigo bnabey Pedr brieē zho ley grēse zho, laa me biaan ga, pquitsgzhib me bnab me lo Dios. Blozhse ga wbig me lo ngutoo co, bnee me lo me rēb me:

—Guche i, Tabit.

Zigne sca rēb Pedr laa lo ngutoo co bzhiäl, zeene gon me laa Pedr zo ga, laa me bzobli. ⁴¹ Bzhen Pedr nia me, bliso Pedr me, dzigo bredz Pedr grē zha ne rliadz Jesús ga, ni grē wnaa viud co; gon zho laa me brieēbanle.

⁴² Dipse lad guiedz co bzhoob diidz sca brieēban wnaa co; grē zha ne bina, ndäl zho bliladz Jesús dib zdoo zho.

⁴³ Nzianlaa dze biaan Pedr ga, blēz me lidz Simón ti meñ ne rcuudz grē guid ma.

10

Güeyzodiidznie Pedr Cornel

¹ Guiedz Cesarea, ga no ti meñ lē Cornel, rnabey me lo ti partid menüiib lē partid Italian. ² Zigtaa mew, zigtaa grē menlidz mew, dib zdoo zho rliadz zho Dios, noxco zho mban zho zigne racladz Dios. Tibaque nonab zho lo Dios, ni nroob ncuuañe rgad zho lo grē zha ne guieñd pe yquiin.

³ Tib dze, bđzele dzew tibaque zeene gon me laa ti xanjl Dios bđziñ zaatne zo me, bredzlē anjl co me. ⁴ Dze rwi me lo anjl co, rdzieb me laa me pquiab. Dzigo rēbchaa anjl co lo me:

—Gocnañ ganle grēse miñe rnab luu lo Dios ron mew, ni ran me grētaa yudar ne squi quiaayun luu lo grē zha ne guieñd pe yquiin. ⁵ Gacxe waa, laa naa zialñie diidz lo luu: pxeel bla zha ne tsie guiedz Jop tsixi zho ti meñ ne lē Simón Pedr. ⁶ Gax zaatne nac ro nisdoo, ga no ti meñ lēque Simón, rcuudz me grē guid ma; lidz meñ co ga rbēz me; ga tsieguiub zho me.

⁷ Zeene laa anjl co zey, dzigo bredz me chop zha ne quia dziin lidz me, ni bredz me ti zhaguiib ne nacgrē zhaguiib ne zopaa gax lo me; dib zdoo zhaguiib co rliadz zho Dios. ⁸ Blozhse bzodiidz me lo gza zha co zha bzhaac me, dzigo laa me pxeel zho zixei zho Pedr Jop.

⁹⁻¹⁰ Biini liu, zig rwe ngbidza gaxle Jop zie zho. Lēētaaque hor co laa Pedr biep nēz glaa guic yu ne rbēz me ga. Rcaabedz me, dzigo laga noyacro ncuuañe gow me laa me biep guic yu co ziezodiidznie me Dios. ¹¹ Dios nozodiidznie me, tibaque zeene gon me laa ti lar nroob ziad-zēēb zhan gbaa, nzhidoo gzatap nēza laaw bđziñ lo me. ¹² Grē lose ma no lo lar co, ga no ma ne rzē gza tap ni, no grē ma ne rzē zigne rzē meel, ni no grē ma

ne rsiibe. ¹³ Horco bin me ti tsi meñ co, rēb lo me:

—Pedr, ma ne racladztaa luu gow luu zac gut luu ma.

¹⁴ Pquiab me rēb me:

—jMin cogaa nagon grieelod! Wlaltaa gard gow naa grē ma beed qui.

¹⁵ Rēbchaa meñ co lo Pedr:

—Grē ncuuañe beenlayle Dios, nodne gnee luuw ncuuañ beed.

¹⁶ Blulo lar co tib, bluloquew stib, laa zeene biontaa gon mew dzigo laaw biire bzokuia nēz gbaa.

¹⁷ Lēētaaque laa Pedr no zhgab dieñ pe nacne sca gon me lar co, laa zha ne pxeel Cornel ga bđziñ ro yu ne rbēz me ga, ¹⁸ rnabdiidz zho me.

¹⁹ Zhgab co no Pedr, zeene rēb Espiritu Sant lo Pedr:

—Laa tson zha hgui gon ziaadguib luu. ²⁰ Biet, bnee lo zho. Ib peet tsienied guic luu güeynal zhits zho, sac naa bnabey ziaad-xi zho luu.

²¹ Dzigo laa Pedr biet ga, bđziñ me lo zha ne pxeel Cornel ga, rēb me lo zho:

—Naa nac Simón Pedr. ¿Pe nac mandad ne ziaad to?

²² Pquiab zho rēb zho:

—Laa no ziaad xmandad Cornel, ti meñ ne rnabey lo menüiib Cesarea. Laa me pxeel no ziaad-xi no luu, sac ti xanjl Dios rēb lo me cxeel me zha ne guiaad-xi luu tsie luu lidz me, tsienee luu lo me. Ti miech wen nac me, dib zdoo me rliadz me Dios, grēse zha Israel rleynie zho me.

²³ Dzigo bredz Pedr zho bded zho nēz leñ yu; ga biaan zho wdze co. Biiniraa liu zienie zho me, ye palal zha Jop, zha ne rliadz Jesús zianal zhits me.

²⁴ Dze ne rac chop ngbidz brieē zho Jop, laa zho bđziñ Cesarea. Laa Cornel bredzle grē menlidz me, grē zha ne ndzieēdiidz me; ndäl nac zha ne ndxie me lidz me, quiambēz me Pedr. ²⁵ Zeene laa Pedr bđzin, brieē me güeydzieelo me Pedr, pquitsgzhib me lo Pedr nan me niun me Pedr zigne riegān me Dios. ²⁶ Dzigo bliso Pedr me, rēb Pedr lo me:

—jGuso i, nodne yquitsgzhib luu lo naa! Bien ganle samiechaque luu nac naa.

²⁷ Dzigo laa menüiib co guso ga. Nozodiidz zho laa zho bzēēb leñ yu. Zeene bđziñ zho zaatne ndxie grē miech co, ²⁸ psilo Pedr bnee me lo zho, rēb me:

—Nanle to ganle zha Israel naa, ni ib lo xley no rnabey nodne ziaab no lidz grē zha zit, per ni ctsieelsad no zho; per laa niina laa Dios blu lo naa, grēse miech ne beenlayle me nod pe nacne gbix zdoo naa gan naa zho. ²⁹ Gacxe waa, zigne gocnañ naa laa to rbedz naa, zialnalgazh naa zhits zha ne pxeel to. Nana sca, golñe dieñ pe nacne bredz to naa.

³⁰ Dzigo bzodiidz Cornel zha bzhaac me, rëb me:

—Nadze rac tap ngbidz ga, zig znaw gon, no naa lidz naa nu nocuan naa, ni nonab naa lo Dios. Tibaque zeene gon naa laa ti mgui zole lo naa, masaque riazbel xab me, ³¹ në me: “Gocnañ ganle grëse mine rnab luu lo Dios ron mew, ni ran me grëtaa yudar ne squi quiaayun luu lo grë zha ne guienđ pe yquini. ³² Gacxe waa, laa naa zialnie diidz lo luu: pxeel bla zha ne tsie guiedz Jop tsixi zho ti men ne lë Simón Pedr. Gax zaatne nac ro nisdo, ga no ti men lëque Simón, rcuudz me grë guid ma; lidz men co ga rbëz me; ga tsieguib zho me.” ³³ Sca nagon në men co lo naa, nacne bnabey naa biaad-xi zho luu; ni xquizhгаа luu ne laa luu ziaad. Dios zobwi ganle, grëse no laa no ndxie nu par yquiaadiag no mine bnabey me luu gnë luu lo no.

³⁴ Dzigo rëbchaa Pedr:

—iNaraa rien naa, led yed Dios cue miech dien cho nac zha Israel, cho nacгаа zha zit! ³⁵ Sinque grëse miech lo guidzliu, tel pa guiedztaa nac zho, rcaania me zho totsaque ron zho mine rnabey me, ni rioxco zho zaacse rban zho. ³⁶⁻³⁷ Rgobey naa ziyonle to Diidz Ndzon ne pxeel Dios lo menladz naa niina wriin. Lo Diidz Ndzon co rnee, ne zac guiaanwen miech lo Dios, totsaque gliladz zho cho nac Jesús, men ne zëëble diidz ga cxeel me (ni Jesús gon bzaa grëtaa ncuaañe no). Zig nac dib Judë, desde ne psilo Juan pseed me miech Galilé, laa zho gocnaña. ³⁸ Ni nanaxe to ganle, bdeed Dios poder lo Jesús, pxeel me Espiritu Sant gocie Jesús. Zaatne bdedtaa Jesús, pquia zdoo me miech, grë zha ne nosacsi mendox psilaa me zho lадznia ma; sacne nli Dios nacnie me. ³⁹ No ne nac no zha ne bzianie me, grop lo no bdzian no grëtaa milagr ne been me, zigtaa Jerusaléna zigtagaa dib Judëw. Jerusalénpaa ga beet zho me pquiaa zho me lo cruz, ⁴⁰ per zeene goc tson ngbidza laa Dios bleeban me, ni bneedz Dios diidz biire bdzian no me. ⁴¹ Led grëdraa miech gon me, loxaque nose bdzian me; sac ib Dios bzooblo no dzian no grë dziin ne been me. Haxta bdiowonie no me, bdionie no me, ⁴² ni pxeel me no gnee no lo miech gacnañ zho ganle laa Dios bzo me, me gun guielwxtis gal dze ne laa Dios cuedz grëse miech, zigtaa zha guta zigtagaa zha mbana. ⁴³ Me ga bzeet grë zha ne biadteed Xtiidz Dios lo miech padzeela, zeene rnee zho: “Grëse zha ne gliladz cho nac me, silaa Dios zho lo dol.”

⁴⁴ Laa Pedr bii quianeeque, zeene laa grë zha ne noquiaadiag ga bgaa guielbiini ne bdeed Espiritu Sant lo zho. ⁴⁵⁻⁴⁶ Grë zha Israel ne ziegza Pedr ga, zeene gon zho laa grë zha co psilo quianee stib diidz, ni rdeed zho xquizh lo Dios, bzee zdoo zho gon zho ye grë

menzit rgaa guielbiini ne rdeed Espiritu Sant. ⁴⁷ Dzigo rëbchaa Pedr:

—¿Peraa nadien gbiaaz ne, ne cchoobnigazhd ne zha rii? Laa ne bdzianle ganle zigne rdeed Espiritu Sant guielbiini lo zha Israel, sacque bdeed me guielbiini lo zho.

⁴⁸ Dzigo bnabey Pedr brobnis zho, laa zho bzëëb xnëz Jesús.

Blozh ga bnee Cornel lo Pedr cuëz me ga ti bla dze.

11

Bzodiidz Pedr zha güey me lidz Cornel

¹ Grë zha poxtl ne no Jerusalén, ni grëraa zha ne riladzle Jesús zha ne no Judë, bin zho sca biladz gza menzit co Xtiidz Dios. ² Dzigo zeene laa Pedr bdziñ Jerusalén güey bla zho güeytildiidznie zho Pedr, ³ blisqui zho lo Pedr pe nacne güey Pedr lidz menzit, pe nacne güeytownie Pedr zho.

⁴ Dzigo psilo Pedr bzodiidz me lo zho zha nacne güey me lidz men co, rëb me:

⁵ —Guiedz Jop no naa, tib dze lëëtaque nozodiidznie naa Dios, tibaque zeene gon naa laa ti lar nroob ziad-zëëb zhan gbaa, nzhidoo gzatap squina laaw ziaad nëz lo naa. ⁶ Zeene bdixlo naa bui naa dien pe quia lo lar co, gon naa niapse ma no lo co, grë ma ntseeb, grë ma ne rzë gzatap ni, grë ma ne rzë zig rzë meel, ni grë ma ne rsiibe. ⁷ Lo grë ma co nowi naa, zeene bin naa ti tsi men co, në lo naa: “Pedr, ma ne racladztaa luu gow luu, zac gut luu ma.” ⁸ Dzigo pquiab naa rep naa: “Min cogaa nagon grielod, waltaa gard gow naa grë ma beed qui.” ⁹ Nëchaa me lo naa: “Grë ncuaañe beenlayle Dios, nodne gnee luuw ncuaañ beed.”

¹⁰ Tson vuelt sca gon naa lar co. Blulow tib, bluloquew stib, zeene biontaa gon naaw dzigo laaw biire zey gbaa.

¹¹ Loxaque blozh gon naa lar co, laa tson zha bgui blanso ro lidz men ne blëz naa ga, pxeel men Cesarea co zho ziaadguib zho naa. ¹² Ni laa Espiritu Sant bneeque lo naa, no ganañ naa zhits zho, niicle ne zhazit nac zho; nacne bianañ naa. Ye gza xoop zha ne zialnie naa nu bzë bio no.

¹³ Bdziñ no lidz men co, psilo me bzodiidz me lo no zha bzhaac me, në me len yu no me, zeene gon me ti xanj Dios, rëb anjl co lo me cxeel me bla zha ne tsie Jop tsixi zho naa ¹⁴ zeena gane naa lo me zha grielo csilaa Dios me lo dol grë menlidz me.

¹⁵ Laa naa psilo quiane lo me grë menlidz me, zeene grëse zho laa zho pcaania Espiritu Sant, ni bgaa zho grë guielbiini ne rdeed me zigne bgaaque new. ¹⁶ Ga nagon psoladz naa xtiidz Jesús men ne rnabey ne, zeene znu në me lo ne: “Nli nisse pchoobnis Juan miech, sanque to zgaa to guielbiini ne rneedz Espiritu Sant.” ¹⁷ Sca nagon pcaania zho Espiritu Sant, laa zho bgaa guielbiini ne

rdeed me zigne bgaaque new. ¿Cho nac naa nadien ne glisqui naa mine run Dios?

¹⁸ Zeene blozh bin zho grê mine bnee Pedr ga, peet rëbdraa zho. Psilo zho rleyne zho Dios, rdeed zho xquizh lo me; sac hor coraa bien zho ye grê menzit zrieelo gbig zho lo Dios, gdeed me ti guielmban ndzon ne dzignd dze lozh lo zho.

Bliladz zha Antioquí Xtiudz Dios

¹⁹ Zeene sca pquianał zho grê zha ne riladz Jesús len dze ne beet zho Xteb ga, nêzrii nêzrec bliaał zho. No zho bdziñ haxta Fenicia, no zho bdziñ Chipr, nogaa zho bdziñ nêz Antioquí. Zaatne bdziintaa zho bnee zho cho nac Jesús, per loxaque lo grê menladz zho bnee zhow. ²⁰ Niicle ne scaw, lëêque grê zha Israel ne no Chipr, zha ne no Ciren, zeene laa zho bliladz Jesús güey zho guiedz Antioquí, bnee zho lo grê zha zit co cho nac Jesús. ²¹ Ni ne nacie Dios zho, ndal grê miech co bzëeb xnêz Jesús.

²² Grê zha ne no Jerusalén, zeene gocnan zhow pxeelaque zho Bernabé güey Antioquí. ²³ Zeene bdziñ Bernabé Antioquí, rley me gon me scataa quaiayunlay Dios grê miech co; dzigo pso me diidz lo zho ib csaand zho zhiwseed Jesús.

²⁴ Ti men dib zdoor riladz Dios nac Bernabé, nacie Espiritu Sant me, ti miech wen nac me; gane zeene laa me bdziñ ga nzian-raa zha ne bliladz Jesús.

²⁵ Goc palal dzew, dzigo güey Bernabé guiedz Tars güeyxi me Saul, bdzinnie me Saul Antioquí. ²⁶ Dipse ti len iz blêz zho ga grop zho, blozh pseed zho grê zha ne bliladz Jesús. Ga gloopa psilo ne laa grê zha ne riladz Jesús brieelê CRISTIAN.

²⁷ Len iz co blalaa zha ne noteed xtiudz Dios no Jerusalén. Dzigo briece zho ga güey zho Antioquí. ²⁸ Lad co no tib men lê Agab, psiaab Espiritu Sant guic me bnee me laa ti gbin dox gan miech nêz Israel. (Ni nligaa scase goca, lëê gbin co biaad len iz ne zobnabey men ne lê Claud.)

²⁹ Grê zha ne riladz Jesús Antioquí, zeene bin zho sca rëb Agab, nacie bnediudz zho grê zho, tel palalaa ncuaañe rgaa lo zho tib tib zho gdeed zhow gaclo ti gon cxeel zho lo zha Judé. ³⁰ Dzigo ptop zho gon co, zeene laaw goclo, pxeel zho Bernabé grop Saul güeyšana lo grê zha rnabey ne zo lo zha ne riladz Jesús nêz Judé.

12

Bio Pedr ladzguuib

¹ Len dze co psilo rey Herod notsidil me grê zha ne riladz Jesús. ² Nnabey me bgaa Jacob bets Juan, beet zho Jacob lo spad.

³ Zeene gon Herod rley grê zha ne rnabey lo menquiedz Israel ran zho zha rsacsi

me grê zha ne no xnêz Jesús ga, dzigo bnabeyaque me bgaa Pedr bio Pedr ladzguuib; lëêtaque len dze co noyac lni Pascw. ⁴ Laa Pedr no ladzguuib, nnabey me bzo xon nêz menquuib quianap Pedr. Quiambêz me tedse lni co, laa me cuee Pedr gan grê menquiedz zha csacsi me Pedr.

⁵ Grê zha ne riladz Jesús, zeene gocnan zho scataa ndxienap menquuib Pedr no Pedr ladzguuib, psilo zho tibaque quianab zho lo Dios gacnien me Pedr.

⁶ Nacle diidz pa dze cuee Herod Pedr. Wdze ne guini liu co, laa Pedr nixguesse len ladzguuib; tib ga caden zob ti nia me, tiba menquuib tib nêz cue me, ni zhaaque zo zla zha ne quianap ro ladzguuib. ⁷ Tibaque zeene biab ti biinidoo len ladzguuib, laa ti xanjl Dios bdziñ ga. Bdziñ me, pcaañnia me cue Pedr, pcuaan me Pedr, rëb me:

—jNa zeen guche i!

Zigne sca bnee anjl co, lega zhal caden ne zob nia Pedr ga bzhihala brieew nia Pedr; ⁸ dzigo rëbchaa anjl co lo Pedr:

—jPxidoo len luu, pquiaa lab luu ni luu!

Blozhse pxidoo Pedr len Pedr, ni pquia lab Pedr; rëbchaa anjl co:

—jWbix xab luu na, zeen dënal zhits naa!

⁹ Nalse Pedr zhits anjl co laa Pedr briece ga. Riend Pedr ne nli nosilaa anjl co Pedr, masaque rzac me nonixquieel mew. ¹⁰ Bded zho chop len yu zaatne ndxie menquuib ne quianap, laa zho bdziñ zaatne quia puert guuib ne rrieer no nêz. Zigne bdziñ zho, zhal puert co bzhihala; laa zho briece. Bzënie anjl co Pedr spalal, zeene goł zho zaatne rdedlsa nêz co, dzigo laa anjl co psan Pedr ga.

¹¹ Dzigoraa bien Pedr led nonixquieeld Pedr, nli Dios pxeel xanjl me güeysilaa Pedr ladznia Herod, zeena gleyd zha Israel nian zho grê guielnê ne nded Pedr.

¹² Dzigo laa Pedr zie nêz lidz Marí, xniala Juan Marcw; lëêtaque hor co nzian zho ndxie ga quianab zho lo Dios. ¹³ Zeene bdziñ Pedr pcaañnia Pedr ro yu. Briece ti ndzoop ne quia dzian ga lê Rode, zieso ndzoop dien chow.

¹⁴ Zeene beenbey ndzoop co tsi Pedr, rley ndzoop. Lo guielbley co niicle pxaldaqe ndzoop ro yu, rias ndzoop zienie ndzoop diidz lo grê zha ne ndxie ga; rëb ndzoop laa Pedr bdziñ ro yu ga. ¹⁵ Per bliladz zhow.

—jDieen pe rool luu! —rëb zho—. jNcuaañe gliladz ne rnee luu!

—jCoo, nli lëe mew! —rnee ndzoop—, laa me zo ga.

—jLed meda, —rnee zho—, bod anjl ne quianap mew!

¹⁶ Sca no zho, laa Pedr bii nocaañnia ro yu. Zeene güey zho pxal zho ro yu, bzee zdoor zho gon zho nli Pedra, laa Pedr zo ga. ¹⁷ Dzigo blunia Pedr lo zho gnee nguiedz

zho; laa zho bzëëbnie Pedr len̄ yu. Ga psilo Pedr bzodiidz Pedr lo zho zha güeybee xanj̄l Dios Pedr len̄ ladzguuib; ni pso Pedr diidz lo zho sodiidz zhow lo Jacob, ni lo grëraa zha ne nacgrë zho. Blozhse ga, laa Pedr brieë ga.

¹⁸ Zeene biini liu, grë menguib ne pquianap Pedr len̄ ladzguuib ga, rdzieldraa zho zha guñ zho; sac ib biend̄ zho dien̄ yo Pedr. ¹⁹ Zeene laa Herod pxeel zha ne ziebee Pedr ladzguuib, pa sële Pedr. Dzigo güey zho güeynie zho diidz lo Herod; nacne bnabey Herod gocredz grë zha ne pquianap Pedr ga, pquiep Herod zho; blozhse ga, bnabey Herod gut zho gzase zho. Bded ga, laa Herod brieë Judë zey me Cesarea.

Dow mziog Herod

²⁰ Len̄ dze co, pcaalsa menguedz Tir ni menguedz Sidón güeynee zho lo Herod; sacne rlëënie Herod zho. Lëëque ti men̄ ne nac dziin lo Herod lë Blast güeynie zho bnee lo Herod, bnab zho tilniedraa me zho, niicle zhagaaw laa zho gbig lo me; sac grëse ncuane rquiin zho, grë guiedz ne rnabey me ga rrieew.

²¹ Dzigo bzo Herod ti dze ne tsie zho tsiezodiidznie zho me. Zeene goj̄ dze co, got me lar niaz̄h ne racw rey; bdziñ me bzob me lo zhixcan me, psilo me bnee me lo grë miech co. ²² Goc palo quianee me, psilo zho rleynie zho me, nguiedz roptsie zho rnee zho:

—j̄Led miechdraa i gon! j̄Ti diosle i nac men̄ qui quianee lo ne!

²³ Laa me bī quianeeque, zeene biet tib xanj̄l Dios bdiñ me, psilo dow mziog me, gagaz̄h gut me. Sca gut me, sac beenbeyd me ne Dios nac men̄ ne non, men̄ ne rnabey. ²⁴ Laa Xtiidz Dios, zigse zie dze laaw quia-gaazraa lo miech; ndal zha cub ne nozëëb xnëz me.

²⁵ Jerusalén ga no Bernabé grop Saul len̄ dze co; zeene bialse xtsiin̄ zho, laa zho brieëque ga laa zho zie nëz Antioquí zienie zho Juan Marcw.

13

¹ Lo grë zha ne riladz Jesús Antioquí, nzian zha ne noteed Xtiidz Dios, nzian zha ne rseed miech Xtiidz Dios no lo zho. Lad grë zha co no Bernabé, no ti mgui lë Simón ne rnee zho “Men̄ Yaas”, no ti men̄ Ciren lë Lus, gaque no Saul, ni ti men̄ lë Manaén, bets pchoob Herod.

² Laa ti dze lëëtaque ndxie zho noyoolnie zho Dios ni nocuan zho, zeene laa Espiritu Sant bnee lo zho, rëb me:

—Goj̄cueextso Bernabé i grop Saul, zeene csilo zho lo dziin ne gded naa guñ zho.

³ Blozhse pcuan zho, blozhse bzodiidznie zho Dios, dzigo pxobnia zho guic Bernabé

grop Saul, bnab zho lo Dios gacniën me zho; bnee zho lo zho, laa zho zie.

Güey Saul Chipr grop me Bernabé

⁴ Ga brieë Bernabé grop Saul zienie Espiritu Sant zho bdziñ zho guiedz Seleucia, Seleucia bzëëb zho barcw laa zho zie nëz Chipr (ti guidzliu win ne no lo nisdo). ⁵ Ye Juan Marcw zienie zho guñ xyudar zho.

Bdziñ zho ro guidzliu win co zaatne ndxie guiedz Salamin, biet zho barcw güey zho grë len̄ xyadoo men̄ Israel ne no ga, güeyseed zho miech Xtiidz Dios. ⁶ Ga brieë zho güeyted zho dipse lo guidzliu co bdziñ zho guiedz Pafos; guiedz ne bdedtaa zho bnee zho Xtiidz Dios lo miech. Pafos, ga beenbey zho ti men̄ Israel lë Barjesús (laa xtiidz zha Gres rnee zho me Elim). Rquidie me rnee me xtiidz Dios noteed me lo miech, per diidz dox rool me.

⁷ Guiedz co ga no ti men̄ lë Sergio Paul, men̄ co zob rnabey guidzliu co; dzigo lo men̄ co ga no Barjesús. Ti men̄ nixbiini nac men̄ ne lë Sergio ga, no me liaadz gacnañ me zha nac Xtiidz Dios; dzigo bnabey me gocredz Bernabé grop Saul. ⁸ Zeene bdziñ zho psilo Barjesús quiaquib me dien̄ pe yquiaaqui yquiaadiagd men̄ rnabey co Xtiidz Dios.

⁹ Dzigo buitpaque Pabl lo Barjesús (Pabl nac sti lë Saul), ni ne nacie Espiritu Sant Pabl ¹⁰ rëb Pabl lo me:

—j̄Biche nu zhin mendox! Zhin mendox gon̄ nac luu, squitaa noquidiee luu miech, notsidil̄ luu diidzli. ¿Zha rna dze ne csaan luu miñe nac luu i, squi notsidil̄ luu Xtiidz Dios? ¹¹ Gon̄ gan̄le, j̄laa Dios csaabzi luu, niinagaz̄h laa lo luu ycow, ni spalal xbiini ngbidz gandraa luu!

Zigne sca rëb Pabl laa lo men̄ co pcow, nëzrii nëzrec zie me racladz me dien̄ cho gnaaz nia me.

¹² Zeene gon̄ men̄ rnabey co sca pcow lo Barjesús, hor co bliladz me Xtiidz Dios, bzee zdoo me gon̄ me scataa poder ne ziaadnie zhiwseed Dios.

Bdziñ zho guiedz Antioquí

¹³ Bded ga, laa Pabl gza Bernabé ni Juan bzëëb barcw stib, laa zho zie nëz xtan zha Panfil. Bdziñ zho guiedz Perg laa zho brieë len̄ barcw, ga pto Juan lo zho, laa Juan zey nëz Jerusalén; ¹⁴ laa zho bio nëz zie zho nëz xtan zha Pisis, bdziñ zho sti guiedz lë Antioquí.

Zeene goj̄ dze ne rdziiladz miech lo dziin, güey zho xyadoo zha Israel. ¹⁵ Blozhse bded zha ne blab lo guits ne pquiaa Moisés, ni blab zho miñe pquiaa grëraa zha ne biadteed xtiidz Dios padzeela, dzigo laa men̄ ne rnabey yadoo co bnee lo Pabl grop Bernabé, rëb me lo zho:

—Tej̄ne racladz to gnee to chop lan xtiidz to, zac gnee tow niina.

¹⁶ Dzigo guso Pabl, blunia me lo grë zha ne ndxie ga cuedze zho, rëb me lo zho:

—Grëse to ne ndxie to nu, zigtaa tow ne nac to menladz naa, zigtaa togaaw ne nac to zha stib guiedz zha ne noxco gban zigne rnabey Dios; golquiaadiag chop lan xtidz naa ganle gne naa lo to:

¹⁷ 'Dios ne riladz no nac no men Israel, ib me bzooblo grë pxozgol no laa zho bgab lo me. Me gocien zho zeene bio zho ladz men Egipt, ni me güeyisilaa zho ga, blu me ganle ne nli men nroob nac me. ¹⁸ Dipse len choo iz ne bio zho grë dan bidz ne bded zho ga, pxcw me grëtaa xquieIntseeb zho. ¹⁹ Blozh ga, bnitlo me gadz guiedz nroob ne ndxie xtan zha Canaán, bdeed me liu co lo zho. ²⁰ Ni dipse len tap gayoo groļ iz, me bzooblo grë zha ne bzo bnabey lo zho; lëë lultm zha ne bzo me ga bnabey lo zho goc profet Samuel. ²¹ Blozh ga, laa zho bnab so ti rey gnabey lo zho, nacne bzo me Saúl, bzob Saúl choo iz goc me zhirey zho. Lëë pxoz Saúl ga brieelë Cis, men ne ziaad lo xtii pxozgol no Benjamín. ²² Zeene laa Dios ptiche dziin co lo Saúl, dzigo bzo me David goc rey. Lëë David ga rzeet Dios zaatne znu rnee: "Rleynie naa xingan Isai zha ne lë David, laa naa gonle ib zun David mine gnabey naa." ²³ Ni lo xtii David co nagon brieequia Jesús, men ne pxeel Dios lo guidzliu biaadsilaa miech lo dol, zigne psanle me diidz lo xmengol no padzeela.

²⁴ 'Len dze ne merle xooobnen cho nac Jesús, len dze co bnee Juan Bautist lo grë men Israel: csaan zho xquieIntseeb zho gnab zho perdon lo Dios, zeena chobnis zho. ²⁵ Laa zeene zhile gdziin dze ne gut zho Juan, dzigo bnee me lo miech rëb me: "Golgacnañ ganle, led naad nac men ne quiambëz to ga cxeel Dios. Merle gunbey to me, ti men non nac me, per ni par gac naa ti ngundziin win ne glit lab me ni me raguaiłd naa."

²⁶ 'Golgacnañ sca ganle bets: zigtaa tow ne ziaad to lo xtii Abraham, zigtagaa tow ne nac to miech stib guiedz zha ne riladzle Dios, ib laa Dios pxeel Jesús csilaa me ne lo xtol ne grëse ne. ²⁷ Grë zha Jerusalén ni grë zha ne rnabey lo zho, ib biend zho cho nac Jesús, niicle ne scataa gzobse dze ne rdziiladz zho lo dziin, rlab zho lo grë guits ne pquiaa zha ne biadteed xtiidz Dios padzeela; haxta bnab zho gut me zigne bneese grë zha co. ²⁸ Niicle ne gon zho peet xtolđ me, niicle ne brieequiad dol ne pquiaqui zho me, per bguib zho bdeeda diidz bnabey Pilat gut me.

²⁹ 'Blozhse psacsi zho me, pteed zho me grëse zigne bzeetle grë zha ne biadteed xtidz Dios ga, dzigo güey zha ne blit me lo cruz, güeyqueets zho me. ³⁰ Per bleeban Dios me. ³¹ Grë zha ne güeynal zhits me zeene briece me Galilé bdziñ me Jerusalén, nzian zho gon

me; ni niina grëse zho laa zho quianee lo miech ganle cho nac me.

³² 'Scaquegaa no grop no Bernabé, laa no ziaadnie diidz lo to gacnañ to ganle niina ne laa Dios bleeban Jesús, laa me been mine bnee me lo pxozgol ne padzeela. ³³ Lëë Jesús ga raquiet lo Salm brop, zaatne rnee: "Xpëed naa nac luu. Desde nadze laa zho gunbey ne Xpëed naa nac luu." ³⁴ Ni bzeetle Dios ne laa me cueeban Jesús, bzeetle Dios xiñd xcuerp me len baa; miñ co ga raquiet lo Xtiidz me, zaatne rnee: "Zunlay naa luu, zigne bnese naa lo David gun naa." ³⁵ Laa stib lo Salm ne pquiaa David rnee: "Gdeete luu diidz xiñ xcuerp naa len baa." ³⁶ Rlu led Davite raquiet ga, sac zeene bza dze ne goc me dziin lo menladz me laa me gut, ni zaatne pqueets zho me, ga bnitlo xcuerp me. ³⁷ Led meda, zhaa men ne raquiet ga; gacxe na rneew waa peet gacd xcuerp men co, zbeeban Dios me.

³⁸⁻³⁹ 'iGrëse to bets, gologacnañ sca ganle! iJesús nac men ne rsilaa miech lo dol! Zha ne gliladztaa me dib zdoo zho, tel pe nactaa grë xtol zho, sanmbe me zho. Mine waltaa brieelod ngaa to, niicle ne zienal to xley Moisés; sac niicle gun tow grëse zigne naca, csanmbeda to lo dol.

⁴⁰ 'iGolguien sca gacnroladzde to! Zeena ygaade to mine bzeet zha ne biadteed xtiidz Dios padzeela, zeene znu bnee zho:

⁴¹ Grëse to ne rzhidznie to mine nac diidzli, bii zan to ganle laa naa gun ti milagr nroob ne gzee zdoo to; per znitlo to, sac gliladzde tow niicle guiaad zha ne gzodiidza lo to.

⁴² Blozh bnee Pabl; laa zeene laa Pabl gree ga grop Pabl Bernabé bnab grë miech co lo zho, siguiel zho quiet sti zhmal co biire tsie zho tsieseed zho zho. ⁴³ Zeene briece zho len yadoo co, nzian grë zha Israel, nzian grë zha stib guiedz zha ne riladzle Dios zienal zhits zho. Nëz no zho bnee zho lo grë miech co tiblque tso guic zho tsienal zho zhiwseed Dios, guien zho ganle pa lotaa noxco me zho.

⁴⁴ Biet sti zhmal co, miech guizhiu ne goclo len yadoo co, zootle zig grëse miech guiedz co pcaalsa ga ziequiaadiag zho Xtidz Dios. ⁴⁵ Zha ne rnabey lo grë zha Israel ne no ga, zeene gon zho scataa ndal miech ne goclo ga, blëë zho lo Pabl, ndox zho lo me, rëb zho led diidzlid nac mine rseed me.

⁴⁶ Niicle Pabla, niicle Bernabé bdziebd zho, dzigole bnee zho lo zho rëb zho:

—Nli to glo rieguial yquiaadiag Xtiidz Dios ne nac to zha Israel. Per ne squi run to guieIntseeb nëde to ycaania tow par yгаа to guieImban ndzon ne rneedz Dios; na laa no guioseed grë zhazit. ⁴⁷ Ni scalegaa rnabey Dios gaca, sac znu rnee me:

Laa naaazole luu tsienee luu Xtiidz naa lo grë menzit,

luu gac zig ti biini ne gziini lo grë miech ne ndxie lo guidzliu;

zeena guien zho zha laa zho lo dol.

⁴⁸ Grë zha ne nac zhazit, zeene bin zho sca rëb Pabl, per nli rley zho, rdeed zho xquizh lo Dios scataa ndzon nac Xtiidz me. Grëse zha ne nole ygaa guieľmban ndzon ne gdeed Dios ga, grëse zho dze cogazh laa zho bliladz Jesús. ⁴⁹ Dipse dan co, gocnañ miech Xtiidz Dios.

⁵⁰ Grë zha Israel ne rlëe lo Pabl ga, psilo zho pquuil zho grë meñ wnaa ne nac diidz noxco Xtiidz Dios, ni güey zho güeynee zho lo grë zha ne nac meñ non lad guiedz co; zeena ctsidil zho Pabl grop Bernabé, guñcxoon zho zho dan co. ⁵¹ Zeene bin Pabla grop Bernabé, par glu ne nonguielđ sca been zha co zho, beenmbe zho grë yudie co ni zho laa zho brieeg ga, laa zho zie nëz Icon. ⁵² Grë zha ne bliladz Jesús ga, nguieel rac zho, rdeed Espíritu Sant guieľbiini lo zho.

14

Bdziñ Pabl Icon grop me Bernabé

¹ Zeene bdziñ Pabl Icon grop me Bernabé, güey zho tib xyadoo zha Israel zob lad guiedz co, bnee zho Xtiidz Dios lo grë zha ne pcaalsa ga. Zigtaa zha Israela, zigtagaa zha lad guiedz cow, nzian zho bliladza. ² Laa grë zha Israel ne bliladzda, psilo zho bloo zho diidz lo grëraa miech guiedz co glëenie zho Pabl grop Bernabé. ³ Niicle sca been grë zha co per whid zho, bii blëz zho ga, peet dzeb nod lo zho rie zho rienee zho Xtiidz Dios lo miech; scagaa Dios, nzian grë milagor ne bdeed me diidz run zho par glu ne nli Xtiidz me nonee zho.

⁴ Dzigo grë miech ne no lad guiedz co goc zho chop dii, grol zho racnie grë zha Israel ne rlëe ga, zgroľ zho racnie grop zha poxtl co. ⁵ Zha ne rlëe ga, zigtaa zha Israela zigtagaa zha guiedz cow, bnediiz zho grë zho wxtis laa zho tsie tsiedeedquie zho Pabl grop Bernabé. ⁶⁻⁷ Zeene bin Pabla grop Bernabé, mazd laa zho brieeg ga, laa zho zie nëz xtan zha Licaon. (Güey zho Listr, güey zho Derb ni grëraa guiedz ne ndxie gax ga; güeynee zho lo grë miech co zha nac Xtiidz Dios.)

⁸ Guiedz Listr ga gon zho ti mgui në ni, waltaa lo xquieľmban me ib gard së me; sac scale në ni me zeene gol me. ⁹ Zeene gon Pabl dze zob me rquiaadiag me mine nonee Pabl lo grë miech co, dzigo dzeque bui Pabl lo me, gon Pabl dib zdoo me rliladz me nli zrieelo gunguic Dios me; ¹⁰ dzigo nguiedz bnee Pabl lo me, rëb Pabl:

—jBeenli ni luu, zeena bzoli!

Zigne sca bnee Pabl, znuse guso nguzhoon me, bzoli me laa me psilo bzë.

¹¹ Zeene gon grë miech co sca biac me, psilo zho con xtiidz zho nguiedz rnee zho:

—jDiosle i gon, nasi zig rlu miech rlu me laa me biet gbaa ziaadgan me ne!

¹² jMasaque rzac zho lë xdios zho ga! Rnee zho Bernabé nac dios Júpiter, laa Pabl nac dios Mercur, sac Pabl nac zha ne ndziibraa rnee. ¹³ Ro guiedz co ga zob xyadoo zhimdio zho Júpiter, dzigo brieeg pxoz ne no yadoo co grë me miech lad guiedz, zienie zho ngon, zienie zho guiee, nan zho gut zho ngon co cogon zho ma lo Pabl grop Bernabé. ¹⁴ Zeene bien Pabla grop Bernabé wbinladz guic zho. Ptsiez zho xab zho, bzëeb zho lad grë miech co, nguiedz rnee zho lo zho:

¹⁵ —jNdzinli golgacl! ¿Pe nacne squi rac to? jGolgan ganle miech guidzliuque nac no, tibaque nac ne grë ne! Laa no ziaad lo to ziadseed no to wseed cub ne nac Xtiidz Dios, zeena guien to csaan to grë ncuaane paat rquiind ne run to i, gbiire gbig to lo Dios meñ ne nlipaa mban. Me bzaa gbaa, me psan guidzliu, me psan nisdoos, grëse ncuaane no gbaaw, ncuaane no lo guidzliuw, ncuaane no lo nisdoow, me bzaaw grësew. ¹⁶ Niicle ne glo bdeed me diidz been miech grë ncuaane gocladztaa zho, ¹⁷ per psaanladz me zho. Gocnie me zho zigne racnieque me ne niina, rsiaab me nisguie rac xcuaa ne, rneedz me ncuaane rdioow ne gzataa dze, rneedz me guieľbley lo ne.

¹⁸ Niicle sca rnee grop zha poxtl co, nen bin grë miech co diidz beete zho ngon co ngogon zho ma lo zho.

¹⁹ Len dze co, blalaa zha Israel ne ziaad nëz Antioquí ni nëz Icon bdziñ Listr ga. Psilo zho bloo zho diidz lo grë miech co gocntseeb zho lo Pabl; güey grë miech co bdeedquie zho Pabl.

Masaque bzhaac zho gutle Pabl, bdoobniu zho me güeyron zho me tiblad ro guiedz. ²⁰ Grë zha guiedz co zha ne rliladzle Jesús, zeene bin zhow, güey zho zaatne nix me ga. Lëëtaaque ndxie zho lo me, zeene laa me guche; ga guche me laa zho zeynie me nëz len guiedz. Biini liu, pcaa me nëz grop me Bernabé laa zho zie nëz Derb.

²¹ Bdziñ zho Derb, psilo zho bnee zho Xtiidz Dios lo grë miech co; ndal grë zha ne bliladza. Blozh ga, laa zho wbi ga bi-ire güeyted zho nëz Listr, güeyted zho Icon, ni güeyted zho Antioquí, ²² güeynee zho lo grë zha ne rliladz Jesús ga, pchoobladz zho zdoo zho, pso zho diidz lo zho, niicle nroob guieľnë ne nodod zho per none tibaque gac guic zho tsienal zho Xtiidz Dios; sac ible sca nzian ncuaane ted zho laga gdziñ dze ne gdziñ zho zaatne rnabey Dios.

²³ Tib tib guiedz co, bzose zho grë zha ne so gnabey lo grë zha ne rliladz Jesús

ga; rlozhse rcuan zho grë zho zho ni rzodidznie zho Dios, dzigo laa zho rsan zha co ladznie me yquianap me zho.

Bdizin Pabl grop Bernabé nëz Siria stib

²⁴ Nëz no Pabl grop Bernabé bded zho dib xtan zha Pisid, bzëëb zho xtan zha Panfil, bdizin zho guiedz Perg. ²⁵ Blozhse bnee zho Xtiidz Dios lo grë miech co, dzigo laa zho brieë ga, bdizin zho guiedz Atalia. ²⁶ Atalia ga bzëëb zho barcw bdizin zho sti guiedz ne lë Antioquí, gataa laa zho psiaal viaj co. Guiedz coque ga brieë zho grop zho güey zho grë guiedz co güeynee zho Xtiidz Dios lo miech; zeene sca bñab grë zha ne riladzle Jesús ga lo Dios gacniën me zho tsiegun zho xtsiin me.

²⁷ Zigne bdizin zho Antioquí ga, bnabey zho pcaalsa grëse zha ne riladz Jesús, bzodidz zho lo grë miech co grëse zha gocniën Dios zho güeygun zho xtsiin me, ni zha rquia zdoo Dios zha ne nacd zha Israel rbedz me zho ye zho rzëëb xnëz me.

²⁸ Xtselaa bio Pabl ga grop me Bernabé, blëz zho lo grë zha ne riladz Jesús ga.

15

Pcaalsa zho Jerusalén

¹ Ga no Pabl grop Bernabé zeene bdizin bla zha ne ziaad nëz Judé, psilo zho noseed zho grë zha ne riladzle Jesús ga, rnee zho lo zho ib none tso zho bey zigne rnabey xley Moisés, niicle ne riladzle zho Jesús; zeena sca csilaa Dios zho lo xtoj zho.

² Zeene gon Pabl sca noseed zha co miech, nacne bdildiidznieque Pabl zho grop Pabl Bernabé. Dzigo mazd bnediidz grë zha ne riladz Jesús ga, bzo zho zla zha ne gacgza Pabl grop Bernabé tsie zho Jerusalén tsienabdiidz zho lo zha poxtl ni lo grë zha ne rnabey lo zha ne no ga, diën pe guiab zho.

³ Nacne brieë zho zie zho. Nëz no zho bded zho xtan zha Fenicia, xtan zha Samar; zaatne notaa zha ne riladz Jesús, rzodiidz zho lo zho grëse zha nobedz Dios grë zha ne nacdraa zha Israel, rsaan zho grë zhiwseed xmengol zho laa zho riladz Jesús. Rley grë miech co ron zhow. Sca bio zho nëz, laa zho bdizin Jerusalén.

⁴ Zeene bdizin zho Jerusalén, pcaalsa grë zha poxtl, grë zha ne riladz Jesús ga, ni grë zha ne rnabey lo zho. Dzigo ga bzodiidz Pabl grop Bernabé grëse zha gocnie Dios zho, zeene güeyted zho grë dan co güeynee zho Xtiidz me lo miech. ⁵ Min co quianee zho zeene guso bla zha ne glo goc farisé rëb zho, grë zha ne nacd zha Israel zeene laa zho riladz Jesús ib none tso zho bey, ni none gun zho grëse miñe rnabey Xley Moisés. ⁶ Dzigo nacne bnabey grë zha poxtl co ni grë zha rnabey co, ycaalsa zho stib

diën zhapaa gaca, pe nonguiëla tso grë zha zit bey co.

⁷ Zeene pcaalsa zho, goc pa lo quianee zho zeene guso Pedr rëb Pedr lo zho:

—Grëse to bets, golquiaadiag miñe gne naa lo to nu ganle. Led rsoladz to, zeene griinpa psilo quiaaaz Xtiidz Jesús lo miech, ible Dios bzooblo naa pxeel me naa gaseed naa grë zha ne nacdraa zha Israel gliiladz zho me. ⁸ Ni megaa ne runbey me zdoo tib tib miech, laa me blu ganle, niicle ne zha zit nac zho laa me pcaania zho; pxeel me Espiritu Sant nacnie zho, zigne pxeelaque Espiritu Sant nacnie ne. ⁹ Gotsaa gwi ne ganle, led yed Dios rbe diën cho nac zha Israel cho nacgaa zha zit; zigtaa zhaw, zigtagaa new, laa me pcaania ne porne dib zdoo ne bliladz ne me. ¹⁰ ¿Zha nac dzigo ne racladz to gnabey to grë zha co gun zho grë miñe nac xley ne? ¿Pe niacxe rienraa ne lo Dios dzigo? ¡Niicxe ne name, niicxe xmengol ne brieelod niuna zigne naca! ¹¹ Golguien ganle, zigtaa zhaw zigtagaa new laa me csilaa ne lo dol grë ne, per nacdä por ncuuane rdziuum ne; sinque laa me csilaa ne porne nquialadz me ne.

¹² Zeene blozh sca bnee Pedr, dzese biac zho grë zho; dzigo laa Pabl grop Bernabé psilo bzodiidz grëta milagr ne blu Dios lo grë menzit zaatne güeynee zho Xtiidz me lo grë miech co. ¹³ Blozhse bnee grop zha co, laa Jacob gusoque rëb me:

—Grëse to bets, golquiaadiaggaa chop lan xtidz naa naganle gne naa lo to. ¹⁴ Laa Pedr bzodiidzle lo ne ganle zha psilo bredz Dios grë zha zit, bzooblo me zho ye zho gac zha ne sëëb xnëz me. ¹⁵ Ga nagon goca zigne zho bneese lo Xtiidz me, miñe pquiaa grë zha ne pxeel me padzeela, rneew:

¹⁶ Tedse nu ganle, laa naa cuedz grëse miech ne ygab lo naa; grë zha xtiï David zha ne bzozit, laa zho gbig stib.

¹⁷ Horco grëse zha zit, laa zho gon ganle cho nac naa,

zeena grieele sëëb zho xnëz naa.

¹⁸ Znu nac xtiidz Dios, ni padzeelale bzeet me ne laa me gun min co.

¹⁹ Min co nagon grë zha zit ne riladzle Jesús, ib nonguiëlda ga gnabey ne zho gun zho miñe nac xley ne. ²⁰ Sinque mazd yquia tib diidz cxeel ne lo zho gon zho, grë ma ne rut miech rgonon zho lo grë zhimdio zho, ib gowd zho bëël co; grë ma ne xieed ren zeene ret ma, gowd zho ma; ni niicle grëragaa ma ne gut zho, ib gowd zho xchen ma. Grë zha bgui, nodne tsonie zho wnaa ne nacd tsiel zho; niicle wnaagaaw, nodne tsonie zho mgui ne nacd tsiel zho. ²¹ Niicle mazd padzeelaw, tibaque quiayon miech gun zho min co; sac desde hor co tib tib guiedz bzose Moisés tib zha ne gnëew lo

miech len xyadoo zho, dze ne rdziiladz zho lo dziin.

²² Blozhse ga, dzigo biaan zho diidz so chop zha ne tsie Antioquí tsienal zhits Pabl grop Bernabé, tsiesan zho ti diidz ne guey lo zha co. Nacne bzo zho Judas xingan Barsabás, ni bzo zho Silas; grop zha co, zha rien nac zho lo grèraa zha ne riladz Jesús ga.

²³ Pquia ti guits güey zho, rnee lo guits co: “Zigne nose no Jerusalén nu, zigtaa zha ne nac poxtla, zha ne rnabeya ni grèraa zha ne riladz Jesús nuw, grè no laa no rquiaab-diuzh to grèse to bets ne nac to zha ne no guiedz Antioquí, ni grèraa guiedz ne ndxie nêz Siria i, ni nêz Cilis.

²⁴ Niina ne gocndion no laa bla zha ne nacgrè no nu biaad lo to i, biaadcots zho guic to dien peraa no gun to. Gacnan to ganle led nod pxeel zho, ²⁵⁻²⁷ gane niina bzodiidz no grè no bzo no Judas ni Silas ziaadnal zhits Pabl grop Bernabé, laa zho ziaad i ziaadgan zho to. Zha nziuu nac Pabl grop Bernabé lo no, sac gon rbeeladz zho xquielmban zho quiayun zho xtsiin Jesús.

²⁸ Lo godiizd ne bdziun no, laa no bdzianle nonguielda ne dien peraa gnabey no to gun to, ni niiclegaa Espiritu Sant scaque rnee me. Rquiind ne peraa gun to, lèlèw ga tosaque tosoxco to ²⁹ gowde to xpèel grè ma ne rgogon miech lo grè zhim-dio zho; grè ma ne rxieed ren zeene ret ma, gowde to ma; ni niicle gowdgaa to xchen grè ma ne gut to. Grè zha bgui, nodne tsonie zho wnaa ne nacd tsiel zho; niiclegaa wnaaw, nodne tsonie zho mgui ne nacd tsiel zho. Min rii nagon nac mine no tosoxco to.

‘Guiaanne Dios to sca.’

³⁰ Gza tap zha co laa zho brie Jerusalén, laa zho zie nêz Antioquí. Zeene bdziñ zho ga, bnabey zho pcaalsa grèse zha ne riladz Jesús, dzigo bdeed zho guits co lo zho. ³¹ Zeene gocnan grè zha co zha rnee low, rley zho sacne pchooblada zdoo zho. ³² Blozhse ga, psilo Judas grop Silas pseed zho grè miech co Xtiidz Dios, zeena dib zdooraa zho gnalo zho Dios; sac bdeed me guielbiini lo Judas grop Silas rteed zho xtiidz me lo miech.

³³ Xtselaa blèz Silas ga grop Judas, laa zeene gol dze ne laa zho greee gbiire zho nêz Jerusalén stib, ine güeyzonèz grè zha co zho, rdeed zho xquizh lo zho. ³⁴ [Laa zho nole nêz, tibaque zeene rëb Silas laa Silas guiaanaque ga spalal dze.] ³⁵ Laa Pabl grop Bernabé ible laa zho biaan ga beñ zho xyudar grè zha ne noseedle miech ga.

Ptso Pabl grop Bernabé

³⁶ Goc palal dze no Pabl guiedz Antioquí ga grop me Bernabé, zeene rëb me lo Bernabé laa zho gbiire tsie grè guiedz ne güeynee zho Xtiidz Dios lo miech ga, par

gacnan zho dien yo grè zha co. ³⁷ Dzigo gocladz Bernabé ye Juan Marcw nienie zho; ³⁸ per bzhiguield Pabl, sac zeene güeynie zho Juan glo, psanaque Juan zho guiedz Panfil, laa Juan biire zey Jerusalén, güeynal Juan nlozh nsiaal zho lo dziin co.

³⁹ Min co pquiaqui bneelsa Bernabé grop Pabl, nrooblaa güey lo xtiidz zho; nacne gataa laa zho ptso. Pcaa Bernabé nêz grop Bernabé Juan bzèeb zho barcw zie zho nêz lo guidzliu win ne no lo nisdoo lè Chipr; ⁴⁰ laa Pabl goc grop Silas. Blozhse bñab grè zha co lo Dios gacnieñ me Pabl grop Silas, laa zho brie ga ⁴¹ güeyted zho grè guiedz ne ndxie nêz xtan zha Siria, grè guiedz ne ndxie nêz Cilis, güeynee zho lo grè miech ne riladz Jesús nêz co, güeychoobladz zho zdoo zho.

16

Beenbey Pabl Timoté

¹ Len dze co güey Pabl grop Silas güeyted zho Derb ni güeyted zho Listr. Listr ga beenbey zho tib zha nguieg ne riladzaque Jesús lè Timoté, ti men Israel ne riladzle Jesús nac xniaa me, laa pxoz me nac men Gres.

² Grèse zha Listr, zha Icon, zha ne riladz Jesús tibaque rzeet zho Timoté rnee zho ti miech ndzinli nac me, nacne bnee Pabl lo me tsienal me zhits Pabl. ³ Ni ne nod me bey ne rio zha Israel sac led zha Israeld nac pxoz me, dzigo bloo Pabl me bey co, zeena tsod pe glisqui grè zha Israel ne no nêz co.

⁴ Laa me zienal zhits Pabl. Guiedz ne rdetaa zho rnee zho lo grè zha ne riladz Jesús ga, tosoxco zho gun zho grè mine pso zha poxtl ga diidz, grè zho zha rnabey ne no Jerusalén. ⁵ Zeene ron grè zha cow, dib zdooraa zho rnalo zho Dios, zigse zie dze racnzianraa zha ne riladz Jesús.

⁶ Blozh ga, tibbded zho xtan zha Frij ni xtan zha Galás, sac bdeete Espiritu Sant diidz nienee zho Xtiidz Dios lo miech grè guiedz ne ndxie nêz Asia ga. ⁷ Zeene bdziñ zho zaatne rsilo xtan zha Misia gocladz zho nie zho nêz xtan zha Bitin, scaque bdeete Espiritu Sant diidz nie zho nêz co. ⁸ Dzigo tibbded zho dib xtan Misia bdziñ zho ti guiedz ne ndxie no nisdoo lè Troas.

⁹ Guieel co blulo ti mgui Macedon lo Pabl, rnab me gun Pabl guielnzaac tsie Pabl nêz co, tsiegun Pabl xyudar grè miech co.

¹⁰ Nacne hor cogazh bzhixcuaa no, sac bien no ible Dios racladz guio no nêz co guionee no Xtiidz me lo miech.

¹¹ Dzigo brie no ga bziaab no ti len barcw bdziñ no ti lo guidzliu win ne no lo nisdoo lè Samotras. Biini liu brie no ga bdziñ no Neápolis, ga bliiaz no wdze co. ¹² Biini sti liu co brie no Neápolis bziani no bdziñ no Filip. Lèe guiedz co riaan zaatne rsilo xtan zha

Macedon, niapse meñ Roma no ga; nzianlaa ngbidz bliiaaz no ga.

¹³ Laa tib dze ne rdziiladz miech lo dziin, brieë no bio no tib lad ro guiedz co, gax ti ro giuubee, zaatne bdzion no rcaalsa zha ne rienab lo Dios. Bdzin no nzianlaa meñ wnaa ndxie ga, dzigo psilo no bnee no lo zho cho nac Jesús. ¹⁴ Lad co no ti wnaa Tiatir lë Lidia, rto me grë lar nizhnie nlaan miñe nac lar niazh; ye me dib zdoo me rliladz me Dios. Laa me noquiaadiag miñe nonee Pabl ga, zeene psiaab Dios guic me bliladz mew.

¹⁵ Dzigo hor cogazh brobnis me grë menlidz me; blozh ga, bredz me no guibiaaz no lidz me, nëchaa me lo no:

—Telne rzac to nli dib zdoo naa rleynie naa Dios, goltë sca cuëz to lidz naa.

Rzoobguic me lo no, nacne biobiaaaze no lidz me.

Bio Pabl ladzguuib grop Silas

¹⁶ Tib dze, lëëtaque zio no zaatne riozodidznie no Dios, bdzieelo no ti ndzooop nguieg noguitnie mëndox. Zëëb diidz grëse tel pe rnabdiidz miech lo ndzooop, rnee mëndox cow; nroob dimi ne riab nia zha ne rnabey ndzooop. ¹⁷ Nał ndzooop zhits no, nguiedz roptsie ndzooop rnee ndzooop:

—jXtsiin Dios ndzon ne zob gbaa gon noyün gza mgui rii! jLaa zho ziadseed to zeëna gacnan to zha csilaa Dios to lo xtol to!

¹⁸ Nzian dze zaatne rdzieeltaa no ndzooop tibaque sca rnee ndzooop. Zeëne bieedtaa guic Pabl, biireque me bnee me lo mëndox ne noguitnie ndzooop ga, rëb me:

—Jesús nacie naa, ni laa naa rnabey luu gon niinagazh psaan ndzooop qui.

Zigne sca rëb Pabl laa mëndox co bzhooñ.

¹⁹ Gza zha ne rnabey ndzooop ga, zeene gon zho rundraa ndzooop guielnsin co gdziniaa ndzooop dimi, bnaaazeque zho Pabl grop Silas güeyzo zho lo wxtis, rëb zho:

²⁰⁻²¹ —jGolwi ganle pe nac ncuaañe noyün grop zha Israel rii lad guiedz nu! jNogodil zho miech, laa zho quiseed miech ncuaañe nonguiełdraa dziuuñ ne nac ne zha Roma!

²² Pcaalsa grëse miech co, grëse zho ntseeb rac zho lo Pabl grop Silas. Dzigo rnabey wxtis co brieë xab zho grop zho bdeed bar zho zho, nroob bdiñ zho zho. ²³ Blozhse bdiñ zho zho laa zho psëëb zho ladzguuib, rnabey zho meñ ne quianap ladzguuib ga tibaque yquianap me zho, sac tel laa zho xoon me tsietizha. ²⁴ Zeëne bin meñ co sca rëb zho, güeyaque me güeyseëb me zho stib leña miñe riaan caañraa, ga psëëb me ni zho lad chop lë yag nroob.

²⁵ Wdze co, zig grol guieela laa Pabl grop Silas bii noyoolnie Dios, ni rnab zho lo me gacnieñ me zho. Grëse zha ne no ladzguuib ga, ron zho sca no Pabl grop Silas.

²⁶ Tibaque zeëne bni ti zhodox, psiniw dib

nacse ladzguuib co, grëse ro ladzguuib co bzhial, guuib ne no nia grë zha ne no ga, wbiła.

²⁷ Lëëłëd brieë mcaallo meñ ne quianap ga, zeëne gon me grëse ro ladzguuib co zonial, masaque güeynie guic me bzhooñle grë zha ne no ga, bdoabaque me spad ne ney me laa me zie gut me me. ²⁸ Horco broptsie Pabl lo me, rëb Pabl:

—jGute luu luu! jGrë no ndxie no, choot bzhioond!

²⁹ Lëëłëd bñab me biini, bzëëb nguzhooñ me leñ ladzguuib, masaque rzhidz me dzeb pquiiitgzhib me lo Pabl grop Silas. ³⁰ Blee me zho ga, rëb me lo zho:

—Golnë lo naa, zpe nac miñe gun naa zeëna csilaa Dios naa lo grëtaa xtol naa?

³¹ —Dib zdoo luu bliladz Jesús, meñ rnabey ne pxeel Dios lo guidzliu —rëb zho—, dzigo silaa me luu lo dol, silaa me menlidz luu ne.

³² Dzigo güeynie me zho lidz me, bnee zho Xtiiidz Dios lo me grë menlidz me. ³³ Guieel co no me bdiib me zhits zho, zaatne brëë bar ne bloobar zho zho; blozhse ga, laa me brobnis grë menlidz me. ³⁴ Bñabey me goclo ti guielwagw downie me zho, rley me, niicle grëga me menlidz mew rley zho ne laa zho bliladz Jesús.

³⁵ Biini liu, pxeel wxtis zha ne güeynie diidz lo me cuee me Pabl ladzguuib grop Pabl Silas. ³⁶ Dzigo güey me güeynee me lo Pabl rëb me:

—Laa wxtis pxeel diidz cuee naa to ladzguuib; zacle nasca griee to, peet tsieniedraa guic to.

³⁷ Dzigo rëbchaa Pabl lo zha ne bdziñnie diidz ga:

—jZha ndzielguictaa zhiwxtis to gon! Squi ndxie menguiedz bdiñ zho no, ni gardle gacnan zho dien pe nli no pe falt ne rdziaap no. Bñabey zho bio no ladzguuib, ni zha Roma nac no; nana racladz zho zhliiaanee griee no. jLëda ga gon! jGoltsie golguiab lo zho, lëëzhal zho guiaad guiadbee zho no nu!

³⁸ Dzigo güey zha co güeynie zho diidz lo wxtis. Zeëne bin wxtis zha Roma nac Pabl, bdzieb zho; ³⁹ lëëłëd güey zho ro ladzguuib güeynab zho dispensar lo Pabl grop Silas. Blee zho zho ladzguuib, ni bñab zho lo zho siguiej zho mazd gbi zho guiedz co.

⁴⁰ Ga brieë zho güey zho lidz wnaa ne lë Lidia ga, bnee zho lo grë zha ne pcaalsa ga, zha ne rliladz Jesús, pso zho diidz lo zho tiblrique gac zho tsienal zho xtiidz me. Blozhse ga, dzigo laa zho brieë guiedz co.

17

Güey Pabl Tesalónica grop me Silas

¹ Brieë Pabl guiedz Filip grop me Silas, güey zho güeyted zho guiedz Anfipolis

ni guiedz Apolonia, bđziņ zho guiedz Tesalónica. Lad guiedz co zob ti xyadoo zha Israel, ² dzigo güey Pabl güeynee me Xtiidz Dios lo grē zha ne rcaalsa ga, zigne runaque me grēraa guiedz ne zieded me.

Blēz zho ga tsoņ zmal, gzobse dze ne rdziiladz miech lo dziin güey Pabl güeyzodiidznie Pabl grē zha co, ³ bzeet me lo zho grē zaatne raquiet grētaa ncuaaņe ted meņ ne cxeļ Dios lo guidzliu ga, ni zha grieēban me; ni blu me lo zho gacnaņ zho ganle lēē meņ co ga nac Jesús.

⁴⁻⁵ Ndal zha ne pquiaadiag xcodiidz Pabl, biēņ zho ne nli sca naca, laa zho bliladz Jesús, ndal zho nac zha nēz Gres, zha ne noxcole miņe rnabey Dios, ye blalaa meņ wnaa ne nac meņ non lad guiedz co. Laa zha Israel ne rnabey yadoo co, zeņe goņ zho scataa ndal zha ne bliladz Jesús, blēē zho; güey zho güeytop zho grē zha yozh ne quianzē lad guiedz co, ti ruid ne beēņ zho lad guiedz. Güey zho güeyšēēb zho lidz Jasón naņ zho niebee zho Pabl ga grop Silas, ngo zho zho ladzniā grē miech co.

⁶ Zeņe goņ zho bgaad grop zha co lo zho, bnaazaque zho Jasón ni zla zha ne rliladz Jesús, bđobniū zho zho bđziņnie zho zho lo wxtis, roptsie zho rnee zho:

—jGolgaņ ganle laa zha ne sca quianzē no-cots guic grē miech, laa zho blansole nu! ⁷ Ni Jasónpaa rdeed zaatne rbēz zho. Racladz-draa zho guņ zho miņe rnabey rey César, sac rnee zho no sti zhirey zho lē Jesús.

⁸ Grē zha wxtis co ni grē meņguiedz ne pcaalsa ga, zeņe bin zho sca rnee grē zha co, riēņdraa zho zha guņ zho. ⁹ Miņe beēņ zho beēņquizh zho Jasón ti mult gza Jasón zla zha co, dzigo laa zho wbi ga.

¹⁰ Pcow liu co, wxiņa laa grē zha ne rliladz Jesús ga bleese Pabl ga grop me Silas, pxeļ zho zho nēz Berē. Zigne bđziņ zho Berē, gloque ti xyadoo zha Israel güey zho.

¹¹⁻¹² Grē zha Israel ne no Berē ga, rley zho rquiaadiag zho miņe rnee Pabl grop Silas, gzobse dze rlab zho lo Xtiidz Dios rwi zho dien pe nli miņe rnee zho ga. Ndal zha Israel co bliladz Jesús, ndal zha Gres ne, zigtaa mguiw zigtaa wnaaw; blalaa meņ wnaa co zha non nac zho guiedz co. Tibliladz nac grē miech co, gocntseebd zho zigne gocntseeb zha Tesalónica.

¹³ Laa zeņe gocnaņ zha Israel ne no Tesalónica laa Pabl nolaque guiedz Berē, güeyaque zho güeyquiił zho grē miech co glēēnie zho Pabl. ¹⁴⁻¹⁵ Dzigo lēēlēd brieē bla zha ne rliladz Jesús ga, zienie zho Pabl nēz ro nis; laa Silas grop Timotē biaan ga. Güey zha co güeyšaņ zho Pabl guiedz Aten; laa zeņe laa zho wbi, pxeļ Pabl diidz lo Silas grop Timotē tsiēniob zho Aten.

Leņ dze ne no Pabl Aten

¹⁶ Laga quiambēz Pabl gdziņ Silas grop Timotē güey me güeyted me lad guiedz co, wbiņladz guic me goņ me led zhid grē mdio ne riegān grē miech co. ¹⁷ Nacne bioxco me bnee me Xtiidz Dios lo zho, güey me xyadoo grē zha Israel ne no ga, bzodiidznie me zho grē zho zha guiedz co zha ne rliladzle Dios. Gzobse dze rie me leņ guiedz riēnee me lo grē miech ne rdziņ ga. ¹⁸ Tib dze bđzieelo me bla zha rac ne zienaļ zhiwseed ti men lē Epicur; ni zla zha ne zienaļ wseed ne rnee zho estoic; psilo me bzeet me Jesús lo zho, bnee me zha brieēban Jesús. Zeņe bin zho zha rnee me, no bla zho rzhidznie me, rnee zho:

—jDieņ pe riab guic meņ qui rnee me, ziaadquidie me miech!

Zlagaa zho rnee, nend cho zhiwseed sti Dios ne rliladz miech stib dan zienie Pabl, gane sca rnee Pabl; ¹⁹ dzigo rēb zho lo Pabl:

—Bzhiguiel mazd, sē luu guio ne lozh sodiidz luu lo no dien zha nac wseed ne ziaadnie luu, ²⁰ sac waltaa gard dzion no grē ncuaaņe rnee luu i.

²¹ No zho liaadz gacnaņ zho pe rnee Pabl, sac sca nac grē zha Aten, niiclegaa grē zha ne quiaziņ ga, rdziladz zho rded-dze zho rzodiidz zho dien zha nac grē diidz cub ne griiņ ron zho.

²² Bđziņ zho ti guic gui win ne rnee zho Areópago, bzo Pabl glowtaa zaatne rcaalsa zho ga, bnee me lo zho rēb me:

—Grēse to ne nac to meņ Aten, raņ naa ne nligaa rioxco to rleyne to grē meņ ne rzac to nac Dios; ²³ sac leņ dze rii biateed naa za-atne zob grē xdios to, haxta no zaatne niaa ti lo pcoog quia chop lan diidz ne znu rnee: “MIN RII NIAA PAR DIOS NE RDZIUNBEYD NE.” Golgacnaņ sca ganle, Dios ne runbeyde to ga, runbey naa me ni lēē zhiwseed me none naa lo miech leņ dze rii.

²⁴ ‘Dios co bzaa guidzliu, me bzaa grētaa ncuaaņe no lo guidzliu; gacd ne guiab miech zha gzaa ti zaatne cuēz me, sac me nroob meņ rnabey nac me, me rnabey gbaa, me rnabey guidzliu. ²⁵ Niicle rquiindgaa me dien zha yquianap zho me, sac grēse ne ne nac ne miech, me rneedz guielmban lo ne, me rneedz grētaa ncuaaņe rquiin ne. ²⁶ Lo tib nēzaque miech ne bzaa me ga, bnabey me brieēquia grēse dii miech ne ndxie lo guidzliu niina, bdeedse me zaatne biaan tib tib dii co ni dien palal dze ne gbaņ zho zaatne biaan zho. ²⁷ Laa me psāņ zho parne yguib zho me, tsoxco zho guieņ zho ganle zha nac me haxta gdziel me lo zho. Ni led zite ga zo me lo ne grē ne, ²⁸ sac goņ, niapse por xpoder me laa xcuerp ne niaa zigne naca, laa ne mban, laa ne rriel. Lēēw ga bnee bla meņladz to, zha rac ne znu rēb: “Xtii Dios nac ne.”

²⁹ 'Gase na ganle gotsaa gwi ne, conque xtií Dios name nac ne, pe nac dzigo gliladz ne lëë Dios ga nac grë cho mdio or, cho mdio plat, cho mdio quie ne riab guic miech rzaa zho; ³⁰ ni ib sca rliladz miech. Laa Dios gop zho paciens hor co sac runbeyd zho me; sañgue niina laa me quiabedz zho, laa me rnab lo zho csaan zho grë ncuaañe bliladz zho ga gbig zho lo me, mese gleynie zho; ³¹ sac laa me bzole tib dze ne gacredz grëse miech lo me ygaa zho miñe tsieguiañ zho tib tib zho, tel zha wban zho. Ni laa me blule ganle cho nac men ne guñ guieñwxtis co, lëë men co ga goñ bleeban me.

³² Zeene bin zho bzeet Pabl no ti men ne brieeban, nzian zho rzhidznie Pabl, zla zho rëb:

—Na dien pa sti dze lozh yquiaadiag no miñe rnee luu i.

³³ Gataa pçuëëz zho lo xcodiidz Pabl, laa Pabl wbi lo zho ga. ³⁴ Brieequia blalaa zha Aten bliladz Jesús, lëë tib zho ga nac mgui ne lë Nich (men ne nacgrë zha ne nac wxtis) ni ti wnaa lë Dámaris.

18

Güey Pabl guiedz Corint

¹ Brieë Pabl Aten bdziñ me guiedz Corint. ² Ga beenbey me ti men Pont lë Aquil, ti zha xtií zha Israel nac Aquil. Roma no me glo, wriiñ bdziñ me Corint ga grop tsiel me; sac bnabey rey Claud brieë grëse zha Israel ne no Roma. ³ Dzigo güey Pabl blëz Pabl lo zho ga, sac ye zho rzhixcuaa grë lar nroob ne rquia ncal, tipse pquia zho dziin ga gza zho.

⁴ Gzobse dze ne rdziiladz miech lo dziin rie Pabl xyadoo grë zha Israel ne no ga, riezodiidznie me grë zha ne rcaalsa ga; zig-taa zha Israela, zigtagaa zha guiedz cow rnee me lo zho tso guic zho gliladz zho Jesús. ⁵ Zeene laa Silas grop Timoté bdziñ Corint, dzigo laa Pabl psilo gzobse dze güey me güeynee me Xtiidz Dios lo grë zha Israel ne no ga, rnee me lo zho cho nac Jesús. ⁶ Laa zeene gontaa me rond zho diidz, leñ ntseeb rac zho lo me haxta rneenë zho Jesús, dzigo bdzib me xab me lo zho, rëb me:

—Laa naa bial bialne naa lo to per pquiaadiagde to miñe rne naa; xtolle to nasca tel laa to nitlo! Gbiiredraa naa gne naa Xtiidz Dios lo to, na laa naa csilo ganew lo grë zha ne nacd zha Israel.

⁷ Dzigo laa Pabl psilo güey lidz ti men ne no gaxaque zaatne zob yadoo co lë me just, dib zdoo me rliladz me Dios. ⁸ Leñ dze co ndal zha Corint bliladz Jesús zeene bin zho miñe rnee Pabl, haxta ti men ne rnabey xyadoo zha Israel lë Crisp, grë menlidz me bliladz Jesús, dzigo grëse zho laa zho brobnis.

⁹ Ti wdze blulo Dios lo Pabl, rëb me lo Pabl:

—jGdziebd luu! jib ycuëëzd luu lo dziin ne noyñ luu i, bnee xtiidz naa lo grë miech qui! Ndal grë miech rii no sëëb xnëz naa. ¹⁰ Peet tsienied guic luu, choot grieelod lega pe guñ luu sac naa quianaap luu.

¹¹ Nacne blëz Pabl ga stib iz groñ, pseed me grë miech co Xtiidz Dios.

¹² Laa zeene bzob men ne lë Galión zob-nabey me xtan Acay, grë zha Israel ne no Corint ga bnediidz zho grë zho bnaaz zho Pabl güeyzo zho me lo Galión ¹³ rëb zho:

—Laa no ziaadnie mgui rii lo luu, sac laa me quiaguuiis xley no, quiago me guic miech tsiegan zho Dios sti mod miñe ni nacdraa ley.

¹⁴ Laa Pabl zie gnee, zeene pquiab Galión rëb me lo grë zha co:

—Telne niaca miñe no pe ti falt, pe ti guieñtseeb ne quiaayñ me, dzigosi naa raguiñ guñ guieñwxtis. ¹⁵ Per telne laa to ziaadnie me nu porne rdziladzde to miñe quiaseed me miech, rdziladzde to tel cho rzeet me, sac led scad nac xley to, tsow golgan dien pe guñ to. Nodaque xtiñ lo guic naa.

¹⁶ Bleege Galión zho nëz ley.

¹⁷ Dzigo bnaaz zha guiedz co ti men lë Sóstenes, men ne rnabey xyadoo zha Israel ga; gonlo Galión bdiñ zho me, per peet rëbd Galión.

Biire bdziñ Pabl guiedz Antioqui

¹⁸ Goc palal dze no Pabl Corint ga, dzigo bnee me lo grë zha ne rliladz Jesús ga laa me gbi; ye Aquil ni Priscil wnaa ne nac tsiel Aquil nole guic tsienañ zhits me.

Nacne zeene laa me brieë, ye zho bzëëbgza me barcw, laa zho zie nëz Cencré. Lëëtaaque len dze co noxco Pabl guñ me tel pe nac ncuaañe rëb me lo Dios guñ me, dzigo zeene bdziñ zho Cencré bnabey me liu liu ptsiib guic me.

¹⁹ Cencré bzëëb zho barcw stib, zie zho nëz Efës. Bdziñ zho Efës, güey Pabl xyadoo grë zha Israel ne no ga güeynee me Xtiidz Dios lo zho. ²⁰ Dzigo bnab zho mbëz me lo zho ga ti blalaa dze, per brieelod mbëz me ²¹ sac laa guic me no gdziñniob me Jerusalén ygaa me lni ne ziaadyob len dze co, rëb me:

—Na telne zneedyz Dios diidz, bii ziañteadaque naa dien yo to.

Gataa biaan Aquil grop Priscil, laa me bzëëb barcw stib zie me nëz Cesarea. ²² Cesarea brieë me barcw, laa me zie nëz Jerusalén. Bdziñ me güeyquiaabdiuzh me grë zha ne rliladz Jesús ga; biireraa me ga bdziñ me Antioquí.

²³ Goc palal dze no me Antioquí, laa me brieëque ga güeyted me grë guiedz ne ndxie dib xtan zha Frij, dib xtan zha Galás, güeynee me lo grë zha ne rliladz Jesús ga dib zdoo zho gleynie zho Dios.

²⁴ Leñ dze co bdziñ ti meñ xtií zha Israel guiedz Efés, ti meñ Alejandríw lè me Apol. Ti zha rac nac me, rien me zha gnee me Xtiidz Dios lo miech. ²⁵⁻²⁶ Güey me xyadoo zha Israel ne no ga, nguieel rac me, peet dzeb guieñd lo me psilo me nonee me lo zho grëse miñe bnee Juan Bautist zeene bzeet Juan Jesús; sac loxaque miñ co bin me zeene gocnañ me cho nac Jesús.

Lad co co no Aquil ni Priscil, zeene gon zho zha rnee me, dzigo blozhse ga, bredz zho me blozh bnee zho lo me zharaa nac zhiwseed Jesús.

²⁷ Grë zha ne rililadz Jesús ga, zeene gocnañ zho laa guic me no tsie me nêz Gres, dzigo ye zho rëb wen tsie me, pquiiaa zho ti cart pxeel zho lo zha ne no nêz co zaacse ycaania zho me. Zeene bdziñ me nêz co, pseed me grë zha co. Rley zho blozh gocnañ zho cho nac Jesús; ²⁸ sac squi ndxie miech rsiog me ro grë zha Israel, rnee me lo zho lëële meñ ne quiambêz zho cxeel Dios ga nac Jesús, ni rlu me lo zho pa lo zho bneew lo Xtiidz Dios.

19

Biire güey Pabl Efés

¹ Leñ dze ne no Apol Corint, laa Pabl bdziñ Efés. Blozhse güeyted Pabl grë guiedz ne ndxie nêz xtan zha Galás, laa me bdziñ ga. Ga bdzieel me blalaa zha ne rililadz Jesús, ² dzigo bnabdiidz me lo zho, rëb me:

—¿Pe bгаа to guieibiini ne rneedz Espiritu Sant, zeene bliladz to Jesús?

Pquiab zho rëb zho:

—¿Guieibiini ye? Gard gon dzion no rdeed Espiritu Sant guieibiini.

Dzigo rëbchaa Pabl:

³ —¿Pezhe waa pseed to zeene brobnis to? —Zhiwseedse Juan Bautist gocndion no —rëb zho.

⁴ Dzigo bnee Pabl lo zho zha nac wrobnis ne biaadnie Juan. Rëb me lo zho nace wrobnis co par glu miech ne laa zho csaan guieintseeb, laa zho seëb xnêz Dios; per grëse zha ne bгаа wrobnis co ib nonee gliladz zho Jesús, meñ ne bzeet Juan ga zeene rëb Juan ile ziaad me.

⁵ Miñ co bin zho nace brobnis zho stib zigne psañ Jesús diidz. ⁶ Zeene laa Pabl pxobnia guic zho bnab me gdeed Espiritu Sant guieibiini lo zho, hor co psilo zho nzian lo diidz ne rnee zho; ni bnee zho tel pe nac mine racladz Dios gacnañ miech. ⁷ Lo gza zho rgaa zho tsiipchop, niapse zha bguiw.

⁸ Tson mëë blëz Pabl ga, tibaque rie me xyadoo grë zha Israel ne no ga, ible rdziebd me rnee me lo zho zha nac Xtiidz Dios, ni rguib me rgo me guic zho gliladz zho cho nac Jesús. ⁹ Per zeene gon me no palal zho ib rond diidz, lel psilo zho squi ndxie miech rneenê zho Jesús, nace bleextsoque me grë

zha ne rililadzle Jesús, güeynie me zho zaatne nac xyuscuel ti meñ lè Tiran; ga rcaalsa zho gzobse dze rieseed me zho.

¹⁰ Dipse leñ chop iz blëz me ga pseed me grë zha co; nace grëse miech ne no dib nêz Asia ga, zigtaa zha Israela zigtagaa grëraa miech cow, bin zho zha nac Xtiidz Dios.

¹¹ Bdeed Dios diidz been me grë milagr nroob ne rzee zdoo miech; ¹² sac haxta lar ne rzëse nia me, lar ne rbixse me rzhooob lad meñ ne rzacnê laa zho riac, niicle grëгаа mendox ne noguitnie miecha, rzhooñ ma.

¹³⁻¹⁴ Ga quianzê gadz xpëëd ti zhipxoz zha Israel lè Escew, stib guiedz stib guiedz rie zho riegunxoon zho mendox ne noguitnie miech. Ti vuet, nañ zho na ye zho cuedz lè Jesús gacnieñ me zho gunxoon zho mendox; bdziñ zho zaatne gunxoon zho ma, rëb zho:

—¿Zig zobwi Jesús ne rzeet Pabl, laa no rnabey to golriiegazh i niina!

¹⁵ Pquiabaque ma rëb ma lo zho:

—Wen wen runbey naa Jesús ni nangaa naa cho nac Pabl, sangue to gon ni lalnu runbeyd naa to.

¹⁶ Znuse bias meñ ne noguitnie mendox co, bnaaz me gza zha co bdiñ me zho. Ib blëbd zho lo me, masaque dib brëë rna zho, ni xab zho nacwdraa, laa zho bzhoon.

¹⁷ Grë miech ne no Efés, zigtaa zha Israela, zigtagaa grë zha guiedz cow, zeene bin zhow per nli bdzieb zho; grëse zho bien zho ne nli meñ non, meñ rnabey nac Jesús.

¹⁸ Haxta ye grë zha ne rililadzle Jesús, hor co laa zho bleero pe nac grë ncuaañe ndzinlid ne bliladz zho glo. ¹⁹ Nzian zha ne biil diidz dox güeyxi zho grë xquits zho, squi ndxie miech laa zho bzëëga grësew. Zeene biobey palal gocnon grëtaa guits co, biirew zig chooptsi mil pes plat. ²⁰ Ga blu poder ne nacie Xtiidz Dios, sac grë zha ne bina bdzëë lo xquieimban zho.

²¹ Bded ga, biab guic Pabl tsieted me nêz xtan zha Macedon, xtan zha Gres, gbiire me ga laa me tsie Jerusalén stib; haxta rnee me Jerusalén gree me tsie me Roma. ²² Nacne ptedner me Timoté grop Rast (zha ne noyuy xyudar me leñ dze co) zie zho nêz Macedon, laa me bii biaan nêz Asia ga.

Gocntseeb zha Efés

²³ Leñ dze co brieequia palal zha Efés ptiidil zho zha ne rililadz Xtiidz Dios. ²⁴ Guiedz co no ti meñ ne rundziin guii plat lè Demetr; rzaa me grë yadoo yeen zig niaada xyadoo xnaxnazh zho Dian; nroob dimi ne rial me grë me zha ne runnie me dziin co; ²⁵ bnabey me pcaalsa grë zha ne quia dziin lo me, ni grëragaa zha ne runaque dziin co, rëb me lo zho:

²⁶ —Rien naa ziyonle to, ziyangaa to ganle laa mgui ne rnee zho Pabl quianzê lad guiedz nu, rnee me nliid Dios ga nac grë

mdio ne rzaa miech. Pe zhidaale miech quialiladz zhiwseed me nu; ni led loxaque nudsegaa, dible Asia quialiladz miecha. ¿Pe gnê to zha dziuun ne? ²⁷ Golguien ganle noxtseeb guiabdraa xtsiin ne, ni nanwen to ganle lëê xtimi ne nu. Ni tebaa minçosegaaw, minç mazdraa noxtseeb nend grêse miech csaanladz xyadoo nazhnazh Dian, nend grêse miech ne rleyne me dib Asia, diibgaa lo guidzliuw con guiaanladz zho me.

²⁸ Zeene gon grê zha co sca rëb Demetr, riëe zho, roptsie zho rgo zho xviv Dian. ²⁹ Wdzeepaaw grêse menguietz laa zho pcaalsa, güey zho bnaaz zho Gay ni Aristarco chop zha Macedon ne rzënie Pabl, bdoobniu zho zho bdziñnie zho zho ro yulow.

³⁰ Nacne gocladz Pabl nie me nienee me lo grê miech co, per psaand grê zha ne rililadz Jesús ga. ³¹ Haxta bla zha wxtis ne ndzieeldidz Pabl, pxeel zho diidz lo me tsied me.

³² Zhaase zhaase rnee grê miech co ndxie zho ro yulow ga, no zho haxta ni riend pe nacne zie zho ga. ³³ Blalaa zha Israel, zeene gon zho scataa rac grê miech co, bdoob zho zhiwç ti meñ lë Lejandr gocladz zho nee me chop lan xtiidz zho. Laa meñ co blis nia me parne cuedze zho gnee me; ³⁴ zeene gon zho zha Israel nac me, psilo zho stib grêse zho nguiedz roptsie zho, rgo zho xviv Dian rnee zho:

—jMeñ ndzondoo nac Dian! jMeñ ndzon nac xnaxnazh ne!

Zig chop hor bre zho ga sca roptsie zho.

³⁵ Dzigo brie meñ ne zobnabey ga, blu-nia me lo zho cuedze zho; zeene laa zho bredze, psilo me bnee me lo zho rëb me:

—Golgona ganle, grêse miech lo guidzliu nan zho guiedz rii zob nazhnazh Dian, nan wen zho gbaa biet me zob me nu; ³⁶ tsoð zha ne guiab led scada. ¿Pe nac nadien ne squitaa rac to? Golguien ganle nonguielda i squi lëêlëd dieen pe rzhixcuua to. ³⁷ Golwi ganle, laa to ziaad-zo grop zha rii nu, ¿pe nadien been zho? Nacd zho cho zha ne quiaaguitnie yadoo, cho zha ne nozhidzniegaa xnaxnazh ne. ³⁸ Nana, telne racladz Demetr pe glisqui me grê me zha ne rquianie me dziin, gacxe na no yulow waa. Niac niaad zho niaadnab zho guielwxtis, ni zogaa zha ne yquiaadiaga. jGa glisqui zho pe run tib, pe rungaa stib! ³⁹ Laa telne noragaa pe racladz zho glisqui zho, dzigo niac niacredz grêse zha ne nac wxtis, zha ngobey dien zha niaca. ⁴⁰ Sac gon ne squi been to nadze, noxtseeb glisqui zha Romaw lo ne; ni pe nadien dzieets ne telne laa zho glisquiw.

⁴¹ Blozhse sca bnee me laa me wbi lo zho ga, niicle zhagaaw laa zho zey.

20

Güey Pabl nëz Macedon ni nëz Gres

¹ Zeene laa ruid co blëz, dzigo bredz Pabl grêse zha ne rililadz Jesús, bnee me lo zho zaacse gac zho. Blozhse bnee me lo zho, laa me brie ga zie me nëz xtan zha Macedon; ² güeynee me lo grê zha ne rililadz Jesús nëz co, pso me diidz lo zho zaacse gac zho. Nëz co brie me bdziñ me nëz Gres. Ga blëz me tsoñ mëe.

³ Laa zeene laa me gbi ga tsie me nëz Siria, laa me ziele sëeb me barcw zeene gocnan me laa zha Israel ne no ga bnedidz pa tsietin zho me, nacne güeydaque me barcw, mazd bio me nëz güeyted me nëz Macedon.

⁴ Blalaa zha ne bzënal biogza no me, bzë ti meñ Beré lë Sópater xingan ti meñ lë Pirr; bzë chop zha Tesalónica, Aristarco ni Segund; ti zha Derb lë Gay, Timoté, ni schop zha nëz Asia, Tíquico ni Trófimo. ⁵ Gol no Filip laa zho bner, per biaan no diidz Troas cuëz zho no; ⁶ laa no bliiaz ga, ga bdieed no lni Pascw. Zeene bded lni co laa no bziaab barcw, laa no brie ga. Goc gaay ngbidz no no lo nis laa no bdziñ lo zho Troas, dzigo bliiaz no Troas ga gadz ngbidz.

⁷ Zeene gol dze dmingw, bio no yu ne rcaalsa zha ne rililadz Jesús ga. Ti yu tsoñ xcuuaw, laa no pcaalsa par dziuun no xtsee ne psan Jesús diidz ga gon grê zha ne rililadz me. Laa no ndxie grê no, dzigo psilo Pabl pseed me no; nzian ncuuañe nonee me lo zho sac guini liu co laa me grie ga; gol grol guieela rsiaaldaque me. ⁸⁻⁹ Nzian nac biini ne noquia len yu co; zaatne nac ro ventan ga zob ti niib lë Tic. Wdzeelaaw rsiaaldaque Pabl, tibaque bzhen mcaal niib co, wbi niib ga biab niib nëz ley; ni glaaw, len yu ne riaan glaaraa ga ndxie no. Zeene güeylis zho niib laa niib gutle.

¹⁰ Biet Pabl, bdziñ me lo niib bdeedz me niib.

—jGdziebd to! —rëb me—. jZrieaban niib!

jNi nligaaw brieaban niib! ¹¹⁻¹² Grêse zho per nli rley zho. Blozh ga bdzieep no glaa stib bdziñ no len yu co, dzigoraa bdiiz Pabl guietxtil pquinn no. Blozhse bdziuun no xtsee co, laa Pabl psilo bnee lo zho stib, quianeeque Pabl laa liu biini.

Bdziñ Pabl Milet

¹³ Lban co psiaal Pabl, laa me wbi ga laa me zie nëz Ason nzëni me; laa no bziaab barcw bdiednieer no lo me. Bdziñ no Ason ga bliiaz no me zigne biaan no diidz. ¹⁴ Zeene blanso me lo no, laa no bziaab barcw gza no me bdziñ no guiedz Mitilen. ¹⁵ Biini liu brie no Mitilen, bdieed no gax Quo, bietraa stib dze co bdziñ no Samos, ga bliiaz no; bzia no lo nis co zig sti dze dzigoraa bdziñ no Milet.

¹⁶ Biotieete no Efés, sac laa guic Pabl no gdziñniob me Jerusalén, zeena ygaa me lni Pentecostés. ¹⁷ Nacne zigne bdziñ no Milet pxeel me diidz Efés bredz me grè zha ne zo lo zha ne rliladz Jesús ga. ¹⁸ Zeene blanso zho, bnee me lo zho rëb me:

—Wen wen runbey to naa, nanle to ganle zha noxco naa noyun naa xtsiñ Jesús meñ ne rnabey ne. Wlal ne psilo ziyal naa nëz Asia nu, ¹⁹ blactaa biin naa lo grè miñe bdeed naa, blactaa lo guielxtseeb ne ziyo naa, tibaque quiana grè zha Israel quin zho naa. ²⁰ Per gon to ganle, tibaque bioxco naa bialseed naa to miñe nac diidz, zigtaa pseed naa to zaatne rcaalsa tow, zigtagaa pseed naa to stib yu stib yu. ²¹ Grèse miecha, tibaque miñe pseed naa zho, miñe bne naa lo zha Israel mincoque bne naa lo miech stib guiedz; grèse zho bnee naa lo zho none csaan zho xquielntseeb zho dib zdoo zho gnalo zho Jesús, zeena gbig zho lo Dios.

²² Scaque niina ne laa Espiritu Sant rnabey ga naa Jerusalén, nan naa dien peraa nac ncuane gdzieelo naa ga; ²³ per nanpaa naa ible zgo zho naa ladzguib, ible sacci zho naa, sac guiedz ne gdziñta naa min co rnee Espiritu Sant teed naa. ²⁴ Lo guielxtseeb co no naa per rquiad zdoo naa xquielmban naa; miñe nziuuraa lo naa laga gdeeda diidz ib laa naa no gne lo miech pa lotaa rleynie Dios zho, zeena ine gley naa csiaal naa dziin ne bzo Jesús naa nu quiaayun naa. ²⁵ Rien naa lo grè to ne nac to zha ne bialseed naa gconan to zha nac xnèz Dios, gandraa to lo naa lo guidzliu rii. ²⁶⁻²⁷ Laa naa pseedle to grèse miñe nac Xtiidz Dios, ib peet pqueetsd naa lo to; gacxe waa, tel cho tib to nitlo, led xtoldraa naa ga. ²⁸ Golguien sca, jolquianap to, ni scagaa golquianap grè zha ne zo to lo! jGolwi ganle xnèz Dios no zho, haxta lo cruz gut Xpèed me bdiizh me xtol zho! Ni stiba, jib Espiritu Sant bzo to yquianap to zho zigne rquianap baxtor xpècwxiil zho!

²⁹ jNsin golso! Sac rienle naa zeene laa naa gbiche lo to, ib zrieequia grè zha ne guiaad guiaadquidie to, zguib zho zha gnitlo zho to zigne run grè coyot mëcwxiil. ³⁰ Haxta lad to, zrieequia bla zha ntseeb ne ctsèe Xtiidz Dios, squiil zho to tsienal to zhiwseed zho. ³¹ Gacxe waa laa naa rne lo to, jnsin golso! Golsoladz ganle tsonraa iz, dze guieel pseed naa to, blactaa biin naa pso naa diidz lo to tib tib to zaacse gac to. ³² Dios nac meñ ne gacniñ to, laa naa rsan to lадznia me grèse to; Xtiidz Ndzon me miñe rnee ganle zha nquialadztaa me to, lèew lozh quixbiini to dib zdoo to gnalo to me, zeena ygaa to zaatne gneedz me cuèz to grè to zha ne noraa xnèz me.

³³ Wlaltaa ib rzobladd naa dimi, ib rzobladd naa lar, guiep naa tebaa zha yquianie naa grè ncuana co. ³⁴ Len dze ne

blèz naa lo to, gon to ganle niapse nia naa bdziniia naa ncuane pquini naa, ncuane pquingaa grè zha ne bzènie naa. ³⁵ Ga blu naa lo to ganle, ib none dziuun ne dziin zeena grielo dziuun ne xyudar zha ne guiend pe yquini. Ib rianladz naa xtiidz Jesús meñ ne rnabey ne, zeene znu bnee me: “Mazdraa nroob guielbley ne rgaa zha ne rgad, lèdle zha ne rad.”

³⁶ Zeene blozh bnee Pabl lo zho, laa me pquitsgzhib ga grè me zho bzodiidznie zho Dios. ³⁷ Blozhse ga, tibga tibga zho wbig bnee zho lo me, bnaaz zho nia me, bdeedz zho me. ³⁸ Mban rac zho psilo zho roon zho, rsoladz zho rëb me gandraa zho lo me. Blozh ga, güey zho güeyzonèz zho me zaatne sèeb me barcw.

21

Biire güey Pabl Jerusalén

¹ Blozhse bzhieen no nia grè zha Efés co, laa no bziaab barcw, laa no zio bdziñ no ti lo guidzliu win ne no lo nisdoo co lè Cos. Biini liu brie no ga bdziñ no lo sti guidzliu win co lè Rodas. Rodas brie no bdziñ no guiedz Pátara. ² Guiedz Pátara, ga bziaab no ti barcw ne zie nëz xtan zha Fenicia. ³ Zeene zieded barcw co ngali zaatne rian guidzliu win ne lè Chipr; bui no nëz revés rlupaa guidzliu co. Laa no zio haxta bdziñ no guiedz Tir; xtan zha Siria, ga blèz barcw co biet grè yo ne neya.

⁴ Zigne bdziñ no ga bdzieet no barcw bziaab no lad guiedz co, biodziel no grè zha ne rliladz Jesús ga; bliazaque no lo zho ga ti zhmal. Dzigo psiaab Espiritu Sant guic zho rnee zho lo Pabl, tebaa siguiel me mazd tsied me Jerusalén.

⁵ Zeene laa no brie ga, grèse zha ne rliladz Jesús grè tsiel zho grè xpèed zho biaad-zonèz zho no ro nis co; dzigo lo yuzh co ga pquitsgzhib no grè no, bzodiidznie no Dios. ⁶ Blozhse bzhieen no nia zho, laa zho wbi ga.

⁷ Brie no Tir bdziñ no guiedz Tolemaid, ga bio no bioquiaabdiuzh no grè zha ne rliladz Jesús ga, bliiaz no lo zho tib dze. ⁸ Biini liu brie no ga bdziñ no guiedz Cesarea, ga biobiaaz no lidz ti meñ ne noneeque Xtiidz Dios lo miech, lè Lip. Lè Lip co ga gogza sxoops zha ne bzo been xyudar zha poxtl. ⁹ Quianie me tap ndzoop ne gard ctsieelnia, gzase zho bdeed Dios guielbiini lo zho rnee zho tel pe nac miñe racladz Dios gacnan miech.

¹⁰ Nzianle dze goc no no lidz Lip, zeene blanso ti meñ ne ziaad nëz Judé lè Agab, biadquiaabdiuzh me no. (Ye me rnee tel pe nac miñe racladz Dios gacnan miech.) ¹¹ Zigne blanso me lo no ga, bzheñ me lar ne rbe len Pabl, pxidoo mew nia me ni pxidoo mew ni me, nè me:

—Znu gon rnee Espiritu Sant gzobdoos zha Israel bizhuan lar rii, co zho me ladhnia zha Roma zeene laa me gdziñ Jerusalén.

¹² Grè zha ne riladz Jesús ga, zeene bin zho sca rëb men co, rnab zho lo Pabl tsied me Jerusalén, yeque no sca rnee lo me. Mban rac no rdzioon no. ¹³ Pquiabaque me nē me lo no:

—¿Pe nac dzigo roon to? Teñ naa laa naa bleeladzle naa maase gzobdoos zho naa Jerusalén, niicxe haxta gut zho naa waa porne rleynie naa Jesús. ¡Loxaque rsiaab guieñe to naa i gon squi rac to!

¹⁴ Bdzianse no nlid yquiaadiag me xtiidz no, dzigo mazd psaan no, rdzieets no:

—Golgotasa csaan ne, Diostaa nan dien zha gaca.

¹⁵ Bdedse ga bzhixcuua no laa no brieeg ga, laa no zio nēz Jerusalén; ¹⁶ blalaa zha ne riladz Jesús Cesarea ga bzēnal zhits no, bzēnie zho ti men Chipr lē Mnasón. Izle riladz me Jesús, lidz me biobiaaz no zeene bdziñ no Jerusalén.

¹⁷ Grè zha ne riladz Jesús Jerusalén, rley zho zeene gon zho laa no bdziñ, blēzlo zho no.

¹⁸ Biini liu co güeynie Pabl no lidz Jacob bioquiaabdiuzh no me, lēētaque laa grè zha rnabey ne zo lo grè zha ne riladz Jesús Jerusalén ga, ndxie ga. ¹⁹ Blozhse pquiaabdiuzh Pabl grè zha co, dzigo psilo me bzodiidz me lo zho grēse zha gocniēn Dios me güeyseed me grè miech stib guiedz. ²⁰ Zeene bin zhow per nli rley zho, rdeed zho xquizh lo Dios; dzigo rēbchaa zho lo me:

—Bets, ye zha Israel gon ndaloo zho zililadz Jesús; per racladz zho tibaque tsienal zho miñe rnabey Xley Moisés. ²¹ Grè zha ne no nu bin zho laa luu güeyseed grè men wladz ne no guiedz zit, nac diidz blu luu lo zho tsienaldraa zho Xley Moisés, codraa zho xpēēd zho bey, niicle tsienaldraa zho grè zhiwseed xmeñgol ne. ²² ¿Zha ganle dziuun ne? Sac zeene gon zho laa luu blanso, ible ziaadguib zho luu. ²³ No tap bets ne nu ziaadyoble gun zho miñe bnee zho lo Dios; mine gaca güey ²⁴ güeynie zho yadoo, golgun grè miñe rnabey ley, bdiizh ctsiib guic to gza to; zeena ga gan grè zha rii ganle nlid grè miñe rnee miech luu ga.

²⁵ Sangue grè miech stib guiedz zha ne riladz Jesús, laa no pxeelle diidz lo zho zigne bzodiidz ne nu: grè ma ne rut miech rgoon zho lo zhimdio zho, gowd zho bëel co; grè ma ne rxieed ren zeene ret ma, gowd zho ma; ni niicle grēgaa ma ne gut zho, ib gowd zho xchen ma; grè zha bgui, nodne tsonie zho wnaa ne nacd tsiel zho; niicle wnaagaaw, nodne tsonie zho mgui ne nacd tsiel zho.

Bnaaz zho Pabl

²⁶ Laa Pabl zienie gza zha co. Biini liu güey me gza me zho güeygun zho miñe rnabey ley; blozh ga güey zho yadoo güeynie zho diidz pa dze gza miñe quiayun zho ga, zeena gal dze co laa zho tsienie gon ne gdeed zho tib tib zho. ²⁷ Laa zeene merle gza gadz ngbidz ne quiayun me miñe rnabey ley ga gza me zha co, lega naclew gon bla zha Israel ne ziaad nēz Asia laa me no len yadoo. Nacne wbig zho ²⁸ bzheñ zho zhicw me, roptsie zho rnee zho:

—¡Grēse to men guiedz! ¡Golgun xyudar no gnaaz ne men rii! Sac lēe me ga quianzē quiaaseed me zha wladz glēēnie zho ladh zho, rnee me lo zho gundraa zho grè miñe rnabey ley, gapdraa zho respet yadoo rii; haxta grè zha zit zizēēbnie me nu. ¡Noguitniele me lugar nda rii!

²⁹ Sca rnee zho, sac gon zho Pabl len guiedz Jerusalén ga ziegrop me ti zha Efés lē Trófimo, dzigo rzac zho güeynie me zha co len yadoo.

³⁰ Pe ga bin grè menguietz, grēse zho bdziñ wbigbe zho lo Pabl bdoobniu zho me blee zho me len yadoo, zigne blee zho me ga lēēléd psioog zho ro yadoo; psilo zho noguin zho me, nan zho gut zho me.

³¹ Zeene gocnan men ne rnabey lo menguiib ne ndxie ga laa ruid co noyac, ³² lēēléd brieenie me grè xmenguiib me ni grēraa zha ne rnabey lo zho. Zeene gon grè zha ne noguin Pabl ga, laa grè menguiib co bdzin, dzigoraa blēz bdiñ zho me.

³³ Dzigo wbig men rnabey co, bnabey me grè zhaguib co bzoob zho Pabl chop caden. Bnabdiidz me lo grè miech co dien cho nac Pabl, pe quiayun me ne scataa rlēēnie zho me. ³⁴ Psilo zho nguiedz roptsie zho, zhaase zhaase ucaane rcaadzdoñ zho me. Gonse men rnabey co rlud dien pepaa rlisqui zho, nacne bnabey me grè menguiib co ziesan zho Pabl yu ne rbēzpaaz zho.

³⁵ Laa grè menguiib co csilo soquianie Pabl lo scaler ne rdziñ ro yu co, gataa mazd bzoobyān zho me, sac ntseeb rac grè miech co; ³⁶ nalbe zho, roptsie zho rnee zho:

—¡Golnitlogazh men qui! ¡Niinagazh golgut me!

³⁷ Laa grè menguiib co csēēble me len yu co, zeene bnee me lo men rnabey co, rëb me:

—¿Pe zrieelo gne naa ti xtidz naa lo luu?

Dzigo rëb men rnabey co:

—¿Mod rac luu rnee luu xtiidz zha Gres?

³⁸ ¿Led luud ga dzigo nac ti zha Egipt ne psilo racntseeb lo gobiern len dze rii? Nac diidz, tap mil zha ntseeb nacie zho, laa zho ziese nēz dan.

³⁹ —Led naada —rëb Pabl— men Israel nac naa. Guiedz Tars gol naa, lēe guiedz co nac miñe nroobraa lo grè guiedz ne ngab Cilis. Na laa naa rnab lo luu, been guieñzaac

bneedz diidz gne naa chop lan xtidz naa lo grê miech qui.

⁴⁰ —Zaca —rêb meṇ co.

Lo scaler co zo Pabl blunia me lo grê miech co cuedze zho. Zeene laa zho biacdze, dzigo psilo me bnee me xtiitsê me grê me zho, rêb me:

22

¹ —Grêse to meṇ wladz, laa naa rzaac to zig ti bets naa zig pxozgaa naa, goḷquiaadiag mine gne naa nu ganle zeena gacnaṇ to quiauynd naa miṇe rquiaqui to naa.

² Zeene gon zho xtidz zho rnee me, grêse zho dzese bre zho; dzigo rêb me:

³ —Meṇ Israel nac naa, guiedz Tars xtan Cilis ga gol naa, per Jerusalén nu broob naa, nu bio naa wseed, maistr Gamaliel goc meṇ ne pseed naa. Pseed me naa grêse zigne naa xley xmeṅol ne, grêse zigne nac zhiwseed zho; pseed me naa tibaque noxco naa runṇon naa lê Dios zigne noxcoque tow. ⁴ Miṇe been to nu nadze, ye naa blactaa squi beṇ naa ptsidil naa grê zha ne rliladz Jesús, pquiaanaḷ naa yгаа zho guet zho; mgui wnaasaque razobdoo naa zho lidz zho rasan naa zho ladzguuib. ⁵ Meṇ ne nac pxoz nroob ni grê meṅol ne goc wxtis guiedz rii leṇ iz co, zha co nanpaa ganle nli sca ben naa; sac zha bneedz ti xtiidz zho bi naa ndziṇnie naa lo zha ne rnabey xyadoo grê meṇ wladz ne no Damasc, zeena niacnie zho naa nianaz naa grêraa zha ne no ga rliladz Jesús, nialnie naa zho Jerusalén nu nded zho caxtigw.

⁶ Min copaa nagon brie naa nu za naa nêz co. Zhile gdziṇ naa Damasc, zig rwe ngbidza tibaque zeene ziaad ti biinidoo nêz zhan gbaa biab lo naa. ⁷ Biabgazh naa liu, ga nix naa bin naa ti tsi meṇ co rnee me lo naa: “Saul, Saul, ¿pe nacne quianaḷ luu naa?” ⁸ “¿Been guieḷnzaac bnê dien cho luu!”, rep naa. Dzigo nê meṇ co lo naa: “Naa nac Jesús meṇ Nazaret ne squi quiatsidil luu.”

⁹ Grê zha ne zanie naa ga, bdzieb zho gon zho biini co, per biend zho pe rnee meṇ co lo naa. ¹⁰ Dzigo rep naa lo me: “Bzhiguiel bnê dien, ¿pe racladz luu gun naa niina?” Nêchaa me: “Guche i, güey Damasc ga gnê zho ganle pe nac miṇe no gun luu.”

¹¹ Dzigo bzheṇ zha ne zanie naa ga nia naa, bdziṇnie zho naa Damasc; sac lo biinidoo co pcow lo naa. ¹² Ga no ti mgui lê Ananí, zêêb diidz rioxco me grê miṇe rnabey ley, grêse meṇ wladz ne no ga nanpaa zho ti meṇ wen nac me; ¹³ dzigo biaad me zaatne blêz naa ga, nê me lo naa: “Saul, niinagazh gon bets laa luu gbiire gwi stib.” Zigne sca bnee me laa lo naa biac, gongazh naa me. ¹⁴ Dzigo nêchaa me lo naa: “Dios meṇ ne bliladz grê pxozgol ne, ib meṇ co bzooblo luo gacnaṇ luo pe nac miṇe racladz

me gac, me bzooblo luo gunbey luo meṇ ne nacle diidz ga cxeel me lo guidzliu, ni gon luo tsi meṇ co. ¹⁵ Ib laa me bzo luo tsienee luo lo miech mine bzhaac luo ga, miṇe bin luo ga. ¹⁶ Guso i sca, zeena chobnigazh luo. Dib zdoo luo bredz Jesús, nbnab lo me csaṇmbe me luo lo xtoḷ luo.”

¹⁷ Zeene laa naa blanso Jerusalén nu, tib dze lëêtaque no naa yadoo nozodiidznie naa Dios, ¹⁸ tibaque blulo me lo naa nê me: “Na zeena biobladz brieer Jerusalén nu, sac ib gliladzd grê miech rii miṇe gnee luo zeene gnee luo xtidz naa lo zho.” ¹⁹ “Per runbey zho naa waa”, rep naa lo me, “nanpaa zho scataa ra naa grê yadoo raxizhoo naa grê miech ne rliladz luo, rnabey naa rguin zho zho ni rio zho ladzguuib, ²⁰ niicle zeene beet zho Xteb meṇ ne bnee xtiidz luo ga, ye naa bded diidz beet zho me, haxta pquiaanaap naa xab grê zha ne bdeedquie me.” ²¹ Dzigo nê me lo naa: “Na zeena pcaaniob nêz brieer nu, sac gon laa naa cxel luo stib dan tsienee luo xtidz naa lo grê menzit.”

²² Zeene bin zho sca rêb me bdeetraa zho diidz nee me, psilo zho nguiedz roptsie rnee zho:

—¡Ib rieguiel draa gban meṇ qui! ¡Goḷnitlogazh me!

²³ Nguiedz zêêb tsi zho, ib rioogd ro zho, masaque rdzib zho xab zho ni rchoon zho yudie laglaa.

²⁴ Dzigo psêeb meṇ rnabey co Pabl leṇ yu co, ni rnabey me grê menguiib co quin zho Pabl, zeena cueero Pabl dien pe nac ncuaaṇe been Pabl, zha nac ne scataa rac grê miech co lo Pabl. ²⁵ Laa zho blozhle pxidoo me, laa zho csilo quin me, zeene rêb me lo sti zha ne rnabey lo grê zhaguiib co:

—¿Pe nonguiela dzigo ne lega quin to ti zha Roma, ni gardle gag guiel wxtis dien pe nlipaa no xfalt zho?

²⁶ Zeene bin zha co sca rêb Pabl, lëêlêd güeynie zho diidz lo meṇ ne rnabey zho ga, rêb zho:

—¿Zha gon gun luo? Sac zha Roma me nac mgui co.

²⁷ Dzigo güey meṇ rnabey co rêb me lo Pabl:

—Bneeli lo naa, ¿dien pe nli na meṇ Roma nac luo?

—Nliw —rêb Pabl—, zha Roma nac naa.

²⁸ Rzedz yaṇ meṇ rnabey co rêb me:

—¡Naasi zha Roma nac naa, ni nroob dimi bdizh naa bgab naa lo zha Roma!

Dzigo rêbchaa Pabl:

—Sangue naa, desde gol naa bgab naa lo zha Roma.

²⁹ Grê zhaguiib ne bzo nguin Pabl ga parne cueero me, lëêlêd wbiche zho lo me, niicle meṇ rnabey cow bdzieb me zeene gon me nli zha Roma nac Pabl, sac nrooble nac

falt ne niuñ me ga lega nabey me nguñ zho ti zha Roma.

Bnee Pabl lo wxtis Israel

³⁰ Zeene biini liu, bnabey meñ rnabey co pcaalsa grë zhipxoz non zha Israel ni grë meñ ne nac zhiwxtis zho, sac racladz me gacnañ me dien pepaa nac ncuaañe rquiaqui rlëënie grë miech co Pabl. Dzigo pxadz me Pabl, blee me Pabl bzo me Pabl lo zho.

23

¹ Dze bui Pabl lo grë zha wxtis co, dzigo psilo Pabl bnee me rëb me lo zho:

—Laa naa rneli lo to nu ganle, mbe zdoo naa, Dios zobwi ganle zanañd naa ncuaañe rdziguiend me.

² Zeene gon Ananí (meñ ne nac pxoz nroob) sca rëb Pabl, bnabey me zha ne zo gax lo Pabl, rëb me:

—¡Golcap ro zha qui!

³ Dzigo rëbchaa Pabl lo me:

—¡Tebaa squique cap Dios ro luu! ¡Nac luu gon zig ti lidz nguts loxaque nëz zhtissew stib rna! ¡Pa rquiin ne laa luu zob i? Led luu zo par cobey luu tel no pa ti ley ne zguits naa, na lel luule noguiitsa bnabey luu bñin zho naa.

⁴⁻⁵ Pquiabbe zha ne ndxie ga rëb zho:

—¡Bieñ ganle lo pxoz nroob i, lo meñ ne quiayun xtsiin Dios i noquiabro luu!

—Golgun dispensar —rëb Pabl—. Nand naa lëe pxoz nroob i, tel niaca miñe nan naa ne scad naa; sac zhoobnee lo Xtiidz Dios: “Gneenëd luu zha ne rnabey ladz luu.”

⁶ Zeene bieñ Pabl grol zha wxtis co zianañ zhiwseed zha saduce, zgroñ zho zianañ zhiwseed zha farisé, dzigo psilo me nguiedz bnee me rëb me lo zho:

—¡Grëse to bets, golgona ganle, zha farisé nac naa, niiclegaa pxoz naaw farisé goc me! ¡Ni porne riladzpaa naa gon zriebean zha ne ret, miñ co gane znu zo naa lo to nu!

⁷ Zeene sca rëb Pabl, psilo zho bdildiidz zho. Goc zho chop dii, ⁸ rriee zha saduce rnee nliid griebean zha ne ret, nliid no anjl, nliid no espíritu; laa zha fariséga na rnee zriebean miech, no anjl ni no espíritu. ⁹ Nguiedz zëeb tsi zho noneelsa zho, dzigo gusoque bla maistr ley ne nacgrë zha farisé, rëb zho:

—Laa ne bdzianle ganle, ¡ni ti falt rapd mgui qui! ¿Pe nadien dziuun ne? Nend ti espíritu ga, ti xanjlgaa Dios ga sca bnee lo me.

¹⁰ Zeene gon meñ ne rnabey lo menguiib ga, laa lo xtil zho noyac nroobraa, bdzieb me rëb me nend znuse gzhiizh zho Pabl; bnabeyaque me gocredz menguiib güeyxi zho Pabl biire güeyan zho me len yu ne rbëz zho ga.

¹¹ Gol guieel co, blulo Dios lo Pabl rëb me:

—Gdziebd luu, zigne bnee luu xtidz naa lo miech Jerusalén nu, scaque none tsienee luuw lo grë zha ne no Roma.

Gocladz zho niut zho Pabl

¹²⁻¹³ Zeene biini liu, ndziibsráa choo zha Israel bnediidz rëb zho gowd zho, ni tib ro peet guied zho haxta gut zho Pabl; telne gund zho miñe rnee zho maase csiaabzi Dios zho. ¹⁴ Dzigo güey zho lo pxoz ne rnabey, lo grë zha ne nac zha non lo menguiedz, bzodiidz zho miñe no guic zho ga, ni rëb zho:

¹⁵ —Nana gon, golnab lo meñ ne rnabey lo menguiib cxeel me Pabl lo to gzhe, golquiaalo noraa pe lozh yquiep to Pabl; laa no nsinle zioambiaaz. Zeene laa zho tednie Pabl, ga dziuut no Pabl.

¹⁶ Dieen zha bin ti xingan bzian Pabla, nacne lééléd güey win yu ne rbëz menguiib ga güeynie win diidz lo Pabl. ¹⁷ Dzigo bredz Pabl ti zha ne rnabey lo menguiib co, rëb Pabl lo zho:

—Bzhiguiel güeynie mëed rii lo meñ ne rnabey to, sac laa win no tsienie ti diidz lo me.

¹⁸ Bzhen meñ rnabey co nia mëed co, güeynie me win lo meñ nroob ne rnabey zho, rëb me:

—Laa naa zialnie mëed rii nu me, dien pe nac diidz ne ziaadnie win lo luu; Pabl ne no ladzguib ga bnab lo naa guialnie naa win.

¹⁹ Dzigo bzhen meñ rnabey co nia win, güeynie me win stib nëz, bnabdiidz me lo win dien pe nac diidz ne zienie win lo me. ²⁰ Dzigo rëbchaa win:

—Laa zha Israel gon bnediidz gnab zho cxeel luu pxey naa Pabl lo zhiwxtis zho gzhe, yquiaalo zho gnë zho noraa pe yquiep zho me. ²¹ Bzhiguiel giladzd luu xtiidz zho, sac ndziibsráa choo zha ne nacgrë zho rëb zho laa zho tsiesoblan nëz gutgazh zho me zeene laa me ted. Biaan zho diidz grë zho, gowd zho, ni tib ro peet guied zho haxta gut zho me; haxta rëb zho tel laa zho gund miñ co maase gdzibdee Dios zho. Ible zun zhow, loxaque quiambëzse zho dien pe guiab luu.

²² Blozhse ga dzigo bzonëz me win, ni pso me diidz lo win choot lo gneed win ne laa win güeynie diidz lo me.

Güey Pabl lo gobernador Wech

²³ Lééléd bredz meñ rnabey co chop zha ne zo lo menguiib, rëb me:

—Laa zhaguiib gon none griee naguiieel tsie zho Cesarea, na zeen golzo zha ne tsie; none tsie chop gayoo zha ne sëni, tsongal tsii zha ne sob guay, schop gayoo zha ne güey lanz. Naguiieelgazh, zig rlozh xtsee none griee zho nu; ²⁴ sac laa zho none tsiesan Pabl Cesarea. Ni golcoxab ti guay ne sob Pabl, sac none ndip ndaan me gdziinne to me lo gobernador Wech Cesarea.

²⁵⁻²⁶ Dzigo pquiaa me ti guits ne güey zho gdziñnie zho lo gobernador, rnew: “iDiuzh Gobernador Wech!

’Naa nac Claud Lisias, laa naa rxel guits rii lo luu zgoziidz naa ganle zha nacne bnabey naa ziaadsan zho men qui zaatne zob luu i.

²⁷ Zha Israel bnaaz me gocladz zho niut zho me, laa zeene gocnan naa zha Roma nac me nacne pxeelaque naa zhaguiib güeyla me lo zho. ²⁸ Gocladz naa niacnan naa dien zha nacne rlëenie zho me, dzigo bianie naa me lo zhiwxtis zho. ²⁹ Ga gon naa led ncuaañe rnad rlëenie zho me; tel zha nac xley zho ncuaañe co rlisqui zho; nacda ncuaañe guiab ne rieguial guet me, tsogyugaa me ladzguiib. ³⁰ Zeene gocnan naa laa palal zho bnediidz gut zho me, nacne bnabeya que naa ziaadsan grë menguiib qui me lo luu i. Niiclegaa zha ne rlëenie mew, laa naa rep lo zho guiaad zho lo luu i, zeena i gnë zho dien zha nacne rlëenie zho me.

’Lëed bii gdzieel ne sca dien.’

³¹ Zeene laa liu pcow, zig rlozh xtseew laa grë menguiib co pcaanie Pabl nëz; dib guieel bio zho nëz bdziñnie zho me guiedz Antipatris. ³² Biini liu, loxaque zha ne zob guay ga pcaa nëz zienie zho me Cesarea, laa grëraa menguiib co wbire bdzin Jerusalén stib.

³³ Zeene bdzin zho Cesarea, bdeed zho guits ne zienie zho ga lo men ne nac gobernador, dzigo laa zho psan Pabl ga.

³⁴ Blozhse blab me lo guits co, dzigo bnabdiidz me lo Pabl dien pa guiedz gol Pabl. Dzigo rëbchaa Pabl lo me, zha Cilis nac Pabl.

³⁵ —Nasca —rëb me—, zeene laa zha ne rlëenie luo glanso nu, dzigo yquiaadiag naa dien zhapaa nac xtil to.

Dzigo bnabey me, pquianap menguiib Pabl zaatne nac len xyulow Herod.

24

Gocredz Pabl lo gobernador Wech

¹ Zeene goc gaay ngbidza, laa Ananí men ne rnabey lo pxoz bdzin ga, gza me blalaa zha ne nac zha non lo menguiiedz Israel, zienie zho ti licenciad lë Tértulo; grë zho laa zho zie zienie zho diidz lo gobernador pe nacne rdilnie zho Pabl.

² Dzigo bnabey gobernador gocredz Pabl. Zeene laa Pabl bdzin, psilo licenciad co bzeet me grë ncuaañe rquiaqui zho Pabl, rëb me:

—Xquizhdoo luo gon gobernador, ne squitaa ndzielguic luo rien luo zha gnabey luo, gane zaace mban menladz no niina, blactaa ncuaañe yquiiñ lo no noyun luo. ³ Rzac zdoo now, tel pa lotaa zo no rsoladz no luo nac luo men ne rnabey no. ⁴ Nli nonguiel da dziuñneed no luo, per been ti

guielnzaac pquiaadiag ganle pe nac ncuaañe rlisqui no quiaayun mgui ne zo lo ne nu.

⁵ Masaque nac me lo no zig nac ti guielguidz dox ne rded, grëse guiedz quianzë me noyungüet me menladz no gacndaan zho lo men ne rnabey no. Lëe me ga zo lo grë zha ne rnee zho nazaren. ⁶ Zeene bgaa me, lëetaque laa me no len yadoo ro ne zob Jerusalén quiaayunnguzee me xyadoo no. Nacne gocladz no gagazh nguizh me falt co zigne rnabey xley no; ⁷ per biaad Lisias grë xmenguiib me ntseeb rac zho biaadla zho me lo no. ⁸ Na nagon zac luuzhal yquiep me, zeena gan luo ganle nli quiaayun me grë mine rnee no nu.

⁹ Grë zha Israel ne zienal ga, pquiabbe zho rëb zho nli quiaayun me grë min co.

¹⁰ Dzigo blunia men ne nac gobernador ga lo Pabl gnee Pabl; nacne psilo Pabl bnee me rëb me:

—Nanle naa ziele iz zob luo nu rquiaadiag luo grë ncuaañe rac xtan no nu, gane rley naa zial naa lo luo par yquiaadiaggaa luo ganle zha nac xtidz naa.

¹¹ Na rac tsiipchop ngbidz ga bdzin naa Jerusalén, biagan naa Dios len yadoo nroob ne zob ga (niicle tel niaca mine griece didz ganle). ¹² Laa naa bia Jerusalén biagan naa Dios, choot biatilniend naa ga; niicle len grëragaa yadoo wina, ro nëzgaaw, wla-taa noquiild naa miech cho lo gacntseeb zho. ¹³ Grëse mine rquiaqui grë zha qui naa grieelod glu zho nliw, sac led ncuaañe goda.

¹⁴ Mine nac diidzli, niina wriin psan Dios ti Wseed Cub dien zha guiaanwen miech lo me, zha qui rzac led zhiwseete Diosa, sangue naa dib zdoo naa zanañ naaw, dib zdoo naa quiaayun naa dziin lo Dios men ne bliladz pxozgol no; ni scaquegaa, noxco naa grëse mine nac ley. Bliladz naa grëse mine bnee grë zha ne biadteed xtiidz me. ¹⁵ Rliladz naa zdzin dze ne cueeban Dios grëse miech, zigtaa zha wena zigtagaa zha ntseeba, ni haxta zha ye zho rliidaz min co.

¹⁶ Ni min copaa nagon gane tibaque noxco naa guiaanmbe zdoo naa, gunaldras naa xtol naa zigtaa lo Diosa zigtagaa lo samiech naaw.

¹⁷ Nod naa Jerusalén tibaque, blale iz goc no naa ladz menzit; dze ne bdzin naa Jerusalén ga, laa naa bia porne zasan ti gon lo menladz naa ni zanie naa ti gon ne gded naa lo Dios. ¹⁸ Min co nagon nacne no naa len yadoo zeene gon grë zha qui naa. Blozhle bep naa grë mine rnabey xley no rdziun no zeene sca riosan no gon, zeene laa bla zha Israel ne no nëz Asia blanso naa ga; per choot miech taf ndxienied naa ga, niicle choot noquiildgaa naa. ¹⁹ Zha co nagon rieguial niaad nu, nlisqui zho tel pe ncuaañe rzac zho nonguiel noyun naa

ga. ²⁰ Zha ne ndxieгаа nu niina, zac gnë zho telne brieequia falt ne rquiaqui zho naa zeene gocredz naa lo wxtis Jerusalén. ²¹ Te goon falt ga naye ben naa, lëë gdib nguiedz bne naa lo zho rep naa: “Laa naa racredz lo to, zig nac zeene falt ga rap naa loxaque ne rililadz naa dzin dze ne griebeban miech.” Scase nagon naca.

²² Nanle gobernador co led ncuane gund zha ne rililadz Jesús ga rquiaqui zho Pabl, dzigo bnee me lo zho cuëz zho nieeda gdzin Lisias, dzigo dien zhapaа guiaan xtil zho. ²³ Bnabey me zha ne zo lo menguiib yquianap zho Pabl, ni pso me diidz zaacse gac zho lo Pabl, gdeed zho diidz ted grë zha ne ndzieeldiidz Pabl tsiegan zho Pabl.

²⁴ Goc blalaa ngbidza, bnabey gobernador co gocredz Pabl lo me grop tsiel me Drusil, ti wnaa Israel. Laa me bredz Pabl, sac racladz me yquiaadiag me dien zha nac zhiwseed Jesús. ²⁵ Zeene bzeettaa Pabl, zha nac guielwxtis, zha none tsoxco miech gund zho mine riaabtaa guic zho, ni zha gdzin dze ne gun Dios guielwxtis, dzigotaa laa me bdzieb, rëbchaa me lo Pabl:

—iLëëlewga na nadien! Na zeene guioba, dzigo naazhal cuedz luu guiaad luu ziodiidz ne stib.

²⁶ Zhiga zhiga rbedz me Pabl, sac quiambëz me dien pe gdziibd Pabl dimi csilaa me Pabl.

²⁷ Zeene goc chop iz sca no Pabl ladzguuib ga, laa Wech briee guielgobrador, bzëëb ti men lë Pons Fest. Niicle briee Wech per psilaad me Pabl, sac racladz me dien zha guianznuuraa me lo grë zha Israel.

25

Güeyzo zho Pabl lo gobernador Fest

¹ Zeene goc tson ngbidz bdzin Fest Cesarea pcaania me guielgobrador, laa me briee güey me Jerusalén.

² Grë zha pxoz non ni grë zha ne rnabey lo menguiedz Israel, zeene bin zho laa Fest bdzin Jerusalén lëëled güey zho lo me güeyxob zho xdemand Pabl; ni ³ bnab zho lo me cxeel me Pabl Jerusalén. Laa zho rnab min co sac laa zho bnediidzle, nëz tsiesoblan zho, yquiambëz zho ted Pabl gut zho Pabl. ⁴⁻⁵ Per bdeete Fest diidz, rëb me laa Pabl nole ladzguuib ga, tel zha ne zrieelo tsie, ga glisqui zho tel pe nac falt ne rquiaqui zho Pabl; benque zlase dze laa me gbiire guey nëz co dzigo zac tsienal zho zhits me.

⁶ Ndziibsräa ti zhal blëz me Jerusalén ga, dzigo laa me biire zey Cesarea. Zna dze bdzin me biinigazh liu co güey me yulow, bnabey me gocredz Pabl. ⁷ Laa grë zha Israel ndxiele ga, wbig zho lo Pabl ndal grë falt nroob ne rcaadzdoj zho me, per loxaque

diidzsew, guienz zha glu zho ne nliapaа goca. ⁸ Dzigo pquiaб Pabl rëb Pabl:

—Grëtaa mine rquiaqui zho naa i, ni tiba nliid. Wlaltaa gard quits naa xley no, gard quitnie naa xyadoo no, niicle gardгаа gacntseeb naa lo zhiwxtis zha Roma.

⁹ —¿Pe racladzdгаа luu tsie luu Jerusalén? —rëb Fest—. Ga gbiire yquiaadiag naa xtil to i zeena glu dien chopaa rap dol.

Sca rëb me, sac racladz me dien zha guianziuu me lo grë zha Israel. ¹⁰ Dzigo rëbchaa Pabl:

—iGad naa! iNod pe nac ga naa ga, to riegual gun guielwxtis riil! Benque nan wen luu ganle peet falt nzëëbd naa lo zha Israel. ¹¹ Tel niaca mine nli ziyun naa pe guielntseeb ne ragual naa guet naa, maase guet naa. Per na nanpaa naa ni ti ncuane rquiaqui zho naa i nliid, ¿pe nac dzigo cho co naa ladznia zho gut zho naa? Laa naa racladz, mazd golneedz diidz tibaque ga naa lo zhiwxtis nroob ne, men ne zob Roma.

¹² Dzigo bzodiidz Fest grë me men rac ne nacie me dziin; blozhse ga rëbchaa me lo Pabl:

—Guiend rson sca. iTel lo César racladz luu tsie luu, na maase tsie luu!

Gocredz Pabl lo Agrip

¹³ Zeene goc bla zhmalä, laa rey Agrip grop wnaa ne lë Berenis bdzin Cesarea ga güeyziabdiuzh me Fest. ¹⁴ Nzianlaa ngbidz blëz me ga, dzigo bzodiidz Fest lo me laa Pabl sca no ladzguuib ga, rëb Fest:

—Len dze ne bii nac Wech dziin biab ti mgui ladzguuib nu, ¹⁵ laa len dze ne bia naa Jerusalén biaad grë zhipxoz non zha Israel, grë zha non ne rnabey lo zho, biaad-xob zho xdemand me lo naa ga, rnab zho lo naa gnabey naa guet me. ¹⁶ Dzigo rep naa lo zho led scad run zha Roma guielwxtis, ib none gacredz me gnee me chop lan xtiidz me lo grë zha ne rzoob xdemand me, ga glu telne nli mine rquiaqui zho me togo nliidgaaw; ¹⁷ nacne biaad zho nu. Zna dze blanso zho, biinigazh liu co bnabey naa gocredz me. ¹⁸ Tibaque ni naa bod no pe ti falt nroob ne rquiaqui zho me, per zeene biaad zho yulow gon naa ¹⁹ lëë gdib tel zha nac grë ncuane rililadz zho min co rlisqui zho, ni rlisqui zho pe nacne zienal me zhiwseed ti mgui lë Jesús, gutle men co ni laa me rnee mban me.

²⁰ Zeene gon naa grë ncuane co rquiaqui zho me nli riend naa zha gun naa, dzigo rep naa lo me, telne racladzgäa me zac tsie me Jerusalén ga dien zha guiaan lo xtil zho.

²¹ Per bnëd me, lel bnab me tsie me lo César; gane niina laa me bii no i, nieeda gne naa lo César dien pa hor grieelo cxej naa me nëz co.

²² Dzigo rëb rey Agrip:

—Racladz naa gon tebaa zha yquiaadiag naa dien zha nac xtiidz mgui co.

—Na zho ganle —rëb Fest—, gzhegazh gnabey naa gacredz me.

²³ Biini liu, ti lni nroob ne rac laa Agrip ni Berenis bdziñ len yu ne rac guielwxtis ga, grë zha non ne rñabey lo menguiib, grë zha non lo menguiiedz, nal zho zhits me. Dzigo bnabey Fest gocredz Pabl, zeene laa Pabl bdziñ ²⁴ laa Fest psilo bnee, rëb me:

—Niina ne laa luu ziaad nu rey Agrip, scagaa to ne nac to men ne ndxiegrë ne nu nadze, golwi ganle lëe men rii nagon rlëeniedox zha Israel, racladz zho guet me; zigtaa Jerusalëna zigtagaa nuw ziyaadnab zho lo naa gnabey naa guet me. ²⁵ Sangue naa gonle naa rapd me falt, par guiab ne rieguial guet me; per laa me bnab tsie me lo César, na laa naa no cxel me nëz co.

²⁶ 'Nli riend naa dien pe nac diidz ne cxel naa lo César, ne squi lega ncuane nlid rquiaiqui zho me. Min co nagon bnabey naa gocredz me lo to nu, ni laga laa luu ziaadga nu rey Agrip, bzhiguiel pquiaadiag ganle zha rzë xtiidz me; zeena togo zdziel naa pe nac diidz ne cxel naa gal dze ne laa me tsie nëz co. ²⁷ ¡Sac nonguield ga gun naa telne sobdoo me cxel naa me, ni tel cxeld naa diidz dien pe nac xfalt me!

26

Bnee Pabl lo Agrip

¹ Dzigo rëb rey Agrip lo Pabl, mezhal gnee dien zha naca. Nacne blis nia Pabl psilo Pabl bnee Pabl rëb Pabl:

² —Rley naa gon rey Agrip ne laa naa zial lo luu nadze, zeena gzodiidz naa lo luu gacnan luu ganle nlid grë ncuane rquiaiqui grë menladz naa naa. ³ Rley naa sac nan naa nappaa luu zha nac grë xcostumbr no, grë ncuane rliladz no. ¡Rnab naa lo luu sca, guieete luu yquiaadiag luu grë mine gne naa!

⁴ 'Grëse zha Israel nan wen zho ganle zha mban naa, sac mëedlas naa bdziñ naa Jerusalën, ga broob naa. ⁵ Nanpaa zho zha farisé goc naa, ni zha farisé nac zha ne rioxcoraa run grëse mine rliladz zha Israel. ⁶ Per mazd gon, laa zho rlëe lo naa porne dib zdo naa rliladz naa laa Dios beenle mine psan me diidz lo grë pxozgol no. ⁷ Grëse zha Israel, zigne ziaad zho lo gza tsiipchop dii ne psan xmengol no, grëse zho dze guieel bii quiambëz zho gac min co. ¡Masaque rzac zho dol ga quiaayun naa rliladz naa laaw gocle! ⁸ Haxta to, zeene rzet naa zrieeban miech, rzhidz to ron tow, ¡pe rzac to naa grieelod Dios gun me min co?

⁹ 'Glo nli ptsidil naa grë zha ne rliladz Jesús men Nazaret, masaque rzaac naa lëew ga quiaayun naa. ¹⁰ Pe zhidaa zha ne blo

naa ladzguuib Jerusalën, haxta grë pxoz non bneedz diidz ben naa grë min co; ni zeene rñabey zho ret grë zha co, ye naa rded diidz ret zho. ¹¹ Nzian grë yadoo win bia naa, biasacsi naa zho haxta gneenë zho Jesús. Blëeniedox naa zho, haxta grë guiedz zit bia naa biaguib naa zho.

¹² 'Min copaa nagon brie naa za naa guiedz Damasc, masaque grë pxoz rñabey bneedz ti xtiidz zho bi naa laa naa za. ¹³ Tel gan luu ganle rey Agrip zha bzhaac naa: Zig rwe ngbidza, tibaque zeene ziaad ti bi-inidoo nëz zhan gbaa biab lo naa, ni lo grë zha ne zanie naa ga, nroobraa nac biini co lo xbiini ngbidz. ¹⁴ Grëse no biab luu, dzigo bin naa ti tsi men co rnee me xtiidz no, bredz me naa në me: "Saul, Saul, ¡pe nacne quiana! luu naa? Lëeque luu gon nosacsi luu i, rzac luu zigne rzac ngon ne rcaanni, ni lëeque lo guuib lots ne rtseb zho ma riecaanni ma."

¹⁵ Dzigo rep naa: "Been guielnzaac bnë dien cho luu." Nëchaa men co: "Naa nac Jesús, men ne squi quaitsidil luu. ¹⁶ ¡Na zeena guche i, bzoli! Laa naa bredz luu zeena gun luu xtsin naa, tsiezodiidz luu lo miech mine blozh bzhaac luu nu, ni grëragaa mine naraa gan luu. ¹⁷ Peet tsienied guic luu, naa yquiaanaap luu, niicle zhaladz luuw niicle-gaa zha zita peet grieelod gun zho luu. Sac laa naa cxel luu grë guiedz zit ¹⁸ tsienee luu lo miech gacnan zho mine nacpaa diidzli, zeena greee zho lo ncow gbig zho nëz lo biini, greee zho ladznia mendox ygab zho lo Dios. Dib zdo zho gililaz zho naa zeena gun Dios zho pardon, ni ygab zho zaatne gdziñ grëse zha ne mbe zdo."

¹⁹ 'Min co nagon rey Agrip nacne bioxco naa ben naa mine në men co lo naa ga. ²⁰ Glose Damasc psilo naa bne naa lo miech, ga brie naa bdziñ naa Jerusalën, bia naa dib Judë ni grë guiedz zit, bne naa lo miech csaan zho grë xquie!ntseeb zho gbig zho lo Dios.

²¹ 'Min co nagon nacne rlëenie zha Israel naa, biadnaaz zho naa len yadoo ro ne zob Jerusalën, gocladz zho niutgazh zho naa. ²² Gocniën Dios naa, gane laa naa bii zo nu quiane naa Xtiidz me zigtaa lo grë zha wina zigtagaa lo grë zha nona. Noseete naa miech stib wseed, sinque laa naa rne mine bzeetaque Moisés ni grëragaa zha ne biadteed xtiidz Dios padzeela. ²³ Tel zha, bzeete zho ib sacsi miech men ne cxel Dios ga, ni me gac men ne glopaa grieeban, me gac zig ti biini ne gziimi lo grëse miech, zigtaa zha Israela zigtagaa grë menzita.

²⁴ Tibaque nguiedz bnee Fest rëb me lo Pabl:

—¡Bod rzhinle guic luu gon Pabl! ¡Ne tibaque nagon rio luu wseed gane squi riots xtiidz luu!

²⁵ —Coo, gobernador Fest —rëb Pabl—, led rzhind guic naa. Niapse mine nac diidzli min co none naa, ²⁶ laa rey Agrip zob i, me nan ganle nli grë mine rne naa nu. Tibliladz naa none naaw lo me, sac nanpaa naa nan me nli mine rnee naa, nacda ncuaañe goc ngueets zhliiaan. ²⁷ ¿Led nli lëë rey Agrip rililadz luu mine bzeet grë zha ne biadteed xtiidz Dios padzeela? Nanpaa naa rililadz luuw.

²⁸ Pquiab rey Agrip, rëb me lo Pabl:

—iZlalaque nu gon laa luu cole guic naa ye naa sëëb xnëz Jesús!

²⁹ Dzigo rëbchaa Pabl:

—iNend zhilew o nroobraaaw, per rnab naa lo Dios led loxaque luudse sëëb xnëz me, sinque ye grëraa zha ne noquiaadiag mine none naa nu niina; zeena yгаа to mine bgaa naa nu, per led znud sob caden rii nia to!

³⁰ Gataa laa Agrip guso, gusoque Fest, gusoque Berenis ni grëraa zha ne zobnie zho, laa zho brieë ga. ³¹ Grëse zho rnee peet xtold Pabl, rapd me falt ne guiab ne rieguial guet me, rieguialgaa tso me ladzguuib.

³² —Niacpaa nsilaa ne me —rnee Agrip lo Fest—, telne nabd me tsieppaa me lo César.

27

Pxeel zho Pabl nëz Roma

¹ Bdziñ dzew, laa Fest bnabey tsie Pabl nëz Roma, dzigo laa zho psañ Pabl ladznia ti men ne rnabey lo men guuib lë Jul, gza Pabl zalaa zha ne no ladzguuib ga. Lëë Jul co rnabey lo tib dii men guuib ne rnee zho “Augusto César”.

² Ye no zional zhits Pabl grop no Aristarco, laa no bziaab ti xbarcw zha Adramit zie grë guiedz ne ndxie ro nis nëz Asia, laa no pcaa nëz laa no zio.

³ Biini liu co laa no bdziñ guiedz Sidón. Zeene bdziñ no ga, wen goc Jul lo Pabl bdeed me diidz güey Pabl güey quiaabdiuzh Pabl grë zha ne runbey Pabl ga, grëse zho rleynie zho me blëzlo zho me.

⁴ Ga brieë no bdieed no tib ro guidzliu win ne lë Chipr, psaac guidzliu co palal, sac psilo rrieë me rtsire me barcw ne zio no ga. ⁵ Laa no zio, bdieed no gax ro guidzliu ne nac xtan zha Cilis ni xtan zha Panfil, bdziñ no ti guiedz ne ndxie xtan Licia lë Mira; ⁶ ga bdzieet no barcw ne zio no ga. Lëëtaaque noguib Jul sti barcw ne guio no, laa ti xbarcw zha Alejandri no greeë ga tsie nëz Italia, dzigo bziaab no barcw co laa no zio stib.

⁷ Tsow ga zie barcw co, nzian dze goca, nen dzigoraab bdziñ no gax guiedz Gnid; ib rbëzdaque me, nacne bguib zho dien pa nëz zhi rcaañ me, dzigo güeynie zho barcw co nëz Cret. Tib ro guidzliu win co zio no bdieed no Salmon; ⁸ nen bdziñ no zaatne

rnee zho Buenos Puertos, gaxle ga riaan ti guiedz lë Lasé. ⁹ Nrooble dze goc no no lo nis, len dze co laa mëë nal psilole ni zëëb diidz gacd së barcw len mëë co, nacne bnee Pabl lo grë zha ne zienie no ga, ¹⁰ rëb me lo zho:

—Golgona ganle, telne laa ne greeë nu len dze rii, rgobey naa ib znitlonie ne barcw rii lo nis.

¹¹ Laa ne niacnie Jul Pabl niac mine rëb Pabl ga, lel mazdraa bliladz me xtiidz zha ne rsëë barcw ni men ne nac bizhuana. ¹² Stiba, zaatne nac Buenos Puertos ga rapda zaatne zaacse cuëz miech len mëë nal, nacne nzian zho rëb mazd gdziñ guiedz Fenice, ga zac gbiaaz no gdipse len mëë nal. Ro guidzliu win co riaan Fenice, nligaa zhi rcaan me ga.

¹³ Zeene laa ti me win ne znu ziaadquia psilo brieë lo nis co, zootle na nli griedraa me. Nacne lëëled bnabey zho bziaab no barcw, blisglaa zho lar nroob ne rcaan me rzëw, laa no zio, gax gax ro guidzliu co zienie zhow. ¹⁴ Zhisaque goca zeene laa ti me dox ne rnee zho Nordest psilo brieë, laa me co psilo rtsire barcw. ¹⁵ Niicle racladz zho tsienie zhow nëz ne no guio no ga, per rsaand me; gonse zho led ncuaañe gacda, mazd psaan zho zienie mew nëz ne racladztaa me.

¹⁶ Scale zienie me barcw ne no no ga, biotieed no gax ro guidzliu win ne lë Claudia, ga në në brieëlo blis zho grë canó win ne nal zhits barcw ga bzëëba nëz len barcw; ¹⁷ dzigo blibdoo zho barcw co zeena gbilda, ni blit zho lar nroob ne rcaan me rzëw, sac rdzieb zho rëb zho telne scaquia lar co nend tsieniezhoo mew nëz ro nis, pa tsiesobnagwa lo yuzh.

¹⁸ Zeene biini sti liu co mazdraa rrieë me, ni guixoo ne ziaadnie me, nacne blee zho grë yo ne no len barcw blaal zhow lo nis. ¹⁹ Goc bioñ ngbidz scataa zo guie dox co, bnabeyaque zho blee no grëse ncuaañe runxtsiñ zho len barcw blaal now lo nis.

²⁰ Goc bla ngbidza rbëzdaque guie dox co, rludraa lo mel per ni lo ngbidz rludraa, dzigotaa rdzieets no nliudraa griequiaa no. ²¹ Niicle wagw choot rsoladzdraa, dzigo bnee Pabl lo grë zha ne ziogrë no ga, rëb me:

—Tebaa nion to xtidz naa nagon nzhiguiel to nrieed ne Cret, zeena ndzieelod ne grë ncuaañe nodzian ne nu, niicle nlaaldgaa ne grë yo co lo nis. ²² Per laa ne znule bzhiac zha dziiunraa ne. iGdziebde to! iPeet gacd ne! Niicle nitlo barcw rii, per choot peet gacd. ²³ Led nanle to ganle, xnëz Dios no naa ni xtsiñ me noyün naa, nieewdze pxeel me ti xanjl me ²⁴ në lo naa: “Gdziebd luu gon Pabl, peet gacd luu, sac ib none laa luu gdziñ lo rey ne zob Roma. Niicle grë zha ne ziadgrëë luu len barcw i peet gacd zho, sac bin me mine rnab luu.” ²⁵ Gane rne naa lo to peet

tsienied guic to, nanle naa csaand Dios ne, ible zac mine në anjl co lo naa. ²⁶ Ib tedsod, no pa ti lo guidzliu win ne no lo nis rii tsiezo me rii ne.

²⁷ Zeene goc tsiida ngbidz sca nëzrii nëzrec zienie me no, laa no no lo Nisdoo Adriatico. Wdze co, zig groļ guieela, bien grē zha ne rsēē barcw ga gaxle ti ro guidzliu ga nonie barcw no; ²⁸ dzigo ptiix zho dieņ palal quiet nis ga, gon zho loxaque gal yas guieta. Bzē zho spalal biire ptiix zhow stib, gale guieta loxaque tsiiptib yas. ²⁹ Gataa laa zho bdzieb rēb zho nend pa tsiecaan barcw lo quie, dzigo psilēē zho lo doo ne zob gza tap guiib cruz nroob ne quia nēz zhits barcw, bron zho gza guiib co lo nis, zeena tsowga sē barcw; rzac zho tebaa laa liu biinile.

³⁰ Grē zha ne ruņ dziin leņ barcw, gocladz zho nzhoon zho, psilo zho noxadz zho grē canó win ne ney barcw, rquiaalo zho zig nac zeene guiib cruz nroob ne ney barcw nēz quiaw quialit zho csēēb zho leņ nis. ³¹ Zeene gon Pabla, rēbchaa me lo Jul ni lo grē xmenguib Jul:

—iLaa grē zha rii gon racladz xoon! Csaande to, sac telne laa zho xoon nliidraa grieequia to lo nis rii.

³² Dzigo pchug grē menguib co doo ne zob grē canó win co, bron zhow lo nis.

³³⁻³⁴ Silgaw, bii ncow r naw laa Pabl bnee lo zho gow zho, rēb Pabl:

—iNone gow to! Golwi ganle nale gac tsiin ngbidz ga ni ti lē peet gard gow to, ni squique raguiesde to zaacse. Peet tsienied guic to, ni tib to peet gacd.

³⁵ Blozhse sca bnee Pabl lo zho, bzheņ Pabl ti quietxtil, squi ndxie zho grē zho bdeed me xquizh lo Dios, dzigo beengroļ me quietxtil co laa me psilo wagw. ³⁶ Dzigoraa peet güeyniedraa guic zho, ye zho laa zho psilo dow. ³⁷ Lo grē no zig zio no leņ barcw co rgaa no chop gayoo tsongaltsiimtib.

³⁸ Blozhse bdiow no, dzigo laa zho blee grē zhoxtil ne zie leņ barcw ga blaal zhow lo nis, zeena gnitnē barcw spalal. ³⁹ Zeene laa liu blozh biini, gon grē zha ne rsēē barcw ga laa ti lē ro guidzliu rlu gax ga, per riend zho dieņ paw. Natlaa nac ro guidzliu co, rlu zac gdziņ barcwa, nacne rēb zho dieņ pe grieelod gdzinie zho barcw ga. ⁴⁰ Dzigo pchug zho doo ne zob guiib cruz nroob ne no leņ nis ga, biaanse guiib co ga. Psilēē zho doo ne naaz yag nlag ne rchug nis rzē barcw, ni blisglaa zho lar nroob ne rcaan me rzēw; zeena csēē mew gdziņa gax ro guidzliu co.

⁴¹ Per ziese zho, lēētse lo yuzh ne zobli len nis co güeytsiba, loxaque güeysēēbguica ga laa nēz zhitsa psilo nobilaque, sac grēse nis ne rias riecaan choo co. ⁴² Dzigotaa laa grē menguib co gocladz niut grē zha ne zie ga gueyladzguib, rēb zho nend znuse xobnis

zho xoon zho. ⁴³ Per bdeete meņ ne rnabey lo zho diidz, sac racladz me gut zho Pabl. Mazd bnabey me zha ne rac rzhoobnis, zac ner zho xobnis zho grieequia zho ro nis co; ⁴⁴ laa grē zha ne gacd xobnis, zac maase grē yag biats ne nobil barcw xobnisnie zho. Sca bdeeda diidz brieequia no ro nis grēse no.

28

Blēz zho Malt

¹ Zeene bdziņ no ga, dzigoraa gocndion no lēē guidzliu win ne lē Malt ga. ² Grē miech ne no ga pquiadox zdoos zho no, bzēēg zho gui bredz zho no bdzēē no, sac lala rac naļ ni scataque bgaa no guie.

³ Ye Pabl güey güeytop chop lē yag ne cuib lo gui. Lēētaaque laa me nodziiba lo gui, tibaque bias ti meel ne zizhoon lo zhindzēē gui co, pquiaalay ma nia me, quiatague ma ga. ⁴ Grē miech ne no ga, zeene gon zhow rneechaa zho:

—iIse nagon rlu, nzēēb meņ qui ngutoo! Niicle blaa me lo nisdoo, per no guielwxtis ne quianab guet me.

⁵ Znuse bdzib Pabl nia me bron me meel co lo gui. ⁶ Grēse zho rwi quiambēz zho dieņ pa hor sigui me, te tibaque tsobe me liu ye guet me. Wdzeelaaw peet racd me. Laa zeene gon zho peet racd me, dzigo psilo zho rnee zho no cho ti dios nac me.

⁷ Gaxaque ga quia tib lē liuņ meņ ne rnabey lo guidzliu win co lē Publ, dzigo bneedz me zaatne bliiaz no ga tson ngbidz ni bneedz me ncuaaņe bdiow no.

⁸ Lēētaaque leņ dze co laa pxoz me nix rlan xlēē ni yoobchen. Dzigo güeynee Pabl lo me, bnab Pabl lo Dios guiac me; blozhse bnab Pabl lo Dios, pxobnia Pabl guic me, laa me biac. ⁹ Zeene bin grē miech cow, zha ne rzacnētaa riaadnie zho zho lo Pabl, runguiac Pabl zho. ¹⁰ Dzigo rleynie zho no, nroob grē ncuaaņe bgad zho lo no. Zeene goļ dze ne laa no wbiņ ga, scasaque nroob ncuaaņe yquii no nēz bneedz zho.

¹¹ Tson mēē bliiaz no lo guidzliu co, dzigo laa no brieē ga bziaab no ti leņ xbarcw zha Alejandri, ti barcw ne blēz ga dipse len mēē naļ co. Guic barcw co quia chop mdio, mdio ne rnee zho Cāstor ni mdio ne rnee zho Pólux. ¹² Bdziņ no guiedz Siracús, ga bliiaz no tson ngbidz. ¹³ Siracús brieē no, gax gax ro guidzliu zio no bdziņ no guiedz Regio; biini liu iņe zhoob ti me ne ziaadquia lo nis co, dzigo laa no brieē Regio laa no zio. Biiniraa sti liu bdziņ no guiedz Puteoli, ¹⁴ ga bdziņ no lo blalaa zha ne riladz Jesús. Bnab zho lo no gbiaz no, nacne bliiazaque no lo zho ga ti zhmal. Garaa brieē no bdziņ no Roma.

¹⁵ Grë zha ne riladzle Jesús Roma, zeene bin zho laa no gdzin ga, brieë zho biaadinëz zho no. Zhis zho biadzieel no zaatne lë Foro de Apio, szhis zho baaad zaatne lë Tres Tabernas. Zeene gon Pabl scataa baaad-xinëz zho no, rley me rdeed me xquizh lo Dios.

Bdizin Pabl Roma

¹⁶ Zeene bdizin no lad guiedz Roma, bdeed zho diidz Pablzhal bguib ti yu ne blëz me grop me menguib ne quianap me, blood zho me ladzguuib.

¹⁷ Goc tson ngbidz bdizin no ga, dzigo bredz Pabl grë zha ne nac zha non lo zha Israel ne no ga. Blohse pcaalsa zho, rëbchaa me lo zho:

—Laa naa bredz to nu gon bets, gacnan to ganle laa grë zha ladz ne bnaaz naa Jerusalén, güeyzo zho naa lo zhiwxtis zha Roma rnab zho guet naa, per gneli naa lo to ganle, peet bend naa lo zho, ni ti zhiwseed xmengol ne bditsd naa. ¹⁸ Niicle wxtisgaaw, blohse pquiep zho naa gon zho raapd naa falt, nacd naa zha ne rieguial guet; dzigo gocladz zho nsilaa zho naa.

¹⁹ Per zeene gon naa nëd menladz ne csilaa zho naa, nacne bnabaque naa ziaadnie zho naa lo César nu. Min co nagon nacne zial naa nu, ziald naa cto naa menladz ne o cteedquiegaa naa zho. ²⁰ Wen ne laa naa beenbey to nagon, ni beenbeyga to naa; gacnan to sca ganle laa caden rii zob nia naa, per nacda por pe falt ne rap naa, sinque laaw zob nia naa porne riladz naa laa Dios pxeelle men ne quiambëz menladz ne ga.

²¹ Dzigo pquiab zho rëb zho lo Pabl:

—¡Waltaa, ni ti guits ib gard cxeel menladz ne lo no zaatne gzeet zho luu! Niiclegaa grë zha wladz ne zilanso nuw, rneed zho laa luu noyun pe guientseeb. ²² Per na laga laa luu ziaad nu, siguiel luu sodiidz luu lo no dien zhapaa nac wseed ne riladz luu i, sac blactaa zidzion no, zaatne notaa zha ne riladza rlëenie miech zho.

²³ Dzigo pso zho ti dze ne tsie zho.

Zeene gol dze co, nzian zho pcaalsa zaatne rbëz Pabl ga. Dzigo psilo Pabl bzodiidz me lo zho zhapaa racladz Dios gban miech, ni rnee me lo zho gliladz zho lëele men ne nac diidz cxeel Dios ga nac Jesús; blu me lo zho grëse zaatne zhozneew, zigtaa lo grë mine pquiaa Moisésa, zigtagaa lo grë mine pquiaa grëraa zha ne biadteed xtiidz Diosa. Dipse dze sca bzodiidznie me zho grë min co.

²⁴ Brieequia bla zha ne bliladz grë mine bnee me ga, ni scaquegaa brieequia zha ne bliladzda. ²⁵ Grë zha ne riod zdoo mine rnee me ga, laa zho psilo noriee, nacne rëb me:

—Ib lëëpaa mine nac to i ga nagon bzeet Espiritu Sant, zeene psiaab me guic profet Isá znu rëb Isá ²⁶ lo grë xmengol to:

Niicle peraa gon to, niicle peraa gan to,
per peet guiente;

²⁷ sac gocntseeb zdoo to.

Zob diag to, ni peet ronde to;

zob lo to, ni peet rande to.

Ncow nac guic to,

gane peet ronde to, peet rande to;

niicle rioxcodgaa to gbig to lo naa zeena csilaa naa to lo xtol to.

²⁸ Golgacnan sca ganle, min co gane laa Xtiidz Dios quiagaaz lo grë miech stib guiedz, ni zhasi gon noliladz zhow.

²⁹ [Zeene gon zho sca rëb Pabl mazdraa blëë zho, nodiidzisa zho laa zho zey.]

³⁰ Dipse len chop iz blëz Pabl ga, ga bree me ti len yu ne bio me. Ga rdizin grë miech ne zienee lo me, ³¹ zha ne zietaa, rnee me lo zho zhapaa racladz Dios gban miech, ni rnee me lo zho gliladz zho cho nac Jesús. Dipse len dze co, ib biod zha ne ntsidil pe nacne sca noseed me miech.

GUITS NE PXEEL PABL LO ZHA ROMA

¡Diuzh to grëse to!

¹ Naa nac Pabl, naa nac tib ngundziin win quiaayun naa xtsiin Jesús. Dios bredz naa pxeel me naa none naa Xtiidz Ndzon me lo miech.

² Padzeelale bnee Dios ne laa me cxeel Diidz Ndzon rii lo ne, lëew ga bzeet grë zha ne biaad padzeela biadteed xtiidz me lo miech, lëew ga raquiet lo guits ne zhubnee Xtiidz me. ³ Lëew ga rnee ganle cho nac Jesús (meñ ne briequia lo xti rey David ne laa me goc miech lo guidzliu; ⁴ sangue Espiritu Sant, pxobnen me ganle Xpëed Dios nac me; min co gane brieaban me).

⁵ Zeene biaad Jesús, ga pxobnen me ganle tibaque noxc Dios ne; ni niina Diosaque bzooblo naa rxeel me naa none naa Xtiidz me lo grëse miech, zeena gliladz zho me, gon zho diidz gban zho zigne rnabey me. ⁶ Zig nac to, glo lo guielcow ga ngab to; sangue niina laa me bredz to laa to ngab xnëz Jesús.

⁷ Laa naa rxel guits rii lo to, grëse to ne no to guiedz Roma i. Golgacnan ganle rleynie Dios to, gane laa me bredz to ygab to lo me, gban to zigne no gban zha ne ngab lo me. Me ne nac me Pxož ne, ni Jesús meñ ne rnabey, tibaque noxc me to, me nac meñ ne gacniën to zeena peet zhgab csebde to.

⁸⁻⁹ Nanle to nasca ganle xtsiin Dios quiaayun naa, dib zdoo naa quiaseed naa miech Diidz Ndzon ne nac zhiwseed Xpëed me.

Nu ne laa naa rsilo rne lo to, gloque rded naa xquizh lo Dios ni lo Jesús por mine quiaayun to grëse to, sac gon tel pa lotaa zëeb diidz ne nlipaa dib zdoo to riladz to me. Me zobwi, me nan ganle zeene rnabtaa naa lo me, ib riaanladz naa to, tibaque rnab naa lo me gacniën me to; ¹⁰ ni tibaque rnab naa telne zneed me diidz gdziñ tib dze ne grieelo guial naa i guialgan naa to. ¹¹ Ne nlipaa rquiabladz naa ganlo naa to, guialzhaal naa gnedz naa rson lo to guien to zha ycaanaraa to guielbiini ne rneedz Espiritu Sant; zeena tibilique gac guic to dziitsraa so to. ¹² Ni scagaa tipse gac ne zidiidz ne zha nac Xtiidz Ndzon Dios, mine riladz ne; zeena tipse gac ne sodziits ne low.

¹³ Bets, bzian, tel gan to ganle blactaa vuelt ziyacladz naa guial naa i guialgan naa to, per haxta lo nadze gon rrieelodaque guial naa. Ib laa guic naa no guial naa lo to i, zeena gacndalraa miech ne sëeb gliladz Xtiidz Dios, zigne ziyacndal zho grëraa zaatne ziyateed naa. ¹⁴ Sac ible naa raguial cseed miech Xtiidz Dios, grëse zho niicle zha nona,

niicle zha mbana; niicle zha raca, ni niicle grëgaa zha ne peet rienda. ¹⁵ Mincoxe waa, tibaque laa naa racladz ye nëz qui guial naa guialne naa Xtiidz Ndzon Dios lo to, ne nac to zha ne no guiedz Roma i.

Poder ne rap Xtiidz Ndzon Dios

¹⁶ Tel naa, ib rotladz naa gne naa Diidz Ndzon rii lo miech, sac ncuaan ro ne run Dios zeene rquiaadiag miecha. ¡Grëse miech ne gliladz, ib zlaa zho lo xtol zho! Laa guielnzaac co no niina par grëse miech. Glose lo zha Israel bdzina, laa niina laaw quiazin lo grëraa miech, zeena grëse zho gbig sëeb xnëz Dios. ¹⁷ Sac gon, lëe Diidz Ndzon rii rlu zha rbiire rcaania Dios miech, rsanmbe me zho lo dol rbiire riaanwen zho lo me: totsaque nli dib zdoo zho gliladz zho mine nac Xtiidz me. Sca zhubnee lo Xtiidz me, zaatne rnee: "Zha ne biaanwenle lo Dios, ib zrieelo gbannie zho me, sacne dib zdoo zho riladz zho mine nac Xtiidz me."

Xtol miech

¹⁸ Ndionle ne ganle no guielne ro ne csiaab Dios ygaa grëse miech ntseeb, miech ne nëd gac-wen, ni desde gbaa cxeel me guielne ne ygaa zho; sac por xquielntseeb zho rsaand zho gacnan grëraa miech mine nac diidzli.

¹⁹ Grë zha ntseeb, nanle zho zha nac Dios, sac mezhallu lo miech zha grieelo gunbey zho me. ²⁰ Niicle ne grieelod ganlo ne Dios, per de lo grëtaa ncuaañe bzaa me, grëtaa ncuaañe run me, gase rlu ganle cho nac me. ¡Gase rlu ne nli me nac Dios, ni gdziñd dze ne lozh xpoder me!

Gacxe waa grë zha ntseeb, ib tedlaad zho lo guielne ne csiaab me ga; ²¹ sac gon niicle nanpaa zho me nac Dios, ni ib rond zho xtiidz me. Nëd zho gunbey zho me zigne rieguiala, niicle xquizh nand zho gdeed zho lo me. Laa ne rzac zho na rien zho pe run zho, lel pcow xquielrien zho; rzac zho na lëew ga, gun zho ncuaañe guiaabtaa guic zho. ²² Niicle ne rzac zho zharien zharac nac zho, per zha nac miech ne qualoozhraa lo xquielnxen; ²³ sac gon laa ne gunbey zho guielndzon ne rap meñ ne nacpaa Dios nguiamban, lel rsilo zho rzaa zho grë mdio ne niaa zigne rlu samiech guidzliu zho, grë mdio ne niaa zigne rlu grë ma ne rsiibe, grë ma ne rzë tap ni, grë ma ne rzëlen lo liu; lel grë ncuaañ co ziegan zho laa ne gleynie zho meñ ne nacpaa Dios.

²⁴ Mincoxe nagon waa, rsaanladz Dios zho laa zho zienal grë ncuaañe ndzinlid ne rzoobladztaa zho. Grë ncuaañe ntoladzdox ne run zho, lëeque zha runnguzee zho rguintnie zho xcuerp zho. ²⁵ Sac laa ne gleynie zho diidzli mine rnabey Dios, lel mine rnee zha ne rquidie rleynie zho; lel grë ncuaañe bzaale Dios, ncuaañe psanle me, ncuaañ co ziegan zho, lo grë ncuaañ co ziequitsgzhib

zho; laa ne yquitsgzhib zho, gleynie zho men ne nac Dios mban, men ndzon ne psan grëtaa ncuaañe no. ¹Diosse rieguiäl gunnon miech, men co rieguiäl tibaque goolñie zho! Sca rieguiäl.

²⁶ Ne sca nagon nac zho, gane psaan Dios zho laa zho run grë guielyozh, ncuaañe ngubeeguelto ne rieguiäl draa gun miech. Grë wnaa laa ne gdeed zho diidz gnee tsieel zho lo zho, leñ lëëque sawnaa zho rquiangob zho, laa zho zienäl grëraa guielyozh; ²⁷ grëgaa mgui, laa ne gnee zho lo wnaa ne nac tsieel zho zigne biaan no gaca, leñ lëëque sabgui zho rzoobladz zho. Ncuaañe mbixladz run zho, rquiangob zho lëëque sabgui zho; ni ne sca run zho grë ncuaañ co, lëë mine rdziniaa zho nac grë guielguidz yozh ne riaan lad zho; ndzinlidraa rac zho.

²⁸ Scataale nac zho, ni bii rzoliaadz zho gbig zho lo Dios, gane niicle megaa rlozh rsaanladz me zho, laa zho biaan lo grë zhgab yozh ne no guic zho, no zdoo zho, min co ne scataa nac zho. ²⁹ Nroobdoo nac xtol zho, sac:

rsacsixuu zho samiech zho,
rzoobladz zho ncuaañe quianied zho,
racntseeb zho lo samiech zho,
në rac zdoo zho ran zho stib noded samiech zho,

rut zho samiech zho,
rtsidil zho samiech zho,
rquidie zho samiech zho,
rquiadiidzguizh zho samiech zho,
miech yozh nac zho,
³⁰ rneenë zho samiech zho,
rquiabro zho lo samiech zho,
racniats zho lo samiech zho,
rlu zho ncuaañe rapd zho, ncuaañe nacd zho;

rlëënie zho Dios,
rio zho rbeebe y zho grë guielntseeb,
rond zho xtiidz pxoz zho,
rond zho xtiidz xniaa zho,
³¹ racladzd zho gon zho diidz,
rund zho mine rnee zho,
rleynied zho samiech zho,
rund zho samiech zho perdon,
rquiad zdoo zho samiech zho.

³² Niicle ne nanpaa zho zha rnabey Dios none gban miech, niicle ne nanpaa zho grëse zha ne run guielntseeb, ib tedsod znitlo zho; ni laa zho bii quiaayuna, ni haxta rley zho ran zho cho grëraa zha ne run grë mine run zho.

2

Xquielwxtis Dios

¹ Ib tedsod no to gnë: “iZha ntseebttaa miech ne sca run!” ¹Per gni naa lo to ganle, zigtaa zhaw, zigtaa tow, lalga ntseeb to grë to! Sac ye to gon run grë guielntseeb co, gacxe waa, zha ne rzac rieguiäl zha co yгаа

zho guielnë ne csiaab Dios, ye zho rieguiäl min co. ² Ndion ne ganle Diossi zeene laa me gun guielwxtis, grëse zha ne sca zienäl guielntseeb, ib tedsod zunquizh me zhow.

³ Zha ne sca rlozhd gzee zdoo pe quiaayun stib zho, haxta rlisqui zho mine quiaayun zha co, ni yeque zho quiaayuna; masaque nan zho nagon zdedlaa zho zeene laa Dios guiaadgun xquielwxtis me, masaque nan zho zha cose nitlo, laa zho tedlaa. ⁴ None guien zho ganle pa lotaa nquialadz Dios zho, pa lotaa noyap me zho paciens noxecw me grëtaa ncuaañe run zho; sac laa me quiambëz csaan zho xquielntseeb zho, yguudz zdoo zho gban zho zigne rnabey me. ⁵ Telne tibaque squi ndip gac zdoo zho, gond zho mine rnabey me; gacnan zho ganle, quiaayunloraa zho grë guielnëdox ne yгаа zho gal dze ne laa me gun guielwxtis. Ni xquielwxtissi me, zigne rieguiäl gaca sca gun mew.

⁶ Gal dze co, laa me gdeed mine rieguiäl yгаа tib tib miech tel zha wban zho. ⁷ Grëse zha ne güeynal beennon zho lë me, pxobnen zho xquielndzon me, güeynal d zho grë ncuaañe rnitlo, lo zha co gdeed me tib guielmban ne gdzind dze lozh. ⁸ Sañgue grë zha ne güeynal loxaque grë zhixco zho, güeynal zho grë guielntseeb, laa ne nienäl zho mine nac diidzli; zha co yгаа grëse zhian ne csiaab me.

⁹ Ga nagon, grëse zha ne run guielntseeb, zigtaa zha Israela, zigtagaa zha stib guiedza, ible zгаа zho tib guielnëdox; ¹⁰ sangue grë zha ne rban zaacse, zigtaa zha Israela, zigtagaa zha stib guiedza, ible zгаа zho lo xquielndzon me, zunnon me zho. Ni led yedraa ga pe zhgab cteeb zho.

¹¹⁻¹⁵ Grëse zha ne gunctal xtol, tel chotaa nac zho zunquizh Dios zhow; sac tel me, led yed me cue. Zig nac grë zha ne beenbeyd xley me, zunquizh me zho grë xtol zho; sac niicle ne gocnandpaa zho zha naca, per len zdoo zho, guic zho, nanpaa zho pa min nac guielntseeb, pa mingaa nac guielwen. Rrieequiacxe waa runbeyle zho xley Dios ga. Scaquegaa zha Israela, ne nac zho zha ne runbepaa xley Dios, zunquizhaque me zho grë xtol zho; sac niicle ne runbepaa zho xley me, per tel lozh ga mband zhow. Nanpaa zho pa min wen, ni tel lozh ga rond zho diidz gun zhow; sac gon, led-xe por ne gacnandse ne ley waa laa Dios ycaaniale ne, sinque none gban new.

¹⁶ Zdzin tib dze, zeene laa Dios cxeel Jesús, gunquizh me miech grëse dol ne been zho tib tib zho, niicle mine mazdraa rzac zho ngeets zhlian been zho; sac sca rnabey Dios gaca, ni min co noseed naa miech.

Zha Israel ni xley Moisés

¹⁷To ne nac to zha Israel, rzac to zienal_{paa} to xley Moisés, niats rac to, rzac to tose non lo Dios. ¹⁸Na_{nwen} to zha racladz Dios gban to, na_npaa to pa min wen sac pseed to xley me. ¹⁹Min co masaque rzac to to cseed zha ne no lo ncow, grè zha ngoopdol. ²⁰Masaque rzac to to rien_{raa} zha cseed to grè zha ne peet gacd, to rien_{raa} zha quixbini to grè zha ne peet rien_d; sac rzac to ne nan to ley, tose nac zha ne ndziibraa nixbiini, tose nan mine nacpaa diidzli.

²¹Nana, tel scataa rien to zha cseed to stib miech, *zpe* nac dzigo rwide to mine run to?

Conque to name rnee lo miech cuand zho, ni rlozh ga toque quiaban. ²²Rseed to miech rnee to, tib zha ne nole tsieel, nodne yquiangob zho stib zha ne led tsieeld zho; ni rlozh ga toque noyun min co. Rnee to, rdzigiunde to grè mdio, ni rio to rieban to yadoo ne zob grè mdio co.

²³Rlozhd gacniats to rzac to quia_{yunn}non to lè Dios ne nan to ley, ni na_{nde} to gon, lel quia_{gnitnie} to lè me ga, sac mbande to zigne nac ley. ²⁴Mine noyun_{paa} to i ga gon raquiet lo Xtiidz Dios, zaatne rnee: "Por xtol to, grè zha zit laa zho rneenè Dios."

²⁵Tel to, rzac to porne nace to zha Israel non to lo Dios, per ne squi mbande to zigne nac xley me, nacaque to zigne nac grè zha zit ne runbeyda. ²⁶Nana, zha zit ne rioxco rban zigne nac xley me, *z*nacxe rieguiald dzigo guia_nnziuu zho lo Dios? Sa_nnziuu me zho gon. ²⁷Gol_{gacnan} sca ganle, glole zha zit co gon guia_nnziuu lo Dios, lèdle to ne na_npaa to zha racladz Dios gban to, na_npaa to mine psan Dios diidz yгаа to, ni rbande to zigne rnabey me.

²⁸Gol_{gacnan} sca ganle, led porne nacdse to zhin zha Israel, porne bio to xbey zho, laa to nziuu le lo Dios. ²⁹Led scada gon, sinque zha ne nli dib zdoo rioxco mine rnabey Dios, zha co nziuu lo me. Sac tel Dios, rwidaxe me waa dien cho pe bey ne no, sinque laa me rcaania zha ne nli_{paa} dib zdoo, dib guic, rban zigne racladz me. Grèse zha ne znu nac, nziuu zho lo Dios, niicle telne rzac to peet nond zho.

3

¹Nana, *z*pa lugar nadien ne ria_nnnon zha Israel lo grèraa zha stib guiedz? *z*Pa rquiin ne scataa rio zho bey? Zootle lèè lalaquew tel niaca mine niacd zho zha Israel. ²Per led scada, no pe nace non zho. Sac gon, ible lo zho psan Dios xtiidz me mazd padzeela.

³Nli ndal zho rond xtiidz me, per led mincod ctsèe me xtiidz me, mine bneeel me lo zho. ⁴Niicxe tel zharaa quia_{yunn}ctal miech xtol zho, sa_ngue Dios ctsèed me xtiidz me. Zigne zho_{bee}que lo Xtiidz me, zaatne rnee: "Mine rnee Dios, diidzli naca; niicle

zha ne gacladz, guien_d pe ncuaa_ne glisqui zho lo me."

⁵Sca nac Dios, gacxe waa rnee me grèse zha ne runctal xtol, rieguial yгаа zho guiel_{nè} ne cxeel me. Ga nagon, rlu ne mine nac diidzli, min co run me. Nana, *z*pe ziab ne nonguiel_d mine run me ga? ⁶Mine nonguiel ga gon run me, sac tel gdziguien me grè zha ne runctal xtol, *z*zha nac zhe guiel_{wxtis} ne dzigo gun me?

⁷Nana, nogaa zho gnè, *z*per pe nace glisqui Dios dol ne rdziuu_n ne, ni tel por lèew rlu ne diidzli nac mine run me? ⁸Per telne sca naca, rriequia dzigo ib none gunctal ne xtol ne parne yquiaraa zdoo me ne. Ni nzian zha ne nobee xquiel_{to} naa, rnee zho ib min co noseed naa miech. Ni zha ne sca rnee, ib tedlaad zho lo guiel_{nè}dox ne rieguial zho.

Grèse miech, ngoopdol nac zho

⁹Nana, *z*pe dzdieets ne dzigo ne nac ne zha Israel, nziuuraa ne lo grèraa miech stib guiedz? *z*led scada gon! Niina blozh bzeet naa lo to, grèse ne ngoopdol nac ne, zig-taa zha Israela, zigtagaa zha stib guiedza. ¹⁰Zigne zho_{bee}que lo Xtiidz Dios, zaatne rnee:

*z*Guien_d miech ne zienal_{paa} mine racladz Dios!

*z*Ni tib zho guien_d!

¹¹Guien_d zha ne niini guic;

guien_d zha ne tsoxco yguib xnèz Dios.

¹²Grèse zho laa zho zie nèz ne nitlo zho;

niapse guiel_{ntseeb} zienal zho.

*z*Guien_d zha ne zienal_{paa} mine racladz Dios!

*z*Ni tib zho guien_d!

¹³Ro zhow,

masaque been cuent naca zig nac len grè baa ne noyodz ngutoo;

niapse diidz ne rquidie zho zhoob lo ludz zho.

Grè diidz ne rnee zho,

masaque naca zig nac zvenen grè meel_d dox;

¹⁴niapse grè diidz dox, niapse grè diidz nè rrieche ro zho.

¹⁵Ni zhow,

masaque zombèzlew dien pa tsiegt zho samiech zho;

¹⁶loxaque guiel_{nè}, loxaque guiel_{zi} rsa_n zho zaatne rded zho.

¹⁷Ib na_{nd} zho ne zaacse gbannie zho samiech zho;

¹⁸per ni Dios rdziebdraa zho.

¹⁹Gacxe waa nroob nac guiel_{nè}dox ne yгаа grè zha ne runbey ley ni mband zho zigne naca, lel run zho grètaa guiel_{ntseeb} zig nac grè mine goquiet nu. Ni niicle grèraa miech ne runbeyd ley, scaque ngoopdol nac zho, ni ro zho guien_d pe guiab zho lo Dios.

²⁰Gol_{gan} sca ganle, grielod guia_nmbe ne lo Dios, niicle paraa yquia ne gun ne mine

rnee ley; sinque par guiẽn ne ganle ne ngoopdoꝓ nac ne, gane biaan ley.

Silaa Dios miech zeẽne gnalo zho me

²¹ Sanguẽ niina, tib ladle biaan ley, laa Dios bneedz stib mod ne guiaanwen ne lo me. Ni lo grẽque guits ne ziaad ley, lo grẽ guits ne pquiaa zha ne biadteed Xtii dz Dios padzeela, ga raquieta. ²² Grẽse miech tel chotaa nac zho, tel petaa beẽn zho, ib ziaanwen zho lo Dios totsaque dib zdoo zho gnalo zho Jesús, dib zdoo zho gliladz zho me. Zha ne gliladztaa me, sac led yed Dios rbe.

²³ Zigne rne naa ga, grẽse ne miech ngoopdoꝓ nac ne lo Dios, ni palal rdzieeld gdziẽn ne lo xquieĩndzon me. ²⁴ Per niina laa me blu ganle pa lotaa noxco me ne, gola zdoo me pxeel me Jesús bdiizh grẽse xtoꝓ ne, laa ne biaanwen lo me. ²⁵ Laa me beẽn miẽ co parne glu run me guieꝓwxtis, sac niicle bdizhd ne xtoꝓ ne, per pxeel me tib meẽn ne bzhiee xchen bdiizha xcuẽnt ne, lëẽ meẽ co nac Jesús; gane niina grẽse zha ne gnalo meẽ co, zun me zho perdon grëtaa doꝓ ne pxeew me beẽn zho. ²⁶ Ni tib doꝓ rapd me, ni scaque grë zha ne dib zdoo gnalo Jesús, sanmbe me zho lo xtoꝓ zho.

²⁷ Sca nagon psilaa Dios ne lo doꝓ. ¿Cho nadien gacniats ga? Ni tib choot gacd gacniats, sac led por miẽ bdziuuũd new, sinque por grëtaa miẽ bded Jesús. ²⁸ Gocndion ne sca ganle: Niapse por dib zdoo miech gliladz zho Jesús, laa Dios ycaania zho; nacda por tso zho gun zho miẽ rnabey ley.

²⁹ Nana, ¿pe zha Israelse sca ycaania me? ¡Lëda gon! Grẽse miech, sca ycaania me zho. ³⁰ Sac gon tibeyse ran Dios ne grẽse ne; zigtaa zha Israela, zigtagaa zha stib guiedza, sanmbe me ne lo grë xtoꝓ ne, totsaque dib zdoo ne gnalo ne Jesús.

³¹ Nana, ne znu rcaania Dios ne, no zho sac rquiindraa ley. ¿Zha yquiind-zhew? Niinale ne znu dib zdoo ne rililadz ne Jesús, rienraa ne pa rquiina.

4

Dib zdoo Abraham bnalo me Dios

¹ Zig nac pxozgoldoo ne Abraham, ¿pe beẽn me ne laa Dios pcaania me? ² ¿Pe por guieꝓwen ne beẽn mew? ¡Lëda! Telne scaw, nrreeo niacniats me (niicle ne nẽz lo Dios ni palal rieguiald niacniats me). ³ Sac gon rnee lo Xtii dz Dios, ne dib zdoo me bliladz me Dios gane pcaania Dios me zig tib zha ne peet xtoꝓd.

⁴ Zig nac tib zha ne run dziin, dimi ne razh zho ible rieguial zhow, rate zhow ga. ⁵ Sanguẽ Dios zdoo me ral rcaania me miech, zha ne dib zdoo rnalo me, nacda por pe guieꝓwen ne gun zho par guiab ne laa zho rieguiala. ⁶ Ye rey David bzeet guieꝓbley ro ne rgaa zha ne sca rcaania Dios, ⁷ rëb David:

¡Wen zie zha ne run Dios perdon!
Niicle nroob guieꝓntseeb ne beẽn zho;
tel pe nactaa xtoꝓ zho, glisquidraa mew.

⁸ ¡Wen zie zho sac gunquizhdraa me zho grë xtoꝓ zho!

⁹ Nana, ¿pe loxaque grë zha ne nose bey zrieelo yгаа guieꝓbley co, te ye grë zha ne noda ye? Nacda por bey, laa ne blozh bzeet ganle niapse ne dib zdoo Abraham bnalo me Dios, miẽ co ne pcaania Dios me zig tib zha ne peet xtoꝓd; ¹⁰ sac gon gard pe bey ne tso me zeẽne pcaania Dios me. ¹¹ Pcaaniale Dios me dzigora bio me bey. Lega laa me biose bey co, zeẽna glu ne laa Dios pcaaniale me porne dib zdoo me bnalo me Dios. Miẽcocxe waa, Abraham nac dad lo grëse zha ne nod bey, ni dib zdoo zho rnalo zho Dios; ni scagaa Dios, rcaania me zho zig tib zha ne peet xtoꝓd. ¹² Ni meque nac dad lo grë zha ne no bey ni dib zdoo zho rnalo zho Dios, zigne bnalo me Dios zeẽne gard tso me bey co.

Zha goc miẽ bnee Dios lo Abraham

¹³ Psanle Dios diidz lo Abraham ne me guiaanie guidzliu, grë me zha ne griecquiaraa lo xti me; guiabd ne togo porne beẽn me miẽ nac xley zha Israela, sinque ne dib zdoo me bnalo me Dios. ¹⁴ Nana, tel niaca zha ne gunse miẽ nac ley, zha cose yгаа miẽ co, rreeequia dzigo zhlëse ga bnalo Abraham Dios, niicle diidz ne psan Dios lo me ga, nondaquew. ¹⁵ Sac nac ley gon, zha ne gunða zigne naca, laa Dios csiabzi zho; laa zaatne guieꝓdga ley, gacd guiab zho cho noguiitsa.

¹⁶ Ne scacxe waa nac ley, gane niina lëẽse miẽ no gun ne nac dib zdoo ne gnalo ne Dios par yгаа ne miẽ psanle me diidz ga. Grẽse ne yгаа miẽ co, per nacdraaw dieẽ cho zienal ley, cho zienaldgaaw, sac miẽ nonraa, dib zdoo ne gnalo ne Dios zigne bnalo Abraham me. Miẽcocxe waa, rreeequia Abraham nac pxoz ne grëse ne, ¹⁷ zigne rëb Dios lo Abraham: "Laa naa bzo luu, luu gac dad lo nzian dii miech." ¡Lëẽ Dios co nagon bliladz Abraham, me rbeeban grë mengut, ni niicle haxta grë ncuaaẽ guieꝓd, saa mew!

¹⁸ Ndaldox rëb Dios gac lo xti Abraham, ni bliladz Abraham miẽ rëb Dios ga. Niicle ne zootle led ncuaaẽ gacda, per me dib zdoo me bliladz me ne zaca, ni scagaa bdziẽ dze ne laaw goc. ¹⁹ Tibaque bnalo me Dios, niicle ne lala ziele xtse me (zig tib gayoole iz me), ni lala tsieel me Sar, nacd me wnaa ne gap meẽd. ²⁰ Ib goc chopd guic me niab me bod nliid niac miẽ bnee Dios ga, sinque dzigole dib zdooraa me bnalo me Dios; haxta rdeed me xquizh lo Dios, ²¹ sac nanpaa me meẽn nroob nac Dios zun me miẽ psan me diidz ga. ²² Ne sca nagon

dib zdoo me rnaloo me Dios, gane pcaania Dios me zig tib zha ne peet xtold.

²³ Zhobnee lo Xtiidz Dios sca pcaania me Abraham, ni laaw zhobnee zeena gacndion ne ²⁴ ye ne scaania me ne zig tib zha ne peet xtold, totsaque dib zdoo ne gnalo ne Jesús, men ndzon ne rnabey ne; ²⁵ men ne gut ga bdiizh me xtold ne, men ne brieegan ga, par glu me nli psanmbe me ne nēz lo Dios.

5

Jesús rsanmbe miech lo dol

¹ Nasi laa ne nacle zig zha ne peet xtold, laa ne biaanwenle lo Dios porne dib zdoo ne rnaloo me Jesús, men ndzon ne rnabey ne. ² Sac por grētaa minē bded Jesús, laa ne bгаа guielnzaac rii nacie me ne, ni ib csaand me me. Tib guielbley nrooba lo ne, sac ndionpaa ne ib zгаа ne lo guielndzon ne no me.

³ Ni scaquegaa nagon none gley ne zeene pe guielnē ne nodzian ne; sac ndion ne ganle, ga cseed ne lēb ne dziits so ne lo minē riladz ne. ⁴ Ni zeene sca dziits so ne, ziladzraa ne dib zdoo ne; ni zeene dib zdoo ne riladz ne, zacnanpaa ne ib zгаа ne minē riladz ne. ⁵ Ni ndionpaa ne zгаа new, sac blu Dios rleyne me ne, pxeel me Espiritu Sant nacie ne.

⁶ Lēētaaque zeene rdzieldraa miech zha gun zho par guiaanmbe zho lo dol, hor co laa Dios pxeel Jesús, biaad me gut me bdiizh me xtold ne nac ne miech ngoopdol.

⁷ Ndion ne ganle, niicle tib miech ne peet xtolda, tib miech ne mazdraa wena, led lega grieequid tib zha ne cueeladz xquielmban guet por zha. ⁸ Sangue Dios gon, niicle ne miech ngoopdol nac ne, blu me ganle pa lotaa nquialadz me ne, pxeel me Xpēed me Jesús, men co bleeladz xquielmban gut me xcuent ne.

⁹⁻¹⁰ Gotsaa gwi ne ganle, zha nactaa guielnē ne bded Jesús psanmbe me ne lo xtold ne, psanwen me ne lo Dios; ni scaque nagon, ible me csilaa ne lo grētaa guielnēdox ne csiaab Dios yгаа grē miech ntseeb. Ne nligaa, csaand me dzian ne guielnē co; sac gon, tel scataa minē been me por ne zeene nac ne tib miech ngoopdol, zeene scataa ntseeb goc ne blēēnie ne Dios, ꝑe leꝑ na dzigo ne laa ne biaanwenle lo Dios, laa ne biaanle zig tib zha ne peet xtold? ¹¹ Gacxe waa, niina ne psanwen Jesús ne lo Dios, none ine gley ne ne laa ne ngable lo Dios.

Zha nacie biaan dol

¹² Znu gon nacie laa dol biaan: por mine been Adán bind me xtiidz Dios, min co nac ne biaan. Ni por lēēw pquiaqui laa guielgut biaanaque, blozh ga grēse miech laa zho ret, sac grēse zho, tsod zha ne gunctald xtold. ¹³ Desde hor co biaan runctal miech xtold zho. Grēse miech ne bre lo guidzliu, desde Adán

haxta len dze ne laa Moisés pcaania ley, beenctal zho xtold zho, niicle ne guieḅpaa tib ley hor co nlu ne doꝑa. ¹⁴ Gacxe waa ye zho, grēse zho gut; niicle ne bdiitsd zho merpaa xtiidz Dios zigne been Adán.

¹⁵ Nli tib guielnē ga psan Adán, per niinagaa mazdraa nroob guielnzaac ne rneedz Dios lo ne. Por falt ne been Adán, biaan grēse ne ne nac ne miech laa ne no guet; per niina ne biaad stib men ne been ni tib falt, por min co laa Dios rquia zdoo ne grēse ne, laa me rneedz tib guielmban ndzon lo ne; lēē men co nac Jesús. ¹⁶ Tibaque nac dol co been Adán, per grēse miech biabzi; sangue Jesús zeene laa me biaad, grēse ne ne nac ne miech psilaa me ne lo grētaa xtold ne, psanwen me ne lo Dios. ¹⁷ Dol ne beense Adán ga, min co pquiaqui grēse ne ne nac ne miech, laa ne biaan ladznia guielgut; sangue niina ne biaad Jesús, zrieelo yгаа ne tib guielmban ndzon. Guielmban ne ral zdoo Dios gdeed me lo grēse zha ne gbig lo me gun me zho perdon. ¹⁸ Sca nagon naca: por falt ne been Adán ga, grēse ne ne nac ne miech laa ne biabzi, per zeene laa Jesús biaad, pquia zdoo me ne masaque me bdiizh grēse caxtigw ne rioguaꝑ ne ga, laa me psanwen ne lo Dios parne grieeo yгаа ne tib guielmban ndzon. ¹⁹ Golgan ganle, porne bdiits Adán xtiidz Dios, grēse ne ne nac miech laa ne goc zha ngoopdol, per scagaa, por bzoob Jesús grēse xtiidz Dios, zha ne gacladztaa, zrieelo guiaanwen zho lo me.

²⁰ Ible laa ley biaan, par glu ganle pa lotaa nac grē falt ne noyun miech lo Dios. Per niicle scataa nac grē dol co, per blu Dios ganle mazdraa rquia zdoo me miech. ²¹ Masaque bnabey dol miech, pxeela zho nēz ne nitlo zho; sangue zeene laa Jesús biaad, psanwen me ne lo Dios, gane niina zha ne gnalotaa Jesús zгаа zho tib guielmban ndzon.

6

Zha ne mbanniele Jesús

¹ Laa ne bdzianle ganle zha noxcotaa Dios ne. Nana, ꝑe dzizeets ne dziuunctalraa ne xtold ne zeena tosoxcoraa me ne? ² ꝑLēdraaw ga gon! Nodraa ne dziuun ne dol, sac gon, laa ne nacle niina zig tib zha ne gutle nēz lo dol.

³ Golgan ganle, zeene laa ne bziaab xnēz Jesús ni brobnis ne, rrieequia gut ne ga zigne gut me. ⁴ Zeene brobnis ne rrieequia bioliu ne ga, zigne bioliu Jesús. Ni zigne brieegan Jesús (por poder ndzon ne rap Dios), scaque ne rrieequia brieegan ne, stible guielmban ne rdziaap ne.

⁵ Ni zigne sca rrieequia gut ne zeene gut Jesús, scaquegaa ndionpaa ne zbeeban me ne zigne brieegan me. ⁶ Ndion ne ganle, miech ne goc ne zeene scataa bional ne

guielntseeb, rrieequia ye miech co pquianie me lo cruz. Ga bnitlo mine goc ne ga, zeena ygadoodraa ne lo dol; ⁷ sac gon, deque bnitlo grè mine goc ne glo, grieelodraa gnabey dol ne.

⁸ Nana, telne scale gutnie ne Jesús, ndionpaa ne ib zbannie ne me.

⁹ Ndion ne ganle brieenan Jesús, ni gdzindraa dze guet me. Grieeodraa pe gun guielgut me.

¹⁰ Tibaque vult gut me bdiizh me xtol grèse miech, sangue niina mban me ni Dios mbannie me. ¹¹ Scagaa to nasca, golguien ganle laa to gutle lo dol, nodraa gnabey dol to stib, sinque laa to mbanle niina par gun to mine rnabey Dios. Golguien ganle, Jesúsle nacie to.

¹² Nana sca, gdeetraa to diidz gnabey dol xcuerp ben to i, tso to gun to grè ncuuane ndzinlid ne racladz xcuerp to. ¹³ Ib gdeete to diidz guiab to lo dol stib, gun to grè guielntseeb; sinque golšan to lадznia Dios, ine golgun grè mine racladz me. Golguien ganle, laa to gutle lo grè dol, Diosle mbannie to niina; ¹⁴ zeena scagaa gnabeydraa dol lo to, zigne beena to zeene scataa bioxco to mine rnabey ley. Sac gon rnabeydraa ley to niina, laa Dios blule ganle pa lotaa nquialadz me to biaadsilaa me to.

Nli nquialadz Dios ne, rnabeydraa ley ne. ¹⁵ Per nana, ¿pe ne rnabeydraa ley ne, pe ne nquialadz Dios ne dzieets ne dziuun ne grètaa ncuuane gunctal xtol ne? ¡Lèda ga gon! ¹⁶ Nanle to ganle, tib zha ne nanle cho lo yquia zho dziin, lo zha co ngadoo zho ni mine rnee zha co none gun zho. Zig nac zha ne ngadoo lo dol, niapse dol run zho ni mine tsieguial zho laa zho nitlo; sangue zha ne run mine rnabey Dios, scaania Dios zho zig tib zha ne peet xtold. ¹⁷ Nli glo lo dol ngadoo to, per xquizh Dios zeene laa zho biadseed to Xtiiidz me gocnan to zha laa to lo dol, laa to bliladza ni noxco to mban tow niina. ¹⁸ Ni zeene laa to brieeladznia dol, laa to bgab lo Dios; zeena mine rnabeyle me mincole gun to. ¹⁹ Znu bzet naa grè min rii lo to, zeena guien to zha naca.

Nana sca, zigne scataa bio to lадznia dol been to grètaa guielyozh, grètaa guielntseeb, scagaa niina golšan to lадznia Dios, golban zigne rnabey me, zeena lozh guiaanmbe to zigne racladz me. ²⁰ Zeene scataa ngadoo to lo dol, ib wbande to zigne rnabey me.

²¹ ¿Pe nadien needz dol lo to? Lèè gdib mine ngaa to laa to nitlo. Zig nac niina, haxta rtoladz to zeene rsoladz to grè ncuuane been to hor co. ²² Sangue niina, ne laa to brieeladznia dol laa to ngab lo Dios, ible ziaanmbe to zigne racladz me ni zгаа to tib guielmban ne gdzind dze lozh.

²³ Sac gon, zha ne runctal xtol, lèè gdib mine tsieguial zho laa zho nitlo; sangue zha

ne gbig lo Jesús, mine ral zdoo Dios ygad me lo zho nac tib guielmban ne gdzindraa dze lozh.

7

¹ Bets, bzian, to ne nac to zha ne runbey Xley Dios, nanwen to ganle, zeene zombanse miech dzigo rrieelo rnabey ley co zho.

² Zig nac tib mgui ne rtsieelnia, rnabey ley ne mguise gbannie wnaa ne nac tsiel mgui. Per tel gzoob ne glo mgui guet, dzigo gadraa gnabey ley ne mguipaa gbannie wnaa co; telne gacladz zho ctseeelnia zho stib mgui, zaca. ³ Nli nonguiel da ga gun wnaa ctseeelnia zho stib mgui laga bii zomban tsiel zho; laa zeene gutle tsiel zho, led dol draaw yguib zho stib zha ne ctseeelnia zho.

⁴ Bets, bzian, scadaa nagon bzhaac to. Zeene sca gut Jesús, rrieequia ye to gut ga gane niina ngadoodraa to lo ley, niicle lèègaaw grieeod gnabeya to. Jesús, men ne brieenan ga, mele nac tsiel cub to niina. Niinasi, zrieelole gban to zigne racladz Dios; ⁵ sac glo (zeene scataa bdziuunctal ne xtol ne, bdziuun ne grètaa ncuuane nonguiel draa niicle ne ndionpaa ne pe nac mine zhobnee lo ley no dziuun ne), niapse grè ncuuane nxeel ne zaatne nitlo ne, ncuuan co bdziuun ne. ⁶ Blactaa bgadoo ne lo ley, sangue niina rrieequia gutle ne nèz lo ley, laa ne mbanle zigne rnabey Espíritu Sant.

Rca dol gac mine rnabey ley

⁷ Nana, ¿pe dzieets ne dzigo por leypaa rdziuunctal ne xtol ne? ¡Coo, led scada! Tel naa gon, ib niacnand naa pe nac dol telne guien ley. Niacnand naa ne dol ga gzoobladz ne chen ben, telne niacnand naa ne rnee lo ley: "Gzoobladz luu chen ben."

⁸ Zeene gocnan naa zha nac ley, dzigoraa bien naa niapse dol nac mine noyun naa; sac zeene guien ley, rlud pe nac dol.

⁹ Glo zeene rien d naa zhapaa nac ley, tibaque rzaac naa ib peet dol rapd naa; per zeene gocnan naa zha nac ley, bien naa ne ib raguial naa nitlo naa, sac dol quiyay naa. ¹⁰ Nli laa ley biaan zeena guien ne zha grieeo yгаа ne guielmban, per lel bluw ne raguial naa nitlo naa sac ngoopdol nac naa.

¹¹ Ne nligaa bdziintne dol naa, mine rsopaa ley diidz nod gun miech mincopaa ben naa; ni blozh ga, lèèque ley blu ne ib raguial naa nitlo naa. ¹² Niicle ne scaw, per Dios psana ni rquinn grè mine zhobnee low.

¹³ Nana dzieets ne: conqua telne wen nac ley, ¿zha nac dzigo ne lèèpaaw rlu ne riogual ne guet ne? ¡Coo, led scada! Sinque znu naca: dol pteedquie ne lадznia guielgut. Ga rlu ganle zha nactaa dol, sac gon lèèque ley pquin dol pteedquiew ne lo guielgut. Ga blu ley ganle zha ntseebtaa nac dol. ¹⁴ Gotsaa gwi ne ganle wen ley, led leyd rxin sinque

ne rxin; sacne rrieequia ngadoo xcuerp ne lo dol.

¹⁵ Teḷ naa, rienḍ naa pe nacne znu rac naa, niicle ne racladz paa naa guḅ naa ncuaaḅe nonguielḷ per nēda, leḷ ncuaaḅe rzoobladz naa miḅ co ruḅ naa. ¹⁶ Grē ncuaaḅe ruḅ naa, now rienḅ paa naa nonguielḷ da; haxta guic naa, zdoo naa, rienḅ naa wen ley sinque naa quia-guits miḅe rnabeya. ¹⁷ Nana, niicle ne rienḅ naa scaw per gacd pe guḅ naa, sac ngadoo xcuerp naa lo dol, masaque dol rcheep naa ruḅ naa ncuaaḅe ndzinlid. ¹⁸ Rienḅ naa miech ngoopdolḷ nac naa, ni palal ncuaaḅe ndzinliḷ gacd guḅ naa; niicle ne racladz naa gac-wen naa, per rrieeḷoda. ¹⁹ Zeēḅe racladz naa guḅ naa ncuaaḅe rquiin, per rrieeḷod guḅ naaw; laa zeēḅe ni naa guḅ draa naa ncuaaḅe ndzinlid, leḷ miḅcole ruḅ naa. ²⁰ Ni ne znu leḷ grē ncuaaḅe racladz naa, miḅ co ruḅ naa, gase rlu ne led naadse quiaḅuḅ grē ncuaaḅe co; sinque dol quiaḅey xcuerp naa ruḅ naaw. ²¹ Rienḅ naa niicle ne racladz paa naa guḅ naa ncuaaḅe wen, per leḷ guielḷntseeb ruḅ naa. ²² Zdoo naa, guic naa, rleyḅe naa Xley Dios, racladz naa gban naa zigne rnabey me; ²³ per dzigo rtse dol lo naa, rrieeḷod guḅ naa ncuaaḅe nonguielḷ. Masaque dol rnabey xcuerp naa, racladzda guḅ naa ncuaaḅe rnabey Dios; sac ngadoo xcuerp naa lo dol.

²⁴ ¡Probsaxe naa, znutaa nac xcuerp ngoopdolḷ naa nu! ¿Cho samiech ne diēḅ grieeḷo csilaa naa low; sac ncuaaḅe gnitlo naa miḅ co mazdraa rdziladza?

²⁵ ¡Xquizh Dios pxeel me Jesús biaadsilaa me ne lo dol!

¡Jesús nac meḅ ne psilaa naa!

(Znu nagon rzac naa: rienḅ naa nonguielḷ guḅ naa miḅe nac Xley Dios, per xcuerp naa leḷ laaw zianaḷ miḅe rnabey dol.)

8

None gban miech zigne racladz Espiritu Sant

¹ Laa ne gocndioḅ nasca ganḷe, zha ne ngab lo Jesús ndziibḅolḅdraa zho, ² sac zha ne ngab xnēz me, laa Espiritu Sant psilaale zho lo dol, laa me psilaale zho ladznia guielḷgut, laa me bdeedle tib guielḷmban cub lo zho.

³ Wlaltaa ib brieelod ley nsilaaw ne lo dol, gane mazd laa Dios pxeel Xpēed me biaadsilaa ne. Brieelod ley, sac grēse miech laa ne tsianaḷ zho miḅe rnabey ley, mazdraa zianaḷ zho ncuaaḅe ruḅntal xtolḷ zho. Gane zeēḅe pxeel Dios Xpēed me, goc me miech (lēēraasi ni tib dol beēḅd me), meḅ co gut bdiizh grēse xtolḷ ne, dzigo ga laa me psilaa ne ladznia dol.

⁴ Gacxe waa, niinasi zrieelo dziuḅḅ ne grē miḅe rnabey ley, per none gdeed ne diidz guionaḷ ne miḅe rnabey Espiritu Sant,

ni lalnu gdeete ne diidz gac miḅe racladz xcuerp ne nu.

⁵ Grēse zha ne mban zigne racladz xcuerp ngoopdolḷ zho, loxaque grē miḅ co rioxco zho; laa zha ne mban zigne racladz Espiritu Sant, miḅe rnabey Espiritu Sant rioxco zho.

⁶ Zha ne sca rioxco loxaque miḅe racladz xcuerp ngoopdolḷ zho, nēz ne nitlo zho ga zie zho; sangue zha ne rioxco miḅe racladz Espiritu Sant, laa zho zie nēz ne yгаа zho tib guielḷmban; peet dzeb, peet zhgab ctsebdraa zho. ⁷ Ni stiba, zha ne rioxco loxaque miḅe racladz xcuerp ngoopdolḷ zho, rlēēḅe zho Dios ga, sac nēd zho gban zho zigne rnabey xley me; ni niicle gacladz gaa zho, grieeḷod zho. ⁸ Miḅcocxe waa, ib rzacd zdoo Dios grē ncuaaḅe ruḅ zho.

⁹ Sangue to, mbandraa to zigne racladz xcuerp to, sinque laa to mban zigne racladz Espiritu Sant. Sca mban to, sac Espiritu Sant nacnie to. Nanḷe to ganḷe zha ne nacniēd Espiritu Sant, nliḅ xnēz Jesús no zho. ¹⁰ Ni to ne nac to zha ne nole xnēz Jesús, ibḷe zгаа to tib guielḷmban ndzon, sac laa Dios psilaale to lo dol. Nli zig nac xcuerp to, ncuaaḅe nitlo naca, sac por dol biaan sca no gaca; sangue zhiēspirituḅ, nitloda. ¹¹ Dios bleeban Jesús, ni scagaa teḷne nli nacnie to zhiEspiritu me, meque cueeban to.

¹² Bets, bzian, nodne dziuḅḅ ne ncuaaḅe racladz xcuerp ngoopdolḷ ne, zig nac zeēḅe pe nzēēb ne low. ¹³ Sac teḷne grē ncuaaḅe co tsianaḷ to, ibḷe znitlo to; sangue teḷne gḅab to gacniēḅ Espiritu Sant to csaan tow, dzigo ibḷe zгаа to tib guielḷmban. ¹⁴ Sac grēse zha ne zianaḷ zigne racladz zhiEspiritu Dios, ga rlu ne nliḅ paa xpēed Dios nac zho.

¹⁵ Golguiēḅ ganḷe, laa Dios bneedz zhiEspiritu me lo to, sac xpēedle me nac to niina. Tsode to sca gdziebd to me, zig nac zeēḅe cho tib ngundziin win nac to lo me. Xpēed me nac ne, gacxe waa zac tibḷiladz gnee ne lo me guiab ne: “¡Papá yeen!” ¹⁶ Ni Espiritu coque ruḅquiēḅ ne ne nli xpēed me nac ne.

¹⁷ Nana ne laa ne nacḷe xpēed Dios, scagaa dzigo ye ne ibḷe zгаа ne grēḷaa ncuaaḅe bdeed me lo Jesús.

Nli zгаа ne lo grē guielḷndzon ne no Jesús ga, per scagaa none dzianḅ ne grē guielḷnē niina ne laa ne ngab lo me.

Guielḷndzon ne naraa guiaad

¹⁸ Guielḷnē ne dzianḅ ne lo guidzliu rii, loxaque ne ngab ne lo Jesús, led ncuaaḅe rnad ga; mazdraa roobḅdoo nac lo guielḷndzon ne naraa dzianḅ ne. ¹⁹ Zig nac grēḷaa ncuaaḅe bzaa Dios, masaque quiaḅēznēw gdzinḅ dze zeēḅe laa grē zha ne nac xpēed Dios yгаа lo guielḷndzon co; ²⁰⁻²¹ sac gon, gaḷ dze co laa guidzliu guiaaḅḅme lo grēḷaa ncuaaḅe paat rquiind, lo grēḷaa guielḷntseeb ne no low

niina. Dios bdeed diidz biaan grē ncuuañ co low, per zeene gal dze co, zeene laa grē zha ne nac xpēed Dios laa lo grētaa guielntseeb, yew laaw laa.

²² Laga quiambēz grē ncuuañ co gdziñ dze co, masaque mban raca, rzaca zig rzac tib meñ wnaa ne quiyal xpēed. ²³ Ni ndion ne ganle, haxta ne, ne nac ne zha ne nacie Espiritu Sant (zeena glu ne ible zгаа ne grētaa ncuuañe gneedz me), mban rac ne quiambiaaz ne gdziñ dze co, zeene laa Dios ctsēē xcuerp rii ne ni ycaania me ne zig xpēedpaa me.

²⁴ Ndion ne ible zbee Dios ne lo grētaa ncuuañe rac lo guidzliu rii, per nana laa ne quiambiaaz dzianpaa ne gaca. Tib ncuuañe lēē ranle ne noyac, nod pe nacne yquiambēzraa new, ²⁵ per zeene quiambēz ne tib ncuuañe naraa gac, dzigo nodne guieed ne, sinque ine tiblrique gac ne yquiambēz new.

²⁶ Ni scagaa zeene lēbdraa ne, rienndraa ne zha guñ ne, Espiritu Sant nac meñ ne gacnien ne. Zig nac zeene gzodiidznie ne Dios, tel nesew nanñ ne zhapaa nonguiel gnee ne lo Dios, dzigo Espiritu Sant runcnee ne grē diidz ne rienñ ne zha nac. ²⁷ Ni Dios ne nac me meñ ne nanpaa pe rza zdoo miech, rien me pe rnee Espiritu Sant, sac mine racladz Dios gac min co rnab me.

Tsod ncuuañe yquiaaqui csaanladz Jesús ne

²⁸ Ndion ne ganle, zha ne nli dib zdoo rleynie Dios, zha ne rioxco gac grē mine racladz me, grēse ncuuañe rded zho, led lega rdete zhow, sinque no zaatne rquiina lo zho. ²⁹ Ni ndion ne ganle, zha ne nanle me ygab knēz me, desde mazd glow, pso me zho gac zho zig nac xpēed me Jesús. Lo grē zha ne nac xpēed me, Jesús nac meñ nroob. ³⁰ Ni grē zha co, laa me quiabedz zho, quiasilaa me zho lo dol, laa zho noyaanwen lo me; zeena yгаа zho lo guielndzon ne no me.

³¹ iZha nactaa ncuuañe lēē run Dios! Nana, tel scataa racie Dios ne, zcho nadien grieeo lega pe guñ ne? ³² Golgotsaa gwī ne ganle, haxta xpēed me bdeed me gut xcuent ne, grēse ne ne nac ne miech. Nana, zpe lel grē pe stib cos dzigo yquia zdoo me gneedz me lo ne?

³³ Ible Dios bzooblo ne, gacxe waa, ichoot rieguañd glisqui gnē lēda nodziuuñ ne! Sac gon, Dioszhal psanbe ne lo dol. ³⁴ iChoot rieguañd ycaadz dol ne! Sac gon laa Jesús gutle bdiizh me xtol ne; per brieaban me, ni na laa me zob cue Dios zaatne rieguañ me nac me meñ non. Ga no me quiaban me lo Dios por ne. ³⁵ iTibaque rleynie Jesús ne! Zeene nodziañ ne guielñe, zeene mban rac ne, zeene rtsidil miech ne, ib guiabd ne togo bod rleyniēd me ne. Niicle zeene

guiendzha pe gow ne, guienñ pe gacwxab ne, o noxtseebgaa ne guet ne, ib guiabd ne togo psaanladz me ne. iTibaque rleynie me ne! ³⁶ Ni zig nac xcuent guielgut, laaw raquetaque lo Xtiidz Dios, zaatne rnee:

Grēse no ne nac no zha ne ngab lo luu, tibaque noxtseeb no lo guielgut; masaque rzac miech no zig rzac zho grē mēcwxiiil ne golle guet.

³⁷ Niicxe peraa waa dieed ne, zdziuuñ ne gan low ni palal csanwinda ne, sac Jesús nacie ne; ni rleyniēdox Jesús ne.

³⁸ Nanween naa tsod ncuuañe yquiaaqui csaanladz Dios ne:

per ni guielgut,
per ni guielmban,
per ni anj],
per ni menodox,

per ni grē ncuuañe noyac niina, grēгаа ncuuañe naraa gaca.

³⁹ Niicle grē ncuuañe no glaa zhan gbaaw, niicle grē ncuuañe no guietraa zhan guidzliuw,

niicle grēragaa ncuuañe bzaa Diosa.

iNi tiba ycada, sac tibaque rleynie Dios ne! Ni laaw blule me ganle, zeene pxeel me Jesús (meñ ne rnabey ne), meñ ne gut bdiizh grēse xtol ne.

9

Ible Dios bzooblo zha Israel

¹⁻³ Bets, bzian, iBlactaa racladz naa guien grēraa zha Israel cho nac Jesús! Rquianē zdoo naa zho nac zho menladz naa, tibaque mban rac zdoo naa rsoladz naa zho. Haxta Jesús, haxta Espiritu Sant nan ganle rquiad zdoo naa naa niicle maase gdzibdee miech naa, maase nitlo naa guia naa zaatne gandraa naa Dios, telne niaca por min co laa zho guien zha gbiz zho lo Dios.

⁴ Blactaa quiayacniēn Dios zho, ni rond zho xtiidz me. Bzooblo me zho gac zho zha ne ygab lo me, haxta bzēnie me zho, gon zho ganle meñ ndzon nac me; biaan zho diidz grē zho me zha mod gunlay me zho. Psan me ley lo zho zeena guien zho zha gban zho, ni psan me diidz lo zho zha gleynie zho me. Nzian grē ncuuañe bnee me gdeed me lo zho. ⁵ Lēē pxozgoldoo zho ga goc Abraham, goc Isaac, goc Jacob, ni lo dii co ga briequia zha ne bded zig menlidz Jesús. Me nac Dios, me rnabey grētaa ncuuañe no, ni me rieguañd gacnon gzataa dze. Ible sca rieguañd.

⁶ Nana, no zho guiab godcaque grē mine bnee Dios ga yгаа zha Israel. Per led scada. Sinque lēē min co rgaa zha ne nlipaa rnalo Dios, sac zha co nac zha ne nlipaa nac zha Israel. ⁷ Nacda ne loxaque ziaad zho lo xtii Abraham, laa zho nacle merpaa zha Israel; sac gon, niicle ne nzian mēēd

pquianie Abraham, per rëb Dios loraque Isaac gac cuent zig xpëed Abraham. ⁸ Gase naganle rlu, zig nac niina, grë zha ne ziaad lo xtií Abraham, led grëd zho ngab lo Dios; sinque zha ne bzooblome me zigne bzooblo me Isaac, zha co ngab lo me. ⁹ Sac zig nac Isaac, ible Dios bnee lo Abraham grop Sar, ne laa Isaac gac mëed lo zho.

¹⁰⁻¹¹ Ni scasaque xpëed Isaac. Bdzin dze, zeene laa Isaac ptsieelnia wnaa ne lë Rebec, dzigo gop Rebec tibnëz mëedbgui. ¹² Bii zoney Rebec grop mëdyeen co, laa Dios bzooblome win ne brieelë Jacob rëb me, ne ible Jacob gac zha non lo Esau, win ne glo gal. ¹³⁻¹⁵ Laaw zhoobneeque lo Xtiidz Dios, zaatne znu rëb me: "Ible Jacob bzooblo naa beenlay naa, bzoblod naa Esau." Gard gal grop mëed co, per ni gard gacnan win zha nac guie|ntseeb, zha nacga guie|wen, laa me bzooblome tib win. Ga nagon, blu Dios ne mese nac men ne rieguia| rzooblo tel cho zha ne ygab lo me, nacda por pe ncuuaane noyun zho.

Nana, ¿pe dzdieets ne guie|ntseeb ga sca run Dios? ¿led guie|ntseebda! Tib vuelt rëb me lo Moisés: "Zha ne gacladz naa yquia zdoo naa, squia zdoo naa zho." ¹⁶ Ga nagon, zha ne runlay me, nacda porne zha rquiaguiba, o rioxcogaa zho yгаа zhow; sinque laa zho rgaaw, porne me rquia zdoo zho. ¹⁷ Gotsaa gwi ne ganle zha beenndip me zdoo rey Egipt. Lo Xtiidz me zhoobnee zeene rëb me lo rey co: "Ible laa naa bzo luo nac luu rey, luu yguib glu naa poder ne rap naa, zeena dib lo guidzliu guien miech ganle naa nac Dios."

¹⁸ Ga nagon rlu, zha ne gacladz me yquia zdoo me, rquia zdoo me zho; ni scagaa, zha ne gacladz me gunndip me zdoo, runndip me zdoo zho. ¹⁹ Nana, no zho gnë: "Telne scaw, ¿pe nac dzigo rlisqui Dios mine run miech, tel mezhall r nabey zha nac zho tib tib zho?" ²⁰ Per nana, ¿cho nac ne par glisqui ne mine run Dios? Zig nac tib guies ben, niacxe zlisquiw lo men ne bzaaw, guiaba: "¿Pe nacne znu bzaa luu naa?" ²¹ Led zha ne run dziin co, zrieelo gzaa zho tib guies zigne gacladztaa zho; tib lë ben ne xen zho, zac gzaa zhow tib guies niow, o gzaagaa zhow tib guies beelze.

²² Scaquegaa nagon rzac Dios miech. Grë zha ne psanle me nitlo, ible rap me derech csiaabzhan me zho, glu me poder ne rap me; per laa me bii quiayap zho paciens nieeda gdzin dze co. ²³⁻²⁴ Grëgaa zha ne bzooblo me yгаа lo guie|ndzon ne no me, zig-taa new ne nac ne zha Israel, zigtagaa zha stib guiedza; ible rap me derech bzooblo me ne, sac rquia zdoo me ne. ²⁵ Golsoladz ganle zha bzeet Osé, men ne biadteed xtiidz Dios padzeela. Bzeet me ible zbedz Dios grë zha ne nacd zha Israel ygab zho lo me, zeena

gleynie me zho niicle ne rleynie me zho glo. ²⁶ Laa stib lugar bzeet Osé, zha bnee Dios lo zho, rëb me: "Ngabde to lo naa, per dzin dze ne laa to gac xpëed naa, ne nac naa Dios nguiamban."

²⁷ Laa Isá stib men ne biadteed xtiidz Dios padzeela, zeene bzeet me zha Israel rëb me: "Niicle ne ndaldoo nac zha Israel pale yuzh ne ndxie ro nisdo, per zhis zho gac zha ne ycaania Dios; ²⁸ sac ziaadyoble gun Dios xquie|wxtis me lo guidzliu, zigne bnee me." ²⁹ Min co ga bzeet Isá mazd glo, rëb me: "Telne niaca mine yquiad zdoo Dios zha Israel, znitlo me zho grëse zho zigne bnitlo me zha Sodom ni zha Gomorr."

Zha ne nacd zha Israel laa zho wbig lo Dios

³⁰ Nana guiab ne: ¿Zha nac dzigo ne rcaania Dios zha zit? Laa me rcaania zho niina sac dib zdoo zho rnalo zho me, niicle ne waltaa ib bioxcod zho dien zha nsilaa me zho lo dol. ³¹ Laa zha Israel, niicle ne rioxcod zho run zho grë mine rnabey ley parne csilaa me zho, per ib laad zho lo dol sca. ³² Laad zho, sac zienied guic zho gnalo zho Dios, rzac zho por grë ncuuaane gunse zho laa zho laa lo dol. Mincoxe waa, zeene laa Jesús baaad, bzhaac zho me zig tib quie ne rriel ni ne riab ne liu. ³³ Lëe min co ga zhoobnee lo Xtiidz Dios, zaatne rnee: Sxel naa tib men lo zha Israel, me gac zig tib quie ne griel ni zho; sangue zha ne dib zdoo gnalo me, tsod dze ne tso zho guie|në, guiab zho pe nacne bnalo zho me.

10

¹ Bets, bzian, ne nlipaa rzaac naa tebaa zha laa grëse zha Israel lo dol, tibaque rnab naa lo Dios guien zho gbig zho lo me, zeena laa zho lo grë xtol zho.

² Parga nli rap naa noxcod zho gbig zho lo me; per rund zho mine no gun zho. ³ Ib riend zho zdoo Dios ral rsilaa me miech lo dol, laa zho rzac por mine gun zho laa me csilaa zho. Ib nëd zho gun zho mine racladz Dios. ⁴ Sac gon, laa Dios racladz Jesús gnalo zho zeena guiaanbe zho lo grëse xtol zho; sac Jesússe nac men ne brieelo been grëse mine rnabey ley.

⁵ Bzeet Moisés rëb me, zha ne gnalo ley ne lëew csilaa zho, none gun zho grëse mine rnabeya; ⁶ sangue zha ne gnalo Jesús ne me csilaa zho, nacda dien peraa gun zho. Nacda ncuuaane tso zho guiab zho, tebaa zha tsie zho lo me gbaa, gnab zho csilaa me zho (ncuuaane gacda ga, dzigo rriequia racladz zho guiet me ga stib); ⁷ o guiaabgaa zho tsie zho zaatne noliu grë gutoo, tsienab zho lo me csilaa me zho (ncuuaane gacdaque ga, ni stiba led gad no me, laa me brieebanle). ⁸ Rquiind paraa tsieguib zho csilaa

me zho, zig rzac zho zdoo zho, zig rzac zho ro zho, sca gax lo zho zo me quiambéz me csilaa me zho. Min co nac mine noseed no miech, rnee no lo zho: ⁹Zha ne cueero guiab zho Jesús nac men ne rnabey lo xquielmban zho, ni dib zdoo zho gliladz zho ni bleeban Dios me, dzigo silaa me zho lo grè xtoł zho. ¹⁰Sac none dib zdoo ne gliladz ne, dzigo sanmbe Dios ne lo dol; ni none cueero ne pe nac mine rliladz ne, dzigo scaania me ne. ¹¹Rnee lo Xtiidz me: "Zha ne dib zdoo gliladz Jesús, quitnied me zho."

¹²Grèse miech, niicle zha Israela, niicle-gaa zha stib guiedza ible sca ycaania me zho, sac led yed me rbe; me rnabey zho grèse zho, ni gréeta ncuane rap me, zdeed mew lo zha ne gnaba lo me. ¹³Rnee lo Xtiidz me: "Grèse zha ne gnab lo Dios csilaa me zho lo dol, ible silaa me zho."

¹⁴⁻¹⁵Nana, no zho gnè: ¿Per zha gnab zho lo me, ni runbeyd zho me? Nli gunbeyd zho me, tel niaca mine gard cho cxeel zha ne tsienee Xtiidz me lo zho, parne gon zho cho nac me. Ni min co rzeet Isá, zeene rëb me: "¿Zha wentaa ziaad zha ne ziaadnie Xtiidz Ndzon Dios!"

¹⁶Rgaaz Xtiidz Dios, per led grèd zho rzoobdiaga, zig rbiireque Isá, rnee me: "Dios, bui ganle choot néd gliladz Xtiidz luu, mine rne naa." ¹⁷Sac gon, parne dib zdoo ne gnalo ne Dios, ib none yquiaadiag ne Xtiidz me ganle cho nac Jesús.

¹⁸Zig nac zha Israel, ¿niacxe gard gon zho Xtiidz Dios? ¿Binle zhow! Blactaa zha ne ziyadnee Xtiidz me, haxta zaatne mazdraa zita, laa miech quiayacnan Xtiidz me. ¹⁹No hor rne naa: ¿Pe ib rienđ zha Israel, telne gbigd zho lo me csilaa me zho, laa me csilaa miech stib guiedz? ¿Per rienle zhow! Sac bzeetle Moisésa padzeela, zeene rëb Dios laa me ycaania miech stib guiedz, zha ne ib peet rienđ; zeena tednè zdoo zha Israel, togo ziaa zho biini. ²⁰Mincoque ga pquiaa Isá, zeene rëb Dios:

Grè miech ne ni zienied guic yguib zho naa, laa zho beenbey naa.

²¹Laa zha Israel, blactaa bzëëb nia naa lo zho ni naa niacnie naa zho, per pa nion zho xtidz naa, lel gocntseeb zho lo naa.

11

Zha Israel ne wbig lo Dios

¹Per guiabd ne togo psaanladzle Dios zha Israel. Golgan ganle, zha Israelacxe waa nac naa, zha xtií Benjamin, zha xtií Abraham nac naa; ²dzigo led psaanladzd Dios zho (nac zho zha ne padzeelale bzooblo me ygab lo me).

Golsoladz ganle, zha rëb Dios lo Lí, men ne biadteed xtiidz Dios padzeela, zeene bzodidznie Lí Dios ³gréeta ncuane noyun zha

Israel, ptił zho zaatne riegan grè miech me, beet zho grè zha ne pxeel me noteed xtiidz me, ni laa zho quiana laque gut zho Lí. Rzac Lí guien draa zha ne ron xtiidz me, ⁴dzigo hor co rëb me lo Lí: "Led tibd luu riaan, no zgadz mil zha ne gard yquitsgzhib lo Baal, naa bzooblo zho ygab zho lo naa."

⁵Scaquegaa niina nagon led grèd zha Israel psaanladz Dios, no palal zha ne pquia zdoo me ble me zho ygab zho lo me. ⁶Rne naa pquia zdoo me zho, sac guiabd ne togo por demas wen zho gane ble me zho; sac gon, tel por wen zhow, niid dzigo ne rquia zdoo me zho.

⁷Znu nagon naca: Zha Israel ne bzooblole me, zha cose guiaanwen lo me. Laa los demas zho, lel lozh gacndip zdoo zho, ⁸zigne zhobneeque lo Xtiidz me, zaatne rnee: "Beenndip Dios zdoo zho, rienđ zho zha gbig zho lo me; niicle ne zob lo zho, per rac zho zig rac zha ne ranđ; niicle zob diag zho, per rac zho zig rac zha ne peet rond. Ni scataque nac zho haxta lo nadze." ⁹Mincoque bzeet rey David, zeene rëb me:

Lëëque grè zhilni zho, lëëque grè ncuane row zho, gac zig len doo ne, len guix ne tsietsobe zho;

zeena yгаа zho guielne ne rieguial zho.

¹⁰Guiaan zho zig tib zha ne rołd lo, guiaan zho zig tib zha ne blozh blengw zhits.

Psilaa Dios zha ne nacd zha Israel

¹¹Grè zha Israel ne sca gocndip zdoo, guiabde to togo laa zho bnitole ga. ¡Lëda! Sinque laa me bdeed diidz sca goc zho, zeena gbig grè zha stib guiedz lo me csilaa me zho lo xtoł zho; ni tednëgaa zdoo zho gan zho laa me rcaania zha stib guiedz. ¹²Nana, telne scataa guielnzaac ne bgaa miech stib guiedz ne znu racndip zdoo zha Israel, ¿pe lelque dzigo zeene laa zho gbiire guiaanwen lo Dios stib? ¿Zha nac zhe grëraa guielnzaac ne yгаа miech!

¹³To ne nac to miech stib guiedz, led nanle to ganle, ible Dios bzo naa none naa Xtiidz me lo to. Scagaa naa, dib zdoo naa rioxco naa run naaw, ¹⁴zeena togo soobladz palal zha ladz naa ye zho squi gbig lo Dios csilaa me zho lo xtoł zho. ¹⁵¿Que talzhe ndzona zeene laa zho gbiire gbig lo Dios stib! Nli laa Dios psaan zho, laa grëgaa miech stib guiedz laa zho biaanwen lo me. Gacxe waa, ¡tib guielbley nrooba zeene laa me ycaania zha Israel stib! Sac gon, rrieequia grieeban zho ga.

¹⁶Zigne pcaania Dios xmengol zha Israel bgab zho lo me, scaquegaa scaania me xpëed zho; sac gon, zig nac tib zhan yag, zeene ndaan low mine naaza len liu, ndaanaque zhicwa. Scaque nagon, zeene

bzooblo Dios xmenḡol zha Israel, yele zho ga bzooblo me.

Nana, gzoob ne nac zha Israel zig tib zhan yag oliv: low nac xmenḡol zho, laa zho nac zhicwa. ¹⁷ Bdzin dze brug palal zhicwa, dzigo ga bguid zhicw yag oliv dan; l   yag oliv dan co nac to ne nac to miech stib guiedz. Sca nac ne laa Dios pcaania to zigne pcaania me xmenḡol zha Israel; ye to laa to nogaa guieInzaac co. ¹⁸ L  raasi, guiabde to togo nonraa to lo zha ne nac zhicwa mine brug ga. Golguien ganle, por lo yag ndaan zhicwa.

¹⁹ Nana, nend guiab to: "Per riogui   now, gacxe waa no biaan xlugar zhicwa, mine brug ga."

²⁰ jGolgap cuidad gon! Nli l   biche zho, laa to biaan xlugar zho, porne bn  d zho nalo zho Dios zigne bien to rnalo to me; per golguien gacniatsde to. ²¹ Golgan ganle, niicxe zha name zhicwpaa yag co nac zho ni ptiche me zho, jpelel to dzigo!

²² Golwi ganle zha wentaa Dios, per scagaa rdziladz me gats xtiidz me. Mincoxe waa gon dzed me gr   zha co, laa to gon wen goc me lo to. L  raasi none gon to mine rnabey me, sac gon telne gonde tow, scaque gandzed me to.

²³ Nana, zig nac zha Israel ga, telne gbiire gbig zho lo me, ible squid me zho lo yag co stib. jGolgan ganle men nroob nac Dios! ²⁴ Niicxe to na, nac to zig yag oliv dan, pquia zdoos to to pquid me to zhicw yag oliv wen co, jpelel zha Israel dzigo yquid zdoos me, gbiire yquid me zho lo yag ne nacpaa zho!

Scaania Dios zha Israel ne bzozit lo me ga

²⁵ Bets, bzian, laa naa gni lo to ganle zha nac mine no guic Dios gun me. Niicle ne riend miecha niina, per racladz naa gacnan tow, zeena gacniatsde to ne squi bzooblo me to: Nli ndal zha Israel racndip zdoos zozit zho lo me niina, per zeene laa gr   miech stib guiedz blozh wbig lo me, ²⁶ hor co gr  se zho, laa zho gbiire gbig lo me stib ycaania me zho. Zigne bzeetle zha ne biadteed xtiidz me, zeene r  b zho:

Guiedz Sion, ga gree men ne cuee zha Israel lo xquientseeb zho.

²⁷ Dzigo laa Dios csilaa zho lo gr  taa xtol zho, zigne psanle me diidz lo zho.

²⁸ Len dze rii rl   zha Israel ron zho none gnalo zho Jesus, par laa zho lo dol. Znu rac zho zeena gdeeda diidz gbig to lo Dios, nac to zha stib guiedz; sanque Dios rleynie me zho, sac scale r  b me lo gr   pxozgol zho. ²⁹ Me bzooblo zho, dzigo ible scaania me zho; sac gon, led yed me cts   xtiidz. ³⁰⁻³¹ Glo to nac zha ne ib bind xtiidz Dios, laa ninagaa na zha Israel n  d gon xtiidz me. Per zigne rquia zdoos me to niina, scaquegaa dzin

dze ne yquia zdoos me zho. ³² Gr  se miech, zigtaa zha Israela, zigtagaa tow ne nac to miech stib guiedza, laa Dios bneedz diidz sca gontseeb to lo me, zeena grielo glu me ganle ne lalga rquia zdoos me ne.

³³ jGotsaa gwi ganle zha men nroobtaa nac Dios! jPa lotaa rac me, pa lotaa rien me! jPa lotaa rioxco me miech! jCho grielo guien pe nac mine no guic me gun me, pe nacgaa gun mew? ³⁴ Zigne zhobneeque lo Xtiidz me, zaatne rnee: "jchoot nand pe no guic Dios gun me! jchoot grielod guiab lo me, znu znu been! ³⁵ Waltaa choot gard pe gdeed lo Dios, par guiab ne laa Dios z  b." ³⁶ jPeet gon nz  bd Dios lo miech! Sac gr  taa ncuaa ne no, me psana, me naaza, ni me rnabeya.

jMese nac men ndzon, tibaque gotsaa dziuunon ne me! Sca rieguiala.

12

Golban zigne rdziladz Dios

¹ Bets, bzian, laa to gocnanle ganle pa lotaa nquialadz Dios to. Nana sca, dib nacse to golsan to ladznia me, gac to zig tib gon mbe, tib gon ne gley me ycaania me. Sca glu to ne nli rleynie to me.

² Ib tsienaldr  a to gr   ncuaa ne ndzinlid ne noyac lo guidzliu rii, gr  se zhgab ne paat rquiind, golcueew guic to; zeena gban to zigne racladz me, ni guien to ganle zha wentaaw zeene zienal ne mine rnabey me.

³ Ne znu nac naa zha ne pquia zdoos Dios noyun naa dziin rii, nligaa laa naa rso diidz lo to, ndzinli golgac, ib glude to ncuaa ne ni nacde to, sinque golguien cho nac to, zha rnalo to Dios. ⁴⁻⁵ Golgan ganle zha niaa xcuerp ne: nzian l   niaaw, ni tib tiba nose zaatne rquiina; scaque nagon nac gr   zha ne ngab lo Jesus, nzian nac ne, per tib tib ne nose zaatne rquiin ne, tsod zha ne yquid. Gr  se ne none gnalolsa ne gr   zha ne nacgr   ne.

⁶ Tib tib ne bneedzse Dios guieIbiini lo ne, par grielo dziuun ne dziin ne pso me ne dziuun ne lo me. Gacxe waa, zha ne pso me cteed xtiidz me, none gnee zhow zigne csiaab mew guic zho;

⁷ zha ne pso me gun ncuaa ne yquid lo gr  raa miech, none gun zhow.

Zha ne pso me cseed miech, none min co gun zho;

⁸ zha ne pso me gdeedlban miech, none lban gdeed zho.

Zha ne pso me ygad, none dib zdoos zho ygad zho;

zha ne pso me so gnabey, none ndzinlise gnabey zho;

zha ne pso me cchoobladz zdoos zha ne mban noded, none nley gac zho tsie-nee zho lo miech.

⁹ Dib zdoo to golleynie samiech to. Gandzede to grè ncuuaane ntseeb, niapse ncuuaane rquiin goltsienal. ¹⁰ Ine niowse golleynie grè zha ne nacgrè to, gacnguizhde to, quitniede to zho.

¹¹ Nguieel golgac, gacmbechde to, dib zdoo to goltsoxco golgun mine nac xtsiin Dios.

¹² Nley golgac lo guielmban rii, golsoladz ganle zha nactaa grè ncuuaane no gneedz Dios lo to; golxecw lo grè guielnè ne gan to; tibaque golzodiidznie Dios.

¹³ Goltsoxco xliaadz grè zha ne nacgrè to ngab to lo Dios; zaacse golcuèzlo zha ne ziaadted lidz to.

¹⁴ Grè zha ne rtsidil to, laa ne gdzibdee to zho, golnab gunlay Dios zho.

¹⁵ Zha ne no guielbley, golgacnie zho lo xquielbley zho; zha ne nogaa guielnè, golgacnie zho lo xquielnè zho.

¹⁶ Gacniatsde to. Grè zha ne rzac miech peet nond, goltsieelsa zho; guiabde to to nac zha ne racraa. Niowse golbannie zha ne nacgrè to.

¹⁷ Zha ne csacsi to, gunde to ne yeque to csacsi zho. Goltsoxco wen golgac lo grèse miech. ¹⁸ Tilniede to samiech to, goltsoxco tibaque wen golbannie zho. ¹⁹ Golguien, zha ne csacsi to, ib guiabde to ne tozhal ctsire guielnè co, sinque golsana ladznia Dios, metaa nan zha gun me xquielwxtis me; zigne ziaad lo Xtiidz me zeene rëb me: "Naa raguial gun guielwxtis, naa gunquizh miech tel pe nac dol ne zëeb zho. ²⁰ Gacxe waa, zha ne rlèe lo luu, zeene gan luu mban rac zho rcaabedz zho, mazd bdeed ncuuaane gow zho; gangaa luu mban rac zho rnab zhis zho, bdeed ncuuaane guie zho. Sac zeene sca gun luu, stoladz zho csoladz zho mine been zho luu; rrieequia gui ga cuib guic zho."

²¹ Golguien sca, niapse guielwen goltsienal, zeena sca ycuëez to lo guielntseeb. Gdeete to diidz ne ye to gun guielntseeb.

13

Golgon mine rnabey wxtis

¹ Grèse to none gon to xtiidz zha ne nacpaa wxtis. Sac grèse zha ne nac wxtis, ible Dios rdeed diidz ne laa zho rac dziin co. ² Gacxe waa, zha ne racndaan lo wxtis, rrieequia ye lo Dios ga racndaan zho; ni zha ne racndaan, lëëque zha rguib ted zho caxtigw ga. ³ Golgan ganle, ible laa wxtis zo, par zha cobey caxtigw ne tsieguial zha ntseeb. Telne racladzde to sca tsoxtseeb to lo wxtis, zaacse golgac; scagaa zha, tsod pe nacne ygaal zho to. ⁴ Dios psan rzo zho ni zha rteedlo to, ni scagaa, telne pe guielntseeb ne gun to, zhaque gnabey pe caxtigw ne ygaa to; sac gon, ible laa Dios bzo zho gun zho guielwxtis. ⁵ Gacxe waa, ib none gon

to mine rnabey zho, zeena tsoxtseebde to lo zho, ni scagaa niicle nèz lo Dios a ine tiblise no guic to.

⁶ Scaque dimi ne no gdeed to lo zho, goldeeda; sac rquiin dimi co parne grieelelo gun zho tel pe nac dziin ne no gun zho.

⁷ Golguien sca, dimi ne no gdeed to lo zho, goldeeda; mine rnabey zho to gun to, golguia. Golleynie zho, quitniede to zho, golguien zha non nac zho.

Golleynie samiech to

⁸ Grè ncuuaane rieguial to gun to, golgungazha zeena bdedgaw; sangue samiech to, none tibaque gleynie to zho. Zha ne rleyne samiech, grèle mine zhoobnee lo Xley Dios ga quiaayun zho. ⁹ Sac telne rleyne to samiech to zigne rleyne to to, nod pe nacne csacsi to zho; guiab to:

laa to yquidie zho,

laa to gut zho,

laa to cuan zho,

laa to tsonie tsieel zho,

gzoobladzga to grè ncuuaane quianie zho.

Gacxe waa, zha ne rleyne samiech zigne rleyne zho zho, grèle mine zhoobnee lo Xley Dios ga quiaayun zho. ¹⁰ Zha ne rleyne samiech, rsacsidraa zho zho; ni min co rnabey Dios. Gacxe waa, grèse ne none gleynie ne samiech ne.

¹¹ Ib none gban ne zigne racladz Dios, golle na tsaa ne biini; sac gon, laa dze ne ycaania Dios ne bii ziaadgaxraa, lèdle zeene psilo rnalo ne me. ¹² Dziuun ne cuent laa guieel lozhe ted, laa biini ne guini liu dze ndzon co ziaadle; gacxe waa, ni lalnu guionald ne mine racladz mendox, sinque mine racladz Dios, min co golgotsaa dziuun ne. ¹³ None ndzinli gban ne:

dziuund ne guielgonziu,

dziuund ne grè lni yozh,

yquiangobd ne zha ne led tsieeld ne,

dziuund ne grè guielyozh ne racladz xcuerp ne,

dilnied ne samiech,

glëenied ne zho zeene stib noded zho.

¹⁴ Golgotsaa gnab ne lo Jesús sca, zig zie dze lozh csanmbe me xquielrien ne, csanmbe me zdoo ne, gac ne zigne racladz me. Dziuundraa ne grè ncuuaane ndzinlid ne racladz xcuerp ne.

14

Gzeed zdoo to mine run zha ne nacgrè to

¹ Golcaania zha ne gard tsoguicpaa zha nac Xtiidz Dios. Telne no palal mine riladz to zhaa rzac zho, glisquide tow lo zho.

² Gzoob ne, no to rzac peet nacda gow to grè lose guielwagw, laa zha ne na gard tsoguicpaa Xtiidz Dios, rzacga wena telne scuaan guizhyese gow zho; ³ ga nagon, ni stib ni stib nod pe nacne glisqui dien cho pe row,

diēn cho pe rowdga; sac gon grēse to, Dios bzooblo to ngab to lo me. ⁴ Nana zig nac zho, lo Dios ngab zho, led lode tow; ¿cho nac to dzigo tso to glisqui to diēn pe run zho? Dios nac meñ ne nan telne lēw o lēdgaaw ga quaiyuñ zho; meñ nroob nac Dios, me gdeed guielbiini lo zho guien zho gban zho zigne racladz me.

⁵ Scaque, no zho zienał diēn pa dzepaa none gleyne zho Dios, nogaa zho rnee zac tel pa dzetaa gleyne zho me. Per peet nacd ga, zac tib tib zho gunse zho miñe rzac zho rdziladz me. ⁶ Tel pa dzetaa wena, totsaque run zhow par gunñon zho me. Scaquega guielwagw, wena zha ne gow grēlosew; niicle zha ne ncuuegaa ncuuañe gow, wenaquew, totsaque run zhow par glu zho ne rleyne zho me, ni rdeed zho xquizh lo me.

⁷⁻⁸ Sca nagon naca, per led miñ cod dzieets ne dziuun ne miñe gacladztāa ne. Grēse ne ne nac ne zha ne ngab lo Dios, laa ne mban par dziuun ne miñe rnabey Jesús, ni zeene guetgaa ne, lo me none gdziñ ne. Gacxe waa, niicle niina ne zomban new, niicle zeene gutlegaa new, ladznia me no ne. ⁹ Sac gon, tel Jesús gut me ni brieaban me; gacxe waa, me rnabey ne grēse ne, zigtaa zha mbana zigtagaa zha guta.

¹⁰ Jesús rnabey ne tib tib ne. Gacxe waa, nonguiēda glisqui to lo zha ne rund miñe run to; nonguiēda por miñcose sac to zho zig zha ne peet nond, tso to gneedraa to lo zho. Ni stiba, gal dze ne laa Dios gun guielwxtis, grēse ne laa ne none gacredz lo me. ¹¹ Zigne raquietaque lo Xtiidz me, zaatne rnee me: Naa nac Dios mban, gneli naa lo to ganle: grēse miech, ible squiitsgzhib zho lo naa, cuero zho ne nli naa nac Dios.

¹² Sca nagon gaca, tib tib ne ib laa ne no cuero lo me tel zha wban ne.

Csande to zdoo zha ne nacgrē to

¹³ Nana sca, zha ne sca rund grē miñe run to, ible glisquidraa tow lo zho. Golguien, gunde to ncuuañe rgobey to yquiaaqui gunctal zho xtol zho, o csaangaa zho Xtiidz Dios. ¹⁴ Tel naa, nanpaa naa led dolda gow ne grē lose guielwagw; sac niicle Jesúsā scaque nac xtiidz me. Sangue zha ne rzac dola, mazd gowd zhow; sac tel laa zho gowa, xtol zho ga gunctal zho. ¹⁵ Zig rne naa ga led dolda, per telne xtsiinpaa row to tib ncuuañe rquiaqui rsan to zdoo stib zho, ga rlu to ne rleyniede to zho. ¿Golguien sca, gowde to ncuuañe yquiaaqui sozit zho lo Dios! Sac gon, blactaa guielñe ne bded Jesús psilaa me zho.

¹⁶ Ib gunde to grē ncuuañe yquiaaqui gneenē miech to, niicle ne nanpaa to led dolda. ¹⁷ Zha ne ngab lo Dios, miñe none tsienie guic zho nac ne ndzinli gban zho, tiñied zho samiech zho, ine nley gac zho

(miñ co nac miñe rdeed Espíritu Sant); led tsod zho diēn pe zac gow zho, pe zac guic zho, pegaa gacda. ¹⁸ Sca rdziladz Jesús, ni zha ne sca gban, zleyne Dios zho, niiclegaa grē miecha zleyne zho zho.

¹⁹ Goltsocxo sca, gunde to ncuuañe codil to grē zha ne nacgrē to; zeena tipse gac to lozh tsoguc to zha racladz Dios gban to. ²⁰ Ib gunde to, ne por tib guielwagw codil to grē zha ne ngable lo Dios. Zig rnele naa ga, grēlose guielwagw mbew, peet nacda gow new; sinque miñe nonguiēda, nacne gow ne miñe nanpaa ne yquiaaqui csañ ne zdoo stib zho. ²¹ Miñcocxe waa, mazd gowde to pe scuaan bēēl, guiede to nziu, telne miñ co yquiaaqui gunctal to xtol zho; ni tel pe grēraa ncuuañe nan to tsod zdoo zho, gunde tow.

²² Niicle ncuuañe nanpaa to dolda gun tow, niiclegaa nēz lo Diosa led dolda; per mazd gunde tow zeene zo zha ne rzac dola. ¿Wen zie zha ne sca niicle nanpaa zho dold nac miñe gun zho, per rund zhow, parne gunctald zho xtol zho!

²³ Sangue zha ne racchop guic riend zho diēn pe zow zho tib guielwagw, ni lozh ga row zhow, runctal zho xtol zho ga; sac beend zho miñe rzac zho rdziladz Dios. Grēse ncuuañe rzactaa zho wend ni gun zhow, xtol zho ga gunctal zho.

15

Golgacnie zha ne nacgrē to

¹⁻² Golguien sca, to ne nac to zha ne dziitsle zo lo Xtiidz Dios, golgacnie grē zha ne gard sodziits lo Xtiidz me. Golgun ncuuañe tso zdoo zho, ncuuañe yquini lo zho, zeena lozh guien zho zha gnalo zho Dios; led tsode to gun to ncuuañe yquiuise lo to.

³ Golgan ganle, niicle Jesúsā bguibd me niac ncuuañe nquini lo me. Zigne raquietaque lo Xtiidz Dios, zaatne rnee: “Grētaa diidznē ne rnee zha ne rlēē lo Dios, grēsew pcon zho me.”

⁴ Grēse miñe raquiet lo Xtiidz Dios, padzeela pquiw; ni ib laaw pquia zeena gacndion ne zha no gban ne. Lēw rnee none nley gac ne, lēw rnee guieete ne yquiambiaaz ne yga ne grē miñe bzeetle Dios. ⁵ Dios meñ ne rneedz guielbley co, meñ ne racniēn ne guieete ne, me gacniēn to niowse gbannie to grē zha ne nacgrē to. Golleynie zho zigne rleyne Jesús to, ⁶ zeena grēse ne tipse gac ne dzioolnie ne Dios, Pxoz Jesús, meñ ndzon ne rnabey ne.

Grēse miech noyon Xtiidz Ndzon Jesús

⁷ Golguien sca, grēse zha ne nacgrē to, golcaania zho zigne pcaania Jesús to. Sca golgun, zeena xoobnenraa lē Dios.

⁸ Golsoladz ganle, zeene biaad Jesús nroob ncuuañe beēñ me lo zha Israel, me bi-aadgun grētaa miñe bzeetle Dios padzeela.

Ga blu Jesús grêse miñe rnee Dios, ib run mew. ⁹ Ni golsoladz ganle, ye grê miech stib guiedz biaadsilaa me, gane niina grêse zho roolnie Dios, ne scataa pquia zdoo me zho. Miñ co raquiet lo Xtiidz me, zaatne rnee: Zoolnie naa luu, ni zlu naa lo grê zha stib guiedz ne men non nac luu.

¹⁰ Stib lugar rnee:

To ne nac to miech stib guiedz, jine nley golgac grê to zha Israel!

¹¹ Ni no stib zaatne rnee:

Grêse to ne nac to miech stib guiedz, jgolleynie Dios! jGolsanznuu lè me!

¹² Miñcoque ga bzeet Isá, zeene znu pquiaa me:

Zrieequia tib men lo xti Isai; men co gnabey lo grêse miech stib guiedz, ni me gnalo zho grêse zho.

¹³ Miñcocxe waa, to ne nac to miech stib guiedz, rnab naa lo Dios (men ne psanle diidz pe nac grê ncuane ygaa ne ga) gneedz me guiebley lo to, gacnie me to peet zhgab ctsebd to niina ne laa to riladzle me. Rnab naa lo me, gacnieñ Espiritu Sant to ine gley to yquiambéz to gac grê miñe psanle me diidz ga.

¹⁴ Bets, bzian, nanle naa zha wen nac to, nacte to zha ne csan zdoo stib zho; rienle to zha racladz Dios gban to, rienle to zha cso to diidz lo grê zha ne nacgrê to; ¹⁵ per lo guits rii gon nzian ncuane rso naa diidz lo to. Guiabde to togo ndox naa lo to, sinque laaw ben naa zeena guiaanladzde tow. ¹⁶ Ne nquialadz Dios naa, laa me bzooblo naa noyun naa xtsiin Jesús, none naa Xtiidz Ndzon me lo grê miech stib guiedz, zeena csanbe Espiritu Sant zho; lozh ga gded naa zho lo Dios zig tib gon ne gley me ycaania me.

¹⁷ Gacxe waa, tel niina rley naa sac noyacnieñ Jesús naa noyun naa dziin ne pso Dios naa. ¹⁸ Me noyacnieñ naa none naa Xtiidz me lo grê zha stib guiedz, zeena gban zho zigne racladz me. Ni laa zho nobig lo me, sac ran zho grêse miñe rne naa mban naaw zigne naca, ¹⁹ ni ran zho zha racnieñ Espiritu Sant naa run naa grê milagr, grê ncuane rzee zdoo zho. Sca nagon none naa Xtiidz Jesús lo zho, brie naa Jerusalén brieequia naa haxta nêz xtan zha Ilir. Guiabde to togo rtix naa diidz. ²⁰ Ni laa naa noxco za naa zaatne wlaltaa gard gon zho cho nac Jesús, zeena gasëëbd naa zaatne zizele zha ne güeynee Xtiidz me. ²¹ Laa naa zanañ zigne zhubnee lo Xtiidz Dios, zaatne rnee: "Grê zha ne wlaltaa gard gon cho nac me, zeene gan zho grêtaa ncuane run me, laa zho gunbey me."

Racladz Pabl tsie Pabl Roma

²² Nzian vuelto gocladz naa nialgan naa to, per ib bdeetew diidz, sac laa naa bia grê dan co biaseed naa miech. ²³ Izle ga na tibaque sca no guic naa, laa niina ne laa naa psiaal lo xtsin naa, nataa nagon ible zial naa. ²⁴ Laa naa no ga Spañ, dzigo lèe nêze ga teed naa Roma i guialgan naa to. Tib guiebleya lo naa guialquiabdiuuzh naa to, dzigo lozh ga siguiel to gun to xyudar naa grielo ga naa nêz Spañ.

²⁵ Laa niina, laa naa no ga Jerusalén gasan naa tib gon lo grê zha bets, zha bzian ne no ga; ²⁶ sac grê zha bets, zha bzian, ne no nêz Macedon, ni nêz Acay, laa zho bnediidz beenlo zho palal dimi cxeel zho yquiiin grê zha prob ne no nêz co. ²⁷ Niapse zdoo zho gol ptop zho gon co, sac rzac zdoo zho grêtaa miñe been zha Jerusalén lo zho; sac gon, zha co güeynee Xtiidz Ndzon Jesús lo zho. Laa niina, laa zho rxeeñ palal ncuane rgaa lo zho yquiiin zha Jerusalén.

²⁸ Zigne lozh nagon gasan naa gon co Jerusalén, dzigo laa naa teed guialgan naa to i zigne nile naa ga. ²⁹ Rien naa nroob guieñzaac ne gneedz Dios lo to zeene laa naa guial.

³⁰ Bets, bzian, golguieñ ganle Jesús rnabey ne grê ne; ni rleyne ne zha ne nacgrê ne, sac Espiritu Sant nacnie ne. Gane niina, laa naa rnab lo to, golgotsaa gnab ne lo Dios gacnieñ me naa; ³¹ golnab lo me, csilaa me naa ladznia grê zha Israel ne gard guieñ cho nac Jesús. Golnab lo me, ine gley grê zha bets ne, zha bzian ne, ycaania zho gon ne gasan naa lo zho nu; ³² zeena ine nley no zdoo naa glanso naa lo to, ine gdziiladz naa len dze ne cuëz naa lo to i. Sca nagon no guic naa, totsaque gneedz Dios diidz gaca. ³³ Ni me ne nac me men ne rbee miech lo grêse zhgab, lo grêse guieñtseeb, me gacnieñ to. Sca gaca.

16

Bdiuzh

¹ Bets, bzian, len dze rii laa Feb, tib wnaa ne run xtsiin Dios guiedz Cencre, laa me guiaad nêz lo to i. ² Laa naa rso diidz lo to, zeene glanso me i niowse golcaania me, golcaania me zigne rieguial ycaania ne zha ne ngab lo Dios. Golsiguiel goldeed grê ncuane yquiiin me; sac gon, tel me ndal grê zha ne ziyacnie me lo xliaadz zho, haxta naa blactaa ziyacnie me naa.

³ Ni rnab naa lo to, golsiguiel goldeed zhibdiuzh naa lo grê zha qui.

Goldeed tib zhibdiuzh naa lo Aquil i, grop tsieel me Priscil. Blactaa ziyacnie zho naa zidziun no xtsiin Jesús, ⁴ haxta bdedlaa zho niet zho psilaa zho naa lo guieñgut. Rzacdoo zdoo naa miñe been zho ga, niicle grêragaa zha zit ne nacgrê new, rzac zdoo zhow.

⁵ Ni scagaa, grè zha ne rcaalsa lidz zho riegoalnie Dios, goldeed zhibdiuzh naa lo zho. Goldeed zhibdiuzh naa lo Epenet, rley naa rsoladz naa me; lèè me nac zha Asia ne glopaa bzèèb xnèz Jesús.

⁶ Goldeed zhibdiuzh naa lo Marí, blactaa noyũ me xtsiin Jesús lo to.

⁷ Goldeed zhibdiuzh naa lo Andrónic, lo Junias, grop menladz naa zha ne no i; gzapaa no zho bdzio ladzguuib. Glo zho bliladz Jesús lo naa, zha nziuu nac zho lo grè zha ne pxeel Dios nonee Xtiidz me.

⁸ Goldeed zhibdiuzh naa lo Ampliat, lèè stib zha ne rdzieel xtidz naa ga; ⁹ lo Urban, rsoladz naa me, tipse bdziuuñ no xtsiin Jesús grop no; lo Staquis, stib zha ne nziuu lo naa, goldeed zhibdiuzh naa lo zho; ¹⁰ lo Apel, ye me blactaa ncuaañe bded me blu me ganle ne nli dib zdoo me rnalò me Jesús; lo grè zha ne no lidz Ristob ne.

¹¹ Goldeed zhibdiuzh naa lo Herodion, ye me menladz naa nac me; lo grè zha ne no lidz Narcis, zha ne riladzle Jesús; ¹² lo Trifen, lo Trifós, ni lo Pérsida, gza men wnaa rii blactaa noyũ zho xtsiin Jesús.

¹³ Goldeed zhibdiuzh naa lo Ruf, zèèb xtidz me lo grè zha ne nacgrè ne; goldeed zhibdiuzh naa lo xniaa me ne, ruñ naa cuent lèè stib xnia naa ga, blactaa pteedlo me naa. ¹⁴ Goldeed zhibdiuzh naa lo Asíntric, lo Flegon, lo Hermes, lo Patrob, lo Hermas ni lo grèragaa zha bets ne nacgrè zho.

¹⁵ Goldeed zhibdiuzh naa lo Filólogo, lo Jul, lo Nerew grop bzian me, lo Olimp ni lo grèraa zha bets ne nacgrè zho.

¹⁶ Grèse to bets, grèse to bzian, golcaania zhibdiuzh naa. Grèse zha ne riladz Jesús nèz rii, laa zho rxeel bdiuzh lo to.

¹⁷ Nu ne laa naa csiaalle lo guits rii, laa naa rso diidz lo to, nsin golso lo grè zha ne ziaad loxaque dien zha codil zho to, dien zha gunğüet zho to, rlu zho mine ni nacdraa Xtiidz Jesús; yquiaadiagde to zhiwseed zho.

¹⁸ Grè zha co, led xtsiin draa Jesús ga ruñ zho, sinque laa zho noxco ncuaañe gdeed guxt xcuerp zho. Diidz nex, diidz ndooladz rnee zho; grè miech ne beelze pe riladz, znuse rquidie zho zho. ¹⁹ Sanguè to, zèèb diidz ne ib rsaande to mine nac Xtiidz Dios, zienal to mine rnabey me.

Rley naa ron naa squitaa nguzobdiidz to. Racladz naa tibaque squi niini gac to, zeena guien to niapse ncuaañe yquiin gun to, ni lalnu tsoode to lo guie!ntseeb. ²⁰ Scagaa Dios men ne rtiche grèse zh-gab, grèse dzeb, merle quixdze me Satanás, zeena peet grielodraa gun ma. Jesús, men ndzon ne rnabey ne, me gacnien to.

²¹ Golcaania zhibdiuzh Timoté, men ne quianie naa xtsiin Jesús, laa me rxeel bdiuzh lo to; scaque zha ladz naa Lus, Jasón ni Sosípater, laa zho rxeel bdiuzh lo to.

²² (Naa nac Ters, naa noquia guits rii, ye naa laa naa rxeel zhibdiuzh naa lo to i. Rleynie naa to, sac ye to ngab lo Jesús.

²³ Golcaania zhibdiuzh Gay, men ne rbèz naa lidz, laa me rxeel bdiuzh lo to. Lidz me nu rcaalsa grè zha ne riladz Jesús nèz rii. Ye Rast, men ne nac wxtis quianap xtimi guiedz rii, ni bets ne Cuart, laa zho rxeel bdiuzh lo to. ²⁴ Jesús men ne rnabey ne, me gacnien to grèse to. Sca gaca.)

²⁵ Laa naa rsan to ladznia Dios, me gacnien to lozh sodziits to lo Xtiidz me, mine none naa lo miech. Haxta zeene gard tsaá guidzliu, znu no guic Dios csilaa me grè miech lo xtol zho, per choot gocnanda, naraa laaw bzhoobnen. ²⁶ Laa niina, nzian zaatne nogaaz Xtiidz me, zeena grèse zho guien Jesús none gnalo zho, ni mine rnabey me min co no gun zho. Grè zha ne biadteed xtiidz Dios padzeela, bzeetle zho ne znu gaca, ni ible Dios rnabey ne znu gaca.

²⁷ ¡Mese nac Dios, mese nac men ne nliipaa rien! ¡Tibaque sca golgotsaa dziuunnon ne me, grèse ne ne nac ne zha ne ngab lo Jesús! Sca rieguiala.

Pabl

GUILTS NE GLO PXEEL PABL LO ZHA CORINT

¡Diuzh to grëse to! ¹ Naa nac Pabl, ible Dios bzooblo naa znu quiayun naa xtsiin Jesús. Grop no bets ne Sóstenes rquiaa guits rii rxeel no lo to.

² Laaw ziaad lo to i, grëse to ne nac to zha ne ngable xnëz Dios no to guiedz Corint i, nac to zha ne bredz Dios ngab lo me, psanbe me to zeene laa to bliladz Jesús; zigne psanbeque me grëse miech ne no dib lo guidzliu, zha ne bliladz Jesús, men ne rnabey ne grëse ne.

³ Dios men ne nac Pxoze, ni Jesús men ne rnabey ne, me gacniën to, me glu lo to ganle pa lotaa noxco me to; zeena peet tsienied guic to.

⁴ Gzataa zeene rzodiidznie naa Dios, rded naa xquizh lo me por grëtaa ncuane zi-needz me lo to, niina ne laa to riladz Jesús.

⁵ Sac gon porne riladz to Jesús, blactaa ziyunlay me lo xquielmban to, noyacniën me to quaiyogucraa to zha nac zhiwseed me, rien to zha gnee tow lo miech. ⁶ Rlu zienal to mine nac Xtiidz Jesús, zigne binse tow, ⁷ gacxe waa bneedz Dios grëtaa guielbiini lo to, zeena guien to zha gban to, laga quiambëz to gdzin dze ne guiaad Jesús men ne rnabey ne. ⁸ Ni Dios nac men ne gacniën to tiblique gac to lo Xtiidz Jesús, zeena ni tib falt rapde to gal dze co. ⁹ Sca nac xtiidz me, ni mesi gon çtsëed me mine rnee me, ible laa me bredz to gacnie to Xpëed me Jesús, men ndzon ne rnabey ne.

¹⁰ Gacxe waa bets, bzian, laa naa rso diidz lo to niowse golgac, tsodildraa to. Ine tipse golgac grë to, tel pe nac dziin ne gun to, tel pe rzac to, tipse golnee. Ne nligaa golgona, zig nac zeene Jesússhal noso diidz rii lo to. ¹¹ Sac gon në tib zhalidz Cloé lo naa nodillsa to i; ¹² no to dien cho xnëz ngab to. No to rnee: "Xnëz Pabl no naa"; riasaque zha ne rnee xnëz Apol no zho, rrieequigaa zha ne rnee xnëz Pedr no zho; haxta no zho rzac zhase nac zha ne nliipaa no xnëz Jesús. ¹³ Ne squi rac to, çpe rzac to dzigo squi nzian lé nac Jesús? Zha ne rnee xnëz Pabl no zho, çpe niacne naa pquia lo cruz gozh xtol zho?, çte brobnis zho ye par ygab zho lo naa?

¹⁴ ¡Xquizh Dios led naad pchoobnis to grë to, lëese chop zha ne pchoobnis naa nac Crisp ni Gay! ¹⁵ Zeena tsod pe nacne guiab to xnëz naa ngab to, sac naa pchoobnis to. ¹⁶ Ah, ni naaque gon pchoobnis grë menlidz Stef. Bod lëese zha ne pchoobnis naa ga, ¹⁷ sac gon pxeeldaxe Jesús naa waa cchoobnis naa miech, sinque laa me pxeel naa cseed naa zho gacnan zho zha grieelo laa

zho lo dol. Haxta bod ligase bzhaac to mine bialne naa lo to, sac ib zanald naa pe guielrac, pe diidz ngan ne gne naa; sac nacda gleynie miech zha rnee naa, sinque gliladz zho cho nac Jesús, pe nacne gut me lo cruz.

Diosse nac men ne rien

¹⁸ Min co nagon noxco naa, maase niicle no grë zha ne rzac ncuane paat rquiind ga been Jesús gut me lo cruz, per lëe zha co nole nëz ne nitlo zho; sangue ne ne nac ne zha ne psilaale me lo dol, ndion ne ganle ga blu pa lotaa nac poder ne rap Dios. ¹⁹ Noyaca zigne zhubneeque lo Xtiidz Dios, zeene rëb me:

Znitlo naa grë guielrac ne rzac zho csilaa zho,

niicle rzac zho mazdraa zhooba guic zho, ni lalnu yquiinda.

²⁰ Ni nligaa, grë zha rac, grë zha rien, grë zha ne rzob dien cho nroobraa rac, ib blud grë zhiwseed zho ga lo zho zha csilaa Dios zho, chogaa nac Dios. Ga blu Dios ganle lega nacse grë guielrac ne no lo guidzliu rii.

²¹ ¡Diosse nac men ne rien! Bien me grielod gunbey miech me por xquielrac zho, nacne bnabey me zha ne dib zdoo gliladz xtiidz me, zha co csilaa me; niicle ne rzhidznie miecha, rzac zho ncuane paat rquiinda.

²² Zig nac grë zha Israel, grë zha Gres ncuane paat rquiinda rzac zho. Grë zha Israel, racladz zho ganlo zho grë milagr nroob par glu ne diidzliw; laa zha Gres na zienalгаа gaca zigne nac zhiwseed zho, sac laa zho zienal guielrac ne no lo guidzliu rii. ²³ Gacxe waa zeene rnee no lo zho Jesús men ne pquia lo cruz, men cose csilaa miech, rlëe zha Israel ron zhow; laa zha Gres, rzhidznie. ²⁴ Sangue ne, ne nac ne zha ne bredzle Dios bzëeb xnëz me, zigtaa zha Israela, zigtagaa grëraa miecha, ndion ne ganle Jesús nac men ne biaadlu pa lotaa nac poder ne rap Dios, me biaadlu pa lotaa nac xquielrac Dios. ²⁵ Mine rzac miech paat rquiind ga been Dios, ni nand zho ndziibguicraa nac min co lo grë xquielrac zho; zha ne rzacgaa çholze cho men nsis ga sca gut lo cruz, ni nand zho lëe men co mazdraa ndip lo grëse miech guidzliu.

²⁶ Bets, bzian, golgan ganle lo grë to ne nac to zha ne ngab xnëz Dios, led grëde to nac zha rien nëz lo miech, led grëde to nac zha non, zha ne ziaadгаа lo grë dii ne nziuu lo zho. ²⁷ Per ib laa Dios nobedz grë zha ne rzac miech peet riend, grë zha ne rzac zho nac zha nsis, parne gunctoladz me grë zha ne rzac zho nac zha rac, zha non. ²⁸ Laa me nobedz grë zha ne sca rzac miech paat rquiin, zha ne rzac zho peet nond, parne guioog ro grë zha ne rzac zho nac zha non, zha nziuu. ²⁹ Ga rlu me ganle ni tib choot grielod gacniats lo me. ³⁰ Golwi ganle, niapse por me laa ne nacie Jesús, grë

guielrac, grë guielrien ne rdziaap ne, Jesús bneedza, ni Jesús nac men ne psilaa ne lo grëtaa xtol ne, men ne psanmbe ne laa ne bziaab xnëz Dios. Dios bnabey sca goca. ³¹ Gacxe waa choot grielod gacniats, zigne ziaadaque lo Xtiidz me zaatne rnee: "Zha ne racladz gacniats, mazd gunnon zho Dios por grëtaa ncuuaane run me."

2

Xtiidz Jesús bnee Pabl

¹ Gacxe waa tel naa, golsoladz ganle bets, bzian, len dze ne bialseed naa to Xtiidz Dios, bned naa dien pe diidz nroob, dien pe diidz ndzielguic lo to. ² Bend naa dien peraa nseed naa to, sinque mine nac zhiwseed Jesús min co bialne naa, zeena gacnan to cho nac me ni pe nac ne pquia me lo cruz. ³ Lega gzhe gzhe rac naa, haxta rzhidz naa, rdzieeb naa no naa lo to. ⁴ Zeene laa naa psilo bne Xtiidz Dios lo to i, gon to ganle ib bned naa zigne rnee grë zha ne nac zha rac lo guidzliu rii; per blu Espiritu Sant ganle nacda beelze pe wseed, ni blu ganle pa lotaa poder ne rap Dios. ⁵ Sca bne naa lo to, sac laa naa racladz zha ne gbig sëeb xnëz Dios, me gnalo zho, gnalod zho grë mine nac xquielrac miech.

⁶ Parga nli no zaatne rnee no grë diidz nroob, diidz ndzielguic, per laa min co rnee no lo grë zha ne rienraa zha nac Xtiidz Dios, ni nacdgaaw zigne nac grë xtiidz ndzielguic grëraa miech, grë diidz ne rleynie grë zha rnabey ne no lo guidzliu rii; sac zigtaa zhaw, zigtagaa zhiwseed zhow, ncuuaane tibrde naca. ⁷ Grë diidz ne rnee no, ndzielguic naca, sac zhiwseed Diosa, lëë xquielrac me ga. Ndzielguica, sac ga rlu me zha no guic me csilaa me miech gdzin zho lo guielndzon ne no me; gocnand miecha padzeela, per nolew zeene bzaa me guidzliu. ⁸ Grë miech ne no len dze rii, rioguicd zho zha nac xquielrac Dios; sac telne nioguic zhow nabeyd zho nquia men ndzon ne nac Jesús ga lo cruz. ⁹ Zigne zhobneeque lo Xtiidz Dios, zaatne rnee:

Ncuuaane waltaa gard guien miech, nac grë mine quianiele Dios gdeed me lo grë zha ne nlipaa gbig lo me gleynie zho me.

Ncuuaane choot gard gana, ncuuaane choot gard gona.

¹⁰ Sangue no laa no ndionlew, sac pxeel me zhiEspiritu me blu lo no zha naca, men co nan grëse mine no guic me.

¹¹ Zig nacse tib miech, grielod gacnanpaa ne dien pe nac mine no guic zho, pe nacgaa mine rza zdoo zho, loxaque zhiespirituse zho nana; scaque Dios, loxaque zhiEspiritu me nan grëse mine no guic me gun me. ¹² Ni tel no, Espiritu co nacie no (nacned no

espiritu ne quianzë lo guidzliu rii), ni ible laa Dios pxeel me lo no zeena gacndion no zha nactaa grë ncuuaane nole guic Dios gneedz me lo ne. ¹³ Zeene rzeet no grë guielnzaac co, laa no rneew zigne rneedz zhiEspiritu me guielbini lo no, rneed now zigne riab guic grë zha rac ne no lo guidzliu rii. Laa no rnee grë min co zigne rlu zhiEspiritu mew, ni ible laaw nac par grë zha ne rioguicle zha racladz Espiritu co.

¹⁴ Grë zha ne nacned zhiEspiritu Dios, cholze miech nac zho, grielod tsoguic zho zha nac grë mine rlu Espiritu co lo no. Rzac zho ncuuaane paat rquiind naca, sac grielod guien zhow ne zhase. ¹⁵ Sangue zha ne rioguicle zha racladz Espiritu co, rien zho pe nac mine rlu me.

¹⁶ Ni nligaa zha guien zhow, zigne zhobneeque lo Xtiidz Dios, zaatne rnee: "Choot grielod gacnan pe nac mine no guic Dios gun me, choot grielod glu lo me pe nac mine no gun me." Per no, ndion now, sac grë ncuuaane nan Jesús, bneedz me diidz lo no ye no gocndiona.

3

Gnalod zho samiech zho

¹ Bets, bzian, ne nligaa gard grielo gne naa lo to zigne rne naa lo grë zha ne rioguicle zha nac mine racladz zhiEspiritu Dios, sinque tibaque laa naa rne lo to zigne rne naa lo grëraa miech guidzliu, sac rrieequia bii mëdyeen nac to lo zhiwseed Jesús. ² Niapse ncuuaane ligase ziseed naa to, laa ne cseed naa to ncuuaane ndzielguic. Rrieequia nidzse nonedz naa quiaie to, laa ne gow to grë ncuuaane row zha gol. Haxta niinagaa gard tsoguic to zha nac grë mine ndzielguic, ³ sacne laa to bii zienal mine run miech guidzliu, laa ne gun to mine racladz Dios. Golguien ganle zha rac to, no to rlozhd glëëlsa to, rlozhd tilisa to. ¡Led squid gon no gac zha ne nole xnëz Dios! ⁴ Pe i na rriee bla to rnee: "Tel no xnëz Pabl no no", rrieequegaa zla zha ne rnee: "Tel no xnëz Apol no no." Gase rlu ganle zienalde to mine racladz Dios, sinque laa to zienal mine no guic to.

⁵ Nana, zcho nac Pabl, chogaa nac Apol parne no yquiaaqui tsodil to? Nli no biadseed to Xtiidz Dios, per tib ngundziin winse nac no lo me, bdziuun no mine rnabey me no. ⁶ Nac cuent rii zig nac tib guielgon, naa blo bni liu, laa Apol bgaala; per Dios nac men ne bnabey blana ni me pchooba. ⁷ Golwica ganle Diosse nac men non, sac me pchoob bni co, tel no peet ncuuaane nroob bdziuund no, lëë gdib tib bloo bni liu, stib bgaala. ⁸ Zigtaa zha ne bloo bni liuw, zigtagaa zha ne bgaala, lal nac zho grop zho; ni Diosse nac men ne gdeed mine rieguial

zho tib tib zho por dziin ne been zho. ⁹ Tib ngundziin winse nac no lo Dios grop no Apol; laa to nac zig tib lè liu ne quiayan Dios, zig tib yu ne quizaagaa me.

¹⁰ Pa lotaa wen Dios, sac bzooblo me naa naa psilo yu co, ni blu me lo naa zhapaa none tsaaw. Nli naa bgaa blee xcimienta, per niina zhaale zha ne nosoquiaw. Tib tib zha ne nosoquia yu co, none guien zho zaacse gzhixcuaa zhow, tsienal zho zigne nacse xcimienta ga, ¹¹ sac gon nod pe nacne csèëb zho stib cimient, tibaque cimient no, lèë cimient co nac Jesús.

¹² ;Laa cimient co nole! Nana no zho gzaa yu co niapse guuib or, niapse guuib plat, no zho gzaaw grè quie niazh, no zho gzaaw yag, nogaa zho gzaaw grè pe guizh, pe yag xiidgaa. ¹³ Zeene gdziin dze ne laa Jesús gun guielwxtis, ga glu dien zha nac xtsiin zho; sac gal dze co grèsew laaw none ted lo gui, ga glu dien pa min lèbraa. ¹⁴ Zha ne pquuin ncuuaane rlèb lo gui, ib tedsod zгаа zho mine rieguial zho gdeed Dios lo zho; ¹⁵ laa zha ne pquingaa grè ncuuaane znuse rec, mbe scase nitlo xtsiin zho. Peet ycaaniad zho, haxta zha pense tel zha laa zho lo gui co, zigne rzac zha ne rec lidz.

¹⁶ Golgacnan ganle xyadoo Dios gon nac to, sacne zdoo to rbèz zhiEspiritu me. ¹⁷ Tel xyadoo Dios, tib yadoo mbe, tib yadoo nda naca; gacxe waa, zha ne gnitlow ib tedsod znitlo Dios zho. ¹⁸ Golguien sca zaacse gulgac, tel no zha ne rzac nroob rac zho wseed lo guidzliu rii, gnalod zho min co; nend lel lo co no zho, ygaad zho mine nacpaa guielrac, guielrac ne rneedz Dios. ¹⁹ Sac gon grè guielrac ne no lo guidzliu rii, ncuuaane beelze naca nè lo Dios. Zigne raquietaque lo Xtiiidz me zaatne rnee: "Grè zha rac ne no lo guidzliu rii, lèëque lo grè guielrac ne zienal zho, ga rlu Dios ganle paat rquiinda." ²⁰ No stib zaatne rnee: "Nanle Dios grè zhgab ne nonie guic grè zha rac, ncuuaane paat rquiinda." ²¹ Tsode to sca lozhd gacniats to dien cho xnèz miech guidzliu rii no to, golguien ganle grètaa ncuuaane no, laa Dios psana par yquina lo to. ²² Zig nac guidzliu, guielmban, guielgut, ladznia to now, niicle ncuuaane no niinaw, ncuuaane naragaa ziaada, chen tow; haxta Pabl, Apol, Pedr, ib laa no zo nu par dziuun no xyudar to. ²³ Grèse to tibaque xnèz men ne no to, lèë men co nac Jesús, men ne pxeel Dios.

4

Zha rzac zha ne rienee xtiidz Dios

¹ Golguien sca tib moz winse nac no lo Jesús, laa me bzoo no noseed no miech xtiidz me mine gocnand miech padzeela. ² Ni zha ne gon znu run tib dziin, ible none nguzobdiidz gac zho lo men ne rnabey zho.

³ Gacxe waa tel zha rzac to naa, tel zha rzacgaa grèraa miech naa, peet zienied guic naa. Haxta ni mine rzaac naa nac naa, peet nonda, rieguiald guiep naa znutaa znutaa nac mine noyuu naa. ⁴ Nli peet dzeb nonied guic naa guiep naa nend cho pe glisqu lo naa, per led mincod gni naa ni tib dol rapdraa naa; loxaque Dios nan zha nac naa, me gneedz mine gaguial naa. ⁵ Gacxe waa, gunde to ne glote lo guiab dien cho nac zha ne wenraa; sac min co gun men ne rnabey ne gal dze ne laa me guiaad. Gal dze co, me cxobnen ganle zhapaa nac ne tib tib ne, haxta grè mine rza guic ne, mine no zdoo ne, laaw glu me; grè no ne nodziuun no xtsiin me, dze co laa me gneedz mine riogualpaa no tib tib no.

⁶ Bets, bzian, niina ne nozet naa no lo to nu grop no Apol, quiayunnond naa naa, niicle nosanwindgaa naa me. Ga sca ganle golwi, zeena cseed to ghan to zigne nac Xtiiidz Dios, tsode to lozhd dien cho non, chogaa nond. ⁷ Stiba, zcho nadien nè lo to ne gunnon to to? Grè ncuuaane rap to, grè ncuuaane rac to, zniacxe led Diosd bneedza lo to? Dios name bneedza lo to, zpe nac dzigo no to rlozhd gacniats to zig nac zeene por xquieliger to bgaa tow? ⁸ Niats rac to, masaque rzac to grèle zhiwseed Dios nan to, gaxle zo to lo me, haxta rzac to tole nac zha rnabey, paat rquiindraa no. Wenzhe tebaa nligaa zha rnabeyle nac to, zeena haxta ye no zley no.

⁹ No hor rzaac naa, diunavez win psan Dios no ne nac no zha ne none xtiidz me, loxaque lo no rwi miech, rwi grè anl dien zha rac no; zig run miech rieso zho lo zha ne rnabey zho ret. ¹⁰ Ne znu quiadziuun no xtsiin Jesús, masaque zha yozh nac no lo miech, laa to gon xquizh me zha rien nac to lo zho. Zha nsis, zha zozhidzle rzoob zho no, laa to zha ndaan, zha ndip nac to. Masaque zha nziuu nac to lo zho, laa no rzac zho ni gand zho lo no. ¹¹ Haxta lo nadze blactaa zaatne retgbin no, zaatne retnis no, per ni lidz no, per ni lar ne dziaacw no guien, rdib rdzaag no rdziuun no dziin rdzniaa no ncuuaane rquiiin no. ¹² Ni rlozh ga rrieeque miech rsacsi zho no. Rrieequia zha ne rdzibdee no, per rdziuund no gdzibdeequ no zho, sinque mazd rnab no lo Dios gunlay me zho; zha ne rtsidil no, rdziuuncasd no zho. ¹³ Rrieequia zha ne nè rnee lo no, per no, diidz wen rtsire no lo zho. Masaque rzac miech no, zig rzac zho grè ncuuaane paat rquiindraa, zig rzac zho grè ncuuaane nole lo guizh.

¹⁴ Laa naa rzet grè min rii lo to, per nacda par gunctoladz naa to, sinque laa naa rzeta zeena guien to zaacse gac to, golguien ganle rleynie naa to, rzaac naa to zig tib xpèed

naa. ¹⁵ Niicle niaca miñe ndal zha ne guiadseed to i, niicxe guiaad nzian mil zho waa, per led grëd zho tsoxcopaa to zig rioxco tib dad xpëed zho. Zigne rne naa ga, xpëed naa nac to, rrieequia pxoz to nac naa, sac gon naa glo bialne xtiidz Dios lo to, laa to bzëeb xnëz Jesús. ¹⁶ Goltsoxco sca, golban zigne mban naa. ¹⁷ Ni ible miñcopaa gon laa naa rxel Timoté ziaad lo to i, lëe stib xpëed naa i, ne nligaa rleynie naa me, tib zha nguzobdiidz nac me lo men ne rnabey me. Laa me ziaad i, me gzodiidz lo to ganle zigne rseed naa miech grëse zaatne ziyateed naa, scagaa noxc naa mban naaw.

¹⁸ Rien naa no bla niats ne nac to i, rzac nliidraa guial naa lo to i stib. ¹⁹ Gacnañ zho ganle, gneedzse Dios diidz, ible laa naa none guialniob, dzigo bii zdziañ ne rien pe nli na nacnie zho xpoder Dios, te loxaque rnee zho ye. ²⁰ Sac gon zha ne ngab xnëz Dios, grë miñe rnee zho none glu nacnie zho xpoder me, nacda loxaque diidzse. ²¹ ¿To nadien zha racladz to? ¿Pe rdziladz to guial naa guialgactox naa lo to i, te mazd wen ye niapse diidz ndooladz, diidz nex guialne naa lo to?

5

Zha ne runctal xtol

¹ Zëeb diidz gon, lad to i no tib zha bgui ne quiayun tib dol nroob; per ni grëraa miech ne gard gliladz Xtiidz Dios rund min co. Bin naa lëëque xnïaa pchoob zho quiangob zho. ² ¿Yo na ne rzac to grële zhiwseed Dios nañ to, gaxle zo to lo me! ¿Laa ne ctoladz to, laa ne tso to guielnë, cuee to zha qui lad to, lel no to rlozhd gacniats to!

³ Niicle ne zozhaald naa lo to i, per zeene bin naaw tibaque nonie guic naa zha gaca. Nu laa naa gni lo to ganle zha rieguial gac zha co: ⁴ Grë to ne nac to zha ne ngab lo Jesús, rnab naa lo to ycaalsa to zigne rnabey me. Ndionle ne ganle zeene laa to ycaalsa, ga zo Jesús lo to, scagaa naa, golgun cuent lo to i zo naa. ⁵ Squi ndxie to grë to, golzonz zha co, golcueegazh zho lo to i, tsie zho tsietosbe zho ladznia mendox, ga tednë xcuerp zho guien zho ganle pe noyun zho; nanñ new togo zzhixcuaa zho stib, zeena ycaania Jesús zho gal dze ne laa me gbiire guiaad.

⁶ ¿xlëse gon squitaa racniats to rzac to zha mbe nac to, ni randze to zha ne quiayun dolldox qui! ¿Pe riende to telne glisquide to mine quiayun zho, ib tedsod zrieequiaraa zha ne squi gunctal xtol! ⁷ Zha ne squi nac, masaque nac zho zig nac grë guielguidzdox ne znuse rded; golcueegazh zho sca, zeena ine mbe gac to nëz lo Dios, tete to guielguidz qui. Golguien ganle laa Jesús psanmbele ne, miñcopaa gut me, goc me gon nëz lo Dios zig carner yeen ne rgogon zho lo me lni Pascw. ⁸ Golgotsoa gban ne zigne racladz Dios, grëse

tel zha wban ne glo, grëse guielyozh, grëse guielntseeb ne bdziuun ne, none csaan zeh grësew. Ndzinli sca golgac, goltsienal miñe nac diidzli; none mbe gac to nëz lo Dios, zig quietxtil ne notsd ncobi.

⁹ Lo stib guits ne pxel naa lo to ga, laa naa psolë diidz lo to ganle ctsieelsade to grë miech yozh ne ndzinlid mban. ¹⁰ Zeene sca pso naa diidz lo to, guiabde to togo naca parne ctsieelsadraa to grë zha ne gard gliladz Xtiidz Dios, zha ne rquiangob zha ne led tsieeld, grë zha ne zienal loxaque gunlo dimi, grë zha ne run guielgbaan, grëgaa zha ne nralo grë mdio. Led zha coda, sac laga mban ne lo guidzliu rii, ible zanlsa ne grë ne zho. ¹¹ Sinque zha ne bzet naa ga ctsieelsade to, nac zha ne nacle diidz xnëz Dios no zho, ni noque zho quiayunctal zho xtol zho, no zho rquiangob zha ne led tsieeld zho, no zho zienal loxaque gunlo dimi, zhiga zhiga laa ne gleynie zho Dios lel zhaa ncuane rleynieraa zho, no zho rquiadiidzguizh samech, no zho rzudz, no-gaa zho run guielgbaan. Ne nligaa zha ne sca nac, per ni tib guielwagw gownniede to zho. ¹² Tel grëraa zha ne gard gliladz Xtiidz Dios, led ned riogual glisqui miñe quiayun zho, Dios nac men ne gunquizh zhow. ¹³ Sangue zha ne nacgrë ne, zeene noyun zho tib ncuane ndzinlid, ib rieguial glisqui new lo zho. Gacxe nana sca, zha ne squi quiayunctal xtol i, golcueegazh zho lad to, ni spalal gandzedraa to zho.

6

Zha none gac guielwxtis

¹ Laa to gocnanle ganle, to rieguial glisqui tel pe nac ncuane nonguield run zha ne nacgrë to. Lëda i gon run to, zeene pe tib dil rap to, lëëlëd zie to lo wxtis laa ne bgib to lo zha ne nacgrë to, zha csiooglo lo xtil to. ² ¿Niacxe nande to zha ne ngab xnëz Dios, zha co cobey zha nac xtol grëraa miech zeene gal dze ne laa Dios gnabeya? ¿Pe nac dzigo grieelod tose csiooglo lo tel pe dil win ne rap to? ³ Haxta grë anjl name, ne gon cobey pe nac grë miñe quiayun zho. Gacxe waa, grë dil ne rac lo guielmban rii, ne riogual cobey zha guiooglo low. ⁴ Sca gon gun to, led node to, rnadse pew laa to ziele lo wxtis. ⁵ ¿Pe ni tib lë guielto guien lo to? Lo grë to, ¿niacxe goon guien zha ne grieelod gnee lo to, cuëz lo xtil to? ⁶ Nazdpaa rdziladz to dil, ¿pe i na lëëque zha ne nacgrë to quiadilne to, ni rlozh ga zieque to zienie to xtil to lo zha ne riladz Dios? ⁷ Pe riende to tib guieltodoxle i squi no to lëëque to quiadilla. Mazd golxecw tel cho pe run to.

⁸ Mazdraa gon mbana squi no to rsacsi to miech, ni haxta zha ne nacgrë to rsacsi to. ⁹ Nanle to ganle zha ne squi run guielntseeb,

grieeled gdziñ zho zaatne rnabey Dios. Tseniewguite guic to sca. Golsoladz ganle grêse zha ne ruñ guielyozh:

zig nac zha ne rquiangob zha ne led tseeled zho,

zig nac zha ne rquiangob zha ne nole tseeel, zig nac zha ne nac mrazh,

zig nac zha ne rnalo grê mdio laa ne gnalo zho Dios,

ni tib zho grieeled gdziñ zaatne rnabey Dios. ¹⁰ Scaque:

zha ne nac ngbaan,

zha ne zienie guic loxaque dien zha guñlo dimi,

zha ne nac ngonziu,

zha ne rzhixcuua diidzguizh,

zha ne rungiët miech par cuan zho zho;

ni tib zho ygaad guielnzaac co. ¹¹ Blalaa to bio lo grê dol co glo, sangue niina miech mbele nac to nêz lo Dios, laa Jesús ni Espiritu Sant psanle to zig tib zha ne peet xtold, laa me psanwenle to nêz lo Dios.

Gunctald zho xtoñ zho

¹² Nli ndal ncuuañe zac guñ ne, gunctalda xtoñ ne, niicle choot rcadgaaw, per led grêda rquiin. Tel naa, niicle no ncuuañe zrieelo gun naa, per rund naaw; sac racladz naa guien naaw, lozh ga lëew gnabey naa.

¹³ Zëeb diidz rnee zho: "Laa guielwagw biaan par gow miecha, scagaa zdoo zho laaw biaan par tsodzëw guielwagw." Nli scaw, per guiabd ne togo por min co lega gowcho ne. Pa rquiin ne lega tedso gow ne, sac gon zigtaa zdoo new, zigtagaa guielwagwa, zdziñ dze ne gnitlo Diosa. Guielwagw ga na, sangue grê guielyozh nerun miech rquiangob zho zha ne led tseeled zho, biaand ne par dziuun ne min co, sinque laa ne biaan par gban ne zigne rdziladz Dios, sac me rnabey ne. ¹⁴ Tel new nitlod ne, sac gon zigne bleeban Dios Jesús con poder ne rap me, scaque zbeeban me ne zeene laa dze co gdziñ.

¹⁵ Gulgacnan ganle, rrieequia lëe tiblë xcuerp Jesús nu gon nac ne tib tib ne. Nana, çpe nonguiela ga dzigo gdziel tib lë xcuerp me ga xcuerp tib wnaa ro nêz? ¡Nonguiel da gon! ¹⁶ Sac gon zha ne raanie tib wnaa ro nêz, rrieequia tibaque rac zho ga grop zho wnaa co. Rnee lo Xtidz Dios, par me: "Zeene laa mgui racgrop tib wnaa, tibaque miech rac zho ga grop zho." ¹⁷ Scagaa zha ne rzëeb xnêz Jesús, tibaque rac zho grop zho me, zhiEspiritu me racnie zho.

¹⁸ Gacxe waa, gunde to guielyozh yquiangob to zha ne led tseeelde to. Lo grê dol ne no, min riise nac mine xcuerppaa miech rguitnie zho. Sac gon zha ne ruñ guielyozh co, masaque rsanbeed zho zho ga.

¹⁹ Golguien ganle, zha ne nole xnêz Dios, masaque zha nac zig tib yadoo zaatne rbëz Espiritu Sant, Espiritu ne rdeed Dios rbannie

zho. Led nedraa rnabey xcuerp ne, ²⁰ Diosle rnabeya, sac gon bzhiiile me ne ni nroob gocnon ne lo me. Gacxe waa, zigtaa xcuerp new, zigtaa xpensar new, gotsaa yquian new par cxobnen ne ganle pa lotaa men nroob nac me.

7

Rtsire Pabl lo zhiwnabdiidz zho

¹ Lo guits ne pxeel to lo naa, nzian ncuuañe rnabdiidz to, nu ganle laa naa ctsire lo wnabdiidz co: nli wena, telne niaca mine grieeled ctsieelnia ne. ² Per parne tsod pe yquiaaqui cho gon guielyozh, tsonie zho zha ne led tseeled zho, mazd wena zigtaa mguiw, zigtaa wnaaw ctsieelnia zho, tib tib zho gbanniese zho tseeel zho zigne rieguiala.

³ Zha ne ptsieelniale, zig nac mgui none gnee zho lo tseeel zho zeene racladz me, scaquegaa wnaa zeene racladz tseeel zho gnee lo zho none siguiel zho. ⁴ Sac gon wnaa ne rtsieelnia, led zhadraa rnabey xcuerp zho, sinque tseeel-le zho rnabeya; scaquegaa mgui zeene laa zho rtsieelnia, tseeel-le zho rnabey xcuerp zho. ⁵ Golguien sca, niicle mguiw niicle wnaaw nodne yca zho xcuerp zho lo tseeel zho. Laa telne rzaçgaa zho none yquind zho tseeel zho tib blalaa dze, sac rquiabladz zho gzodiidznie zho Dios, wena totsaque guiaan zhow diidz grop zho. Per zigne ted ga, gbiireque gnee zho lo tseeel zho, sac gon zha ne grieeled cxcw, nend ccheep mendox zho gon zho guielyozh.

⁶ Ne znu rne naa lo to, guiabde to nagon togo rne naa nopaa ctsieelnia to. ⁷ Tel naa, rzac naa wena tebaa grêse to znu ctsieelnia, zigne nac naa; per na ncuuañe gacd ga, sacne zhaase zhaase nac ne tib tib ne. No zho pso Dios ctsieelnia, nogaa zho pso me ctsieelnia, per rley zho mban zho zigne nac zho. ⁸ Zig nac grê zha ne bii tib, grëgaa zha ne gutle tseeel, wena tebaa grieelo scase guiaan zho, ⁹ per telne rien zho lëbd xcuerp zho, dzigo mazd ctsieelnia zho. Mazd wena ctsieelnia zho, lëdle so zho tib zho ni tel rec rdzu zho.

¹⁰ Sangue zha ne ptsieelniale, laa naa rso diidz lo zho csaand zho tseeel zho, ni nacda xtudz naa, sinque ible sca rnabey Dios. ¹¹ Laa tel zha ne guiaabgaa csaand zho tseeel zho, zaca, per lëeraasi grieeledraa gbiire ctsieelnia zho, mazd mine naca telne zrieelow ycatsieel zho stib, o guiaangaa zho tipe zho.

¹² Nu na ganle laa naa gnegaa chop lan xtudz naa lo zha ne led yed tseeel riladz Xtudz Dios; tib diidzse naca gni naaw, nacda mine rnabeyppaa Dios. Zha bgui ne mbannie tib wnaa ne riladz Xtudz Dios, per telne rio guic wnaa gbannie wnaa zho, nodne csaand

zho wnaa. ¹³ Scaquegaa wnaa ne mbannie tib mgui ne riladzd Xtiidz Dios, nod csaan zho mgui co telne riopaa guic mgui gbanne mgui zho. ¹⁴ Zigtaa mguiw, zigtagaa wnaaw, zha ne sca mbannie tib zha ne riladzle xtiidz Dios, ye zho runlay Dios ga, nenda haxta zio dze ne ye zho giladz xtiidz me. Sac telne ctso zho, laa ne gbigraa xpëéd zho lo Dios, lel znu sozit mëéd. ¹⁵ Nana, telne zhalgaa zha ne riladzd Xtiidz Dios ga, rnab csaansa zho, peet nacda maase ctso zho, nod pe nacne gzoobguicpaa tsiel zho lo zho cuéz zho. Sac gon zha ne riladzle Xtiidz Dios, laa me bredz zho parne zaacse gban zho, bredzd me zho par tsodil zho; ¹⁶ stiba, nand zho dien pe zdziñ dze ne giladz tsiel zho Xtiidz Dios.

¹⁷ Mine naca tib tib to goltsocxo gun to mine rdziladz Dios. Zigtaa zha ne pso me ctsieelnia, zigtagaa zha ne pso me scase guiaan, sca none gac to; scagaa zha ne ncaatsieel-le zeene riladz zho xtiidz me, none sca guiaan zho niicle telne riladzd tsiel zho xtiidz me. Grëse zha ne ngab lo me, diidz rii rso naa lo zho. ¹⁸ Zig nac grë zha ne nole bey xcuerp zeene laa zho rzëéb xnëz me, sca no zho bey co gun d zho ne yqueets zhow. Zha ne na nodgaa bey co zeene rzëéb zho xnëz me, scaque nod pe nacne tsopaa zho bey co. ¹⁹ Mine mazdraa non lo me, gban zho zigne rdziladz me, guiendraa ne dien cho no bey, chogaa noda.

²⁰ Zigne rneque naa ga, grëse zha ne rzëéb xnëz Dios, tel zha nac zho zeene laa me bredz zho, scase none guiaan zho. ²¹ Zig nac zha ne nac ngundziin lo ben, peet tsieneid guic zho guiab zho dien zha greece zho ladhnia zha ne rnabey zho; per telne gdeeda diidz, zac tsocxo zho dien zha greece zho lo zha co. ²² Zha ne sca nac ngundziin lo ben zeene bzëéb zho xnëz Dios, guien zho ganle rrieequia zonlaale zho, sac gon laa Jesús psilaale zho lo grëtaa dol ne bio zho. Zha ne nacdga ngundziin lo ben zeene bzëéb zho xnëz Dios, guien zho ganle tib ngundziinle nac zho lo Jesús niina, me rnabey zho. ²³ Golguien ganle, grëse to laa Dios bzhiile to ni nroob gocnon to, gacxe waa mele rnabey to; ni togaa, lo me none gun to dziin, gdeete to diidz lega gnabey miech to. ²⁴ Sca nasca gon bets gaca, tib tib to zigne nacse to zeene bzëéb to xnëz Dios scase no gban to, ine gleynie to me.

²⁵ Stib wnabdiidz ne run to ga dien zha gac zha ne gard ctsieelnia, gneli naa lo to ganle, guiend tib xley Dios mine gnabeypaa dien zha gac zho. Per golquiaadiag mine gne naa nu ganle zha rzaac naa, nanle to ganle, zha ne znu rquia zdoo Dios rbedz me, mine rquiin min co rnee zho. ²⁶ Grë ne ne nac ne zha ne riladz Xtiidz Dios len dze rii, nligaa ngan nac lo xquielmban ne, gane

zoot naa wena zha ne sca gard ctsieelnia, maase guiaan tib zho. ²⁷ Zha bgui ne na ptsieelnialegaa, grielod gni naa guiaan tib zho; sca mbannie zho tsiel zho; per tel zha ne gard ctsieelnia, mazd sobd guic zho ctsieelnia zho. ²⁸ Zha ne racladzpagaa ctsieelnia, zigtaa mguiw zigtaa wnaaw, led dol d ga gun zho telne laa zho ctsieelnia; per gacnañ zho ganle, zeene laa zho pcatsieel-le, ib tedsod nroob guielne ne gan zho por grë mine noyac len dze rii.

²⁹ Mine none guien to: zhisle nac dze ne so ne lo guidziu rii, led nroob nac ngbidz ne grielo dziiun ne xtsiin Dios; gacxe waa, zha ne nole tsiel, mazd sac zho zho zig tib zha ne guien d tsiel. ³⁰ Zha ne quianie dimiw, zha ne no guielbleya, zha ne nogaa guielnëw, gdeete zho diidz yca grë ncuuan co lo zho par gun zho xtsiin me. ³¹ Zha ne bienle runfalte grëtaa ncuuane rquiin zho, gdeete zho diidz ctse grë ncuuan co lo zho, sac zigtaa guidziuw, zigtaa grë ncuuane no low, zdziñ dze ne nitlow.

³² Mine racladz naa peet zhgab ctсед lo to. Golwi ganle, zha bgui ne tib, tublicque zienie guic zho run zho mine rdziladz Dios, mine nac xtsiin me. ³³ Laa zha ne no tsiel, grielodraa sca gac zho, sac laa guic zho zienie zha gbannie zho tsiel zho, zha grielo gun zho mine rdziladz me, min co rionieraa guic zho. ³⁴ Scaque grë men wnaa, zha ne tib, rioxcoraa zho run zho mine rdziladz Dios, dib nacse zho rbeeladz zho zho lo xtsiin me. Laa zha ne ptsieelniale, xco ne dien zha gbannie zho tsiel zho, dien zha grielo gun zho mine rdziladz tsiel zho, xco co rioraa zho.

³⁵ Laa naa rne min rii lo to, per guiabde to togo rca naa ctsieelnia to, sinque laaw rne naa parne guien to zha gun to, zeena grielo zaacse gac to gun to mine rnabey Dios. ³⁶ Zha ne quianie wnaa nguieg, telne rzac zho nonguielda ga scase ted lo xquielnguieg xpëéd zho, sinque none ctsieelnia zho, peet nacda, led dol d ga ctsieelnia zho. ³⁷ Laa telne rzacgaa zho, werraaw ctsieelnia xpëédwnaa zho, ible scale pquiabladz zho guiaan mëéd, wenaque ga telne sca rzac zho. ³⁸ Wen ga gun zha ne sca gdeed diidz ctsieelnia xpëédwnaa, per mazdraa wen ga gun zha ne rzac mazd ctsieelnia xpëéd.

³⁹ Nana, wnaa ne retgaa tsiel, nli zeene mban tsiel zho rnabey ley ne tsielse zho gbannie zho; per zeene laa tsiel zho ret, zac ctsieelnia zho tel cho stib mgui ne racladz zho, totsaque zha ne noque xnëz Dios. ⁴⁰ Per tel naa, rzac naa mazdraa wen gban zho telne tsodraa guic zho ctsieelnia zho stib; sca nagon rzaac naa wena, ni led xtiidzde naaw sac rian naa led tibd naa, Espiritu Sant nacnie naa.

8

Bëel ne rgogon zho lo mdio

¹ Stib wnaabdiidz ne run to ga, dien zha nac guielwagw ne rgogon zho lo grè mdio, pe zrieelo gdiioowa, te grieeloda ye. Zootle na grèle to nan min co; per no hor zeene squi rzac ne grèlew nan ne, lel racniats ne, laa ne gacndooladz ne gnee ne lo grè zha ne nacrè ne dien zha gun zho parne tsogucraa zho Xtiidz Dios. ² Zha ne rzac grèlew rac zho, ga rlu zho ganle peet riend zho. ³ Tel Dios runbey me tib tib miech, nanpaa me cho nac zha ne rleynie me.

⁴ Zhapaa dzigo gaca, çpe wena dioww ne xpèel grè ma ne rgogon zho lo mdio ga, te wenda ye? Ndionle ne ganle grè mdio ne riegān miech led Diosd ga, tibaque men ne nac Dios no. ⁵ No zho rzac nziandox Dios, nziandox men rnabey no, no me no gbaa, nogaa me no lo guidzliu, ⁶ sangue ne ndion ne ganle tibaque Dios no, lèe men co nac Pxoaz ne, me psan grètaa ncuane no, me psan ne parne dziuunbey ne me. Ni scaquegaa, tibaque men ne rnabey ne, lèe me ga nac Jesús, me bzaa grètaa ncuane no, me nac men ne rneedz xquielmban ne. ⁷ Per no zha ne riladzle Xtiidz Dios, bii gardaque guien zho ne tibaque Dios no. Tibaque rzac zho mban mdio, gane zeene rquuin zho bëel ne rgogon zho lo mdio racchop guic zho, lèeque zha runctal xtol zho ga sca run zho. ⁸ Golguien sca, tel Dios rwid me dien cho pe row. Guiabd ne togo por gow ne o gowdgaa ne bëel co laa ne guiaanziiu lo me.

⁹ Laa to nanle nasca, peet nacda yquuin to guielwagw co, per scagaa golcobei adel min co yquiaaqui gunctal to xtol tib zha ne squi bii racchop guic. ¹⁰ Sac gon, nenda tibiladz to zob to zaatne riegān grè miech mdio noquuin to bëel co, ni gan tib zha ne bii racchop guica. Zeene gan zho to, nend yeque zho gbig gow zhow, per zeene lozh ga tibaque laa guic zho tsienie lèda ga been zho. ¹¹ Zha ne sca gun, niicle ne nli rien zho peet nacd ncuane noyun zho ga, per por zha laa zha co gunctal xtol. Gunscade to, golguien ganle ye zho ga psilaa Jesús zeene gut me lo cruz; ¹² gacxe waa, telne sca gun to por to yquiaaqui gun zho tib ncuane rzac zho nonguield, lole Jesús ga quiaayun to falt. ¹³ Min co nagon, tel naa mazd maase gowd naa bëel co, telne por min co yquiaaqui gunctal naa xtol tib zha ne nole xnèz Dios; sac lèda ga gun naa gac naa zig tib quie ne griel ni zho.

9

Min rieguial zha ne run xtsiin Dios

¹ Zigne nagon zac gun to grè ncuane wen ne racladz to, scaquegaa naa, zac gnab naa ncuane wen ne racladz naa. Tel naa

gonlo naa Jesús men ne rnabey ne, Dioszhal bzo naa pxeel me naa none naa Xtiidz me. Ne squi ptsèe Dios lo xquielmban to zeene bialseed naa to, i rlu ganle me nacnie naa.

² No zha ne rzac nlid Dios pxeel naa, sangue to nanwen to ganle me pxeel naa, sac gonlo to mine ben naa, mine blu naa; ni scagaa niina, lo xquielmban to i rlu ganle ne nli xtsiin me quiaayun naa. ³ Grè zha ne sca rzac nlid Dios pxeel naa, rzac zho peet raguiald naa, gacnan zho ganle: ⁴ Raguial naaw gon! Ni grèragaa zha ne rdziuongza no xtsiin Dios, rioguial no gneedz to ncuane yquuin no, gneedz to zaatne gbiaaz no. ⁵ Tel naa, haxta raguial yquianie naa tib men wnaa ne gac tsieel naa, ine sènie naa me zigne run grèraa zha ne rdziuongza no dziin rii, zig nac Pedr, zig nacgaa grè zha bet men ne rnabey ne. ⁶ ÇTe loxaque grop no Bernabé naye znu zhaaque no dziun no stib dziin, par gdziniaa no ncuane dioww no? ⁷ Golgan ganle, zig nac zha ne rzèeb lo xtsiin menguiib, çniacxe zhaa lo dziin ne rdziniaa zho ncuane row zho rio zho lo xtsiin menguiib? ÇZha ne rangaa, niacxe rieguiald zho yquuin zho ncuane rac zatne ran zho? ÇZha ne na rangaa ma, niacxe rieguiald zho yquuin zho ma zigne racladz zho?

⁸ Guiabde to togo bod guicse naa riab mine rne naa nu, golgan ganle haxta lo ley ne psan Moisés ⁹ no tib zaatne rnee: "Zeene gunçun to xcon to dziin gzeèni ma mzion zho bxtil gacmbew, code to guieç ro ma, golsaan gow ma mine yгаа ro ma." Golwi ganle zha rnee Dios, nana pe nan to ngonse rquia zdo me. ¹⁰ Lèda gon, grèse ne rquia zdo me ne. Ga rlu me ganle, zha ne run xtsiin me, ible rieguial zho ycaa zho mine non xtsiin zho. Zig nacaque guielgon, zigtaa zha ne rana, zigtagaa zha ne runmbe grè guielnzaac co, ible rieguial zho yquuin zhow. ¹¹ Tel no, rrieequia nazho tib gon i bdziun no biadseed no to Xtiidz Dios, çniacxe rioguiald no dzigo gneedz to ncuane yquuin no?

¹² Balaa zha ne nale griin riaadted lo to i, rnabey zho to rdeed to ncuane rquuin zho, çpe lel no dzigo rioguiald gnaba lo to? Mazdraa gon rioguial no gnab now, per haxta lo nadze gard dziun no min co, notaa nan zha rdziniaa no ncuane rdioow no; zeena guiaand zdo to, lozh ga laa to csaan mine nac Xtiidz Dios. ¹³ Led nanle to ganle, grè zha ne run dziin len xyadoo Dios, psan me diidz grè ncuane nac gon, ga xen zho pe yquuin zho, zig nac zha ne run dziin zaatne nac lo pcoog, lo ncuane rielogon miech ga, ga rdioob ncuane row zho. ¹⁴ Ni scaquegaa psan Jesús diidz, zha ne cseed miech Xtiidz me, ib none lo dziin co gdziniaa zho pe yquuin zho. ¹⁵ Per tel naa gon, waltaa peet gard gnab naa lo miech.

Laa naa rzet min rii lo to, per guiabde to togo run naaw parne csilo to pe gneedz to lo naa. Ib zanałd naa min co, sac rley naa znu quiayazhd naa quiayun naa xtiin Jesús, mazd maase guetgbin naa, lèdle ctiche zho guielbley rii lo naa. ¹⁶ Niicle ne znu quiayazhd naa quiayun naa dziin rii, per ni lalnu racniatsd naa, sacne ible laa Dios bzo naa par gne naa Xtiidz me lo miech; ni, jprobsaxe naa telne gned naaw! ¹⁷ Noyund naaw par dien pe premio ygaa naa, sac zig rne naa ga Dios bzo naa, me rnabey naa quiayun naaw, masaque nacse naa zig tib ngundziin. ¹⁸ Par naa, lèele premio nu nac guielbley rii ne znu liga quiaseed naa miech Xtiidz Dios, rnabd naa gneedzpaazho ncuuaane yquiin naa niicle ne raguial naa gnab naaw.

Tsoxco zho ygaa zho premio

¹⁹ Stiba mazdragaa wena, znu choot noneedz ncuuaane yquiin naa, sac sca grieelod cho gnabey naa; per niicle ne nagon choot rnabeyd naa, zhaal naa rac naa zig tib ngundziin lo grèse miech, parne gdeeda diidz tso guic zho sèeb zho xnèz Jesús. ²⁰ Gacxe waa zeene no naa lo grè zha Israel, rac naa zigne rac zho, zeena tso guic zho giladz zho cho nac Jesús. Zeene nogaa naa lo grè zha ne zienal xley zha Israel, niicle ne rnalodraa naa ley, per run naa grè ley ne zienal zho, zeena sca grielo yquiablazd zho sèeb zho xnèz Jesús. ²¹ Scauegaa zeene no naa lo grè zha ne runbeyd ley co, rioxco naa rac naa zig tib zha ne runbeyda; per guiabd ne togo haxta grè ncuuaane rleyniedraa Dios run naa. Laa naa run min co, zeena ye zho sèeb xnèz Jesús. ²² Grè zha ne pense quiayacnan zha nac Xtiidz Dios, zeene no naa lo zho, rund naa gne naa grè ncuuaane gard guien zho zha nac, rund naa csanwin naa zho, sac mine rioxco naa lozh giladz zho cho nac Dios. Tib tib miech, rguib naa rac naa zigne rac zho, parne grielo gzodiidz naa lo zho cho nac Jesús, zeena gacnan zho zha sèeb zho xnèz Dios. ²³ Laa naa run min co, parne gdeeda diidz gnee naa Xtiidz Dios grèse lo miech, ni scagaa, gley naa gan naa ye zho ygaa lo guielndzon ne zhoobnee lo Xtiidz Dios.

²⁴ Nanle to ganle zha rzac zha ne rie tib lo corr; nzian zho nac zha ne rie per tibaque zha ne run gan, zha co rcaa tib premio. Golgun cuent nasca tib lo corr i no to, grèse to gołtsoxco xoon to zeena grèse to ygaa tib premio. ²⁵ Grè zha ne sca rio tib lo wguıt, par grielo gun zho gan rioxco zho ran zho xcuerp zho, rund zho ncuuaane csiaab xfuers zho. Nroob cuidad ne rap zho zho par gun zho gan tib coron guizh nguia ne znuse rgool. Scase nac premio ne rgaa zho, sangue ne gon, laa ne noxco ygaa ne tib premio

ne gdziıd dze nitlo. ²⁶ Gacxe waa, tel naa tibaque noxco naa dien zha xoonraa naa. Nanpaa naa pa gdziıd naa, nacd naa zig zha ne riend dien pa gdziıd, zha ne lega rquiaa-gaa puıet, rdeete zhow zaatne no ygaaw. ²⁷ Ni lalnu rdete naa diidz gac mine racladtaa xcuerp naa, tibaque rnabey naaw parne guieņa ncuuaane nonguiel min co none guņa, led guıda ncuuaane racladztaaw. Laa naa run min co zeena gun naa gan, sac gon, guieltodox ga grieequia naa znu no naa none naa lo miech zha gun zho, ni tel lozh ga naapaze biaan bend naa gan.

10

Nodne gleynie miech mdio

¹ Bets, bzian, gołsoladz ganle zha bzhaac grè pxozgol ne zha ne sca bzènie Moısés ga. Pxeel Dios tib xcow been ncal zaatne zieetaa zho, ni pteed me zho lo Nisdoo Nizhnie. ² Zigtaa lo xcow cow, zigtaa lo nisdoo cow, masaque rrieequia lo co brobnis zho, parne tibaque niac zho niacnie zho Moısés.

³ Grèse zho gon milagr nroob ne been Dios, bnabey me bliaal guıetxtıl zhan gbaa bdeed me dow zho, ⁴ beencta me nis tib cho quie bdeed me go zho no zho dan bidz co. Lèele Jesús ga bdeed nis co go zho. Lo zho ga zo me, rrieequia me ga nac quie ne bda nis go zho, sac mese rzhixcuua lo grètaa xliaadz miech. ⁵ Niicle scataa gon Dios zho, per led grèd zho bioxco nion xtiidz me, nacne ndal zho bnıtlo bioliuse zho dan co. ⁶ Gase na ganle gotsaa gwi ne zha bzhaac zho, zeena gzooblazd ne dziuun ne grè ncuuaane ndzinlid ne been zho. ⁷ Golguıen gleyniede to mdio, zigne been zho. Rnee lo Xtiidz Dios: “Blozhse dow zho, go zho, laa zho psilo biee lo zhımdio zho.”

⁸ Gotsaa gwi ne ganle, pe guielne ne bgaa zho zeene brieequia bla zho lega bionie wnaa, tib dzeque bnabey Dios gut galptson mil zho. iNi lalnu tsod guic to gun to min co! ⁹ Ib gunglèede to Dios, sac zha, zeene benngulèe zho me, bnabey me brieequia grè meel pquiaa maw zho, ndal zho gut. ¹⁰ Niicle glisquidgaa to tel pe nac mine quiayun me, sac tel zha, sca been palal zho; nacne pxeelaque me anjl ne rnıtlo, ndal zho bnıtlo anjl co. ¹¹ Sca nagon bzhaac grè pxoz gol ne ga, gotsaa guien ne sca dziuund ne mine been zho, mine been zho ga laaw zhoobnee lo Xtiidz Dios parne gacndion new, guien ne zaacse gban ne, ne nac ne miech ne mban len dze rii ne znu ziaadyoble nitlo guidzliu.

¹² Gacxe waa, zha ne rzac mbanpaa zho zigne racladz Dios, none nsin so zho zeena gund zho ncuuaane gunctal xtol zho. ¹³ Nli no ncuuaane rcheep ne gunctal ne xtol, ne, per nacda ncuuaane griin rien. Pe zhıdaa miech

ne zieded lo min co. Tsod mine guiab ne ib lëbd ne greee ne lo. Mine naca none gnalo ne Dios, sac tel me ib csaand me guiab ne tib lo ncuuane glëbd ne greee ne; sca nac xtiidz me, ni mesi gon ctsëed me mine rnee me. Me nac men ne gacnieu ne grielo greee ne low.

¹⁴ Bets, bzian, golguien sca ib none csaan to grë mdio, gnalodraa tow. ¹⁵ Miech nixbini nac to, grë mine rne naa lo to nu, nan to gane ncuuane rquiina. ¹⁶ Golwi ganle, zeene rdioow ne guietxtil, rdio ne vin, rdziuuu ne xtsee ne been Jesús ga, ga rlu tipse nac ne grë ne nacie ne me. ¹⁷ Niicle ne ndal nac ne, per ne tibaque guietxtil ne rdioow ne, min co gane tibaque cuerp nac ne grë ne, ni lëe xcuerp Jesús ga. ¹⁸ Scaque zha Israel, zeene row zho xpëel ma ne riogon lo Dios, ga rlu zho ne nacie zho me.

¹⁹ Zha ne rnalogaa mdio, zeene row zho grë ncuuane riogon lo mdio, scaque tibaque rac zho grë zho mdio. Per guiabde to togo mban mdio, togo mazdragaa nac bëel ne rgogon zho lo mdio. ²⁰ Mine racladz naa guien to, zeene sca run grë miech pe rgogon zho lo grë mdio, lo mendox ga rgogon zhow, led lo Diosda. Golguien sca, ib tsiesëebde to lo grë zha ne quaiyownie mdio, zeena gacniede to mendox. ²¹ Lëdraaw ga gon gun to, tel rlozhse rquiu to xtsee ne psan Jesús diidz ga dziuuu ne, ni tsieue to tsieguie to, tsietow to zaatne rownie zho mendox. ²² jGunscaade to, gunglëede to Dios! jGolguien ganle, lëbd ne dzian ne xquielblëe me!

Zha gun zha ne riladzle Jesús

²³ Zig rne naa ga: "Ni zac gun ne ncuuane gacladzttaa ne, per led grëda nonguiel." Tel naa, zrieelo gun naa ncuuane gacladzttaa naa, per led grëda yquiu par gun naa xyudar grëraa zha bets ne, lozh tsoguic zho Xtiidz Dios; ²⁴ sac gon, ib none dzioxc ne grëraa zha ne nacgrë ne. ²⁵ Zig nac grë bëel ne rdo lo lgui, zac gow tow, ib gunde to gnabdiidz to dien zha naca, sac gon nend bëel ne biogon lo mdiow, dzigo laa dzeb co tsonie guic to. ²⁶ Golguien ganle, Dios psan guidzliu, scagaa grëtaa ncuuane no low chen me naca.

²⁷ Zeene tel zha tsiegaa to tib wagw lidz tib zha ne gard gliladz Jesús, bëel ne gneedztaa zho golgowa, per scaque gnabdiidzde to dien zha naca; zeena peet dzeb tsonied zdoo to. ²⁸ Per telne grieequia tib zha ne gnë bëel ne biogon lo mdiow, gowde tow; zeena csaade to zdoo zho. ²⁹ Niicle ne ndionpaa ne led dold ga gun to gow tow, per zha ne gana ga sadol zdoo zho.

Nana gnë to: "¿Pe nac dzigo por stib zho grielod gun naa mine racladz naa? ³⁰ Tel rded naa xquizh lo Dios zeene pe tib guielwagw ne rquiu naa, ¿pe nac dzigo por mine rzace stib zho, grielod gow naaw?"

³¹ Golguien ganle, racda por zha cose; sac grëse ncuuane dziuuu ne, haxta ncuuane dioow new, ncuuane dio new, none zeene nodziuuu new cxobnen ne ganle pa lotaa men nroob nac Dios. ³² Gotsaa guien ne sca ganle dziuuu ne ncuuane yquiaaqui csa ne zdoo stib miech, zigtaa zha Israela, zha stib guiedza, zha ne nolegaa xnëz Dios. ³³ Tel naa, zanaald naa ncuuane gdziladz naa naase, sinque rioxc naa grëtaa ncuuane run naa, run naaw par gacnie naa grëse miech, zeena grielo tso guic zho gnab zho lo Dios csilaa me zho lo xto! zho.

11

¹ Golwi sca, zigne ran to noxc naa mban naa zigne blu Jesús, scaquega to goltsoxc gban to zigne ran to mban naa.

² Bets, bzian, rleynie naa to gon sac tibaque rsoladz to naa, ni rioxc to zienal to grë mine pseed naa to. ³ Per golsoladz ganle: grëse men wnaa, none zha bgui gnabey lo zho, tel zha bgui Jesús rnabey lo zho, zigne rnabey Dios lo me. ⁴ Gacxe waa, tel tib zha bgui yase nozodiidznie zho Dios, quiateedgaa zho xtiidz me, ni zob xombrel zho; xquielto Jesús ga rbee zho. ⁵ Scagaa men wnaa, tel zhoobd bay guic zho ni zo zho nozodiidznie zho Dios, quiateedgaa zho xtiidz me, xquielto mgui ga rbee zho; sac ga rlu zho rond zho mine rnabey mgui. ⁶ Telne racladzdgaa zho gdze lad guic zho, mazd gnabey zho chug guitsguic zho. Laa telne rtoladz zho chuga, rtoladz zho gacruca, dzigo mazd cxobguic zho xpay zho.

⁷ Grë zha bgui, nod pe nacie gdze lad guic zho, sac choot samiech guidzliu zho rnabeyd lo zho. Zeene bzaa Dios mgui, bzaa me zho zigne nac me, zeena glu zho ganle pa lotaa men non nac me; scagaa wnaa, laa wnaa biaan par glu zho ganle non mgui. ⁸ Gotsaa gwi ne ganle, letxe xcuxti mgui briece biao wnaa. ⁹ Stiba, zeene psan Dios wnaa, ib laa me psan zho par gacnie zho mgui. ¹⁰ Gacxe nagon waa ib none gdze lad guic wnaa, zeena glu ganle nguzobdiidz zho lo zha ne rnabey zho; haxta grë anj ne no gbaa zley zho gan zho min co.

¹¹ Per guiabde to togo peet nond wnaa, golsoladz ganle psanle Dios diidz zigtaa mguiw, zigtaa wnaaw rquiuinsa zho; sac telne guieud wnaa guieud mgui, telne guieudgaa mgui guieud wnaa. ¹² Gotsaa gwi ne ganle, zeene biao wnaa cho mgui briece dzit ne biao wnaa, per zeene laa wnaa biaan, haxta lo nadze wnaale rzo mgui; zigtaa mguiw, zigtaa wnaaw Dios psan zho grop zho. ¹³ ¿To nadien zha rzac to? ¿Pe nli nonguiela gdze lad guic wnaa zeene nonab zho lo Dios, te nonguiela ye? ¹⁴ Golwi ganle ib no gdze guic wnaa, biaanle zho roob

guits guic zho parne ctsew lad guic zho; ¹⁵ tel zha, haxta rleyinie zhow zeene scaataa noola, sangue ne nac ne zha bgui, guiel tow ga guiool guitsguic ne. ¹⁶ Tel nogaa zha ne rzac led scada, maase gnee zho. Per ible znu gon noseed no miech, ni greragaa zha ne riladzle Xtiidz Dios, rien zho ne nli scaw.

Zha none gac xtsee ne psan Jesús

¹⁷ Bets, bzian, ne nligaa rley naa tibaque rsoladz to naa, per bin naa zeene rcaalsa to row to xtsee ne psan Jesús diidz, laa ne gley to ycaalsa to, lel quiayunctal to xtol to. Miñcosi nagon ni lalmu riod zdoo naaw. ¹⁸ Ziyon naa gzobtaa zeene rcaalsa to, pe na tsiegald til diidz to, laa ne tipse gac to lel rlëëlsa to. Ni rgobey naa nli scaw. ¹⁹ Rien naa masaque rzac to ible sca none gac to, parne glupaa cho nac zha ne non xtiidz, zeena guianñziuu zho lo miech.

²⁰ Led zhixtseedraa Jesús i gon run to. ²¹ Sac ron naa zeene laa to row, masaque lëëlëd rac to row to ncuuaane zienie to, ib rwide to no zha ne rdziñ ga quianied zho nroob ncuuaane gow zho. Squi rzob to rowcho to, haxta rzudz to; laa zha mbanse rac zho grielod gow zho ncuuaane row to. ²² ¿Mod guienid lidz to, ga sob to gow to, guie to haxta zaatne guieltaa to, led node to runctoladz to zha ne squi guienid pe yquiin? I gon rlu to rleyniede to grë zha ne no xnëz Dios. ¡Ni palal gon rdzigiuenid naa ncuuaane noyuu to!

²³ Golsoladz ganle zha nac ne laa xtsee rii biaan, Jesús psan diidz gaca, sca gocnan naaw ni scagaa biallu naaw lo to. Wdze ne bnaaz zho Jesús ga, zeene blozh dowxtsee nie me xpëëdsuel me, bzhen me tib guietxtil, bdeed me xquizh lo Dios; ²⁴ blozhse bdeed me xquizh, nzian lë been me guietxtil co, bdeed mew lo zho rëb me: “Golquina, rrieequia lëë xcuerp naa nu, sac gon znu gun zho xcuerp naa parne csilaa naa to grë to. Golgun xtsee rii, parne glu to ganle tibaque rsoladz to naa.”

²⁵ Blozh ga, scaque bzhen me tib cop no vin, rëb me lo zho: “Lëë stib trat cub nu gon riaan Dios grë me miech, rrieequia xchen naa nu nac vin rii, ren ne tso sell trat co par glu nona. Gzataa zeene znu guie to vin, golsoladz ganle zha naca.”

²⁶ Golguien sca, zeene guntaa to xtsee co zaace golguna, sac gon, ga quiaxobnen to lo miech Jesús nac men ne gut xcuent to, psilaa me to. Tibaque none gun to xtsee co, haxta gdziñ dze ne laa me guiaad stib.

²⁷ Gacxe waa, zha ne rieniewguit guic rquiind zho xtsee co zigne no yquiin zhow, dol nroob ga run zho, xcuerp Jesús ga, xchen me ga noguitnie zho. ²⁸ Zeene gun to xtsee co, none wen wen sob to ganle zha naca, pe nacne laaw rac, dzigo lozh ga zac

yquiin tow. ²⁹ Sac gon zha ne lega gow guietxtil co, lega guie zho vin co, sac zhow zig beelze pe xtsee; rrieequia guielne ne yгаа zho ga gow zho, guielne co ga guie zho. ³⁰ Miñcoxe waa, blactaa zha ne nacgrë to i quiayaan nsis, nogaa zho rzacnëe, haxta nzian zho gutle. ³¹ Telne niaca miñe wen wen gwi ne ganle zha nac xtsee co, tsod pe nacne pe guielne ne cxeel Dios dzian ne. ³² Ni zeene scagaa rteed me ne tib caxtigw, laaw run me parne tsaane biini gbiire gbig ne lo me, zeena led yed ne nitlo gal dze ne nitlo grëraa miech ne ziana ncuuaane lo guidzliu rii. ³³ Bets, bzian, golguien sca zeene ycaalsa to gun to xtsee co, golcuëz grëraa zha ne nacgrë to dzigo tipse golsilo golquina. ³⁴ Tel zha ne riengaa lëbd zho lozh gdziñ grëraa zha ne nacgrë zho, mazd gowgazh zho lidz zho, zeena yguibd zho yгаа zho guielne co.

No spalal miñe racladz naa gacnan to, per naa zeene guial naa nëz qui dzigo gne naaw lo to.

12

Guieibiini ne rdeed Espiritu Sant

¹ Bets, bzian, nugaa na ganle laa naa gzet zha nac guieibiini ne rneedz Espiritu Sant, sac racladz naa wen wen guien to zha naca. ² Rsoladz to ganle zeene gard giladz to Xtiidz Dios, nëzrii nëzrec bio to güeygan to stib stib grë mdio, ncuuaane ni tib lan diidz rneed; sangue Dios ne riladz to niina, led scad nac me. ³ Per nsin golsod dien cho nac zha ne noteedpaa xtiidz me, sac nzian zha ne rnee xtiidz Espiritu Sant noteed zho lo miech, per tel rzo zho rdzibdee zho Jesús, ga rlu rquidie zho. Sac zha ne nli nacnie Espiritu Sant, rdzibdeed zho Jesús, sinque rlu zho ne me rnabey zho, ni haxta dib zdoo zho rnee zhow.

⁴ Tib tib zha ne riladz Jesús, zhaase zhaase nac guieibiini ne rgaa zho, per tibaque men ne rdeeda, lëë men co nac Espiritu Sant. ⁵ Nzian mod zrieelo dziuuñ ne dziin lo Jesús, per grëse ne me rnabey ne. ⁶ Tib tib ne zhaase zhaase mod ne rlu Dios nacnie me ne, per grëse ne me nac men ne rlu zha dziuuñ ne xtsiin me.

⁷ Guieibiini ne rneedz Espiritu Sant lo ne tib tib ne, laaw rneedz me parne dziuuñlsa ne xyudar grë zha ne nacgrë ne gacndionraa ne zha racladz Dios.

⁸ No lo zho rdeed me guieibiini rien zho zha cso zho diidz lo miech, no lo zho rdeed me guieibiini rseed zho grë ncuuaane ngan ni rlu zhow lo miech.

⁹ No lo zho rdeed me guieibiini dib zdoo zho rnalo zho Dios, niicle ncuuaane mazdraa ngan rnab zho lo me, raca.

No lo zho rdeed me guieibiini zeene rnab zho lo Dios, riac grë men rzacnë.

¹⁰ No lo zho rdeed me guielbiini r nab zho lo Dios rac grè milagr,

no lo zho rdeed me guielbiini r teed zho xtiidz Dios lo miech,

no lo zho rdeed me guielbiini rien zho cho nac zha ne nlipaa nacie me, cho zhagaa nacie mendox.

No lo zho rdeed me guielbiini rnee zho stib diidz ne gard cseed zho,

no lo zho rdeed me guielbiini rien zho pe rnee zha ne rnee diidz co, dzigo rnee zhow.

¹¹ Grèse guielbiini, Espíritu Sant rdeeda, ni me nan pa mine rneedz me lo ne tib tib ne.

¹² Lo grèse ne ne nac ne zha ne no xnèz Jesús, rriequia xcuerp me nac ne. Tel cuerp, nicle ne nzian part niaaw, per tibaque naca.

¹³ Ndal miech ne nac xcuerp me, no zho nac zha Israel, no zho nac zha zit, lo grè zho no zho ngadoo lo ben, nogaa zho zonlaa, per grèse ne tibaque Espíritu ne nacie ne, sac tibaque Espíritu bgaa ne zeene brobnis ne.

¹⁴ Gotsaa gwi ne ganle, no ni ne, no nia ne, no diag ne, nzian lè niaa xcuerp ne, per tibaque naca. ¹⁵ Gacxe waa telne niaca mine rnee ni ne, grielod guiaba porne nacda nia ne, nacda xcuerp ne. ¹⁶ Scaque diag ne, grielod guiaba porne nacda bziaalo ne led yedraaw nac xcuerp ne. ¹⁷ Sac telne niaca mine gdipse xcuerp ne niaa bziaalo ne, z zha nadien gon ne? Telne gdipsegaa xcuerp ne niaa diag ne, z zha zzoobzhi ne?

¹⁸ Lèezhe wen led scad psan Dios xcuerp ne, sinque grèse part ne niaaw bzaa mew zigne gocladz me, psanse mew zaatne rquiina tib tibia. ¹⁹ Sac telne tipse niaa grèse part ne nac xcuerp ne, jzhazhe rlu ncuaan co! ²⁰ Godca sca, sinque zhaase zhaase nac tib tib part co, per grèsew tibaque cuerp naca. ²¹ Gacxe waa grielod guiab bziaalo ne lo nia ne: "Ib rquiind naa luu"; guiaabgaa guic ne lo ni ne: "Ni lalnu rquiind naa to." ²² Grèse part ne niaa xcuerp ne nose zaatne rquiina, haxta mine mazdraa nda lèe min co rquiinraa.

²³ Stiba, no part ne niaa xcuerp ne rzac ne zhi nona, no part haxta rtoeladznie ne, per gotsaa gwi ne ganle part co nac zaatne ranraa ne, rioxcoraa ne rdze; ²⁴ sangue part ne nziuu lo ne, zienied guic ne dien zha gdzew. Ible sca psan Dios xcuerp ne, zeena sca gacnon part ne rzac ne zhi non. ²⁵ Sca niaa xcuerp ne, grèse part ne niaaw rquiinl-saw xcompañera; led yeda rtsolsa. ²⁶ Golwi ganle, zeene nè tib part xcuerp ne, grèse part ne niaaraaw zienie nè co; scaquegaa zeene rdioon tib part co grèsew zienie guielbley co.

²⁷ Laa naa rne min rii lo to, sac racladz naa guien to sca none tipse gac to. Golguien ganle xcuerp Jesús i nac to grè to, tib tib part ne niaa cuerp co i nac to, rquiinlsa to zha ne nacgrè to. ²⁸ Ni zigne sca tib tib part ne niaa cuerp nose zaatne rquiina, scaquegaa grèse

zha ne no xnèz me, bzose Dios zho pe nac dziin ne gun zho:

no zho rienee xtiidz me lo miech,
no zho rteed xtiidz me lo miech,
no zho rseed miech xtiidz me,
no zho r nab lo me rac grè milagr nroob,
no zho r nab lo me riac men rzacné,
no zho rioxco run xyudar grè miech,
no zho rzo rac zho zha rnabey,
nogaa zho rnee grè diidz ne gard cseed zho.

²⁹ Golgan ganle, psod me zho grèse zho tie-nee xtiidz me lo miech, grèse zho cteed xtiidz me, grèse zho cseed miech xtiidz me, grèsegaa zho gnab gac milagr. ³⁰ Niicle psodgaa me zho grèse zho gnab guiac men rzacné, grèse zho gnee stib diidz, grèsegaa zho gnee zha nac grè diidz co. ³¹ Zhaase zhaase nac guielbiini ne rgaa tib tib zha ne no xnèz me, per goltsoxco yгаа to guielbiini ne mazdraa rquiin.

Sca nagon naca, per golquiaadiaga ganle, nu laa naa gzet lo to stib mine mazdraa non lo grè guielbiini rii.

13

Guieiwleynie

¹ Mine mazdraa rquiin gon nac ne gleynie ne samiech ne. Tel niaca mine bgaa naa guielbiini rne naa grè lose diidz ne rnee miech, haxta grè diidz ne rnee xanj Dios rne naa, ni tel rleynd naa samiech naa, z pa dien rquiin rac naa grètaa diidz co? Rriequia nac naa ga zig tib lè guuib ne loxaque rzedz.

² Tel niaca mine rteed naa xtiidz Dios lo miech, rien naa pe nac mine naraa cxobnen me, grèse wseed ne no rien naa, ni rleynd naa samiech naa, ipaat rquiinda! Tel dib zdoogaa naa rnaloo naa Dios, haxta ncuaane mazdraa ngan r nab naa run mew, ni rleynd naa samiech naa, jpeet nonda!

³ Tel quizzgaa naa grè ncuaane quianie naa lo grè zha ne guien pe yquii, haxta ged naa naa tsec naa, per tel rleynd naa samiech naa, jzhèse ga gun naa min co!

⁴ Sac gon zha ne nli mban zigne nac guieiwleynie co:

riednedz zho samiech zho,
wen rac zho lo samiech zho,
racnèd zdoos zho, niicle ran zho wenraa noded stib miech lo zho,

runz zho ne lèèque zha gunnon zho,
racniatsd zho lo samiech zho,

⁵ runz zho ncuaane coguieinè zho,
gunglèègaa zho samiech zho,

ziana dzho ne tebaa lose zho yquii grè pe cos,

nacd zho zha ne lega zolèe,
rapguieinèd zho samiech zho,

⁶ ni lalnu riod zdoos zho mine run zha ne rsacsi samiech,

mine rleynie zho nac diidzli.

⁷ Zha ne nli rleynie samiech, ni lanu peet grielod yca gleynie zho zho; rquiaadiag zho mine rnee zha co, rzhidznied zho zho; tibaque rquiablazd zho wen grieequia zho, rsaand zho zho, tibaque racnie zho zho.

⁸ Zdzin dze yquiindraa cho cteed xtiidz Dios lo miech, yquiindraa gnee zho stib diidz, yquiindraa grē guielrac, sangue guielwleynie gdzind dze ne nitlow. ⁹ Niicle ne nogaa ne guielbiini ne rneedz Espiritu Sant, niicle no zha ne rien zha gnee zho Xtiidz Dios lo miech, per palase nac ncuuane rien ne niina. ¹⁰ Sangue gal dze ne laa Dios lozh gzhixcuua ne zigne no gac ne, grēse guielbiini ne rdziaap ne niina, paat yquiindraaw.

¹¹ Masaque nac ne niina zig tib mēēdlas. Tel naa, zeene goc naa mēēdlas grēse ncuuane bne naa, grēse ncuuane bien naa, grēse ncuuane pseed naa, grēse ncuuan co ben naaw zigne run grēraa mēēdlas. Per zeene laa naa broob, laa naa biala biini, grēse ncuuan co laa naa bienpaa zha naca; laa guielmēēdlas co bded. ¹² Scadaa nagon rziaac ne niina, palase rien ne zha nac Dios, rrieequia rdzianse ne me niina zigne ran ne zhimlē ne lo beelze pe tib lē vidr; per dzin dze laa ne dzianlo me zigne nacpaa me. Palase ndion ne niina zha nac me, palase rsilo rdzian ne me, per gal dze co laa ne dziuunbeypaa me zigne runbey me ne niina, nanpaa me zha nac zdoo ne tib tib ne.

¹³ Golgacnan sca ganle, grē guielbiini co dzin dze ne yquiindraaw, sangue ne znu: dib zdoo ne rnalō ne Dios, noniepaa guic ne zac mine rnee me, ni rleynie ne samiech ne, lozhda. Per lo gza tsona nagon, guielwleynie co nac mine gdzind dze ne gdzēē.

14

Zha ne rnee stib diidz

¹ Laa to nanle pa min nac mine mazdraa non, igolleynie samiech to sca! Per scagaa golnab yгаа to guielbiini ne rneedz Espiritu Sant. Zig nac guielbiini ne rgaa zha ne rteed xtiidz Dios lo miech, golnab yгаа to min co zeena sca grieeo cseed to miech xtiidz me.

² Sac tel zha ne rgaa guielbiini rnee zho stib diidz, zeene rnee zho diidz co choot riend dien pew, sac lo Dios ga rnee zho. Tel pe nac mine rnee zho ga, Espiritu Sant rsiaba guic zho, per choot racnand dien zha naca. ³ Sangue zha ne rgaa guielbiini rteed zho xtiidz Dios lo miech, mine rnee zho ga rquiina par tsoguicraa miech zha racladz me, par guien zho pe nonguiel gun zho, ni rchooblada zdoo zho.

⁴ Tib zha ne sca rnee stib diidz, lose zho rquiin guielbiini co, sac zhase rioguicraa zha racladz Dios; sangue zha ne rteed xtiidz me,

diidz ne rnee zho rquiina lo grēraa zha ne no xnēz me, grēse zho rioguicraa zha racladz me. ⁵ Wena tebaa grēse to yгаа guielbiini co gnee to stib diidz, per mazdraa gon wena cteed to xtiidz Dios lo miech, cseed to miech xtiidz me; sac min co mazdraa rquiin, lēdle gnee to stib diidz. Zacaquegaa gnee to stib diidz co, totsaque lozhse gnee tow, gneegazhaque to dien zha naca; zeena sca yquiina lo grēraa zha ne no xnēz Dios. ⁶ Bets, bzian, to gase nadien, tel niaca mine glanso naa lo to i csilo naa gne naa stib diidz, zpa dien yquiina lo to? Per tel glanso naa, ine csilo naa clar gne naa lo to pe nac mine zinee Dios lo naa, pe nac grē mine rien naa, pe nac mine ziaadyob gac, zha nac grē mine zhubnee lo Xtiidz Dios, led grēse min co zien to zha naca, ni squina lo to grēse to.

⁷ Haxta grē ncuuane rool miech, zig nac bzie zig nacgaa vihuel, tel csilo zha ne noyoola tel zhataa gool zhow, zha dien guien miech pa di noyool zho? ⁸ Zig nacgaa zha ne rcuedz cornet lo menguiib, telne tel zhataa ycuedz zhow, zha dien gacnan menguiib pe nac vis ne quiaayun zho? ⁹ Scadaa nagon run to zeene rnee to stib diidz lo miech, zha nadien guien zho pe nonee to? Rrieequia lo mese ga rnee to. ¹⁰ Zig nac lo guidzliu ndal lo diidz rnee miech, per tib tiba nose mod ne rnee zhow, nose zha ne riena. ¹¹ Telne guiaad tib zho lo naa csilo zho gnee zho, ni riend naa pe quianee zho, grielod guien naa pe racladz zho, guienгаа zho zha rzaac naa.

¹² Nana sca, zha ne rquiablazd yгаа guielbiini ne rneedz Espiritu Sant, gnab zho yгаа zho mine grieeo yquiin lo grēraa zha ne nacgrē zho, zeena grē zho tsoguic zha racladz Dios gban zho. ¹³ Gacxe nagon waa, zha ne rnee stib diidz, none gnab zho gdeed Espiritu Sant guielbiini lo zho guien zho pe nac grē diidz co, parne gnee zhow lo miech; ¹⁴ sac zha ne sca rnee stib diidz, tel so zho gnab zho lo Dios, riend zho pe nonab zho, loxaque zhiespirituse zho quianee ga. ¹⁵ Gacxe waa zeene gnab ne lo Dios, zeene goolniegaa ne me, zac gnee ne stib diidz, per scagaa none gnee ne diidz ne rien ne, mine riengaa grēraa miech. ¹⁶ Sac gon tel stib diidz nonee ne noyoolnie ne Dios, nodeed ne xquizh lo me, zha dien yquiab grēraa zha ne ndxie ni riend zho pe rnee ne? ¹⁷ Niicle ne ndzon sca nodeed ne xquizh lo Dios, per zha ne noquiaadiaga ga, paat yquiinda lo zho.

¹⁸ Xquizh Dios, tel naa ye naa rne stib diidz, ni mazdraa gon rne naaw que zha ne rneew lo to i, ¹⁹ per zeene zo naa zaatne ndxie grē zha ne noquiaadiag Xtiidz Dios rund naa ne gnee naa stib diidz, sinque rne naa mine guien zho. Rien naa wenraaw gne naa maase gaayaque lan diidz, per mine

guien zho, lëdle so naa gne naa tsii mil diidz, ncuuañe ni tib choot guiend.

²⁰ Bets, bzian, golguien sca golsaan guielmëedlas qui. Zacgaa gac to mëedlas per nêz lo guielntseeba, sangue xpensar to golgac zig zha ne biaa biinile.

²¹ Gotsaa gwi ne ganle zha nac stib diidz. Zhobnee lo Xtiidz Dios rëb me, laa me cxeel miech stib dan miech ne rnee stib diidz, par gnee zho lo zha Israel; per niicle tsienee zha co, ib guiend zhow. ²² Gase naganle rlu rquiind stib diidz co par grë zha ne rnalole Dios, sinque laaw rquiin parne grë zha ne nod xnëz me gan zho ganle nli no me. Zha ne nole xnëz me, zha co rquiin gon zho pe nac miñe racladz me gacnañ zho, pe nac miñe zhobnee lo Xtiidz me. ²³ Per niicle scaw, telne zob bla zha ne sca gard gliladz Xtiidz me, zobgaa bla zha ne pense rsilo rquiaadiaga, ni csilo to gnee to stib diidz, zeene gan zhow lëëtaa miñe guiab zho rzhinle guic to sca rac to. ²⁴ Laa telne grëse to no noteed to xtiidz me, nonee to miñe racladz me gacnañ miech, zha ne sca gard gliladz Xtiidz me, zha ne sca pense rsilo rquiaadiaga, zeene gon zho grëtaa miñe nonee to, haxta ziaa zho biini zien zho ne nli tib miech ngoopdoñ nac zho. ²⁵ Zigse quianee to laa zdoe zho lozh yguudz, laa zho ted yquitsgzhib zho gnab zho perdon lo Dios; ga guien zho ganle ne nli nacie me to.

²⁶ Bets, bzian, golguien sca zeene ycaalsa to cseed to Xtiidz Dios, zigtaa zha ne goola, zha ne cteed xtiidz Diosa, zha ne gnee stib diidza, zha ne gneegaa zha nac diidz co, none tsiene guic zho miñe gun zho ga laaw yquiin parne tsoguicraa los demas zho zha racladz Dios gban zho. ²⁷ Zeene gnee zho stib diidz, none choptaa zho, tsontagaa zho gneew. None tibga zho gnee, ni rquiin zole zha ne gnee pe nac diidz co. ²⁸ Laa telne guiend zha ne grieelo gnee dien pe naca, nodne gnee zhow; mazd len zdoose zho gnee zhow, Diosse gon pe nonee zho.

²⁹⁻³⁰ Scaque zha ne cteed xtiidz Dios, choptaa zho, tsontagaa zho gneew, laa grëraa zha ne ndxie none yquiaadiag zho miñe nonee zho. Telne lëëtaque nonee tib zho, ni csaab Dios guic stib zho gnee, dzigo none cuëz zha ne quianeele ga zeena grieelo gnee zha co. ³¹ Sca none gaca, none tibga tibga zho gnee, zeena grëse zha ne ndxie grieelo gon zho dien pew, parne cseed zho, ni gacn-guieelraa zho lo Xtiidz Dios.

³² Zha ne sca rteed xtiidz Dios, none cseed zho gnabey zho zho, cuëz zho nieeda gdziñ hor ne gnee zho. ³³ Sac tel Dios, rdziladzd me guiots gnaaz pe cos, rdziladzd me ncuuañe nziitni. Miñe rdziladzd me zaacse gac tib cos, ni scagaa run grëraa zha ne no xnëz me.

³⁴ Ni stiba, zeene sca rcaalsa to, racladz naa guien grë men wnaa dzese sob zho. Nodne so zho ye zho gnee, sac gon mngui rnabey zigne zhobneeque lo Xtiidz Dios. ³⁵ Ncuuañe racladz zho gacnañ zho, ro yu ga gnabdiidz zhow lo zha bgui, sac gon, rdzieelda lëëpaaze wnaa gnee zaatne rcaalsa to rquiaadiag to Xtiidz Dios. ³⁶ Zaacse sca golgac, golguien ganle grieelod gun to mine notaa guic to, sac gon led loxaque todse nac zha ne runbey Xtiidz Dios, par guiab to zigne racladz to gac tib cos, sca none gaca.

³⁷ Miñe rne naa lo to nu xtiidz Dios naca, zha ne rteed xtiidz me lo to i, zha ne rapgaa pe stib guielbiini ne rneedz Espiritu Sant, zha co gunbey ganle nli miñe rnabey mew. ³⁸ Zha ne gliladzgaaw, maase gliladz zhow.

³⁹ Sca nagon naca. Goltsoxco sca yгаа to guielbiini cteed to xtiidz Dios lo miech, zeena gacnañ zho zha racladz Dios gban zho; per scagaa, ib ycade to tel zho zha ne rnee stib diidz. ⁴⁰ Per zigne rne naa ga, grëse miñe gun to none zaacse gun tow, tib tiba gacsew hor ne rieguiala.

15

Brieaban Jesús

¹ Bets, bzian, nu laa naa gbire gzet lo to ganle zha nac Xtiidz Dios. Zigne bialseed naa tow, scataque naca; led yeda rdzëë. Lëëw ga pcaania to, ni haxta niinagaa rliiladz tow.

² Lëëw rlu zha grieelo ycaania Dios to, totsaque nli dib zdoe to bliladz tow, ni bii lëëgaaw rnalto to.

³ Zeene bial naa lo to i, pseed naa tow zigne pcaaniase naaw. Gocnañ to cho nac Jesús, gocnañ to por xtol ne gut me lo cruz, zigne zhobneesew lo Xtiidz Dios. ⁴ Gocnañ to ganle zeene goc tson ngbidz pqueets zho me laa me brieaban, zigne raquietaquew lo Xtiidz Dios. ⁵ Len dze ne brieabanle me ga, gonlo Pedr me, niicle grëragaa zha ne nacgza Pedr bzënie zho me, gonlo zho me sac güeyted me lo zho. ⁶ Güey me güeyted me zaatne ndxie ndziibsræa gaay gayoo zha ne nole xnëz me, grëse zho gon me; ndal zha co bii mban niina. ⁷ Bded ga gonaque Santiagw me, ni biire güey me lo zha ne bzënie me ga stib; ⁸ goc palal tiempa, lega naclew haxta lo naa brieequia me. Tel naa gon, rrieequia nac naa zig tib mëed ne rzamëëd, ⁹ lo grëraa zha ne nac poxtl, ni lalnu peet nond naa, per ni rdzieeld gnee zho naa poxtl; sac gon pa lotaa ptsidiñ naa grë zha ne glopaa bzëëb xnëz Dios. ¹⁰ Per xquizh Dios tibatque noxco me naa, bzooblo me naa gane laa naa nac miñe nac naa niina. Ni led zhlëdgaaw bzooblo me naa, sac gon nroobraa xtsiin me noyun naa lo miñe noyun grëraa poxtl; per rned

naa togo naase quiaayuna, sinque me noyacie naa rrieelo noyuy naa.

¹¹ Laa naa rzet min rii, per nacda par glu dien cho nroobraa noyuy xtsiin me, sac mine mazdraa non nac ne noseed no miech Xtiidz me; lëew biadseed no to, ni bliladzgaaw tow.

¹² Nana sca, racladz naa gnë to dien zha nacne no bla to i rnee nlid grieeban mengut; led wen wen name gocnañ to brieeban Jesús. ¹³ Telne rnee to nlid grieelo grieeban mengut, rrieequia gon rnee to ga nlid brieeban Jesús. ¹⁴ Nana telne brieeband me, paat rquiind mine dzigo noseed no miech nu, zhlëse znu noteed-xtse ne rnalo ne Dios. ¹⁵⁻¹⁶ Rrieequia noquidiee no miech, sac gon tibaque rnee no lo zho bleeban Dios Jesús; ni telne nli rrieeband mengut, ye Jesús dzigo bii noliu me niina. ¹⁷ Stiba, telne nlid brieeban me, zhlëse dzigo rnalo to me ycaania me to; telne nlid brieeban me, scase bii zëeb to grë xtol to. ¹⁸ Grë zha ne bliladz me, zha ne nacle mengut niina, lëë bnitlole zho ga dzigo. ¹⁹ Nana telne losaque lo guielmban rise nona gnalo ne Jesús, ne dzigo nac miech ne mazdraa nxen.

²⁰ Per gacnañ to sca ganle, jbrieeban Jesús! Me nac men ne glopaa brieeban lo grëraa miech guizhiu ne grieeban. ²¹ Grëse ne ne nac ne miech, ible laa ne none guet; sac laa guielgut biaan por mine been Adán; per niina ne laa Jesús bиаad, por mine been me grëse mengut laa zho none grieeban. ²² Zigne grëse miech ret porne ziaad zho lo xti Adán, scaquegaa grëse zha ne gbig lo Jesús, zgaa zho tib guielmban ndzon. ²³ Ible sca none gaca, ndion ne ganle laa Jesús brieebanle, ni zeene laa me guiaad, grë zha ne no xnëz me laa zho grieeban. ²⁴ Gal dze co laa me lozh gnitlo mendox ni grëraa ma ne nacie ma, dzigo laa me csan grëse miech ne no xnëz me lадznia Dios men ne nac PxoZ me; dze cotaa nagon laa Dios gun guielwxtis. ²⁵⁻²⁶ Sac ible Jesús nonabay haxta gdzin dze co, zeene laa me gnitlo grëse meyozh ne rlëë lo me; zig nac guielgut, lëew nac mine lultm gnitlo me. ²⁷ Zigne zhoBneeque lo Xtiidz Dios, ladznia me biaan grëtaa ncuaañe no; per guiabd ne togo ye Dios no ladznia me, sac gon Dios nac men ne bdeeda lo me. ²⁸ Gacxe waa, zeene gal dze ne laa me sca lozh gnitlo grë zha ne rlëë lo me, PxoZ me nac men ne gnabay lo me; sac gon men co gocie me been me gan, ni men co nac men ne rnabay.

²⁹ Nana, ne rnee to i nlid rrieeban mengut, ¿pe nac dzigo no zha ne rrobnis xcuent zha ne gutle? ³⁰ Telne niaca mine nlid grieeban mengut, ¿pe nac nadien znu gzataa dze quiabeeladz no no lo grë guielxtseeb? ³¹ Bets, bzian, nligaaw tel naa gon gzataa dze noxtseeb naa lo guielgut; nanle to ganle

zeene rne naa rleynie naa to, diidzli rnee naa; scaquegaa niina, mine rnee naa nu diidzliw. ³² Ne nligaa zeene glo bial naa guiedz Efës nu, ntseeb goc miech rii lo naa, pale grë ma ntseeb. Telne nlid grieeban mengut, zhlëse dzigo nodeed naa grë min co; mazd tel zhataa dzigo gban ne, zigne rëbaque diidz ne rëb: “jGolgotsaa dioow ne, golgotsaa dio ne, benque guielgutse quiambi-aaz ne!”

³³ Per lëda ga gon. Zha ne ziana min co, ib yquiaadiagde to xtiidz zho, zeena gacde to zigne nac zho; zigne zëëbaque diidz: “Telne ndzinlid miech ne ctsieelsa luu, dzin dze ne gac luu zigne nac zho.” ³⁴ Golquix biini sca, gunctaldras to xtol to; pe rtoladzde to, golwi ganle no bla to i gard sëeb xnëz Jesús, haxta ni rienñ zho zhapaa nac Dios.

Zha grieeban mengut

³⁵ Nana, no to gnë: “¿Per zha grieeban mengut? ¿Zhazhe nac cuerp ne grieebannie zho?” ³⁶ ¿Aque nxen wnabdiidz co! ¿Pe rande to zig nac grë midz ne rio liu rac bni, rlozhse rnitlo midz co dzigo laa guizh ne naca ga rlan? ³⁷ Tel rnee to zha nac cuerp ne grieebannie zho, golwi ganle zig nac zhoBxtil, zig nac grëragaa midz, ¿pe niacxe zigne nacsew riow liu, scasaque naca rлана? Led zeene laaw rlan, guizhle naca. ³⁸ Tib midzse naca riow liu, Diosle nac men ne rdeed zhiblaga zigne racladz me. Tib tib midz, psanle me dien zha gluw zeene laaw glan. ³⁹ Zigne zhaase zhaase nac tib tib midz, tib tib guizh, scaque nzian lo cuerp no.

Zig nac miech, zhaa nac xcuerp zho lo xcuerp ma, niicle magaaaw, zhaa nac xcuerp ma ne no lo liu, zhaa nac xcuerp ma ne no lo nis, ni zhaaque nac xcuerp ma ne rsiibe. ⁴⁰ Grë anjl ne no gbaa, zhaa nac xcuerp zho lo xcuerp ne nac ne miech guidzliu; zhaa nac xquielniow cuerp co lo xquielniow cuerp ne no lo guidzliu. ⁴¹ Gotsaa gwi ne ganle, zig nac xbiini ngbidz zhaa naca lo xbiini mëe, lo xbiinigaa mel. Niicle melgaaw, zhaase zhaase nac xbiini ma tib tib ma, no ma palalse rlu, nogaa ma rol rna. ⁴² Scadaa nagon, zhaa rlu cuerp ne rap miech niina, ni zhaagaa glu mine ygaa zho zeene laa zho grieeban. Cuerp ne rdziaap ne niina, ncuaañe tib rded naca, sangue cuerp ne grieebannie ne gal dze co, led yedraa min co nitlo. ⁴³ Mban nac cuerp rii, sac rza-cnëw, reta; sangue cuerp ne grieebannie ne, tib cuerp ne gdzind dze nitlo gaca. Lega zozhidz cuerp rii, sangue cuerp co tib cuerp ndip ndaan gaca. ⁴⁴ Cuerp ne rdziaap ne niina, tib cuerp ngoopdol naca, sangue cuerp ne grieebannie ne, min co gac tib cuerp ne gban zigne racladzpaaw Dios. Sac zigne znu no cuerp ne rquiin lo guielmban rii,

scaquegaa no mine yquiin stib lo guielmban ne gneedz Dios.

⁴⁵ Golsoladz ganle, rnee lo Xtiidz Dios Adán goc miech ne gloopaa biaan ni Dios nac men ne bdeed guielmban lo Adán; sangue Jesús, me rap guielmban, ni zrieelo gdeed me guielmban co lo miech. ⁴⁶ Scaque nagon, glo rgaa ne cuerp ngoopdol ne rdziaap ne niina, dzigoraa yгаа ne cuerp ne gban zigne racladzpaa Dios. ⁴⁷ Gotsaa gwi ne ganle, zeene biaan Adán yudiese bzaa Dios me; sangue Jesús, men gbaa nac me. ⁴⁸ Grése ne nac ne miech, cuerp ne rdziaap ne lo guielmban rii, zigne godcaa xcuerp Adán naca; per zha ne gnalo Jesús, zeene laa zho grieeban laa zho gable tib cuerp zigne nac xcuerp me. ⁴⁹ Masaque nac ne niina zigne goc Adán, ni scaquegaa zdziñ dze ne glu ne zigne rlu Jesús. ⁵⁰ Gulgacnan sca ganle, cuerp ne rdziaap ne lo guidzliu rii, grieelod gdzina zaatne rnabey Dios; sac rdziñ dze ne rnitlow, grieelod gaca tib cuerp ne guete.

⁵¹ Wen wen golzoobdiag mine gne naa lo to nu ganle, waltaa choot gard gacnana: Grése ne ne nac ne zha ne rnalo Jesús, gal dze co zigtaa zha ne mbana, zha ne gutlegaaw ible stsèè Dios xcuerp ne. ⁵² Znuse gac min co zig nacse zeene riab tib belye; lèè min co gac lultm vuelt ne ycuedz xanj! Dios zhitrompet zho. Zeene sedz trompet co, hor co grése zha gut, laa zho grieebannie tib cuerp ne gdziñdraa dze nitlo; scagaa grè zha ne bii zomban, hor co laa xcuerp zho gdzèè. ¡Grése ne dziaap tib cuerp cub! ⁵³ Ible sca none gaca, ib none gdzèè xcuerp ne gaca tib cuerp ne xiñd, tib cuerp ne gdziñdraa dze nitlo. ⁵⁴ Zeene gac min co, ga grieequia mine raquiet lo Xtiidz Dios zaatne rnee: “Nasi laa guielgut bnitlo, guielmbanle nac mine rnabey. ⁵⁵ Ah guielguta, ¿yora na zeene scataa psacsi luu? ¿Yora zeene scataa gocndip xtiidz luu?” ⁵⁶ Grieelodraa pe gun guielgut ne hor co, sac led yedraa hor co tso dol, led yedraa hor co gnabey ley; sac por dol gane rrieelo rsacsi guielgut ne niina, ni por ley rlu pe nac xtol ne. ⁵⁷ ¡Xquizh xquielnzaac Dios pxeel me Jesús, sac gon por Jesús zrieelo griee ne ladznia guielgut!

⁵⁸ Bets, bzian, ne nac to zha ne rleynie naa, golguien sca tibaque dxiits golso lo Xtiidz Dios; zig zie dze goltsoxcoraa golgun xtsiin me, beñque nanle to ganle, grése xtsiin me mine rdziuuñ ne nacda ncuane zhlèse.

16

Gon ne guey Jerusalén

¹ Laa zig nac gon ne noyacro guey gac xyudar grèraa zha ne no xnèz Jesús Jerusalén, laa naa rso diidz lo to zigne psoque naa diidz lo zha Galás.

² Tel palal run to gan tib len zhma, lo co golcob mine ral zdoo to gdeed to gac gon co; gzobse dze goltxiesana lo zha ne noyunlow. Adel na ganle haxta glansoraa naa i, dzigoraa no to dien zha topa. ³ Ni golzoobloga dien bla zha ne tsie tsiesana, na zeene glanso naa i dzigo yquia naa tib guits ne güey zho tsiesan zhow; ⁴ ni tel rquiinpagaa ye naa ga, dzigo na maase ga naa ganie naa zho.

⁵ Len dze rii no guic naa gateed naa nèz Macedon, dzigo gale grie naa glanso naa lo to i. ⁶ Nend zbèz naa lo to i palal dze, togo iquegaa teed naa len mèè nal ne ziaad; ni racladz naa zeene gbi naa i, siguiel to gun to xyudar naa tel pa nèz ne no ga naa len dze co. ⁷ Telne zneedz Dios diidz cuèz naa lo to grè len dze co, zbèz naa, sac racladz naa tib guialteed naa lo to i. ⁸⁻⁹ Niina ne no naa Efés nu, len dze riipaa rlu ndal miech ne no liaadz ycaania Xtiidz Dios, gane zbèz naa nu haxta ted lni Pentecostés. Nligaa ndal zha ne no liaadz co, per scagaa ndalaaque zha ne rtsidila.

¹⁰ Nacle diidz laa Timoté guiaad i; tel nanñ new naraa guiaad me, golsguiel zeene glanso me zaacse golcaania me, zaacse golcuèzlo me, zeena tsonley zdoo me; golgan ganle, ye me quiaayun xtsiin men ne rnabey ne. ¹¹ Golguien csanwinde to me, sinque golgap me respet; zeena zeene glanso me lo naa nèz rii ine nley gac me csoladz me zha biaadted me lo to i. Laa naa quiambèz glanso me nèz rii, gza me zha ne guiaadnalraa zhits me.

¹² Sangue bets ne Apol, blactaa bnab naa lo me niaadgza me zha ne ziaad i niaadgan me to, per rzac me grieeloda niina. Rien naa zeene gdeedtaaw diidz, ible ziaad me ziaadgan me to.

¹³ Bets, bzian, nsin golso, tibaque golnalo Dios. Ib ctsèède to xtiidz to, tibaque goltsoxco tsienal to mine rnabey me. ¹⁴ Ncuane guntaa to, golconie guic to gun tow porne rleynie to Dios, porne rleyniegaa to samiech to.

¹⁵⁻¹⁶ Laa naa rso diidz lo to, niowse gon golgac lo grè zha bets ne, zha ne run xyudar to i; zig nac Stef grè menlidz me, golgon xtiidz zho. Led nanle to ganle, Stef nac tib men ne gloopaa biladz Xtiidz Dios nèz Gres i grè menlidz me; ni desde dze co laa me pquiablazd tibaque squi quiaayun me xyudar grèraa zha ne no xnèz Jesús. ¹⁷ Rley naa gon zeene gon naa laa me blanso nu gza me Fortunat ni Acaic, haxta stib goc zdoo naa gocnan naa zha no to, masaque gun naa cuent grèle lo to ga gon naa. ¹⁸ Ne nligaa bloomley zho zdoo naa, ni rien naa scaquegaa to nley gac to niina zeene gon to zha no naa. Golguien gon zha non nac zho, golwi ganle pa lotaa nac dziin ne quiaayun zho.

¹⁹ Grëse zha ne no xnëz Jesús nëz Asia nu, laa zho rxeel bdiuzh lo to, golcaania zhibdiuzh zho. Scaque Aquil grop me Priscil, ni grëraa zha ne rcaalsa lidz zho rieseed Xtüdz Dios, grë zho laa zho rxeel bdiuzh lo to. ²⁰ Scagaa grë zha ne no nu, ye zho laa zho rquiaabdiuzh to. Zeene ycaalsa to i, ine golnaaznialsa, golqueedzlsa, golcaania zhibdiuzh no.

²¹ Nu laa naa cso schop lan xtidz naa lo to, ni golwi ganle naazhal yquiaw: ²² Grëse zha ne gon nêd gleyniepaa Jesús, miech ndzi-ibdeele ga nac zho. ¡Ni ile gon ziaad me!
²³ Mese nac men ne gacnien to, me nac men ne no zhixco to, sac ne nligaa rleynie me to.

²⁴ Niicle naaw rleynie naa to, sac gon tibaque nac ne ngab ne lo me. ¡Lëed bii gdzieel ne sca!

Pabl

BROP GUITS NE PXEEL PABL LO ZHA CORINT

¡Diuzh to grëse to!

¹ Naa nac Pabl, grop no bets ne Timoté, laa no rquia stib guits rii rxeel no guiedz Corint i. Nanle to ganle Dios bzo naa, pxeel me naa none naa Xtiidz Ndzon Jesús lo miech.

Laaw ziaad lo to i, grëse to ne nac to zha ne ngab xnëz Dios; zigtaa tow, zigtaa grëragaa zha ne no dib nëz Gres iw.

² Dios men ne nac Pxoze ne, ni Jesús men ne rabey ne, me gunlay to, me glu ganle pa lotaa noxco me to zeena peet zhgab ctsebdet.

³ Bets, bzian, golgotsaa gwi ne ganle, jzha ndzontaa Dios, Pxoze Jesús men ne rabey ne! Sac gon, pa lotaa rquia zdoome ne ne, pa lotaa rchoobladz me zdoome ⁴ lo grëtaa guielnë ne rdieed ne. Ni laa me rchoobladz zdoome gon, zeena scagaa grëraa zha ne rdzian ne no guielnë, mban rac zho, guio ne guiochoobladz me zdoome zho zigne rchoobladaque me zdoome.

⁵ Zig nac niina, nroob guielnë ne nodieed no loxaque ne rliladz no Jesús, per scaque-gaa ib rsaand me no tibaque nochoobladz me zdoome. ⁶⁻⁷ Laa no nodzian grë guielnë rii, sacne noxco no nonee no lo miech zha laa zho lo dol, parne scagaa grieele choobladz no zdoome to. Lo grë guielnë rii, me nac men ne nochoobladz zdoome no, gane ndion no scaque squia zdoome me to, schoobladz me zdoome zeene gdzin dze ne laa to gan grë guielnë ne nodzian no nu niina. Ni me gon nac men ne gacnien to glëb to gan tow.

⁸ Bets, bzian, tel niaca mine nian to ganle zha nactaa grë guielnë nroob ne bdieed no zeene no no nëz Asia. Ne nligaa nroob psacsi zho no, ncuaae lëbdraa no lo grë guielnë co, tibaque rdzieeto no bod gataa niet no. ⁹ Masaque bzhaac no len dze co zig rzac tib zha ne nole guet, laa zho quiambëzse gal hor ne guet zho. Garaa bdzion no peet grieeleod dziuun no ne nose, sinque Dios none gnalo no, mese zac csilaa no lo grëtaa guielnë; sac tel me, haxta mengut rbeeban me.

¹⁰ Ni nligaa bleeme no lo guielnë co, bla me no lo guielgut co; ni ndion no scaque zla me no lo grëraa guielxtseeb ne dzian no, ¹¹ totsaque gacnie to no tibaque gnab to lo me gacnien me no. Zeena, tibaque gac ne grëse ne gdeed ne xquizh lo me.

¹² Rley no sacne rien no choot noquidied miech, ndzinli mban no, zigtaa zeene zo no lo tow, zigtaa zeene zogaa no lo grëraa miecha. Per guiabd ne togo por niini now,

sinque ne nquialadz Dios no gane quiayacnien me no nzu mban no. ¹³ Grë mine rnee no lo guits ne zixeel no lo to, niapse diidzliw, ni mine rgobey no grieele guien to min co rquiaa no; gane racladz naa gdzin dze ne guien tow. ¹⁴ Nli runbeydpaa to zha nac naa, per racladz naa gley to zeene ran to naa, zigne gleyaque naa gan naa to gal dze ne laa Jesús, men ne rnabey ne guiaad stib.

¹⁵⁻¹⁶ Sca nagon rzaac naa, gacxe na ni naa glo nialgan naa to, dzigo ile nrie naa nia naa nëz Macedon. Ni zeene mbire naa nëz co, nialteadaque naa lo to i stib; zeena niac chop vult ne nionley zdoome to. Lozh ga, ine niowse nzonëz to naa nia naa nëz Judé. ¹⁷ Ni pasëe naa nial. Per guiabde to togo bod notiblid guic naa zeene sca bne naa, o nacgaa naa zig nac grë zha ne laglaase rnee tib diidz, laa len zdoome zho nanpaa zho gund zhow. ¹⁸ Dios zobwi ganle rdziuunscad no. Mine rnee no, rdziuun now.

¹⁹ Golgan ganle, zigtaa naaw, zigtaa Silvana, zigtagaa Timotéw, no biadseed to cho nac Jesús, men ne nac Xpëed Dios; ni zig nac Jesús, rquidied me. Grëse mine rnee me run mew, ²⁰ ni grëse mine psan Dios diidz gu me, grësew noyuu mew; gane niicle nogaaw rnee no lo miech ganle ible run me mine rnee me, ga rlu ganle pa lotaa men nroob nac me. ²¹ Ni lëe Dios co gon nozhixcuaa lo xquielmban ne, laa ne ngab xnëz Jesús niina; me bzooblo no nonee no Xtiidz me. ²² Haxta pxeel me Espiritu Sant zdoome ne, rrieequia bloobey me ne ga, par glu ganle lo me ngab ne, ni ible zgaa ne grëtaa guielnzaac ne bnee me gneedz me lo ne.

²³ Me zobwi, me nan ganle pe nacne gard guial naa. Gard gon guial naa, per por tow; sac rquia zdoome naa to, racladz naa loxaque guialquiago naa to i, lozh ga mban gac to. ²⁴ Guiabde to sca togo bod racladz no guiaad no. Nli rquindraa to guiadnee no lo to zha gliladz to Dios, sac dib zdoole to rliladz to me; per laa no racladz ine guiaadlonley no zdoome to i. Golguien sca, min co racladz no, racladz no guiaadloguielnë no to.

2

¹ Min co nagon bend naa ne nial naa, ² sac nonguieldda ga coguielnë naa to, ni to nac zha ne rgonley zdoome naa. ³ Ne racladzdxae naa min co waa, gane pxel naa tib guits co lo to glo, zeena nzhixcuaale lo guielto ne nobee to i, zeene laa naa nlanso. Sac tel lega nlansoe naa, laa ne ndzio ne guielbley, lel guielnë ndzio ne. Ni nan to ganle, tipse nac guielbley ne rdziaap ne; zniacxe zrieele nley gac to telne ran to mban rac naa?

⁴ Tel gan to ganle zeene pxel naa guits co, ine nlipaa mban rac naa no naa zhizhgab to! Haxta roon naa zeene noquiaa naaw.

Laa naa pxel guits co lo to, per pxeld naaw par ngoguejnê naa to; sinque laaw pxel naa, zeena xixcuaaniob lo ncuane ndzinlid ne noyac i; ni laa naa ben min co sacne rquia zdoo naa to. ⁵ Zeene bin naa zha nac dol ne noyun zha co i, zig rne naa ga: bio naa guielnê; per rien naa mazdraa nroob bio to guielnê. ⁶ Nana gon, ne squi laa to pteedle zho tib caxtigw, jlelew ga na! ⁷ Golguiaanladz mine been zho ga, golneewen lo zho stib, golchoobladz zdoo zho zeena gacmband zho. Sac telne csaanladz to zho, nend scase lozh guiuu zho lo xquielnê zho. ⁸ Rnab naa lo to, golleynie zho stib, zigne rleynieque to zho glo.

⁹ Ni stiba, laa naa pxel guits co lo to, zeena dien pe zon to diidz gun to mine rne naa lo to ga. ¹⁰ Golguiaanladz mine been zha co sca, tel naa laa naa biaanladzlew. Jesús zobwi ganle laa naa benle zho perdon, zeena gbiire zaacse gac to; ¹¹ ni scagaa gleyd mendox gunguet ma ne. Led nanle to ganle, zombêzle ma dien zha gnitnêz ma ne.

Tibaque noxco Pabl cseed miech Xtiidz Dios

¹² Bded ga nagon dzigo bia naa guiedz Troas. Zeene bdziñ naa ga, ne nligaa bneedz Dios diidz niun naa xtsiñ me ga. ¹³ Nac diidz ga ndzieelo naa bets ne Tit, per zeene gon naa bdziñ me, biotiblidraa guic naa. Nacne briquee naa ga bia naa nêz xtan zha Macedon, biaguib naa me.

¹⁴ Per, jxquizh xquielnzaac Dios! Sac zaatne ziotaa no, Jesús ner lo no, me rlu ganle rdziuuñ no gan lo grêta ncuane rca. Tibaque rnee no lo miech gacnan zho ganle cho nac me, sca quiaxobnen no Xtiidz me, zig rzêbxlaa tib ncuane nex rlaa. ¹⁵ Haxta no, masaque nac no lo Dios zig tib ncuane sca nex rlaa; sca nac no lo me sacne laa no ngable lo Jesús. Nêzri nêzrec nex zêbxlaa gox co, zigtaa lo grê zha ne ngable xnêz Diosa, zigtagaa lo grê zha ne zie nêz ne nitlow. ¹⁶ Par grê zha ne nôle nêz ne nitlo, masaque rzac zho no zig tib gox ne nguid rlaa, haxta rsoladz zho pe nac guielgut ne quiambêz zho; sangue grê zha ne nôle xnêz Dios, rzac zho no zig tib gox nex ne runcsoladz zho guielmban ndzon ne no yгаа zho. jNi led chold zha ne gon grieelo gun dziin rii! ¹⁷ Nu rquiin zha ne dib zdoo rquiabladz gun dziin lo Dios, glu zho ne nli Dios pxeel zho, ne nli Jesús nacie zho. Sac no zha ne, loxaque rquiaalo zho ye zho rseed miech Xtiidz Dios, per laa zho ruña par cuee zho dimi.

3

¹ Nana ne znu rne naa, guiab to bod yeque no rdziuuñ zig ruñ zha ne sca rquidie ga, lêêque zha runnon zho, rio zho dien pe didz ne rquia rey zho par glupaa dieñ cho nac

zho. Ni lalnu rdziuuñ nond no no, niicle peet diidz rquiindгаа no. ² Led yed no rquiin pe diidz ne dzeey no, to rlu cho nac no. Grêse miech ne gan zha notsêê Dios lo xquielmban to, gase gunbey zho no, ga glu pe nac dziin ne rdziuuñ no. ³ Gane rrieequia nac to zig tib diidz ne quialu ganle cho nac no. Jesúszhal pquiaa diidz co, ni pquiind me pe tint ne nquiaa mew, sinque laa me pquiaaw con guielbiini chen zhiEspíritu Dios, men ne nguiamban. Ni pquiindгаа me pe lo guits ne nquiaa mew, sinque laa me pquiaaw zdoo to.

⁴ Ni ndionpaa no nli scaw, sac Dioszhal rluw, ne nac no zha ne ngab lo Jesús. ⁵ Per guiabd ne togo nose rrieelo rdziuuñ grê mine rdziuuñ no, led scada, Dios nac men ne racnieñ no rdziuuñ now; ⁶ sac me bdixbiini no zha cseed no miech diidz cub ne psan me. Gane laa no noseed miech niina, per rseete no zho tsienal zho mine rnabey ley, sinque laa no noseed zho guien zho tsienal zho mine rnabey Espiritu Sant. Sac tel leya, lêê gdib rnabeya guet grêse miech ngoopdol; sangue Espiritu Sant, laa me rlu zha yгаа zho tib guielmban ndzon.

⁷ Golsoladz ganle, zha blu Dios biini ne nac xquielndzon me zeene pcaania Moisés ley ne rnabey guet grê zha ngoopdol. Biinidoo ne biaan lo Moisés dze co, haxta lêbd lo zha Israel gwi zho lo me, per dzega dzega biuu biini co. ⁸ Scaque nagon nolu Dios xquielndzon me, niina ne laa Espiritu Sant nolu zha yгаа miech guielmban; per, jmazdraa gon nroob nac guielndzon rii! ⁹ Sac gon, tel scataa blu xquielndzon Dios zeene biaan guet grê zha ngoopdol; mazdraa dzigo nroob nac guielndzon ne rlu niina. ¹⁰ Ne nligaa, palalse ga nac biini ne blu lo Moisés zeene pcaania Moisés ley co, mazdraa nroob biini ne ziaadnie xtiidz cub Dios niina. ¹¹ Ni stiba, bza dze ne been ley co dziin; sangue xtiidz cub me, gdziñd dze ne gdzêew. Gacxe waa, mazdraa nac biini ne ziaadnieew.

¹² Ni ne ndionaxe no waa gdziñd dze ne gdzêew, gane tibleque laa no noneew lo miech; ¹³ rdziuuñd no zig been Moisés. Sac tel Moisés, pquia tib lê lar lo me dzigo gond zha Israel zha bnitlo biini ne biaan lo me ga. ¹⁴ Ni rrieequia ye lo grê zha Israel ga sca bdze, gacxe waa, haxta lo nadze riend zho zha zhoobnee lo Xtiidz Dios, mine psan me padzeela. Ible riend zho ne bdedle dze ne pquiin diidz gol co, Jesúsle none glladz zho niina. Me nac men ne cخال lo zho. ¹⁵ Ne nligaa sca nac zho, haxta lo nadze niicle rlabraa zho lo guits ne pquiaa Moisés ga, tibaque ndip nac zdoo zho.

¹⁶ Per tel zha ne csaan grê guielntseeb, dib zdoo zho guien zho cho nac Jesús, ible zlit me lar co lo zho; ¹⁷ sac gon, miech ne naciele zhiEspiritu me, led yedraa zho

ngadoo lo ley gol co. Ni ndion ne ganle, meque ga nac Espiritu.¹⁸ Gacxe waa, grèse ne ne ngab ne xnëz Jesús, led yedraa lo ne ndze. Masaque nac ne niina zig tib quiewan, zeene ran miech zha mban ne, ga ran zho ganle pa lotaa nac xquielndzon Dios. Tibaque nozhixcuaa zhiEspiritu me lo xquielmban ne, zigse zie dze noluraa me zha nactaa guielndzon ne rap me.

4

¹ Ne nligaa noxco Dios ne, gane niicle peet nond no laa me bzo no quianee no Xtiidz Ndzon me lo miech; ni choot rsaand dziin rii.

² Zeene rseed no miech, choot rquidied zho par gliladz zhow. Choot nolud wseed ne ziaate lo Xtiidz Dios; guieltole ga, tel dzio no yquidiee no miech, cseed no zho ncuuaane nacdraa Xtiidz me. Me zobwi ganle niapse diidzli rnee no, niicle grëгаа zha ne rdziuunbey no, nan zho rquidieed no.

³ No grë zha ne ib nëd tsoguic zha nac zhiwseed Dios mine nonee no; sac lëëque grë xtol zho notse lo zho, laa zho zie nëz ne nitlo zho. ⁴ Nëd zho gliladz zhow, sac ible mendox (ma ne nonabey lo guidzliu rii) noyun ncow xquielrien zho; gane rienđ zho ycaania zho Xtiidz Ndzon Jesús, men ndzon ne biaadlu ganle zhapaa nac Dios.

⁵ Laa no quiaseed miech, per rseete no zho gacnan zho dien cho nac no, sinque laa no noseed zho gunbey zho cho nac Jesús. Gacnan zho, ne me nac men ne rnabey; laa no, tib ngundziin winse nac no lo to, sacne rleynie no me. ⁶ ¡Ne nligaa tib ngundziin winse nac no! Golwi ganle Dioszhal, men ne bnabey biaan biini ne rziini guidzliu, me bdxibiini guic no bien no xquielndzon me ga biaadlu Jesús.

Rsaand Dios zha ne dib zdoo rnalo me

⁷ Ne nlipaa, lega nacse no zig nac tib guies yu ne notsow grëtaa ncuuaane ndzon ne zieneedz Dios lo no. Gase na ganle rlu, Dios nacchena grësew, peet nond no loxaque nose.

⁸ Me nacie no, niicle nroob zhgab ne rio no, per racmband no; niicle nroob nac guielxteeb ne rdziaa no, per choot rdziebd. ⁹ Tibaque notsidil miech no, per rsaand Dios no; niicle rsacsi zho no zootle laa no nitlole, per rbiire riochee no ga stib. ¹⁰ Zaatne ziota no, quianał miech gut zho no, zigne beenaque zho Jesús; per me rsilaa no ladznia zho. Ga rlu ganle ne men mban nac me, ni me nacie no. ¹¹ Gzataa dze noxtseeb no gut miech no, loxaque ne rdziuun no xtsiin me; per ga rdeeda diidz rlu no ganle pa lotaa nacie me no, niicle ne tib lëse ben nac no. ¹² Ne nligaa, tibaque noxtseeb no lo guielgut ne znu nonee no Xtiidz Jesús; per scagaa,

porne biadnee now i laa to bgaa guielmban ne gneedz Dios lo to. ¹³ Niicle nagon ne znutaa noxtseeb no, per ndionpaa no me quianap no, gane rdzieebd no noseed no miech Xtiidz me; zig zho bneeque lo Xtiidz me, zaatne rnee: "Bliladz naa mine rnee me, gane rne naaw." ¹⁴ Ni ndion ne ganle, zigne bleeban me Jesús, scaque zbeeban me ne, lozh ga tipse gac ne gdziinne Jesús ne lo me.

¹⁵ Grëse guielnë ne nodzian no, laaw nodzian no sacne nligaa noxco no to; zeena grëse to sëëb xnëz me. Sac telne ndal grë zha ne sëëb xnëz me, scaque gaa ndal zha ne gdeed xquizh lo me, cxobnen zho pa lotaa men ndzon nac me. ¹⁶ Mincoxe waa, ib choot riablod. Nli zigse zie dze laa no bii noyoxraa, sangue zhiEspiritu no, zigse zie dze laaw racnucubraa, laaw riaanmberaa nëz lo Dios. ¹⁷ Ni stiba, niicle ne znutaa nodzian no grë guielnë rii, per ncuuaane tib rded naca, led ncuuaane rnada; sac gon, zeene laa no lozh dieed grë min rii, mazdraa nroob nac lo guielndzon ne yгаа no, ni mincosi gdzindraa dze lozha. ¹⁸ Gacxe waa, choot rdziuuncasd grë ncuuaane quiazdian no lo guidzliu rii, sinque laa guic no nonie yгаа no grëtaa guielbley ne no gbaa. Sac grë ncuuaane ran ne niina, ncuuaane tib rded naca; sangue grë ncuuaane gard dzian ne ga, led yedraa min co nitlo.

5

¹ Ni ndion ne ganle, zeene laa xcuerp rii ne nitlo, laa Dios gneedz stib mine gdzindraa dze nitlo. Masaque nacse xcuerp rii ne zig nac tib yu guizh win ne rbëz miech lo wгаа; sangue cuerp ne gneedz me lo ne, rreequia naca zig tib yu ne gbiaazpaa ne gbaa. ² ¡Blactaa guielnë ne rdieed ne niina ne rdziaap ne cuerp rii! Gacxe waa, quiambiaaznë ne gdziñ dze ne gneedz me stib cuerp co. ³ Sac gon, led niapdse Espiritu gdziñ ga, sinque none gapa cuerp. ⁴ Ne nligaa, niina ne mbannie ne cuerp rii, zeene në nodieed ne, rziacac ne tebaa laa ne mbanniele stib cuerp co. Per par yгаа ne cuerp cub co, ible none guet ne. Per zienied guic ne sca, sinque laa ne racladz zhits cuerp riise tsie cuerp co, zig nacse ne niina yгаа ne guielmban ndzon co. Sca rziacac ne, sac choot rdziladzd guet. ⁵ Dioszhal bzo ne yгаа ne min co, ni ible zaca, sac gon laa me pxeelle Espiritu Sant nacie ne.

⁶ Tel no, min co nagon quiambiaaz no; ndionle no laga mbannie no cuerp rii, grielod yгаа no min co, grielod gdziin no zaatne no Jesús. ⁷ Nli rdziand now niina, per dib zdoo no riladz no ib laaw nonee gac. ⁸ Gacxe waa, haxta nley rac zdoo no quiambiaaz no gdziñ dze co; rziacac no tebaa laa no brielee len cuerp rii, zeena guiohannie no Jesús. ⁹ Min co nagon,

tibaque noxco no gac no zigne rdziladz me, zigtaa niina ne no no lo guidzliu riiw, zigtagaa zeene gdziin no lo mew. ¹⁰ Sac gon, grëse ne zdziin dze ne laa ne gacredz lo me zaatne guñ me guielwxtis. Grëse ne ne nac ne miech, tel zha mban ne niina ne rdziaap ne cuerp rii: zigtaa zha ne zaacse mbana, zigtagaa zha ne tel zhataa mbana, ga yгаа ne miñe guiguiañ ne tib tib ne.

¹¹ Min rii nagon nonie guic no, gacxe waa noxco no nonee no lo miech zha nac Xtiidz Dios. Ni me nan ganle dib zdoo no nodziuuñ no dziin rii, ni racladz naa guien to ganle sca nac no.

Zaacse golgac lo Dios

¹² Grë miñe blozh bne naa nu, zig bnele naa ga: nacda par dziuuñnon no no. Laa no rnee grë min rii, zeena guienpaa to ganle cho nac no; ni scagaa, guien to zha ctsire to lo xtiidz grë zha ne squi riaad i rlozhd gacniats zho. Tel zha, laglaase rlu zho miech wen nac zho. ¹³ Nligaa, dib zdoo no noxco no xtsiin Dios, laa miech masaque rzac zho riotsle guic no. Nana niicle tel riotsgaaw, per xtsiin Dios nodziuuñ no. Sangue no, ndionpaa no riotsd guic no; laa no rdziuuñ grë min rii, sacne noxco no cseed to Xtiidz me. ¹⁴ Laa no nodziuuñ dziin rii, sacne rleynie no Jesús, maase tel zhataa rzac miecha.

Ndionpaa no Jesús bgaa guielgut ne nioguiañ ne; scaqueгаа, ndion no niina ne laa no bziaab xnëz me, rrieequia gutle no lo grëtaa ncuaañe ndzinlid ne bdziuuñ no glo. ¹⁵ Gacxe nagon waa, grëse zha ne rzëeb xnëz me, nodraa gban zho zigne notaa guic zho, sinque laa zho none tsoxco gban zho zigne rdziladz me; guien zho ganle, me gut bdiizh me xtol zho (ni brieaban me), par yгаа zho tib guielmban ndzon ne gdziñd dze lozh.

¹⁶ Gotsaa guien sca, zha ne nole xnëz Dios, ziaacd ne zho zig rzac grëraa miech zho, rzac zho peet nond zho. Tel naa glo sca bzhaac naa Jesús, masaque bzob naa cholze miech nac me; sangue niina, ndionpaa ne ganle cho nac me. ¹⁷ Sac gon, grëse zha ne ne nlipaa dib zdoo riladz Jesús, stible miech nac zho. Grëse tel zha goc zho glo, laa min co bdedle. ¡Ncube nac lo xquielmban zho! ¹⁸ Ni loxaque Diosse gon zrieelo sca guñncub miech. Sac gon, me pxeel Xpëed me Jesús bi-aadtizh grëse xtol ne, laa ne biaan wieso lo me. Ni scagaa niina, me bzo no znu quiaaseed no miech, zeena gacnan zho zha grieelo guiaanwen zho lo me. ¹⁹ Znu gon naca: Laa Dios nodeed diidz niina guiaanwen miech lo me, guñquizhd me zho tel pe nactaa xtol zho, totsaque gliladz zho cho nac Jesús. Min rii nagon bzo me no nonee no lo miech. ²⁰ Golgan sca ganle, xmandad Jesús nac no. Me zobwi ganle laa no rnab lo to niina:

¡Golguiaanwen lo Dios! Golguien ganle, rrieequia gon Dioszhal rso diidz rii lo to. ²¹ Sac gon, Dios bzo Jesús bgaadz me grëse xtol ne, niicle ne ni tib dol rapd me; zeena niina ne laa ne wbig lo me, grieelo ndzinli gban ne, zigne racladz Dios. ¡Masaque Jesús bdiizh grëse xtol ne, psanwen me ne lo Dios!

6

¹ Gotsaa gwi ne ganle pa lotaa noxco Dios ne. Gacxe waa, no ne nac no zhingundziin me laa no rso diidz lo to: golguien golgon miñe nonee me lo to niina. ² Lo Xtiidz me, no tib zaatne znu zho bnee:

Lëetse len dze ne nosilaa naa miech, laa to bñab gacnie naa to.

Lëetse len dze ne rdeeda diidz gac miñe quiambëz to, laa grë xliaadz to blanso lo naa.

¡Ni lëe dze co nu nagon bdziñ! ¡Nadzegazh quiambëz me gbig miech lo me, zeena csilaa me zho!

³ Dziin rii quiadziuuñ no, choot quiadziuuñtald xtol miech, choot noguibd sozit zho lo Dios. Zaatne ziotaa no, tibaque noxco no zaacse gac no, zeena tsod pe yquiaaqui zho gneenë zho Dios. ⁴ Zigtaa ncuaañe rdziuuñ now, zigtaa grëгаа ncuaañe nodieed now, rlu no ganle ne nli xtsiin me nodziuuñ no. Tel pe nactaa grë guielnë ne nodieed no, tel pe nactaa grë xliaadz no, niicle no zaatne rsacsi miech no, per choot rietede. ⁵ Blactaa zaatne rguin zho no, zaatne rsioogyu zho no, zaatne rriee zho ndal zho ractseeb zho lo no. Blactaa rdib rdzaag no rdziuuñ no dziin, no zaatne rriee zhimcaalo no dipse guieel, no zaatne retgbin no.

⁶ Ne nligaa rdzioxco no ndzinli mban no, choot rietede, wen wen rdziuuñbey no zha nac Xtiidz Dios, sca ran miech ganle ne nli Dios pxeel no. Dib zdoo no rleynie no samiech no, wen rac no lo zho, zilu no ganle pa lotaa racnie Espiritu Sant no.

⁷ Niapse miñe nac diidzli min co rnee no, ni scagaa Dios, nolu me ganle ne nli scaw. Niapse guielwen, niapse diidz ndooladz rlu no ne nli lo Dios quiadziuuñ no dziin.

⁸ Choot rsaand miñe pso Dios no nodziuuñ no, maase niicle miñe runtaa miech no. No zaatne runnon zho no, nogaa zaatne rzhidznie zho no; no zaatne rneenë zho no, nogaa zaatne rleynie zho no. Niicle ne diidzli rnee no, per no zho rzac noquidiee no miech. ⁹ Runbeyd miech cho nac no, sangue Dios runbey me no. Niicle ne tibaque noxtseeb no lo guielgut, per peet gard gac no laa no bii mban; niicle ne rsacsi zho no, per choot gard guet. ¹⁰ Niicle ne no hor mban rac zdoo no, per znusaque rneedz Dios tib guielbley zdoo no. Nacd no zha dimi, per nroob nac grë guielnzaac ne rgaa miech zeene rnee no lo zho. Rdziaapd no

grê ncuuaane rap grëraa miech, per ncuuaane rdziaap no, nroob naa.

¹¹ Bets, bzian, ne no to Corint i, laa no rzodiidznie to, laa no rnee lo to grëse zigne rza zdoon no. Ne nligaa rleyynie no to. ¹² Tel ne rzac to gard gacpaa ne tipse, per led nod naca. Tel no rleyynie no to, sinque to gon rien no laglaase rleyynie no to. ¹³ Ne nligaa peet rqueets naa lo to, laa naa rne lo to zig rnee tib dad lo mëed. ¡Scauegaa to, golsiguiel zaacse golgac!

Zhaa nac biini lo guielcow

¹⁴ Golguien, guiabde to tipse gac to grë to zha ne gard sëeb xnëz Dios. Golgan ganle, tib zha ne nole xnëz me, rdzieeld gac zho zig rac zha ne bii no lo dol. Zig nacgaa biini, zhaa nac biini, zhaagaa nac lo guielcow. ¹⁵ Sac gon, tel Jesús, çniacxe tipse nac me grë me mendox? Scauegaa grë zha ne nole xnëz mew, grielod tipse gac zho grë zho zha ne no lo dol. ¹⁶ Tel xyadoo Dios, nacda zig nac xyadoo grë mdio. Ni rrieequia gon ne nac xyadoo me, zigne raquiet lo Xtiiidz me zaatne rnee:

Na gbannie naa to, ine sënne naa to.

Naa giladz to, ni scagaa to, lo naa ygab to.

¹⁷ Gacxe waa, rbiire me rnee me:

¡Golrie lad grë zha qui, golbiche lo zho!

Gunde to grë ncuuaane ndzinlid ne run zho, golbig lo naa, naa ycaania to.

¹⁸ Naa gac Pxoze to grëse to,

scagaa to, laa to gac xpëed naa.

Lëe xtiidz men ne nabeey to nu.

7

¹ Bets, bzian, gotsaa gwi ne ganle zha naca ncuuaane psan Dios diidz ygaa ne. Gacxe waa, golgotsaa lozh griee ne lo grë zhgab yozh, lo grë ncuuaane ndzinlid ne runctal xtol ne. None zigse zie dze dzioxcoraa ne gban ne zigne rdziladz me.

² Ne nligaa, zaacse golgac golcaania no stib. Tel pe guielnë ne noded to, tel zha rzac to, to bguiba; zig nac no, choot noquidiede to, choot nosacside to. ³ Guiabde to togo noquiago naa to nu, laa naa nile ganle dib zdoon no rleyynie no to. Len ngbidz ne gbantaa no lo guidzliu rii, ib csaand no to. ⁴ Laa naa rne grë min rii lo to, sacne nanpaa naa zha nac to, nanpaa naa zac gne naa lo to zigne nose guic naa. Zeene rsoladz naa to, haxta riaanladz naa grë mine nodeed naa, ine riaad tib guielbley zdoon naa; haxta riats naa ne runbey naa to.

⁵ Wlal ne blanso no Macedon nu, ni tib lë notiblid guic no; lala noxtseeb no lo grë zha ne quianañ no, lala nonieque to guic no dien yo to. ⁶ Per rsaand Dios zha ne no lo zhgab, me pchoobladz zdoon no; sac zeene blanso Tit lo no nu, ⁷ blansonie me diidz zaacse pcaania to me. Per nli rley no bdzion

ndzinlile mban to, në me bio to guielnë grë len dze ne bded ga, ni në me nonie no guic to, quiambëz to tebaa zha ganñob to lo no stib.

⁸ Zeene pxel naa guits co lo to glo, mban goc zdoon naa sac bien naa ib zgo guielnëw to, sangue niina racmbandraa zdoon naa; sac rien naa niicle ne bio to guielnë tib bla dze, per na laa ncuuaan co bdedle. ⁹ Gacxe waa rley naa niina, per guiabde to togo rley naa bio to guielnë, sinque rley naa gon naa laa to wbiire wbig lo Dios por guielnë ne bio to ga. Ni sca nagon racladz Dios gon grë zha ne ngab xnëz me zeene runctal zho xtol zho, gane rienpaa naa led psacsid no to ga. ¹⁰ Zeene Dios rdeed diidz sca rio miech guielnë, lo guielnë co laa zho rbig lo me rsanme me zho lo xtol zho; rsaan zho tel pe nac ncuuaane ndzinlid ne noyun zho. Zha ne sca rac-wen lo Dios, nodne gacmban zho guiab zho pe nacne bded zho guielnë co. Laa grëraa guielnë ne ran miech, zig nac zha ne nod xnëz Dios, loxaque rlozh runmbana zho, laa zho bii zie nëz ne nitlo zho. ¹¹ Golgan ganle, pa lotaa bzhixcuaa to niina ne bio to guielnë co. Haxta baa to biini, bioxco to blee to zha co lo dol ne quiayun zho ga; bien to ganle nonguiela rlisqui naaw. Gacxe waa, zeene gon to pa lotaa nac dol co, güeyniew guic to ni whinladz to; gondzedraa to zho. Niicle ne gocladz to tebaa i zo naa nedz naa rson dien zha niun to; per tibaque beenquizh to zho mine been zho ga. Wen ne sca been to, ga blu to ganle rdziguierende to dol ne been zho.

¹² Ne nligaa tibaque noxco no zaacse gac to. Zeene pxeel no guits co lo to, guiabd ne togo zhizhgabpaa zha ne been dol co no no, zhizhgabpagaa pxoze zho; sinque laa no pxeela sac tibaque noxco no zaacse gac to. ¹³ Gacxe waa, zeene bdzion no bin to diidz been to mine rnee no lo guits co, per nli rley no.

Ni zeene bdzion no grëse to zaacse blëzlo to Tit, mazdraa bley no; niicle megaa rley me ne squi niowse gon to me; haxta nguiel rac me niina. ¹⁴ Bzodiidzle naa lo me, ne squitaa wen miech nac to, gane rley naa psande to naa guielto. Tel naa niapse diidzli rne naa, zig nac niina, zig repse naa lo Tit scase gon me rac to. ¹⁵ Rleyynie me to, rzac zdoon me zeene rsoladz me grëse to ndooladz goc to pcaania to me, ni bin to diidz been to mine nabeey me to. ¹⁶ ¡Ne nligaa, rley naa niina bin naa squi zaacse rac to! ¡Nasi, nanpaa naa racnie to naa zigne racnie naa to!

8

Dib zdoon to goldeed gon

¹ Bets, bzian, laa no gzodiidz lo to ganle pa lotaa quiayacniën Dios grë zha ne ngab

lo Jesús nêz Macedon nu. ² Nli nroob grê guielnê ne quaiyan zho, per nguieel rac zho. Len dze ne bded nu beenlo zho tib gon, niicle ne zhis ncuaañe rap zho, per nroob gon ne beenlo zho. ³ Laa naa rnew lo to, sac naazhal goña. Ne nligaa, dib zdoo zho bleeladz zho grê ncuaañe bloogon zho; ncuaañe rgaataa lo zho laa zho bdeeda. ⁴ Dzigo bnab zho lo no gdeed no diidz ye xgon zho guey lo grê zha ne nacgrê ne, zha ne guienp pe yquuin. ⁵ Ni lêdsew ga, bzee zdoo no zeene bdzion no blozhse psañ zho zho ladzina Dios, laa zho wbig lo no nê zho, mine csiaabtaa Dios guic no gnabey no zho, zuñ zhow. Ni lalnu gon güeynied guic no gun zho grêtaa min rii.

⁶ Niina ne bdzion no znutaa biabgan zho nêz rii noyunlo zho gon rii, nacne rdzieets no lo Tit siguiel me guiaad me nêz lo to i stib; zeena lozh gunlo to gon ne bnabeyle me to i quaiyunlo to. ⁷ Rdziunbey no to: dib zdoo to rnalto to Dios, zha niini nac to, rien to zha gnee to Xtiidz Dios lo miech, nguieel rac to run to xtsiin me, ni pseed to rleynie to samiech to. Nana sca, zig nac gon rii, scaque dib zdoo to goltsoxco golgunlow.

⁸ Laa naa bzet lo to nu zha been zha Macedon, per guiabde to bod nonabey naa to scapaa gun to. Sinqe laa naa bzeta lo to, zeena gacnan to ganle ye zha co pquiabladz bdeed gon co. Nu nagon rdeeda diidz glu to ne nli rleynie to grêraa zha ne nacgrê ne, led loxaque diidzsew. ⁹ Golwi ganle, zig nac Jesús pa lotaa noxco me ne. Niicle ne me nacchen grêtaa ncuaañe no, per bdeed me diidz goc me zig tib zha ne peet rapd; ga bgaa ne grêtaa guielnzaac ne rap me. Laa me been min co sacne rleynie me ne.

¹⁰ Wena, tebaa tsoxco to lozh gunlo to gon qui. Golsoladz ganle, topaa psilo bleebey gaclo wdibiz ga, ine nguieel rac to psilo to. ¹¹ Nana sca, zigne psilo to hor co, scaque-gaa niina nguieel golgac golisiaal lo dziin co. Golquiabladz tel palaltaa ncuaañe rgaa lo to tib tib to, dib zdoo to goldeeda; ¹² sac zeene dib zdoo miech rquiabladz zho cogon zho, tel palaltaa mine ygaa lo zho, scaania Diosa. Nanle me palal ncuaañe rgaa lo tib tib miech, gnabd me ncuaañe ni quianied zho.

¹³ Sac nacda ne ygad to grêse ncuaañe rap to lo stib zho, lozh ga guiaaḡmban to; laa zha yquianie grêsew. ¹⁴ Led scada. Laa min rii rac, zeena grêse ne lalga ncuaañe yquianie ne. Niina ne rgaaw lo to, goldeed palala yquian grê zha ne rapd nrooba; zdzingaa dze na pe gunfalt lo to, dzigo laa zho gneedz tel pe nacgaa ncuaañe quianiede to. Sca none dziunḡlsa ne xyudar zha ne nacgrê ne, zeena zig rne naa ga: lalga ncuaañe yquianie ne. ¹⁵ Golsoladz ganle, znu rnee lo Xtiidz Dios: "Zha ne ptop nrooba, beenda

sobr lo zho; niicle beenfaltegaaw lo zha ne ptop zhisa."

Laa Tit guiaad i stib

¹⁶ Xquizh Dios psiaab me guic Tit, zigne rzacaque naa to scaque rzac me to; tibaque nonie to guic no. ¹⁷ Zeene bnab naa lo me siguiel me guiaad me lo to i, bzhiguielga me; ni nolegaa guic me guiaad me, sac ne nligaa racladz me guiaadso me lo to stib. ¹⁸ Nêz rii, no tib bets ne, nroob yudar quaiyan me nogaaz Xtiidz Dios lo miech; zaatne rcaal-sataa zha ne no xnêz Dios nu, grêse zho runbey me, tib men nziuu nac me lo zho. Me gacgrop Tit, niina ne laa no cxeel Tit lo to i; ¹⁹ ni meque bzooblo zho, sēnal zhits no zeene guiosañ no gon rii. Nozhal guiosañ, sac ne nligaa dib zdoo no noxco no zha gac xyudar grê zha ne guienp pe yquuin. Nu rlu ganle pa lotaa men nroob nac Dios, sac me quaiyacnien ne ne laa dziin rii noyac. ²⁰ Gza no bets co guio, zeena gzadold zdoo miech guiab zho nend zha lega zhieen no palal gon rii, sac gon nligaa nroob naca. ²¹ Dios zobwi ganle mbe lo no, ni racladz no ye miech gan zho ganle ne nli zha legal nac no. Min co nagon, nacne sca guio no gza no.

²² Rdziunbey no stib bets ne nu, rdzian no nli dib zdoo me rleynie me Dios. Niina ne laa grop zha co guiaad i, ye me guiaadnal zhits zho. Rley me ne laa me guiaadgan to i, sac ziyon me ye to noxco gacnie to zha ne nacgrê ne.

²³ Tel nand new cho gnabdiidz lo to dien cho nac Tit, golguiab lo zho tipse nac no grop no me, xyudar naa noyun me quiaseed no to. Ni tel gnabdiidz zho cho nac schop zha ne ziaadnal zhits me i, dzigo golguiab grê zha ne ne no nêz rii pxeel zho, dib zdoo zho noxco zho mban zho zigne rdziladz Dios. ²⁴ Golguien sca, zha zho zigne ziaad zho lo to i, niowse golcuēzlo zho. Gollu ganle ne nli dib zdoo to rleynie to zho, zigne rleynieque to naa; zeena gacnan grêraa zha ne nacgrê ne nli mine rnee no zeene rzodiidz no lo zho zha nac to.

9

¹ Nanle naa, rquiindpaa gni naa lo to zha gdeed to gon ne gaclo nu gac xyudar grêraa zha ne nacgrê ne, sac laa to noyunlolew. ² Runbey naa to, nanle naa ible rquiabladz to gun to xyudar zho, gacxe waa rley naa rzodiidz naa lo zha ne no nêz Macedon nu, rne naa lo zho: wdibizlaa psilo to nêz Acay i quaiyunlo to gon co. Mincoxe waa, zeene bin zhow, nzian zho pquiabladz laa zho bdeeda. ³ Per laa no rxeeel gza bets rii ziaad i, ziaadguncsoladz zho to lozh gunlo niob tow; zeena glu ganle led lega rneed no zha nac to. ⁴ Sac gon guielto ga griequia naa lo zha rii, tel guialnie naa bla zho i, ni gan zho peet gard gaclo. Nli ziaañ naa guielto,

per mazdraa gon nac guielto ne guiaan to.
⁵ Min co nagon, ni naa mazd cxel naa zha rii, ziaadnerga zho zeena gon zho xyudar to lozh ycaalsa gon ne pquiabladz to gunlo to ga.

Laa naa rnab lo to, tel pe nac ncuuaane cogon to, dib zdoo to goldeeda. Golguien zha cogon to. ⁶ Golwi ganle zha nac guielgon: Zha ne zhis ran, zhis guielnzaac ne rcaa zho; sangue zha ne nroob ran, scagaa nroob guielnzaac ne rlis zho. ⁷ Tib tib to sca, golcobey palal ncuuaane gdeed to. Mine gdeedtaa to, dib zdoo to goldeeda; ib gunde to ne guiab to por rac-wnabsew laa to gdeeda. Sac gon, zha ne dib zdoo rdeed ncuuaane rgogon zho, rleynie Dios zho. ⁸ Ni me ne nac me men ne rrieelo nreedz grese ncuuaane rquini, me nac men ne gneedz grëtaa ncuuaane yquini to; ni haxta ziaan mine gdeed to gac xyudar grëraa zha ne nacgrë ne. ⁹ Zigne raquetaque lo Xtiidz me, zaatne rnee:

Zha ne nguzobdiidz lo Dios,

dib zdoo zho rgad zho ncuuaane rap zho lo grë zha ne guienpe yequini;

ni scagaa sëëb diidz ne miech wen nac zho. ¹⁰ Dios gunlay ncuuaane quianie to, ygaaw gdeed to, ni scagaa me gacniën to nroobraa guielnzaac ne yгаа to. Golwi ganle, zha runlay me zha ne ran: Me psan grëse lo bni ne ran zho, ni meque rchooba; rlozh ga, nroob guielnzaac ne rlis zho, rgaaw row zho.

¹¹ Ne nligaa, Dios nac men ne gunnroob ncuuaane quianie to, zeena scagaa nrooba cogon to. Golguien ganle, zeene laa no guiosaana lo grë zha ne yquina ga, blactaa gley zho gdeed zho xquizh lo Dios. ¹² Led lega nacdse gon ne gdeed to i. Sac gon, led loxaque xyudardse zho guna, sinque zeene laa zho ycaaniaw, haxta squiabladz zho dib zdoo zho gdeed zho xquizh lo Dios. ¹³ Zley zho gan zho grëtaa ncuuaane cxeel to yquini zho; ni zleynie zho Dios gan zho ron to mine rnabey Xtiidz Jesús. ¹⁴ Haxta dib zdoo zho gnab zho gacniën Dios to, por grëtaa guielnzaac ne gdeed me ga yгаа zho.

¹⁵ Xquizh xquielnzaac Dios, sac gon tel me nroobraa nac guielnzaac ne bneedz me lo ne! jGotsaa gwi ne ganle, haxta Xpëed me bleeladz me!

10

Rieguial gnabey Pabl lo zha Corint

¹ Ziyon naa rnee zho i, zeene zose naa zit nguieex rzë xtidz naa rxel naa; laa zeene zo naa lo to, rdziel naa pe gne naa. Sangue tel naa, tibaque nac naa, ndooladz rac naa lo to, niicle zeen tel pe diidz ne rsogaa naa, ndooladz rne naaw; zig gun Jesús, tel niaca mine mezhah gnee lo to. ² jTebaa gdzind dze pe yquiaaqui glu naa xquieldox naa lo to! Zha ne squi rzac lalaque nac no grë

no grëraa miech, rnee zho mine run miech, mincoque rdziun no, jtebaa siguiel zho zacse gac zho, sac racladzd naa tilnie naa zho!

³ Nli miechse nac no, per ib zionald no gacndaan no zigne racndaan grëraa miech guindzliu. ⁴ Sac tel no, choot ralod grë guuib las ne rnalo zho, sinque laa no rnalo poder ro ne rap Dios; mincosi zrieelo gnitlo grëtaa guielntseeb ne racladz mendox gac. ⁵ Con poder rii, zrieelo csioog no ro zha ne squitaa lega rnee, zha ne racndaan nëd zho gacnaa miech cho nac Dios. Grë zha ne racntseeb lo Dios, con poder rii zrieelo co no guic zho gbiire gbig zho lo me, gacxe tib miech nguzobdiidz lo Jesús. ⁶ Ni poder co yquini no gnee no lo to lozh guien to ghan to zigne racladz Jesús; lozh ga, grëraa zha ne racntseeb, lëëqew yquini no par gacnaa zho ganle zha rieguial gac zho.

⁷ Zha ne rnee i loxaque rzedz yan naa, laglaase ga ran zho, nand zho zhapaa nac naa. Naasi xnëz Jesús no naa; gacxe waa, zha ne rnee xnëz me no zho, none guien zho ganle cho nac naa. ⁸ Nana no to guiab guielniatsle nu, sac rlu naa ne naa rnabey lo to. Per nacdä guielniats, ible Dios bzo naa gnabey naa lo to, ni laa me bzo naa par glu naa zha tsienal to grë mine rnabey me, bzod me naa par yquidiee naa to tsienal to nëz ne nitlo to. ⁹ Golgacnaa sca ganle Dios bzo naa, guiabde to togo lega rnese naa par ctseb naa to. ¹⁰ Sac nanle naa no zha ne rnee i: "Gonde to mine rnee men qui. Loxaque lo guits ne rxeel me squitaa ndox rzë xtidz me, per loxaque diidza. jZeene zo me lo ne, tib zha yozhsew, per ni rienä me zha gnee me!" ¹¹ Per led scada gon. Niina ne laa naa guial i, laa naa glu lo zho ganle zigne rzë xtidz naa zo naa zit, sca nac naa.

¹² Ib guiabde to, togo ye naa quiayun zigne run zha qui, lëëque lëë zho runniats zho. Tib guielnxen ga, sac gon lëëque zha runnon zho. ¹³ jTel no, choot rdziunniatsd no ncuuaane ni nacd no! Ni zeene rnee no cho nac no, per mine bzo Dios no nodziun no min co rnee no; ni mecxe waa bzo no quiaseed no to.

¹⁴ jble riogual ne no gnabey lo to, sac gon no gloppa biaad i biadseed no to zha nac Xtiidz Ndzon Jesús; choot noziaabd zaatne rioguald no. ¹⁵ Stiba, rdziladzd no gdaanie no xtsiin stib miech. Laa no bii cseed to lozh tsoguc to zha nac Xtiidz Dios, zeena haxta yele to gun xyudar no ygaazraa Xtiidz me. ¹⁶ Dzigosi nagon laa no guio grëraa guiedz ne ndxie dib nëz qui, guioseed no zho gacnaa zho zha laa zho lo dol; per zig rneque naa ga, guiosaabd no zaatne psilole stib zho, zeena gan miech ganle rdaannied no xtsiin stib zho.

¹⁷ Znu ziaad lo Xtiidz Dios, zaatne rnee: "Zha ne zienie guic xoobnen lë zho por

dziin ne run zho, maad tsoxcw zho xoobnen lë Dios.”¹⁸ Sac paat rquiinda ne lëëque ne gunnon ne, miñe mazdraa rquiin nacne Dioszhal glu zha non nac ne.

11

Nlid Dios pxeel zha qui

¹ Laa naa rnab lo to, jgolxcw yquiaadiag to miñe gne naa nu, niicle tel no miñe rzac to rquiind! ² Golgacnan ganle, zigne rzac Dios to scaque rzaac naa to, ib racladz naa cho guiaadquidie to. Miñe racladz naa Jesússe gleynie to, zig run wnaa nguieg ne no xtiidz ctsieelnia. Sac tel wnaa nguiega, mgi ne no xtiidz zho mgi cose rleynie zho, haxta rdziñ dze ne rtsieelnia zho. ³ Sca none grieequia to lo me; per rdzieeb naa gon nend zha yguib menox yquiiil ma to, gondraa to miñe rnabey Dios, dzigo laa to gac zig rac grëraa miech ndzinlid. Sac gon tel Ev, sca pquiiil ma Ev.

⁴ Laa naa rzet min rii lo to, sac rien naa, zha ne riaadtaa i ween rdeed to diidz rquiaadiag to zhiwseed zho. No zho rzeet Jesús, rzeetгаа zho espíritu, per rzeete zho me zigne biadseed no to; rneegaa zho zha laa miech lo dol, per nacda zigne pseedle to glo. ⁵ Haxta rnee zho, rienraa zho lo grëraa zha ne noteed Xtiidz Dios; sangue naa, nannpaa naa led scada, zrieelo glu naa lo zho ganle peet rienñ zho. ⁶ Nend nli gacd naa gne naa zigne rneetaa zho, per zeene rne naa rienppaa naa ne diidzli none naa; ni zianlegaa tow ganle.

⁷ Rzaac naa lëda ga ben naa, zeene bial naa bialseed naa to Xtiidz Dios; sac rsoladz to ganle ib peet bnabd naa lo to, scase bialseed naa to. Niicle mban bdeed naa, per bioxco naa wbig to lo Dios bgaa to guielnzaac nroob ne rap to niina. ⁸ To rieguial needz ncuuaane nquiin naa, na lel grë zha ne nole xnëz Jesús len dze co, zha co pxeel ncuuaane pquiin naa, rrieequia bla naa xtimi zho ga. ⁹ Niicle bdzin dze ne peet guindraa lo naa, per ni tib lo to ib psodziind naa; lëëtaque len dze co biaad bla zha bets ne zha ne ziaad nëz Macedon, zha co biaadnie ncuuaane pquiin naa. Ib peet bnabd naa lo to hor co, ni gdzindгаа dze ne pe gnab naa. ¹⁰ Ni golgacnan ganle, ib tedsod sodiidz naa grë min rii dib nëz Gres i. Ible zun naaw, led yed naa rquidie, sac gon runbey naa zha nac Xtiidz Jesús. ¹¹ Per guiabde to togo riëënie naa to, racladz naa csan naa to guielto; sac Dios zobwi ganle rleynie naa to. ¹² Golgacnan sca led scada, sinque laa naa gun min co, zeena csioog naa ro zha ne rlozhd gacniats i, rnee zho ye zho quiaayun xtsiin Dios zigne quiadziun now. ¹³ Sangue no, ndion no nlid Dios pxeel zho, lega noquidiese zho to i squi no

zho, rquiaalo zho zig nacne nli xtsiin Jesús quiaayun zho.

¹⁴ Ni led ncuuaane gzeed zdoe ne ga. Sac ible sca run menox, no hor rzëeb ma rded ma zig tib xmandad Dios. ¹⁵ Gacxe waa, jzha ne squi run xtsiin ma, mincoque run zho rquiaalo zho rac zho zig cho miech wen, rquidie zho miech! Per zdziñ dze ne laa zho ygaa guielnëdox ne tsieguial zho, zaatne tsietizh zho grëtaa miñe noyun zho i.

Blactaa ncuuaane zadeed naa

¹⁶ Laa naa rnab lo to nu stib, golquiaadiag miñe gne naa, niicle tel rzë xtiidz naa zig rzë xtiidz zha ne rzhinle guic. Nli lega niats gne naa, per golxcw gon tow, sac laa naa gunnon naa zig run grë zha qui. ¹⁷ Led Jesús rnabey znu gne naa, sinque masaque laa naa gun min rii, zig run tib zha ne riotsle guic. ¹⁸ Tel squitaa niats rac zha qui lëëque lëë zho runnon zho, lozhd gool zho lo to dien pe nac ncuuaane noyun zho; golquiaadiaggaa miñe gne naa nu na ganle:

¹⁹ Conque rzac to name nixbiini to, jzha nac dzigo rdeed to diidz rquiaadiag to ncuuaane rnee grë zha yozh qui? ²⁰ jPe ib rienñe to ganle quianabeyzhoole zho to i, quiasacsi zho to, quiaquidie zho to, quiala zho grë ncuuaane rap to, quiasanwin zho to, ya zig zgag zho lo to? ²¹ jHaxta rtoladz naa gon, sac laa ne naa squi nabey to lel zhale squitaa no!

Grë ncuuaane riats zho i nac zho, ye naa zrieelo sca gunniats naa naa (znu nagon rac zha ne rzhin guic). ²² jTelne riats zho rnee zho zha Israel nac zho? Yecxe naa waa zha Israel nac naa. jTelne rnee zho lo dii ne bzooblo Dios ga ziaad zho? Ye naa lo dii co zial naa. jTelne rnee zho Abraham nac xmengol zho? Men cocxe waa nac xmengol naa. ²³ jTelne niats rac zho rnee zho xtsiin Jesús quiaayun zho? Gacnan zho ganle, naasi xtsiinppaa me quiaayun naa. Nroob dziin ne ziyun naa, blactaa ncuuaane zadeed naa, pe zhidaa zigo miech naa ladzguuib, blactaa zi-needz dooguid zho naa, blactaa zaatne zad-edlaa naa lo guielgut. ²⁴ Gaayle vult zisacsi zhiwxtis zha Israel naa, galptsibguieega nia dooguid bneedz zho naa. ²⁵ Tsonle vult zineedzyag zho naa, stib vult bneedzquie zho naa. Tsonle vult zadzieelo naa rdedquie barcw ne no naa len nisdo; tib vult, tib dze tib guieel bzhoobse naa lo nisdo. ²⁶ Pa lotaa grë dan ne ziya naa. Nzian vult ne bdedlaa naa niet naa: zaatne bdedlaa naa lo nis guiubee, zaatne bdedlaa naa lo ngbaan, zaatne bdedlaa naa lo grë menñit, zaatne bdedlaa naa lo grë menladz naa. Ziyoxtseeb naa lo guielgut, zigtaa zaatne nac len guiedza, zaatne nac dana, zaatne naa lo nisdoow, zigtagaa lo grë zha ne laglaase rquiaalo riladz Jesúsaa.

27 Blactaa rdib rdzaag naa run naa dziin, blactaa guieel ni niip raaguiesd naa, blactaa zaatne retgbin naa, zaatne retnis naa, zaatne rcuan naa, zaatne mbanse rcuub naa ni guieñd lar ne piix naa. 28 Ni zhaaque tibaque nonie guic naa dieñ yo to, grëse to ne nac to zha ne nole xnëz Dios, zha no to tib tib guiedz zaatne squi blansole Xtiidz Dios. 29 Zeene ron naa cho tib to racladz guiaan zdoo, mban rac naa zeene rrieelod gane naa lo zho; zeene rongaa naa cho tib to quiaayunctal xtól stib zho, ni rrieelod galisqui naaw lo zho, scaque mban rac zdoo naa.

30 Grë miñe bne naa nu, nacda guieñniats; telne rieguialpaa gunniats naa naa, mazd gzet naa grë miñe rlu ganle peet gacd gun naa naase. 31-33 Zic bzhaac naa tib vuelt zeene bia naa Damasc, len dze co zob tib gobernador nac dziin lo rey Aret. Bnabey gobernador co xmenguiib me pquianap zho gzase puert ne rap biedz nroob ne ndze igo ro guiedz co; nan me naaz zho naa ngo zho naa ladzguuib. Per brieelod naaz zho naa, sac grë zha ne nole xnëz Jesús ga, zeene bin zhow dzigo bloo zho naa tib len chicuid pteed zho naa tib ro ventan ne quia cho biedz nroob co. Sca bdeeda diidz brie naa ga, biabd naa ladznia gobernador co.

Ni Dios gon, men ne nac Pxož Jesús, men ne rieguial dzuunnon ne gzataa dze, me zobwi ganle diidzli rne naa.

12

Racniatsd Pabl

1 Nanle naa nonguiel da lëëque ne gunniats ne, per laa naa sodiidz lo to ganle zha nac grë ncuuañe zinabey Dios zilulo lo naa, ni grëgaa miñe zinee me lo naa.

2-3 Niina rac tsiida iz ga blis Dios naa güeynie me naa gbaa. Nanñ naa dieñ pe dib znu naa bia naa, te zhiespirituse naa ye güeynie me; loxaque mese nan dieñ zha güeynie me naa. Loxaque miñe biñ naa ne laa naa bia lugar ndzon co, 4 ga bin naa grë diidz ndzon ne waltaa gard gon miech, ncuuañe guieñd zho zha naca, ni nodgaa diidzbeñ gne naaw. 5 Zrieelopaa nagon gunniats naa naa ne laa naa bia ga, per ib gund naa miñ co. Laa ne gunniats naa naa zig rnele naa ga, mazd gzet naa grë miñe rlu ganle peet gacd gun naa naase. 6 Ni tel gacladzga naa gunniats naa naa por miñe blozh bzet naa nu, led guieñxend ga gun naa; sac miñe nlipaa goca. Per rund naa miñ co, sac laa naa racladz tozhal guieñ cho nac naa, beñque ran to ganle zha mban naa, rangaa to zha rne naa.

7 Ne nligaa ndzondoo nac grë ncuuañe blu Dios lo naa ga, zac nazho gunniats naa naa sac naa gona; per parne gund naa miñ

co, laa Dios bdeed diidz biaad tib xmandad mendox psanwin naa, biaañ tib yoob xcuerp naa zig nac zeene pe tib guiets nroob ne niaaz naa. 8 Tsonle vuelt zinab naa lo Dios ctiche me yoob rii; 9 biontaa vuelt në me lo naa: "Bui ganle laa naa nacniele luu, ni miñ co nac miñe rquuinraa lo luu. Peet tsienied guic luu sca, zha ne squi nsis rac, ga rdeeda diidz rlu naa ne nli naa nacnie zho." Miñ co nagon rley naa, sac ne znu nsis rac naa, grëse miech zeene ran zho grëtaa ncuuañe rrieelo run naa, rien zho nli Jesús nacnie naa. 10 Ne nligaa rley naa, sac niicle ne miech gzhe rac naa, niicle nroob guieñne ne nodeed naa, niicle rbidzgo miech lo naa, rtsidil zho naa, no hor guieñd pe yquuin naa, per rley naa sac laaw nodeed naa porne no naa xnëz Jesús. Rne naa rley naa, sac zeene sca zootle grieequiadraa naa lo zhgab ne no naa, hor co laa Dios rlu ne me nacnie naa.

11 iNligaa lega guieñxenle nu znu rne naa, rac naa zig tib zha ne rzhiñle guic! Per to gon rap dol, sac laa ne cxobnen to nli miech wen no, lel zhaa miñe noyün to. Nli nacñ naa cho zha non, per tsod ncuuañe rzanwin grë zha qui naa, niicle ne squitaa rcaz zho zha rien nac zho, niicle ne rnee zho Dios pxeel zho. 12 Golsoladz ganle, zeene bialseed naa to i, blu naa lo to ne nli Dios pxeel naa noteed naa Xtiidz me, blactaa grë ncuuañe bneedz Dios diidz blu naa lo to, blactaa grë milagr, blactaa grë ncuuañe bzee zdoo to gon to. Biod dze ne nieednie naa to. 13 Lëëse miñe beñd naa lo to i, nacne nab naa needz to pe nquuin naa; sac grëraa zaatne ziyaseed naa miech, zha rneedz ncuuañe rquuin naa. iGolgun dispensar telne rbinladz guic to miñ co!

Nonie zha Corint guic Pabl

14 Laa naa nozhixcuuale par guialgan naa to stib. Nu gac tson vuelt guial naa lo to i; ni scaquegaa niina gon ib csodziind naa lo to. Sac tel naa, noguibd naa dieñ pe gneedz to lo naa, sinque to guialguib naa. Golguieñ ganle, niicle ne racladzde to, per rrieequia gon meed nac to lo naa; ni ndion ne ganle, led mëete rieguial gdeed ncuuañe yquuin dad, sinque dad none gdeed ncuuañe yquuin meed. 15 Ne nligaa, tib guieñbleya lo naa quiateedlo naa to, laa naa noxco guieñ to zaacse gban to, zeena gdziñ to zaatne gneedz Dios cuëz to. Xco co no naa, ib rquiad zdoo naa lozh grë ncuuañe rap naa, o lozhgaa naa lo xco co; maase niicle squi zootne laa ne rleynieraa naa to, lel nozozit to lo naa.

16 Nanle naa, no bla zha ne rnee i: "Nli peet bnabd me zeene biadseed me ne, per ne squi miech ndzielguic nac me bod no pa stib mod ne rieñd ne quiaaban me ne."

17 Nana, zig nac zha ne zixel naa ziyaadgan to i, ¿pe niacxe biaadban zho to? ¿Pe niacxe biaadquidie zho to? 18 Naa quia bñab naa favor lo Tit biaad me i, ni pxel naa stib zha bets ne biaadgrop me. ¿Pe no pe bñab zho lo to? Golgacnañ ganle nodziuuñ no miñ co, sac zigtaa naaw, zigtagaa mew, dib zdoon no nodziuuñ no dziin rii, choot noquidied miech.

19 Nana gza zdoon to guiab to bod parne guiaanwen no lo to, gane znu rne naa. Dios zobwi ganle led scada. Bets, bzian, grē mine none naa lo to nu, laaw rne naa sacne racladz naa lozh tsoguc to gban to zigne naa Xtiidz Dios. 20 Sac gon, rdziladz naa telne glanso naa lo to i, ni gan naa racde to zigne racladz naa; dzigo niicle togaaw, tsod zdoon to zeene gan to laa naa glisquiw. Adel gon zeene laa naa glanso i, lel dil no to; zha ne nē rac zdoon dien cho stib noded, zha ne nozhixcuuaa diidzguizh, zha ne quianeene, zha ne quiayacniats; nend haxta chop tson diile nac to. 21 Tel gan naa sca rac to, mbe gon stoladznie naa to ni haxta siaabguielñe to naa; sac nanle naa ni lalnu rdziladz Dios grē miñ co. Zig nac grē zha ne squi padzeelale quiayunctal xtol ni rsaand zho grētaa guielyozh, grētaa ncuuañe ndzinlid ne bii quiayun zho, mbe gon sigoon zho naa.

13

Rso Pabl diidz

1 Niina nagon ne gac tson vult guialgan naa to, tel pe nactaa falt ne cho quiayun i, guiaanda scase. Zigne rnee lo Xtiidz Dios: Tel no chop zho, tsonga zha ne nanpaa zha nac falt co, zha ne beena ga ib none laa zho quizh xfalt zho. Nu rac bion vult ne rso naa diidz rii lo to. 2 Laaw nile naa lo to lultm vult ne bialgan naa to, ni niina laaw rneque naa stib: Grēse zha ne quiayunctal xtol i, zigtaa zha ne padzeelale squi no, zigtagaa zha ne wriin psilow, gacnañ zho ganle zeene laa naa glanso i, grēse mine quiayun zho ib tedlaad zho, laa naa gunquizh zhow zigne rieguial zho. 3 Ga gan to ganle nli Jesús rnabey naa, ni Xtiidz me none naa lo to; sac mesi gon, gdziguiend me sca gac to, sinque zigne racladz me sca none gac to. 4 Nli nguudz goc me bdeed me diidz pquiaa zho me lo cruz hor co, sangue niina men rnabey nac me; laa me mban niina niapse por poder ne rap Dios. Ye no, zig nac niina miech nguudz nac no, per ible zgaa no tib guielmban ndzon, sacne me nacnie no; ni zrieelo gnabey no to sacne rdziaap no xpoder me.

5 Nana sca, tozhal golcobei dien zha mban to. Wen wen golcobei dien pe nli dib zdoon to rliladz to Jesús. ¿Pe nli mban to zig none gban zha ne rliladz me? ¿Pe zig zie dze

rienraa to ne me nacnie to, me rnabey lo to? ¿Te loxaque diidzse ye nac ne laa to rliladz me? 6 Sangue no gon, wen wen ndion no zha mban no, ndionpaa no ne lo Jesús ngab no.

7 Tibaque rnab no lo Dios cxobnia me guic to zaacse gban to. Ni guiabde to togo par guianziuu no lo miech gane noxcopaa no zaacse gac to; sinque laa no rdziuuña parne gban to zigne rieguial gban zha ne nli no xnēz Dios. Miñ co nagon noxcno, niicle tel rzac to lēda nu quiaadziuuñ no. 8 Sac tel no, laa no zionañ gac to miech wen, zha ne zienañ mine nac diidzli; choot ziaate par lega gactox no lo to. 9 Gacxe waa, tib guielbley nroob ga lo no, telne zhal to znuse xixcuuaa to, gac to zha ne nlipaa dib zdoon rleynie Dios; laa ne yquiambēz to guiaadlisqui no grē ncuuañe noyun to. Laa no racladz gdzin dze ne gac to zigne rdziladz Dios, ni mincogaa quianab no lo me.

10 Laa naa rso diidz rii lo to lo guits ne rxel naa nu, sacne racladz naa gactox naa lo to zeene laa naa glanso i. Nli Dios bzo naa rnabey naa lo to, ni mine racladzpaa naa nacne lozh tsoguc to zhiwseed me; ib racladz naa yquiaago naa to.

11 Nu ne laa naa csiaal lo guits rii, laa naa rnab lo to bets, laa naa rnab lo to bzian: Nley golgac, goltsocxo gban to zigne racladz Dios, zha ne mban rac, golchooblaz zdoon zho; ine niowse golban, tipse golgac. Scagaa Dios zleynie me to, ni haxta zacnie me to zeena peet ctsebde to.

12-13 Nana sca, tib tib zha ne nacgrē to golquiaabdiuzh zho, ine golxen nia zho. Grēse zha bets ne, zha bzian ne, zha ne rliladz Jesús nēz rii; laa zho rxeel bdiuzh lo to. Golcaania zhibdiuzh zho.

14 ¡Dios sca guiaannie to! Ine nley golgac, golgan ganle pa lotaa rleynie me to. Peet tsienied guic to, Jesús nac men ne noxcno grē zhizhgab to; ni scagaa Espiritu Sant gacnie to tibaque tipse gac to.

Pabl

GUILTS NE PXEEL PABL LO ZHA GALÁS

¡Diuzh to grêse to!

¹ Naa nac Pabl, tib zha ne pxeel Dios nonee Xtiidz Ndzon me lo miech. Led miechd bzoo naa, led miechd pxeel naa, sinque Jesús pxeel naa, me ni Dios Pxoz me, meñ ne bleeban me.

² Laa naa rxeel tib guits rii ziaad lo to zigne no to nëz Galás i, nac to zha ne ngab lo Jesús; rquiaabdiuzh naa to, ni scagaa grê zha rii laa zho rxeel bdiuzh lo to. ³ Dios meñ ne nac Pxoz ne, ni Jesús meñ ndzon ne rnabey, me nac meñ ne tsoxco grê zhizhgab to, zeena peet tsienied guic to. ⁴ Jesús bdeed xquielmban bdiizh me xto! ne, psilaa me no lo grêtaa guieIntseeb ne no lo guidzliu rii, laaw been me zigne gocladzse Dios meñ ne nac Pxoz me. ⁵ ¡Gotsaa dziuunnon ne Dios sca, ni gdziñd dze ne csaan ne dziuunnon ne me! Sca rieguiala.

⁶ Rzee zdoo naa gon ne gardle gac nroob dze ga, laa to bzozitlo lo Xtiidz Ndzon Dios, meñ ne bredz to pcaania me to, porne nquialadz Jesús to. Wseed ne riladz to niina, masaque rzac to na mincogaa csilaa to lo dol. ⁷ Per guiendreaa stib wseed ne gon csilaa ne lo dol. Miñe naca zha ne biadseed to i, lega rquidiese zho to, racladz zho ctsëe zho miñe nac Xtiidz Ndzon Jesús.

⁸ Grêse zha ne guiaadnie stiblo wseed miñe pseete no to, ni gnë zho lëe miñ co csilaa to lo dol; zha ne sca gun, miech ndziib-deele ga nac zho. Tel chotaa sca gun, niicle tel naazhala, tib anj! ne quietgaa gbaaw, ible zdzibdee Dios zho. ⁹ Bnele naaw lo to, ni na laaw rneque naa stib: Tel cho zha ne guiadseed to stiblo wseed miñe pseete no to, ni gnë zho lëe miñ co csilaa to lo dol, ible zdzibdee Dios zho.

¹⁰ Nana gon ne znu rne naa, no to guiab parne guianzniu naa lo miech gane znu rne naa; per golgacnañ ganle, quiaguibd naa guianzniu naa lo miech, sinque laa naa noxco gun naa miñe rnabey Dios. ¡Sac telne lel ncuuañe gleynie miech noxco naa, nlid dzigo xtsiin Jesús ga noyuuñ naa!

Jesús pxeel Pabl gnee Pabl Xtiidz me

¹¹ Bets, bzian, golgacnañ sca ganle: Wseed ne nac Xtiidz Ndzon Jesús, miñe bialseed naa to, led guicd miech biaba. ¹² Paat biad naa nseed miech naaw, sinque Jesús zhal bneedza lo naa.

¹³ Led nanle to ganle, zha nactaa grê miñe beñ naa zeene biñ no naa lo zhiwseed zha Israel; ptsidiñ naa grê miech ne no xnëz Jesús, blëenie naa zho, pquianañ naa nloozh

naa zho. ¹⁴ Bzhoob diidz ne naa nac zha ne pseedraa lo grê meñladz naa, zha ne tipse bi-agrëe naa scuel; naa nac zha ne neer lo zho, sac naa run grêse miñe rnabey zhiwseed zha Israel, ni naa rioxcoraa run grêse miñe been grê pxozgol no. Sca nagon goc naa lo zha Israel.

¹⁵ Ible güeynied guic naa, antes ne gal naa laa Dios bzooblole naa gunbey naa Xpëed me; laa me bleextsole naa, niapse porne nquialadz me naa. Zeene bdziñ dze co ¹⁶ laa me blu me lo naa, bzo me naa ga naa zaatne ndxie grê miech ne nacdreaa zha Israel, gaseed naa zho Xtiidz me miñe glu zha laa zho lo dol. Zeene blozh gon naa Xpëed me, biad naa niaguib naa ne goon dien cho nseed naa, ¹⁷ ni niicle biadgaa naa Jerusalén, nianabdiidz naa lo grê zha ne pxeelle me nonee Xtiidz me; sinque laa naa bia nëz Arab, wbirele naa nëz co, dzigoraa bdziñ naa Damasc stib.

¹⁸ Gocle tson iza dzigoraa bia naa Jerusalén, hor coraa beenbey naa Pedr; blëz naa lo me ga tsiin ngbidz. ¹⁹ Gaque beenbey naa Jacob bets Jesús, laa grëraa zha ne pxeel Jesús noyuuñ xtsiin me, ni tib zho gonñ naa. ²⁰ Dios zobwi ganle diidzli nac grê miñe rne naa nu, led lega rned naaw.

²¹ Zeene brie naa ga, laa naa bia nëz Siria ni nëz Cilis. ²² Grê zha Judé zha ne nole xnëz Jesús, gard gunbey zho naa len dze co. ²³ Diidz ronse zho rnee zla zha ne nacgrê zho: “Meñ ne scataa pquianañ ne, yeke me noseed miech Xtiidz Jesús, ni glo scataa gocladz me nitlo mew.” ²⁴ Dzigo rley zho, rdeed zho xquizh lo Dios ne yeke naa riladz Jesús.

2

Rcaania zho Pabl

¹ Zeene blozh tsiida iza, dzigo laa naa biire bia Jerusalén stib, bio no grop no Bernabé, ni bionie no Tit. ² Laa naa bia, sac ib Dios blu lo naa ne no ga naa. Dzigo ga pcaalsa no grê no zha ne zo rnabey lo grê zha ne no xnëz Jesús ga, bzodiidz naa lo zho zha noseed naa grê zha ne nacd zha Israel Diidz Ndzon ne rlu lo zho zha laa zho lo dol, ni naa zeena guien zho ganle ne nli rquiuñ dziin ne beñe naa, ni miñe quiauyngaa naa. ³ Ni nligaa bley zho bin zhow.

Niicle ne led zha Israel nac Tit, per bnabeyd zho niopaa Tit bey ne rio grê zha Israel. ⁴ Per lo zha ne zioobgza no ga, lad co brieequia bla zha ne bnab nio Tit bey co, per choot pquiaadiagd xtiidz zho. Nac diidz ye zho riladz Jesús, per nliida; ib blud zho cho nac zho, ngueets bzëeb zho lad no biadleets zho dien zha mban no, niina ne Jesúsle rnabey no, rnabeydraa ley no. Gocladz zho nquiaadiag no xtiidz zho, biire ndziuuñ no

mine rnabey ley. ⁵ Per ni palal bdeete no diidz niac mine rnee zho, laa no racladz guiaan^{ne} to Xtiidz Ndzon Jesús mine rlu zha laa miech lo dol, sac min co nac diidzli.

⁶ Grè zha non ne zo rnabey lo grè zha ne no xnèz Jesús ga (zha non guiab ne, per ndion ne ganle grèse ne tibaque nac ne nèz lo Dios) ⁷⁻⁸ ib peet blisquid zho lo naa, niicle peet pseetragaa zho naa. Sinque laa zho gocnan ganle ne ib Dios bzoo naa gun naa xtsiin me, gaseed naa grè zha ne nacd zha Israel guien zho zha laa zho lo dol; zigne bzoque me Pedr noseed Pedr zha Israel. Dios men ne bzo Pedr quiaseed Pedr zha Israel, lèèque me bzo naa quiaseed naa grè zha ne nacd zha Israel.

⁹ Gacxe waa, zig nac Pedr, Jacob, Juan, zha ne zo rnabey lo grè zha ne rliladz Jesús ga, laa zho bien ne ible naa bgaa guiel^znaac rii, bneedz Dios dziin rii lo naa. Dzigo rley zho haxta bzhen zho nia no grop no Bernabé, laa no biaan diidz ne zha tseseed zha Israel, laa no guioseed grè zha ne nacd zha Israel. ¹⁰ Lèèse mine pso zho diidz lo no, dzioxco no dziuun no xyudar grè zha ne guien^d pe yquin; ni nligaa ib nonguiel^l min co ni laaw noyoxco naa.

Ractox Pabl lo Pedr

¹¹ Laa zeene biaad Pedr Antioquí, dzigo ga nli laa naa goctox lo Pedr, sac ncuane ndzinlidraa quiaayun Pedr. ¹² Glo, grèse zha ne nacd zha Israel zha ne rliladzle Jesús, rzènie Pedr zho, tipse rbenie Pedr zho zeene laa zho row; ni blozh ga, zeene laa bla zha ne pxeel Jacob bdzin ga, pasèraa Pedr sca tipse niownie zho, laa Pedr bzozit lo zho. Rdzieb Pedr zha ne bdzin ga, sac lèè zha co racladz, grèse zha zit ne rzèèb xnèz Jesús ib none tso zho bey ne rio zha Israel. ¹³ Grè zha Israel ne nole xnèz Jesús ga, yeque zho laa zho gocnie Pedr lo xtseb Pedr ga, haxta ye Bernabé wbig lo zho. ¹⁴ Nacne zeene gon naa sca zienal^draa zho zigne nacpaa wseed ne ziaadnie Xtiidz Dios, squi ndxie grèse zha ne rcaalsa ga goctox naa lo Pedr, rep naa: "Luugase name niicle ne zha Israel luu, ni mband luu zigne nac zhiwseed zha Israel, ^zpe nac dzigo ne racladz luu gnabey luu grè zha ne nacd zha Israel, gban zho zigne nac zhiwseed zha Israel?"

Zha rlaa miech lo dol

¹⁵ Gol^lquiaadiaga ganle, tel^l no desde gol no zha Israel nac no, nacd no zigne nac grèraa miech ngoopdol^l ne nac stib nacion; ible pseed no grè mine nac xley zha Israel. ¹⁶ Sangue niina laa no ndion ganle, niicle mazdraa gun miech mine nac ley grieelod guiaan^{wen} zho lo Dios, sinque zha ne dib zdoo gliladz Jesús, zha co nac zha ne guiaan^{wen} lo me. Gacxe waa, ye no laa no bliladz Jesús dib zdoo no, zeena guiaan^{wen}

no lo Dios; ni laa no guiaan^{wen} lo me porne dib zdoo no rliladz no Jesús, nacda porne dziuun no mine nac ley. Sac gon niicle zha ne tsoxcoraa gun zho grè mine nac ley, grieelod guiaan^{wen} zho lo Dios.

¹⁷ Nana ne laa no wbig lo Jesús parne guiaan^{wen} no lo Dios, no zha ne rzac dol ga. Masaque rzac zho xtol^l no ga rdziuun^{ctal} no porne rliladz no Jesús, per, jed scada gon! ¹⁸ Mazd dol ga gun naa, tel^{ne} rlozhle rseed naa miech rne naa lo zho ne led leyd nac mine csilaa ne lo dol, ni lozh ga naaque no lozh^d tsoxco gun grè mine nac ley. ¹⁹ Sac tel^l naa, ib brieelod niun naa grè mine rnabey ley, ni zha ne rguuits ley gon ib none guet zho; gane niina masaque rrieequia laa naa gutle. Niina ne laa Jesús gut por grè xtol^l naa, rrieequia ye naa gutnie me ga, zeena grielo gun naa mine rnabey Dios. ²⁰ Led naadraa nu znu mban, Jesúsle nu mbannie naa, ni guiel^lmban ne mban naa niina, lèè min rii bneedz Dios lo naa porne rliladz naa Xpèèd me, men ne rquia zdoo naa, men ne bleeladz xquiel^lmban ga beet zho me bdiizh me xtol^l naa. ²¹ Nana, tel^{ne} niaca mine nli zrieelo guiaan^{wen} ne lo Dios porne gun ne mine nac ley, zhlèse ga dzigo biaadguet Jesús. Gol^lgacnan sca ganle, Jesússe nac men ne csan^{wen} ne lo Dios, gacxe waa nonguiel^dda ga csan ne me tiblad, ni pa lotaa ga pquia zdoo Dios ne.

3

Jesús none gliladz miech

¹ ¡Nadzpaan xen to nac to zha Galás! ¿Pe goc to, cho biaadgun^guet guic to squi rac to? Pe led zeene biadseed no to, wen wen gocnan to cho nac Jesús, ni zha nacne sca beet miech me lo cruz. ² Zhal to gol^lcobey dien, ^zpe ne been to grè mine nac xley zha Israel, laa to bgaa guiel^lbiini chen Espiritu Sant, te ne bliladz to Xtiidz Diosa ye? ³ Pa lotaa gon rdzin lo xquiel^lnxen to i, conque laa to gonle ganle ne niapse por guiel^lbiini chen Espiritu Sant laa to psilo mban tib guiel^lmban cub, ni na nana^{que} to tsienal^l to ley. ⁴ Pe nlipaa rnee to, ^zpe lega scase nazho gon to grè guiel^lne ne pteed miech to, zeene psilo bliladz to Xtiidz Jesús? ⁵ ¡Gol^lzhixcuaa guic to! Gol^lguien ganle, laa Dios bneedz zhiEspiritu me lo to, ni laa me noy^{un} grè milagr lo to, per nacda porne run to mine rnabey ley, sinque porne dib zdoo to rliladz to Xtiidz mew, mine biadseed no to.

⁶ Zig Abraham, porne dib zdoo me bliladz me xtiidz Dios mine rèb Dios lo me, gane pcaania Dios me zig tib zha ne peet xtol^d. ⁷ Gol^lgacnan sca ganle, grèse miech ne dib zdoo gliladz Xtiidz Dios, grèse zha co laa Dios ycaania zho zig xpèèdpaa Abraham. ⁸ Ni mine nodzian ne niina, ib lo Xtiidzle

Dios zhubneew, zeene bnee me ne grëse miech ne nacd zha Israel, silaa me zho telne dib zdoo zho gliladz zho me. Lëë min co ga bnee me zeene znu rëb me lo Abraham: "Grëse miech ne ndxie dibdoo lo guidzliu, zha ne dib zdoo gliladz naa zigne rliladz luu naa, zunlay naa zho." ⁹ Gane grëse zha ne dib zdoo rliladz Jesús, runlay me zho zigne beenlayaque me Abraham, zeene laa Abraham bliladz me dib zdoo Abraham.

¹⁰ Sangue zha ne rnalo ley ne lëew csilaa zho, laa zho noyac ndziibdeele ga, sac lo Xtiidz Dios no tib zaatne rnee: "Ndziibdee grë zha ne grielod gun grëse zigne nac ley." ¹¹ Ni tsod zha ne gon grielo gun grëse mine rnabey ley! ¹² Gase naganle rlu tsod tib zha ne grielo guiaanwen lo Dios por gun zho mine nac ley; ni laaw zhubneew lo Xtiidz Dios zaatne rnee: "Zha ne guiaanwen lo Dios, laa zho guiaanwen porne dib zdoo zho gliladz zho me; ni zha co yгаа tib guielmban ndzon." ¹³ Led yed ley rnab dien cho dib zdoo gliladz; sinque rneew: "Zha ne racladz gban, none gun zho grëse mine rnabey ley."

¹³ Min co nagon, grëse ne nac ne miech laa ne biabdee, sac brielod mban ne zigne nac ley. Per niina, laa Jesús bиаadsilaa ne lo grëtaa dee co, masaque lëë grë dee ne nac ne ga bi me zeene sca pquia me lo cruz; zigne zhubneew lo Xtiidz Dios, zaatne rnee: "Miech ndziibdee ga nac grëse zha ne ret rquianga zho tib lo yag." ¹⁴ Ni por mine sca bded Jesús ga, min co niina grëse miech ne nacd zha Israel, zac yгаа zho grëse guielnzaac ne bzeet Dios lo Abraham ga; ni niicle tib tibгаа zha ne ngab lo mew, scaania zho Espíritu Sant, Espíritu ne rëb me cxeel me lo grë zha ne dib zdoo gliladz me.

Zha ne nlipaa nac xpëed Abraham

¹⁵ Bets, bzian, laa naa gzet ncuaaane rac lo guidzliu ri. Nanle to ganle, zeene laa chop miech run tib trat, rquia mine rnee zho ga lo guits ni rquia lë zho lo guits co grop zho; zeene laa lë zho pquiase ga, ni tib zho gacdraa ctsëë trat co. ¹⁶ Nana gotsaa gwi ne ganle zha been Dios: Psañ me xtiidz me lo Abraham, ni tib lo men ne grieequia lo xtiia Abraham. Raquiete nzian zho, rëbd me: "grë zha xtiia Abraham", sinque tibaque men ne bzeet me, ni lëë men co ga nac Jesús.

¹⁷ Znu nagon nac mine quiane naa lo to nu: Tib trat ga been Dios grop me Abraham, zeene rëb me scaania me grëse zha ne dib zdoo gliladz me; ni ible laa xtiidz co me biaan zig tib trat ne quia lë me lo. Min co nagon, grielod ctsëë ley trat co; zig nac ley, blozhle tap gayoo galptsii iz biaan xtiidz co me zeene laa ley bиаad. ¹⁸ Nana, telne por gun ne mine rnabey ley, laa ne yгаа grë guielnzaac ne bzeet Dios lo zhitrat me gdeed me por tib men ne grieequia lo xtiia

Abraham; ¿pazhe dzigo rquiin trat co? Sac lo trat co gon raquiet ne por tib men ne grieequia lo xtiia Abraham, laa me gneedz guielnzaac co lo ne.

¹⁹ Nana gnë to: "¿Pa dzigo rquiin ley ne laa ley biaan, ni tel nole trat co glo?" Laaw biaan gon zeena glu ganle zha nac miech, ib rond zho mine rnabey Dios zho, laaw been dziin laga bdzin dze ne laa men ne brieequia lo xtiia Abraham ga bиаad, men ne bzeet Dios ga zeene psañ me xtiidz me lo Abraham. Ni tel ley, dze ne pcaania zha Israela tib xanjl Dios pxeel me bdeeda lo Moisés, dzigo Moisés psaña lo menguedz Israel. ²⁰ Sangue dze ne been Dios trat co grop me Abraham ne laa me csilaa miech lo dol, pxeeld me cho tib miech, cho tib anjlgaa nиаadne xtiidz me; sinque mezhall biadneew lo Abraham.

¿Pa rquiin ley?

²¹⁻²² Nana gnë to: "¿Zig gocladz dzigo lëë nsiooglo xley Moisés lo trat ne been Dios ga?" ¹ Led scada! Sac grielod yгаа ne guielmban ndzon ne gdzind dze lozh ga, telne gnalo ne ley; ib grielod ley csanwena ne nëz lo Dios. Telne niaca mine nrielo ley nsi-laaw miech lo dol, nod pe nacne dzigo nxeel Dios Xpëed me, bиаad me biadbee me miech lадznia dol (sac rnee lo Xtiidz Dios masaque ngadoo miech lo dol). Jesússe gon zrieelo csilaa miech lo dol, totsaque dib zdoo zho gnalo zho me, mese zrieelo gdeed guielmban ndzon co lo zho.

²³ Zeene gard guiaad Jesús ga, laa ley co pquiin pquiinapa ne zigne rquiianap wx-tis zha ne niioogyu, laga bdzin dze ne laa me bиаad. ²⁴ Zig tib ngudziaan ne riaanne mëédwin, sca pquiin ley co lo ne, pseeda ne zha gban ne, ni gacaañ ne cho nac Jesús, men ne csilaa ne lo dol zeene dib zdoo ne gliladz ne me. ²⁵ Sangue niina ne laa Jesús bиаadle, led ley codraa gnabey ne, ni niicle rquiindragaa pe cseeda ne. ²⁶ Gacxe waa, tel to xpëedle Dios nac to porne dib zdoo to rliladz to Jesús, ²⁷ ni grëse zha ne brobnisle porne no zho xnëz Jesús, laa zho rlu ganle ne Jesúsle nacnie zho, ni laa zho zienal gban zho zig racladz me. ²⁸ Mincoxe nagon waa, grëse ne tibaque nac ne niina, guienndraa ne goon cho nac zha Israel, cho nacгаа zha zit; dien cho nac ngundziin, cho nacгаа zha ne rnabey; goon dien cho nonraa pe nguiw te wnaaw ye; sac grëse zha ne nacniele Jesús, tibaque nac zho grë zho. ²⁹ Ga nagon, telne ngable to lo Jesús, dzigosi nli zha xtiia Abraham nac to, ni zгаа to grë guielnzaac ne bzeet Dios zeene psañ me xtiidz me lo Abraham.

4

Zha ne nac xpëed Dios

¹ Golgona ganle, nligaa tib mēēdwin lēē, niicle guiaañnie win ncuuañe rap pxoz win, per lega nacse win zig tib ngundziin win ne run xtsiin pxoz win. Niicle chen win grē ncuuañ co, per grielod win gnabey wina.

² Laa win riaan lадznia zha ne ran win, zha ne rseed win dien pe nac ncuuañe gun win, laga gdzin dze ne laa win zacle ycaania ncuuañe psan pxoz win.

³ Scadaa nagon bzhiac ne glo zeene gard guiaad Jesús, rrieequia masaque ngadoo ne lo grē ley co, ni lo grēraa ncuuañe rac lo guidzliu rii. ⁴ Laa zeene bdzin dze ne laa Dios pxeel Xpēēd me Jesús lo guidzliu (tib wnaa bded por xniaa me, bzoob me diidz been me grēse zigne rnabey xley zha Israel), ⁵ laa me biaadsilaa ne, biadbee me ne lадznia ley co, bdiizh me grē xtoḷ ne, zeena ycaania Dios ne gac ne mēēd lo Dios. ⁶ Ni parne glu ganle ne nli xpēēde Dios nac ne, pxeel Dios zhiEspíritu Xpēēd me blēz zdoo ne; gacxe waa niina laa ne rien rnee ne lo me: “¡Papá yeen!” Espiritu co rnee ne Pxoze ne nac me.

⁷ Ga nagon, led yedraa niina nac ne zig cholze cho ngundziin, sinque xpēēde Dios nac ne, ible ye ne yгаа grē guielñzaac ne rap Dios.

Rnee Pabl rnabeydraa ley

⁸ Bets, bzian, golsoladz ganle, zeene bii gard gunbey to men ne nacpaa Dios, masaque rrieequia ngadoo to lo ncuuañe nac zhimdio to hor co, rdib rdzag to run to grē miñe rzac to rdziladz grē mdio co. ⁹ Nana, laa to runbeyle Dios, mazd gni naa ganle ledaa Dios runbeyle to, žepe nac dzigo racladz to gbiire tsiegan to, tsiequitsgzhib to lo grē mdio co, gbiire guiab to lадznia grē ncuuañe paat rquiind co, gnabeya to? ¹⁰ Rquia to gon run to grē lni, dien pa mēē ndzonraa, dien pa dze nac dze ndaraa, pa iz nac iz ne ndaraa, dien pa dze zac pe gow to, pa dzeegaa gacda. ¹¹ ¡Rdziebnie naa to gon! ¡Pe nlipaa zhlēse bialseed naa to, ne squi laa to racladz csaan miñe bialne naa lo to!

¹² Bets, bzian, laa naa rnab lo to golban zigne mban naa, tel naa niicle ne zha Israel nac naa per zanaḷdraa naa miñe nac xley zha Israel. Ngadoodraa naa lo ley, gane rne naa: Golban zigne mban naa. Ni guiab to togo bod nend no pe falt ne been to lo naa. ¹³ Led rsoladz to ganle, rzacñe naa len dze ne psilo pseed naa to zha laa to lo dol; min co nacne nzianlaa dze blēz naa lo to i. ¹⁴ Niicle ne sca rzacñe naa, gonḷde to naa; laa ne mbix zdoo to nian to xquielguidz naa, znu pquia zdoo to naa, rley to blēzlo to naa pale cho xanjḷ Dios o Jesúsгаа, tel niaca miñe mezhā niaadseed to. ¹⁵ ¡Ne nlipagaa rleydox to len dze col! Tel niaca miñe niac mbee to bziaalo to, zootle zig mbee tow ngad tow lo naa. ¿Yo grē guielbley co na? ¿Yo ne scataa rleynie to

naa len dze co? ¹⁶ Nana, pe rēb to rlēē naa lo to ne znu rne naa miñe nacpaa diidzli. ¡Lēda gon!

¹⁷ Golquiaadiaga ganle, grē zha ne gon squi ziadseed to i niina, nli laa zho noxco to per zhaa ncuuañe no guic zho. Laa zho racladz tebaa zha guiañladz to naa, csaan to grē miñe bialseed naa to, zeena gbigo to lo zho. ¹⁸ Rtsidild naa pe nacne cho gacnie to, totsaque zha ne nli nquialadz tow. Zig nac naa tibaque noxco naa to, led loxaque zeene zodse naa lo to i. ¹⁹ ¡Xin, ne nlipagaa gon rdedñe naa ran naa squi rac to! Masaque nac guielñe rii lo naa niina, zig tib yoob ne rquia grē men wnaa ne gap mēēd. Ni lēē nole naa guielñe rii nu nagon, haxta gdzin dze ne gan naa laa to wbiire wbig lo Jesús stib. ²⁰ Tebaa niaca miñe grielo guialzhaal naa lo to i niina, zeena gan naa zha no to, dzigo dien zha gnegaa naa lo to; per na ne znu zit zo naa, nand naa dien pe nacraa ncuuañe noyun to.

²¹ Zha ne racladz gnabey xley zha Israel zho, racladz naa gnē zho dien, žepe ib riend zho zha zhonee lo guits ne ziaad Xtiidz Dios ²² zaatne raquiet xingan Abraham? Rneew: Chop xingan Abraham, tib mēēd co gop wnaa ne nac ngundziin lidz me, laa stib mēēd gop wnaa ne nacpaa tsieel me. ²³ Xpēēd wnaa ne nac ngundziin ga, laa win goc mēēd zig grēraa xpēēd miech; sangue mēēd ne gop tsieel me ga, laa win gol porne ib Dios rēb ne laa me yquianie win.

²⁴ Lo grop wnaa co, tibga me rlu ganle zha nac grop trat ne been Dios: Miñe bzhaac Agar, ga rlu ganle zha nac trat ne been Dios guic gui Sinaí. Grēse zha ne zienal trat co, nac zho zig goc xpēēd Agar, lадznia trat co no zho. ²⁵ Gzoob ne Agar nac Gui Sinaí, gui ne riaan nēz Arab; me nac guiedz Jerusalén ne ndxie len dze rii, sac tel grē menguietz Jerusalén, masaque ngundziin nac zho lo ley. ²⁶ Sangue wnaa ne gocpaa tsieel Abraham ga, rrieequia me nac Jerusalén ne no gbaa, zaatne ngab grē zha ne no xnēz Jesús, sac led yedraa grē zha co ngadoo lo ley; ye ne ngab ga, ni gzoob ne lēē xniaa ne ga nac wnaa co. ²⁷ Lēē Jerusalén co ga raquiet lo Xtiidz Dios, zaatne znu rnee:

Luu, ne nac luu wnaa ne brieelod niap mēēd, bley niina;
nguiel goc, nguiedz broptsie lo guielbley qui,
luu ne bdzinḷ dze niacnañ luu zha noxco bii mēēd.
Sac gon ndalraa xpēēd wnaa ne brieelod niap mēēd,
lēde grē xpēēd wnaa ne gop mēēd.

²⁸ Bets, bzian, golgacnañ sca ganle, laa ne nacle niina zig Isaac, xpēēd tsieelpaa Abraham, wnaa ne gacd yquianie mēēd ga; sac tel Isaac, ib Dios psan diidz ne laa Isaac gac

mëed lo Abraham. ²⁹ Ni zigne sca blëënie xpëed wnaa ngundziin co Isaac, mëed ne Dioszhal psan diidz gal ga; scasaque niina, no zha ne rlëë ran zho zionald ne miñe rnabey ley, sinque laa ne zionald dib zdoo ne rliladz ne Jesús. ³⁰ Ni nana, led lo Xtiidzaque Dios zhobnee ganle zha rëb Dios lo Abraham, rëb me: “Wnaa ne nac ngundziin lo luu i, bzonëz me grop xpëed me, nonguiëld ne ye mëed qui guiaannie ncuuañe csañ luu lo xpëed tsiel luu.” ³¹ Gacxe nagon waa, tel ne nacd ne zig xpëed wnaa ngundziin co, sinque laa ne nac zig xpëed tsielpaa Abraham.

5

Dziits golsa

¹ Peet lo ngadoodraa ne niina, sac gon laa Jesús bиаadsilaale ne, sinque to none dziits so zeena ygadoode to lo xley zha Israel. ² Naa nac Pabl, ni naazhal rne lo to nu. Golgona sca ganle, telne laa to gdeed diidz tso to xbey zha Israel, nacdiedraa to Jesús ga dzigo. ³ Ni laaw gneque naa lo to nu stib, grëse zha bgui ne rio bey co, ib none gon zho grëse zigne rnabey ley co. ⁴ Zha ne rzac por gon zho grë miñe rnabey xley zha Israel, miñ co laa Dios csilaa zho lo dol, gacnañ zho ganle, lel nozozit zho lo Jesús ga; ygaad zho guieInzaac ne yгаа zha ne gnalo Jesús. ⁵ Sangue tel no, ndionpaa no silaa Dios no lo dol, sacne dib zdoo no rliladz no Jesús ni nacie Espiritu Sant no. ⁶ Sac zha ne nli nole xnëz Jesús, peet liaadz nodraa zho bey ne rio zha Israel. Miñe noxcoraa zho nac ne dib zdoo zho gliladz zho Jesús, ni scagaa grieelo gleynie zho samiech zho.

⁷ ¡Ese tow nli! ¿Pex goc to waa? Zaacse name rac to zeene psilo to bliladz to miñe nac diidzli. ¿Cho pquiil to ne nëdraa to tsienal tow? ⁸ Miñe squi nonie guic to i niina, led zhiwseete Dios i, meñ ne bredz to grieet to ladznia ley. ⁹ Golguien sca, adel ye to sac zig rëb diidz ne rnee: “Niipaxe ncobi waa runcsibe ncob quietxtil.” ¹⁰ Per nanpaa naa, ible meñ ndzon ne rnabey ne meñ co gacnie to, zeena csaande to miñe nac diidzli; ni zha ne squi racladz gungüet to, tel chotaa nac zho ib tedsod siaabz Dios zho.

¹¹ Bets, sangue naa tel niaca miñe nli ye naa quianabey tso grë zha ne rliladz Jesús xbey zha Israel zig quianee zha qui, bod goonzhe ni ctsidiidraa zha Israel naa dzigo, glëëdraa zho zig rlëëtaa zho niina zeene ron zho rne naa zha nacne bиаadguet Jesús lo cruz. ¹² Zha ne squi ziaadnabey tsopaa to bey ne rio zha bgui nëz Israel, itebaa mazd ladaque zho yga zho, niicxe gdib nacse zho waa cueniaal zho, led tsod zho noyunneed zho to! ¹³ Bets, golguien ganle ne ygadoodraaxe to lo ley waa, miñ co nacne bиаad-silaa Jesús to. Per guiabde to togo ne laa

me psilaale to, laa to gon ncuuañe guiaab-taa guic to. Gunscade to, sinque tib tib to golleynie samiech to, ine golgon ncuuañe rquin grë zha ne nacgrë to; ¹⁴ sac niina totsaque gban to zigne rnabey Dios nu: “Bleynie samiech luu zigne rleynieque luu luu”; lëële grë miñe nac ley ga gon to. ¹⁵ Per tel laa ne gleynie to zha ne nacgrë to, lel dil no to, zig run grë ma ne lëëque ma noquiaalayla, lëëque ma noyowlsa; dzigo lëëque to gnitlo to ga. ¡Gunscade to!

Zha ne lega mbanse

¹⁶ Gacxe, laa naa rnab lo to: Goltsoxco golban zigne racladz Espiritu Sant, ni me gacnie to; led tsode to dien zha gon to grë ncuuañe ndzinlid ne racladz xcuerp to. ¹⁷ Sac gon grëse ncuuañ co, rleynie Espiritu Santa. Laa xcuerp ne run ncuuañe racladz Espiritu Sant, ni ncuuañe racladz-gaa Espiritu Sant nëd xcuerp ne rac min co. Gunde to miñe racladz xcuerp to sca. ¹⁸ Telne gban to zigne rnabey Espiritu Sant, dzigosi nodraa pe nacne ygadoo to lo xley zha Israel.

¹⁹ Ni miech ne sca run grë ncuuañe ndzinlid, ib paat ngeetsd zho:

rionie zho zha ne led tsielld zho,
run zho grë ncuuañe ndzinlid ne racladztaa
xcuerp zho,

²⁰ riegan zho grë mdio,
rnab zho pe sac samiech zho,
rlëënie zho samiech zho,
rdiñie zho samiech zho,
rzac zho adel cho glale tsielld zho,
rnadse pew laa zho rlëële,
runctil zho miech,
rguib zho rtso miech,
rbeextso zho dien cho zha ne gacnie zho,
²¹ në rac zdoo zho ran zho ncuuañe quianie
stib miech,

rzudz zho,
rcaalsa zho zaatne loxaque rowcho zho, ni
run zho grë guieIyozh.

Grë ncuuañ co run zho ni grëragaa ncuuañe ndzinlid ne sca nac. Laa naa rbire rso diidz lo to, gunde to grë ncuuañ co; sac gon grëse miech ngoopdol ne sca rban, grieelod gdzin zho zaatne rnabey Dios.

²² Sangue zha ne zienal miñe racladz Espiritu Sant, znu nac zha co:
rleynie zho samiech zho,
tibaque nguieI rac zho,
peet dzeb nonied guic zho,
rxecw zho, riedniobd zho,
niowse rnee zho lo samiech zho,
niapse ncuuañ wen run zho lo samiech zho,
run zho miñe rnee zho gon zho,
²³ miech ndooladz nac zho,
zha rnabey xcuerp zho.

Ni telne gban ne zigne nac grëse min rii, ni tib ley noguitsd ne ga. ²⁴ Grëse

miech ne nli xnêzle Jesús no, zieniedraa guic zho gun zho grê ncuuaane ndzinlid ne bzoobladz zho padzeela, grê ncuuaane ndzinlid ne racladznê xcuerp zho, sac rien zho paat rquiind ncuuaan co lo zho. ²⁵ Gacxe nagon waa, telne nli mbannie ne guielmban ne rneedz Espiritu Sant, golgotsaa dzion ne mine rnabey me. ²⁶ Dzigosi gacniatsdraa ne lo samiech ne, tsienaldraa ne dien cho glaaraa guiaan, tso ne nê gac zdoo ne gan ne grê ncuuaane rap zho, ncuuaane racgaa zho.

6

None gacnie ne samiech ne

¹ Bets, bzian, telne gan to laa cho tib zha ne nacgrê to noyun pe tib dol, dzigo to ne nac to zha ne nlipaa zienal mine rnabey Espiritu Sant, to golnee lo zho. Diidz wen, diidz ndooladz golco zdoo zho gbiire xixcuaa guic zho; ni scagaa tib tib to none nsin so to, sac gon adel nenda yeque to sca sac. ² Zeene ran to zha ne mban noded, golgun xyudar zho, golchoobladz zdoo zho, sac gon sca rnabey Jesús gban miech.

³ Tel zha ne rzac zha non nac zho, ni laa zho peet nond zho; lëëque zha noguitnie zho ga. ⁴ Tib tib to, wen wen golguien dien pe quiaayun to, telne ncuuaane ndzinliw ine golley, per tsode to glëë zdoo to gan to mine run stib zho. ⁵ Sac tib tib ne, psose Dios ne pe nac xtsiin me mine gun ne.

⁶ Grê zha ne noseed Xtiidz Dios, ib none ncuuaane rgaataa lo zho gdeed zhow yquiin zha ne noluw lo zho.

⁷ Tsienie wguite guic to sca, sac gon led yed Dios guiab ne quitnie ne. Tib tib ne, tel pe nac mine run ne mincoque ctsire me lo ne. ⁸ Zha ne run grê ncuuaane ndzinlid, lëë mine cueequia zho ga laa zho nitlo. Laa zha ne gun grê mine rnabey Espiritu Sant, lëë mine yгаа zho ga nac tib guielmban ndzon ne gdziind dze lozh. ⁹ Gacxe nagon waa, tibaque gotsaa dzioxco ne dziuun ne ncuuaane ndzinli, ncuuaane rquiin, guieete ne; sac telne sca tibaque dzioxco new, zeene gal dze co laa ne yгаа mine guioguial ne. ¹⁰ Zeene gdeedtaaw diidz sca, golgotsaa dzioxco ne dziuun ne xyudar grêse samiech ne, ni nana zeene zha ne noque xnêz Dios nac zho, mazdraa rieguiual dziuun ne xyudar zho.

Rso Pabl diidz

¹¹ ¡Golwi ganle, naazhal pquia nu! ¡Golwi ganle mbee mbee nac letr rii pquia naa rso naa diidz lo to! ¹² Grê zha ne gon squi racladz tsopaa to bey ne rio zha Israel, laa zho runa zeena glëënie miech zho, zigne rlëënie zho grê zha ne rseed miech ne ib laa Jesús gut lo cruz, psilaa me grêse miech lo dol.

¹³ Nana, niicxe grê zha ne nole bey co, rundaque zho grê mine rnabey ley; sinque laa zha qui nagon quiaguib tebaa gdeed to diidz tso to bey, zeena sca lozhd guiats zho ne zha rnabey to bio to bey. ¹⁴ Sangue tel naa, ib quiaguibd naa ne dien zha gacniats naa, sinque laa naa quiaguib gacnan miech ganle zha nac ne laa Jesús gut lo cruz. Sac tel naa, por grê mine bded Jesús ga, grêtaa ncuuaane no lo guidzliu laaw psan naa tib lad; ni niicle naagaa, sca rzac grê miech guidzliu naa. ¹⁵ Grêse zha ne ygab xnêz Jesús, nacda ne dien cho no bey ne rio zha Israel, chogaa noda; sinque mine non nacne ctsëë Dios lo xquielmban zho.

¹⁶ Grêse to ne nac to zha ne zienal diidz ne rso naa nu, Dios yquia zdoo to, ni me gacnie to ctsebd grê zhgab to; niicle tow ni niicle grêragaa zha ne ngable lo mew.

¹⁷ Bets, bzian, golgacnan sca ganle, ib racladzdraa naa gon pe yquiaaqui gbiire gaquiet mine bnele naa lo to nu; sac tel naa, grêtaa mdel ne no xcuerp naa nu, lëëlew nac bey ne rlu ganle ne nli lo Jesús ngab naa, ni xtsiin me noyun naa.

¹⁸ Jesús men ndzon ne rnabey ne, me tsoxco grê zhzhgab to. Sca gaca.

Pabl

GUITS NE PXEEL PABL LO ZHA EFÉS

¡Diuzh to grëse to!

¹ Naa nac Pabl, tib zha ne pxeel Jesús nonee Xtiidz me lo miech, sac ible Dios bnabey ne sca gaca.

Laa naa rxel guits rii lo to grëse to bets, grëse to bzian, zigne nose to guiedz Efés i, ne nac to zha ne ngable lo Dios niina ne tiblque laa to riladz Jesús. ² Dios men ne nac Pxoze, ni Jesús men ndzon ne rnabey, me glu lo to guien to ganle pa lotaa noxco me to, ni me gacnie to ctsebd grë pe zhgab to.

³ ¡Gotsaa dziolnie ne Dios, Pxoze Jesús, men ndzon ne rnabey ne! Sac gon, zha nactaa grë guielnzaac nroob ne bneedz Espiritu Sant lo ne niina ne laa ne ngab xnëz Jesús. ⁴ Haxta zeene gard cue guidzliu, bzooblo Dios ne gac ne zha ne gdziñ lo me zeene laa ne gliladz Jesús, gac ne tib miech peet xtold, zha ne gban zigne racladz me. ⁵ Nquialadz me ne, gane bzooblo me ne gac ne xpëed me zeene laa ne gliladz Jesús, ib me sca bnabey gaca sac ib sca gola zdo me.

⁶ Mincoxe waa tibaque none dziolnie ne Dios, sac gon zha wentaa me lo ne, pxeel me xpëed me men ne nquialadz me ga, bi-aadgunlay me ne. ⁷ Ne nligaa nquialadzdox Dios ne, gane pxeel me xpëed me bzhiee xchen psilaa me ne lo grë dol ne ngadoo ne, been me ne perdon grë dol co. ⁸ Ni led loxaque mincodse, sinque haxta bneedz me guielrien lo ne, bdxixbiini me ne, ⁹ ni bneedz me diidz gocndion ne pe nac mine no zdo me, mine mese nan, mine nole me gun me. ¹⁰ Sac niina laa ne ndionle: Grëse ncuuaane no gbaa, ncuuaane no guidzliu, tibaque gaca grëw ni Jesús gnabeya grësew; sca gaca zeene laa dze co gdziñ.

¹¹ Grëse ncuuaane bnabeyle Dios no gac, run mew zigne racladz me. Gotsaa gwi ne ganle, glole bzooblo me ne ygaa ne grë guielnzaac ne nacle diidz gdeed me lo grë zha ne no xnëz me, guielnzaac ne bgaa ne zeene laa ne bziaab xnëz Jesús. ¹² Ni laa me bzooblo ne, zeena ne ne nac ne zha ne gloopaa psilo bnalo Jesús, cxobnen ne lo miech ganle pa lotaa men nroob nac me.

¹³ Xquizh Jesús, ye to zeene laa to psilo pquiaadiag diidzli, Diidz Ndzon ne rnee ganle zha laa to lo dol, ni bliladz to cho nac Jesús, laa Dios pxeel Espiritu Sant lo to zig tib bey, bey ne rlu lole me ngab to; zigne bneele me glo. ¹⁴ Ne znu pxeel me Espiritu Sant nacie ne, ga rlu ganle ib nli zгаа ne grë mine bneele me gdeed me lo grë zha ne ngab lo me, ni lëe min co ygaa ne zeene gal

dze ne laa me blozh psilaa grë zha ne ygab lo me; zeena grë ne gleynie ne me por squitaa men nroob nac me.

Rnab Pabl guielbiini lo Dios

¹⁵ Zeene gocnan naa ne nlipaa dib zdo to riladz to Jesús, ni ne nli nquialadz to grëraa miech ne no xnëz Dios, ¹⁶⁻¹⁷ rded naa xquizh lo me. Zeene rzodiidznietaa naa me, rsoladz naa to, rnab naa lo me gneedz Espiritu Sant guielbiini lo to guien to cho nac me, zeena lozh gunbey to me. Lëe me nac xDios Jesús, lëe me nac Pxoze ndzon ne. ¹⁸ Rnab naa lo me quixbiini me guic to, guien to ganle zha nactaa grë ncuuaane ygaa to ne laa me bredz to, guien to ganle zha ndzontaa, zha nontaa ncuuaane gdeed me lo grëse miech ne ngab lo me, ¹⁹ ni guien to zha nroobtaa guielrnabey ne rap Dios, pa lotaa naca; lëe guielrnabey co nacie ne ne nac ne zha ne no xnëz me. Lëe guielrnabey co ga blu me ²⁰ zeene bleeban me Jesús bzoob me me cue me bgaa, zaatne rieguañ sob me ne nac me men rnabey, ²¹ bzo me me, me rnabey lo grëse zha ne rnabey, lo grëse zha ne non, ni lo grëragaa ncuuaane no; niicle niinaw, niicle len dze ne naragaa guiaada. ²² Grëse ncuuaane notaa, laa Dios psana ladznia me, ni bzo Dios me me rnabey lo grëse zha ne no xnëz me. ²³ Sac grëse zha ne no xnëz me rrieequia xcuerp me ga nac zho, gacxe waa grëse zha ne nac cuerp co, zha none cxobnen ganle pa lotaa men nroob nac me. Tel pe lotaaw me nacie zho, sac grëtaa ncuuaane no ladznia me now.

2

Ne noxco Dios miech gane psilaa me zho

¹ ¡Laa Dios bneedzle tib guielmban cub lo to niina, niicle ne ntseeb goc to glo! Golsoladz ganle, zeene scataa beenctal to xtold to, masaque nac to lo Dios hor co zig tib zha ne gutle, ² laa to güeynañ niapse grë ncuuaane ndzinlid ne rac lo guidzliu rii, been to grë mine rnabey ma ne rnabey lo mendox, ma ne rcheep grë zha ne ne néd gon xtiidz Dios.

³ Grëse ne sca wban ne glo, bionañ ne ncuuaane ndzinlid ne bzoobladztaa ne, bdxiiun ne ncuuaane bdeedtaa guxt xcuerp ngooptol ne, ncuuaane bbaabtaa guic ne. Ni ne scataa nac ne, ib bioguañ ngaa ne lo guielnédox ne cxeel Dios, lo guielné ne noxtseeb grëraa miech niina. ⁴ Per ne nquialadz Dios ne nac ne miech, gane pquia zdo me ne, ⁵ ni niicle ne rrieequia mengutle nac ne ne scataa quiadziun ne grë dol co, per bleeban me ne; lëe min co ga been me zeene bleeban me Jesús. ¡Laa me psilaa ne lo guielgut co, niapse por mezhal noxco ne! ⁶ Laa me bleeban ne, zeena ygaa ne guiosioibne ne Jesús zaatne gnabey Jesús. ⁷ Zigtaa len dze riiw, zigtagaa len dze ne

ziaadraaw, ga gan miech ganle pa lotaa nquialadz me ne, pa lotaa wen me lo ne, sac pxeel me Jesús bjaadsilaa ne. ⁸ Golgan ganle, ne wen me mezhal noxco guiaanwen miech lo me, gane rsilaa me ne lo dol zeene laa ne riladz Jesús dib zdoo ne; guiabd ne togo por pe guielwen ne gun ne laa me csilaa ne. Ible zdoo me ral rsilaa me miech, ⁹ racda ne por pe guielwen ne gun zho; zeena gdaannied zho guielwen ne run zho. ¹⁰ Dios nac men ne psan ne, ni niina ne laa ne bziaab xnéz Jesús, laa me bredz ne dziuun ne grè guielwen ne racladz me, mine bzooblolle me ne dziuun ne.

Grèse zha ne ngab lo Jesús, tipse nac zho

¹¹ Golsoladz ganle miech ngoopdol, miech ne ngabd lo Dios, miech beed, sca lè to lo grè zha Israel glo (sac zha, ne rio zho bey zigne rnabey xley zho, rzac zho miech wen, miech mbe nac zho, zha nac zha ne ngabpa lo Dios). ¹² Len dze co gard ygab to lo Jesús, gard gac to tipse grè to zha Israel, led yede to no lo trat ne biaan Dios grè me zha Israel, nande to grè diidz ne psan me lo zho. Lega laa to mbanse, runbeyde to Dios, ni tib guielnaac quiambèzde to yгаа to. ¹³ Sanguè niina ne laa to bzèèb xnéz Jesús porne bzhiee xchen me psanmbe me to, laa to ngable lo Dios.

¹⁴ Jesús nac men ne psanwen ne grè ne, ptiche me grètaa ncuaa ne pca zaacse ndziañsa ne; zigtaa zha Israela, zigtagaa zha zita, tibaque been me ne lo me niina. ¹⁵⁻¹⁶ Zeene pquia me lo cruz, gataa ptiche me grè ley ne zienal zha Israel, ne scataa rsanglaa zho zho; gane niina zigtaa zha Israela, zigtagaa zha zita, laa me been zho tipse, been me zho tib guiedz cub ne ngab lo me. Sca nac ne laa me psanwen zho grè zho, ni psanwen me zho nèz lo Dios.

¹⁷ Jesús nac men ne bjaadnie Xtiidz Ndzon me lo ne grèse ne, gocndion ne zha guiaanwen ne nèz lo Dios, zigtaa tow ne nac to zha ne zit zo lo Dios glo, zigtagaa zha Israela ne nac zho zha ne gax zo lo me. ¹⁸ Gane niina, niicle zha Israela, niicle zha zita, zrieelo ygab zho lo Dios men ne nac Pxoze ne, zeene laa Espiritu Sant gunquien zho none gbig zho lo me. ¹⁹ Gacxe waa, tel to nacdrea to menzit niina, lole Dios ngab to, lal non to, lal nac to grè to grèraa zha ne ngab lo me. ²⁰ Golguien ganle, grèse ne niina gzoob ne nac ne zig tib yu ne noyaa, yu ne psilo grè zha ne pxeel Dios nonee xtiidz me lo miech niina, grè zha ne pxeelgaa me pteed xtiidz me lo miech padzeela, ni Jesús nac quie ne naaz yu co. ²¹ Grèse zha ne zienal mine rnabey me, rrieequia nosoquiaraa zho yu co ga, haxta guirew gaca tib yadoo ne nliipaa mbe nèz lo Dios. ²² Zig nac to gon, tib tib

to ne nac to zha ne ngab lo Jesús, ye to nac yadoo co, zaatne rbèz Espiritu chen Dios.

3

Pabl nac zha ne güeyseed zha zit

¹ Ni ne bialnecxe naa Xtiidz Jesús lo to waa, gocnan to ne niicle men zit nac to zrieelo ygab to lo Dios, min co gane znu niogyu naa nu. ² Nanlaxe to ganle ne wen Dios, laa me bzo naa gun naa dziin rii cseed naa grè menzit. ³ Laa me blu lo naa zha nac grè ncuaa ne no guic me gun me, mese nana per laa me blu lo naa zha naca, ni laa palala psilo bzette naa lo to lo guits rii. ⁴ Zeene glab tow i, dzigo guien to ganle ne nli nan naa zha nac grè mine gun Jesús, mine mese nan. ⁵ Wlaltaa choot miech gocnanda, laa niina laa Dios pxeel zhiEspiritu me bneedz guielbiini lo no gocndion now, zigtaa no ne nac no zha ne pxeel me nonee xtiidz me, zigtagaa grè zha ne pxeel me noteed xtiidz me. ⁶ Ni znu naca: grèse zha zit, zgaa zho guielnaac ne rëb Dios gdeed me lo grè zha ne ngab lo me, tibaque nac guielnaac ne ygaa zho grè zho zha Israel. Niicle zha Israela, niicle zha zita, laa Dios quiambèz gdeed me guielnaac co lo zho, totsaque gliladz zho Xtiidz Ndzon Jesús.

⁷ Niicle ne tib miech peet nond nac naa, per laa Dios bzooblo naa gne naa lo miech gacnan zho mine blozh bzet naa nu, me nacie naa, me rneedz grètaa poder ne rap me parne grieelo gun naa dziin rii. ⁸ ¡Ncuaa ne gzee zdoo new! Golwi ganle, naa nac tib zha ne mazdraa peet nond lo grè zha ne ngab lo Dios; per laa me bzooblo naa, naa bgaa dze ndzon rii gne naa Xtiidz Ndzon me nu lo grè zha zit, zeena gacnan zho ganle pe zhistaa grè guielnaac ne gdeed Jesús lo zho. ⁹ Gne naa lo zho gacnan zho ganle zha nactaa grè mine no guic Dios gun me, mine wlaltaa choot gard gacnan; Dios, men ne bzaa grèse ncuaa ne no. ¹⁰ Nana gnè to: “¿Pe nacne sca been me?” Laa me beeta zeena grèse zha non, zha rnabey ne no gbaa, zeene gan zho tipse nac zha Israel grè zho zha zit ngab zho lo me, ga guien grè zha gbaa co ganle zha ndzielguictaa Dios. ¹¹ Sca nac mine no guic me padzeela, ni zeene laa me pxeel Jesús laaw goc. ¹² Gacxe waa, niina ne laa ne ngable lo Jesús, peet lo ngadoodraa ne, niinasi zrieelo gbig ne lo Dios, sac ndion ne zha ne rnalo Jesús ible scaania Dios zho. ¹³ Laa naa rso diidz lo to sca, niicle ne znuaa quiaadeed naa loxaque ne bialseed naa to, gunde to ne minriise laa zdoo to guiaan, sinque golley golwi ganle nu rlu zha nziuu, zha non nac to lo naa.

Nquialadz Jesús miech

¹⁴⁻¹⁵ Zeene rsoladz naa grètaa mine no guic Dios gun me, ni mine beenlegaa me

(me ne nac me Dad lo grëse zha ne ngab lo me, niicle lo guidzliu nuw, niicle gbaa-gaaw); rded naa xquizh lo me. ¹⁶ Ni ne squitaa ndzon, ne squitaa ncuuaane lozhd nac grëtaa guie_lnzaac ne rap me, laa naa rnab lo me cxeel me zhiEspiritu me gneedz xfuers to dziits so to. ¹⁷ Ni rnab naa lo me tibaque dib zdoo to gliladz to Jesús, zeena scagaa tibaque gbannie to me, parne guie_n to gan_{le} pa lotaa nquialadz me to. ¹⁸ Ga guie_n to gan_{le} grë to grëraa zha ne ngab lo me, ne nligaa pa lotaa nquialadz me to, nacd ncuuaane grielo ctiix ne, guiab ne lalnuw. ¹⁹ Niicle ne znu nacd ncuuaane grielo guiab ne znu znu naca, per laa naa rnab lo me zig zie dze guie_nraa to pa lotaa rleynie Jesús to; zeena glu gan_{le} ne nli nacie Dios to.

²⁰ Ni Diosi gon ne nac me men ne ndzon, mazdraa ncuuaane grielo gneedz me lo ne, lëdle mine riab guic ne rnab ne lo me; ni ncuuaane gaca gon, sac me nacie ne. ²¹ Grëse ne ne nac ne zha ne no xnëz Jesús, itibaque golgotsaa gleynie ne me sca, ne squitaa ndzon me! Sca rieguiala.

4

None tipse gac zha ne rililadz Jesús

¹ Zigne rne naa ga, laa naa nioogyu nu loxaque ne run naa xtsiin men ndzon ne rnabey, per laa naa rnab lo to zaacse golgac, golban zigne rieguial gban grë zha ne bredzle Dios ngab lo me, sac gon laa me bredzle to. ² Golgac tib miech ndooladz, tib miech wen, tib miech nlëëguicd, tib miech ne guieednied samech sinque ine gleynie to zho. ³ Wenle na ndxie to niina, ni Espiritu Sant nac men ne gacnie_n to; zeena tibaque squi tipse gac to. ⁴ Sac gon tibaque cuerp nac ne grë ne, tibaque Espiritu nacie ne, ni tibaque nac mine ndion ne gneedz Dios lo ne, ne laa me bredz ne. ⁵ Tibaque men ndzon ne rnabey ne, tibaque men ne rililadz ne, tibaque wrobnis ne no par grë ne ne dib zdoo ne rililadz ne me; ⁶ tibaque Dios no, me nac Pxo_z ne grëse ne, me nac men nroob ne zo lo ne, me racnie_n ne grëse ne, ni me nacie ne.

⁷ Tipse nac ne, per tib tib ne ppose Jesús ne pe nac dziin ne grielo dziuun ne lo me, zigne gola zdoo me. ⁸ Min rii ga raquiet zaatne znu zhonee lo guits ne ziaad Xtiidz Dios:

Blozhse psanwin me grëse zha ne rlëe ran me,

laa me biire zey gbaa stib;

ni ppose me tib tib miech pe nac dziin ne grielo gon zho lo me.

⁹ Golgotsaa gwi ne gan_{le}, Jesús raquiet nu, rneew "biire zey me gbaa stib", ga rlu gan_{le} tib men ne biet gbaaw biaad me lo guidzliu.

¹⁰ Sac me biet gbaa, ni biire zey me gbaa stib, zeena glu gan_{le} tel pa lotaa zrieelo gdzi_n me.

¹¹ Ni mezhall rzo ne tib tib ne pe nac dziin ne dziuun ne; me rzo:

zha ne rxeel me gnee xtiidz me,

zha ne rxeel me cteed xtiidz me,

zha ne rienee Xtiidz Ndzon me tib tib lo miech zha laa zho lo dol,

zha ne rteedlo grë zha ne ngab lo me, ni

zha ne rseed zho zha nac Xtiidz Ndzon me.

¹² Laa me run min co, sac laa me racladz grëse zha ne ngab lo me lozh xixcuaa lo xquie_lmban zho, zeena guie_n zho zha gon zho xtsiin me; ¹³ haxta gdzi_n dze ne tibaque mine gliladz ne grë ne, grëse ne dziuunbey_{pa} ne men ne nac Xpëed Dios. Laa ne lozh sodziits, haxta gac ne zig me.

¹⁴ Gacdraa ne zig cho_l cho meëd_{la}s ne beelze pe rililadz; niicxe guiaad grë zha ne guiaadnie stib wseed, zha ndzinlid ne zombëz loxaque dien zha gdeeda diidz yquidie zho miech; yquidied zho ne.

¹⁵ Sinque guional ne mine nac diidzli, ine gleynie ne samiech ne, tibaque laa ne guional zigne nac Jesús, men ne rnabey lo ne grë ne ne ngab ne lo me (rrieequia xcuerp me nac ne, me nac guic cuerp co). ¹⁶ Ni ne me nac men ne rnabey lo ne, me rnabey zha gac tib tib dziin ne pso me ne dziuun ne; niicle ne nzian ne, per tipse nac ne laa ne nodziuun dziin ne pso me ne, zeena xixcuaaraa lo xquie_lmban ne, ni lozh guie_n ne zha gleynieraa ne samiech ne.

Guie_lmban cub ne rneedz Jesús

¹⁷ Laa naa rso diidz lo to nu, ni golquiaadiaga zig nac zeene men ndzon ne rnabey ne rneew lo to: gbandraa to zigne mban grëraa miech ne zozit lo Dios, grë zha ne mban zigne notaa guic; ¹⁸ sac tel zha, ncow nac guic zho. Gard yгаа zho guie_lmban ndzon ne rdeed Dios, nand zho zha nac guie_lmban co sacne ndip zdoo zho. ¹⁹ Laa zho gocnadle, niapse lo grë ncuuaane ndzinlid no zho, ib rgobeyd zho run zho grëtaa guie_lyozh ne no. ²⁰ Sangue to gon, ne nac to zha ne no xnëz Jesús niina, led mincod noseed to; ²¹ telne nli noquiaadiag to gan_{le} cho nac me, telne nli rien to zhiwseed me mine rlu gan_{le} zha nac diidzli.

²² Miech yozh ne goc to glo, grëtaa ncuuaane ndzinlid, grëtaa guie_lyozh ne gocladztaa xcuerp to been to, igol_{sa}ana!

²³ None gdzëe lo xquie_lmban to, zigtaa grë mine no zdoo to, zigtagaa grë mine rza guic to, ²⁴ golgac tib miech cub, zaacse golban, ndzinli golgac; zeena glu gan_{le} ne nli beencuble me to zigne racladz me.

²⁵ Golguie_n sca, yquidiedraa to samiech to, sinque niapse mine nac diidzli golnee, sac gon tel ne pe nacne yquidielsa ne ni tibaque nac ne grë ne.

²⁶ Telne glëë to, code to guielblëë co zdoo to dib dze, sac gon dol ga. ²⁷ Gunde to mine racladz mendox.

²⁸ Zha ne goc ngbaan lëë, cuandraa zho, sinque gun zho dziin gdziniaa zho ncuaaane yquuin zho, zeena scagaa grielo gun zho xyudar zha ne guiend pe yquuin.

²⁹ Gneede to diidznë, sinque diidz ne ndzinli, diidz ne yquuin golnee, zeena zha ne gona ine chooblada zdoo zho, ine yquuina lo zho. ³⁰ Golguien, gunde to ncuaaane coguieinë to Espiritu Sant. Golgan ganle laa Dios pxeel me, nac me zig tib bey ne glu ganle ne nli lo Dios ngab to, gal dze ne laa me lozhpaacsilaa grë zha ne ngab lo me. ³¹ None csaan to:

guielnaladz, tso to gow gzhizh zdoo to; glëëdraa to,

sobzhiandraa to,

coredzdraa to,

gacntseebdraa to, ni

grëragaa guielntseeb ne no, gunde tow.

³² Sinque none:

wen gac to lo samiech to,

golquia zdoo samiech to,

golgun samiech to perdon, zigne beenaque Dios to perdon zeene laa to beenbey Jesús.

5

None glu cho nac zha ne ngab lo Dios

¹ To ne laa to nacle xpëed Dios ni nquialadz me to, goltsocxo gac to zig me. ² Zaacse golban, golleynie samiech to zigne rleynie Jesús to, sac gon tel me, haxta bleeladz me me gut me xcuent ne, gut me biogon me lo Dios psanme me ne lo xtol ne, me goc tib gon ne pcaania Dios.

³ Golguien sca, none glu to ne nli xnëz Dios no to;

gunde to grë guieleyozh ne run grë zha ne zienald zigne nacpaa guieltsieel,

gunde to grë ncuaaane yozh ne run miech ndzinlid,

gunde to grë ncuaaane run grë zha ne zienald loxaque dien zha gunlo dimi.

Gunde to grë ncuaaan co, per ni gzodiidzde tow.

⁴ Gneede to grë diidzguidz,

gneede to grë diidz ne paat rquiind,

gneede to grë diidz ro nëz;

sac gon rdzieeldraa gnee to grë ncuaaan co; sinque Dios golgoolnie, goldeed xquizh lo me.

⁵ Nanle to ganle, grëse:

zha ne zienaldraa zigne nac guieltsieel,

zha ndzinlid ne run grëraa guieleyozh,

zha ne mbidz (zha ne rleynieraa dimi, laa ne gleynie zho Dios); ni tib zho grielod gdziin zaatne rnabey Jesús ghop me Dios.

⁶ Gdeete to diidz lo zha ne gacladz yquidie to gnë zho peet nacd grë min co, sac gon, grëcxe min co waa run grë zha ne nëd gon xtiidz Dios, lozh ga, lëë mine tsieguial zho laa zho yгаа lo guielzi ne csiaab me. ⁷ Golguien sca, yquiaadiagde to xtiidz grë zha ne sca rnee, per ni ctsieelsade to zho.

⁸ Nli, çlëë?, ndzinlid wban to glo, rrieequia lo ncow ga bio to, gocnie to mendox; sangue niina ne laa to nacie Jesús men ne nac biini, rrieequia lo biinile no to. Golguien sca, zaacse golban, ⁹ sac niina ne laa to nole lo biini, none gac to:

tib miech wen,

tib miech ne zienald gac mine nac diidzli,

tib miech ne rnee diidzli.

¹⁰ Goltsocxo guien to zha racladz Dios gban to. ¹¹ Gandzede to grë ncuaaane ndzinlid ne run grë zha ne no lo ncow, sinque gollisquiw;

¹² sac grë ncuaaane run zho ngeets zhli-aan, haxta ncuaaane ctoladz ne gnee new.

¹³ Grëse zha ne bgib lo biini co, zien zho ganle zha nactaa grë ncuaaane yozh ne noyrun zho; sac gon telne biiniw, tsod ncuaaane guianngueets low. ¹⁴ No tib zaatne znu zhonee lo Xtiidz Dios, rneew:

Luu ne tibaque guieel no luu, blee mcaal lo luu;

briee lad grë zha ne squi nole ladznia guielgut,

zeena gban luu lo biini ne nac Jesús.

¹⁵ Golguien sca:

Miech nixbiini golgac, ndzinli golban; gbande to zig chol cho grë miech nxen ne run mine notaa guic.

¹⁶ Cteed zhlëde to xtse to lo ncuaaane paat rquiind, niicle ne niapse grë min co zienald grëraa miech len dze ri.

¹⁷ Gunde to ncuaaane paat rquiind ne rza guic to, sinque golguien dien pa minpaa racladz Dios gun to, dzigo goltsocxo min co golgun.

¹⁸ Gzudzde to, sac gon lo guielgonziu run miech ncuaaane nonguieldraa; sinque mazd golnab gneedzraa Espiritu Sant guielbiini lo to, zeena ine:

¹⁹ gool to grë salm, grë himno, grë cant ne csiaab Espiritu Sant guic to; dib zdoo to golgoolnie men ndzon ne rnabey.

²⁰ Goldeed xquizh lo Dios men ne nac Pxoze, por grëtaa ncuaaane ran to, ncuaaane rded to; golguien ganle lo Jesús ngab to.

Zha none gban zha ne rtiladz Jesús

²¹ To ne nac to zha ne ngable lo Jesús, tib tib to golgon mine rnee zha ne nacgrë to, zeena glu ganle me nac men non lo to.

²² To ne nac to men wnaa ne ptsieelniale, golgon xtiidz tsieel to, zigne rioxcoque to ron to mine nac xtiidz men ndzon ne rnabey. ²³ Sac ible tsieel to nac men ne no gnabey lo to, zigne Jesús rnabey lo grë zha

ne no xnëz me (ni me psilaa zho lo dol, laa zho nac zig xcuerp me). ²⁴ Ni zigne sca ron zho xtiidz me, scaque none gon to mine rnabey tseele to to.

²⁵ Togaa ne nac to zha bgui ne ptsieel-niale, golleynie tseele to, zigne rleynie Jesús zha ne no xnëz me. Tel me haxta bleeladz me xquielmban me, ²⁶ blee me zho lo dol, ni biaanmbe zho zeene laa zho pquiaadiag xtiidz me, wban zhow ni brobnis zho; ²⁷ zeena gal dze ne laa me ycaania zho, laa zho nacle miech ne rieguial gdziñ lo guielndzon ne no me, ni tib dol rapdraa zho, miech mbele nac zho, zig tib lë lar nquitsbie ne ni tib pxud neyd. ²⁸ Sca nagon none guñ mgui, none gañtsi zho tseele zho zigne rañtsi zho xcuerp zho. Mgui ne rañtsi tseele, rrieequia xcuerp zho ga rañtsi zho; ²⁹ sac gon, tsod tib zha ne lëëque zha csacsi xcuerp zho, sinque ran zhow. Ni scadaa nagon rzac Jesús grëse miech ne ngab lo me, ³⁰ sac nac zho zig xcuerp me. Ni lëë tib lë cuerp co nu nac ne.

³¹ Zha ne pcatsieel-le, ible tibaque cuerp nac zho grop zho, laaw zhowneequa lo Xtiidz Dios zaatne rnee: "Ib none griezhaa mgui lo pxoz zho, lo xniaa zho, zeena gban-nie zho tseele zho gac zho zig tibaque miech grop zho." ³² Rgobey naa ngan tsoguic to zha nacne chop miech gac tibaque cuerp; per ga gon rlu ne niicle nzian ne per tibaque cuerp nac ne, ni lëë xcuerp Jesús ga. ³³ Mine racladzpa naa csoladz to nu: to ne nac to men bgui, none gleynie to tseele to zigne rleynieque to xcuerp to; ni niicle togaa ne nac to men wnaa, none gon to xtiidz tseele to, cueede to xquielto zho.

6

¹ To ne nac to mëed, golgon xtiidz pxoz to, xtiidz xniaa to, sac sca nonguiela, ni scagaa glu ne nli rleynie to Dios. ² Golgan ganle, lo grë xley Dios no tib men znu rnee: "Bin xtiidz pxoz luu, xtiidz xniaa luu, zeena ine niowse gac lo xquielmban luu, ni nroob dze ne gban luu lo guidzliu rii." Ni lëëw glopaa rnee ganle pe nac mine yгаа zha ne guñ mine rnabeya, ³ sac rneew, niowse gac lo xquielmban zho, ni nroob dze ne gban zho lo guidzliu rii.

⁴ Togaa ne nac to men nguzan, gunde to ncuaañe yquiaaguieñe to xpëed to, sinque golcobey dien zha guñ to parne gon zho diidz, ni cseed zho gban zho zigne rdziladz Dios.

⁵ To ne nac to zha ne ngadoo ladznia ben, golgon xtiidz men ne rnabey to. Golguieñ zha rnabey to, dib zdoo to, goltsocxo golgun xtsiin zho, zig nac zeene xtsiin Jesús ga noyun to. ⁶⁻⁷ Gunde to ne loxaque zeene zose zho lo to, dzigose yquiaalo to guñ to dziin zeena guiaanzuu to lo zho, sinque ine nguieel golgac golgun xtsiin zho, zig nac

zeene xtsiin Jesús ga quia to, ine dib zdoo to quiaayun to mine racladz Dios. ⁸ Benque nanle to, zigtaa zha ne ngadoo ladznia beña, zigtagaa zha ne rnabeya, zdeedse Dios mine tsieguial zho tib tib zho tel pe nac ncuaañe wen ne noyun zho.

⁹ Togaa ne nac to zha ne rnabey, niowse golgac lo zha ne quia xtsiin to, gacntseebe to lo zho. Golguieñ ganle, zigne rzacaque zho, scaque rzac to, no tib men ne rnabey to grë to, lëë me ga zob gbaa; ni tel me gon led yed me guiab dien cho rnabey, chogaa run dziin.

None nsin so zha ne riladz Jesús

¹⁰ Bets, bzian, nu ne laa naa csiaalle, laa naa rnab lo to gon tibaque golnalo Dios; golgan ganle, con grëtaa guielrnabey ne rap me, me gneedz grë lose fuerz lo to. ¹¹ Zig nac grë menguiib, ible no grë ncuaañe rquuin zho zeene laa zho rie lo dil, scaque to niina nagon, golquuin grë lose fuerz ne bneedz Dios lo to, zeena glëbd mendox gunguet ma to. ¹² Golgan ganle, led-xe miech guidzliud waa nodilnie ne, sinque laa ne nodilnie grë me yozh ne quianzë zhan gbaa, ma ne quianabey grëtaa guielntseeb ne rac lo guidzliu rii. ¹³ Gane nagon none yquuin to grëse lo fuerz ne zineedzle Dios lo to, zeena guiablude to zeene laa grë me ntseeb co csilo ygaal to; ni scagaa, zeene laa ma biablo, tibaque dziits so to grë to.

¹⁴ Dziits sca golso:

Dziits golso lo mine nac diidzli, zigne dziits dziits rzhidoo len menguiib zeene laa zho tsie lo dil.

Golgun mine nonguiel zeena ctse to lo mendox, zigne rtse ncuaañe racw menguiib lo grë ncuaañe gnitlo zho.

¹⁵ Nsin golso zeene laa to tsienee Xtiidz Dios lo miech gacnan zho zha guiaanwen zho lo me, zigne nsinle zo menguiib zeene laa zho no tsie lo dil.

¹⁶ Guiaanpladzde to, golnalo Dios, zeena peet grielod guñ grë me yozh co to, zigne rnalo menguiib guiablag ne rsaac zho lo zha ne nodilnie zho.

¹⁷ Golsoladz ganle laa Dios psilaale to lo guielgut, golsaca zigne rzac menguiib pchog guiib ne rzob guic zho, rsilaaw zho lo guielgut. Ni gol sac Xtiidz Dios mine rneedz Espiritu Sant lo to, zigne rzac menguiib xquii zho.

¹⁸ Nsin sca golso, guiablude to. Tibaque golzodiidznie Dios. Golnab lo me mine rsi-aab Espiritu Sant guic to, golnab gacnien me grëse zha ne ngab lo me; ni ¹⁹ golnab lo me gacnien me naa, csiaab me guic naa pe nac mine gne naa, peet dzeb tsod lo naa gne naaw lo miech; zeena gacnan zho ganle, zha nac Diidz Ndzon ne rnee zha laa miech lo dol, mine choot gocnand glo.

²⁰ Ib me bzo naa cteed naa xtiidz rii me lo grë zha zit, ni miñcocxe waa rquiaqui znu no grë guiib rii nia naa, ngoguiu zho naa nu. Golnab lo me gacnieñ me naa, gdzieebd naa gne naa ganle cho nac me. ¡Nsin sca golsol!

²¹ Laa naa rxel Tic lo to, me nac tib meñ nziuu lo naa, dib zdoo me laa me quiayun xyudar naa lo xtsiin meñ ndzon ne rnabey ne. Me guiaadnie diidz lo to ganle zha rac naa, zha no naa nu. ²² Miñcopaa ziaad me i, ziaadnie me diidz zha no no nëz rii, zeena ine gley to tsoxcoraa to mine rililadz to.

²³ Rnab naa lo Dios meñ ne nac Pxoz ne, ni lo Jesús meñ ndzon ne rnabey, me gacnieñ to peet zhgab ctsebde to, ine úbaque gliladz to me, ine gleynie to samiech to. ²⁴ Me gunlay to, grëse to ne nac to zha ne nlipaa dib zdoo rleynie Jesús.

Pabl

GUITS NE PXEEL PABL LO ZHA FILIP

¡Diuzh to grëse to!

¹ Naa nac Pabl, grop no Timoté laa no rxeel guits rii guiedz Filip i. Laaw ziaad lo to ne nac to zha ne ngable lo Dios, ni nacie to Jesús; zigtaa tow, zigtaa zha ne zo lo tow, zigtagaa zha ne run xyudar zhow. Nanle to ganle zigtaa naaw, zigtaa Timotéw, tib ngundziin nac no lo Jesús.

² Dios men ne nac Pxoze ne, ni Jesús men ndzon ne rnabey, me glu ganle pa lotaa noxco me to, zeena ni tib zhgab ctsebde to.

³ Zeene rsoladztaa naa to, rded naa xquizh lo Dios; ⁴ ni zeene rzodiidznie naa me, rley naa gon rnab naa lo me gacnie me to; ⁵ sac desde dze ne laa to psilo bliladz Jesús haxta lo nadze, tibaque laa to quiayacnie naa, quiayun to xyudar naa noseed naa miech Xtiidz Ndzon me. ⁶ Ni nanpaa naa, zigne squi psilo Dios nozhixcuaa me lo xquielmban to, zigse zie dze laa me gzhixcuaaraa to, zeena nsinle zo to gal dze ne laa Jesús guiaad stib.

⁷ Min co racladz naa, ni ib rieguiala sac ne nligaa rleyne naa to. Sac ib rsaande to naa, zigtaa zeene znu no naa ladzguiiba, zeene zonlaagaa naaw, zaatne racpaa rne naa ni rlu naa ganle ne nli diidzli nac Xtiidz Jesús. ⁸ Dios nan ganle pa lotaa nonie to guic naa, rquiane zdoo naa to, zigne rzacaque Jesús ne.

⁹ Rnab naa lo Dios gacnie me to, zig zie dze gleyneraa to samiech to, tsabiiniraa to, ¹⁰ zeena guien to cue to niapse grë ncuane ndzinli gun to. Sca ine ndzinli nac lo xquielmban to, ni tib xtol to guiend gal dze ne guiaad Jesús; ¹¹ zaace gban to. Ga glu to ganle lëe min co blu Jesús lo to, zeena sca csanglaa to Dios.

¹² Bets, bzian, racladz naa gacnan to ganle niicle tel pe nactaa ncuane nodeed naa, per led mincod gon cuéz ygaazdraa Xtiidz Ndzon Jesús, sinque lel znu mazdraa ndal miech ne noquiaadiaga. ¹³ Sac tel niina, zigtaa grë zha ne rquia dziin lo gobierna, ni grëragaa miecha, laa zho nanle ganle ne loxaque noyun naa xtsiin Jesús gane znu no naa ladzguiib. ¹⁴ Sac ndal grë bets zeene gon zho laa naa znu biab ladzguiib, laa zho bguiaalraa laa zho noseed miech Diidz Ndzon rii; peet rtoladzdraa zho, peet dzeb guiendraa lo zho, masaque Dios rnao zho.

¹⁵ Parga nli no stib dii zha ne psilo noyun dziin co, per laa zho noyuna loxaque par dien zha guianziuu zho, sac në rac zdoo zho ran zho zha none naa Xtiidz me. Per zigne no zha ne sca nac, noque zha ne nli dib zdoo

zho quiaseed zho miech. ¹⁶⁻¹⁷ Lëe zha co nagon rlu ne nli rleyne zho naa; sac nan zho ib laa Dios bzo naa gne naa ni glu naa lo miech ganle ne nli diidzli nac Xtiidz Jesús; laa zha ne sca noyun dziin co par guianziuu zho, rzac zho na tel mazdraa glaa guiaa zho lo naa, mazdraa lozh coguielne zho naa ne laa naa znule no ladzguiib. ¹⁸ Per par naa, pex gun naa zho. Tel zha ne zie dib zdoo, zha ne zieedgaa dib zdoo, totsaque ne Xtiidz Jesús quiaseed zho miech; min co nac mine mazdraa rley naa.

¹⁹ Ni zleyragaa naa, sac nan naa ib zrie naa zaatne niioogy naa nu; sac lala quianab to lo Dios por naa, ni lala nacie zhiEspíritu Jesús naa. ²⁰ Dib zdoo naa racladz naa, tiblrique gac naa lëeb naa gan naa mine tedtaa naa, gdzind dze ne gun naa ncuane cuee xquielto naa. Racladz naa cxobnen naa ganle zha men rotaa nac Jesús; niicle tel niaca por min co yquiaaqui gut miech naa. ²¹ Sac gon, par naa laa naa mban par gun naa mine rnabey Jesús, ni zeene guetgaa naa, nanpaa naa tib guielbley nroob ne ygaa naa. ²² Per tel laga mban naa, nzianraa ncuane grielo gun naa lo me; dzigo nagon riendaque naa dien pa min wenraa. ¡Pe wena gbanraa naa, te wena ye prontga gbi naa lo guidzliu rii! ²³ No hor rzaac naa gbanraa naa, nogaa hor rzaac naa tebaa laa naa while lo guidzliu rii; zeena ziagaa naa lo Jesús, sac nligaa zoot naa laa naa bdzingle lo me. ¡Min co mazdraa wen, lëdle cuéz naa lo guidzliu rii! ²⁴ Per rien naa ible none cuéz naa, sac rquianpaa to naa. ²⁵ Mincoxe nagon waa, rgobey naa zbanraa naa, zeena lozh cseed naa to choobraa to lo Xtiidz Jesús, ine nley gac to laa to rliladza; ²⁶ ni zeene laa naa gbire guial lo to i, rien naa nroob gley to, zdeed to xquizh lo Jesús porne racnie me naa.

²⁷ Per mine rsopaa naa diidz lo to gon: Goltsoxco golban zigne no gban zha ne ngab xnëz Jesús, zeena niicle telne grielod guial naa, racladz naa gon naa tipse nac to grë to, tiblrique dziits zo to lo Xtiidz Dios; ni noxco to dien zha gliladz grëraa miech Jesús, ²⁸ ni lalnu rdziebde to grë zha ne rlëe ran to. Ga guien zho ganle nëz ne nitlo zho zie zho, sangue to ga rlu ne laa Dios psilaale to lo xtol to, ni nacie me to. ²⁹ Sac gon, ible none gan to guielne porne no to xnëz me, bzooblod Jesús to loxaque par ygaa to guielnzaac qui gnalo to me. ³⁰ Niicle tow, niicle naagaaw none dzian me min co. Gonle to ganle zha nactaa grë ncuane bdeed naa, ni ziyongaa to grë mine nodeed naa niina.

2

Goc Jesús tib men ndooladz

¹ Nanle to ganle Jesús rchoobladz zdoos to, me rlu zha gleyenie to samiech to, tipse nac to ni Espiritu Sant nacie to; nanle to ganle none yquia zdoos to samiech to. ² Gacxe nana sca, golconley zdoos naa, ine tipse golgac, golleynie grè zha ne nacgrè to, tipse golnee, ni tipse golgac tel pa lo dziin ne gnediidz to gun to. ³ Ncuuaane gun to, guiabde to ne laa to gūna par dien zha csanwin to stib miech, zeen dien zha guianenziuu to; sinque ine ndooladz golgac, masaque goltsienie guic ne nonraa stib miech lo to. ⁴ Ib yguibde to ne lose to yquinn ncuuaane gun to, sinque golguib dien zha gun to xyudar grèraa miech.

⁵ Golsoladz ganle pa lotaa ndooladz goc Jesús len dze ne biaadted me lo guidzliu, scaquegaa nasca ndooladz golgac. ⁶ Sac tel me:

Niicle ne Dios nac me,
per led mincod niab me nrieed me lo guielndzon ne no me,
⁷ sinque grèse zigne nac me, laa me psana tib lad,
laa me goc zig tib ngundziin win,
biaad me gol me lo guidzliu rii goc me miech.

Nacle me miech,
⁸ ni bii psanwin me me lo miech,
haxta bdeed me diidz pquiaa zho me lo cruz,
zig run zho cho grè zha yozh.

⁹ Mincoxce waa, psanglaaraa Dios me,
biaan me men ne mazdraa non, men ne mazdraa nroob;

¹⁰ zeena zeene laa me gaquiet,
grèse zha ne no gbaa, grèse zha ne no lo guidzliu,
ni grèse zha ne no nèz len guidzliu, laa zho yquitsgzhib,

¹¹ ni grèse zho laa zho cueero, guiab zho ganle ne nli me nac men ne rnabey.
Ga laa zho cxobnen ganle, zha men nroob-taa nac Dios, men ne nac Pxoz me.

Zha ne nac biini lo guidzliu rii

¹² Bets, bzian, ne nligaa rleyenie naa to. Laa naa rnab lo to (zigne bioxco to bin to xtudz naa zeene blèz naa lo to i, scaquegaa niina niicle ne zit zo naa, golgon mine rne naa nu), ib gdeete to diidz guiab to ladz-nia dol stib, niina ne laa Dios psilaale to; golguien tsieniewguite guic to. ¹³ Benque Dioszhal rsiaab guic to rquiabladz to gun to mine racladz me, ni scagaa me racnien to rrieelo run tow.

¹⁴ Ni ncuuaane rieguial to gun to, ine nguieel golgac golgūna, peet glisquide to, ni niicle tilidiidzdgaa to; ¹⁵ zeena tsod pe nacne cho glisqui guiab zho laa to pe falt, pe dol ne quiaayun. Gollu ganle nli xpèedle Dios nac to; zaacse golban, niicle ne ladaque grè

miech ntseeb, miech ncow ne ndxie lo guidzliu rii no to. Golgac zig tib biini lo zho, zigne rziini mel gbaa lo ncow ne nac guieel. ¹⁶ Ib csaande to Xtiidz Ndzon Jesús, diidz ne rdeed guielmban, lèew golconie guic to. Sca golgac, zeena gal dze ne laa Jesús guiaad stib, per nli gley naa gan naa led zhlèd brie naa bial naa, bialseed naa to. ¹⁷ Zig nac niina, tel niaca mine no gded naa xquielmban naa gaca zig tib gon, parne dib zdooraa to gliladz to Dios, haxta zley naa gded naa xquielmban naa; sac racladz naa ye to yгаа guielbley. ¹⁸ ¡Golley sca! Zigne no guielbley rii zdoos naa, scaquegaa to golco nley zdoos to, zeena grè ne gley.

Timoté ni Epafrodit

¹⁹ Telne gneedz men ndzon ne rnabey ne diidz, racladz naa cxeelniob naa Timoté guiaadwi dien zha no to, zeena haxta stib-gac zdoos naa zeene laa Timoté glansonie diidz lo naa. ²⁰ Me cxel naa, sac giend stib zha ne zienie guic zig zienie guic naa, tel led med; sac tel me nonie to guic me. ²¹ Grèraa zho, ncuuaane yquinn lo zho rioxco zho, laa ne tsoxco zho mine nac xtsiinj Jesús. ²² Laa Timoté, led nanle to ganle zha ndzinli nac me, tel niina ine tib mèed nac me lo naa, nroob yudar ne quiaayun me noseed no miech Xtiidz Ndzon Jesús. ²³ Ible laa guic naa no cxel naa me lo to i, loxaque gacnase naa dien zha csan wxtis rii xcuent naa nu. ²⁴ Ni ye naa nend prontaque guialso naa i dien yo to, sac rien naa ible zneedz Dios diidz guial naa.

²⁵⁻²⁶ Ni rgobey naa nonguielaquew cxel naa bets ne Epafrodit guiaad me nèz qui, sac laa me rbanle to, ni no me zhag bin me laa to gocnan ne laa me bzhaacné. Nli laa to pxeel me lo naa nu, ni blactagaa noyun me xyudar naa ne znu mban nodeed naa, blactaa noyacnie me naa lo dziin ne nodziyun no. ²⁷ Ni nligaa bzhaacné me, nzhoos goc me zootle laa me nietle; per pquia zdoos Dios me ni pquiaagaa zdoos Dios naa peet god me, sac gon nole naa guielne, ni tel pe niacaque me mazdraa niac nroob xquielne naa. ²⁸ Min co nagon laa naa cxelgash me, zeena gley to gan to lo me stib, ni scagaa niicle naaw zley naa. ²⁹ Golley sca gon golcaania me, golguien ganle bets to nac me, bets new grè ne ne nac ne zha ne ngab lo Dios; ni grèragaa zha ne nac zig nac me, golleynie zho. ³⁰ Golgan ganle, tel me haxta bdedlaa me niet me nu niina ne biaadgun me xtsiin Jesús; per ib pquiad zdoos me me, bleeladz me xquielmban me biaadgun me xyudar naa, porne brieelod niaad-zhal to.

3

Ncuuaane mazdraa non

¹ Bets, bzian, golley ne laa to ngab lo Jesús meñ ndzon ne rnabey. Miñe ziesole naa diidz lo to, guieete naa zneque naaw stib, sac ncuuañe yquingaa lo tow: ² ¡b cxende to lo grè mècw dox qui! Grè miech ndzinlid ne squi quianzè, racladz zho tsojaa zha bgui bey, sac rzac zho zha ne sca tso bey, ga rlu xnèzle Dios no zho. ³ Sangue ne, ndionle ne zha nac diidzli, zha ne rleynie Dios zigne rsaab Espíritu Sant guic zho, ni dib zdoo zho run zhow, zha co nac zha ne nlipaa no xnèz me. Ne ne nac ne zha ne no xnèz me, Jesús nac meñ ne rdziunnon ne, sac ndion ne por me laa Dios ycaania ne; rnalod ne grè ncuuañe laglaase, ⁴ sac telne scaw; zig nac naa pe zhistaa ncuuañe dzigo zrieelo gnalo naa. Tel no zha ne rzac por ncuuañe been zho miñ co laa Dios csilaa zho; tel scaw, nroobraa ncuuañe ziyun naa lo zho: ⁵ Xon ngbidz raap naa laa naa birole bey co, zha Israel nac naa, lo xtií Benjamín zial naa, merpaa zha Israel nac naa; sac niicle pxoz naaw, niicle xníaa naaw zha Israel nac me. Niicle xleygaa zha Israela, nroob pseed naaw, zha farisé goc naa; ⁶ bleyniedox naa grè miñe zienal zha Israel, gacxe waa pquianañ naa grè miech ne no xnèz Jesús; zig nac miñe raquiet lo ley, grèsew beñ naaw zigne naca, ib biod dze ne cho zha pe nlisqui lo naa.

⁷ Lèe grè ncuuañ co rnalo naa len dze co, sangue niina Jesús rnalo naa, grèse ncuuañ co laaw psañle naa tib lad. ⁸ Ni led loxaque psandse naaw tiblad, sinque grèsew peet nondraaw lo naa, miñe non lo naa niina nacne beenbey naa cho nac Jesús, meñ ndzon ne rnabey naa. Niina ne laa naa runbey me, grèse ncuuañ co rzaac naaw zig rzac ne grè pe guizh beed, sac laa naa racladz gbigraa naa lo me, ni gacniera naa me. ⁹ Zanañdraa naa gun naa miñe rnabey ley par guiaañmbe naa lo dol, sinque laa naa zanañ dib zdoo naa gliladz naa cho nac Jesús; sac zha ne dib zdoo rnalo me, sanmbe Dios zho lo dol. ¹⁰ Racladz naa guienraa naa zha nac Jesús, ni gaap naa poder ne pquini Dios zeene blische me me len baa, ye naa teed grè mine bded me, ni cueeladz naa xquielmban naa zigne bleeladz me xquielmban me; ¹¹ ni scagaa, nanpaa naa ye naa grieeban gal dze ne guiadbeeban me grè zha ne no xnèz me.

Stsèe Jesús xcuerp zha ne ngab lo me

¹² Gnid naa togo laa naa benle gan, nasi laa naa nacle zigne racladz Jesús gac naa; led scada, laa naa bii noxcow, sac nanpaa naa zac naa zigne no guic me gac naa zeene psilaa me naa. ¹³ Bets, bzian, gard gun naa gan; per xco co no naa; grèse ncuuañe bded laaw biaanladzle naa, laa guic naa zienie ncuuañe naraa ziaad. ¹⁴ Masaque rzaac naa niina zig rzac zha ne rie prueb lo corr, rded

naa fuerz gdziñ naa zaatne gneedz Dios zhipremio naa, guielnzaac ne rbedz Dios ne ygaa ne zeene laa ne riladz Jesús.

¹⁵ Ni ib znu none tsonie guic grè zha ne nlipaa dziiis zo lo Xtiiid Dios; telne nogaa bla zha ne rzac led scada, per Dios gdeed guielbiini lo zho guien zho ganle zha naca. ¹⁶ Ni negaa, grè miñe rienle ne zha nac, none gban new.

¹⁷ Bets, bzian, golwi ganle zha mban naa, ni zha mbangaa grè zha ne zienal miñe blu no lo to grè to; dzigo sca golban. ¹⁸ Sac gon nzian zha ne nacgrè to i (blactaale zizet naa zho lo to, ni niina haxta roon naa rzet naa zho stib), laa zho mban zigne racladzttaa zho, rièe zho ron zho pe nac gut Jesús lo cruz; ¹⁹ ni nèz ne nitlo zho ga zie zho. Laa ne tsienal zho miñe rnabey Dios, laa zho zienal grè ncuuañe gdeed guixt zdoo zho, ncuuañe gdeed guixt xcuerp zho. Loxaque grè ncuuañe mbee guielto zienal zho, per zha rlozhd gleynie zhow; niapse grè ncuuañ lo guidzliu rii nonie guic zho. ²⁰ Sangue ne, laa ne zionañ ncuuañe ygaa ne gbaa, sac gbaa nac zaatne ngab ne, ni laa ne quiambi-aaz quiet Jesús gbaa guiaad me stib (me nac meñ ne psilaa miech lo dol, me nac meñ ndzon ne rnabey); ²¹ zeena ctsèe me xcuerp beñ wiich ne nu, gaca zig nac xcuerp ndzon me. Ni ib zun mew, sac nroob poder ne rap me rnabey me grètaa ncuuañe no.

4

Rnab Pabl nley gac zha Filip

¹ Bets, bzian, ne nlipaa gon rleynie naa to, haxta rzaac naa tebaa laa naa ranle lo to; to nac xquielbley naa, to nac zig tib premio lo naa por grètaa xtsiin Jesús miñe ben naa lo to. Laa naa rso diidz lo to, tibaque squi dziiis golso, ib csaande to zhiwseed Jesús.

² Rnab naa lo bzian ne Evodia, ni lo bzian ne Sintique glèèlsadraa zho, none tipse gnee zho; sac gon bel zho, xnèz Dios no zho grop zho. ³ Ni luu gon bets, ne nac luu zha ne tibaque quiayacnie naa lo dziin ne quiazziun ne, laa naa rnab lo luu bnee lo grop wnaa qui gneewen zho stib, sac gon ye zho blactaa miñe bded zho zeene bzènal zho zhits naa biotiiz no Xtiiid Jesús, ni zeene güeynalгаа zho zhits Clement, ni zla zha ne rdziuunzga no dziin. Laa lè zho zhooble len libr ne quia lè grèse miech ne bgaale guielmban ne gdziñdraa dze lozh.

⁴ ¡Golley sca, tibaque golley! ¡Golgan ganle lo Jesús ngab to! Ni rneque naaw stib: ¡Golley! ⁵ Golguien zaacse golbannie grèse samiech to, zeena haxta gzeèb diidz ganle ne nli miech ndzinli, miech ndooladz nac to. ¡Golguien ganle, ile ziaad meñ ndzon ne rnabey ne!

⁶ Tel pe nac grë ncuuaane quiaded to, tsoede to zhgab, gdziebde to, sinque golzodiidznie Dios, golsan grësew ladznia me; per led loxaque gnabde to, sinque golsoladz goldeed xquizh lo me. ⁷ Ni zeene sca csañ to grë xli-aadz to ladznia me, haxta tibililadz guiaañ zdoos to, peet dzeb tsoniedraa zdoos to, peet zhgab tsoniedraa guic to, masaque Jesús nac men ne nacnie to; grëraa miech ib guiend zho zha nac ne scataa tibililadz rac to.

⁸ Bets, bzian, nu ne laa naa csiaalle guits rii laa naa rnab lo to, min rii golconie guic to: niapse mine nac diidzli, niapse grë ncuuaane nonguiel gac, niapse grë ncuuaane rac zigne nac diidzli, niapse grë ncuuaane mbe, niapse grë ncuuaane gleynie miech, niapse grë ncuuaane gley miech gon zho, niapse grë ncuuaane yquiiñ, niapse grë ncuuaane gzee zdoos miech ni gleynie zho.

Grë min rii golconie guic to, ni lëew goltsoxco gun to.

⁹ Ni golguien gon, grë mine pseed naa to, mine psan naa diidz lo to gun to, grë mine bin to bne naa lo to, mine gon to ben naa, grë min co goltsenal; zeena scagaa zacnie Dios to ib peet zhgab ctsebdraa to.

Gon ne bdeed zha Filip

¹⁰ Ne nlipaa rded naa xquizh lo men ndzon ne rnabey ne, ni rley naa ne laa to pxeel grë ncuuaane yquiiñ naa stib. Nan naa ne led biaanladzde to naa, sac tibaque noxco to dien zha gun to xyudar naa; sinque bdeedniobda diidz. ¹¹ Rley naa ne laa to psoladz naa, maase niicle nodpaa naa zhgab co dien pa griepe yquiiñ naa, sac pseedle naa peet zienied guic naa niicle tel zhataa nodeed naa. ¹² Nan naa zha nac guielprob, ni nanquegaa naa zha nac zeene quianie ne nroob ncuuaane yquiiñ ne. Pseedle naa rzac zdoos naa mine nodeedtaa naa, niicle zeene biodzë zdoos naaw, zeene rcaabedzгаа naaw; niicle zeene nroob ncuuaane yquiiñ naa no, zeene peet guiendгаа. ¹³ Grësew rrieelo naa, sacne nacnie Jesús naa, me rneedz xfuers naa! ¹⁴ Per wen ga been to, pxeel to ncuuaane pquiiñ naa lëëtaque len dze ne peet guiend lo naa.

¹⁵ Zeene brie naa nëz xtan zha Macedon i, len dze ne wriiñ psilo noseed naa miech Xtiidz Ndzon Jesús ga, tosaque nac zha ne been xyudar naa, been lo to gon pxeel to lo naa, porne rleynie to dziin rii. ¹⁶ Scasaque len dze ne no naa Tesalónica, blalaa vueltpxeel to pe pquiiñ naa.

¹⁷ Guiabde to togo bod ne dien zha ygadraa miech lo naa gane rzetpaa naaw; lëda, sinque rley naa ne squi rala zdoos to rgad to, sac squi nroobraa guielnzaac ne

yгаа to. ¹⁸ Tel na gon, grële ncuuaane yquiiñ naa no, haxta nrooblew nu. Ni ne pxeelaque to Epafrodit biaadsan stib nëza, haxta bdeedsole goclow lo naa nu. Grëtaa ncuuaane bgad to lo naa, rrieequia naca zig tib gon ne bdeed to lo Dios, zig tib gon ndzon ne sac zdoos me ycaania me. ¹⁹ Scagaa niina nagon, grëse ncuuaane yquiiñtaa to, Dios men ndzon ne rliladz ne, me gneedza lo to, porne nligaa dib zdoos to rliladz to Jesús; sac gon, nroobdoos grë guielndzon, grë guielnzaac ne rap Dios. ²⁰ Jëë xDios ne ga, me nac Pxoos ne grëse ne! jGotsaa dziuunnon ne me sca, mesi gdzind dze ne nitlo xquielndzon me! Sca rieguiała.

²¹ Goldeed tib zhibdiuzh naa lo grëse zha ne no xnëz Jesús i, grë zha ne squi noxco mban zigne racladz Dios. Scagaa golcaania zhibdiuzh grë zha bets ne, zha ne no lo naa nu. ²² Golcaania zhibdiuzh grëse zha ne no nu, zha ne rliladz Jesús; haxta ye grë zha ne rquia dziin lo rey Roma nu, laa zho rxeel zhibdiuzh zho lo to.

²³ Jesús, men ndzon ne rnabey ne; me noxco to, me nonie grë zhizhgab to. jMe gunlay to grëse to!

Pabl

GUITS NE PXEEL PABL LO ZHA COLÓS

jDiuzh to grëse to!

¹ Naa nac Pabl, tib zha ne pxeel Jesús nonee Xtiidz me lo miech, sac ible Dios bnabey ne sca gaca. ² Grop no Timoté laa no rxeel guits rii Colós i, laaw ziaad lo to grëse to ne nac to zha ne noxco mban zigne racladz Dios, ni dib zdoo to rleynie to Jesús.

Dios men ne nac Pxoze, me glu ganle pa lotaa noxco me to, zeena peet dzeb tsonied guic to.

³ Gzobtaa zeene rzodiidznie no Dios, Pxoze Jesús men ndzon ne rnabey ne, rnab no gacnieu me to, ni rdeed no xquizh lo me ne squitaa rneedz me guielbiini lo to; ⁴ sac zidzion no ne nliipaa dib zdoo to riladz to cho nac Jesús, ni rleynie to grëse zha ne no xnéz Dios. ⁵ Min co nonie guic to, sac desde dze ne psilo pquiaadiag to Xtiidz Ndzon Jesús mine nac diidzli, laa to gocnan ganle no tib guielnzaac nroob ne yгаа to gbaa.

⁶ Golgacnan sca ganle, Xtiidz Ndzon Jesús, wseed ne riladz to, nzianraa zaatne quiagaaza, ni lëw notsëe lo xquielmban miech, zigne bdzëeque lo xquielmban to zeene pquiaadiag tow, laa to bien ganle ne nligaa pa lotaa noxco Dios to. ⁷ Lëe min co ga biadseed Epafra to; tib men ne nziuu lo no, ye me rquiagza no dziin; ranaxe to ganle zha rioxcotaa me xtsiin Jesús. ⁸ Me bzodiidz lo no ne squitaa rneedz Espiritu Sant guielbiini lo to, rleynie to samiech to.

⁹ Gane zeene bdzion no squitaa ndzinli mban to, tibaque laa no quianab lo Dios quixbiiniraa Espiritu Sant guic to, guien to zhapaa nac grë mine racladz Dios gun to; ¹⁰ zeena grieelo gban to zigne no gban zha ne no xnéz Jesús, tibaque gun to ncuuaane conley to zdoo me; dzigosí grëse ncuuaane ndzinli ne gun to, zlupaa ncuuaane rquiina, ni zioquicraa to zha nac Dios. ¹¹ Ni rnab no lo me, niapse por poder ne rap me gunndip me zdoo to, gunndip me guic to; zeena nicle tel pe nactaa guielne ne gan to, ib peet tsienied guic to, ib sacxuude to, ¹² ine gley to gdeed to xquizh lo me nac me Pxoze, ne squi laa me bzooblo to, psanmbe me to; zeena gdziin to lo biini zaatne yгаа to mine no gdeed me lo grëse miech ne no xnéz me. ¹³ Sac me nac men ne blee ne lадznia mendox, ma ne rnabey lo guielcow, psan me ne ladznia Xpëed me Jesús, men ne rleynie me ga. ¹⁴ Jesús nac men ne bdiizh grëse xtol ne zeene sca gut me lo cruz, me nac men ne psanmbe me ne nöz lo Dios.

Grë ncuuaane been Xpëed Dios

¹⁵ Niicle no gard dzian ne Dios, per laa Xpëed me bиаad bиаadlu lo ne ganle zha nac me, sac zigne nacse me scaque nac Xpëed me; ni ladznia Xpëed me no grëtaa ncuuaane no. ¹⁶ Zeene bnabey me tsaa grëtaa ncuuaane no gbaa, grëtaa ncuuaane no lo guidzliu; Xpëed me bzaaw grësew, zigtaa grë ncuuaane rdzian new, zigtagaa grë ncuuaane grieelod dzian new, zig nac grë "me mban" ne rap guielrnabey, rap poder. Jesús bzaaw grësew, ni ible par me bиаaw. ¹⁷ Nole Jesús zeene bиаa grë ncuuaan co, me naaza, gane tib tiba nowew zaatne rieguiaa. ¹⁸ Ni grëse zha ne no xnéz me, me nac men nroob ne rnabey lo zho; grëse zho laa zho nac zig tib cuerp, dzigo me nac guic cuerp co. Me nac men ne nole glo, ni me nac men ne glopaa brieeban; zeena glu ganle me nac men ne mazdraa nroob, me nac men ne mazdraa non; ¹⁹ sac ib Dios bnabey zigne nacse Dios scaque nac me.

²⁰ Niapse por Jesús grëse ncuuaane no zigtaa lo guidzliuw, zigtagaa gbaaw, laaw bиаanwen lo Dios, ni lëe min co goc zeene sca bzhiiee xchen Jesús lo cruz. ²¹ Zig nac to, glo zit zo to lo Dios, rrieequia rlëenie to me, sac niapse grë ncuuaane ndzinlid güeynie guic to been to; ²² sangue niina laa Jesús psanwenle to lo me, zeene sca goc me miech pquiaa zho me lo cruz. Ni laa me psanwen to, zeena ine mbele to, ni tib dol rapdraa to gdziin to zaatne no me. ²³ Per parne grieelo gdziin to ga, none tiblique golgun guic to, goltsienal Xtiidz Ndzon me mine riladz to, ib guiaanladzde to guielnzaac ne no yгаа to, zigne raquiet lo Diidz Ndzon ne pquiaadiag to ga. Lëe Diidz Ndzon co quiagaaz dipse lo guidzliu niina, ni ye naa nac tib zha ne quia quianeew lo miech.

Dios bzo Pabl tsoxco me zha ne ngab lo Dios

²⁴ Grë guielne ne noyan naa porne rleynie naa to, rley naa noyan naaw. Laa Jesús gonle grë guielne co zeene psilaa me grë zha ne ngab lo me niina, laa niina ye naa noyan spalala, loxaque ne noseed naa zho Xtiidz Ndzon me, ne nac zho zig xcuerp me. ²⁵ Ni ible Diosgaa bzo naa noyan naa dziin lo grë miech ne no xnéz me, zig nac to, gocien me to bzo me naa bne naa grëse zigne nac Xtiidz Ndzon me lo to. ²⁶ Diidz ndzon ne gocnand grëtaa zha gol ne ziyaadmaban wlae ne bre guidzliu, laaw gocnan grë zha ne no xnéz me niina. ²⁷ Ible zha gocladz me gacnan grëtaa guielnzaac ne yгаа zho zeene laa zho gacnan diidz co; haxta to ne nac to zha zit. Ni lëe diidz ndzon co nu: Zha ne nacie Jesús, me gdziinie zho zaatne nac lo guielndzon ne no me.

²⁸ Gacxe waa, zaatne ziotaa no, Jesús nac men ne rzeet no lo miech, ni megaa rneedz

guielbiini lo no rseed no zho, rso no diidz lo zho; zeena gac zho tib miech ndzinli, zigne no gac zha ne ngab lo me. ²⁹ Min co nac dziin ne noxco naa, per led dziin ligada, gane dib nacse guielndaan, dib nacse fuerz ne rneedz me lo naa, noxco naa noyuu naaw.

2

¹ Racladz naa gacnan to ganle ne nlipaa tibaque no to guic naa, zigtaa tow, zigtagaa zha Laodicew, ni greragaa zha ne gard ganlo naaw. ² Rnab naa lo Dios ib guiaand zdo to, tipse gac to ine gleynie to grè zha ne nacgrè to, lozhraa tsaa biini xquielrien to guien to ganle zhapaa nac Jesús, sac gon naraa bdeed Dios diidz gunbey miech me. ³ Me nac men ne rap grèse guielrac, grèse guielbiini nroob cheu Dios. ⁴ Laa naa rne min rii lo to, zeena choot yquidiede to, niicle paraa ndzielguic rzè xtiidz zho. ⁵ Niicle ne nli zozhaald naa lo to i, per zhiespíritu naa nacie naa to, ni rley naa ran naa squi zaacse mban to, tiblrique nac guic to dib zdo to riladz to Jesús.

Tib guielmban cub

⁶ Nana sca, zigne bzèeb to xnèz Jesús gnabey me to, scagaa goltsenal mine rnabey me, ⁷ masaque ladzna me golsan xquielmban to, me gofnalo, gollu ganle ne nli dib zdo to riladz to me, zigne pseed no to, ni tibaque goldeed xquizh lo Dios.

⁸ Nsin golso: ib gac-wete to lo grè zha ne guiaadnie wseed lo guidzliu rii, grè godiidz ne paat rquiind, sac laa zho gacladz yquidie zho to. Tej zha, ib rzeete zho lo miech dien cho nac Jesús, sinque lej grè ncuuane run grè xmengol zho, grè wseed ne rleynie grè miech lo guidzliu, min co rseed zho miech. ⁹ Sangue ne, ndion ne ganle zigne nac Dios scapaa nac Jesús. ¹⁰ Gacxe waa, to ne nacie to Jesús, peet rquiindraa to. Me nac men ne rnabey lo grèse zha ne rap poder, lo grèse zha ne rnabey.

¹¹ Zeene bnalo to Jesús rrieequia hor co bio to tib bey, per nacda zig nac bey ne rio xcuerp zha bgui, sinque tib bey ne rlu ne laa to psaanle grè dol ne been to glo; ni Jesús nac men ne bloo to bey co. ¹² Ni zeene brobnis to, rrieequia bguetsnie to me ga ni brieiebannie to me, sacne bliladz to poder ro ne rap Dios men ne blische me lej baa. ¹³ Glo zha gutle nac to nèz lo Dios, lala por grètaa xtol to ni porne gard co Jesús to bey co; laa zeene bleeban Dios Jesús, men ne pxeel me biaadsilaa ne lo dol, laa to wbiire bgaa guielmban stib. ¹⁴ Ptiche Dios grèse mine riogual ne, sac bdiits ne mine nac xley me; grèse dol co pcaadz me Jesús zeene laa Jesús pquia lo cruz. ¹⁵ Ni zeene sca bded Jesús, ga psiaablo me mendox; grè me yozh ne rap poder, me ne rap guielrnabey, psan

me ma guielto; sac gasi laa me blu lo miech ganle ne nli ladznie naa lo ma.

Grè wseed ne paat rquiind

¹⁶ Gacxe waa, ib guncaste to zha ne rlisqui dien pe nacne pe row to, pe nacne pe rie to, pe nacne runde to grè zhilni zha Israel, runndade to dze ne rquia mèe yeen, runndade to dze ne rdziiladz zha Israel lo dziin. ¹⁷ Grè min co bioxco miech zeene gard guiaad Jesús, per lega gocse ncuuan co zig tib zhimlè guielbiini ne biaadnie Jesús. ¹⁸ Ib ghiladzde to xtiidz grè zha ne squi racladz csozit to lo Dios, niicle squitaa rquiaalo zho ndooladz rac zho, squitaa rleynie zho grè anjl, rnee zho goon dieen pe ncuuane gbaa ne zielulo lo zho, lèèque lèè zho rlozhd gunniats zho por grè zhiwseed zho. ¹⁹ Led yed zho ngab lo Jesús, men ne rnabey lo ne grèse ne ne nac ne zha ne ngab lo me. Tej ne, me racnien ne, tipse noyuu me ne, laa ne noyabiiniraa zigne racladz Dios.

²⁰ Zeene sca gut Jesús, gataa bnitlo me grètaa mine nac to glo, gane niina ngadoodraa to lo grè ncuuane zienal grèraa miech guidzliu. ¿Pe nac dzigo ne bii zienal to grè min co? ²¹ Zig nac grè mine rnabey zho to, rnee zho: “Nod gon yquiin to ncuuan rii, nod gow to min rii, gacd ygaal to ncuuan rii.” ²² Ncuuane tib rded nac grè ncuuane qui, zig nac guielwagw led ncuuane gdiid ga, grèse wseed qui miechse bleebeya. ²³ Parga nli na zootle nixbiini nac grè wseed co, sac rioxco zho dien zha tsiegan zho grè anjl, rac ndooladz zho lo miech, ni rsacsi zho xcuerp zho; per rriielod grè ncuuan co ct-sèew xpensar zho, zdo zho, parne gnabey zho xcuerp zho.

3

¹ Golguien ganle, stible guielmban rap to niina, lèè guielmban co bgaa to zeene brieeban Jesús; gacxe waa, goltsoxco ygaal to grè guielnzaac ne no bgaa, zaadne zob Jesús cue Dios nèz derech. ² Grè guielnzaac ne no bgaa min co golconie guic to, led grèd ncuuane no lo guidzliu rii; ³ sac gon, rrieequia gutle to lo grè ncuuane no lo guidzliu rii, laa to mbanniele Jesús, zigne racladz Dios. ⁴ Laa ne rdziaap tib guielmban cub niina, sacne nacie ne Jesús; gal dze ne laa me guiaad stib, laa ne no gdzin lo me gban ne zaatne nac lo xquielndzon me.

Zha gban zha ne riladz Jesús

⁵ Gacxe nana sca, golsaan grètaa guielntseeb ne run miech lo guidzliu rii: tsoniede to zha ne led tsieelde to, gunde to grè ncuuane mbeeguelto, gdeete to diidz gnabey xcuerp to to, gunde to ncuuane ndzinlid ne racladz to, ni gacblède to lo dimi (sac tej scaw, dzigo dimi rsan to xlugar Dios).

⁶ Grè dol rii run grè zha ne néd gon xtiidz Dios, lozh ga lèè mine tsieguial zho laa zho ygaa lo guielzi ne csaab Dios. ⁷ Zig nac to, grè min co been to glo; ⁸ sangue niina, none csaan tow, ni lalnu:

glèèniendraa to samiech to,
sobzhiandraa to,
gundraa to guielntseeb,
gneenèdraa to samiech to,
gneedraa to diidzguidz,

⁹ yquidiedraa to samiech to.

Sac gon, nacdraa to zigne nac to glo, laa to brieele lo grètaa mine been to. ¹⁰ Stible nac lo xquielmban to niina: tib miech cube nac to, ni laa to bii nodzèè haxta que ne gac to zigne racladz Dios men ne psan miech, zeena scagaa lozh gunbey to zha nac me. ¹¹ Zha ne bgaale guielmban cub rii, led yedraa zho cue dien cho zha nac zha Israel, dien cho zhagaa nac zha zit; dien cho no bey, dien cho nodgaaw; dien cho ziaad guiedz nroob, dien cho ziaadgaa guiedz win; dien cho rac, cho gacdgaa; dien cho run xtsiin ben, dien chogaa nac zha rnabey. Mine rquinnraa niina, nagne grèse zho guien ganle Jesús nac men ne mazdraa non, me none gnalo zho.

¹² Golgan ganle, zha nquialadztaa Dios to, ib laa me ble to gac to miech ne ygab xnèz me. Zaacse sca golban, ne nlipaa dib zdoo to: golquia zdoo samiech to,

niowse golgac lo samiech to,
ndooladz golgac lo samiech to,
nguudzladz golgac lo samiech to,
guieedniede to samiech to.

¹³ Guieedniede to samiech to, ni zeene cho zha run pe tib falt lo to, golgun zho perdon. Golguien ganle zha been Dios to perdon; scaque to, none gun to samiech to perdon. ¹⁴ Ni mine mazdraa none tsoxco to, golleynie zha ne nacgrè to zigne racladz Dios, zeena tipse gac to; ni scagaa gleynie to grèraa samiech to. ¹⁵ Jesús nac men ne ctiche grètaa ncuuaane ndzinlid ne no zdoo to, zeena niowse gbannie to samiech to. Lèè tib guielnzaac co no ygaa to ne laa Dios bredz to, ni scagaa none gban to, zeena tipse gac to grè to. Golsoladz goldeed xquizh lo me.

¹⁶ Niapse mine nac Xtiidz Jesús golconie guic to, golco zdoo to. Golquin grè guielbiini ne rneedz me lo to, golseed grè zha ne nacgrè to, ni zha ne rxin, golnee lo zho zaacse gac zho. Dib zdoo to goldeed xquizh lo Dios por grètaa mine run me, ine golgoolnie me grè salm, golgoolnie me grè cant ne rdzioolnie ne me. ¹⁷ Ncuuaane guntaa to, niicle zeene gnee tow, zeene gungaa to tib dziina, golguna zigne rdziladz Jesús, men ne rnabey ne; ni tibaque goldeed xquizh lo Dios men ne nac Pxo to, niina ne laa to ngable lo Jesús.

¹⁸ To ne nac to men wnaa ne ptsieelniale, golgon xtiidz tsiel to, sac ible sca nonguiel gban miech ne no xnèz Jesús.

¹⁹ To ne nac to men bgui ne ptsieelniale, golleynie tsiel to; gacnchogde to lo me.

²⁰ To ne nac to mèèd, golgon mine rnee pxoz to, mine rnee xniaa to, sac sca rdziladz Dios.

²¹ Togaa ne nac to men nguzan, gunde to ncuuaane gunlèè to xpèèd to, zeena csande to zdoo zho.

²² To ne nac to zha ne lega run xtsiin ben lo guidzliu rii, golgun grèse mine rnabey zho to; gunde to zeene zose zho lo to dzigose yquiaalo to gun to dziin, zeena guiannziiu to lo zho; sinque dib zdoo to golgun xtsiin zho, golguien ganle Dios zobwi ran me pe run to.

²³ Grèse dziin ne gun to, ine nguieel golgac golguna, zig nac zeene xtsiinzhaz Dios noyun to. ²⁴ Benque nanle to, zgaa to mine gdeed Dios lo grè zha ne ngab lo me, telne gon to diidz; sac gon Jesús nac men ne nlipaa rnabey to, ni lo me quia to dziin. ²⁵ Golgon diidz sca, sac zha ne gonda, ib tedsod zdeed Jesús mine tsieguial zho; sac gon, tel me led yed lo me ncuee miech.

4

¹ Togaa ne nac to zha ne quia miech xtsiin, zaacse golgac lo zho, csacside to zho. Golsoladz ganle, ye to tib ngundziin nac to lo men rnabey ne zob gbaa, ni me zobwi ganle pe run to.

Gnab zho gacnien Dios Pabl

² Bets, bzian, tel petaa rzac to tibaque golzodiidznie Dios, nsin golso, goldeed xquizh lo me. ³ Golnab lo me gacnien me no, grieelo ziaab no zaatne guioseed no miech Xtiidz Ndzon Jesús, gnee no lo zho ganle cho nac Jesús men ne beenbeyd miech padzeela; sac zig nac niina por min co znu niogyu naa nu. ⁴ Golnab lo me gneedzraa me guielbiini lo naa, zeene cseed naa miech xtiidz me, guien zho mine rne naa; gun naa dziin co zigne no gun naaw.

⁵ Golquien guielbiini ne rneedz Dios lo to, zeena guien to zha gnee to, zha gac to lo zha ne gard gliladz Xtiidz Jesús; ni zeene sca rdeeda diidz sodiidznie to zho, golnee lo zho ganle zha nac Xtiidz me. ⁶ Golguien tib godiidz ndzinli, tib godiidz niowse, min co golzodiidznie zho, ni none guien to zha ctsire to lo xtiidz zho tib tib zho.

⁷ Laa bets ne Tic guiaad i, me guiaadnie didz lo to ganle zha no naa nu. Rleynie no me, tibaque laa me noxco quiazdiungza no me xtsiin men ndzon ne rnabey ne. ⁸ Ga nagon laa naa rxel me, me gnè lo to ganle zha no no nèz rii, ni gnee me lo to zeena choobladz me zdoo to. ⁹ Ye menladz to Onésimo guiaadgrop me. Rleynie no Onésimo, ye me tibaque

noxco me xtsiin men ndzon ne rnabey ne. Grop zho guiaadnie diidz i ganle zha nac grë ncuaane quiayac nëz rii.

¹⁰ Golcaania zhibdiuzh Ristarc, men ne nioogyunie naa nu, zhibdiuzh Marcw bet-syeen Bernabé (laa naa nile lo to ganle, telne laa Marcw guiaadgan to i, niowse golcuëzlo me); ¹¹ ni zhibdiuzh Jesús, tib men ne rneeque zho Just. Lo grë zha Israel ne rililadz Jesús, lëese gza zha rii nac zha ne quiayun xyudar naa quiaseed no miech zha sëëb zho xnëz Dios, ni blactaa zichoobladz zho zdoo naa.

¹² Golcaania zhibdiuzh menladz to Epafir, ye me quiayun xtsiin Jesús nëz rii; tibaque rzodiidznie me Dios rnab me dziits so to lo Xtuidz Jesús, ni tiblrique gac guic to tsoxco to gban to zigne rnabey Dios. ¹³ Nanpaa naa ganle pa lotaa nonie to guic me, grë to zha Laodicé ni zha Hierápolis.

¹⁴ Golcaania zhibdiuzh Demas ne, ni zhibdiuzh Luc men ne run rmed, lëe stib men ne nziuu lo no nu.

¹⁵ Goldeed tib zhibdiuzh no lo grë zha ne no guiedz Laodicé, zha ne nacgrë ne. Goldeed zhibdiuzh no lo zhuz Ninf, ni lo grëraa zha ne rcaalsa lidz me i, riegoolnie zho Dios.

¹⁶ Zeene gon lozh glab to lo guits rii, dzigo golxeela lo zha Laodicé, zeena ye zho glaba; ni scagaa to, gollab mine cxel naa lo zho.

¹⁷ Ni golguiab lo Arquip, tsoxco me zaacse gun me dziin ne bdeed Dios lo me i.

¹⁸ Naa nac Pabl, golgan ganle naazhal pquia tib bdiuzh rii nu rxel naa lo to. Golsoladz ganle ladzguiib no naa. Dios nac men ne gunlay to, me glu lo to ganle pa lotaa noxco me to.

Pabl

GUILTS NE GLO PXEEL PABL LO ZHA TESALÓNICA

jDiuzh to grëse to!

¹ Naa nac Pabl, gza no Silas ni Timoté, laa no rxeel guits rii Tesalónica i; laaw ziaad lo to grëse to ne nac to zha ne ngable lo Jesús, men ndzon ne rnabey, ni lo Dios men ne nac Pxoz ne.

Dios ni Jesús, me glu ganle pa lotaa noxco no to, zeena peet zhgab ctsebde to.

² Tibaque rdeed no xquizh lo Dios men ne nac Pxoz ne, squitaa rneedz me guielbiini lo to; gzobtaa zeene rzodiidznie no me rzeet no to lo me. ³ Ni zeene rzeet no to lo me, rsoladz no grëtaa dziin ne run to niina ne dib zdoos to rleyntie to me, ni zha quialëb to lo grëtaa guielnë ne noyan to, tibaque nonie guic to ne ible zdzin dze ne laa Jesús guiaad stib.

⁴ Bets, bzian, rleyniedox Dios to, ni ndion ne ganle me bzooblo to ygab to lo me. ⁵ Zeene biaad no biadseed no to Xtiidz Ndzon Jesús, znuse ptsëew lo xquielmban to, sac gocnie Espiritu Sant to bien to ganle niapse diidzli nac grë diidz ne nonee no lo to; scagaa no, gon to ganle zha mban no, ga blu ne ni diidzli nac grë mine noseed no miech. Ni golsoladz ganle zha biaadbannie no to i, bdzioxco no bdziuuñ no xyudar to, sac ne nligaa rleyntie no to.

⁶ Scagaa to, pseed to wban to zigne mban no, ni zigne wban men ndzon ne rnabey ne. Laa to pcaania xtiidz me, blozh ga, niicle nroob guielnë ne bbed to, per bneedz Espiritu Sant guielbley lo to, ib peet güeynied guic to. ⁷ Grëse zha ne rililadz Jesús nëz Macedon, nëz Acay, zeene bin zho zha mban to, yeque zho laa zho pseed mban zho zigne mban to. ⁸ Ni ne squi ndzinli mban to, nzianraa zaatne rzeet miech Xtiidz Ndzon Jesús, led loxaque gropdse lugar rii. Zaatne ziota no, zhoob diidz ne squitaa dib zdoos to rililadz to Dios, rquiiindraa ne no gzodiidza lo zho. ⁹ Zhale rzodiidz grëse zha biaad no lo to i, zha scataa niow blëzlo to no len dze co, ni zha psaan to grë zhiwseed xmengol to, grë ncuaañe nac mdio lo to, laa to bliladz men ne nacpaa Dios ne nguiamban, ni laa to zianal mine rnabey me. ¹⁰ Ni rzodiidz zho zha zientie guic to ne ible zdzin dze guiet Jesús gbaa guiaad me stib, ni quiambëz to gdzin dze co. Xpëed Dios nac Jesús, Dios bleeban me lo guielgut, ni me psilaa ne lo guielnëdox ne ziaadyob guiaad.

2

Zha güeyseed Pabl zho

¹ Bets, bzian, nanle to ganle zeene biaad no lo to i biaad-zhlëd no, brieelo pseed no to. ² Niicle ne wriin psacsi zho no guiedz Filip hor co, per laa no bii biaad ladz to i, ni niicle igaaw bioxtseebaque no, per ib bdziehd no laa no pseed to Xtiidz Ndzon Jesús; sac ndion no Dios nacnie no. ³ Ni diidzli nac mine pseed no to, choot biaate par nquidiee no to, niicle biaategaa no par dien pe niaadla no lo to. ⁴ Xtiidz Dios bnee no, me bzo no gnee no lo miech zha laa zho lo dol, ni min co nac dziin ne quiadziuuñ no. Nli nzian zha ne rlëëniew, per laa no bii rdziuuñ dziin co; sac zionald no gac mine rdziladz miech, sinque laa no zional gac mine rdziladz Dios, men ne nan ganle pe rza zdoos ne.

⁵ Gon to ganle, bneed no pe diidz niow lo to par nquidiee no to, niicle bguibdgaa no dien zha ndeeda diidz needz to dimi lo no. Dios zobwi rdziuuñ no min co. ⁶ Waltaa ib hguibd no dien zha nianon no lo miech, niicle lo tow, niicle lo stibgaa miecha. ⁷ Laa ne nlu no ganle zha rnabey nac no, sac gon Jesús pxeel no, lel ndooladz goc no lo to. Masaque zigne rleyntie men wnaa xpëdeyen me, nda nda ran me win; scadaa bleynie no to, ⁸ bio no bdzioxco no pseed no to Xtiidz Dios. Ne nlipaa bleynie no to, telne niaca mine niedzina haxta mbeeladz no no niet no por to.

⁹ Bets, bzian, rsoladzaxe to ganle ni lalnu ib psodziind no to; blactaa, dze guieel bdziuuñ no dziin, nozhal bdziniaa ncuaañe pquiiñ no len dze ne biadseed no to. ¹⁰ Dios zobwi ran me ganle zha nac lo xquielmban no, ni niicle togaaw (ne nac to zha ne ngab lo me) gon to ganle ndzinli wban no zeene biaad no i, bdziuuñ no ncuaañe mbee no diidz ro miech, sinque laa no bdziuuñ mine rdziladz Dios. ¹¹ Masaque rziaac no to zig rzac tib dad xpëed zho, blactaa pchoobladz no zdoos to, bloonley no zdoos to tib tib to; ¹² pso no diidz lo to zaacse gac to, gban to zigne no gban zha ne no xnëz Dios, men ne bredz to gdzin to lo xquielndzon me, zaatne rnabey me.

¹³ Ne nligaa rdeed no xquizh lo Dios, sac zigne biadnee no Xtiidz me lo to, laa to pcaaniaw, bien to Xtiidz me naca, nadda ncuaañe bleebey miech. Ni nligaa Xtiidz Diosa, gacxe waa zha ne rililadza zigne rzac tow niina, rzhixcuua lo xquielmban zho. ¹⁴ Per zeene laa to bililadza, laa menladz to psacsi to; bbed to zigne bbedaque grë zha Israel ne rililadz Jesús, sac tel zhaw psacsi menladz zho zho. ¹⁵ Ni lëëque zha ne psacsi zho ga, zha co bnab psacsi zho Jesús men ndzon ne rnabey, zigne beetaque zho grë zha ne pxeel Dios biadteed Xtiidz me; ni lëëque zho benxcoon no. Ncuaañe rbinladz Dios run zho, rlëënie zho grëse miech, ¹⁶ rtsidil

zho pe nacne nonee no lo grë zhazit zha laa zho lo dol. Loxaque quiayunctalraa zho xtol zho, per, iprobsaxe zho, sac guielnëdoh ne ziaadyob cxeel Dios yгаа zho!

Racladz Pabl tsiegan Pabl zho stib

¹⁷ Bets, bzian, nli gard dzianlolsa ne wlal ne wbii no i, per tibaque rsoladz no to; blactaa rnee no telpaa zha guiaaddzian no to. ¹⁸ Tel naa blactaa gocladz naa nial naa, nialgan naa to. Laa no niaadle, per ptse mendox lo no gon, pca ma xnëz no pasëe no niaad. ¹⁹ Guiabde to togo quiayaanladz no to, sac gon to rnalno no conley zdoo no gal dze ne laa Jesús guiaad stib. To glu nli bdziuun no xtsiin me, to glu ne nli rioguiual no yгаа no premio ne gneedz me. ²⁰ Ne nligaa rley no rdzian no zha mban to, haxta riats no zeene raquiet to; sac to rlu ganle ne nli xtsiin Dios nodziuun no.

3

¹⁻² Ni ne scataa tibaque nonie to guic no, dzigo mazd pxeelaque no bets ne Timoté biaad lo to i, laa no biaan guiedz Aten. (Nanaxe to ganle ye Timoté nacgza no quiadziuun no xtsiin Dios, quiaseed no miech Xtiidz Ndzon Jesús.) Laa no pxeel me biaadgan me to, biadchoobladz me zdoo to, biadnee me lo to lozh sodziits to lo Xtiidz Dios; ³ zeena niicle tel pe guielnë ne noyantaa to, ib guiaand zdoo to. Nanle to ganle grëse ne ne rliiladz ne Jesús, ib laa ne no dzian guielnë. ⁴ Led rsoladz to zeene biaad no i, bneegazh no ne ib laa ne no dzian guielnë; ni gon to ganle scase goca.

⁵ Ne nligaa tibaque bionie to guic naa, nacne mazd pxeelaque no Timoté, biaadso me dien pe bii zienal to mine nac Xtiidz Dios; sac ni naa nend pquuil mendox to biire zienal to ncuuane rnabey ma, dzigo zhlëse biadseed no to.

⁶ Laa niina ne laa Timoté blanso nu stib, blansonie me diidz, në me niowse mban to, rleynie to grë zha ne nacgrë to, dib zdoo to rliiladz to Dios. Ni në me rleynie to no, ye to racladz tebaa zha gan to lo no, zigne rziaaacute no.

⁷ Min co nagon, bets, bzian, niicle ne nroob zhgab, nroob guielnë ne nodieed no nu, haxta biaanladz no grë ncuuane co zeene gocndion no dziits zo to lo Xtiidz Dios, mine rliiladz ne. ⁸ Haxta stib goc zdoo no bdzion no squi tiblrique laa to rleynie men ndzon ne rnabey ne; ⁹ ni rdzieldraa no diidz ne gnee no gdeed no xquizh lo Dios por to. Ni ne znutaa bloomley to zdoo no, haxta Dios ran ganle pa lotaa rley no. ¹⁰ Dze, guieel, quianab no lo me gneedz me diidzbe y gbiire dzian no lo to stib; zeena lozh cseed no to grëraa mine no gacnan to lo Xtiidz me.

¹¹ Dios men ne nac Pxoze ne, ni Jesús men ndzon ne rnabey ne, me gacnien no grieelo guiaaddzian no to. ¹² Jesús gacnien to tsaaraa to biini, zeena gleynieraa to grë zha ne nacgrë to ni grëraa samiech to, zigne rleynie no to. ¹³ Ni rnab no lo me, gacnien me to tiblrique gac to lo Xtiidz me, zeena ine mbe zdoo to, ni tib dol rapde to zeene laa me gzo to lo Dios men ne nac Pxoze ne, gal dze ne laa me guiaad stib con grë zha ne nacnie me.

4

Guieľmban ne rdziladz Dios

¹ Zig zobwi Jesús men ndzon ne rnabey, laa no rso diidz lo to: zigse zie dze goltsoxcoraa gban to zigne rdziladz Dios, ² benque nanle to zhaw, sac lëe min co rnabey Jesús no biadseed no to gon to. ³ Sac gon, laa Dios racladz mbe guiaan to lo me, gunde to guieľyozh yquiangob to zha ne led tsieelde to.

⁴ Grë zha bgui, zeene laa zho gnee lo tsieel zho, none niowse ndzinli gac zho; ⁵ gund zho zigne ruw grëraa miech ne nand zha nac Xtiidz Dios; sac tel zha co, rzac zho loxaque par gdeedse guxt xcuerp zho, mincose rquin wnaa. ⁶ Niicle yquiangobde to tsieel sabgui to; sac zha ne sca run, sabgui zho ga rguitnie zho; ni dol co ible tedsod zunquizh Dios zhow. Golsoladz ganle psol no diidz rii lo to glo, ni na laa no rnequew stib. ⁷ Golguien ganle, bredzdaxe Dios ne waa parne dziuun ne grë guieľyozh, sinque laa me bredz ne gban ne zigne racladz me. ⁸ Gacxe waa, zha ne zienald wseed rii, gacnan zho ganle xtiidz Dios ga (men ne rdeed Espiritu Sant lo zha ne ngab lo me) noguiits zho, led xtiidz cholz samiech zhow.

⁹ Laa zig nac guieľwleynie, nanle to zha no gleynie to grë zha ne nacgrë to. Rquiind cso no diidz lo to dien zha gon to, sac Dioszhal pseed to zha gleynie to zigtaa zha ne nacgrë tow, zigtagaa grë samiech tow. ¹⁰ Zig nac grë zha bets ne, zha bzian ne, zha ne no xtan zha Macedon, zëeb diidz rleynie to grë zha co. Goltsoxco sca, golleynieraa samiech to.

¹¹ Ni stib mine rso no diidz lo to: niowse golbannie samiech to. Mine nac xtsiin to tib tib to, min co goltsoxco, tozhal goldziniaa ncuuane yquini to; ¹² zeena peet gunfalte lo to, ni scagaa grë zha ne gard gliladz Xtiidz Dios, haxta gzee zdoo zho gan zho zha mban to. Golsoladz ganle psol no diidz rii lo to glo.

Ib ziaad Jesús stib

¹³ Bets, bzian, nu na ganle laa naa gzodidz lo to zha gac grë zha ne ret, zha ne ngable lo Dios; zeena tsode to guielnë zig rzac grë miech ne gard guien gnalo Jesús.

¹⁴ Ne, ne dib zdoo ne rliiladz ne nli gut Jesús ni bleeban Dios me; scaquegaa none gliladz ne ible zbeeban Dios grëse zha ne

dib zdoo riladz Jesús, zeene laa Dios cxeel me guiaad me stib. ¹⁵ Golgacnan sca ganle, znu gon nac xtiidz me: Grése zha ne ngab lo me, zha ne bii zomban gal dze co (gal dze ne guiaad Jesús) tednerd zho lo grè zha ne gutle. ¹⁶ Zeene laa me guiet gbaa, redz ro ne yquia, zlu zèeb tsi tib zha ne quianabey, tsi tib anjl ne nonraa, ni tsi zhitrompet Dios; hor co laa me guiet gbaa, laa grè zha ne ngab lo me, zha ne gutle, laa zho grieeban. ¹⁷ Dzigo tipse gac zho grè zho zha ne bii zomban ga, laa zho soquia laglaa lo xcow tsiedzieelo zho me; dzigosi gdzindraa dze ne gbiche zho lo me.

¹⁸ Nana sca mine rne naa nu, golsodiidza lo grése zha ne nacgrè to; zeena conley to zdoo zho.

5

¹ Bets, bzian, nana par gni naa lo to dien pe guide te guieel guiaad me, choot ndionda. ² Golgacnan ganle, lega nacle zeene gan miech laa me ziaadle, zig nac zeene rzèeb ngbaan yu guieel, zcho dien nanpaa pa hor sèeb ngbaan? ³ Zeene laa grè miech guiab: "Nasi wen ndxie ne, peet guielxtseeb nodraa", tibaque zeene guien zho laa dze ne nitlo zho bdziñle, ni gasi grieeolodraa cho csilaa zho. Sac zig znuse rnaaz yoob men wnaa ne bdziñle dze gap xpèed; scadaa gdziñ dze co.

⁴ Sangue to, bets, bzian, nacdraa to zha ne nonziaab lo ncow, tel pa hortaa guiaad me nsinle zo to; sacdraa to dze co zig rzac miech ngbaan, lega nacle zeene ran zho laa ngbaan rdziñ. ⁵ Miech ne nole lo xbiini Dios nac to, niini zo to; nacdraa to zha ne no glowtaa guieel, zha ne no lo ncow; ⁶ gacxe nagon waa, niini golsa, tsienalde to mine run zha ne zienal guielntseeb; sac nac grè zha co zig nac zha ne nixguies, tibaque guieel no zho. ⁷ Sac tel guieela, guieel raaguies miech, niicle zha ne rzuudzgaaw guieel rzudz zho. ⁸ Sangue ne ne nac ne zha ne niini zo, none guien ne pe nac ncuaañe noyac. Tibaque dib zdoo ne gliladz ne Dios, gleynie ne samiech ne, zeena csaaca ne zig rsaac ncuaañe racw menguiib lo grè ncuaañe gnitlo zho; ni csoladz ne ganle laa Dios psilaale ne lo guielgut, gotsaa ziaac new zig rzac menguiib pchog ne rzob guic zho rsilaaw zho lo guielgut. ⁹ Sac gon bredzaxe Dios ne waa yгаа ne guielnédox ne no guiaad, sinque laa me bredz ne csilaa me ne lo guielné co. Ni lèe min co rac zeene laa ne riladz Jesús. ¹⁰ Zeene gut Jesús, ga bdiizh me xtol ne; zeena yase mban ne o gutlegaa ne gal dze ne guiaad me, per me gbannie ne.

¹¹ Nana sca, tib tib to goldeed xfuers zha ne nacgrè to, niapse diidz ne gon xyudar zho choobraa zho lo Xtiidz Dios, min co golnee lo zho; zigne quaiyunaque to niina.

Rso Pabl diidz

¹² Bets, bzian, laa no rso diidz lo to: Niowse golgac, niowse golnee lo grè zha ne po Dios noyun xtsiin me lo to, zig nac zha ne zo lo to, zha ne rnee lo to zha no gban to. ¹³ Golguien ganle cho nac zho, golleynie zho, sac gon led lega nacd dziin ne quaiyun zho lo to. Golsoladz sca: jZaacse golban, tilniede to samiech to!

¹⁴ Tel cho zha ne nacgrè to i, rsilo quaiyacgbech, golgactox lo zho, zeena guien zho gon zho dziin. Grè zha ne quiasaan Xtiidz Dios, golnee lo zho zeena gleynie zhow stib; grègaa zha ne gard tsoguicpaa zha naca, golgon xyudar zho tsoguc zhow; niicle grèragaa zha ne nacgrè tow, ib guieedniede to zho. ¹⁵ Golguien tel pe guielntseeb ne run miech lo to, guiabde to ne scaque gon to zho; sinque mazd goltsoxco tibaque niowse golgac lo grése miech, niicle lo zha ne nacgrè tow, niicle lo grèragaa miecha.

¹⁶ Tibaque nley golco zdoo to.

¹⁷ Tibaque goltzodiidznie Dios.

¹⁸ Goldeed xquizh lo Dios, niicle zeene noyan to guielnèw, zeena nogaa to guielbleya, sac sca racladz me gon grése zha ne no xnèz Jesús.

¹⁹ Golquaadiag mine rnee Espiritu Sant lo to, ni golguna.

²⁰ Golquaadiag mine rnee grè zha ne rnee grè diidz ne rsiab Dios guic zho; ²¹ wen wen golwi dien pe nac mine rnee zho, dzigo mine rzac to rquinnraa lo to, min co golseed.

²² Golbiche lo grése guielntseeb ne no.

²³ Dios, men ne rtiche grése dzeb, grése zhgab, mezhah csañmbe to lo grètaa guielntseeb; dib naccse to (zhiespiritu tow, xalm tow, xcuerp tow) zeena ni tib dol rapde to gal dze ne laa Jesús men ndzon ne rnabey ne gbiire guiaad stib. ²⁴ Me bredz to, ni mesi run me mine rnee me, gane ndion no ne ib zun me min rii.

²⁵ Grése to bets, grése to bzian, laa naa rnab lo to golsiguieel golnab lo Dios gacniñ me no.

²⁶ Golcaania zhibdiuzh no i, ine golxen nia grè zha ne nacgrè to, gollu ne nli rleynie to zho.

²⁷ Men ndzon ne rnabey, me rnabey naa laa naa rso diidz lo to, glab to guits rii lo grése zha ne nacgrè to i.

²⁸ Jesús, men ndzon ne rnabey ne, me glu lo to ganle pa lotaa noxco me to.

Pabl

2

BROP GUILTS NE PXEEL PABL LO ZHA TESALÓNICA

¡Diuzh to grëse to!

¹ Naa nac Pabl, gza no Silas ni Timoté; laa no rxeel stib guits rii guiedz Tesalónica i, laaw ziaad lo to grëse to ne nac to zha ne nole xnëz Dios, men ne nac Pxoze, ni Jesús men ndzon ne rnabey.

² Dios men ne nac Pxoze, ni Jesús men ne rnabey, me glu ganle pa lotaa noxco me to, zeena peet zhgab ctsebde to.

³ Bets, bzian, ible rieguiala gdeed no xquizh lo Dios ne squitaa noneedz me guielbiini lo to; sac gon zigse zie dze dib zdooraa to riladz to Xtiidz me, ni rleynieraa to samiech to. ⁴ Zaatne rdziinta no lo grë zha ne nole xnëz me, ne nligaa rley no rzodiidz no lo zho zha squitaa dziits zo to, tibaque dib zdoo to riladz to me niicle maase rtsidil miech to, niicle maase nroob guielnë ne quiaad to. ⁵⁻⁶ Nli nroob guielnë noya to, per scagaa laaw noya to zeena tsieguiala to gdziñ to zaatne rnabey me. Nu rlu ganle, Diosi zeene run me guielwxtis, zigne no gaca sca run mew. Zig nac niina, grë zha ne squi nosacsi to i, ib zгаа zho guielndox ne csiab me.

⁷ To ne nac to zha ne quiaad grë guielnë qui, golgona ganle, gal dze ne guiet Jesús gbaa guiaad me stib, ible zgaa ne descans ne gneedz me. Gal dze co, laa me guietnie grë xanj me, zha ne rapraa poder; ⁸ masaque tib beldox ne guietnie me, sac dzigosi laa me guiaad csiabzi me grëse zha ne néd niunbey Dios, grëse zha ne néd nquiaadiag Xtiidz Ndzon me. ⁹ Grëse zho laa me gnabey guey zho lo guielndox, zaatne gdziñdraa dze griece zho. Lëë bichele zho lo me ga, ib gdziñd dze gan zho lo xquielndzon me, gangaa zho grëtaa poder ne rap me. ¹⁰ Dze co, grëse zha ne no xnëz me laa zho goolnie me, gunnon zho me. Grëse zho see zdoo zho gan zho me; ye to gacgrë zho, sacne bliladz to Xtiidz me mine biadseed no to.

¹¹ Gacxe waa, tibaque laa no quianab lo Dios gacniën me to grieelo gban to zigne racladz me; zeena glu ganle led zhléd bzooblo me to. Ni rnab no lo me gneedz me xpoder me lo to, zeena grieeelo gun to grëse ncuaañe rquiabladz to, zeena grieequia grëse dziin ne quiaayn to porne riladz to me. ¹² Zeena sca cxobnen to ganle pa lotaa men nroob nac Jesús, men ndzon ne rnabey ne; ni niicle megaaw, zunnon me to. Sac zigtaa mew, zigtagaa Diosa, noxco me to.

Ziaad Jesús stib

¹ Bets, bzian, ib laa Jesús men ndzon ne rnabey ne no guiaad, ni laa ne gbannie me.

² Zeene gon to laa miech gnë laa dze co bdziñle, niicle gnë zho Espiritu Sant bneew lo zho, gangaa to palo nonee zhow zaatne ndxie nzian miech, o cxeelgaa zho pe tib guits lo to zig nac zeene no pxeela; gliladzde tow. Laa no rso diidz lo to, peet tsienied guic to, gdziebde to. ³ Ib gdeete to diidz yquidie zho to. Sac gon ansraa ne gdziñ dze co, ib none grieequia grë miech ne gacntseeb lo Dios; lozh ga, laa tib mgui ne nacie mendox grieequiaque, zactseeb me lo Dios, per gabil ga nitlo me.

⁴ Lëë zha co ctsidil grëse zhiwseed Dios, grëse ncuaañe naclay lo miech; ni haxta zie zho ziesob zho zaatne nac len xyadoo Dios, guiab zho zha nac Dios. ⁵⁻⁶ Per no tib men ne notse lo zho niina, laga gdziñ dze ne laa zho guiaad. Golsoladz ganle, blactaa bzeet naa min rii lo to len dze ne blëz naa i. ⁷ Grëse ncuaañe no guic zha ntseeb co gun zho, laaw rsilole; loxaque runfalt gdeed men ne notse lo zho ga diidz guiaad zho. ⁸ Zeene laa zho guiaad, hor co laa Jesús guiaadaque con grë xquielndzon me, dzigo me ne grieese ro me gloozh me zho, gnitlo me zho.

⁹ Masaque mendox gnabey zha ntseeb co, niapse xpoder ma gap zho, nzian ncuaañe glu zho; zun zho grë ncuaañe gzee zdoo miech, per led ncuaañe nlida. ¹⁰ Zun zho grë ncuaañe lozh yquidie zho grë zha ne nole nëz ne nitlo, zha ne ib bzhiguield nlliladz mine nac diidzli. Tel niaca mine nlliladz zhow, nleynie zhow, nsilaa Dios zho. ¹¹ Saan Dios tsienal zho grë ncuaañe co, ni zlliladz zhow zig nac zeene diidzliw; ¹² per ib siaabzi Dios zho, sac laa ne gliladz zho mine nac diidzli, lel mazdraa gleynie zho grë guielntseeb.

Zha ne bedlaale lo dol

¹³ Bets, bzian, golguien sca tibaque golgotsaa gdeed ne xquizh lo Dios; sac gon tel to padzeelale bzooblo me to csilaa me to lo dol. Nacle diidz zeena laa to gliladz Xtiidz me, mine nac diidzli, laa Espiritu Sant csanbe to lo me. ¹⁴ Min co nagon nacie pxeel me no biadseed no to xtiidz me, guien to zha laa to lo dol; zeena gdziñ to zaatne nac lo xquielndzon Jesús, men ndzon ne rnabey ne. Gacxe waa, zha nziuu nac to lo me.

¹⁵ Golguien sca, dziits golso, ib csaande to grë mine pseed no to len dze ne biaad no i, niicle mine rneegaa no lo to lo guits ne rxeel no. ¹⁶⁻¹⁷ Ni Jesúsaque, men ndzon ne rnabey ne, ni Dios men ne nac Pxoze, me gneedz xfuers to dziits so to; zeena grëse mine gnee tow, mine gun tow, wen grieequiw. Me blu ganle pa lotaa rleynie me ne, laa me bneedz

tib guieļbley ne gdziņd dze lozh lo ne, ni psan me diidz pe nac miņe naraa no yгаа ne. Ga rlu ganle pa lotaa noxco me ne, niicle ne rioguaļd new.

3

¹ Bets, bzian, nu ne laa no csiaalle, laa naa rnab lo to goļnab lo Dios gacniņ me no, zeena znuse znuse diiz no Xtiidz Ndzon meņ ne rnabey ne; ni zha ne gontaaw, guieņ zho ycaania zhow zigne pcaania tow. ² Ni goļnab lo me csilaa me no lадznia grē zha ntseeb, zha ne run miņe notaa guic; sac goņ led grēd miech riladz Xtiidz Dios.

³ Dios meņ ndzon ne rnabey, miņe rnee me run mew; gacxe waa, ible zacniņ me to dziits so to lo Xtiidz me, ni squianap me to tsobede to lадznia menđox. ⁴ Ndioņ no ne me noyacniņ to noyū to grē miņe pso no diidz lo to, ni scagaa me gacniņ to bii guņ tow. ⁵ Me gacniņ to grieelo gleynie to samiech to zigne rleynie Dios ne, ni guiuude to lo guieļnē, sinque golgac zigne been Jesús.

None guņ zho dziin

⁶ Bets zig zobwi Jesús, laa no rso diidz lo to: Teļ cho zha ne nacgrē to i, nēdraa yquia dziin gdziniaa zho ncuaaņe gow zho, ib ctsieelsade to zho; sac goņ pseete no to miņ co. ⁷ Teļ no, goņ to ganle zha wban no zeene bliaaz no lo to i; ni sca goņ none gban to. Ib bdeddzeed no, ⁸ biod dze ne lega ndioow zhlē no xcuuņ miech, blactaa haxta guieel bdziuuņ no dziin bdziniaa no pe pquiin no; ib psodziind no lo to. ⁹ Niicle ne ib rieguiaļ nab no lo to needz to ncuaaņe nquiin no, per choot peet bnabd. Miņe bdziuuņ no pquiaa no dziin bdziniaa no pe pquiin no, par gan to ganle zha nongueļ gban to. ¹⁰ Led rsoladz to leņ dze ne bliaaz no i, pso no diidz rii lo to: Zha ne nēd guņ dziin, scagaa nodne gow zho. ¹¹ Laa niina laaw rzetaque naa stib, sac zidzion no no bla zha ne nacgrē to i, mbe runđraa zho dziin scase quiaded dze zho; loxaque nēzrii nēzrec no zho rzēeb zho lo grē ncuaaņe rieguiaļd zho. ¹² Zig zobwi Jesús meņ ne rnabey ne, laa no rso diidz lo zha ne sca run: none guņ zho dziin gdziniaa zho ncuaaņe yquiin zho.

¹³ Bets, bzian, ib guieete to, tibaque goļtsoxco goļguņ niapse grē ncuaaņe yquiin lo samiech to.

¹⁴ Teļ cho zha ne nacgrē to i nēd gon diidz gban zho zigne rso no diidz nu, goļwi dieņ chow, dzigo ctsieelsadraa to zho; zeena sca ctoladz zho. ¹⁵ Per guņde to zho zig run zha ne rlēēnie samiech, sinque goļnee lo zho gacwen zho; golguieņ ganle bets to grē to.

¹⁶ Jesús nac meņ ne rtiche grēse zhgab, grēse guieļxtseeb, me cuee to lo grēse zhizhgab to, lo grēse guieļxtseeb gzataa dze. Me gacniņ to grēse to.

¹⁷ Naa goņ nac Pabl, naazhal pquia bdiuzh rii rxel naa lo to; naazhal pquia lē naa nu. Golgan ganle lēē xletr naa nu.

¹⁸ Jesús meņ ndzon ne rnabey ne, me gacniņ to, me glu lo to ganle pa lotaa noxco me to.
Pabl

GUITS NE GLO PXEEL PABL LO TIMOTÉ

¡Diuzh Timoté!

¹ Naa nac Pabl, tib zha ne pxeel Jesús nonee Xtiidz Ndzon me lo miech. Ible Dios men ne psilaa ne lo dol, ni Jesús men ne rnaloo ne, me bnabey quiayun naa dziin rii.

² Laa naa rxel guits rii lo luu, rzaac naa luu zig tib xpëed naa ne squi dib zdoos luu riladz luu Jesús. Dios men ne nac Pxoos ne, ni Jesús men ndzon ne rnabey ne, me yquia zdoos luu, me tsoxco grë zhizhgab luu zeena peet tsienied guic luu. Min co racladz naa, ni min co rnab naa lo Dios.

³ Zigne psoque naa diidz lo luu len dze ne laa naa za nëz xtan zha Macedon ga, laa luu biaan Efés i; scagaa niina laaw rneque naa lo luu stib: Sca no luu i, bnee lo bla zha ne squi no i, cseetraade zho miech grë zhivseed zho, sac ncuuaane paat rquiinda. ⁴ Bnee lo zho, csaan zho grë cuent gox qui, zhale noyunnroobraa goon dien zharaa, peraa been grë xmengol ne. Ncuuaane paat rquiind ga, loxaque runctidiidza miech; mazd lo lal ne nodiidiidz zho, tsoxco zho cseed zho miech ganle pe nactaa grë guielnzaac ne rgaa grë zha ne rquiabladz dib zdoos riladz Jesús.

⁵ Laa naa rso diidz rii lo luu, sac racladz naa guiaanmbe zdoos grëse miech qui, guiaanmbe xquielrien zho ni dib zdoos zho giladz zho Dios; zeena scagaa grieelo gleynie zho samiech zho. ⁶ Sac gon, no bla zha ne quiasaanle Xtiidz Ndzon Jesús mine nac diidzli, lel lo grë cuent ncuuaane paat rquiind co no zho. ⁷ Racladz zho zha cseed miech zha nac xley Dios, ni niicle zha rienz zha naca; zeene rseed zho miech ni zha rien daque dien pe rnee zho.

⁸ Ndionle ne ganle nli wen ley ne psan Dios, per tel niaca mine yquini miecha zigne psan me yquiina. ⁹⁻¹⁰ Golguien ganle, biaan ley par gnabeya grë miech ne nole xnëz Dios, sinque laaw biaan par gnabeya grë: zha ne racndaan lo Dios, zha ne rond xtiidz Dios, zha ntseeb, zha ngoopdol, zha ne rzacdraa ne men nroob nac Dios, zha ne rguinle lë Dios, zha ne rut pxoz, zha ne rut xniaa, zha ne rut samiech, zha ne rionie zha ne led tseield, zha ne nac mrazh, zha ne rban samiech rieto zho zho stib nëz, zha ne rquidie,

zha ne rzeet lë Dios par gliladz miech xtiidz zho, ni nanpaa zho led diidzlid rnee zho.

Par grë zha rii nagon biaan ley; grë zha ne mband zigne nac Xtiidz Ndzon Dios; ¹¹ wseed ne rlu ganle zha laa miech lo dol. Ni lëe wseed co gon pso Dios naa none naa lo miech.

Pquia zdoos Dios Pabl

¹² Rded naa xquizh lo Jesús men ndzon ne rnabey ne, porne bzooblo me naa gon naa xtsiin me, ni noyacniey me naa ne laaw quiayun naa. ¹³ Ne nligaa rded naa xquizh lo me, sac glo ntseeb goc naa, bneene naa me, ptsidil naa grë zha ne no xnëz me, ntseeb goc naa lo zho. Ni niicle ne scataa nac grë ncuuaane ben naa, per pquia zdoos me naa; sac len dze co gard gliladz naa cho nac Jesús, lega lo xquieln xen naa ga sca ben naa.

¹⁴ ¡Pa lotaa pquia zdoos Dios naa! Ga blu me ganle zha noxcotaa me naa, pxobnia me guic naa bliladz naa cho nac Jesús, ni zig nac niina dib zdoos naa rleynie naa me. ¹⁵ Mine rne naa nu niina, diidzliw, ni racladz naa grëse miech gliladz zho ganle, ible laa Jesús biaad lo guidzliu, baaad silaa me grëse miech lo xtol zho; ni naapaa gon goc tib zha ne mazdraa ngoopdol. ¹⁶ Gacxe waa pquia zdoos Dios naa, niicle ne scataa miech ngoopdol naa per psilaa Jesús naa. Ga blu ganle pa lotaa paciens ne rap me; ni ga gwi grëraa miech ganle, zha ne gliladz me, zгаа zho tib guielmban ne gdzind dze lozh. ¹⁷ ¡Tibaque sca golgotsaa dziuunnon ne me, golgotsaa gnee ne grë diidz ndzon lo me, zigtaa niinaw zigtagaa len grëraa izdoos ne ziaada! Sac gon, me nac men nroob ne rnabey, men ne gdzind dze ne nitlo. Sca rieguiala.

¹⁸ Timoté, xin, laa naa rso diidz lo luu gon: Tibaque dziits bzo, ib guiaan d zdoos luu; psoladz ganle scaque nac diidz ne bnee grë zha bets ne zeene psiaab Dios guic zho bzeet zho pe nac grë mine pso Dios luu gon luu. ¹⁹ Bien tibaque dib zdoos luu bliladz Jesús, ib guind luu ncuuaane nan luu ndzinlid, zeena ine mbe xquielrien luu; sac gon no zha ne niicle rienpaa zho pa min nac ncuuaane ndzinlid, ni laa zho runa. ¡Min cocxe waa, grë zha ne sca nac, rsaanga zho mine bliladz zho! ²⁰ Zig nac Himené grop Lejandr, sca been zho; per laa zho bzonëzle naa sca tsie zho xnëz mendox telne sca racladz zho; zeena guien zho ganle nodne gneenë zho Dios.

2

Gac-wnab lo Dios por grë miech

¹ Laa naa rso diidz lo to: Golguien none gnab to lo Dios por grëse miech ne ndxie lo guidzliu, gonlab lo me gunlay me zho,

gacniɛn me zho; ni goɫdeed xquizh lo me por grɛtaa ncuaaɛe ruɛ me. ² None gnab to lo me gacniɛn me grɛse zha ne nac wxtis, grɛse zha ne rnabey, gdeed me guieɫbiini lo zho zaacse guɛn zho guieɫwxtis, zaacse gnabey zho; zeɛna tibɫiladz cue miech, iɛe gban ne zigne raɫladz me, sin choot peet glisquid lo ne.

³ Sca nagon nonguiɫ dziuun ne, ni scagaa rdziladz Dios, meɛ ne pxeɫ Jesuꝰ biaadsilaa grɛse miech lo dol; ⁴ meɛ ne raɫladz grɛse miech seeb xnɛz Jesuꝰ, gacnaɛ zho miɛe nac diidzli. ⁵ Guiɛn zho ganle ne tibaque Dios no, ni tibaque meɛ ne zac gdzɛɛnie grɛse miech lo me: lɛɛ meɛ co nac Jesuꝰ, meɛ ne goc miech biaad lo guidzliu; ⁶ sac gon Jesuꝰ nac meɛ ne bdeed xquieɫmban, beet zho me, bdiizh me xtoɫ miech. Miɛn rii nagon raɫladz Dios gacnaɛ miech len dze rii. ⁷ Ni laa me pxeɫ naa none naaw lo grɛse zha ne nacd zha Israel, noseed naa zho grɛse miɛe nac diidzli, zeɛna guieɫ zho dib zdo zho gliladz zho Dios. (Miɛe rne naa nu diidzliw, rquidieed naa.)

⁸ Laa naa raɫladz sca, zaatne notaa zha ne dib zdo rɫiladz Dios, grɛse zha bgui none gzodiidznie zho Dios. Ni zeɛne gzodiidznie zho me, none iɛe mbe zdo zho, choot lo zha rɫeɛd zho, choot zha nodɫnied zho. ⁹ Laa grɛ meɛ wnaa, raɫladz naa tsoxco zho zaacse gacwxab zho, niowse, tibɫiladzse gac zho. Sac grɛ meɛ wnaa ne rɫiladz Dios, par gluniow zho rquiind ne goon dieɛn paraa xixcuaa guitsguic zho, dieɛn pe quie rbebni, pe or gac xniɫ zho, gac zhiɛguiaa zho, pe lar niazh ne gacwgaa zho. ¹⁰ Par gluniow zho, rquiin zaacse gbannie zho samiech zho, zig none gban zha ne nole xnɛz Dios. ¹¹ Zig nac len yadoo, none tibɫiladzse gac zho, dzese sob zho yquiaadiag zho tel pe nac wseed ne noyac; ¹² gnedzd naa diidz ne zha so cseed miech, o zhagaa gnabey lo mgu. None dzese sob zho, ¹³ sac gon zeɛne psan Dios miech lo guidzliu, glose bzaa me Adan, dzigora a bzaa me Ev. ¹⁴ Ni stiba, pquidied mendox Adan, sinque laa ma guieyquidie Ev; ni porne bliladz Ev xtiidz ma, ga bdiits Ev xtiidz Dios. ¹⁵ Per silaa Dios wnaa lo xtoɫ zho, telne dib zdo zho gliladz zho me, tsoxco zho gban zho zigne raɫladz me, guieɫ zho guɛn zho miɛe rieguial wnaa, gap zho xpɛɛd zho ni cchoob zho win.

3

Zha ne so lo grɛ zha ne ngab xnɛz Dios

¹ Zha ne raɫladz so gnabey zho lo grɛ zha ne no xnɛz Dios, tib dziin wen ga rquiabladz zho guɛn zho. Sca zɛeb diidz rnee miech; ni nligaaw. ²⁻⁴ Per ga nagon rquiin: tib zha ne zaacse mban,

zha ne mbannie loxaque wnaa ne nacse tsieel zho,
zha ne tibɫiladz,
zha ne nixbiini, rieu pe ruɛ,
zha ne mbe lo, choot lega gzhidznied zho,
zha ne iɛe nley rac, rbɛzlo zho miech lidz zho;

zha ne rieu zha rseed miech,
zha ne rquiad lo nziu,
zha ne rleynd dil,
zha ne wen zdo,
zha ne zaacse mbannie samiech,
zha ne rzonaɫ dimi,
zha ne zaacse mban lidz,
zha ne rrieelo rnabey lidz, rnabey xpɛɛd,
zha ne nguzobdiidz nac xpɛɛd, rbeed meɛd xquieɫto zho.

⁵ Sac tel zha ne rrieelod gnabey lidz, gnabey xpɛɛd; ɛpe tel ne so zho gnabey zho lo grɛ zha ne no xnɛz Dios dzigo grieelo zho?

⁶ Niicle tib zha ne griinpa a psilo bliladz Xtiidz Dios grieelod gac zho dziin co; sac nend lɛɛque lɛɛ zho guɛnon zho, lozh ga lɛɛque zha yguib guiabdee zho. Goɫsoladz ganle zha bzhaac mendox. ⁷ Ni ye rquiin tib zha ne zɛeb xtiidz ne miech ndzinli nac zho, haxta lo zha ne nod xnɛz Dios; zeɛna tsod lega pe glisqui miech lo zho, sca gleyd mendox gac miɛe raɫladz ma.

Zha ne guɛn yudar len yadoo

⁸⁻¹² Scaquegaa zha ne so guɛn xyudar zha ne gnabey ga, ga rquiin: tib zha ne zaacse mban,
zha ne rnee niapse diidzli,
zha ne rleynd guieɫgonziu,
zha ne zienaɫ dimi,
zha ne dib zdo rɫiladz grɛse miɛe zho bnee lo Xtiidz Dios (miɛe rɫiladz ne, miɛe nac diidzli),

zha ne mbe lo,
zha ne mbannie wnaa ne nacse tsieel zho,
zha ne rrieelo rnabey lidz,
zha ne rrieelo rnabey xpɛɛd.

Ni stiba, antes ne so zho none glugazh zho dieɛn pe nli zrieelo guɛn zho dziin co. Zig nac tsieel zhow, none gac me: tib wnaa ne zaacse mban,
wnaa ne rleynd diidzguizh,
wnaa ne rleynd nziu,
wnaa ne rquidied.

¹³ Sac zha ne zaacse guɛn dziin co, zianziuuraa zho lo grɛ zha ne ngab lo Dios, ni scagaa iɛe mbe lo zho haxta no ro zho gnee zho lo miech zha nac ne laa zho rɫiladz Jesuꝰ.

Miɛe rɫiladz zha ne ngab lo Dios

¹⁴ Ib laa guic naa no guiaɫniob naa i, guialgan naa luu; per laa naa rxel diidz rii lo luu, ¹⁵ zeɛna telne grieelod guiaɫniob naa, per laa luu nanle naganle cho gzo luu yquiaanap grɛraa zha ne ngab xnɛz Dios

nguiamban; zha ne runbey miñe nac diidzli, ni rlu zho ganle ne nli diidzliw. ¹⁶ Ne nligaa nroobdoo nac wseed ne ziaad lo Xtiidz Dios, miñe rililadz ne, ngañ guieñ miech zha naca. Nu raquiet miñe been me:

Goc Jesús miech biaad me lo guidzliu, ni blu Espiritu Sant ganle ne nli Xpëedpaa Dios nac me;

ni gon grë anjl me.
Brieets bliaal Xtiidz me grë guiedz, ndaldoo miech ne bliladz ganle cho nac me, blozh ga biire zey me lo guieñdzon ne no me gbaa.

4

Zha ne rsaan Xtiidz Dios

¹ Ib laa Espiritu Sant rneele ne len dze ne ziaadyob guiaad Jesús stib, ndal grë zha ne rililadzle Xtiidz me, laa zho csaana laa zho tsienal grë miñe rnee zha ne rquidie, grë miñe nac zhiwseed menox. ² Grë zha ne guiaadnie wseed co, ni lalnu yquiad zdoos zho zeene laa zho yquidie miech. ³ Haxta stsidil zho ctsieelnia miech, znabey zho ycuae ncuane gow miech; zig nac zeene led Diosd psan ctsieelnia miech, zig nac zeene led med psan grë ncuane gow zho. Me psana grësew, zeena grëse zha ne ngab xnëz me (zha ne beenbey diidzli), zeene laa zho yquina gdeed zho xquizh lo me. ⁴ Sac grëse ncuane psan Dios, wena; zig nac grë ncuane rac wagw, peet nacda yquini new, totsaque gdeed ne xquizh lo me zeene laa ne yquina, ⁵ ni gnab ne gunlay mew; sac zeene rdeed ne xquizh lo me ni rnab ne gunlay mew, rsanmbe mew.

None gun Timoté xtsiin Jesús

⁶ Zeene cseed luu grë zha bets ne, zha bzian ne i, pseed zho grë miñe rne naa lo luu nu, tibaque miñe nac zhiwseed Dios güeyna; sac sca no gun zha ne squi zo quianap grë zha ne ngab lo Dios. ⁷ Ib yquiaadiagd luu grë cuent gox, grë cuent nxen ne paat rquind; sinque Xtiidz Dios bioxco, min co bloonie guic luu. ⁸ Gzoob ne zha ne rguit, wguite ne run zho, nli rquina lo zho par gac macis xcuerp zho; per zig nac Xtiidz Dios, mazdraa rquini dzioxc new; sac mincosi squina lo ne zigtaa lo guieñmban riiw, zigtagaa lo guieñmban ne naraa dzian new. ⁹ ñe nligaa sca rieguial gun miech, ni grëse zho none tsoxc zhow! ¹⁰ Ni gacxe waa, laa ne quia dien zha gliladz zhow, niicle ne nroob grë guieñ ne quiazian ne; sac ible Dios nac men ne rnalo ne, men nguiamban ne rsilaa grëse miech lo dol; sac grëse zha ne dib zdoos rililadz me, rsilaa me zho. ¹¹ Bioxco sca pseed zho grë miñe rne naa lo luu nu, ni bnee lo zho gun zhow.

¹² Nli lëë tib zha nguiegse nac luu, per blu lo zho ganle zha none gban zho: Zeene

gnee luu, niowse bguib diidz ne gnee luu, zaacse goc, ñe bleyne samiech luu, tibaque dib zdoos luu bliladz Xtiidz Dios, ñe ndzinli wban; zeena gan zho ganle niicle ne zha nguieg luu, per nixbiini luu.

¹³ Laga gal dze ne glanso naa i, bioxco blab Xtiidz Dios lo grëse zha bets ne, zha bzian ne i, bnee lo zho zha naca, bnee diidz ne conley zdoos zho; zeena ñe nguieel gac zho. ¹⁴ Ib csaand luu grë guieñbiini ne bneedz Dios lo luu i (guieñbiini ne bgaa luu zeene psiaab me guic grë zha ne rnabey lo grë zha ne no xnëz me, pxobnia zho guic luu). ¹⁵ Grëse miñe rne naa lo luu nu, bioxcow; zeena gan grëraa miech ganle zigse zie dze laa luu quiaabiiniraa lo Xtiidz Dios. ¹⁶ Bien zaacse goc, bien miñe nac Xtiidz Dios, min co pseed miech, ib csaand luuw; zeena tedlaa luu lo grëtaa guieñne ne no guiaad, ni scagaa haxta grë zha ne rquiaadiag wseed ne rlu luu ni rban zhow, ye zho zlaa zho lo guieñne co.

5

Men wnaa ne gutle tsieel

¹ Grë zha bgui gol ne nac bets ne i, zeene zha rxin zho, bien gactoxd luu lo zho, sinque zaacse bnee lo zho zig nac zeene lo pxoz luu nonee luu; niiclegaa zha nguiega, zaacse goc lo zho, been zho cuent zig tib bets luu. ² Scaque grë men wnaa ne nac zhagol, ndooladz bnee lo me, been cuent lo xnäa luu ga zo luu; lo grë wnaa nguiega, ndzinli goc, niowse bnee lo zho, bien ganle rrieequia tib bzian luu ga.

³⁻⁶ Grë men wnaa ne gutle tsieel, men ne nlipaa choot rapd, to none cteedlo me; totsaque nli Diosse rnalo me, dze guieel tibaque nozodiidznie me Dios. Sac no zho mban zigne notaa guic zho, laa zho zienal loxaque grë ncuane gdeed guxt xcuerp zho; zha ne sca run, rrieequia gutle zho ga. Laa tel men wnaa ne scaque gutle tsieel, ni no xpëed me, no xiag me, dzigo zha none cteedlo me; none cseed zho gan zho menlidz zho, gan zho pxoz zho, gan zho xnäa zho, sac gon me pchoob zho. Sca nonguiela, ni scagaa rdziladz Dios.

⁷ Pso diidz rii lo grë zha ne nacgrë to i, zeena cseed zho sca gban zho, ni scagaa tsod pe nacne gneenë miech zho. ⁸ Sac zha ne tsoxcod gan zha ne nacgrë zho, ni miñe mazdraa telne niicle menlidz zho tsoxcod zho gan zho, rdzieeld dzigo guiab zho laa zho rililadz Dios, haxta mazdraa nac xtol zho que tib zha ne gard gliladz me.

⁹⁻¹⁰ Ni stiba, grë men wnaa viud qui zha ne rquiaablazd gun pe xtsiin Dios, bien zha ne psale tsongal iz zha co psëeb lo list. Ni wen wen goncan telne:

bionied me stib mgui zeene bii zomban tseeel me,
 zaacse mban me,
 zaacse pchoob me xpëed me,
 dib zdoo me rbëzlo me miech lidz me,
 ndooladz rac me lo grë zha ne no xnëz Jesús,
 run me xyudar grë zha ne no lo tib guielnë;
 ni run me niapse ncuuaane wen ne rquiin lo samiech me.

¹¹⁻¹² Laa grë zha ne bii nguieg, ib yquiaad luu lë zho lo list co; sac nac wnaa nguieg, zeene sob guic zho ctsieelnia zho, laa zho ctsieelnia stib. Loxaque guncat zho xtol zho ga, telne glo rquiablazd zho gun zho xtsiin Dios ni lozh ga laa zho csaanaquew. ¹³ Ni ye nac wnaa nguieg, rdziladz zho rquiandez zho; ni telne peet dziin gund zho, racgbech zho; ni stiba, zeene sca guieud pe gun zho dzigo laa zho rzhixcuua diidzguizh, laa zho rzëeb lo grë cuent ne rieguiadraa zho. ¹⁴ Gacxe waa, racladz naa grëse wnaa nguieg ne sca ret tseeel, mazd ctsieelnia zho stib; zeena yquiaanap zho xpëed zho, yquiaanap zho ro lidz zho. Sca yguibd zho tso grë zha ne rlëenie Xtiidz Jesús, gneenëraa zho zha ne rliladza. ¹⁵ Sac gon, bcale wnaa ne sca gut tseeel zieriee xnëz Dios, lel laa zho zienal grë mine rnabey mendox.

¹⁶ Psoladza ganle, tel cho tib zha bets ne, tib zha bzian ne i raclidz tib men wnaa ne gutle tseeel, none zha gan me, laa ne gnalo zho ne to yguib dieh zha gdioon me; zeena grë ncuuaane runlo to i, zgaaw yquiiin grë men ne nlipaa guieud cho gan.

Mine rieguial zha ne zo lo zho

¹⁷ Grë zha ne zo rnabey lo grë zha ne ngab xnëz Dios, zha ne zaacse noyun dziin co, zig nac zha ne tibaque rnee Xtiidz Dios lo miech, zha ne rseedgaa miech zha naca, tel palal ncuuaane rcaa zho, ible rieguial ycaa zho chop lalgaw. ¹⁸ Gotsaa gwi ne ganle zha quia lo Xtiidz Dios, rneew: "Code to guie x ro xma to, zeene no ma ye noguiits ma zhoxtil; jgolsaan gow ma!" Laa stib lugar rnee: "Zha ne run dziin, ib none ycaa zho mine non xtsiin zho."

¹⁹ Bien gon Timotë, zeene guiaad zho lo luu, guiaad-zo zho tib men ne rnabey lo to, ib yquiaadiagd luu mine rnee zho, telne gzod zho chop tson zha ne gon ne nli been me mine rquiaqui zho me. ²⁰ Telne bind me diidz, bii noyun me dol co, dzigo squi ndxie grë zha ne nacgrë to, goctox lo me; zeena sca gdzieb grëraa zho gunscad zho. ²¹ Zig zobwi Dios, zig zobwi Jesús grë xanj me, laa naa rso diidz lo luu, been mine rne naa lo luu nu. Gdzieebd luu, yquiad zdoo luu, bnee lo zho tel chotaa nac zho.

²² Zeene gzo luu zha ne gun xtsiin Dios, gund luu ne lega tel chotaa gzo luu; sac gon,

nend lëetse zha ne rap pe tib falt gzooblo luu, dzigo laa miech guiab nanpaa luu zha nac zho ni rlisquid luuw lo zho. Ible gdeete luu diidz gun luu ncuuaane guncat xtol luu. ²³ (Gnid naa togo ible grielodraa guie luu vin, zac guie luu niipyeena maase poc poc, laa ne guie luu niab nis; zeena glunëdraa zdoo luu.) ²⁴ Sac grë zha ne no lo dol, no dol co znuse rzhoooben; nogaaw, haxta gal dze ne laa zho gacredz lo Dios, dzigoraaxoobnëna. ²⁵ Scaquegaa zha ne run guielwen, no ncuuan co znuse glu; nogaaw, niicle ne rluda niina per ible zdziin dze ne laaw glu.

6

Zha ne quiazho xtsiin ben

¹ Grë zha bets ne, zha bzian ne, zha ne lega run xtsiin ben, none gon zho xtiidz men ne quia zho xtsiin; zeena yguibd zho gneenë miech Dios, gneenë zho Xtiidz me mine noseed ne miech.

² Scaquegaa grë zha ne run xtsiin men ne rliladzle Xtiidz Dios, none gon zho mine rnabey me zho; led guiabd zho por bets zhow, gun zho mine racladztaa zho. Ni gale none tsienie guic zho wenraa grieequia grë dziin ne noyun zho; sac gon lo tib men ne no xnëz Dios ga, lo tib men ne rleynie zho ga yquiiin xtsiin zho.

Grëse mine none naa lo luu nu, pseed grë miech quiw, ni pso diidz lo zho gun zhow.

³ Zrieequia zha ne guiaadnie stib wseed, mine ni nacdraa Xtiidz Jesús; sac zhiwseed Jesús rlu zha gban grë zha ne no xnëz Dios. ⁴⁻⁵ Zha ne sca rlu stib wseed, lega:

tib miech niats ga nac zho,
 ible peet rienud zho,
 runbeyd zho mine nac diidzli,
 rdziladz zho rdliidznie zho miech; ga rlan,
 laa miech rdillsa,
 laa miech rlëëlsa,
 laa miech rbidzgonsa; rlozh ga,
 rliladzdraa zho pe rnee samiech zho.
 Masaque nan zho telne sëeb zho xnëz Dios,
 nroob dimi ne gunlo zho.

¡Bien ib ctsieelsad luu zha co! ⁶ Parga nli zha ne rzëeb xnëz Dios, zeene rzac zdoo zho mine rzoladztaa Dios lo zho, tib guieinzaac nroob ga rgaaz zho. ⁷ Ni sca nonguiela, sac gon zeene rlanse ne lo guidzliu, peet rlanse ne; ni scaquegaa zeene laa ne gbi, peet grielod güey ne. ⁸ Gacxe waa, none sac zdoo ne ni gley ne totsaque gneezd Dios ncuuaane gow ne, ni ncuuaane gacwxab ne. ⁹ Sac grë zha ne rzoobladz xen nroob dimi, no zho rquiil mendox zho run zho ncuuaane ndzinlidraa par gdziniaa zho dimi co; rlozh ga rzhin lo xquielmban zho, haxta rnitlo zho. ¹⁰ Sac nac dimi, zeene rzoobladzdox miecha, ga rzobni ne laa zho run grë guielntseeb. Ndal zha ne ziesaan Xtiidz

Dios, sac laa zho zienal dien zha xen zho nroob dimi; per rlozh ga, stib stib guielne ne ziedzin lo zho.

Pabl

Dib zdoos Timoté gliladz Timoté Dios

¹¹ Sangue luu gon, bien ganle xnéz Dios no luu, gund luu gré ncuuan co. Bioxco zaacse wban, tibaque bioxco gban luu zigne racladz Dios, dib zdoos luu bliladz me, bleynie me ni bleynie samiech luu, ndooladz goc lo zho, ni lalnu ib guiaand zdoos luu.

¹² Bleeladz luu been gré dziin ne run zha ne dib zdoos riladz Dios, zigne run zha ne rie lo dil, rbeeladz zho zho. Gon ganle, laa luu nole néz ne yгаа luu guielmban ne gdzind dze lozh, ib csaand luu néz co; sac niicle Dios ible min co bzooblo me luu. Psoladz ganle, squi ndxie miech bleero luu ne dib zdoos luu riladz luu Xtiidz Jesús. ¹³ Dios (men ne rdeed xquielmban grétaa ncuuane no), ni Jesús (men ne ni lalnu bdziebd zeene güeyzo zho me lo Pons Pilat, bnee me cho nac me); me zobwi ganle ¹⁴ laa naa rso gré diidz rii lo luu, bioxco beena zigne no gaca. Tibaque bioxcow haxta gal dze ne gbiire guiaad Jesús, men ndzon ne rnabey ne. ¹⁵ jib laa me no guiaad! Ni Dios cxeel me zeene laa dze co gdzin. Dios men nroob ne rnabey, men ne rnabey lo grétaa zha ne nac rey, lo grétaa zha ne rnabey. ¹⁶ Mesi ib gdzind dze guet me, lo biini ne no mew, tsod zha ne gléb gdzin ga; ni tib miech lo guidzliu rii gard gan me, ni grieelodгаа gan zho me. jGacxe waa, ible me none dziuunnon ne, sac gon men non, men rnabey nac me! Min co nagon no dziuun ne.

¹⁷ Gré zha ne rapchen, bnee lo zho cseed zho gdaannied zho gré ncuuane rap zho, ib gnalod zho gré ncuuan co; sac gon ncuuane tib rded ga. Dios none gnalo zho, ni mesi rneedz me grétaa ncuuane wen ne rquuin ne. ¹⁸ Gudz lo zho gacmbidzd zho, none gun zho gré ncuuane yquuin lo samiech zho, ycad zho ncuuane quianie zho, ine gun zho xyudar zha ne peet quianied. ¹⁹ Zha ne sca gun, tib guielnzaac nroob ne yгаа zho; lée guielnzaac co gan zho len dze ne ziaadraa. jNi haxta zгаа zho tib guielmban ne gdzind dze lozh!

²⁰ Timoté, laa naa rbire rso diidz lo luu nu gon: ib csaand luu dziin ne bneedz Dios lo luu i. Yquiaadiagd luu gré wseed yozh ne ziaadnie stib miech, wseed ne rneené Xtiidz Dios, niicle ne rnee zha ne ziaadniew zha rac nac zho, per nlid ne diidzli rnee zho. ²¹ Sac gon, blale zha ne ziesaan mine nac diidzli, laa zho zienal wseed co; per riend zho lel znu rziaabnéz zho ga.

Dios men ndzon ne rnabey, me noxco luu, me gzhixcuua lo gré zhizhgab luu. Me gacnieu luu peet tsienied guic luu.

BROP GUILTS NE PXEEL PABL LO TIMOTÉ

¡Diuzh Timoté!

¹ Naa nac Pabl, tib zha ne pxeel Jesús nonee Xtiidz Ndzon me lo miech. Ible Dios bzo naa quiseed naa miech diidz ne rdeed guielmban lo zha ne rzëëb xnëz Jesús.

² Laa naa rxeļ stib guits rii lo luu i gon xin; xin rne naa lo luu sac rzaac naa luu zig tib xpëëd naa. Miñe racladz naa ni rnab naa lo Dios meñ ne nac Pxoz ne, ni lo Jesús meñ ndzon ne rnabey ne, yquia zdoo me luu, ni me tsoxco grë zhizhgab luu; zeena peet tsienied guic luu.

³ ¡Gzataa zeene rzodiidznie naa Dios rzet naa luu lo me, niicle guidzew, niicle guieela, tibaque rded naa xquizh lo me ni rnab naa lo me gacniën me luu! Dib zdoo naa noxco naa zanaļ naa miñe rnabey me, zigne bloxcoque grë xmengoldoo naa güeynaļ zhow.

⁴ Zeene rsoladz naa blactaa roon luu zeene wbi naa i, zoot naa tebaa zha ganñiob naa luu stib; zeena tsonley zdoo naa. ⁵ Ni rsoladz naa scataa dib zdoo luu rliladz luu Dios; lëëdaaque xnanit luu Loid, ni xniaa luu Eunis, ni nanpaa naa scataque dib zdoo luu rliladz luu me.

⁶ Gacxe waa, laa naa rso diidz lo luu pquiiñ grëse guielbiini ne bneedz Dios lo luu zeene pxobnia naa guic luu, ni bnab naa beenlay me luu. ¡ib csaand luuw! ⁷ Sac gon, laa Dios rneedz zhiEspiritu me lo ne, parne sodziebdraa ne, parne dzaapraa ne xfuers me, gleynieraa ne samiech ne, ni tsabiniraa ne. ⁸ Gacxe nod pe nacne gdzieeb luu, bnee lo miech ganle zha nac Xtiidz Ndzon Jesús; ni niicle gdzieebdgaa luu ne znu niioogyu naa nu, loxaque ne rliladz naa me. Sinque bloo zdoo luu ne ib laa luu no gan grë guielñë rii, loxaque ne quiseed ne miech Xtiidz me, diidz ne rlu ganle zha laa zho lo dol. Ga nagon rquiiñ fuerz ne rneedz Dios lo ne. ⁹ Gotsaa gwi ne ganle laa me psilaa ne lo grëtaa xtoļ ne, ni bredz me ne gban ne zigne racladz me. Ni nacda por pe guielwen ne bdziuuñ ne, sac haxta zeene gard cue guidzliu, laa me psan diidz ne laa me glu ganle pa lotaa rleynie me ne.

¹⁰ Ni niina ne laa me pxeel Jesús (meñ ne rsilaa miech lo dol), laa me blu ganle ne nli nquialadz me ne. Jesús nac meñ ne biaadtiche poder ne rap guielgut, ni biaadlu me ganle parne ygaa miech tib guielmban ne gdziñd dze lozh, none giladz zho Xtiidz Ndzon me. ¹¹ Ible miñ co nagon nacne bzo Dios naa gne naa Diidz Ndzon rii lo miech, pxeel me naa ga naa grë guiedz zaatne nodraa zha

Israel, gaseed naa zho zha naca; ¹² miñcocxe waa znutaa grë ncuaañe nodeed naa. Per ni lalnu ib rtoladzd naa, sac wen wen nan naa cho nac meñ ne rliladz naa, ni nan naa mesi zrieelo yquiaanap me naa nitñëzd naa haxta gaļ dze ne laa me guiaad.

¹³ Bien, güeynaļ grë miñe pseed naa luu, sac gon miñ co nac miñe rquiiñ. Tiblique bliladz Dios, iñe bleynie samiech luu zigne no dziuuñ ne ne nac ne zha ne no xnëz Jesús. ¹⁴ Espiritu Sant meñ ne nacnie ne, me yquiaanap luu, me gacniën luu ib csaand luu zhiwseed Dios, ib csaand luu dziin ne bzo Dios luu guñ luu.

¹⁵ Nanlaxe luu ganle zha been zha Asia, grëse zho bzozit lo naa; zig nac Figel, zig nac Hermoj, mbe psaan zho naa. ¹⁶ Sangue Onesif, rnab naa lo Dios yquia zdoo Dios me grë meñlidz me, sac blactaa biadchoobladz me zdoo naa. Niicle ne znu niioogyu naa nu, per ib beend me ne ntoladz me niaadgan me naa; ¹⁷ sinque zigne blanso me lad guiedz Roma nu, pquiaguib me naa haxta bdziel naa lo me. ¹⁸ Ni zoladzaxe luu ganle, pe zhistaa been me xyudar ne zeene no ne guiedz Efés i; rnab naa lo Dios yquia zdoo Dios me gaļ dze ne laa grëse miech gacredz lo Dios.

2

Dziits so Timoté lo Xtiidz Dios

¹ Xin, sangue luu gon tibaque squi dziits bzo lo Xtiidz Dios, gon ganle Jesús noxco grëse zhizhgab luu.

² Grëse miñe gon luu pseed naa miech, scagaa niina bioxco bneew lo zha ne rgobey luu griello tsie tsienew lo stib miech.

³ Ib gacmband luu zeene noyan luu grë pe guielñë, sinque bioxco been xtsiñ Jesús zigne no guñ luuw, masaque been cuent xmenguiib me nac luu. ⁴ Sac gon, tib zha ne nac menguiib, grieelod sëëb zho pe stib lo cuent ne nacd xtsiñ menguiib, sac none nsin so zho guñ zho tel pe nac miñe rnee meñ ne rnabey zho. ⁵ Bioxco been miñe rnee meñ ne rnabey ne, zig ruñ zha ne rie tib lo wguit; sac zha co telne tsoxcod zho quit zho zigne nacpaa lo wguit, ycaaniad zho premio. ⁶ Been xtsiñ me zigne no gaca, zig ruñ zha ne ran; gon ganle zha ne rioxco ran, zha glopaa rquiiñ guielnzaac ne rac zaatne ran zho. ⁷ Miñe blozh bzet naa nu, bloomiew guic luu, ni Jesús nac meñ ne gneedz guielbiini lo luu guielñ luu zha naca.

⁸ Tibaque psoladz ganle cho nac Jesús, zha brieequia me lo xtiñ rey David, ni zha brieeban me; zig nac naa miñ co rzet naa lo miech zeene rseed naa zho Xtiidz Ndzon me, par laa zho lo xtoļ zho. ⁹ Ni ne nonecxe naa Diidz Ndzon rii waa, gane nroob guielñë ne noyan naa; zig nac niina, laa naa ngadoo zaatne niioogyu naa

nu zootne cho zha dox. Ni niicle ne znu nioogyu naa nu, sangue Xtiidz Dios led yeda nioogyu. ¹⁰ Laa naa quiaxecw miñe quiaadeedtaa naa, zeena grëse zha ne bzooblele Dios gliladz Jesús, grieelo yquiaadiag zho zha laa zho lo dol, ni zha yгаа zho tib guielmban ndzon ne gdziñd dze lozh.

¹¹ Ni znu goñ naca:
Telne xnëzle me no ne zeene laa ne guet, ib zgaa ne guiobannie me ne.
¹² Niicle nroob guielnë dzian ne porne rililadz ne me, scagaa ible dzziñ ne zaatne gnabeynie me ne;
telne guiab ne runbeyd ne me, scaquegaa me ziab me runbeyd me ne.
¹³ Niicle telne riaanladz ne me, sangue me riaanladz me ne; miñe rnee me run mew, sac mesi rtsëed me xtiidz me.

Tsoxco Timoté grieequia xtsiin Timoté

¹⁴ Bien, beencsoladz grë zha bets ne i, zha bzian ne i grë miñ rii. Zig zobwi Dios ganle laa naa rso diidz lo luu, gudz lo zho tildiidzniedraa zho miech grë godiiddz ne paat rquiind; led ncuaañe ndzinlida, loxaque rungüeta guic zha ne rquiaadiaga.

¹⁵ Tibaque bioxco zaacse grieequia xtsiin Dios, miñe noyun luu, zeena wen grieequia luu zeene laa luu gdziñ lo me. Zigne nacse Xtiidz me, sca pseed miecha. ¹⁶ Yquiaadiagd luu grë wseed yozh, ncuaañe ni lalnu paat rquiind; zha ne zienal wseed co, zig zie dze laa zho rrozitraa lo Dios. ¹⁷ Lega nac zhiwseed zho zig nac grë guielguidzdox; sac tel guielguidzdoxa, znuse rded miecha ni zha ne glana ible zet zho. Zig nac Himená grop Filet, wseed co rleynie zho, ¹⁸ sac tel zha zienaldraa zho miñe nac diidzli; rnee zho bleebanle Dios grë mengut. No palal zha ne rililadzle Xtiidz Dios, zeene ron zho miñ co, riendraa zho dien pa miñe gliladz zho. ¹⁹ Sangue zha ne nlipaa no xnëz Dios, tsod pe nacne griee zho xnëz me sac lole me ngab zho; zigne zhobneeque lo Xtiidz me zaatne rnee: "Runbey Dios cho nac zha ne nlipaa no xnëz me"; ni rneequew: "Grë zha ne nlipaa ngab xnëz Jesús, none csaan zho grëse guielntseeb."

²⁰ Zaatne nac lidz tib zha ricw lëë, no grë xtsiin rotie zho miñe niaa or, miñe niaa plat, ni noquegaa miñe niaa yag, miñe niaa beñ. Miñe mazdraa niazh, miñ co rquiin zho rio ncuaañe row miech; laa miñe beelze niaa, ga rgo zho ncuaañe row ma. ²¹ Scaquegaa miech, zeene csaan zho grëse ncuaañe paat rquiind, ible squiin zho lo Dios guñ zho xtsiin me miñe mazdraa nroob, zigne rquiin grë trast niazh co.

²² Nac lo guielngueg, ndal grë ncuaañe ndzinlid rio guic miech run zho, sangue luu

goñ tsienied grë ncuaañ co guic luu, bioxco zaacse wban, dib zdoo luu bnaló Dios, ine bleynie grëse samiech luu, tilnied luu zho; grë zha ne squi nli mbe zdoo, rbedz zho Dios, zaacse wbannie zho. ²³ Ibyquiaadiagd luu grë godiiddz ne paat rquiind, sac goñ loxaque runctiila miech.

²⁴ Zha ne squi run xtsiin Dios, nodne tso zho dien pe tildiiddz zho; sinque none wen gac zho lo grëse miech. None guien zho zha cseed zho miech; ib guieednied zho miech, ²⁵ ndooladz gac zho gnee zho lo zha ne rlëënie Xtiidz Dios. Ni scagaa Dios cxobnia guic grë zha co, yguudz zdoo zho csaan zho grë xquielntseeb zho, gacnañ zho miñe nac diidzli; ²⁶ zeena tsaa zho biini griee zho ladznia mendox, zaatne ngadoo zho.

3

Len dze ne ziaadyob nitlo guidzliu

¹ Ni none gacnañ luu ganle, zeene laa dze ziaadyobpaa nitlo guidzliu, nroob nac guielnë ne gan grë zha ne no xnëz Dios. ² Zrieequia grë zha ne:

gacladz tebaa lose zho yquiin grëtaa ncuaañe no, loxaque dimi gleynie zho, niats gac zho, zdaannie zho ncuaañe ni rapd zho, zneenë zho Dios, gond zho xtiidz pxoz zho, xtiidz xniaa zho; sacd zdoo zho miñe guñ miech lo zho, laa zho gban zigne notaa guic zho, ib yquiaadiagd zho Xtiidz Dios.

³ Gacnañdraa zho pe nac guielwleynie, ib yquiaad zdoo zho, loxaque diidz gzhixcuua zho, lëbd zho gnabey zho xcuerp zho, sacci zho samiech zho, stsidil zho grëse ncuaañe rquiin, ⁴ zgo zho zha ne ndzieeldiiddz zho nia zha ne quin zho,

ni lalnu guielto tsod lo zho, loxaque dien zha gdeed guxt xcuerp zho tso zho, laa ne yguib zho xnëz Dios.

⁵ Squiaalo zho ye zho rililadz Dios, per lo grë ncuaañe guñ zho, ga glu ne rililadz zho me.

Bien, ib ctsieelsad luu grë miech ne sca nac. ⁶ Sac lëë zha ne nacgrë zho ga, rzëeb yu rietisitnie grë wnaa yozh ne zienal ncuaañe gdeedtaa guxt xcuerp. ⁷ Tibaque no zho dieen peraa rseed zho, per ib rioguidc zho miñe nac diidzli. ⁸ Zigne beñ chop zha ne bil diidz dox padzeela, Janes grop Jambres, gocndaan zho lo Moisés; scaque run zha co niina, rlëëniexod zho miñe nac diidzli. Miech yozha, ndzinlidraa nac guic zho, nacd zho zha ne gliladz Xtiidz Dios; ⁹ per gacdaquew xtse, zeene laa diidz guien ganle pe clas miech nac zho, dzigo lëëque grë

ncuaane yozh ne run̄ zho cuae xquiel̄to zho; zigne bzhaacaque zha ne sca blēenie Moisés.

Csaand Timoté mine pseed me

¹⁰ Sanguē luu, nan̄le luu gan̄le zha nac grē mine pseed naa luu. Wen wen nan̄ luu gan̄le zha mban naa, pe no guic naa gun̄ naa, zha dib zdoo naa riladz naa Dios, zha dib zdoo naa rleynie naa samiech naa, rieed-nied naa zho. ¹¹ Nan̄le luu gan̄le zha rneedz Dios xfuers naa, rlēeb naa grētaa mine rteed miech naa, zig been̄ zho naa guiedz Antioqui, guiedz Icon ni Listr, blactaa pquianal zho naa; per tibaque gocnie Dios naa, psilaa me naa lo grētaa guiel̄xtseeb co. ¹² Ni scagaa naca, grē zha ne rquiabladz gban zigne rnabey Jesús, ible squianal miech zho. ¹³ Per probsaxe grē zha ne sca quiaayunctal xtol, zha ne sca noquidie miech, zig zie dze laa zho noteedquie zho nēz ne nitlo zho. Quiaaguitnie zho miech, ni quiaaguitniegaa mendox zho.

¹⁴ Sanguē luu gon̄, csaand luu grē mine pseed luu. Nan̄ween luu gan̄le diidzliw, ni run̄beygaa luu cho nac grē zha ne bneew lo luu. ¹⁵ Ni stiba, zigne ziadroob luu psilo quiaseed luu Xtiidz Dios, ni lēew bdixbiini guic luu gocnañ luu ne Jesús none gliladz miech parne laa zho lo dol. ¹⁶ Dib nace Xtiidz Dios, Espiritu Sant psiaaba guic zha ne pquiaav, laaw biaan: rseeda ne mine nac diidzli, rswod diidz lo ne guien̄ pe la lo quiaxin̄ ne, rseeda ne zaacse gban ne.

¹⁷ Zeena sca grēse zha ne no xnēz Dios, grieelo wen wen cseed zho, ni guien̄ zho zha gun̄ zho grēse dziin̄ ne rquiin̄, dziin̄ ne rieguial̄ zho gun̄ zho.

4

None gnee Timoté Xtiidz Dios

¹⁻² Zig zobwi Dios, zig zobwi Jesús men̄ ndzon ne rnabey ne, laa naa rso diidz lo luu, bnee Xtiidz Dios lo grēse miech. (Jesús nac men̄ gun̄quizh miech grētaa ncuuaane been̄ zho, zigtāa zha ne mbanāa zigtagāa zha ne gutlew, zeene gdziñ dze ne laa me guiaad gnabey me.) Bioxco tel̄ pa hortaa bneew lo zho, niicle zeene rzac luu riobda. Bloo guic zho gliladz zhow, bnee lo zho zeene gan̄ luu pe falt ne noyun̄ zho, ni scagaa bloonley zdoo zho. Bioxco tibaque pseed zho, ib guieednied luu zho. ³ Sac gon̄, zdziñ dze ne siguiel̄draa miech yquiaadiag zho mine nac diidzli; sinque laa zho yquiaaguib zhaase dien̄ cho cseed zho tel̄ pe nac ncuuaane rdziladzse zho yquiaadiag zho. ⁴ Gleyndied zho Xtiidz Dios, laa ne yquiaadiag zho mine nac xtiidz me, lel̄ laa zho tsoxco yquiaadiag zho grē mine nac zhiwseed miech guidzliu. ⁵ Sanguē luu gon̄, nsin̄ bzo gdeete luu diidz gun̄güet zho luu.

Zaacse been̄ grē mine pso Dios luu gun̄ luu, bnee lo miech zha laa zho lo dol; niicle tel̄ pe nactaa guiel̄nē ne noded luu, gacmband luu.

⁶ Rien̄ naa ziaadyoble ne laa naa gbi lo guidzliu rii, zhile gdziñ dze ne laa zho gut naa. ⁷ Len̄ ngbidz ne wban naa, tibaque dib zdoo naa biladz naa Dios; xtsiin̄ mew, laaw ben̄ naa zigne bnabey me naa, ni laaw psiaalga naa niina. Zigne run̄da grē menguiib ne rie lo dil̄, sca bleeladz naa naa ben̄ naa xtsiin̄ me; ⁸ laa na nagon̄, mine quiambēzse naa nac premio ne no gneedz me lo naa. Lēē premio co gneedz me gal̄ dze ne guiaad me guiaadgun̄ me guiel̄wxtis; ni led loxaque naadse ygaaw, sinque grēse zha ne rleynie me, grē zha ne dib zdoo quiaambēz gdziñ dze ne guiaad me stib, grēse zha co ygaā premio co.

Tsienib Timoté

⁹ Bzhiguieł̄ guiaadnib luu guiaadgan̄ luu naa nu; ¹⁰ sac zig nac Demas, laa me bichele lo naa. Psañaque me naa nu laa me zie nēz Tesalónica; sac mazdraa nonie grē ncuuaane lo guidzliu rii guic me. Bay zig nac Crescent, laa me brieē zie me nēz Galás; Tit na, zieegaa nēz Dalmás; laa zho zie zaatne nacle diidz tsie zho. ¹¹⁻¹² Niicle Tic guien̄d nu, sac laa me pxel̄ naa zie me Efés. Loxaque Lucse biaan lo naa nu.

Psoladz gon̄ tsieguib luu Marcw, zeene laa luu guiaad nēz rii bzhiguieł̄ guiaadnie luu me; sac rquiin̄ me nu gun̄ me xyudar naa lo xtsiin̄ Dios. ¹³ Ni psoladzpaa guiaadnie luu lar ne rbiix naa, mine psañ naa guiedz Troas lidz Carp; ni guiaadnie luu grē xquits naa. Ib guiaanladz luu mine nac grē guits nroob ga.

¹⁴ Tel̄ gan̄ luu gan̄le nzian̄ ncuuaane nonguiel̄draa been̄ Lejandr naa, men̄ ne nac wncadzguib ga; per Diostaa nan̄ zha gun̄quizh me Lejandr grē mine been̄ Lejandr ga. ¹⁵ Ni niicle luugaa gon̄, nsinaque bzo lo me; sac ne nlipaa rlēenie me wseed ne nolu ne lo miech nu.

¹⁶ Zeene glopaa gocredz naa lo wxtis, choot bzēd nrree xfavor naa, grēse zho biche lo naa; rnab naa lo Dios gun̄quizhd me zho mine been̄ zho, sca psaan̄ zho naa. ¹⁷ Sanguē men̄ ndzon ne rnabey ne psaan̄ me naa, me pchoobladz zdoo naa, haxta bdeeda diidz bnee naa Xtiidz me lo grē zha zit rii. Sca gocnien̄ me naa, gun̄ naa cuent role meedz psilaa me naa; ¹⁸ ni niicle niina-gaa, nan̄le naa ne ib silaa me naa lo grētaa ncuuaane racladz miech cteed zho naa, ni me yquiaaanap naa haxta gal̄ dze ne laa me gdziñnie naa zaatne rnabey me gbaa. jMe rieguial̄ guiaannon̄ gzataa dze, niicle nadzew, gzheew, ni grēragaa len̄ izdoo ne ziaada!

¹⁹ Bzhiguiel bdeed tib zhibdiuzh naa lo Aquil i grop Priscil, ni lo grë zha ne no lidz Onesifr. ²⁰ Gacnañ to ganle, laa bets ne Rast biaan Corint, laa Trófimo biaan guiedz Milet, sac rzacnë me. ²¹ Bioxco gon guiaad-niob luu, zeena blansole luu nëz rii zeene laa mëë naļ sëëb. Pcaania zhibdiuzh Eubul, zhibdiuzh Pudent, zhibdiuzh Lin, zhibdiuzh Claud; ni grëragaa zha bets ne, zha bzian ne, zha ne no nëz rii, laa zho rxeeļ bdiuzh lo luu.

²² Jesús men ndzon ne rnabey, me gacnie luu. Dios glu lo to ganle pa lotaa noxco me to. ¡Me gunlay to grëse to!

Pabl

GUITS NE PXEEL PABL LO TIT

¡Diuzh Tit!

¹ Naa nac Pabl, tib ngundziin win nac naa lo Dios, tib zha ne pxeel Jesús nonee Xtiidz Ndzon me lo miech. Laa naa none xtiidz me, zeena grëse miech ne bzooblote Dios, gliladz zho me, gacnan zho zhapaa nac wseed ne zional ne (wseed ne rnee zha none gbannie miech Dios), ² wseed ne rlu ganle ible laa ne quiambiaaz ygaa ne tib guielmban ne gdziindraa dze lozh. Ansraa ne tsaaguidzliu, laa Dios bzeetle ne laa me gneedz guielmban co, ni mesi gon led yed me rquidie. ³ Ni niina ne laa dze co bdziin, laa me blu lo ne ganle zha nac xtiidz me, mincopaa nagon bzo me naa none naa lo miech. Lëe me ga nac Dios ne psilaa ne lo dol.

⁴ Laa naa rxel guits rii lo luu gon Tit. Rzaac naa luu zig tib xpëed naa, sac nan naa nli dib zdoo luu rliladz luu Dios zigne rliladz naa me.

Rnab naa lo Dios men ne nac Pxoz ne, ni lo Jesús men ne psilaa ne lo dol, glu me ganle pa lotaa noxco me luu, zeena peet zhgab ctseebd luu.

⁵ Rsoladzaxe luu ganle, zeene psan naa luu lo guidzliu win ne lë Cret i, laa naa psan luu zeena lozh gun luu grëraa dziin ne no gac i, ni psan naa diidz lo luu zha gzo luu zha ne so gnabey lo grë zha ne rliladz Jesús, tib tib guiedz qui. ⁶ Bien sca, zeene gzo luu zha co, ga rquiin:

tib zha ne zaacse mban, zeena peet glisquid miech lo zho;
tibaque wnaa ne mbannie zho, men ne nacse tsieel zho,
zaacse quiachoob zho xpëed zho, rliladz mëed Dios (zëëbd diidz pe guielntseeb ne noyun mëed, o rondgaa mëed diidz).

⁷ Sac zha ne sca so lo grë zha ne no xnëz Dios, ib none gac zho tib zha ne ndzinli mban, sac gon xtsiin Dios ga gun zho. Nodne gac zho:

zha nlëëguic,
zha ngonziu,
zha nad ron diidz,
zha nguibdij,
zha ne rzonal dimi.

⁸ Sinque none gac zho tib zha ne:

ndzinli nac guic,
ine niowse rdeed zho zaatne rbëz miech ne rdzintaa lidz zho,
rioxco zho run zho niapse ncuuaane rquiin lo samiech zho,
zional zho gac niapse mine nac diidzli,
rioxco zho run zho niapse mine rnabey Dios,

rrieelo zho rnabey zho guic zho, rnabey zho xcuerp zho.

⁹ Ni none tibaque tsienal zho mine nac Xtiidz Jesús, mine pseed zho; zeena guien zho zha gnee zhow lo grë zha ne gard tsoguc zha naca, ni grieeelo zho glu zho lo grë zha ne rlëenie Xtiidz Jesús, guien zha co nonguielda ga glëenie zhow. ¹⁰ Sac no ndal grë zha ne nëd gon Xtiidz Jesús niina, ncuuaane paat rquiind rseed zho miech, rquidie zho; ni lëepaa zha ne sca run zha Israel. ¹¹ Gacxe waa, ib none guioog ro zho; sac gon par cueexlëse zho dimi no zho noseed zho miech grë ncuuaane paat rquiind; zaatne no tib yu miech, grëse zho rquidie zho.

Bien sca gon nsin bzo lo grë zha Cret i. Sac gon, ¹² tib menladzaque zho, tib men rac lo zho bzeet ganle zha nac zho zeene znu bnee me: "Nandraaque zha Cret, loxaque noquidielsa zho samiech zho. Masaque mban zho zigne mban grë ma ntseeb ne no guix; loxaque gowse zho zienie guic zho, rbech zho gun zho dziin." ¹³ Ni nligaa sca nac zho. Gacxe waa, bien gdziguiend luu grë mine run zho, goctox lo zho zeena sodziits zho lo Xtiidz Ndzon Jesús mine no gliladz zho. ¹⁴ Bnee lo zho yquiaadiagdraa zho beelze pe grë godiidz ne rbeebey zha Israel, ni niicle yquiaadiagdga zho grë mine rnabey zha ne rlëenie Xtiidz Ndzon Jesús.

¹⁵ Golgan ganle, grë miech ne ndzinli nac guic, zha ne mbe xquielrien, ncuuaane notaa, mbe naca lo zho; sangue zha ne rliladz Xtiidz Dios, zha ne ndzinlid nac guic, tsod tib ncuuaane mbe glulo lo zho; sac desde zdoo zho, desde xquielrien zho mbed. ¹⁶ Rnee zho runbey zho Dios, per rlu nliida sac ndzinlid mban zho. Zha yozha, xquielndaan yozh zho zienie zho, led zha ne guiabd ne gun ncuuaane yquiina.

2

Znu nac Xtiidz Ndzon Jesús

¹ Sangue luu gon, none gnee luu lo grë miech qui zigne nacse Xtiidz Jesús. ² Grë men bgui ne nac zha gol lo to i, bnee lo zho: tibliladz gac zho, gund zho ncuuaane cuee xquielto zho, quix zho biini, ncuuaane ndzinli tsienal zho gun zho; tiblique gac zho lo Xtiidz Jesús, gleynie zho samiech zho, ni dziits so zho tel pe nactaa grë guielnë ne noyan zho.

³ Scaquegaa grë men wnaa ne nac zhagol, bnee lo zho: gban zho zigne no gban zha ne nole xnëz Dios, gzhixcuaad zho diidzguizh, gzudzd zho.

None zaacse gac zho, ⁴ zeena zha glu lo grē wnaa nguieg zha gban zho. Cseed zho grē wnaa nguieg:

gan zho tseeel zho,

gan zho xpēed zho,

⁵ gac zho tib wnaa nix biini,

quintniad zho tseeel zho;

zaacse gan zho xtsiin zho,

niowse gac zho, niowse gnee zho,

gon zho xtiidz tseeel zho; zeena tsod pe nacne gneenē miech Xtiidz Dios.

⁶ Ni scaquega bnee lo grē zha bgui nguieg, gac zho zha nix biini. ⁷ Luuzhal zaacse been grēse ncuaañe no gan luu, zeena ga gwi zho ganle zha none gban zho. Zeene cseed luu zho, ine tibladz goc, gun luu ne quitnie luu zho. ⁸ Bguib diidz ne gnee luu, zeena choot peet glisquid lo luu; ni scagaa, grē zha ne rlēñie Xtiidz Jesús, stoladz zho zeene gan zho guien pe glisqui zho lo ne.

⁹ Grē zha ne lega run xtsiin ben, pso diidz lo zho gon zho xtiidz men ne quia zho xtsiin, niowse gac zho, niowse gnee zho, yquiabrod zho lo me. ¹⁰ Ib cuand zho, sinque ine ti miech mbe lo gac zho; zeena ga gan miech ganle zha niowtaa nac lo xquiemban zha ne zienal Xtiidz Dios, men ne psilaa ne lo dol.

¹¹ Grē diidz rii nagon pso lo zho. Got-saa gwi ne ganle zha noxcotaa Dios miech, gacxe psilaa me ne lo dol waa; ¹² sac laa me racladz csaan ne grēse guientseeb, csaan ne grētaa ncuaañe rleynie zha ne nod xnēz me, guien ne ndzinli gban ne, tibaque gwi ne dien pa min wen, pa mingaa wend, ine dzioxco ne gban ne zigne racladz me. ¹³ Sca none gban ne, haxta dzianlo ne gdzin dze ne laa Jesús guiaad stib, zigne psanle Dios diidz; gal dze co, laa me guiaad con grē xquieindzon me. Me nac Dios ro ne riladz ne, me psilaa ne lo dol. ¹⁴ Sac gon, me bgaadz guiegut ne niogual ne, me bdiizh grētaa guientseeb ne bdziun ne, psanmbe me ne lo grētaa ncuaañe bdziun ne; gane niina, lo me ngab ne, ni none dzioxco ne gban ne zigne rnabey me.

¹⁵ Grē min rii nagon pseed grē miech qui, bnee lo zho gban zhow. Zeene riegala gdziebd luu goctox lo zho, sac gon luu riegual gnee lo zho. ¡Sca been, zeena choot quintniad luu!

3

Znu riegual gban zha ne no xnēz Dios

¹ Been soladz zho ganle none gon zho mine rnee grē zha ne nac wxtis, gac zho tib zha nguzobdiidz, ni ib soliaadz zho gan zho grē tel pe ncuaañe yquini lo samiech zho.

² Guien zho gneenē zho samiech zho, ine zaacse gbannie zho samiech zho, niowse gac zho, niowse gnee zho, ni zeene cho lo

gnee zho none ndooladz gac zho, ndooladz gnee zho.

³ Sac gon haxta ne, ib peet riend ne glo, ntseeb goc ne, bdiits ne grē mine rnabey Dios; laa ne ziole nēz ne nitlo ne hor co, masaque bgadoo ne lo grētaa ncuaañe racladz xcuerp ne, lo grētaa ncuaañe ndzinlid ne bley ne bdziun ne. Niapse guientseeb bional ne, nē rac zdoo ne rdzian ne ncuaañe quianie, ncuaañe run stib miech; zigtaa row rzhizh zdoo zho gon zho ne, scaque ne, zha ne rdziantaa ne, row rzhizh zdoo ne bdzian ne zho. ⁴ Per bdzin dze, zeene laa Dios (men ne psilaa ne lo dol) blu ganle pa lotaa nac xquie wen me, pa lotaa nquialadz me miech, ⁵ laa me psilaa ne; per guiabd ne togo por pe ncuaañe wen ne bdziun new, sinque porne quia zdoo me new. Psanmbe me ne lo grētaa xtol ne, rriequia gol ne ga stib, ni bzhixcuaa Espiritu Sant lo xquiemban ne. ⁶ Niapse por Jesús men ne psilaa ne ga, laa Dios pxeel Espiritu Sant rneedz me grēse guiebiini ne rquini lo ne. ⁷ Por mine been Jesús ni mine been Espiritu Sant laa ne biaanwen lo Dios; ni porne noxco me ne gane bnabey me sca goca. Gane niina, ndion ne ib zгаа ne tib guiemban ne gdzind dze lozh, sac ib sca nac xtiidz me.

⁸ Mine rne naa lo luu nu, diidzliw. Racladz naa tibaque gnee luuw lo grē zha qui, zeena grēse zho ne nac zho zha ne riladz Dios, tsoxco zho gan zho niapse grē ncuaañe ndzinli; sac gon, min co nac mine nonguiel, ni mincogaa rquini lo grēse miech.

⁹ Biche lo zha ne racladz tildiidznie luu grē ncuaañe paat rquiind, zig nac grē godiiz dien pe been grē mengol padzeela, dien pe nonguiel tsienal ne ley, te nonguiel da ye. Ncuaañe paat rquiind ga, loxaque runctila miech; ni lalnu rieguald gaqueta.

¹⁰ Tel cho zha ne rsilo rgodil grē zha ne riladz Dios, blisquiw lo zho. Bnee lo zho tib, tel gan luu rond zhow, bnee lo zho stib; telne rondaque zhow, dzigo bzonēz zho gan zho dien pa nēz tsie zho. ¹¹ Zha ne sca run, gase rlu ne zieniedraa guic zho gon zho mine rnabey Dios; sac nanpaa zho dol ga, ni laa zho runa.

¹² Laa naa no cxel tib zha ne guiaad i, yase cxel naa Artem o cxeelgaa naa Tic. Zeene glanso zho i, siguieel luu guiaad luu Nicópolis ga gdzieel ne; sac ib ga ni naa cuēz naa len mēē nal ne ziaad nu. ¹³ Laga no luu i, bioxco zaatne grielotaaw been xyudar Apol grop me licenciad Zenas. Bdeed grē tel pe ncuaañe yquini zho nēz; zeena peet gunfalte lo zho, grielo gdzin zho zaatne no tsie zho. ¹⁴ Grēse zha ne nacgrē ne ne riladz ne Jesús, none cseed zho gan zho xyudar zha ne no liaadz; glu zho ganle rquini zho, led zhlēd mban zho.

¹⁵ Grëse zha ne no lo naa nu, laa zho rxeel bdiuzh lo luu i. Bzhiguiel bdeed tib zhibdiuzh no lo grëse zha ne rleynie no i; sac ye zho riladz Jesús.

Guiaannie Dios to sca dien. Peet tsienied guic to, me gacnieñ to; sac gon me noxco grëse zhizgab to.

Pabl

GUITS NE PXEEL PABL LO FILEMÓN

¡Diuzh Filemón!

¹ Naa nac Pabl, laa naa no ladzguiib nu loxaque ne quiayun naa xtsiin Jesús; grop no Timoté laa no rquia guits rii.

Laa no rxeela lo luu gon Filemón, ne nli-gaa rleynie no luu squi ye luu noyun xtsiin Jesús. ² Laaw ziaad lo to i gza to bzian ne Apia, bets ne Arquip tib zha ne noyunaque dziin rii, ni grëraa zha bets, zha bzian ne rcaalsa lidz luu i.

³ Dios, men ne nac Pxoz ne, ni Jesús men ndzon ne rnabey, me glu ganle pa lotaa noxco me to, zeena peet zhgab ctsebde to.

⁴ Ib riaanladz naa luu, zeene rzodiidznie naa Dios, tibaque rded naa xquizh lo me squitaa noneedz me guielbiini lo luu. ⁵ Sac ziyonle naa squitaa dib zdoo luu rliladz luu Jesús, rleynie luu me, ni scaque rleynie luu grë zha ne ngab lo me. ⁶ Rnab naa lo Dios, grëse mine noseed luu grë zha ne no i, tsoguic zhow, zeena yгаа zho grëse guielnzaac ne rdeed Jesús lo grë zha ne ngab lo me. ⁷ Rley naa gon bets, sac zigtaa naa zigtagaa grëraa zha ne ngab lo Diosa, blac-taa ziechoobladz luu, zigonley luu zdoo no, rlu luu ganle nli rleynie luu no.

⁸ Niicle ne rieguiala gnabey naa luu mine racladz naa gun luu, sac gon Jesús bzo naa none naa Xtiidz me, ⁹ per gnabeyd naa luu, sinque laa naa rnab lo luu yquiaadiag luu ganle zha racladz naa; sac gon ndion ne zigne rleynie naa luu, scaque luu rleynie luu naa. (Gon ganle, mengol ne nac Pabl nu nonee lo luu, laa naa nioogyu nu loxaque ne quiayun naa xtsiin Jesús.) ¹⁰ Niina gon ne laa Onésimo glanso lidz luu i stib, bzhiguiel zaacse pcaania me, gon ganle rrieequia mëéd nac me lo naa niina, sac nu len ladzguiib nu bne naa Xtiidz Dios lo me, xquizhгаа Dios bliladz mew.

¹¹ Nli glo tib zha peet xtsiind nac me lo luu, sangue niina gon, zigtaa lo luuw zigtagaa lo naaw nroob yudar ne gun me. ¹² Laa me biire ziaad lo luu i, niowse pcaania me; masaque been cuent naa i zial i. ¹³ Gocladz naa mbéz me lo naa nëz rii, zeena me niun dziin lo naa nu xcuent luu, ne znu nioogyu naa nu loxaque ne noseed naa miech Xtiidz Ndzon Jesús. ¹⁴ Per gocladz naa niunga naa mine no guic naa, ni nand naa dien pe gnë luu; gane ni naa mazd telne zrieelow, per zdoo luu gala.

¹⁵ Nli laa Onésimo biche lo luu palal dze; per niina ne laa me glanso lo luu stib, lëé guiaanle me lo luu i. ¹⁶ Per bien gon, sacdraa luu me niina zig tib zha ne runse xtsiin luu,

gon ganle rrieequia tib bets luu i, tib zha ne nziiu lo luu i nac me. Tel naa, sca rzaac naa me, gacxe waa none gleynie luu me; sac gon tel niina, led loxaque tib ngundziindse nac me lo luu, sinque ye tib bets luu nac me, sac gon ye me ngab lo Dios.

¹⁷ Telne nlipaa rzac luu naa zig tib bets luu, porne tibaque men ne rliladz ne, nana sca been cuent naa i zial i, pcaania me zig nac zeene naa glanso lidz luu. ¹⁸ Ni tel no pe guielqui ne been me lidz luu, tel pe zëebгаа me lo luu, lo naa bnaba. ¹⁹ Wi ganle, naazhal pquia diidz rii nu: Naa quizha. ¡Zig nac luu, gon ganle zëèble luu lo naa, ni haxta nroobraa zëèb luu! Sac gon, naa bnee Xtiidz Dios lo luu laa luu bгаа guielmban ndzon ne gdziind dze lozh.

²⁰ Sca gon bets gaca, bzhiguiel been guielnzaac co; bloonley zdoo naa, bien ganle tibaque lo men ne ngab ne.

²¹ Laa naa pxel guits rii lo luu, sac rien naa ible zon luu mine rne naa lo luu nu, rgobey naa haxta nroobraa mine gun luu lo mine rnab naa. ²² Lëé nëzle nu rnabaque naa lo luu, siguiel luu gneedz luu lidz luu cuéz naa zeene laa naa guial i; sac rien naa ib zun Dios mine quianab to lo me, zneedz me diidz guial naa guialgan naa to.

²³ ¡Dios guiaanle luu sca! Pcaania zhib-diuzh Epafz; men ne nioogyunie naa len ladzguiib nu loxaque ne rdziun no xtsiin Jesús. ²⁴ Scaqueгаа zla zha ne quiadzi-uungza no dziin, zig nac Marcw, Ristarc, Demas ni Luc, gza zho laa zho rxeel bdiuzh lo luu.

²⁵ Jesús men ne rnabey ne, me glu ganle pa lotaa noxco me luu. ¡Me gunlay luu!

Pabl

GUILTS NE BEY LO GRË ZHA ISRAEL

¹ Padzeela, ndal vuilt bnee Dios lo grë pxozgoldoo ne, pxeel me grë zha ne biadteed xtiidz me lo zho, bnabey me grë zha co zhaase zhaase mod ne bnee zho. ² Sangue niina, Xpëedpaa me Jesús pxeel me biadnee xtiidz me lo ne. Jesús men ne bzaagrop me grëtaa ncuane no, ni men ne bzo me gnabeya grësew. ³ Zeene biaad Jesús lo guidzliu, me blu ganle zha ndzontaa Dios, zhapaa nac Dios, sac gon grë anjl, mese nac zho run zho dziin lo Dios, rxeel me zho rquianap zho zha ne nacle diidz laa lo grëtaa guielnë ne csiaab me.

⁴ Ga rlu ganle men nroob nac Jesús, led lega lëd me Xpëed Dios; men nroob nac me lo grë anjl. ⁵ Ni tib lo anjl bneed Dios zigne bnee me lo Jesús, zeene rëb me: "Xpëed naa nac luu. Desde nadze laa zho guñbey ne Xpëed naa nac luu." Stib vuilt zeene bzeet me Jesús, rëb me: "Xpëed naa nac me, naa nac Pxoz me." ⁶ Ni zeene biaad Jesús lo guidzliu; men ne nac Xpëedpaa me ga, rëb me: "Grëse xanj naa, none yquitsgzhib zho lo me."

⁷ Zaatne raquiet anjl, rneew: Tib mandadse nac zho lo Dios, pale zigne rzhoon me sca rzhoon zho rie zho zaatne rnabey me zho; me rnabey rlu zho zigne rlu bel.

⁸ Sangue zaatne raquiet Xpëed me, rneew: Dios, luu nac men ne zobnabey, ni gdziñ dze ne griece luu; zeene run luu guielwxtis, zigne rieguiala sca run luuw.

⁹ Ni palal rdziguiend luu grë guielntseeb, niapse ncuane ndzinli, ncuane nonguiel, min co rleynie luu; min co gane bzooblo Dios luu, nac luu men ne rnabey, luu nac men ne mazdraa nroob guielbley bgaa.

¹⁰ Laa stib lugar rnee: Men rnabey nac luu, luu bzaa guidzliu, luu bzaa gbaa dib nacsew.

¹¹ Nli dzin dze nitlo grë ncuane co, grësew zlozha zigne riozh grë lar,

¹² dzigo laa luu ctibëda, zig rdibëd grë lar, laa luu cuee stib min cub; zigne run zha ne rtsëexab.

Sangue luu, tibaque nac luu, nacd luu men ne nitlo, nacd luu men ne lozh xquielmban.

¹³ Haxta rëb Dios lo me: Cue naa nëz derech, nu bzob,

nieda lozh gnaz naa zha ne rlëë lo luu, csan naa zho ladzniia luu.

Nligaa men nroob nac me lo grë anjl, sac ni tib lo anjl bneescad Dios. ¹⁴ Lo me ga sca bnee Dios, sac gon grë anjl, mese nac zho run zho dziin lo Dios, rxeel me zho rquianap zho zha ne nacle diidz laa lo grëtaa guielnë ne csiaab me.

2

¹ Gacxe nagon waa, gotsaa guien ne ganle ib none dzioxcu ne wen wen gwi ne zha nac Xtiidz Ndzon Jesús mine zidzion ne; zeena gnitnëzd ne. ² Sac gon, niicle zeene xanjlse Dios biadteed xtiidz me lo miech padzeela, ni gocnona; grëse zha ne güeynalda, pteed Dios zho caxtigw ne rieguial zho. ³ ¿Pe lelgue niina dzigo ne Jesús zhal biadnee zha laa ne lo dol? ¿Zha dien tedlaa ne lo caxtigw, telne dzioxcod ne mine rnee me? Nli zha ne binlew zha co biadneew lo ne, per me nac men ne psilo bneew; ⁴ niicle Diosgaa, blactaa grë ncuane quialu me, blactaa grë milagr ne run me, rlu me ganle ne nli diidzli biadseed zho ne; ni zhaagaa grë guielbiini ne ral zdoo me rdeed Espiritu Sant lo grë zha ne dib zdoo rnalo Jesús.

Jesús nac men ne grieelo gdzinnie miech lo Dios

⁵ Zig nac lo guidzliu cub ne ndion ne naraa gneezd Dios, psand me ne anjl gnabey low. ⁶ Lo Xtiidz me zhoobnee ganle zeene znu rëb David lo me:

¿Cho nac miech ne squitaa noxco luu zho? Zig nac tib men qui, ¿pe nacne squitaa runnon luu me?

⁷ Tib blase dze psanwin luu me palal lo grë anjl; na laa luu psanglaa me stib, beennon luu me, bzo luu me mele gnabey.

⁸ Grëtaa ncuane no, laa luu psana ladzniia me.

Nli gard gac grë mine bnee David ga, ⁹ per ndionle ne ganle zha psanwin Dios Jesús lo grë anjl tib bla dze, ni blozh ga zeene laa me gut xcuent ne grëse ne, hor co laa Dios biire psanglaa me, laa Dios biire beennon me. Ni nligaa noxco Dios miech, nquialadz me ne, gane bdeed me diidz gut Jesús psilaa me ne lo grëse xtole ne.

¹⁰ Ible sca gocladz Dios, men nroob ne bzaa grëtaa ncuane no, ible me bdeed diidz scataa grë guielnë ne gon Jesús; gane niina, Jesús nac men ne grieelo ner lo grëtaa miech guizhiu ne no ygab lo me, gdzinnie Jesús zho lo guielndzon ne no me.

¹¹ Grëse ne ne nac ne zha ne psanmbe Jesús ngab ne lo Dios, yeke ne nac mëed lo Dios. Gacxe waa, rley Jesús rnee me bets me nac ne; ¹² no tib lugar lo Xtiidz Dios zaatne raquiet zeene znu rëb me:

Zne naa lo grē bets naa, gacnaḡ zho gaḡle cho nac luu;
ni zeene ycaalsa zho grē zho, tipse dzioolnie no luu.

¹³ Stib vuelḡ rēb me:

Dios nac meḡ ne rnalo naa.

Ni rēb me:

Laa naa nu, quiaacnie naa grē zha ne nac xpēed Dios.

¹⁴ Miḡ co gane, zigne znu nac ne miech, scaque Jesús goc me miech zigne nac ne. Sca bdeeda diidz gut me, ni zeene gut me, ga psanwin me meḡdox, sac glo masaque ladznia ma no miech par gnitlo ma zho.

¹⁵ Sca psilaa me grē miech ne ngadoo lo guielgut; rrieequia ngadoo zho, sac tibaque nonie xtseb guielgut guic zho.

¹⁶ Ni wen wen ndioḡ ne gaḡle, zeene biaad Jesús, biaate me par gacnie me grē anj, sinque laa me biaad par gacnie me grē zha ne no ygab lo Dios. ¹⁷ Gacxe waa, goc me zig nac miech, zigne nac ne ne nac ne bets me; ni parne scagaa grielo gac me pxoz nroob ne gnab lo Dios por ne. Pquia zdoo me ne, bloogon me me bdiizh me grētaa xtoḡ le; ¹⁸ nroob nac grē guielnē ne bded me, pquianaḡ meḡdox nquiiḡ ma me niab me lo doḡ. Ni ne mezhah bded grē miḡ co, nanpaa me zha rzac zha ne nodeda, gane ible zacnieḡ me zho.

3

Guḡndipde to zdoo to

¹ Bets, bzian, to ne nac to zha ne bredz Dios ngab to lo me; goḡguieḡ cho nac Jesús, meḡ ne pxeel me biadteed xtiidz me lo miech, meḡ ne bzo me nac pxoz nroob ne rnalo ne niina.

² Tib meḡ nguzobdiidz brieequia Jesús lo Dios, zigne nguzobdiidzaque brieequia Moisés zeene pquianap me grē zha Israel.

³ Per Jesús nac meḡ ne non, sac goḡ lo me ngab grē miech co, laa Moisés loxaque pquianap me zho. ⁴ Zig nac zha ne rzhix-cuaa tib yu, nli non zho, per mazdraa non meḡ ne bzaa grētaa ncuaaḡe no; ni lēē meḡ co nac Dios. ⁵ Nli bin Moisés diidz beḡ me xtsiḡn Dios, per laa me gocse zig tib ngūdzin pquianap me grē zha Israel co, ni pteed me xtiidz Dios lo zho. ⁶ Saḡue Jesús, Xpēed Dios nac me, ni me rnabey grēse zha ne ngab lo Dios. Ni grēse ne, ne nac ne zha ne no xnēz me, lo Dios ngab ne; totsaque iḡe nley gac ne dib zdoo ne yquiambiaaz ne gac grē miḡe nacle diidz gneedz me lo ne.

⁷ Ndioḡle ne sca gaḡle, meḡ ro nac Jesús, gacxe waa gotsaa gwi ne gaḡle zha raquiet lo Xtiidz Dios rnee Espiritu Sant lo ne, rnee me:

Teḡne gon to gnee me lo to nadze,

⁸ guḡndipde to zdoo to,

guḡde to zigne beḡ grē pxozgol to, gocntseeb zho lo Dios, zeene sca mban noded zho, no zho grē dan ngan co.

⁹ Ga raquiet gaḡle zeene znu rēb Dios:

Ncuaaḡe lēbdrāa guic naa beḡ zho,

per dipse leḡ choo iz, blactaa ncuaaḡe goḡ zho beḡ naa.

¹⁰ Zeene goḡ naa scataa nac zho,

laa ne gon zho diidz tsie zho nēz ne rlu naa lo zho, leḡ zhaa ncuaaḡe ruḡ zho;

nacne nli beḡngulēē zho guic naa.

¹¹ Lo guielblēē co, bdeḡe naa diidz ndziḡ zho zaatne nded naa ndziiladz zho.

¹² Bets, bzian, goḡguieḡ sca gaḡle ib guḡndipde to zdoo to, zeena sozite to lo me ne nac me Dios nguiamban. ¹³ Gzataa dze, goḡnee lo grē zha ne nacgrē to (nasraa laga rdeeda diidz), zeena ni tib tsienald grē ncuaaḡe ruḡctal xtoḡ miech, lozh ga lēēw yquiaaqui gacntseeb to lo Dios. ¹⁴ Sac goḡ, par gdziḡ ne zaatne no Jesús, ib none tiblīque gac ne, tibaque gnalo ne Dios zigne bnalō me me zeene psilo bdziuuḡbey ne me.

¹⁵ Ni nadzegazh none dzioxcō ne miḡ co. Goḡsoladz gaḡle zha rnee lo Xtiidz me:

Teḡne gon to gnee me lo to nadze,

guḡndipde to zdoo to,

guḡde to zigne beḡ grē zha ne sca gocntseeb lo me ga.

¹⁶ Ni lēē miḡ co goḡ bzhaac zha ne güeybee Moisés Egipt. Bin zho bnee Dios lo zho ni blozh ga gocntseeb zho lo me, ¹⁷ beḡctal zho xtoḡ zho. Dipse leḡ choo iz ne sca bio zho dan co, bieednie me zho. ¹⁸ Zeene goḡ me rond zho xtiidz me, nacne bnee me lo zho rēb me gdziḡnd dze ne gdziḡn zho zaatne ndeed me ndziiladz zho. ¹⁹ Ni nli gaaw bdziḡnd zho, grēse zho gut dan co; sac sca beḡndip zho zdoo zho, ib bliladz zho miḡe rnee me.

4

¹ Sca nagoḡ bzhaac grē miech co. Gacxe nagoḡ waa, zig nac niina ne laa me rnee gaḡle laa me gneedz lugar ne gdziiladz gaa ne, none ndzinli gac ne, zeena ni tib choot sacd zig bzhaac grē zha co. ² Sac zigne nagoḡ nonee Dios lo ne niina dien zha gdziḡn ne zaatne gneedz me ga, znuque bnee me lo zho; per zhlēse bin zhow, ib bliladz zhow dib zdoo zho. ³ Sac loxaque zha ne dib zdoose riladz xtiidz Dios, zha cose zrieelo gdziḡn zaatne nacle diidz ga gdeed me gdziiladz zho. Miḡcōcxe waa, zeene goḡ me bliladz zha co xtiidz me, bdeete me diidz ndziḡ zho ga.

Niaale zaatne gdziiladz zho ga, nolew zeene blozh bzaa Dios grētaa ncuaaḡe no. ⁴ Sac goḡ rnee lo Xtiidz me: "Xoop ngbidz bzaa me grētaa ncuaaḡe no, laa zeene goḡ ngbidz gadz laa me bdziiladz."

⁵ Niaalew

nagon, sinque ne gocontseeb zho lo me gane bdeete me diidz ndziñ zho.

⁶ Grè zha ne glo gocnan xtiidz me ga, brielod ndziñ zho; per zig nac niina, laa me bii quiambèz sèeb grèraa zha ne no sèeb. ⁷ Gacxe waa, laa me biire pso stib dze ne yгаа zho guielnzaac co. Lèë miñ co ga znu bzeet David, zeene rëb me: "Telne gon to gnee me lo to nadze, gunndipde to zdoo to." Ndaldoole iz sca bzhaac grè zhagol co, dzig-oraа znu bzeet David; ⁸ ga nagon rlu no stib lugar ne gdziiladz miech. Nacdraaw zaatne bdziñnie Josué grè zha ne biaan zeene blozh gut grè zha ne gocontseeb ga; sac telne lèële lugar co ga, nsodraа Dios stib dze ne yгаа miech guielnzaac co. ⁹ Miñ co nagon, ndion ne ible no stib lugar co, ni ga gdziñ grèse zha ne ngab lo Dios. ¹⁰ Grèse zha ne gdziñ ga, gasi laa zho gdziiladz lo grètaa xtsiñ zho, zigne bdziiladzaque Dios zeene blozh bzaа me grètaa ncuaañe no.

¹¹ Gacxe nana sca, golgotsaa dzioxco ne dziuun ne mine rnabey Dios, zeena gdziñ ne ga; dziuunnd ne zigne been grè zha wladz ne sca bind xtiidz me. ¹² Sac Diossi gon, diidz ne rnee me, nona. Zeene rnee me, rien ne grèse miñe nac ne. Nan me pe no guic ne, pe rza zdoo ne; niicle ncuaañe rzac ne mazdraа ngeetsa, nan mew. ¹³ Tsod ncuaañe tsongueets lo me. Grèse ncuaañe rac, me rana; ni tib tib ne, lo me cueero ne grèse tel zha mban ne.

Lèë pxoz nroob ga nac Jesús

¹⁴ Per zig rne naa ga, rdziaap ne tib pxoz nroob niina, ni pxoz cosi men ne bzoquia gbaaw. Lèë me ga nac Jesús, men ne nac Xpèed Dios, me none gnalo ne; none tiblrique gac ne. ¹⁵ Sac gon mesi rquia zdoo me ne, csaand me ne zeene zootle laa ne guiable lo dol, sac tel me gonle me zha nac lo guidzliu rii, gonle me grètaa mod ne rquiil mendox ne par gunctal ne xtol ne. Bzhaac me zigne rziaacaque ne niina, lèëraasi biabd me lo dol. ¹⁶ Gacxe nagon waa, ine tibliladz golgotsaa gbig ne lo Dios, ndion ne ganle ible squia zdoo me ne, ni ible zacniñ me ne zeene rquiinpaa ne gun me xyudar ne, sac ne nligaa noxco me ne.

5

¹⁻³ Ible Jesús nac zhipxoz nroob ne niina. Gotsaa gwi ne ganle, men ne rгаа rac pxoz nroob, ladaque miech rcuee me run me dziin co, ni laa me rzo rteed me xtiidz miech lo Dios. Zig nac grè gon ne rgogon miech lo Dios, xchen ma ne rut zho par guiooglo lo xtol zho, me riesana lo pcoog; ni scaquegaa riesan me miñe guiooglo lo xtol me; sac gon, miech guidzliuque nac me. Ye me rzac zigne rzac grèraа miech, gane rien me rquia

zdoo me grè zha ne peet rienñ, grè zha ne mazdraа ngoopdol.

⁴ Ni zha ne sca rac pxoz nroob, led zhald zho rzèeb zho rac zho dziin co, sinque Dioszhal rzooblo zho zigne bzooblo Dios Aarón, men ne glopaa goc pxoz nroob. ⁵ Zig nac Jesús, Dioszhal bzooblo me ne laa me nac zhipxoz nroob ne; men ne znu rëb lo me: "Xpèed naa nac luu. Desde nadze laa zho gunbey ne Xpèed naa nac luu." ⁶ Ni rëb me:

Luu nac pxoz nroob, gdziñd dze ne gdzèë luu,

luu gac zig pxoz Melquisedec.

⁷ Zeene bii zo Jesús lo guidzliu rii, tib vuelt mban rac me zig zet me lo guielnè, haxta roon me, nguiedz bnee me bñab me lo Dios csilaa Dios me lo guielgut co; scagaa Dios psilaa Dios me, sac tib men nguzobdiidz nac me. ⁸ Niicle ne Xpèed Dios nac me, per tib men nguzobdiidz goc me, maase mincopaa pquiaqui nroob guielnè ne bded me. ⁹ Ni ne sca bin me diidz been me grèse mine rnabey Dios me, gacxe waa grèse miech ne gban zigne nac xtiidz me, me gdeed tib guielmban ne gdziñdraа dze lozh lo zho; ¹⁰ ni bzo Dios me nac me pxoz nroob niina, zigne gocaque Melquisedec pxoz nroob.

Gacde to zig cho mèdyeen

¹¹ Racladz naa gneraa naa lo to nu pe run zhipxoz nroob ne, zha nac me, per ne squi rac to peet nède to yquiaadiag to, ngan zha naa lo to zha naca. ¹² Lo lal dze ne psilo rnalo to Jesús, haxta none tole cseed miech niina, per na gon lel rquiin to dien cho gbiire csilo cseed to stib. Rac mèdyeen to i gon, laa ne gow to ncuaañe row zha brooble lel racladz to tibaque nidz guie to. ¹³ Sac gon, mèdyeen rie nidz, ni rienñ win dien pe nac ncuaañe ntseeb, pegaa nac ncuaañe wen. ¹⁴ Sangue grèloraa guielwagw, miñ co rquiin grè zha gol, ni zha co niinile zho, rien zho pe nac ncuaañe wen, pegaa nac ncuaañe ntseeb.

6

¹ Gacxe waa, none tsoxco to gac to tib zha gol. Gunde to ne miñe pseedse to glo zeene psilo bnalo to Jesús, lo miñ co ib grieede to. Laa to pseedle ganle:

zha none csaan to guielntseeb gbig to lo Dios, zha none gnalo to Dios,

² zha cxobnia to guic stib zho, gnab to lo Dios por zha,

zha nac wrobnis,

zha cueeban Dios grè mengut,

zha gun Dios guielwxtis ne gloozh grètaa guielntseeb.

³ Grèle miñ rii nan to. Laa niina telne zneedz Dios diidz, laa to cseed miñe noraa gacnan to.

⁴ Sac gon, no ncuane grieelod gac telne gneedz Dios diidz gaca. Zig nac zha ne squi bienle zha nac Xtiidz Ndzon Dios, bley zho gon zho gol zdoo Dios psilaa me zho, bdeed Espiritu Sant guielbiini lo zho, ⁵ bien zho zha wentaa nac xtiidz me, zha grieele seëb zho zaatne ziaadyob gdziñ zho (zeene glu Dios grë poder ne rap me), ⁶ ni lozh ga csaan zhow, tsianał zho guielntseeb stib; grieelod nose co guic zho gbiire seëb zho xnëz Dios. Ni zha ne gon sca run, rrieequia noquiaa zho Jesús lo cruz ga stib, gbiire gzhidznie miech me. ⁷ Zig nac tib lë liu ne rgaa grëse nisguie ne riab, zeene rrieequia grë ncuane ran zho low, runlay Diosa; ⁸ laa telne niapse yag guiets, niapse grë guizh guiets roob low, paat rquiinda; ib tedsod zdzibdee Diosa, ni lozh ga znabey me tseca. Scaque nagon nac miech ne runbey Xtiidz me.

⁹ Bets, bzian, laa naa rne min rii lo to, per guiabde to togo mine run to rzet naa. Tel to, rien naa brieete lo grë guielntseeb, lole Dios ngab to niina. ¹⁰ Nanle to ganle, Diosi ncuane rieguial tib tib miech, min co rdeed me lo zho. Grëtaa ncuane noyū to niina ne rleynie to me, grë tel zha rquia zdoo to been to xyudar grëraa zha ne no xnëz me, ni noyūngaa tow niina; grësew ible guiaanladz mew. ¹¹ Mine rzoobladz naa, tibaque squi nguieel gac to, zeena scagaa zgaa to grë ncuane nacle diidz gneedz Dios lo to. ¹² Sac dzigosi guieete to, ib gbechde to; masaque laa guic to tsienie ycaania to grëtaa mine bneele me gneedz me lo ne; zigne been grë zha ne nlipaa bnalo me.

Mine rnee Dios run mew

¹³⁻¹⁴ Golšoladz ganle, zeene psan Dios xtiidz me lo Abraham been mew zigne bneese mew. Lëe hor co rëb me laa me gunlay Abraham, ni ndal gun me lo xtii Abraham. Ni lëeque lë me bzeet me, par glu ne ible zun me mine bnee me. ¹⁵ Scagaa Abraham, tiblique bliladz me ne laaw gac; lëe gdib pquiambëz me bdziñ dze co.

¹⁶ Zig nac miech, par glu ne zun zho mine rnee zho, dzigo rzeet zho lë tib men ne mazdraa non lo zho; ni deque sca run zho ga rlu ne gdzëedraa xtiidz zho. ¹⁷ Scagaa Dios, laa me bzeet lë me sac guien draa stib men ne mazdraa non lo me. Ga blu me ne ible zun me mine bnee me ga.

¹⁸ Zeene sca rsan Dios diidz, ni rzeet me lë me, choot grieelodraa ctsëe mine rnee me, ni niicle megaaw nacd me men ne rquidie. Gacxe waa, grëse ne ne nac ne zha ne wbig lo me, none ine nley gac ne, sac ndionpaa ne ne ible zneedz me mine psan me diidz ygaa ne. ¹⁹ Min co nagon, none tiblique gac ne zig tib barcw ne dziits zob lo nis, sac no ncuane naaza len nis; ndion ne ganle,

ible zdziñ ne len yadoo nroob ne zob Jesús. ²⁰ Laa me bner bdziñ me ga nonab me lo Dios por ne. Me nac pxoz nroob niina, ni gdzindraa dze ne gdzëe me; laa me nac zig goc pxoz Melquisedec.

7

Pxoz nroob ne lë Melquisedec

¹ Nanle to ganle Melquisedec goc rey guiedz Salem, ni meque goc pxoz lo Dios ro ne zob gbaa. Golšoladz ganle, zeene znu wbirele Abraham güeygunxoon me zha ne no grë guiedz ne rlëe lo me, Melquisedec goc pxoz ne güeydzieelo me, beenlay Melquisedec me. ² Dzigo lo grëse ncuane bla me lo grë zha co, been mew tsiilal, bdeed me tib lalgaw lo Melquisedec.

Melquisedec nac zig nacre rnee ne “guielwxtis”, min co nac ne rnee zho me “rey ne run guielwxtis”; ni rneeque zho me “rey ne rcuëez lo dil”, sac Salem (guiedz ne goc me rey ga) nac diidz co zig nac ne rnee ne “zaatne guien dil”. ³ Ib raquiete dien cho goc pxoz me, dien cho goc xniaa me, dien cho gocgaa xmengol me; niicle raquietegaa dien zha blanso me lo guidzliu, dien pe gutgaa me. Ziaad gac me zig Xpëed Dios, men ne nac zhipxoz nroob ne, men ne gdziñ dze gdzëe.

⁴ Rlu men non goc Melquisedec; sac gon:

a) Golwi ganle, haxta pxozgol ne Abraham bdeed palal ncuane bla me ga, lo Melquisedec. ⁵ Nana, telne niac Melquisedec zha xti Levi guiab ne por min co pcaa mew, sac zeene laa ley biaad rnabeya ne grëse zha Israel, tel pe nactaa ncuane quanie zho run zhow tsiilal rdeed zho tib lala lo zha xti Levi, sac zha co nac pxoz; ni tibaque dii ne nac zho. ⁶ Laa Melquisedec, niicle ne led zha xtiid Levi nac me, per bnaab me bdeed Abraham tib lal grë ncuane co lo me.

b) Me beenlay Abraham; ni laa Abraham biaan niicle diidz pe nac mine gdeed Dios lo Abraham. ⁷ Ni ndion ne ganle men nroob nac zha ne runlay.

⁸ c) Grë pxoz ne sca rcaania gon co, rdziñ dze ne laa zho ret; sanque Melquisedec, zigne raquiet me lo Xtiidz Dios rlu ne mban me.

⁹ d) Rrieequia ye grë pxoz ne brieequia lo zha xti Levi ye zho ga bdeed gon lo Melquisedec, zeene sca bdeed Abraham gon co lo me. ¹⁰ Sac niicle ne gard gal Levi hor co, per racle Levi cuent ga, sac xpëëdaque Abraham goc Levi.

¹¹ e) Grë pxoz ne brieequia lo xti Levi ga, zig nac Aarón; zha co nac zha ne blu ley lo menguedz Israel; per brieelod zho mbee zho miech lo dol, gane laa ne nxeel Dios stib

pxoz ne ziaad lo xtii Aarón, mazd pxeel me tib pxoz zig pxoz Melquisedec.

¹² Zeene sca ptsëe Dios lo dii ne ziaad pxoz, hor co nacne bdzëëque grë xley pxoz. ¹³⁻¹⁴ Ndioñ ne ganle, Jesús men ne nac pxoz cub niina, lo xtii Judá brieequia me, ni ni tib zha dii co gard gac pxoz, sac ib bzod Moisés zha dii co ne laa zho niac pxoz. ¹⁵ Ga nagon rlu ne nli grëw bdzëe. Sac gon, Jesús men ne nac pxoz niina, men ne nac zig pxoz Melquisedec, ¹⁶ nacd mew porne ziaad me lo xtii Leví, sinque porne nac me tib men ne gdzind dze lozh xquielmban. ¹⁷ Zigne raquietaque me, zaatne rnee:

Luu nac pxoz nroob, gdzind dze ne gdzëe luu,

luu gac zig pxoz Melquisedec.

¹⁸ Gataa laa grë xley pxoz biaan tib lad, sac grëse minë bnabey pxoz hor co run miech, paat pquiinda. ¹⁹ Ni lalnu brieelod nsanwena miech lo Dios; sangue niina, mazdraa wen zio ne, sac ndionpaa ne Jesús nac men ne csanwen ne lo Dios, sac me nac men nroob ne rnalo ne.

²⁰ Dioszhal rëb Jesús gac tib pxoz ne gdzind dze gdzëe, ni haxta bzeet me lë me parne glu ne ctsëed me xtiidz me; ²¹ laa grëraa pxoz ne ziezio, ib beend me ne sca nzeet me lë me. Sac gon, lose Jesús znu rëb me:

Luu nac pxoz nroob, gdzind dze ne gdzëe luu,

luu gac pxoz nroob zig Melquisedec.

Naa nrew, ni naasi ctsëed naa xtidz naa.

²² Mincoxe waa ndioñ ne, diidz ne biaanmie Dios miech ga gdzind dze ne gdzëew; sac gon, por Jesús laaw noyac. ²³ Glo, ndaloo zha ne goc pxoz, sac grëse zho miech nac zho, rdzind dze ne laa zho ret, zeene laa tib zho ret laa stib zho rzo. ²⁴ Sangue Jesús, led yed me grieve par dien cho stib so, sac mesi gdzind dze ne guet me. ²⁵ Gacxe waa, grëse ne ne nac ne miech, zha ne gbigtaa lo me parne ycaania Dios zho, ible silaa me zho lo dol, ni lëe blaale zho ga. Tibaque laa me gnab lo Dios por zha, sac gdzind dze ne guet me.

²⁶ Jesús nac tib men ne nlipaa mbe, ni tib dol rapd me, ib rdziguendi me guielntseeb; gacxe waa, beennon Dios me, ni lëepaa pxoz nroob co nagon rquin ne. ²⁷ Led yed me nac zigne goc grëraa pxoz nroob ne bio glo. Grë pxoz co, gzobse dze rut zho ma ne rgogon zho lo Dios, parne csanmbe me zho lo xtol zho; ni rutaque zho ma ne riogon lo Dios parne guiaanmbe grëraa menguedz; sangue Jesús, tibaque vueltd beede me gon co, ni mezhal goc gon co. ²⁸ Stiba, glo, zha ne rgaa rac pxoz nroob zigne rnabey ley, ye zho runctal zho xtol zho; sangue niina ne laa Dios psan stib xtiidz me, laa me bzo Jesús

nac me zhipxoz nroob ne, mesi tib men mbe nac me, ni gdzind dze ne gdzëe me.

8

Jesúsle nac men ne rteed xtiidz ne

¹ Lo grë minë quiane naa nu, minë racladzpaa naa gacnan to nac min rii: Jesús nac zhipxoz nroob ne, ni zaatne zob Dios, men nroob ne rnabey, ga zob me. ² Gbaa no me, ga quiaayun me dziin zaatne nacpaa yadoo, Dios bzaa yadoo co, led yedraa min co bzaa miech.

³ Ndioñ ne ganle, zha ne rac pxoz nroob, laa zho rzo, zeene grë ma, grëgaa ncuuane rgogon miech, zha rdeeda lo Dios; scaquegaa Jesús, ye me bdeed me gon lo Dios. ⁴ Tel niaca minë bii no me lo guidzliu niina, grielod gac me pxoz nroob, sacne nole pxoz nroob ne rdeed grë gon co lo Dios, zigne rnabey ley. ⁵ Grë dziin ne run grë zha ne rac pxoz nroob lo guidzliu rii, lega nacsew zig zhimplë grë minë rac gbaa; yadoo ne rio zho lo guidzliu riiw, lega nacsew zig zhimplë yadoo ro ne zob gbaa. Golsoladz ganle, zeene laa Moisés gzaa yadoo, rëb Dios lo me: "Zigne gon bluse naa lo luu guic gui ga, sca none gzaa luuw." ⁶ Gacxe waa, tel Jesús men ne nac zhipxoz nroob ne niina, mazdraa non dziin ne quiaayun me; sac gon, zeene pso Dios me gac me pxoz nroob, psan Dios diidz stib zha grielo yгаа ne grë guielnzaac nroob ne neezdz Dios lo ne, ni me gunctsin ne lo Dios.

⁷ Wenraa nac diidz ne psan Dios ga, sac telne niaca nlëb diidz ne biaan glo ga zeene rëb me zha guiaanwen miech lo me, dzigo nod pe nacne mbiire nsan me stib xtiidz me.

⁸ Ni bzeetlegaa me ne laa me csan stib xtiidz me, sac grë zha ne biaanmie xtiidz me glo, loxaque beentcal zho xtol zho. Min co ga raquiet lo xtiidz me, zaatne znu rnee:

Rnee men ndzon ne rnabey: Zdzin dze ne gbiire guiaan no diidz grë no zha Israel, ni zha Judá.

⁹ Per gacdraaw zig diidz ne biaan no grë no xmengol zho,

zeene rrieequia bzheen naa nia grë zha gol co, blee naa zho lo caxtigw ne noded zho Egipt;

sac ni lalnu güeynalzd zho diidz ne biaan no ga,

nacne niicle naagaaw, psaanladz naa zho.

¹⁰ Zeene gdzind dze co,

znu nac diidz ne guiaan no grë no zha Israel: Grëse xley naa, nis nis gacnan zhow,

zig nac zeene haxta len zdoo zho, len guic zho zhoneew.

Dzigosi laa zho gunbey naa ne naa nac xDios zho,

ni niicle naagaaw, laa naa gunbey zho ne lo naa ngab zho.

¹¹ Dzigosi yquindraa tso zho gnee zho lo menlidz zho, lo menladz zho: "None gunbey luu Dios gon."

Sac len dze co, grëse zho runbeyle zho naa, niicle zha ne mazdraa wina, niicle zha ne mazdragaa naa.

¹² Tel pe nactaa xquielntseeb zho, zuñ naa zhow perdon; gdzindraa dze csoladz naa grë falt ne been zho lo naa.

¹³ Zeene sca bzeet me ne laa me csañ stib xtiidz me, ga rlu ne rquindraa mine biaan glo ga; sac nac grë ncuaañ gox rquindraaw, laaw nole par nitlow.

9

Yadoo ne no gbaa

¹ Zeene glo biaan Dios diidz ga grë me zha Israel, hor co biaan diidz lo zho zha tsiegan zho me, ni zha tsaa yadoo ne gac zaatne tsiegan zho me. ² Dzigo bzaa zho tib yu mantiad ne goc yadoo co, groltaa len yu co pquiaancaañ zho tib lar nroob, goc len yu co chop len. Tib lena, mine riaan nêz ro yadoo, ga nac zaatne Nda, ga rzo tib candeler ne niaa niapse or, ni rzo tib mezh ne rbib guietxtil ne naclayle. ³ Laa stib lena, mine riaan nêz zhits lar co, ga nac zaatne Ndadoo; ⁴ ga rzo tib yag ndiaab niapse or lada, dzigo lo co rec yaal; len coque zhoob tib guñ scaque niapse or ndiaab lada. Len guñ co no grop lê quie lag ne pquia ley ne pcaania Moisés, ga no bar ne bzhen Aarón, bar ne bdzib ben ga; len coque no tib guies win niaa niapse or, len guies co no palal maná, guietxtil ne bguiaa Dios grë mengol co. Lêe guñ co biaan par csoladz zho zha nac diidz ne biaan Dios zho. ⁵ Zhits guñ co zoli chop anjl ne bzaa zho, masaque rbebel grop anjl co rtsiig me xiil me rthe me zhits guñ co, zaatne rliaal xchen grë ma ne riogon lo Dios, par guiooglo lo xtol menguedz. Par gne naa zha nacraa grë ncuaañ co, nneedzraaw diidz nu niina.

⁶ Sca nagon baa yadoo co, dzigo grë zha ne rac pxoz tibaque rzëeb zho zaatne Nda ga; ga riegun zho dziin ne rnabey ley zho guñ zho. ⁷ Laa stib lena, zaatne Ndadoo ga, loxaque men ne nace pxoz nroob rrieelo rzëeb ga, ni tibaque vuelt tib len iz rzëeb zho. Zeene rzëeb zho, rienie zho xchen ma ne rgogon zho par guiooglo lo xtol zho, ni guiooglogaa lo grë xtol menguedz, dol ne biend zho been zho. ⁸ Gase na ganle rlu Espiritu Sant lo ne, gacd seëb grëraa miech zaatne Ndadoo ga, laga bii sca chop len nac yadoo.

⁹ Gogotsaa gwi ne niina na ganle zha naca: Glo, niicle ne scataa riesañ zho gon, scataa rut zho ma ne rgogon zho, per brieelod grë ncuaañ co nsañbew zdo zho; ¹⁰ sac hor

co, laa zho güeynal grë ncuaañe laglaase, rio zho dien pe zac gow zho, dien pe zac guie zho, dien zha gaz zho, dien zha tsar nia zho par guiaanme zho. Laa zho been miñ co, sac hor co gard gacnub diidz ne biaan Dios zho ga. ¹¹ Sañgue niina ne laa Jesús baaad, niina ne mele nac pxoz nroob, por me laa miech yгаа grë guieñzaac ne bnee Dios ga. Bdziñ dze laa me bzëeb yadoo ro ne zob gbaa (yadoo ne mazdraa non, yadoo ne mazdraa nzhixcuua, yadoo cosi led yeda bzaa miech), ¹² zeene bzëeb me, bzëebnied me pe xchen chiv yeen, pe xchen ngon yeen, zigne been grëraa pxoz nroob; sinque xchenpaa me bzëebnie me zaatne Ndadoo ga; tibaque vuelt bzëeb me, ni lêe psañbele me ne lo grëtaa xtol ne ga. ¹³ Nana, telne scataa pquiiñ zho xchen ngon yeen, xchen chiv yeen, rio zho rzëeg zho tib vac yeen rliaal xquidie co lad zha ne rap falt, par gbiche dol co guiaanme zho lo Dios. ¹⁴ ¿Pe lel xchen Jesús dzigo? Mazdraa gon nac xchen me, ible sañbew ne lo grëtaa ncuaañe paat rquind ne bdziunñ ne glo, niinasi zrieelo dziunñ ne mine rnabey Dios nguiamban. Sac gon, tel Jesús ni tib dol rapd me, ni Espiritu Sant bloo zdo me bdeed me me goc me tib gon mbe. ¹⁵ Gacxe waa, Jesúsle nac men ne gdziñnie ne lo Dios, niina ne laa Dios psañ stib xtiidz me. Zeene gut me, ga bdiizh me grëtaa xtol miech, zigtaa zha ne biaan dieidz glo cow, zigtagaa zha ne nobedz me len dze riw; niinasi grëse zho zrieelo yгаа zho guieñman ne gdziñ dze lozh ga, zigne nacle xtiidz me.

¹⁶ Gotsaa gwi ne ganle, xtiidz miech, mine rsañ zho par dien zha gac grë ncuaañe rap zho zeene laa zho guet, laga bii mban zho grieelod gacnon diidz co; ¹⁷ sinque haxta ret zho, dzigo laa diidz co racnon. ¹⁸ Scaque nagon, zeene psañ Dios xtiidz me glo, gutgazh ma ne brieer ren bzhiere dzigora laa diidz co psilo gocnon. ¹⁹ Gogotsaa csoladz ganle, zeene blozh bnee Moisés lo menguedz zha nac diidz ne psañ Dios ga, laa xchen ngon yeen, xchen chiv yeen ndxiembëzle notsa nis; dzigo bzoob me tib lê guits mëcwxiiil rna nizhnie tib guic bar, blozh ga, psëeb mew lo ren co blaal me ren co lo guits ne quia grë diidz co, ni blaal mew lad grëse miech co, ²⁰ ni rëb me lo zho: "Laa ren rii bzhiere, zeena gacnañ to desde nadzetaa laa diidz ne psañ Dios lo to nu csilo gacnon, none gon to mine rnabeya." ²¹ Blozh ga, blaalaque me ren co gdiipse len yadoo, ni blaal mew grëse lad ncuaañe racdziin len yadoo.

²² Sca nagon nac ley co, grëse ncuaañe no guiaanme, ib ren rsañbew; scaque miech, haxta rzhiere xchen ma ne riogon dzigora riooglo lo xtol zho. ²³ Miñcocxe waa, sca pxiee Moisés xchen ma biaanme yadoo co ni

grë ncuaañe racdziin lena (nacse yadoo co zig zhimlë yadoo gbaa); sangue yadoo gbaa, ga pquiin ren ne mazdraa non lo xchen ma, ni lëë ren co goc xchen Jesús. ²⁴ Zeene bzëëb Jesús zaatne Ndadoo güeynee me lo Dios por ne, güeyd me len yadoo ne bzaa miech, sinque len yadoo gbaa güey me; sac gon, nacse miñe no lo guidzliu rii zig zhimlë miñe no gbaa. ²⁵ Grë pxoz nroob, gzob iz rie zho zaatne Ndadoo rienie zho xchen ma; sangue Jesús, xchenpaa me güeynie me, ni tibaque vult güeylogon me me. ²⁶ Telne ye me niun zig run grëraa pxoz co, pe zhistaale vult na ziyet me wlal ne bre guidzliu, i per na, led yed me! Zeene laa dze bdziñ, laa me bhaad, xchenpaa me bzhiëe, ni tibaque vult bzhiëew psanmbew ne lo dol grëse ne ne nac ne miech. ²⁷ Zigne bhaan tibaque vult ret miech, lozh ga zeene laa Dios gun guielwxtis, laa zho none gacredz lo me; ²⁸ scaquegaa tibaque vult gut Jesús bdiizh me xtol grëse miech; ni zdzin ne guiaad me stib, per guiaatraa me par biire quizh me xtol miech, sinque laa me guiaadsilaa grë zha ne quiambëz lo me, zeena gand zho grëtaa guielnë ne csaab Dios.

10

Tibaque vult goc Jesús gon

¹ Grë miñe rnabey ley run pxoz, lega nacsew zig tib zhimlë grëtaa miñe been Jesús por ne. Horco niicle gzobse iz rienie grë miech co gon zigne rnabey ley, per brieloda nsanmbew zho lo dol. ² Tel niaca miñe gon cose nsanmbe zho, dzigo tibtaa vult ne niesañ zhow lëë niaanmbele zho ga; niicle zhagaaw, niennpaa zho ne laa zho mbele. ³ Per na, gzobse iz zeene laa zho riesañ gon co rsoladz zho ne bii no zho lo dol, ⁴ sac gon, grielod ne xchense ngon yeen, xchense chiv yeen guiaanmbe miech lo dol.

⁵ Min cocxe waa, zeene laa Jesús bhaad lo guidzliu, pe led znu rëb me lo Dios: Grë xchen ma, grë ncuaañe riaadlogon zho lo luu, racladzdraa luuw; gane bnabey luu goc naa miech, zial naa lo guidzliu.

⁶ Grë ncuaañe rzëëg zho, grë ren ne rxiee zho, par guiaanmbe zho lo dol; racladzdraa luu gan luuw.

⁷ Gane niina, laa naa zial nu Dios, zeena gun naa miñe gnabeytaa luu; zigne zhobneele lo Xtiiid luu gac naa.

⁸ Gotsaa gwi ne ganle, blozhse rëb me racladzdraa Dios tso zho pe ncuaañe tsielogon zho lo me, tso zho cxiee zho xchen ma, gzëëg zho ma par guiaanmbe zho (niicle ne lo ley sca rnabey gun zho); ⁹ dzigo rëb me: “Dios, laa naa zial nu zeena gun naa miñe gnabeytaa luu.” Gase nagon rlu pliche me

diidz ne psan Dios ga glo, laa stib diidz cub ne bhaannie Dios miech ga psilo noquuin. ¹⁰ Ni nligaa been me miñe bnabey Dios, bdeed me me gut me lo cruz; ne sca nagon been me miñe bnabey Dios, ga psanmbe me ne lo dol. Tibaque vult sca goc me gon co, ni lëë psanmbele me ne ga.

¹¹ Grë pxoz, gzobse dze rio zho len yadoo rdziib zho grë gon ne riesañ miech; blactaa iz tibaque sca nodziib zho grë gon co, per brieloda nsanmbew miech lo dol; ¹² sangue Jesús gon, tibaque vult bzhiëe xchen me goc me gon psanmbe me miech lo dol. Laa niina, cue Dios nëz derech ga zob me, ¹³ quiambëz me gdziñ dze zeene grëse zha ne rlëë ran me, laa zho guiaanwin lo me. ¹⁴ Tibaque gon ne bdeed me ga, psanmbegazh me grëse zha ne nodzinnie me lo Dios. ¹⁵⁻¹⁶ Ni nligaa scaw, haxta Espiritu Sant, zeene blozh bzeet me zha rëb Dios guiaannie me zha Israel diidz stib, zha nis nis gacnañ zho xley Dios, zig nac zeene haxta len zdoos zho, haxta len guic zho zhobneew; ¹⁷ dzigo bzeet me zeene znu rëb Dios: “Tel pe nactaa xquielntseeb zho, tel pe nactaa xtol zho, gdziñdraa dze ne csoladz naaw.”

¹⁸ Golgotsaa gwi ne sca ganle, rsoladzdraa Dios xtol ne sac laa Jesús bdiizhlew; gacxe waa, nodraa dzio ne dien pe gon ne gdeed ne par psanmbe me ne.

None gbig ne lo Dios

¹⁹ Bets, bzian, glo loxaque men ne nacse pxoz nroob rzëëb len yadoo zaatne Ndadoo ga; sangue niina, haxta zaatne Ndadoo len yadoo gbaa zrieelo gdziñ ne, sac xquizh xquielnzaac Jesús, bdeed me me bzhiëe xchen me psanmbe me ne. ²⁰ Zeene sca gut Jesús, rrieequia tib nëz cub ga pxal me par gdziñ ne zaatne yгаа ne guielmban; lëë nëz co ga bzhiäl zeene sca briez lar ne quia len yadoo ga. ²¹ Ni ne me nac zhipxoz nroob ne no me yadoo gbaa, ²² niinasi zac le gdziñ ne haxta lo Dios. Nana sca, dib zdoos ne golgotsaa gbig ne lo Dios, dib zdoos ne golgotsaa gnalo ne me, benque laa me psanmbele ne lo grëtaa ncuaañe yozh ne rza zdoos ne, rza guic ne; rrieequia bgaz me ne tib nis mbe. ²³ Tiblique sca golgotsaa gac ne, benque ndion ne ganle ible dzdiñ dze ne gac miñe rliadz ne; sac Dios psan diidz co, ni ndion ne rquidied me.

²⁴ Golgotsaa dzioxco ne cseedlsa ne gleynie ne zha ne nacgrë ne, ni dziuun ne ncuaañe yquuin lo ne grë ne. ²⁵ Dze ne nacle diidz ycaalsa ne dzioñne ne Dios, ible none ycaalsa ne grëse ne, guionald ne miñe run grë zha ne rzozit. None cso ne diidz lo grë zha ne nacgrë ne, conley ne zdoos zho dziits so zho lo miñe rliadz ne; xco co none

dzio ne niina ne laa dze ne guiaad Jesús ziaadgaxle.

²⁶ Zha ne beenbeyle zha nac diidzli, ni lozh ga xtsiinpaagunçtal zho xtoł zho, tsodraa gon ne csanmbe zho lo dol co; ²⁷ lëëtaa miñe tsieguial zho nac guiełnëdõx ne yгаа zho zeene laa Dios gun guiełwxtis; dze co laa me cxeel zho lo guidox, zaatne nitlo grëraa zha ntseeb ne gocndaan lo me. ²⁸ Gotsaa gwi ne ganle, niicxe ley ne na pcaania Moisés padzeela ga, zha ne rguits miñe rnabeya, ni tel no chop tson zha ne gon ne nliw, niicle mazdraa mban rac zho ib rdelaad zho rut zho zho. ²⁹ Nana, çpe lëlgue zha ne dzigo quits miñe rnabey Jesús? Mazdraa gon nac guiełnë ne yгаа zho, sac noguitnie zho xchen Jesús ga, rzhidznie zho Espiritu Sant ga sca gun zho. Noguitnie zho ren co, ni lëew bzhiee biaanmbe zho lo dol, lëew bzhiee zeene psan Dios stib xtiidz me zha gbig miech lo me; rzhidznie zho Espiritu Sant, ni men co no zhixco zho. ³⁰ Zha ne sca gun, ible nroob guiełnë ne yгаа zho; sac ndion ne ganle zha nac xDios ne, me znu rnee: "Naa raguial gun guiełwxtis; naa gded miñe rieguial tib tib miech." Ni zhozneeeque lo Xtiidz me: "Grëse miech, lo me cuero zho grë ncuaañe been zho." ³¹ iNe nligaa ncuaañe gdzieb ne ted grë zha ntseeb ne sca guiab lадznia Dios, men nguiamban!

³² Sanguë to, golsoladz ganle zha bded to zeene griinpaap silo bnalõ to Jesús, niicle ne scataa nroob guiełnë ne gon to, per beençtalde to xtoł to. ³³ Blactaa bdziitnie miech to, squi ndxie zha ne nowi laa zho nosacsi to; ni blactagaa gon to nosacsi zho zha ne nacgrë to. ³⁴ Grë zha ne biab lадzguuib, mbanse rac zdoo to ran to zha rac zho; niicle zeene biaad zha ne biaadla grë ncuaañe nacchen to, psaan to ptiche zhow, peet güeyniedaque guic to; sac nanle to mazdraa nac guiełnzaac ne yгаа to gbaa, ni minçosi gdziñd dze ne nitlow. ³⁵ Nana sca, scaque dziits golso; sac telne tibaque gnalo to Dios, ible zgaa to guiełnzaac ne gneedz me. ³⁶ Ible guiaand zdoo to, tibaque dziits golso golgun miñe rnabey me; zeena yгаа to grë ncuaañe bneele me gneedz me lo to. ³⁷ Golsoladz ganle, znu zhozneee lo Xtiidz me: Ible ile ziaad men ne nacle diidz guiaad ga, led nroobdraaw, laa me glanso.

³⁸ Grë zha ne zienal miñe nac diidzli, ible zban zho sac rnalo zho naa;

laa telne guiaan zdoo zho sozit zho lo naa, ni lalnu gleyñied naa zho.

³⁹ Sanguë ne gon, nozozite ne lo Dios, sinque dib zdoo ne rnalo ne me. Grë zha ne sca rzozit lo me, nëz ne nitlo zho ga zie zho; laa ne gon, ible zgaa ne tib guiełmban ne gdziñd dze lozh, sacne znu dib zdoo ne rnalo ne me.

11

Zhapaa nac ne dib zdoo ne gnalo ne Dios

¹ Znu nac ne dib zdoo ne gnalo ne Dios. Zha ne dib zdoo rnalo Dios, tiblique zienie guic zho ne ible zgaa zho miñe quiambëz zho gdeed me lo zho; niicle ncuaañe gard gan zhow, per rzac zho zig nac zeene ranle zhow. ² Zig nac grë xmengol ne, ne scacxe waa bnalõ zho Dios gane bleyñie me zho.

³ Scagaa niina, ne dib zdoo ne rnalo ne Dios, gane rililadz ne me bzaa guidzliu ni grëragaa ncuaañe no, zeene bnabey me baaaw, niicle ne peet guiełnd hor co.

⁴ Gotsaa gwi ne ganle lëë bla zhagol ne dib zdoo bnalõ Dios nu:

Zig nac Abel, ne dib zdoo me bnalõ me Dios, gane bleyñie Dios gon ne bdeed me, lëdle gon ne bdeed bets me Caín. Ne sca bnalõ me Dios, gane pcaania Dios me zig tib zha ne peet xtold, ni pcaania Dios gon ne bdeed me ga; gacxe waa, haxta lo nadze, niicle ne gutle me, bii raquiet ganle pa lotaa dib zdoo me bnalõ me Dios.

⁵ Scaque Enoc, ne dib zdoo me bnalõ me Dios, gane gute me, zomban me zeynie Dios me gbaa, choot gondraa me. Zeene bii zomban me lo guidzliu, blu Dios ne rdziladz Dios zha mban me. ⁶ Sac zha ne rnalod Dios dib zdoo, grielod gban zho zigne rdziladz Dios. Zha ne racladz gbig zho lo Dios, none dib zdoo zho gliladz zho ne nli no me, ni gliladz zho ne nli rcaania me zha ne nlipaa rio liaadz rbig lo me.

⁷ Zig nac Noé, ne dib zdoo me bnalõ me Dios, gane bliladz me xtiidz Dios zeene rëb Dios lo me pe nac ncuaañe ziaadyob gac; bin me diidz bzaa me tib barcw nroob, ni len barcw co bio me gza xpëed me ni tsiel me, blaa zho lo guiełnë co. Ni ne sca bnalõ me Dios, gane ible zgaa me grë miñe gdeed Dios lo grë zha ne biaanmbele lo Dios; laa grë zha ntseeb co, ib bnalod zho Dios, gane sca bnitlo zho.

⁸ Zig nac Abraham, ne dib zdoo me bnalõ me Dios, gane zeene bredz Dios me ycaania me zaatne gdeed Dios lo me, binga me diidz brieë me zie me, niicle ne nand me zha nac dan co. ⁹ Ni ne sca rnalo me Dios, gane niicle bdziñ me lo liu co, laa me wbanse ga zig tib mençit. Lega nacse len grë yu mantiad bio me grop me Isaac, scaquegaa Jacob; sac ye grop zha co biaan diidz nacchen liu co. ¹⁰ Scase bio Abraham ga, sac nappaa me no tib guiedz ndzon ne bzaa Dios, ni ga nac zaatne gdeed Dios gdziñ me.

¹¹ Scaque Sar, wnaa ne goc tsiel Abraham, ne dib zdoo me bnalõ me Dios gane gop me mëed, niicle ne nacd me wnaa ne gap mëed, ni lala gol-le me; laa me gop win, sac zeene rëb Dios lo me laa me yquanie win, dib zdoo me bliladz me ible zun Dios

mine bnee me ga. ¹²Ye Abraham, mengol-le me, men ne yquianiedraa mēēd nac me, ni zeene laa Sar gop mēēd co, miech guizhiu ne brieequia lo dii co; pale mel ne ndziib gbaa, yuzh ne ndxieгаа ro nisdoo.

¹³Gza zha ne blozh goquiet nu, gardaque ygaa zho grē mine bnee Dios gdeed me lo zho, laa zho gut; zeene bii zomban zho lo guidzliu rii, dib zdoo zho bnalo zho me gane bliladz zho ne ible zgaa zhow, rzac zho zig nac zeene ranle zhow. Bien zho ne tib ziaadtedse zho lo guidzliu rii, nacse zho zig tib menzit. ¹⁴Ni ne sca bien zho tib ziaadtedse zho lo guidzliu rii, ga rlu ne dzigoraa gdziñ zho zaatne gacpaa ladz zho. ¹⁵Sac telne niend zho ne scaw, znuse mbire zho ney zho zaatne briece zho ga. ¹⁶Tibaque laa guic zho güeynie ne ib zdziñ zho zaatne gacpaa ladz zho gbaa; gacxe waa, rtoladz Dios ne nac me Dios ne riladz zho, laa me bzhixcuaale guiedz ne gac ladz zho ga.

¹⁷Zeene been Dios Abraham prueb dien pe nli rnalo Abraham me, rēb me cogan Abraham xpēēd Abraham Isaac; ne dib zdoo Abraham rnalo me Dios gane niicle tibaque mēēd ga lo me, per bleeladz me mēēd co, laa me niutle win niac win gon. ¹⁸Ni laa xtiidz Dios nac ne win gunctal lo xtti me! ¹⁹Laa me niut win, sac nanpaa ne nroob poder ne rap Dios, telne niet win nrieelo mbeeban Dios win; ni nligaa rrieequia gut win ga ni biire brieceban win stib.

²⁰Niiclegaa Isaac, ne dib zdoo me bnalo me Dios, gane zeene bnab me gunlay Dios grop xpēēd me, Jacob ni Esaú, bzeet me zha gac lo xquielmban zho.

²¹Scaque Jacob, ne dib zdoo me bnalo me Dios, gane niicle laa me nole guet me bnab me gunlay Dios grop xpēēdbgui José, bzeet me zha gunlay Dios zho; mengol-le nac me, yagale zhoob me per tibaque rleynie me Dios.

²²Scaque José, ne dib zdoo me bnalo me Dios, gane zeene laa me merle guet bzeet me ne ib zdziñ dze griee zha Israel Egipt; haxta psan me diidz güey zho xtsit me zeene laa zho griee ga.

²³Zig nac pxoz Moisés, xniaa Moisés, ne dib zdoo me bnalo me Dios, gane bloolan me mēēd niow yeen co lidz me tson mēē; ib bdziehd me mine bnabey rey Egipt.

²⁴Niiclegaa Moisés, ne dib zdoo me bnalo me Dios, gane zeene laa me broob hdeetraa me diidz niunbey zho me zig xpēēdmiag rey; ²⁵laa ne niaan me lidz rey nleynie me grē ncuuane niunctal xto! me, mazd bleeladz me me psacsi zho me grē menladz me. ²⁶Bien me ne nonguielraaw ted me guielne zig pteed zho Jesús, lēdle niaannie me grē ncuuane non ne no Egipt; sacne mine mazdraa nonie guic me nac guielnzaac ne gdeed Dios lo me.

²⁷Ne sca rnalo me Dios, gane bdziehd me xquieldox rey, tiblique been me guic me briece me Egipt; sac nanpaa me niicle ranđ me Dios, per Dios nacie me. ²⁸Ne scaque rnalo me Dios, gane bnabey me been zha Israel Ini Pascow, ni bnabey me bdiaab xchen carner yeen grēse ro lidz zho, zeena guete xpēēd glo zho wdze co.

²⁹Grē zha Israel co, ne dib zdoo zho bnalo zho Dios gane wbiig lo Nisdoo Nizhnie, bzhial tib nēz mbidz bded zho; laa zeene gocladz grē xmenquib rey Egipt nded zho, znuse bdzieel lo nisdoo co stib, grēse zho gut. ³⁰Ne scaque dib zdoo zho bnalo zho Dios, gane bliaal biedz nroob ne ndze igo guiedz Jericó, zeene bza gadz ngbidz noyecw zho igo biedz co.

³¹Zig nac Rahab, wnaa ro nēz ne bio guiedz Jericó, ne dib zdoo me bnalo me Dios, gane peet god me dze ne bnitlo grēse menladz me, sacne bnalod zho Dios; me ga bdeed zaatne blēz zha ne glole pxeel zha Israel güey wleets ga.

³²Ni noragaa zha ne sca dib zdoo bnalo Dios, haxta tiemple ygaad gzet naa zho. Zig nac Gedeon, zig nac Barac, Sansón, Jefté, zig nac David, zig nac Samuel, ni grēragaa zha ne biadteed xtiidz Dios lo miech. ³³Ne sca dib zdoo zho bnalo zho Dios, no zho beenchen grē guiedz nroob, no zho bnabey grē guiedz zigne nonguiela, no zho gonlo grē mine bzeet Dios gdeed me lo zho, no zho role meedz bdedlaa zho; ³⁴no zho lo beldox bio zho ni peet god zho, no zho lo spadle bdedlaa zho, no zho gzhe gzhele rac zho per bdaan zho; no zho biablote lo dil ni biire pcaa zho fuerz stib, haxta benxoon zho zha zit ne nodilnie zho. ³⁵Grē men wnaa, no zho gonlo brieceban menlidz zho.

Nzian grē zha ne sca bnalo Dios, no zho psacsixuu miech zho, per ib bdeete zho diidz niun zho mine racladz miech, mazd bleeladz zho zho beet miech zho; sac nanle zho mazdraa ndzon guielmban ne ygaa zho zeene laa zho grieeban. ³⁶Nogaa zho bgaa beennguzee miech zho, bdiñ zho zho, bzoob zho zho lo caden, ni bloo zho zho ladzguiib; ³⁷no zho bdeedquie miech zho haxta gut zho, no zho bgaa bloosierr miech zho, no zho bgaa gut zho lo spad. Nogaa zho mbanse rac, pqianguzhooñ zho lo miech, nēzrii nēzrec zie zho, mbanse rac zho guind pe gow zho, guind xab zho, tib lēse guid mēcwxil, tib lēse guid chiv nriēl zho. ³⁸Miech wen nac zho, ni rieguiald grē miech guidzliu rii guiaadban zha co lo zho, per scataa bded zho. Niapse grē dan bidz, grē dan gui, bio zho; zaatne blēz zho grē len blē, zaatne blēz zho grē len bliee.

³⁹Ni golgacnan ganle, niicle nli bianziuu zho lo Dios ne sca dib zdoo zho bnalo zho me, per gardaque ygaa zho guielnzaac ne

psan me diidz ga ygaa zho; ⁴⁰ sacne laa Dios racladz tipse ygaane ne zho guielnzaac ne psanle me diidz gneedz me lo ne niina, sac min co nac mine mazdraa nroob.

12

Choot gbiched lo Jesús

¹ Nziandox grè zha ne sca dib zdoos bnalos Dios. Ni niina, grèse zha co laa zho ndxiewi lo ne; sac rrieequia tib lo prueb no ne noquiaa ne corr. Gacxe waa, golgotsaa csaan grè ncuuane runctal xtol ne, zeena ycadraaw parne griee lo tiblique dzio ne nèz gdzin ne zaatne no gdzin ne. ² Tibaque golgotsaa guionie guic ne laa ne gdzin lo Jesús ga, men ne zo lo ne grèse ne ne rnalos Dios, ni me lozh gzodziits ne. Tel me gon, niicle ne nroob psacsi miech me, haxta lo cruz pquiaa zho me, per tibaque güeynie guic me nroobraa nac guielbley ne gan me zeene lozh ga. Ncuuane mbeeguie lo ga zeene sca quia me lo cruz, per ptoladz me.

Ni nligaa, zig nac niina cue Dios nèz derech ga zob me gbaa.

³ Golguien sca, zeene racmban zdoos to, zeene racladz guiaan zdoos to, ib gdeete to diidz; golsoladz ganle, zha pxcw Jesús bded me grètaa mine pteed grè miech ngoopdol co me. ⁴ Parga nli, nè noded to noxco to gunctalde to xtol to, per gard guiab ne ygaa to ne gut miech to. ⁵ Golsoladz ganle zha rnee Dios lo grè zha ne nac xpèed me. Znu raquiet lo Xtiidz me, zaatne rnee:

Xin, zeene rso Dios diidz lo luu gundraa luu grè ncuuane nonguield, none sac zdoos luuw;
niicle zeene gactoxgaa me lo luu, gacmband luu.

⁶ Sac gon zha ne sca rso me diidz lo, ga rlu ne rleynie me zho;
zha ne ractoxgaa me lo, ga rlu ne nli xpèed me nac zho.

⁷ Golguien sca, gacbande to tel pe caxtigw ne cteed Dios to. Golgan ganle, nicicx miech na, ractox zho lo xpèed zho zeene rond win diidz. ⁸ Nana, tel ib peet glisquidgaa me lo to, gase dzigo rlu ne led xpèete me nac to; sac gon, zha ne nac xpèed me, rlisqui me zeene rond zho xtiidz me. ⁹ Golsoladz ganle, zeene rac ne mèedlas rlisqui pxoz ne zeene rdziuu ne ncuuane nonguield; scagaa ne, rien ne ne me rnabey lo ne. Nana, ¿pe lel Pxoz ne dzigo men ne zob gbaa gnabeyd me ne? Ni none gon dzion ne xtiidz me, zeena ygaa ne guielmban. ¹⁰ Gotsaa gwi ne ganle, zig nac pxoz ne, rquia me rlisqui me zeene rdziuu ne ncuuane nonguield, sac racladz me zaacse gban ne, ni chop tsonaque dze nac lo guielmban rii; sangue Dios gon, laa me noseed ne par gac ne tib miech mbe zdoos,

zig me; ni lèe min co nonraa. ¹¹ Parga nli, tsod zha ne gley zeene noded zho caxtigw, sinque nè rzac zhow; per zeene rded ga, zha ne rienpaa rquina haxta wen riaan zdoos zho, sac rseed zho zaacse rban zho.

Nodne gbiche miech lo Dios

¹² Nana sca, telne bdzagle to, golgun ndip nia to, golgun ndip ni to stib, ¹³ zaacse golsè, tib nèz goltso zeena gziaabnèzde to; dzigo scagaa zrieelo gacnie to zha ne lega noyobe.

¹⁴ Goltsoxco niowse golbannie samiech to, ib gunctalde to xtol to; sac zha ne mbed zdoos, griee lo gdzin zho lo Dios. ¹⁵ Tibaque golteedlolsa zha ne nacgrè to, golguien ganle racladz Dios gacnie me to, napaa na lel nozozit to lo me. Sac zha ne rzozit lo Dios, zeene laa mine nac zho rzhobnen, nzian zdoos zha ne rzan zho, rlozh ga grèse zha co runctal xtol. ¹⁶ Ib gunde to grè ncuuane tsod zdoos Dios, ib quitniede to guielnzaac ne bneedz Dios lo to; gunde to zigne been Esaú, tel Esaú, por tib plat nis scuaan psaan me guielnzaac ne bgaa me ne nac me mèedglo; ¹⁷ ni nanwen to ganle, zeene laa me gocladz nab pxoz me niunlay Dios me zig mèedglo, brieelodraaw. Dzigoraa rquia zdoos me, haxta roon me rnab me ygaa me guielnzaac co stib, per pe xtsiinraaw.

¹⁸ Golguien sca ganle, nroob nac guielnzaac ne bneedz Dios lo to niina! Led yede to ndzin pa tib cho gui, zig bdzin xmengol to cho Gui Sinaí padzeela. Grè xmengol to, zeene ndxie zho zhan Gui Sinaí, beldox ne gon zho rso guic gui co, ni goc tib ncow, lala rio bi ratsie nguzi ni rrie me; ¹⁹ ni lala nguiedz rcuedz trompet, ni nguiedz zèeb tsi Dios rnee me lo zho. Zeene gon zho scataa nguiedz rnee me, bdzieb zho; dzigo bnab zho lo me gneedraa me. ²⁰ Bdzieb zho bin zho rèb me, zha ne tsep cho gui co none gdeedque zho zho, gliz lanzgaa zho zho haxta guet zho; scaque grè ma. ²¹ Ncuuane gdziebdoos ne gon zho ga; haxta Moisés rzhidz lo dzeb co.

²² Sangue to, rriequia haxta Jerusalén, zaatne no Dios nguiamban gbaa bdzin to, zaatne ndxie grè anjl guizhiu ne roolnie Dios; ²³ zaatne ndxie grè zha ne glopaa bzèeb xnèz me, grè zha ne zhooble lè gbaa ga. Laa to bdzinle lo Dios, men ne run guielwxtis; zaatne ndxie grè zha ne psanmbe Dios biaan zho zig tib zha ne peet xtol. ²⁴ Laa to bdzinle lo Jesús, men ne rdziinnie miech lo Dios niina ne laa Dios psan stib xtiidz me; laa to bdzinle zaatne rriequia bliaal xchen Jesús len yadoo gbaa, lèe ren co mazdraa non lèdle xchen Abel.

²⁵ Min co nagon, golguien golgun mine rnabey Dios to. Golsoladz ganle, zha bnitlo grè zhagol ne sca ib bind xtiidz me, ni tib miechse pteed xtiidz me lo zho. ¿Pe lel na

dzigo ne mezhal quiaanee lo ne? Ib diedlaad ne gon telne dziond ne mine rnabey me. ²⁶ Zeene bnee me lo gre zhaqol co, haxta beencxidz me guidzliu, ni rnee me: "Zbire naa gunxixidz naa guidzliu stib, haxta ye gbaa gunxixidz naa." ²⁷ Gase na ganle ru, lo grese ncuuaane bzaa me dzin ne laa me csiniw, dzigo laaw nitlo; lozh ga, guiaan mine gdzindraa dze nitlo; ²⁸ ni ga nagon gneedz me gbiaaz ne. Gacxe waa, golgotsaa dziuun ne mine rnabey me, golgotsaa gdeed ne xquizh lo me, guien ne men nroob nac me; ni scagaa me zley me. ²⁹ Golguien ganle, tel me ne nac me Dios ne riladz ne, nac me zig nac tib beldox ne peet rdedlaad lo.

13

Golban zigne racladz Dios

¹ Bets, bzian, golleynie gre zha ne nacgre to, golguien ganle tibaque men ne nac Pxoz to. ² Goldeed zaatne cuöz gre menzit ne zo nez. Blac zha ne sca bdeed lidz blöz zha ne zo nez, no hor biend zho haxta xanj Dios blöz lidz zho. ³ Golt siegan gre zha ne niogyu ladzguuib, goltso xliaadz zho zig nac zeene ye to nogre zho ga. Golgacnie gre zha ne nosacsi miech, nanle to ganle zha rzac ne zeene no ne tib lo guielne.

⁴ To ne nac to zha ne ptsieelniale, sacde to guieltsieel zig beelze pe wguut, ib yquidiede to tsieel to; sac zha ne yquiangob tib zha ne nonguield tsonie zho o yquiangobgaa zho tib zha ne nole tsieel, ib tedsod zunquizh Dios zho dol co.

⁵ Tsienalde to loxaque dien zha gunlo to dimi; sinque golley totsaque no mine yquiin to. Golsoladz ganle, led znu rnee Dios lo ne: "Tibaque gacnie naa to, ib csaand naa to."

⁶ Gacxe waa, nod pe nacne ctseb zhgab ne, none tibaque dzionie guic ne dzieets ne: Dios nac men ne nacnie naa, ipe nac nadien gdzieeb naa?

iPeet grielod gun miech naa!

⁷ Golsoladz zha goc men ne bzo lo to pseed to Xtuidz Dios, ni dib zdoo to gollnalo Dios zigne bnalo me Dios.

⁸ Golguien ganle, gdzind dze ne gdzëe Jesús, zigne goc me padzeela, scaque nac me niina, ni scaquegaa gac me greeta len iz ne guiaadraa. ⁹ Ib gliiladzde to gre wseed ne ziaadnie stib miech sca, wseed ne ni nacdraa Xtuidz Jesús. Diosse nac men ne lozh gzodziits ne lo mine riladz ne; nacda por tsienal to dien pe gow to, pegaa gowde to; sac zha ne zienal min co, paat yquiinda lo zho. ¹⁰ Grese zha ne guiab tsienal mine rnabey ley parne ycaania Dios zho, tib ladle rsan zho mine been Jesús ga. Rriequia no tib lo pcoog, ni nese zrieelo yquiin gon ne ndziib lo co; laa gre pxoz ne zienal mine rnabey ley, grielod yquiin zho gon co.

¹¹ Glo, zeene ret ma ne riogon lo Dios, rlozhse rielaal pxoz nroob xchen ma zaatne Ndadoo parne guiooglo lo xtol menguedz, dzigo rienie zho xcuerp ma ro guiedz, ga rzëeg zhow. ¹² Scaque Jesús, zeene bzhiee xchen me psanbe me miech lo dol; ru guiedz ga gveysacsi zho me gut me. ¹³ Scagaa ne niina, golgotsaa griee ne lo gre ncuuaane lo guidzliu rii, golgotsaa cueladz ne ne guional ne zhits Jesús dzian ne gre guielne, telne no dzian new. ¹⁴ Benque ndion ne ganle, nacd lo guidzliu rii zaatne gbiaazpaa ne, sinque laa ne zional yгаа ne zaatne naraa gneedz Dios gbiaaz ne.

¹⁵ Laa ne ndionle ganle, Jesús nac men ne gunctsin ne lo Dios; gacxe waa, golgotsaa gleynie ne Dios, golgotsaa gdeed ne xquizh lo me. Lëe min co gac zig tib gon ne gdeed ne lo me. ¹⁶ Goltsoxco golgun gre ncuuaane yquiin lo samiech to, ncuuaane rgaa lo to, goldeed palala lo gre zha ne guien pe yquiin; sac rriequia lëe stib gon ga gdeed to lo Dios, ni mincogaa rleynie me.

¹⁷ Golgon xtiidz zha ne zo lo to noseed to Xtuidz Dios, golguien zha rnabey lo to, sac gon zha quianap to ni zha gdeed cuent lo Dios zha pquianap zho to. None gon to xtiidz zho, zeena ine gley zho yquiaanap zho to; sac gon, telne lel nogoguielne to zho, lëda ga gun to.

¹⁸ Gollnab lo Dios gacnie me no tibaque znu dzioxco no dziuun no mine racladz me, me nan ganle mbe zdoo no, mbe xquielrien no. ¹⁹ Ni mine rsopaa naa diidz lo to, golsoladz gollnab lo Dios gneedz me diidz gbiire guialniob naa i, guialgan naa to.

²⁰ Jesús nac men ne quianappaa ne, zig rquianap baxtor xpëcwxil zho; me gut bzhiee xchen me zeene psan Dios diidz stib zha gdzin miech lo me; ni diidz cosi gdzindraa dze ne gdzëew.

Dios men ne bleeban Jesús, men ne racnie miech peet zhgab rtsebd zho, ²¹ me gneedz guielbiini lo to grielo to gun to mine rnabey me. Jesús sca gollnalo, zeena grielo gban to zigne rdziladz Dios. Dios nac men ne rieguial dziuunnon ne, zigtaa niinaw, zigtagaa grëraa len izdoo ne guiaada. Scaw nagon.

²² Bets, bzian, laa naa rnab lo to ib glëed guic to, golcaania palalse diidz ne pso naa lo to nu.

²³ Racladz naa gacnan to ganle, laa bets ne Timotë briele ladzguuib; telne zlansoniob me lo naa nu, grop no me guiaad lo to i.

²⁴ Golsiguieel goldeed tib zhibdiuzh naa lo gre zha ne zo lo to i, ni lo greëragaa zha ne nacgre to ngab to lo Dios. Ye gre zha ne no nez Italia nu, laa zho rxeel zhibdiuzh zho lo to.

²⁵ Guiaannie Dios to sca. Me glu ganle pa lotaa noxco me to.

GUITS NE PQUIAA SANTIAGW

¡Diuzh to grēse to!

¹ Naa nac Santiagw, tib zha ne quaiyūn xtsiūn Dios, tib zha ne quaiyūn xtsiūn Jesús, meŋ ndzon ne rnabey. Laa naa rquiaabdiuzh to grēse to ne nac to zha ne ziaad lo xtiī Israel, tel pa lotaa nac guidzliu ne no to.

² Bets, bzian, ndal ncuuaŋe rded ne parne glu dien pe nli dib zdoo ne rnalo ne Dios. Tel pe nactaa ncuuaŋe noded to i, ib gacmbande to, sinque golley. ³ Sac goŋ, zeene squi ran ne grē pe guielnē, ga rseed ne tibliladz rac ne tel petaa noded ne. ⁴ Golseed sca tibliladz golgac. ¡ib guiaand zdoo to tel petaa nac guielnē ne gaŋ to! Sac zeene sca cseed to gaŋ to guielnē, zac to tib zha ne dziits so lo Xtiidz Dios, tib zha ndzinli, tib zha ne ib peet gdziebd.

⁵ Zha ne racladz yгаа guielbiini co, zac gnab zhow lo Dios, ni mesi goŋ zdeed mew; sac guielbiini ne gnabtaa ne lo me zneedz mew. Led yed me yca, led yed me glisqui pe nacne pe gnab ne lo me. ⁶⁻⁸ Lēēraasi dib zdoo ne none gnab new, nodne gacchop guic ne; sac zha ne racchop guic, gdziŋd dze yгаа zho miŋe rnab zho. Nac zho, tib dze dib zdoo zho rliiladz zho zgaa zho miŋe rnab zho, stibgaa dze na rliiladzdraa zhow, ib ractiblid guic zho; masaque nac zho zig nac grē mtsiūn ne rbib lo nisdoo, sac tel mtsiūn co loxaque nēzrii nēzrec zienie mew.

⁹ No zha bets ne, zha bzian ne, quianied zho ncuuaŋe yquiiŋ zho, par miech peet nond zho; per none goŋ ine gley zho sac nroob non zho lo Dios. ¹⁰⁻¹¹ Scagaa zha ne rapchen, none ine gley zho niina ne biaanwin zho, sac nēz lo Dios grē ncuuaŋe rap zho nonda. None guien zho niicle ne nroob rapchen zho, zeene laa zho gbi lo guidzliu rii nuque guiaaŋ grē ncuuaŋe rap zho. Masaque nace zho zig nac guieŋ grē guizh ye, tel guiee cow, zhixtsēese ngbidz rcuiidz guizh ne zoba lo, rlozh ga rliaaŋgaw, gataa rnitlo xquielniowa.

¹² Dichos zha ne ib rrozite lo Dios nicle no nzian ncuuaŋe rcheep zho guŋctal zho xtoŋ zho, per ruŋd zhow; sac zha cosi zgaa zho tib guielmban ne gdziŋd dze lozh, guielmban ne bneele Dios gdeed me lo grēse zha ne rleynie me. ¹³ Zeene sca no ncuuaŋe rcheep ne guŋctal ne xtoŋ ne, guiabd ne togo Dios noquuil ne guŋ new; sac goŋ led yed Dios rzoobladz ncuuaŋe ndzinlid, ni niicle rquiiŋdga me miech guŋ zhow. ¹⁴⁻¹⁵ Grē ncuuaŋe ndzinlid ne rzoobladz ne, grē ncuuaŋe yozh ne rionie guic ne, miŋ co nac miŋe rquuil ne. Lēēw nac miŋe rcheep ne ruŋctal ne xtoŋ ne, ni ndionle ne gaŋle, lēē

gdib miŋe gdeed doŋ lo miech nac guielnēdox ne yгаа zho.

¹⁶ Bets, bzian, gac-wete to sca. ¹⁷ Golguien gaŋle, ncuuaŋe rquiiŋ, ncuuaŋe ndzinli, miŋ co nac miŋe rneedz Dios. Tibaque nac me, led yed me rdzēē par guiab ne meque rnabey rac guielntseeb. Me nac tib biini ne gdziŋd dze guiuu, ni tib lē guielcow guieŋd zaatne no me. ¹⁸ Zdoo me gola bneedz me tib guielmban ndzon lo ne niina ne laa bliladz Xtiidz me, masaque rrieequia ne nac mēēdglo lo me.

Nacda yquiaadiagse miech Xtiidz Dios

¹⁹ Bets, bzian, ne nac to zha ne rleynie naa: Golgacnaŋ gaŋle, ne ne nac ne zha ne no xnēz Dios, none dzioxcora ne yquiaadiag ne, zeene gnee ne none guien ne pa lotaa gnee ne, ni guŋd ne ne rnadse pew laa ne glēēle. ²⁰ Sac goŋ, zeene rlēē ne, grielod guŋ ne ncuuaŋe rdziladz Dios. ²¹ Golguieŋ sca, golsaan grētaa ncuuaŋe ndzinlid ne ziyūn to, golbiche lo grē guielntseeb ne znutaa quaiyac niina. Ine ndooladz golgac, golleynie Xtiidz Dios, diidz ndzon ne pseedle to; sac goŋ lēēw rlu zha laa to lo dol.

²² Per guiabde to togo loxaque yquiaadiagse to Xtiidz Dios rlēēlew ga; sinque ib none gban to miŋe rquiaadiag to, sac tel ib gbande tow lēēque to noquidie to ga. ²³ Sac zha ne rquiaadiag Xtiidz Dios, ni rband zhow, rzac zho zig rzac ne zeene rwi ne lo ne lo quiewan: ²⁴ Sac zeene nowi ne lo quiewan, hor cose ran ne zha rac ne; zeene laa ne rbiche low rsoladzdraa ne zha rac lo ne. ²⁵ Sanguē zha ne rquiaadiag Diidz Ndzon ne rlu zha laa miech ga, ni zigne rquiaadiagse zhow scasaque rioxco zho rban zhow, zha cosi ib zunlay Dios zho lo grētaa ncuuaŋe guŋ zho.

²⁶ Gacxe waa, zha ne rnee xnēz Dios no zho ni rgobeyd zho pe rnee zho, lēēque zha noquidie zho ga, ga rlu nliid zianaŋ zho miŋe rnabey Dios.

²⁷ Sac goŋ, par Dios meŋ ne nac Pxoŋ ne, zha ne no xnēz me none tsie zho tsiegun zho xyudar grē mēēdbziab, tsiegun zho xyudar grē wnaa ne ret tsieel, ni tsoxco zho zaacse gban zho, ib tsienalz zho ncuuaŋe ndzinlid ne ruŋ grēraa miech.

2

Lēda ga ruŋ zha ne rbe

¹ Bets, bzian, guŋde to ne ncuueese lo miech ne gnee to, sac zha ne sca ruŋ, zha dien guiab zho xnēz Jesús no zho. ²⁻³ Ron naa, zeene rlanso tib zha ricw zaatne rcaalsa to i, nacw zho xab niazh zho, no grē xnli or zho nia zho, lēēléd rio to dien pa lo wenraa sob zho; laa zeene rlanso tib zha mban beelze nac xab yeen, rnee to lo zho: "Ise bzo, telne racladzgaa luu sob luu, lo liuse i bzob." ⁴ ¡Pe

sca na rac zha ne no xnêz Jesús? Zha ne gon sca run, ga rlu zho niapse guielntseeb no guic zho.

⁵ Lêda ga gon bets, lêda ga gon bzian. Golgacnan ganle, ible Dios ble miech ne peet rapd lo guidzliu rii, zeena dib zdoo zho gnalo zho me, zeena yгаа zho zaatne bneele me gdeed me cuéz zha ne noxco rleynie me. Gotsaa gwi ne sca ganle, zha ricw nac zho nêz lo Dios; ⁶ laa to gon, no to rlozhd gzhidnie to zho. ¿Pe ib riende to, grê zha ricw co nac zha ne rsacsi to? Rgobniu zho to, riezho zho to lo wxtis; ⁷ haxta rdzibdee zho Jesús, meñ ndzon ne nacie to niina.

⁸ Ib none gban ne zigne rnabey Xley Dios, lo xley me zhubnee: “Bleynie samiech luu, zigne rleynie luu luu.” ⁹ Golguien gon, dol i noyup to squi rbe to dien cho nac zha ricw, chogaa nac zha mban; sac Xley Dios i quiaguuits to. ¹⁰ Golgacnan ganle, zha ne rguiits tibaque xley Dios, niicle maase zienal zho grêraaw, laa zho beenctal-le xtol zho ga, rzacaque zho zig zha ne noguiits grêw. ¹¹ Sac tibaque meñ ne psana grêsew. Gacxe waa, tel zha ne zienal mine rnee: “Gute luu samiech luu”, per rguiits zho mine rnee: “Yquiagobd luu zha ne led tsieeld luu”, laa zho beenctal-le xtol zho ga. ¹² Niowse sca golgac, niicle zeene gneegaa tow, niowse golnee; sac gon, zdzin dze cxobdol ne dien pe wban ne zigne rnabey Jesús, te wband new ye. ¹³ Grê zha ne ni lalnu rquiad zdoo samiech, gal dze co scaque ni lalnu yquiad zdoo Dios zho; sangue zha ne rquia zdoo samiech, ible zdedlaa zho lo guielnêdoh ne cxeel me.

Zha ne rnalo Dios none glu zhow

¹⁴ Bets, bzian, ¿pa dien rquiin guiab ne dib zdoo ne rnalo ne Dios, xnêz me no ne, ni tel rund ne xyudar samiech ne? ¿Niace scase laa Dios csilaale ne? ¹⁵ Gzoob ne no zha ne nacgrê to i, yase tib bets tow, tib bziangaa tow, ranlo to guieñd xab zho, niicle quianied zho ncuaañe gow zho; ¹⁶ ni guiab to lo zho: “Csacsid luu luu, got xabnal luu, dow ncuaañe racladz luu”, per loxaque diidz sca guiab to, ni gdeete to ncuaañe run falt lo zho. ¿Pa dien yquiin diidz co? ¹⁷ Scadaa nagon paat rquiinda guiab ne rnalo ne Dios, ni tel rund ne mine rieguial ne gun ne. ¹⁸ Gacxe waa, zha ne rnalo Dios ni run zho mine rieguial zho, no zho gnê lêda i run zha ne rnee lêêlew ga tosaque gnalo ne Dios. Ni rap zho rson, sac grieelod glu ne rnalo ne me, telne rund ne mine rieguial ne.

¹⁹ Nli wena run zha ne riladz tibaque Dios no, per grieelod guiab zho lêêlew ga, sac gon zig nac mendox ye ma riladz tibaque Dios no, per led por mincod laa ma lo guielnê ne cxeel me, sinque haxta rdzieb ma me. ²⁰ Nadzpaa nxen zha ne sca rzac,

pe ni lalnu riend zho paat rquiinda guiab zho riladz zho Dios ni telne rund zho mine rieguial zho. ²¹ Golgan ganle, zig nac pxozgol ne Abraham, porne been me mine rieguial me gane pcaania Dios me zig tib zha ne peet xtol. Led rsoladz to ganle, zeene rêb Dios lo me tsielogon me xpêed me, güey me zaatne pxeel Dios me. ²² Gotsaa gwi ne ganle, zeene been Abraham mine bnabey Dios me ga, ga blu ne nli rnalo me Dios, ni hor co mazdraa dib zdoo me bnalo me Dios. ²³ Lo Xtieldz Dios zhubnee ne scataa dib zdoo Abraham bnalo me Dios, gane pcaania Dios me zig tib zha ne peet xtol; zêeb diidz, tib zha ndzieeldiudz Dios goc me.

²⁴ Golgacnan sca ganle, led loxaque gliladzse miech Dios, laa me ycaaniale zho; sinque none glu zho nli riladz zho me, gun zho mine rnabey me zho. ²⁵ Golsoladz ganle, scaque wnaa ro nêz ne brieelê Rahab, por been me xyudar samiech me, gane pcaania Dios me zig tib zha ne peet xtol; sac zeene gon me noxtseeb zha ne pxeel Josué zie wleets ga, bdeed me zaatne biolan zho, ni blu me stib nêz ne wbiere zho, bgaad zho. ²⁶ Gase na ganle rlu, paat rquiinda guiab ne riladz ne Dios ni tel rund ne mine rieguial ne, nace ne dzigo zig tib xcuerp ngutoo, tel cuerp cow, ¿pa dien yquiina?

3

Ncuaañe run ludz miech

¹ Bets, bzian, guiabde to lega tso to glisqui to ncuaañe run stib miech, sac tsod zha ne demaste wen lo guidzliu rii. Zha ne sca run, rzac zho zha so cseed zho miech, per gacnan zho ganle zha ne rseed miech, mazdraa nroob ncuaañe tsasqui lo zho gal dze ne laa zho gacredz lo Dios.

² Grêse ne nzian mod ne rxin ne lo samiech ne. Tel niaca mine no tib zha ne grieele ycuêez ludz pa lotaa gnee zho, zha cosi cxind zho, haxta xcuerp zho zrieelo zho gnabey zhow. ³ Gotsaa gwi ne ganle zig nac guay, con tib lê win guib ne rgo miech ro ma rrieelo rnabey zho ma, rienie zho ma nêz ne racladztaa zho. ⁴ Scaque barcw, niicle ne nrooba, no hor rriee medox lo nis rheepa, per con tib lê yag lag win ne rsêe miecha, rrieelo rienie zhow nêz ne racladztaa zho. ⁵ Scapaa nagon nac ludz ne; niicle ne winsew, per nroob guielqui ne runa. ¿Ran to ganle tib bzhiñ yeense name rzobgui dan! ⁶ Ni tel ludz ne gon, rrieequia tib bel ga naca. Tib lê win xcuerp ne naca, per guielqui nroob ne runa, runctala xtol miech. Gun ne cuent tib lê gui ne brieegabil naca; ni dipse lo xquielmban miech noxtseeb zho low.

⁷ Golwi ganle, rrieelo miech runndoo zho grê ma ne rsiibe, grê ma ne rzêlen liu, haxta

grë ma ntseeb, haxta grë ma ne no nisdoo, rnabey zho ma. ⁸ Per guiend zha ne gon grieelo gnabey ludz; ncuaañe ntseeb naca, choot grieelod gnabeya; masaque laaw no par gnitlow miech, zigne ruñ grë guizh ncuaañ. ⁹ Lëew name rquini ne roolnie ne Dios men ne nac Pxoz ne, ni rlozh ga lëëquew rdzibdee ne samiech ne, ni lalnu riend ne me bzaa zho, biaan zho zigne rlu me. ¹⁰ ¿Pe ga nadien, ro ne roolnie ne Dios, ni roque ne rgodee ne samiech ne?

¹¹ Bets, bzian, led scada gon. Zig nacse tib zhlian, ¿niacxe zaatne rlanaque nis nex gaque rlan nis yuzed? ¹² Tib yag nexgaaw, ¿niacxe rquia xnex yag oliv lo yag guigw, yquiaagaa guigw lo lbë uv? Nanle to ganle racd min co.

Zha ne nixbiini

¹³ Lo grë zha ne nacgrë to i, tel no zha ne rzac zha nixbiini nac zho, none glu zhow ine zaacse gbannie zho samiech zho, gac zho tib miech ndooladz zig none gac tib zha nixbiini. ¹⁴ Per tel tibaque në rac zdoos zho ran zho zha ne stib noded, tibaque noguib zho csanwin zho samiech zho; gacnan zho ganle, led scad rac zha nixbiini. Ni lalnu rieguiald tso zho csanwin zho zho. ¹⁵ Led scad nac guielbiini ne rdeed Dios, sinque lëë zhiwseed mendox ga, lëë min co zienal grëraa miech guidzliu. ¹⁶ Zeene sca në rac zdoos miech ran zho cho stib noded, zeene sca tibaque no zho dien zha guianglaa zho lo samiech zho, loxaque dil, loxaque grë guielntseeb rzobni zho ga. ¹⁷ Zha ne nli rap guielbiini ne rdeed Dios, rund zho min co, laa zho zienal:

ndzinlise gban zho,
rleynied zho dil,
rguib zho zaacse rnee zho lo miech,
wen rac zho lo grëse miech,
rquia zdoos zho samiech zho,
rund zho cue zho zha ne mazdraa gacnie zho,
ncuaañe ruñ zho dib zdoos zho ruñ zhow,
niapse ncuaañe ndzinli rioxco zho.

¹⁸ Zha ne sca rleynied dil, rioxco zho rnee zho lo miech tipse gac zho, tipse gnee zho; scagaa rdzin dze ne ran zho zeene laa grë miech co rac tib miech wen.

4

Zha ne rleynie guielntseeb

¹ Ne squi tibaque rlëëlsa to, tibaque quiadil to, lëë min qui gon riegald por grë guielntseeb ne rio guic to. ² Rio to riogui to ncuaañe grieelod yquianie to, rlozh ga, haxta rut to samiech to parne yquianie tow. Në rac zdoos ran to cho zha quianie ncuaañe quianiede to, zeene ran to rrieeled yquianie tow laa to rlëënie zho, haxta rdinle to zho. Rrieeled yquianie to ncuaañe

racladz to, sacne rnabde tow lo Dios. ³ Niicle tel rnabgaa tow lo me, nreedzd mew, sacne laa guic to zienie yquianie tow loxaque par gdeedguxt zdoos to, gdeedguxt xcuerp to.

⁴ ¿Que tal ntseeb to! ¿Pe ib riende to, Dios gon rlëënie to zeene squi rio to rleynie to grë guielntseeb? Sac miech ne squitaa rleynie guielntseeb, lo Dios ga racntseeb zho. ⁵ Golgan ganle, zha rnee lo Xtiidz Dios: “Espiritu Sant, men ne pxeel Dios nacnie ne, rleynie me ne, ni racladz me zhaa ncuaañe gleynie ne laa ne gleynie ne me.”

⁶ Ni tel Dios gon, noxco me ne, ib zacnie ne griee ne lo guielntseeb; sca rnee lo Xtiidz me, zaatne rnee: “Zacnie Dios grë zha ndooladz, sangue grë zha niats, rdziguendi me zho.”

⁷ Golguien sca, ine ndooladz golgac, golgon mine rnabey Dios. Gdeetraa to diidz yquuil mendox to, sca golgun zeena zhal ma gbiche ma lo to. ⁸ Dib zdoos to golsëeb xnëz Dios, zeena scagaa me zacnie me to. Goltsoxco guiaaambe to lo grëtaa xtol to, golnab lo me csanme me zdoos to, mese gnalo to, gachopdraa guic to. ⁹ ¿Golguien ganle, ndzinlid i squi mban to! ¿Mban golgac, goltso guielnë, golgoon, laa ne tso to gzhidz to, laa ne tso to gley to! ¹⁰ ¿Ndooladz golgac lo Dios, zeena cuee me to lo grë ncuaañe nac to, csanglaa me to!

¹¹ Bets, bzian, ib gneenëde to zha ne nacgrë to. Zha ne rneenë bets zho, bzian zho, bel zho, ni rdziibdol zho zho, Xley Dios ga rguiis zho. Laa ne so zho gacladz zho zha gun guielwxtis, mazd tsoxco zho gban zho zigne rnabey ley. ¹² Golguien ganle, Dios psan ley, ni mese rieguiald gun guielwxtis, me nan zho cuibdol, chogaa csilaa me; per to nadien, ¿cho nac to par gdziibdol to samiech to?

¹³ Togaa ne nac to zha ne rnee: “Na gzhe widz dien pa tib guiedz ne guioo ne, guio-biaaz ne ga tib iz, ga dziuun ne wzi dziuun ne wto, dziuun lo ne dimi”, golquiaadiag mine gne naa lo to ganle. ¹⁴ Ne sca rnee to, ipe wen wen nan to dien yo to gzhe widz co! ¿Pe ranle to lega nacse xquielmban ne zigne nac xcow las ne rbe ral sil? Zhisaque rbew, zeene rlozh ga rludraa dien yow. ¹⁵ Mazd golguiab: “Telne zneedz Dios diidz gbanraa ne, min rii, min rii dziuun ne.” ¹⁶ Led tsode tibaque guielniats qui zienie guic to, golguien guielntseeb ga ruñ zha ne rac niats. ¹⁷ Ni golsoladza ganle: Grëse zha ne nanpaa pe nac ncuaañe ndzinli ne no gun zho ni rund zhow, xtol zho ga runctal zho.

5

Zha ricw ne zienal guielntseeb

¹ ¿Grë zha ne rapchen, zha ne zienal loxaque guielntseeb, golquiaadiaga ganle!

Golgoon, golquiaadan redz niina, sac gon nroob nac guielnē ne gan to. ² Grē ncuuaane beenlo to i, peet nonda, lega naca zig nac grē ncuuaane biodzle; grē xab to i, rrieequia ncuuaane dowle mxila. ³ Grē guiib or, grē guiib plat ne squitaa quianie to, rrieequia noloozhle bioochena; ni scadaa gon nitlo to, masaque gac to zig tib ncuuaane riab lo gui.

Laa to beenlo grētaa dimi qui, rzac to lēew yquiin to len dze ne ziaad, ni nande to gon laa dze ne nitlo to ziaadyoble. ⁴ Lēē grē dimi qui gon zēēb to lo grē zha ne quia xtsiin to, noquidie to zho rguizhde to xtse zho. Per golgacnaa ganle, grēse redz ne rquiaa zho zeene mban rac zho squi rsacsi to zho, laa Dios binlew. ⁵ Lo grētaa iz ne mban to lo guidzliu rii, loxaque grē ncuuaane gdeed guxt zdoo to, grē ncuuaane gdeed guxt xcuerp to noxco to, ncuuaane yozh ne riaab-taa guic to laa to runa, ib riende to laa dze ne nitlo to ziaadgaxle. jlēē to noyūn xcuent ma ne noro par guet ma! ⁶ Pe zhistaa guielntseeb ne quiaayūn to, haxta zha ne peet xtolđ, zha ne nanđ glis nia lo miech, rquiaqui to zho ncuuaane runđ zho, rnabey to ret zho.

Nodne guieed zha ne rnalō Dios

⁷ Bets, bzian, saŋgue to gon tiblīque golgac haxta gan to gdziŋ dze ne laa Jesús guiaad stīb, tel petaa run miech to peet tsienied guic to. Golgac zig zha ne ran, tel zha cow, zeene rlozh rlaal zho bni liu, tiblīque rac zho gdipse len mēē guie, rquiambēz zho haxta rdziŋ dze ne rlaal zho. ⁸ Tiblīque sca golgac. jib guiaand zdoo to, sac gon zhile gdziŋ dze ne laa men ndzon ne rnabey ne guiaad stīb!

⁹ Ib tsode to guieednie to grē zha ne nac-grē to, zeena gunctalde to xtol to; sac zhile gdziŋ dze ne laa men ne no gun guielwxtis guiaad. ¹⁰ Golsoladz ganle, grē zha ne biadteed xtiidz Dios padzeela, niicle nroob guielnē gon zho, per tiblīque goc zho. ¹¹ Zig nac Job, nanaxe to ganle zha nactaa guielnē ne gon Job, per ib bieete me, ni blozhse gon me guielnē co nroobraa guielnzaac ne bdeed Dios lo me. Ga rlu ganle, zha ne sca rdeed me diidz ran guielnē, led lega rand zhow; sac nquialadz me miech, rquia zdoo me zho. Dichos grē zha ne sca nac.

¹² Bets, bzian, zeene tsiegala glu to diidzli rnee to, tsode to gzeet to gbaa, gzeet-gaa to guidzliu par gliladz miech xtiidz to; guiab to: “Lēpaa gbaa qui”, “lēpaa guidzliu rii”, dien peragaa gzeet to. Tib diidz ne nliw, golguiab: “Nliw”, tib diidz ne nliđgaaw, golguiab: “Nliđa”, zeena gunctalde to xtol to; sac gon zha ne runctal xtol, ible zгаа zho guielnē ne csiaab Dios.

¹³ Lo grē to, zha ne no pe tib lo guielnēw, gnab zho lo Dios gacniēn me zho. Zha ne no pe tib guielbleya, goolnie zho me. ¹⁴ Zha ne

rzacnēgaaw, gnabey zho gacredz bla zha ne zo lo to, zha co quēēb nceit guic zho gnab zho lo Dios guiac zho. ¹⁵ Telne dib zdoo zha co gnab zhow lo Dios, zunguiac Dios zha rzacnē co. Zlische me zho lo xquielguidz zho, ni tel por pe falt ne beengaa zho lo me sca rzacnē zho, zuŋ me zhow perdon.

¹⁶ Gacxe waa, tib tib to zeene run to pe tib falt, yqueetsde tow, golzodiidza lo zha ne nacgrē to, lozhse ga golnab lo Dios gun me to perdon, zeena guiaanmbe to lo me. Sac tib zha ne biaanwenle nēz lo Dios, zeene sca pe rnab zho lo me run mew, niicle ncuuaane mazdraa nḡana. ¹⁷ Golsoladz Lí ganle, men ne biadteed xtiidz Dios lo miech padzeela, samiechaque new, per dib zdoo me bnalo me Dios. Tib dze bnaab me lo Dios csiaabd Dios nisguie, ni scase goca, dipse len tson iz groj ni tib lab nis guie biabd; ¹⁸ haxta bnabraa me lo Dios guiabaa stīb, dzigoraa biaba, laa guidzliu biire bdeed guielnzaac.

¹⁹ Bets, bzian, tel cho tib zha ne nacgrē to i sozit lo Xtiidz Dios, ni grieelo cho tib to ct-sire zho nēz yozh ne zie zho ga; ²⁰ golgacnaa ganle, ladzniale guielgut ga rsilaa zho zho, grēse xtol zha co zuŋ Dios zhow perdon.

Santiagow

GUITS NE GLO PQUIAA PEDR

Bets, bzian, jdiuzh to grëse to!

¹ Naa nac Pedr, tib zha ne rxeel Jesús nonee Xtiidz Ndzon me lo miech. Laa naa rxel tib guits rii ziaad lo to grëse to ne nac to zha Israel, no to stib ladz beñ: zig nac nêz Pont, nêz Galás, nêz Capadós, nêz Asia ni nêz Bitin.

² Dios men ne nac Pxož ne, ible me bzooblo to mazd padzeela, sac nanle me laa to gac xpëed me. Bdziñ dze, zeene laa me pxeel Espiritu Sant bleextso to laa to ngab xnêz me, zeena gban to zigne rnabey me, ni lozh csañmbe Jesús to; sac ible miñ co nacne bzhiee xchen me. Dios glu ganle pa lotaa noxco me to, zeena peet zhgab ctsebde to.

³ Xquizh xquielnzaac Dios, Pxož Jesús men ndzon ne rnabey ne, sac gon pquia zdoo me ne ptsëe me lo xquielmban ne, rrieequia gol ne stib. Xquizh me bleeban me Jesús, sac gon ga rlu ib zgaa ne guielnzaac nroob ne no diidz gneedz me lo ne, ⁴ guielnzaac cosi ncuuaane mbe naca, nacda ncuuaane nitlo, nacda ncuuaane gdzëelo, ni gbaa ga quianie mew.

⁵ Ne squi dib zdoo to rnalo to me niina, gane quianap me to con grëtaa poder ne rap me, parne yгаа to guielnzaac co. Zeene laa dze co gdziñ, zanlo to ganle zeene laa me ycaania to.

⁶ Gacxe waa ine nley golgac. Nli zan to grë pe guielnê, per ncuuaane tib rded ga. ⁷ Ib none gan to grë guielnê, parne ga glu dien pe nli dib zdoo to rnalo to Dios. Zig nac guiib or, parne glu dien pe nli ora, none teda lo gui; scaquegaa to, none gan to guielnê parne glu to nli dib zdoo to rnalo to Dios; ni zig nac or, ncuuaane rnitlo ga. Grëse zha ne tibaque gnalo me, niicle mazdraa guielnê ne gan zho, gal dze ne guiaad Jesús stib, ine zunnon Jesús zho, sanglaa me zho, zley me gan me zho, sac blu zho nli dib zdoo zho rnalo zho me. ⁸ Me i squitaa rleynie to, me i squitaa rnalo to, niicle ne gonde to me, niicle ne rande to me. Tib guielbley nrooba lo to, tib guielbley ndzona, nacda ncuuaane grielo gnee to zha naca; ⁹ sac gon, ne squi dib zdoo to rnalo to me, ib scaania me to.

¹⁰ Grë zha ne biadteed Xtiidz Dios lo miech padzeela, bzeet zho laa Dios glu ganle pa lotaa noxco me ne, laa me csilaa ne lo dol; per ib biend zho dien zhapaa gun me. ¹¹ Zeene bdeed zhiEspiritu Jesús guielbiini lo zho bzeet zho ne ib laa Dios cxeel me, pe nac guielnê ne ted me, ni pe nac guielndzon ne guiaadnie me; gocladz zho niacnañ zho dien cho nac men co, pa hor gac miñ co. ¹² Nacne blu Dios lo zho gocnañ zho nacda

ncuuaane gac len dze co, sinque haxta nele yгаа dziana. Sangue niina, nanwen to ganle laa grë miñ co gocle, lëe diidz cub co i gocnañ to niina, gbaa biet Espiritu Sant bdeed me guielbiini lo zha ne biadnew lo to. ¡Ncuuaane ndzona, haxta grë anj racladz tebaa zha gacnañraa zho dien zha naca!

None gban ne zigne racladz Dios

¹³ Golquix biini xquielrien to sca. Tiblique golgun guic to ne laa to yгаа grëtaa mine ral zdoo Dios gneedz me lo to, zeene laa Jesús guiaad stib. ¹⁴ Zig grë mëed ne ron xtiidz pxož, sca nguzobdiidz golgac lo Dios; gundraa to grë ncuuaan ndzinlid ne been to zeene gard gunbey to me ga. ¹⁵ Goltsocxo golban zigne racladz me, zeena ine mbe guiaaño to lo dol; sac gon tel me, men mbe nac me, nacd me men ne rdziguien dol. ¹⁶ Zigne zhoobneeque lo Xtiidz me, zaatne rnee: "None guiaaño mbe to lo dol, sac gon men mbe nac naa." ¹⁷ Pxož to nac me, me rnalo to, nanle to zeene laa me gun guielwxtis, led yed me cue; mine been tib tib miech, zunquizh me zhow. Golguien sca, golgon xtiidz me gzataa dze ne gbanse to lo guidzliu rii.

¹⁸ Golsoladz me blee to lo grë wseed ndzinlid ne psan grë xmenkol to; nanwen to gozh brieet to ga; per pquiind me ncuuaane rnitlo zig nac pe dimi or, pe dimi plat; ¹⁹ sinque laa me pquiin xchen ndzon Jesús. Ren ne bzhiee goc zig tib gon, zigne rgogon miech carner yeen ne mazdraa niow, carner yeen ne mazdraa ndaan parne guiaaño zho lo Dios. ²⁰ Padzeelale, haxta zeene gard cue guidzliu bzo Dios me gac me gon co, ni nligaa zeene laa dze co bdziñ laa me biaad, biaadsanwen me to lo Dios; laa Dios been miñ co sacne rleynie me to. ²¹ Gacxe waa, zrieelo dib zdoo to gnalo to Dios, mese none gliladz to. Me nac men ne bleeban Jesús, blu me ne men non nac Jesús.

²² Ni niina ne laa to mban zigne nac XTiidz Dios, mine nac diidzli, laa zdoo to biaanmbele lo dol; nasi zrieelo gleynie to zha ne nacgrë to. Dib zdoo to sca golleynie zho, ²³ golguien ganle, tib guielmban cuble rap to niina, rrieequia gol to stib; per nacdraaw zigne gol to glo, sinque lëe guielmban qui bgaa to zeene bliladz to Xtiidz Dios, diidz ne rneedz guielmban, diidz ne gdziñ dze nitlo. ²⁴ Zigne zhoobneeque low, zaatne rnee:

Grëse ne nac ne miech, zdziñ dze ne lozh ne, lega nacse ne zig nac grë guizhye, grë xquielndaan ne, lega nacsew zig nac guieen guizh co.

Sac tel guizhyew, zeene laaw rbidz, laa guieena rliaa laque;

²⁵ sangue Xtiidz Dios, gdziñ dze ne nitlow.

Ni lëe diidz co ga gon biadseed zho to, lëew rlu zha laa miech lo grë xtol zho.

2

¹ Nana sca: gundraa to grē guielntseeb, yquidiedraa to samiech to, gundraa to ne laglaase glu to guielwen, gacnēd zdoo to gan to cho zha stib noded, gzhixcuaadraa to diidzguizh.

² Sinque Xtiidz Dios goltsoxco, zeena lozh tsotibli guic to dziits so to low. Zig rzac mēdyeen ne wriin ral, nidzpaar dziladz win guie win; scadaa golsac Xtiidz me, zeena ygaade to grē guielnēdox ne csiaab me. ³ Laa to gonle ganle zha wentaa zdoo me, Xtiidz me sca goltsoxco.

Jesús nac zig tib quie mban

⁴ Golbig lo Jesús, golgan ganle lēē me nac zig tib quie ne rio squin yu, per tib quie mban. Ib bleynied miech me, sangue Dios, men non, men nziuu nac me lo me. ⁵ Golbig lo me sca, zeena ye to gac quie mban ne tsaa xyadoo me. To gac grē pxoz ne nliipaa mbe zdoo, gun to dziin len yadoo co; golban zigne rdziladz Dios, zeena guielmban co gac zig tib gon ne gdeed to lo me, ne nac to zha ne ngab lo Jesús. ⁶ Zigne zhubneeque lo Xtiidz Dios, zaatne znu rnee:

Men ne bzo naa cxel naa Jerusalén, me gac zig tib quie nroob ne gnaaz dziits xyadoo naa, ni lēē yadoo co nac grē zha ne ngab lo naa. Men non nac me, ni grēse zha ne gnalo me, ible csaand naa zho.

⁷ Ne nligaa tib men non nac me lo ne, sangue grē zha ne rliiladz me cholze miech rzooob zho me; zigne zhubneeque lo Xtiidz Dios, zaatne rnee: Quie ne sca bron zho tib lad zeene quiazaa zho yu, laaw bron zho sac rzac zho paat rquiinda, ni niina lēēpaaw nac quie ne nlibdziits xcoc yu.

⁸ Ni ziaad stib zaatne znu rnee: Quie co griel ni miech, quie co gron zho. Grēse zha ne nēd gliladz Xtiidz me zaatne rnee cho nac me, scapaa sac zho me, ni ib zhubneeque ne min co yгаа zho.

⁹ Sangue to, lo Diosle ngab to, me ble to, zigne rnee lo Xtiidz me: tole nac zhipxoz me, tole nac zha non ne quiaayun xtsiin me; miech ne mbele lo dol nac to lo me, mele rnabey to sac me bredz to laa to brieer lo guielcow bzēēc to lo xbiini ndzon me; zeena gnee to lo miech ganle zha nactaa grē ncuuaane run me. ¹⁰ Glo peet nonde to, sangue niina non to sac gon lo me ngab to; glo nande to pa lotaa rquia zdoo me to, sangue niina rley to ran to ganle squitaa rquia zdoo me to.

Tibaque golgun mine racladz Dios

¹¹ Bets, bzian, rleyne naa to. Ndiin ganle, nacse xquielmban ne lo guidzliu rii

zig zha ne tibrded stib ladz ben; gane rso naa diidz lo to, ib gzoobladzde to gun to grē ncuuaane ndzinlid ne racladz xcuerp to; sac min co rsacsi xalm miech. ¹² Golguien zaacse golgac lo grēraa zha ne gard gunbey Dios; niicle ne gneenē zho to niina, sac zho to zig cho grē zha ntseeb, per zeene gan zho ne ndzinli nac grē ncuuaane run to, haxta zleyne zho Dios gal dze ne laa Jesús guiaadgun guielwxtis.

¹³ Golgon xtiidz grēse men ne nac wx-tis lo guidzliu rii, sac sca rdziladz Dios: zigtaa presidenta, ne nac me zha nonraa, ¹⁴ zigtagaa grē zha ne nacnie me dziina, sac zha run guielwxtis, rdeed zho castigw ne rieguial grē zha ntseeb, ni scagaa runnon zho grē miech ne run ncuuaane rquiin. ¹⁵ Ible laa Dios racladz zaacse gac to, zeena grē zha nxeen, grē zha yozh ne riend pe rnee, haxta ni ro zho tsod pe gneenē zho to.

¹⁶ Gollu ne peet lo ngadoodraa to, per guiabde to ne peet lo ngadoodraa to laa to gun grē ncuuaane ndzinlid ne gacladztaa to. Led scadaa gon, mine racladz Dios min co golgun, gollu mele rnabey to niina.

¹⁷ Zaacse golgac lo grē samiech to, golguien cho lo zo to. Golleyne grē zha ne nacgrē to, ndooladz golgac lo Dios, golguien ne men ro nac me; ni scagaa golgon xtiidz grē zha ne nac wxtis nroob.

¹⁸ Bets, bzian, to ne nac to zha ne quia xtsiin ben, golgon mine rnabey men ne rree to; tel zhataa nac zho, zigtaa men wena, zigtagaa men ne ntseeba. ¹⁹ ¡Nley golgac, goldeed xquizh lo Dios, tel porne noyūn to mine rnabey me, laa zho rsacsi to! ²⁰ Sac gon, telne nosacsi zho to por xquielntseeb to, niicle paraa cxecw to paat yquiinda; sangue tel xrcw to nosacsi miech to porne noyūn to ncuuaane rdziladz Dios, dzigosi zleyne me to. ²¹ Golgacna ganle, ible none ted to min co ne nac to zha ne ngab lo Dios; sac gon, niicxe Jesús, blactaa guielnē ne bded me bdiizh me xtol ne. Glo me sca bded, nana negaa ible none sca dieed ne. ²² Tel me ni tib dol beend me, ni tib miech pquidied me. ²³ Niicle zeene blooredz zho lo me, ible psired me lo diidz co; niicle zeene quiasacsile zho me, ibn gocntseebd me lo zho; sinque grēsew psan me lадznia Dios, men co gun guielwxtis zigne no gaca.

²⁴ Masaque Jesús bgaadz grēse xtol ne, blactaa psacsi zho me pquia me lo cruz bdiizh mew; laa me been min co, zeena grieelo griee ne lадznia dol, gban ne zigne rdziladz Dios. Ne scataa psacsi zho xcuerp me, ga bi me grēse xquielnē ne. ²⁵ Glo lega nac to zig nac grē mēcwxiil ne zonziaab, sangue niina mele quianap to. Me nac tib baxtor ne rleynepaaw to.

3

Zha gban zha ne ptsieelniale

¹⁻² Bzian, to ne nac to men wnaa ne ptsieelniale, golgon xtiidz tsiel to. Niicle tel néd zho gliladz zho Xtiidz Dios, per zeene gan zho ne nligaa ndooladz nac to, ine ndzinli rac to, haxta zhal zho laa zho yquiabladz gliladz zhow. Yquindraa ne goon chopaa yquia gneew lo zho. ³ Golguien sca, tsode to ne goon dien pa xixcuaraa to par glunio to lo miech; dieen pa xixcuaraa guitsguic to, dieen pe hguiaa or ne yquia diag to, dieen pe grē guib or tso yan to, tso nia to, dieen pe lar niazh ne gacwraa to. Tsienalde to grē guielniow co, sac gon ncuaan laglaase ga; ⁴ sinque none xixcuaa zdo to, gac to tib zha tibiladz, tib zha ne ndooladz. Lēē guielniow co nac mine niowraa nēz lo Dios, ni min co gdzind dze nitlo. ⁵ Lēē guielniow co bioxco grē men wnaa ne biaadban padzeela, zha ne briece lo dol wban zho zigne racladz Dios; tel zha, dib zdo zho bnalo zho Dios, ni bin zho xtiidz tsiel zho. ⁶ Zig nac Sar, sca goc me, bin me xtiidz tsiel me Abraham, haxta rēb me masaque Abraham nac men ne rnabey me. Ni scagaa to, telne tsoxco to xixcuaa to, zac to zig goc Sar, dzigosi laa to gac zig xpēēd me; haxta ni tsoxtseebde to pe glisqui tsiel to lo to.

⁷ Scaquegaa to bets, ne nac to zha ne ptsieelniale, goltsoxco tsoquic to zha nac tsiel to. Golgan me zigne nonguiela gan to me, golguien ganle nda men wnaa; ni lala, non me lo Dios, sac gon ye me yгаа guielmban ne psan Dios diidz gneedz me lo to. Sca golban, zeena scagaa zeene gnab to lo Dios, squiaadiag me xtiidz to.

⁸ Nana sca, tipse golgac grē to. Ine niowse golleynie zha ne nacgrē to, miech wen, miech ndooladz golgac. ⁹ Zha ne gacntseeb lo to, gunde to ne yeque to gacntseeb lo zho; zha ne coredzгаа lo to, gunde to ne yeque to coredz lo zho; sinque mazd golnab lo Dios gunlay me zho, zeena scagaa to, zunlay me to; sac gon, ible min co bredz me to. ¹⁰ Zigne zhubneeque lo Xtiidz me, zaatne rnee: Zha ne racladz ine gley zho ne laa zho mban,

wen ted zho len ngbidz ne gban zho, none tsoxco zho ycuēēz zho ro zho, gneenēdraa zho, yquidiedraa zho;

¹¹ none csaan zho grētaa guielntseeb, niapse ncuaan wen tsoxco zho gun zho, yguib zho cuewen miech, niicle zhagaa wen gac zho lo grēse miech.

¹² Sac grē zha ne sca wen rac nēz lo Dios, tibaque quianap me zho, ni rquiaadiag me xtiidz zho tel pe rnab zho lo me;

sangue grē zha ntseeb, ni lalnu rdziguiend me ncuaañe ruñ zho.

Dichos zha ne mban rded lo samiech

¹³ Golguien sca, ncuaañe yquiin golgun; scagaa tsod pe nacne ctsidil miech to. ¹⁴ Laa telne ncuaañe yquinaquegaa noyun to, ni laa miech rtsidil to, jdichos to ga! Ib gdziebde to grē miech guidzliu, niicle peraa gnē zho gun zho to. ¹⁵ Tibiladz golgac, tibaque golgunnon Jesús men nroob ne rnabey ne, tibaque golconie Xtiidz Dios guic to, zeena nanle to pe guiab to lo zha ne gnabdiidz dien zha nacne rnalo to Jesús; ine niowse golgac, diidz ndooladz golnee lo zho.

¹⁶ Zaacse sca golban, zeena grē zha ne rneenē to porne nac to zha ne no xnēz Jesús, zdziñ tib dze ne ctoladz zho, zeene guien zho lega bnexuu zho to. ¹⁷ Wen zie zha ne ran guielnē, telne Dios rnabey gan zhow zeene noyun zho ncuaan wen; lēde gan zhow por xquielntseeb zho.

¹⁸ Golgan ganle niicxe Jesús, zha nactaa grē guielnē ne gon me. Niicle ne ni tib dol beend me, per haxta beet miech me bdiizh me grēse xtol ne nac ne miech ntseeb, psanwen me ne lo Dios. Nli gut xcuerp me, per zhiespiritu me gutew; ¹⁹ gane güeyted me zaatne niogyu zhiespiritu grē zha ne wban padzeela, güeynee me lo zho. ²⁰ Lēē grē zha co ib bzhiguield niladz Xtiidz Dios, niicle ne dipse len dze ne nozaa Noé barcw nroob co pquiambēz Dios niac-wen zho. Nanlaxe to ganle, xonaque nac zha ne bdedlaa lo nis co. ²¹ (Lega rrieequia goc nis co zig nis ne rrobnis ne. Zeene rrobnis ne, ga rlu ne laa ne briecele ladznia dol, ygaadraa ne guielnēdōx ne tsieguial zha ngoopdol, sac gon por mincopaa gut Jesús ni brieeban me; ni guiabd ne togo nis co rsanmbe ne lo xtol ne, sinque ga rxobnen ne ne laa ne rnab lo Dios ctsēē me lo xquielmban ne.) ²² Sangue niina gbaa ga no Jesús, ga zob me cue Dios nēz derech, grēse anjl non, grēse zha non ne no gbaa, rquittszghib zho lo me ni ruñ zho mine rnabey me zho.

4

¹ Golguien ganle, zha nactaa grē guielnē ne bded Jesús bdiizh me xtol ne; nana sca, scaque to gdziebde to golcueladz to gan to guielnē. Ib rquiin guielnē, sac zha ne no tib lo guielnē, rioguid zho grē ncuaañe gunctal xtol zho, ² zēēb rguib zho gban zho zigne racladz Dios. ³ Grētaa ncuaañe ndzinlid ne ruñ grēraa miech, golguiaanladz. Golguiaanladz zeene scataa ptsieelsa to zho, bzudz to, lega dowcho, lega gocho to nziu, haxta bionie to zha ne nacd tsiel to; bio to lo grē lni, bleynie to grē mdio.

⁴ Grē zha co, rien naa rlēē zho ran zho rtsieelsadraa to zho lo grē ncuaañe ndzinlid co, gane haxta rneenē zho to. ⁵ Per golsaan zho, benque zha quizha zeene gacredz zho lo men ne guiaadgun guielwxtis, gal dze

ne gdeed me miñe tsieguiañ tib tib miech, zigtaa zha mbana, zigtagaa zha ne gutlew. ⁶ Sac niicle zha ne gutlew, no zho gocnanpaa zho zha nac Xtiidz Dios zeene bzomban zho. Ible rquiinpaa Xtiidz me, sac zha ne rquiaa-diaga, niicle ne zetaque zho, per nêz lo Dios mban zhiespîritu zho.

Golgacnie zha ne nacgrê to

⁷ Zhile gdzîñ gdze ne laa grê ncuuaane rac lo guidzliu rii nitlo; golquix biini zacse golban, tibaque golzodiidznie Dios. ⁸ Ine golleynie grê zha ne nacgrê to, sac zeene nlipaa rleynie ne samiech ne, tel pe falt ne guntaa zho zrieelo cteed new zdoo ne. ⁹ Zha ne guiaad lidz to, goldeed zaatne cuêz zho; ine golcuêzlo zho, guieedniede to zho.

¹⁰ Tib tib to bneedzse Dios tib guielbiini lo to. ¡Golquiina sca, golgunlsa xyudar zha ne nacgrê to! Ib ga rquiin guielbiini co bneedz mew lo to.

¹¹ Zha ne rseed miech Xtiidz Dios, none gnee zhow zigne racladz me. Zha ne runгаа pe stib xtsiin Dios, ib yquiad zdoo zho none gun zhow dib nacse guielndaan ne rdeed Dios lo zho. Ncuuaane guntaa to, goltsienie guic to ne laaw gun to par csannon to lê Dios. Ga glu ne xtsiin Jesús quaiyun to, men ndzon ne rnabey, men ne gdzînd dze gdzêê. Sca rieguiala.

¹² Bets, bzian, ne nligaa rleynie naa to. Golsoladz sca, tel pe guielnêtaa gan to porne no to xnêz Jesús, peet tsienied guic to, sac ib scale no gaca. ¹³ Mazd ine golley; sac gon ye Jesús sca gon guielnê, ni scagaa nroob guielbley ne tso to gal dze ne glu ganle zha nactaa guielndzon ne rap me. ¹⁴ Zeene rgodee miech to, rquiaago zho to loxaque ne no to xnêz Jesús, nley golgac; wen zie to ga, sac gon zhiEspîritu Dios nacie to.

¹⁵ Guieltow sca csacsi miech to, telne bgaa to laa to beet, laa to wban, laa to bzêeb lo cuent ne rieguialdraa to, pe stib guielntseeb ne noyunragaa to. ¹⁶ Sangue telne rsacsi zho to loxaque ne no to xnêz Jesús, led guieltod ga. Laa ne ctoladz to, goldeed xquizh lo Dios, sac gon tib guielnzaac nroob bgaa to ngab to lo me! ¹⁷ Golgacnan ganle, grêse ne ne nac ne zha ne ngab lo Dios, len dze rii laa ne csilo dzian guielnê. Nana, telne ye zha ne ngab lo me ted guielnê, zha naczhe miñe ted grêraa zha ne nêd gliladz Xtiidz me, gal dze ne laa me gun guielwxtis? ¹⁸ Zigne zhubneeque lo Xtiidz me, zaatne rnee: "Niicle zha ne wenle nêz lo Diosa, nroobaque nac guielnê ne ran zho haxta gdzîñ dze ne ycaania me zho, zpe lelgue grê zha ne dzigo racntseeb lo me?" ¹⁹ Gacxe nagon waa, niicle tel pe nactaa guielnê ne gnabey Dios ted to, tibaque golban zigne rnabey me, golsan xquielmban to ladznia me; sac gon me nac

men ne rneedz xquielmban to, ni mesi ib csaand me to.

5

Golgon xtiidz zha ne rnabey lo to

¹ Laa niina nagon, laa naa cso choplan diidz lo to, ne nac to zha ne rnabey lo grê zha ne no xnêz Jesús. Ye naa, dziin co nac naa, naa nac tib zha ne gonpaa zha psacsi zho Jesús, ni nanpaa naa zgaa naa lo guielndzon ne no me, zaatne rnabey me, gal dze ne laa me guiaad.

² Rso naa diidz lo to gon, zaacse golquianap grê zha ne bgaa to noquianap to. Dib zdoo to golgun dzin qui, sac sca racladz Dios, ib tsienied guic to guiab to dien zha lega cob to dimi lo zho. ³ Gunde to ne gnabey to zho zig cho xmoz to, sinque zaacse golgac lo zho, zeena lo to cseed zho zaacse gban zho. ⁴ Scagaa, zeene laa men nroob ne quianap ne guiaad, zgaa to lo guielndzon ne gneedz me, lugar co gac tib premio ne gdzînd dze lozh lo to.

⁵ To ne nac to zha nguieg, golgon xtiidz grê zha ne zo rnabey lo to. Tib tib to, golgon xtiidz zha ne nacgrê to, sac gon: "Grê zha niats, rdziguierend Dios zho, sangue grê zha ndooladz, racniên me zho." ⁶ Telne guiaanwin to lo men ro ne nac Dios, ine ndooladz gac to lo me, scagaa me zunnon me to zeene laa dze co gdzîñ. ⁷ Tel pe nactaa grê zhizhgab to, grê xliaadz to, ladznia me golsana, sac gon me quianap to, noxco me to.

⁸ ¡Nsin golso lo mendox, sac gon tibaque quianañ ma gnitlo ma ne! Masaque rac ma zig rac grê meedz ne rgobeedz quiaguib ma ne gow. ⁹ Dziits golso gdeete to diidz yquuil ma to. Tibaque dib zdoo to golnalo Dios. Nanle to ganle dipse lo guidzliu, zha ne notaa xnêz me, scaque quiated zho. ¹⁰ Tel pe nactaa guielnê ne noyan to, ible csaand Dios to sacne rleyniedox me to, zeene laa dze co gza, hor co laa me gzhixcuaraa lo xquielmban to, gzodziits me to, guntibli me guic to. Me nac men ne bredz ne yгаа ne lo guielndzon ne no me grop me Jesús, guielndzon ne gdzînd dze nitlo. ¹¹ Mese nac men ne rnabey grêtaa ncuuaane no, ni gdzînd dze ne gdzêê me. Nligaa sca nac me.

¹² Laa naa rxel guits rii lo bets ne Silas, ziaadnie mew lo to, bets ne rne naa me, sac nligaa dib zdoo me rleynie me Dios. Miñe rne naa lo to lo guits rii, laaw rne naa sac racladz naa guien to ganle pa lotaa noxco Dios to, pa lotaa rleynie me to; zeena tibleque gac to gbichede to lo me.

¹³ Grêse zha ne riiladz Jesús Babiloin nu, zha ne bzooblo Dios gac xpêed me zigne bzoobloque me to, laa zho rxeel bdiuzh lo to; scaque Marcw, men ne rzaac naa nu zig tib xpêed naa, ye me laa me rquiaabdiuzh

to. ¹⁴Laa naa rnab lo to, go^lquiaabdiuzh grëse
zha ne nacgrë to, ine go^lxenⁿia zho.

Dios gacniën to peet zhgab ctsebde to, nac
to zha ne no xnëz Jesús.

Pedr

BROP GUITS NE PQUIAA PEDR

Bets, bzian, jdiuzh to grëse to!

¹ Naa nac Simón Pedr, tib ngundziin win ne pxeel Jesús nonee Xtiidz Ndzon me lo miech. Laa naa rquia guits rii rxel naa lo to, ne nac to zha ne squitaa ndzonse dib zdoo rnaló meñ nroob ne zob gbaa, zigne rnalóque no me. Xquizh Jesús meñ ne rsilaa miech, meñ ne nac Dios ne riladz ne, sac gon me gocniën to squi rnaló to me niina; sac mesi miñe nonguiel gac, miñ co run me.

² Zigse zie dze, gołtsoxco lozh gunbey to zha nac Dios, zha nac Jesús meñ ne rnabey ne, zeena scagaa zig zie dze zunlayraa me to, zacniënraa me to, parne peet zhgab ctsebde to. ³ Sac zeene gunbey to zha nacraa me, con grëtaa poder ne rap me, zneedz me guielbiini lo to parne tibaque gban to zigne racladz me, tibaque gleynie to me. jGotsaa gwi ne ganle zha nactaa ncuuañe ro, ncuuañe gzee zdoo ne been me parne gbig ne lo me! ⁴ Ni psañ me diidz pe nac grë ncuuañe ndzon ne gneedz me lo ne. Psañ me diidz, ib laa me cuee ne lo grëtaa guielyožh ne rac lo guidzliu rii, parne gac ne tib miech mbe zigne nac me.

⁵⁻⁷ Nli laa to rnalole Dios, per parne yгаа to miñ co, none tsoxco to:

zaacse golban,
gołtsoxco guien to zha nac Dios,
gołseed gnabey to xcuerp to,
guieete to,
tibaque gołtsoxco gołgun miñe racladz Dios,
iñe niowse golbannie grë zha ne nacgrë to,
gołsac zho zig tib menlidz to;
gołleynie samiech to.

⁸ Nana, telne tsoxco to znu gban to, dzigosi mazdraa tsoquic to miñe racladz Dios, dzigosi zlu run to miñe rnabey Jesús meñ ndzon ne rnabey ne, led loxaque runbeydse to me. ⁹ Sac zha ne tsoxcoda, rriequia rchool lo zho ga, rriequia rowle guic zho ga, sac gon rsoladz zho zha nactaa lo grë doł ne blee Dios zho.

¹⁰ Bets, bzian, gołguien sca, niina ne laa Dios bzooblóle to, laa me bredzle to ngab to lo me, gołtsoxco sca golban, parne guiabde to lo doł stib. ¹¹ Niicle par gdzingaa to zaatne rnabey Jesús, meñ ne psilaa ne lo doł, meñ ne rnabey ne, tsod pe yca lo to, iñe nzhiäl nēz zaatne ted to gdziñ to ga.

¹² Nli nanle to grë miñe rne naa nu, nli dziitsle zo to lo Xtiidz Dios, per ib none guncsoladz naa tow. ¹³⁻¹⁴ Laa Jesús meñ ndzon ne rnabey ne, blule lo naa zhile gdziñ dze ne laa naa gbi lo guidzliu rii, gane niina laga bii mban naa rgobey naa ible nonguiela

znu cso naa diidz lo to; ¹⁵ zeena niicle wbile naa lo guidzliuw, tibaque csoladz tow.

Goñpaa Pedr Jesús

¹⁶ Grëse miñe bnee no lo to zeene pseed no to zha nactaa poder ne rap Jesús, ni zha guiaad me stib, guiabde to togo bod guicse no biaba. Led scada gon, tel naa grop lo naa gon naa xquielndzon me ¹⁷⁻¹⁸ guic gui ne scataa pxobnen Dios ne meñ non, meñ ro nac me. Binpaa naa zëeb tsi Dios gbaa hor co, nē me: "Lëe Xpëed naa i gon, rleynie naa me, nziuu me lo naa."

¹⁹ Ga nagon rlu ne diidzli nac grë miñe bzeet grë zha ne biadteed Xtiidz Dios lo miech padzeela; gacxe waa, zig nac to ible nonguiel guien to zha naca. Masaque lëew quiaziini lo to niina, zig rziini tib biini guieel, haxta riini liu zeene laa Mel Ngol rlan; ni lëe Mel Ngol co nac Jesús. ²⁰ Per scagaa, racladz naa gacnan to ganle, grieelod ne lega tel zha guiaabtaa guic miech, guiab zho sca nac miñe bzeet zha ne biadteed Xtiidz Dios, ²¹ sac gon tel zha co, bneed zho ncuuañe biaabtaa guic zho; sinque laa zho bnee miñe bnabey Dios psiaab Espiritu Sant guic zho.

2

Zha ne rquidie (Judas 4-13)

¹ Grë zha ne biadteed Xtiidz Dios padzeela, miñe bnabey me zho miñ co bnee zho; per brieequiaque zha ne pquidie rëb zho Dios pxeel zho, ni nlida. Ni scaquegaa niina, grë zha ne rseed to, zrieequia zha ne yquidie lad co. Dzega dzega csilo zho glu zho grë zhiwseed yozh zho, ib gunbeydraa zho meñ ndzon ne rnabey ne, meñ ne psilaa zho lo xtol zho; per nand zho zha nactaa guielnëdox ne yгаа zho, tibaque zeene guien zho laa zho nole lo caxtigw co.

² Ndal miech ne grieequia tsienal grë ncuuañe yozh ne gun zho, niapse por zha laa grëraa miech csilo gneñë Xtiidz Dios. ³ Zha yozha, laa zho tsienal loxaque dien zha gunlo zho dimi, zguib zho yquidie zho to gdeed to dimi lo zho. Per ib tedsod zguizh zho miñ co, sac bzeetle Dios ganle zha nactaa lo guielnëdox ne yгаа zho; ⁴ sac Diosi gon, miñe run grë zha ntseeb, csand mew scase. Golgan ganle, niicxe grë anjl ne sca been falt lo me, gondzed me zho, bleegezah me zho gbaa, bnabey me bioogyu zho tib lo ncowdoo, ga nioogyu zho nieeda gal dze ne laa me gunquizh zho miñe been zho. ⁵ Padzeela zeene wban Noé, grë miech ntseeb ne bnëd nion xtiidz me niicle ne bneepaa Noé lo zho, scaque gondzed me zho, psiaab me tib guiedox bnitlo zho grëse zho; loxaque Noé ni zgadz menlidz Noé psilaa me lo nis co; sac wban Noé zigne racladz me.

⁶ Scaque len dze ne wban Lot, bdziguiend me grë miech yozh ne bio guiedz Sodom ni guiedz Gomorr; blaal me gui grop guiedz co, bnitlo me zho grëse zho, xquidiëse biaan. Laa me been min co, zeëna ga gan grëraa zha ntseeb ganle pe nac miñe tsieguial zho telne csaand zho xquielntseeb zho. ⁷⁻⁸ Lotse psilaa me, sac bioxco Lot miñe rnabey me. Gapaa no Lot, ranpaa me zha run grë miech co; haxta mban rac zdoo me, ran me gzataa dze loxaque grë guielyozh noyun zho. ⁹ Gase na ganle rlu ib rsaand Dios zha ne rnalopaa me, rsaand me guiab zho lo dol; ni scagaa grë zha ne rsaand guielntseeb, ib tedsod zho lo guielnëdoh ne cteed me zho gal dze ne laa me gun guielwxtis.

¹⁰ jZig nac zha ne guiaadquidie to ga, mincopaa yгаа zho! Ni lalnu gandzed Dios zho; sac gon, laa zho zienal loxaque grë guielyozh ne gdeed guxt xcuerp zho. Miech nad, miech niats nac zho, rzhidznie zho miñe rnabey Dios, ni lalnu dzeb guieud lo zho rdzibdee zho grë men non ne no gbaa. ¹¹ Per ni grë anjl, niicle ne zha nroob nac anjl, niicle ne rap anjl poder; per rdzind anjl lo Dios gdzibdee anjl zho. ¹² Per zha, lo xquielyozh zho ga, haxta ncuaañe riend zho zha nac, rdzibdee zho. Lëëdaa grë ma nac zho, tel ma laa ma ralse par yгаа ma nitlo ma; guieendraa xquielrien zho, ncuaañe racladzttaa zho run zho. Per zdzin dze ne nitlo zho, zigne rnitlodaque grë ma, ¹³ por grëtaa guielntseeb, grëtaa guielyozh ne squitaa rley zho run zho haxta zobna ngbidz.

Miech mbixladza, miech ngubeeguieiltow, rquiaalose zho miech wen nac zho zeëne rquiaalsobnie zho to lo zhiini to. ¹⁴ Wnaa ne ganntaa zho, pe na gzoobladzd zho tsonie zho wnaa co, tibaque quaiyunctal zho xtol zho. Rio zho rquiiil zho grë zha ne gard sodziits lo Xtiidz Dios; rienle zho zha gla zho ncuaañe rquiiin lo zho. Miech ndziibdeele nac zho, ¹⁵ sac laa zho psaanle xnëz Dios, nëz ne nitlole zho no zho; lëë zho run xcuent Balam, xpëed men ne lë Beor. Tel Balam, haxta miñe nonguieldraa been me par gun me gan dimi; ¹⁶ per bdzin tib dze zeëne laa Dios blisqui lo me grëtaa ncuaañe quaiyun me ga. (Bnabey Dios lëëque xpurr Balam bnee, dzigoraa bien Balam psaan me xquielyozh me ga.)

¹⁷ Masaque nac zho zig nac grë bzie ne bidzle nis, zig nacgaa xcow bidz ne nëzrii nëzrec zienie me; ni lalnu paat rquiind zho. jLaa zho nole guey zho lo guielcowdoo ne rieguial zho, zaatne gdzindraa dze grieë zho!

¹⁸ Niats rzë xtiidz zho, per ncuaañe paat rquiind rnee zho. Miñe mazdraa mban run zho, rio zho lëëque lo grë guielyozh ne rdeed guxt xcuerp zho rquiiil zho grë zha ne pense brieë lo dol, rlozh ga rbiire riab

zha co lo grë dol co stib. ¹⁹ Rnee zho zac tel zhataa gban ne, nodne gnabey xley Dios ne. Rzac zho na choot rnabeyd zho, ni riend zho dol quianabey lo zho; sac grëse zha ne gacdraa csaan tel pe grë guielyozh ne run zho, lëë grë ncuaañe co rnabey lo zho. ²⁰ Tib zha ne sca brieële lo grëtaa ncuaañe ndzinlid ne no lo guidzliu rii (porne bliladz zho Jesús, men ndzon ne rnabey, men ne rsilaa miech lo dol), ni gbiireque zho gdeed zho diidz guiab zho low gnabeya zho, mban gon tsie zho; sac dzigole mazdraa mban guiaan zho. ²¹ Lëda ga gon, telne gocnanle zho zha racladz Dios gban zho, ni lozh ga csañ zho xtiidz me tib lad, gbiire zho tso zho lo grë ncuaañ yozh ne been zho glo. Nroobdoh caxtigw ne gan zha co, mazd zhi miñe yгаа zha ne gocnañd zha nac xtiidz me. ²² Zha copaa nagon run miñe rnee diidz ne znu rëb: “Nandraaque mëcw, ncuaañe bdzible ma rbiire ma row maw”; ni stib miñe znu rnee: “Ngutzshe, rlozhle raz ma nis mbe, ni rlozh ga riegaaque ma lo nis ben.”

3

¿Zha nacne gard guiaad Jesús?

¹ Bets, bzian, golgan ganle lëële guits rii raca chop zixel naa. Gropse low, rso naa diidz lo to tosoxo to zaacse gban to, ine niini gac guic to. ² Golsoladz ganle, zha nac grëse miñe bnee grë zha ne biadteed xtiidz Dios padzeela; golsoladz zha nac grë miñe rnabey Jesús, miñe biadseed no to. (Jesús, men ndzon ne rnabey ne, men ne psilaa ne lo grëtaa xtol ne.)

³ Racladz naa gacnan to ganle, len dze ne ziaadyob guiaad Jesús, zrieëquia zha ne gzhidznie xtiidz me, csilo zho gun zho grëtaa guielyozh ne gzoobladz zho; ⁴ guiab zho: “jPe gliiladz ne nazho guiaad Jesús! Telne nli rëb me laa me guiaad, ¿yo me na? Grë xmengol ne, zha ne scataa pquiambëz me, laa zho gutle, ¿cho na zho guiaad? Znuataque nac lo guidzliu wlal ne brew.”

⁵⁻⁶ Squiaalo zho rsoladzd zho zha bnitlole guidzliu tib vuelt, ni zhagaa nitlo miñe no niina. Wen wen nan zho ganle zha bnabey Dios biao guidzliu, me bnabey brieew lo nis, ni masaque lo nis now; mincoxe waa nis bnitlow glo. ⁷ Scaque, nacle xtiidz Dios, zigtaa gbaaw, zigtaa guidzliu ne no niinaw, laaw nitlo, per lo guile nitlow; ni lo gui co nagon yгаа grëse zha ne run guielntseeb ted zho caxtigw.

⁸⁻⁹ Zha ne rzac quiaaaneladz Jesús diidz ne psan me ga, per led quiaaaneladz mew; sinque laa me quiambëz tebaa grëse miech gac-wen lo me. Laa me racladz, grëse zho csaan xquielntseeb zho, zeëna ni tib zho nitlod. Bets, bzian, nanle to ganle led yed me ngab xtse. Sac tel me, ncuaañe gun ne tib

milraa iz, tib dzeque gun mew; nroob rzac ne tib mil iz, per par me rzacse mew, lal ne rzac ne tib dze. ¹⁰ Ib laa me no guiaad, per choot nand dien pa horpaa guiaad me; laa me guiaad zig rzëëbse tib ngbaan yu, tibaque zeene gan miech laa me ziaadle. Grëse ncuuaane no, hor co laaw lozh; bidox ne gdzieb ne tso zeene laa gbaa nitlo; grë mel ne ndziib gbaa, masaque gazbel ma; haxta guidzliu, dib nacsew laaw tsec.

¹¹ Scataa nagon nitlo guidzliu rii, ni grëraa ncuuaane rdzian ne niina, igolguien sca golban zigne racladz men ndzon ne rnabey ne, gunctaldraa to xtol to! ¹² Tibaque golconie guic to ne ib laa me no guiaad; tibaque ndzinli golban, gollu ne quiambëz to gdziinob dze ne sca gazbel grë ncuuaane ran ne gbaa, dze ne sca tib guiaalse grë ncuuaane niaaw. ¹³ Horco nagon laa ne dzian tib gbaa cub, laa ne dzian tib guidzliu cub ne psanle me diidz ygaa ne; zaatne tsodraa guielntseeb.

¹⁴ Bets, bzian, nligaa goltsoxco ndzinli golban, gunctalde to xtol to; niowse golbannie samiech to, zeena gal dze ne laa Jesús guiaad, ine gleyne me to gan me mban to zigne racladz me. ¹⁵ Golsoladz ganle, porne quiambëz me gbig grëraa miech lo me csilaa me zho lo dol, min co gane gard guiaad me.

Ye bets ne Pabl, men ne nziuu lo ne, lo grë guielbiini ne rdeed Dios lo me rquiaa me grë guits ne zixeel me, zineeale me lo to grë mine none naa nu. ¹⁶ Parga nli no mine rnee me ga, ngan guien ne zha naca; grë zha ne rdziinpaa racladz ctsëë Xtiidz Dios, zeene laa zho rneew, laa zho rneelew zigne racladz zho; zigne runaque zho grëraa mine zhobnee lo Xtiidz Dios. Zha ne sca run, lëëque zha noguib nitlo zho ga.

¹⁷ Laa naa rzet grë min rii lo to nu, zeena nsin so to, ib gdeete to diidz cho grë zha ntseeb ne sca nac guiaadquidie to, yquuil zho to csaan to mine nac diidzli, csaan to nëz ne ziele to i. ¹⁸ Goltsoxco zig zie dze guienraa to pa lotaa rleyne Dios to, ni guienraa to cho nac Jesús, men ndzon ne rnabey ne, men ne psilaa ne lo dol.

Me nac men non, me nac men nziuu, ible me rieguial gunnon miech, zigtaa ninaw, zigtagaa grë izdoo ne ziaadraaw. Sca rieguiala.

Pedr

GUITS NE GLO PQUIAA JUAN

¡Diuzh to!

Laa naa gzodiidznie to ganle cho nac Jesús.

¹ Jesús nac Diidz Ndzon ne rdeed guielmban. Notaque me, nole me zeene bre guidzliu. Bdzin dze biaad me lo guidzliu; grop diag no bdzion no grê mine bnee me, grop lo no bdzion no grê mine been me; sac bdzionpaa no zha rac me, zha rnee me, haxta bzhiieen no nia me. ² Ni niina laa no quianee lo miech ganle cho nac me; golgacnan ganle, me needz tib guielmban ne gdzind dze lozh. Zaatne no Dios men ne nac Pxoze, ga no me; zeene biaad me lo guidzliu dzigo bdziunbey no me. ³ Gacxe waa, mine rnee no lo to led lega rneed now; nozhah bdziona, nozhah bdziona. Laaw rnee no lo to, zeena tipse gac ne grê ne, gacnie to no zigne nacie Dios no (men ne nac Pxoze), zigne nacie Jesús no, men ne nac Xpêed me. ⁴ Laa naa rnee grê min rii lo to lo guits ne rxel naa nu, zeena zigne nonley zdoo no scaquegaa to tsonley zdoo to.

⁵ Znu nac mine bdzion no pseed Jesús miech, rêb me: Nac Dios zig nac tib biini, ni tib lê guielcow guiend zaatne no me; laa grê dol, masaque naca zig nac guielcow. Ni mincoque gon rnee no lo to. ⁶ Gacxe waa, telne rnee ne naciele ne me, ni rlozh ga tibaque lo guielcow co no ne, rquidie ne ga dzigo. ⁷ Telne nliipaa mban ne lo xbiini me, zigne mban Jesús lo biini co, dzigosi haxta tipse nac ne grê ne; ni scagaa, xchen Jesús nac mine csanmbe ne lo grêtaa xtol me.

⁸ Nana tel guiab ne: Tel naa ib peet dol rapd naa. Lêeque ne noquidie ne ga, rneelid ne ga zha nac ne. ⁹ Sangue telne cxobdol ne grêse xtol ne lo Dios, ible tedsod silaa me ne lo grêtaa dol co, sanmbe me ne lo grêtaa guielntseeb ne zidziun ne; sac ible laa Jesús gut par csanmbe me ne. ¹⁰ Telne sca guiab ne rapd ne dol, rrieequia dzigo rzoob ne Dios zig tib men ne rquidie; sac tel me, nanpaa me grêse ne miech ngoopdol nac ne.

2

¹ Xin yeena, laa naa rso diidz lo to: Gunctaldraa to xtol to; telne nandgaa new cho tib to zha been pe tib dol, golsoladz ganle no tib men ne quianab lo Dios men ne nac Pxoze ne yquia zdoo me ne, lêe men co nac Jesús, lo me golbig (tel me ni tib dol rapd me). ² Sac me bded grêtaa guielnê ne riogual ne ndieed ne por grêtaa xtol ne, psanwen me ne lo Dios; me goc zig tib gon ne pcaania Dios gozh grêse xtol ne, ni xtol grêraa miech ne ndxie dibdoose lo guidzliu.

Golleynie samiech to

³ Golgona ganle: Telne run ne grêse mine rnabey Dios, gase rien ne ne nli xnêz me no ne. ⁴ Laa tel zha ne rnee: "Xnêz me no naa", ni rlozh ga rund zho grê mine rnabey me, rquidie zho ga. ⁵ Sac zha ne nli rleynie Dios, rioxco zho rban zho zigne nac xtiidz me; ni tel ne, ndion ne ganle nli xnêz me no ne. ⁶ Gacxe nagon waa, zha ne rnee xnêz me no zho, ib none zaacse gban zho, zigne wban Jesús zeene biaad me lo guidzliu.

⁷ Bets, bzian, golgacnan ganle, none gleynie to samiech to. Guiabde to togo ncub mine rne naa lo to nu gun to, laa naa rzet mine binle to glo zeene psilo pquiaadiag to Xtiidz Dios. Niicle ne padzeelale zhubneew, niicle ne pquiaadiagle tow, ⁸ per rrieequia ncuba niina; sac gon zeene biaad Jesús, me blu ganle zha none gleynie ne samiech ne. Ni scagaa niina ne laa to zienala, laa to noriee lo guielcow ne no to glo, laa to nozêeb nêz lo xbiini Dios.

⁹ Ga nagon, tel zha ne rnee lo biini co mban zho ni rlêenie zho samiech zho, rquidie zho ga; bii lo guielcow ga mban zho. ¹⁰ Zha ne rleynie samiech, zha cosi nli lo biini co mban zho, noxtseebd lega tsobe zho, sac ranpaa zho pa lo zie zho; ¹¹ sangue zha ne rlêenie samiech, lo guielcow ga no zho. Masaque nac zho zig zha ne rold lo, niicle zha riend dien pa nêz tsie zho, sac guielcow co quiantse lo zho.

¹² Xin yeena, laa naa rne grê min rii lo to, sac gon, tel to laa Jesús bdiizhle tel pe nactaa grê xtol to. ¹³ To ne nac to dad, laa naa rxel diidz rii lo to, porne nac to zha ne riladze Jesús, nanle to ganle notaque me, nole me zeene bre guidzliu. Togaa ne nac to zha nguieg, laaw rxel naa lo to, sacne nligaa dziits zo to, rrieelodraa mendox yquiiil ma to. To ne nac to mêedlas, xin yeena laa naa rxel diidz rii lo to, porne nac to zha ne nole xnêz Dios men ne nac Pxoze ne.

¹⁴ Nana sca, zigtaa tow ne nac to dad ne runbeyle Dios; zigtagaa tow ne nac to zha nguieg, ne nataa ndip ndaan to laa to pcaaniale Xtiidz Dios dib zdoo to, ne nac to zha ne lëbdraa mendox yquiiil, ¹⁵ golguien, gleyniede to grê ncuaa ne rap to, gleyniede to grê ncuaa ndzinlid ne rac lo guidzliu rii. Zha ne rleynie grê ncuaa co, nliid rleynie zho Dios men ne nac Pxoze ne; ¹⁶ sac grêse ncuaa ne rac lo guidzliu rii (zig nac zha ne zienal ncuaa ne gdeedgut xcuerp, zha ne rzoobladz yquianie ncuaa ne rdziladztaa, zha ne racniats lo samiech), grêse ncuaa co led Diosd rnabeya, sinque lêe mine rzonal grêraa miech lo guidzliu ga. ¹⁷ Ni na tel zig nac guidzliu, zig zie dze laaw qualozh grêw grê ncuaa ne rleynie miech low; sangue zha ne mban zigne rnabey Dios, laa zho bgaale tib guielmban ne gdzind dze lozh.

Zha ne rlëenie Jesús

¹⁸ Xin yeena, zhile gdziñ dze ne laa guidzliu nitlo. Led binle to ganle ib zrieequia tib zha ne glëenie zhiwseed Jesús, ni nligaa niina len dze rii ndal-le zaatne norieequia grë zha ne rsilo quatsidil Xtiidz me; gane ndion no ne laa dze co ziaadgaxle. ¹⁹ Nli ladaque zha ne nacgrë ne brieë grë zha co, per nliid naciepaa zho ne; sac tel niaca miñe nlipaa nacie zho ne, nrieextsod zho. Ga nagon blu zho ne nliid nacgrë zho ne.

²⁰ Sangue to, nacle to zig nac grë zha co, sac nacie Espiritu Sant to, bneedz me guielbiini lo to runbey to miñe nac diidzli.

²¹ Guits ne rxel naa lo to nu, nacle par cseed naa to miñe nac diidzli, sac runbeyle tow ni haxta rien to pa miñ nac guielwquidie; sinque laaw ziaad lo to par gacnan to ganle zha nac zha ne noquidie i.

²² Grë zha ne rnee i nliid lëë Men ne zëëble diidz cxeel Dios lo guidzliu ga nac Jesús, noquidie zho miech ga. Ni zha ne sca run, rlëenie zho me ga; ni ne sca riladzd zho cho nac me, ye le Pxoze me ga riladzd zho. ²³ Sac zha ne rlëenie men ne nac Xpëed Dios, ga rlu ne nliid riladzd zho cho nac Dios; sangue zha ne rxobnen cho nac Xpëed me, zha cosi nli riladzd zho cho nac me. ²⁴ Laa naa rso diidz lo to sca: Goltsienal grë miñe pseed to zeene glopaa psilo bliladz to Xtiidz Dios, zeena zigtaa Dios, zigtagaa Xpëed mew, tibaque gbannie to me. ²⁵ Golsoladz ganle, laa Jesús psanle diidz ne ib zgaa ne tib guielmban ne gdziñ dze lozh; lëë guielmban co yгаа grëse zha ne nacie me.

²⁶ Laa naa rzet miñ rii lo to, sac ne squi no grë zha ne ziaad racladz yquidie to. ²⁷ Sangue to laa Jesús pxeelle Espiritu Sant nacie to, rquiind ne goon chora cseed to; sac Espiritu Santzhal rneedz guielbiini lo to rien to zha nac grëraa ncuaañe no gacnan to, ni mesi gon miñe nac diidzli miñ co rseed me to, led yed me rquidie. Golguien sca, Jesús golbannie, golbannie me zigne noseed Espiritu Sant to.

Zha ne nac xpëed Dios

²⁸ Xin yeena, nanle to sca sozite to lo Jesús, sinque tibaque golgacnie me; zeena ne tibiladz gac to gal dze ne laa me guiaad. Sac zha ne sozit lo me gban zho zigne gacladztaa zho, zeene laa me guiaad mban gac zho; sac guielto ne guiaañ zho lo me. ²⁹ Nanle to ganle, mesi zigne rieguial gac guielwxtis sca run mew; gacxe waa, grëse zha ne nac xpëed me ible zdeed me miñe rieguial zho.

3

¹ Golwi ganle pa lotaa rleynie Dios ne, laa me rneedz diidz laa ne gac mëed lo me. ¡Ni nligaa tel ne, xpëedle me nac ne! Grëraa

miech riladzd zhow, sacne runbeyd zho cho nac me.

² Bets, bzian, ne nligaa xpëedle Dios nac ne. Nli ndiond ne niina dien zha glu ne gal dze ne laa Jesús guiaad, per miñe ndionpaa ne, zeene gal dze co laa ne gac zigne nacpaa me; ni dzigosi laa ne dziañ me grop lo ne.

³ Ni grëse zha ne zienie guic yгаа guielnzaac co, tibaque rioxco zho zig zie dze nosaan zho ncuaañe runctal xtol zho, sac tel Jesús randzed me dol.

⁴ Grë zha ne runctal xtol, xley Dios ga rguiits zho, sac grëse dol ne runtaa miech ga rlu ganle ne rond zho miñe rnabey me. ⁵ Per nanle to ganle, laa Jesús biaad lo guidzliu, biaadsilaa me miech lo grëtaa xtol zho; ni mesi ni tib dol rapd me. ⁶ Gacxe waa, zha ne nlipaa nacie me, zienaldraa zho ncuaañe gunctal xtol zho; laa grë zha ne tibaque noyuncal xtol, gase rlu ne gard guien zho cho nac me, gard gunbey zho me.

⁷ Xin yeena, ib gliladze to miñe rnee zha ne racladz guiaadquidie to. Golgan ganle, zha ne mban zigne rdziladz Dios, lëë zha co nli mbe zdoo, zigne men mbe nac Dios; ⁸ sangue grë zha ne tibaque quaiyuncal xtol, xnëz menodox ga ngab zho; sac tel menodox, desde padzeela tibaque guielntseeb quaiyuna ma. Ni miñ co nagon nacie biaadpaa Xpëed Dios lo guidzliu, biaadnitlo me grëtaa ncuaañe run ma. ⁹ Zha ne nac xpëed Dios, rdeetraa zho diidz gunctal zho xtol zho, sacne laa guic zho zienie gban zho zigne racladz Espiritu Sant, men ne nacie zho; rienle zho nodne gunctal zho xtol zho, sac laa zho nacle xpëed Dios.

¹⁰ Nieenpaa cho nac xpëed Dios, chogaa nac xpëed menodox, sac grëse zha ne run guielntseeb, grëse zha ne rleynie samiech, led xpëete Dios nac zho; ¹¹ sac gon, desde dze ne psilo bliladz to Xtiidz Dios, bingazh to ib none gleynie ne samiech ne. ¹² Zig nac Caín, xnëz menodox ngab Caín, gane beet me bets me loxaque ne ndzinli mban bets me, laa me niapse guielntseeb run me. Ib gunde to miñe been Caín. ¹³ Gacxe waa, bets, bzian, zeene gan to laa grëraa miech rlëenie to, ib tsode to zhgab guial to pe nacie sca run zho. ¹⁴ Sangue ne rleynie ne samiech ne, gane ndion ne noxtseebdraa ne guioo ne gabil, laa ne bgaale tib guielmban ndzon ne gdziñdraa dze lozh; sac zha ne rleynie samiech, nëz ne nitlo zho ga zie zho. ¹⁵ Grë zha ne sca rlëenie samiech, rrieequia rut zho ga, ni nanle to ganle zha ne rut samiech, gard yгаа zho guielmban ndzon ne gdziñd dze lozh ga. ¹⁶ Ndion ne zha gleynie ne samiech ne, sac Jesús zhal blu zhaw zeene sca bleeladz me me gut me bdiizh me xtol ne. Gacxe waa, zha ne nlipaa rleynie samiech, none cueeladz zho zho, cueeladz zho ncuaañe rap zho, gacnie zho

samiech zho. ¹⁷ Gzoob ne, tib zha ne rnee xnêz Dios no zho, nroob rapchen zho, ranlo zho rcaalsad pe yquuin tib zha ne nacgrê zho, per ib rdeete zho palal pe yquuin zha co. ¿Niacxe na nli rleynie zha co samiech zho ga? ¹⁸ Xin yeena, golgacna sca ganle, led loxaque diidzde, led loxaque laglaadse gnee ne rleynie ne samiech ne; sinque none glo ne nli rleynie ne zho.

¹⁹ Sca nagon none dziuun ne, dzigo niicle new ndionpaa ne nli xnêz Dios no ne, ni scagaa tsod pe nacne pe dzeb tsonie zdoo ne zeene laa ne gbig lo me. ²⁰ Tel zha ne rdzieb zdoo, sac rien zho noyund zho mine rnabey Dios, ib tedsod zlisqui Dios a zho; sac tel me grêsew nan me. ²¹ Xin yeena, laa zha ne desde zdoo zho nan zho noguuitsd zho mine rnabey me, scagaa tibliladzse gbig zho lo me; ²² hor cosi ncuuane gnabtaa zho lo me squiaadiag mew, sacne mban zho zigne rnabey me, ni noxco zho noyund zho ncuuane rdziladz me. ²³ Ni lëe min rii rnabey me: Grêse miech, none dib zdoo zho giladz zho Jesús men ne nac Xpêed me, ni gleynie zho samiech zho zigne psanle me diidz ga. ²⁴ Grê zha ne ron diidz run min co, ga rlu ne nli paa mbannie zho me, ni scagaa me mbannie me zho. Ni ndion ne ganle, ib nli mbannie me ne, sac pxeel me Espiritu Sant nacnie ne.

4

¹ Bets, bzian, zha ne gnê zhiEspiritu Dios nacnie zho, goon ye zho quianee Xtiidz me lo miech; ib gunde to ne lëelêd giladz to xtiidz zho, sinque golwigazh dien pe nli zhiEspiritu Dios nacnie zho. Sac ndal grê zha ne quianzê lo guidzliu, rquidie zho rnee zho Xtiidz Dios noteed zho. ² Parne guien to dien pe nli zhiEspiritu Dios nacnie zho, golwi dien zha rzac zho Jesús: Tel zha ne riladz ne nli zig tib miech goc me biaad me lo guidzliu, ga rlu ne nli zhiEspiritu Dios nacnie zho. ³ Laa tel riladz zho ne nli sca biaad me, nli dzigo zhiEspiritu Dios nacnie zho; sinque lëele espiritu ne rtsidil Jesús ga nacnie zho. Laa to binle ganle ib laa espiritu co guiaad; ni lëele espiritu ntseeb co nacnie grê zha ne squi quianzê lo guidzliu niina.

⁴ Xin yeena, sangue to xnêze Dios ngab to, yquidiedraa zha co to, sac gon mazdraa nroob poder rap men ne nacnie to, lëde espiritu ne nacnie grê zha ne sca zienal grê wseed yozh ne no lo guidzliu. ⁵ Grê zha co, ncuuane rac lo guidzliu rii nonie guic zho; gacxe waa, niapse lëew rnee zho, ni gagaa grêque zha ne rleynie grê ncuuane co, zha co riladz zhiwseed zho. ⁶ Sangue ne xnêz Dios no ne. Ni scagaa zha ne runbey Dios, zha co rquiaadiag mine rnee ne; laa grê zha ne runbeyd me, rquiaadiagd zho. Gase na ranle rlu cho zha nacnie zhiEspiritu Dios, ni

cho zhagaa nacnie espiritu ne ziaadquidie miech.

Rleynie Dios miech

⁷ Bets, bzian, golgotsaa gleynie ne samiech ne, sac gon, tel Dios grêse ne rleynie me ne. Gacxe waa, zha ne rlu nli rleynie zho samiech zho, gase rlu ne nli xpêed Dios nac zho, nli runbey zho me. ⁸ Laa grê zha ne rleynied samiech, runbeyd zho Dios ga gane sca run zho; sac gon ib Dios rneedz guielbiini lo ne gleynie ne samiech ne. ⁹ Gotsaa gwi ne ganle, pa lotaa rleynie me ne: Tibpaa Xpêed me, ni pxeel me me biaadtizh me xtol ne, zeena yгаа ne tib guielmban ndzon ne gdziñd dze lozh. ¹⁰ Led guiabd ne togo glo miech bleynie Dios gane rleynie me zho niina; led scada, sinque ible zdoo me gola rleynie me ne. Ne nligaa gotsaa gwi ne ganle zha pxeel me Xpêed me, goc me zig tib gon ne gozh grêse xtol ne. Ga nagon rlu pa lotaa rleynie Dios ne.

¹¹ Bets, bzian, zigne scataa rleynie Dios ne, scaquegaa ne nagon none gleynie ne samiech ne. ¹² Gard tso tib zha ne gan Dios, per zha ne rleynie samiech, me ga nacnie zho; ni zigse zie dze dib zdoora zho rleynie zho samiech zho.

¹³ Me nac men ne pxeel zhiEspiritu me nacnie no, parne glu nacnie me no, ni scagaa no nacnie no me. ¹⁴ Ni stiba, grop lo no bdzion no biaad Xpêed me biaad silaa me miech lo dol; ni min co nonee no lo miech niina. ¹⁵ Grêse zha ne riladz Xpêed Dios nac Jesús, ni rnee zhow lo miech, ga rlu ne nacnie Dios zho, ni scagaa zha nacnie zho me.

¹⁶ Ndion ne ganle nli rleyniedox Dios ne, sac rienpaa ne rleynie me ne, ni riladz ne zeene rnee me pa lotaa rleynie me ne. Ible niaa me par gleynie me, me rdeed guielbiini lo miech gleynie zho samiech zho, zigne rleynie me zho; gacxe waa, zha ne rleynie samiech, ga rlu nacnie zho Dios, ni scagaa me nacnie me zho. ¹⁷ Zig nac ne, niina ne laa ne nacniele Jesús, zig zie dze laa ne lozh cseed gleynie ne me, ni gleynie ne samiech ne zigne racladz me; ni scagaa tsod pe nacne ctoladz ne, pe nacne gdzieb ne gdziñd dze ne laa me gun xquielwxtis me; sinque haxta gley ne dzian ne me gal dze co. ¹⁸ Nod pe nacne gdzieb ne me, sac gon ndion ne pa lotaa rleynie me ne. Led yedraa niina pe dzeb ne dzio ne, sac grêse dzeb rbiche zeene rien ne rleynie me ne. Zha ne rdzieb, zienie guic zho pe nac grê guielnê ne gan zho, ga rlu zho gard guien zho ne rleynie me zho, ni gardgaa guien zho gleynie zho me.

¹⁹ Gotsaa guien sca ganle, nli laa ne rleynie Dios, laa ne rleynie samiech ne, per glo me blu ganle pa lotaa rleynie me ne. ²⁰ Tel zha ne rnee, rleynie zho Dios, ni rlozh

ga rlëenie zho samiech zho, rquidie zho ga. Sac gon, tel nand zho gleynie zho samiech zho, zha ne ranlopaa zho, çpe lel Dios dzigo gliladz ne nli rleynie zho, ni nac me men ne rand zho? ²¹ Sac gon, znu nac xtiidz Jesús: Zha ne rleynie Dios, zigne rleynie zho me, scaque none gleynie zho samiech zho. Ni min rii rnabey me dziuun ne.

5

Zac csaan ne ncuaañe runctal xtoł ne

¹⁻² Grëse zha ne dib zdoo riladz ne ible lëe Men ne zëëble diidz cxeel Dios lo guidzliu ga nac Jesús, grëse zha co xpëed Dios nac zho.

Grëse zha co, par guien ne dien pe nli rleynie ne zho, none guien ne dien pe nli rleynie ne Dios, dien pe nli run ne mine rnabey me. Nac cuent rii, zig nac tib yu miech, zha ne rleynie pxoz mëed, scaque-gaa rleynie zho mëed. ³ Sac zeene rleynie ne Dios, zun ne grëse mine rnabey me. Ni grë mine rnabey Dios, nacda ncuaañe guiab ne grielod guñ ne; ⁴ sac grëse zha ne nacle xpëed Dios, totsaque rnalo zho ne Jesús guñ xyudar zho, gac-wetraade zho lo grë ncuaañe guñctal xtoł zho. ⁵ Golgacnañ sca: zha ne dib zdoo riladz Xpëed Dios nac Jesús, zrieelo zho csaan zho grëtaa ncuaañe runctal xtoł zho.

⁶ Tel ne, ndion ne ni riladz ne ganle nli Xpëed Dios nac Jesús, sac zeene biaad me horne norobnis me, horne nolozh me, ga blu ganle cho nac me. Ni ye Espiritu Sant nolu ganle ne scaw, ni mine rnee me diidzliw.

⁷⁻⁸ Gotsaa gwi sca ganle, tson mod rlu cho nac Jesús: Tiba por mine nolu Espiritu Sant, stiba por mine blu zeene norobnis me, ni stiba por mine blu zeene nolozh me. Zig-taa mine nolu Espiritu Santa, zigtaa zeene brobnis mew, zigtagaa zeene nolozh mew, blu ganle Xpëed Dios nac me. ⁹ Mine rnee Dios, none gliladz new. Xtiidz samiech ne name riladz ne, çpe lel mine rnee Dios dzigo gliladz ne? ¹⁰ Zha ne gliladz mine rnee Dios, rrieequia rzoob zho me ga zig tib zha ne rquidie; sangue zha ne gliladz mine rnee me, zien zho ganle nli Xpëed me nac Jesús. ¹¹ Laa me bneele ganle: zha ne gnalo Xpëed me, zgaa zho tib guielmban ndzon ne gdzind dze lozh; sac Xpëedse me rdeed guielmban co. ¹² Gacxe waa, zha ne rnalo Xpëed me, laa zho bgaale guielmban ndzon co; sangue zha ne rnalod Xpëed me, gard yгаа zhow.

Bgaale to guielmban ne gdzind dze lozh

¹³ To ne nac to zha ne rnalole Xpëed Dios, laa naa rzet min rii lo to zeena gacnan to ganle laa to bgaale guielmban ne gdzindraa dze lozh ga. ¹⁴ Ni scagaa, ndionpaa ne rquiaadiag Dios xtiidz ne, zeene ncuaañe rio zdoo me rnab ne lo me; ¹⁵ ni zigne ndion

ne rquiaadiag me xtiidz ne, scaquegaa none gliladz ne ib zneed me ncuaañe rnab ne.

¹⁶ Zig nac zeene gan to cho tib zha ne nacgrë to been pe tib dol, ni rlu nacda dol ne gnitlo zho, zac gnab to lo Dios guñ me zho perdon; ni gacnan to ganle, ible zun me zho perdon. Sac gon no dol ne rnitlo, ni zha ne guñ dol co, nodne gnab to lo Dios guñ me zho perdon. ¹⁷ Nli grëse guielntseeb dol naca, per no mine rnitlod miech. ¹⁸ Ni ndion ne ganle, zha ne nacle xpëed Dios rundraa zho ne lega guñctal zho xtoł zho; sac Jesús men ne nac Xpëed Dios, men co quianap zho, grielodraa lega pe gun mendox zho.

¹⁹ Zig nac ne, ndionpaa ne xnëz Dios no ne. Nli ndalraa zha ne zienal ncuaañe rnabey mendox, ²⁰ sangue ne, laa Xpëed Dios biaad bdixbiini me xquielrien ne bdziuunbey ne men ne nacpaa Dios. Niinasi laa ne ngable lo men ne nacpaa Dios ga, ni lëe me ga nac Jesús. Me nac Dios nguiamban, ni me nac men ne rdeed guielmban ndzon ne gdzind dze lozh.

²¹ Xin yeena, golguien Diosse nac men ne gleynie to; gunde to ne lel grë ncuaañe no lo guidzliu rii gleynie to, laa ne gleynie to Dios.

Juan

BROP GUITTS NE PQUIAA JUAN

¡Diuzh to grêse to!

¹ Laa tib zhagol rii rxeel tib guits rii ziaad lo to i, ne nac to zha ne no xnêz Jesús. Dios bzooblo to, bredz me to ne laa to ngab xnêz me.

Ne nlipaa rleynie naa to gon, ni led naad-seгаа, sinque ye grêraa zha ne runbey diidzli ne nac Xtiidz Dios. ² Rleynie no to sacne tibaque nac diidzli ne rliladz ne, ni tsod dze ne csaan new.

³ Dios ni Jesús men ne nac Xpêéd me, me glu ganle pa lotaa noxco me to, zeena peet tsienied guic to, ni yquia zdoo me to; ni zunpaa mew, sac rleyniedox me to.

⁴ Ne nlipaa gon bleydoo naa zeene gon naa nzian zha ne nocaania Xtiidz Dios i, noxco zho mban zho zigne nacpaa diidzli; zigne rnabey Dios men ne nac Pxoz ne.

⁵ Bets, bzian, laa naa rnab lo to, golgotsaa gleynie ne samiech ne. Guiabd ne togo ncub mine rne naa lo to nu gun to; sac gon, lëëquew ga bdzion ne zeene psilo bliladz ne Xtiidz Dios. ⁶ Telne nli rleynie ne Dios, dzigo none gban ne zigne rnabey me; gacxe waa, none niowse gban ne, ine gleynie ne samiech ne, sac gon min co rnabey me.

⁷ Ndal zha ne quianzê lo guidzliu niina, noquidie zho miech, rnee zho nlid goc Jesús zig tib miech zeene biaad me lo guidzliu. Nsin golso lo zho, sac gon notsidil zho mine nac diidzli ga, rlêënie zho Jesús ga sca run zho. ⁸ Golguien, ib gdeete to diidz guiaadquidie zho to, zeena dziin ne quiayun to i gacda zhlêse. Goltsoxco tiblîque golgac, zeena yгаа to grêtaa guielnzaac ne no gneedz Dios lo to. ⁹ Sac gon, zha ne csaan mine nacpaa zhiwseed Jesús, led xnêzdraa Dios ga no zho; ni scagaa, zha ne zienalpaaw zigne naca, zha cosi xnêz Dios ga, xnêz Xpêéd me Jesús ga no zho. ¹⁰ Gacxe waa, zha ne guiaad lo to i ni tel ziaadnied zho wseed ne nacpaa Xtiidz Jesús, ycaaniade to zho. Ib gdeete to lidz to cuêz zho, ib tsode to gnee to pe diidz ne csannziuu to zho; ¹¹ sac telne sca gun to, rriequia yele to rleynie grê zhiwseed yozh zho ga.

¹² Ndal grê ncuaaane no gne naa lo to, per racladzd naa gzetaaw lo guits rii. Laa guic naa no guialgan naa to i, dzigo mazd hor co naazhal gnew lo to; zeena nroob guielbley ne dzio ne grê ne.

¹³ Grê zha rii, zha ne bzooblo Dios bredz me zigne bredzaque me to bzêeb to xnêz me, laa zho rxeel bdiuzh lo to grêse to.

Juan

BION GUTS NE PQUIAA JUAN

¡Diuzh bets!

¹ Laa zha gol rii, pquiaa tib guits rii ziaad lo luu i gon Gay, ne nac luu tib zha ne nziuu lo naa.

² Bets, rnab naa lo Dios zigne squi wen mban luu nêz lo me, scaque zaacse grieequia grêtaa ncuuañe gun luu, ni gneedz me guie!ndaan lo luu. ³ Ne nlipaa bley naa, zeene baaad bla zha bets ne nu, bzodiidz zho lo naa squitaa ndzinli mban luu, tibaque noxco luu zienal luu miñe nac diidzli. ⁴ Ne nligaa, nodraa pe stib conley zdoonaa zigne rleytaa naa zeene ron naa iñe niowse mban grê zha ne biane naa xtiidz Dios lo, zienal zho miñe nac diidzli.

⁵ Bets, ziyon naa squitaa tibaque noxco luu run luu xyudar grê zha ne nacgrê ne, ni mazdraa zeene nac zho zha ne ziaad stib guiedz. ¡Wen ga! ⁶ Squi ndxie grêraa zha ne riladz Jesús, rzodiidz zho squitaa nquialadz luu zho. Bzhiguiel sca, bioxco tibaque squi beñ xyudar zho zeena grieeo gdziñ zho zaatne no tsie zho. Sca rdziladz Dios. ⁷ Sac gon, niapse porne rleynie zho Dios, laa zho brie ziegun zho xtsiin Jesús, ni ib rziguiel zho ycaania zho ncuuañe rdeed grê miech ne riladz Xtiidz Dios. ⁸ Miñ co nagon, ib none ne yquiambiaazlo zho, ne none gdeed ncuuañe yquiuñ zho, zeena dziuuñ ne xyudar zho ygaaz Xtiidz Dios.

⁹ Pxelle naa tib guits lo grêse zha ne no xnêz Dios i, per zig nac Diótrefes gon, men ne racladz so gnabey lo to i, rond me miñe rnee no. ¹⁰ Gacxe na, telne laa naa guial i, dzigo laa naa glisqui lo me dieñ pe nacne quianeene me no.

Ni tebaa miñcose, na haxta run me ib rbêzlod me grê zha bets, zha bzian ne rlanso i; niicle rdeetegaa me diidz cho gdeed zaatne cuêz zho. Zha ne run d miñe racladz me, rbee me zho lad grê zha ne nacgrê zho.

¹¹ Bets, sangue luu gon ib tsienald luu miñe run grê zha ne sca run guie!ntseeb, sinque bioxco güeynal ncuuañe ndzinli. Sac gon, zha ne run niapse ncuuañe ndzinli, xnêz Dios no zho; laa grê zha ne run ncuuañe ntseeb, gard sêeb zho xnêz Dios.

¹² Zig nac Demetr, grêse miech rnee ganle zaacse mban Demetr. Ni rlugaa nliw, sac gon tibaque zienal me miñe nac diidzli. Niicle nogaaw, miñcoque rnee no, ni nan luu ganle led yed no rquidie.

¹³ Ndalraa ncuuañe no gne naa lo luu, per racladz naa gzodiidz naaw lo luu lo guits rii; ¹⁴ sac laa guic naa no guialgan niob naa luu i, dzigo hor co ziodiidz ne grop ne.

¹⁵ Guiaañie Dios luu sca; peet tsienied guic luu. Grêse xamigw luu zha ne runbey luu nu, laa zho rxee! bdiuzh lo luu. Scagaa bzhiguiel bdeed tib zhibdiuzh naa lo tib tib zha ne nac xamigw ne nêz qui.

Juan

GUTS NE PQUIAA JUDAS

¹ Naa nac Judas, bets Santiagw; xtsiin Jesús quiayun naa.

Laa naa rxel guts rii lo to, grèse to ne nac to zha ne bredz Dios bzëëb xnëz me. Ne nligaa nqualadz me to, ni haxta quiapan Jesús to.

² Dios glu ganle pa lotaa rquia zdoo me to, pa lotaa rleynie me to, ni pa lotaa noxco me to zeena peet tsienied guic to.

³ Bets, bzian, mine gocladz naa nzet naa nu ganle zha nactaa mine been Dios psilaa me ne lo xtol ne; per na rgobey naa nonguelraaw cso naa diidz lo to, ib gandzede to grë zha ne rtsidil mine riladz ne. Dios bneedz diidz gocndion new, ne nac ne zha ne brieel lo dol bziaab ne xnëz me. ⁴ Sac gon, blalaa zha ne rquiaalo riladz Dios, ngeets zhliian laa zho bzëëb lad to i. Miech yozha, niapse lo dol no zho, rnee zho zac gun ne ncuuaane guiaabtaa guic ne, sac nqualadz Dios ne; ib riladz zho Jesús, Men ro, Men nroob ne rnabey ne. Padzeelale goquiet, ne grèse miech ne sca nac, lëëque lo xtol zho nitlo zho.

⁵ Golsoladz ganle zha bzhaac grë zha ne gocntseeb lo Dios padzeela. Niicle ne nanle tow, per laaw gzet naa lo to nu, zeena csoladz tow: Zeene psilaa Dios grèse menladz ne lo guielne ne noded zho Egipt ga, zha ne brieequia ib bnëd niunbey me, ib gonzed me zho, bnitlo me zho. ⁶ Scaque grë anjl ne biche lo me, psaan zho dziin ne pso me zho; bdziguind me zho, laa me nsioogyu zho tib lo guielcoddoo, ga quidoo zho haxta gdzin dze ne laa me gun guielwxtis.

⁷ Rsoladz to ganle zha goc guiedz Sodom, guiedz Gomorr; ni grëraa guiedz las ne bre gax ga. Grë miech ne bio grë guiedz co, laa zho güeynal mine nacdraa guieltsiel, tel chotaa pquiangob zho, bionie zho haxta grë mrazh; grèse zho, lo gui ga bnitlo zho. Ga rlu ganle, grèse zha ne csaand xquielntseeb, no tib lo guidoo ne gdzind dze guiuu, ni ga nitlo zho. ⁸ Ni zha ne gon blanso lo to i, scadaa run zho; sac tel zha, niapse guielzyoh zienal zho, laa zho nosanbeed xcuerp zho, ib rond zho mine rnee zha ne rnabey, haxta rdzibdee zho grë men non ne no gbaa. ⁹ Per ni anjl Miguel, anjl rnabey ne bdilnie mendox zeene güeyla me xcuerp Moisés, ib beennd me ndziibdee me mendox; lëë gdib rëb me: "iDios nac men ne gunquizh luu mine run luu i!" ¹⁰ Laa grë zha qui, haxta grë ncuuaane run Dios, ncuuaane ni rioguidc zho zha nac, laa zho rdzibdeew; masaque mban zho zigne mban grë ma, laa zho run ncuuaane rdeedtaa guxt xcuerp zho; lëëque zha nonitlo zho ga.

¹¹ iProbsaxe zho! Sac gon, nëz ne zey Cain ga zienal zho. Lo guielblë dimi, laa zho brieel xnëz Dios zigne brieel Balam; ni zigne gut Coré zeene gocntseeb me lo Moisés, scaque nitlo zho.

¹² Zeene riaad zho lo guielwagw ne run to, loxaque rzhidznie zho, loxaque runnguzee zho, rzob zho rlozhd gowcho zho, zieniedraa guic zho dien choraal no gow; ni lalnu guielto guient lo zho. Nëzrii nëzrec quianzë zho, masaque nac zho zig nac xcov ne ziaadnied nisguie, loxaque nëzrii nëzrec rienie mew; zig nac tib yag bgool ne guient nex lo, len dze ne no yquia nex low. Laa zho bnitole ga, masaque nac zho zig tib yag bidz ne bliaadzle dib lo; sac tel yag bidza, gdzindraa dze ne yguiaaw. ¹³ Zigne nëzrii nëzrec rchoon nisdoos grë mtsiin beed ne ndziib low, scadaa nëzrii nëzrec nolu grë ncuuaane mbeeguie lo ne quiayun zho. Laa zho ziele nëz lo guielcoddoo ne rieguial zho, zaatne gdzindraa dze grieel zho; zig tib mel gbaa ne bnitnëzle, laa ma nonziaabse lo guielcow.

¹⁴ Lëële zha qui ga bzeet Enoc (men ne brieequia lo dii ne rac xoop xti Adán), zeene psiaab Dios guic me, rëb me: "Golwi ganle laa Dios ziaad, pe zhidaa grë anjl ne ziaadnie me, ¹⁵ ziaadgun me guielwxtis. Grèse miech ntseeb, laa me gunquizh zho grëtaa dol ne been zho, grëtaa diidz dox ne brieel ro zho bneenë zho me." ¹⁶ Ni nligaa sca nac grë zha qui, ib nod ncuuaane tso zho conform, tibaque wlisqui no zho; laa zho zienal grëtaa guielzyoh, ncuuaane racladztaa xcuerp zho. Rto zho guieldzin, rlozhd dieen pa rac zho, rio zho pe diidz wen ne rnee zho lo miech, loxaque ne dien zha yquidie zho miech, gun zho mine racladz zho.

Laa naa rso diidz lo to

¹⁷ Sangue to bets, bzian, golsoladz mine bnëe grë zha ne pxeel Jesús bnëe Xtiidz me, zeene biadseed zho to; ¹⁸ led zun rnee zho: "Zeene zhile gdzin dze ne laa guidzliu rii nitlo, zrieequia grë miech ntseeb ne gzhidznie zhiwseed Jesús, laa zho gban zigne nactaa grë zhgag yozh ne guiaib guic zho." ¹⁹ Ni nligaa ran to niima ganle sca quiayaca, lëë grë zha co i squi nogodil grë zha ne no xnëz Jesús. Nacnied zho Espiritu Sant, gaane niapse grë ncuuaane dol ne racladz xcuerp zho, min co run zho.

²⁰ Bets, bzian, golguien sca tibaque dziits golso lo Xtiidz Dios mine riladz to. Golzodiidznie Dios, zigne csiaab Espiritu Sant zdoo to. ²¹ Sozite to lo Dios, golguien ganle zha rleynietaa me to; golquiambëz dzian ne gal dze ne ygaa ne guielmban ne gdzind dze lozh, mine ndionpaa ne gneedz Jesús men ne rnabey ne, porne rquia zdoo me ne.

²² Teḷ cho zha ne racchop guic lo Xti-idz Dios, goḷnee lo zho biire sodziits zho stib. ²³ Zha ne bii no lo doḷ, goḷnee lo zho guieḅ zho csaan zhow; goḷcuee zho lo gui ne noxtseeb zho yгаа zho ga; scagaa grëraa miech, goḷquia zdoo zho, per ib cxende to lo zho. Ni lalnu gdziguiende to grë doḷ ne ruḅ zho, goḷsaca zig rzac to tib ncuaaḅe rbixnë zdoo to raḅ to.

²⁴⁻²⁵ Tibaque Dios no, me psilaa ne lo doḷ, ni megaa csilaa grëraa miech. Meḅ nroob nac me, ni zrieelo gacnieḅ me to guiabde to ladznia doḷ stib; zeena ine mbe to, ine rley to laa me gdzinnie to zaatne nac lo guieḷndzondoo ne no me. Niina ne laa ne rdziuḅḅeyle Jesús, zrieelo dzioḷnie ne me, mese nac meḅ nroob, meḅ ndzon, meḅ ne rap guieḷrnabey. Tibaque nac me, niicle mazd glow, niicle niinaw, ni gdziḅd dze ne gdzëë me.

Judas

MIÑE BDEED DIOS DIIDZ GON JUAN

¹ Nu raquiet grè ncuuañe ziaadyoble gac. Dios bnabey Jesús glu mew lo grè zha ne no xnèz me. Nacne pxeel Jesús tib xanj me biaad biaadluw lo ngundziin win ne nac naa nu, parne sca gacnañ zhow. ² Grèse miñe gon naa, grèse miñe bin naa ga, laaw gne naa zigne gonse naaw, zigne binse naaw. ¡Diidzliw! ³ Dichos grè zha ne glab lo guits rii, ni dichos grè zha ne yquiaadiag grè miñe zhoobnee low nu, ycaania zhow ni giladz zhow; sac gon xtiidz Diosa, ni laa dze ne gac grè miñe rzeeta nu, ziaadgaxle.

⁴ Naa nac Juan, laa naa rquia guits rii rxel naa ziaad lo to i, ne nac to zha ne ngab xnèz Jesús, zigne nose to gza gadz guiedz ne ndxie nèz Asia i.

Dios men ne no padzeela, men ne no niina, men ne nacle diidz guiaad, me gacnieñ to lo grè zhizhgab to, me cchoobladz zdo to peet tsienied guic to; me ni Espiritu ne zo lo me zaatne nac lo xcan ndzon ne zob me; Espiritu ne rlu zha nac gadz guielbiini ne rap me; ⁵ ni Jesús men ne rnee niapse diidzli, men ne glopaa brieeban lo guielgut, men ne rnabey lo grèse zha non ne rnabey lo guidzliu.

¡Gotsaa dziuunnon ne Jesús! Sac gon pa lotaa rleynie me ne, bleeladz me me bzhiiee xchen me psanmbe me ne lo grètaa xtol ne, ⁶ tibaque been me ne, psannon me ne; bzooblo me ne gac ne pxoz ne gon dziin lo Dios men ne nac Pxoz me. ¡Mese nac men ne rap guielndzon, mese rap grètaa guielrnabey! ¡Tsod cho stib zig me, ni gdziind dze ne nitlo xquielrnabey me! Sac nac me.

⁷ ¡Bii zanaque to ganle zeene laa Jesús ziadzèeb lo xcow! Grèse miech zan zho me, zig nac zha ne sca bdiñ me, zha ne sca bliz lanz cue me, zanlo zho me; dibdoo guidzliu, hor co mbanse gac miech, haxta zoon zho, haxta zdzieb zho. Ible sca none gaca.

⁸ Znu rnee Dios, men nroob ne rap grèse guielrnabey: “Grèse ncuuañe notaa, naa psilow ni naa csiaala; naa nac zigne nac letr “a” ni letr “z” lo grèse letr, “a” rsilow, “z” riala, zigne nac naa niina sca goc naa padzeela, ni scaque gac naa zeene laa naa gual stib.”

Gon Juan Jesús

⁹ Naa nac bets to Juan, tibaque nac ne niina grè ne, sac ye naa no xnèz Jesús; ye naa nodeed grè guielnè ne noded to. Zigne rneedz me paciens lo to lèb to lo grètaa guielnè ne no gan to, scaque racnieñ me naa; ni ye naa gdziñ lo me, zaatne no gdziñ to.

Sodiidz naa lo to ganle zha bzhaac naa. Lèètaaque no naa lo guidzliu win ne lè Patmos, ga ngoguiu zho naa loxaque ne noseed naa miech Xtiidz Dios, miñe biaadlu Jesús zeene biaad me lo guidzliu. ¹⁰ Tib dze, lèètaaque nacnie Espiritu Sant naa nozodidznie naa Dios, tibaque zeene nguiedz zèeb tib tsi men co, pale tsi tib trompet; ¹¹ nè me lo naa:

—Grètaa ncuuañe ran luu nu niina, pquiaaw tib lo guits pxeela lo grèse zha ne ngab lo naa, grè zha ne no gza gadz guiedz rii nèz Asia: Efés, Smirn, Pérgamo, Tiatir, Sardis, Filadelf, ni Laodicé.

¹² Ptsire lo naa ni naa gwi naa dien cho ga sca rnee lo naa. Zeene bui naa, gon naa gadz candeler niaa niapse guieb or. ¹³ Glowtaa lo gza candeler co zo tib mgui zigne rlu miech lo guidzliu rii, nacw me tib lar nool rdziña haxta yan ni me, ni ndxie tib cinch niaa niapse guieb or ngali ro zdo me. ¹⁴ Ine bie rna guitsguic me, zootle zhiil nguits, zootgaa luu guies, masaque riaazbel bziaalo me. ¹⁵ Ni mew, masaque rquiabniw zigne rquiabni guieb brons zeene rlozh riaanmbew, zeene rrieenèzgaaw lo gui; tsi mew, masaque rio bi rnee me zig rio bi grè guiubee nroob ne zhoob naal nis. ¹⁶ Nia me miñe nèz derech, nzhen me gadz mel gbaa; ni zob tib spad ro me, zigtaa nèz zhits spad cow zigtaa nèz low, gropsè nèza ndox. Masaque biinidoo ne rriee lo me, zigne rlu lo ngbidz zeene lega recye lo ngbidz.

¹⁷ Zeene gon naa me, mbe biazab naa zhan ni me zig tib zha ne gutle. Dzigto blis me nia derech me pxobnia me guic naa, nè me lo naa:

—¡Gdzieebd luu! Naa psilo ni naa csiaal, naa psan grètaa ncuuañe no, ni naa gnitlow; ¹⁸ ni mban naa. Nli gut naa per briebaanaa, mban naa niina, ni gdziindraa dze ne guet naa; ladzni naa no guielgut. ¡Gdzieebd luu sca! ¹⁹ Grèse ncuuañe noyan luu nu niina, pquiaaw lo guies grèsew, niicle miñe noyaclew, miñe naragaa gaca. ²⁰ Znu gon nac miñe blozh gon luu ga: gadz mel gbaa ne gon luu nzheen naa ga con nia derech naa, tib tib mel co nac tib tib zha ne quianap yadoo ne no gza guiedz co; laa gza gadz candeler co, nac tib tib yadoo co.

2

Diidz ne bnee Jesús lo zha Efés

¹ Blozh ga nè me lo naa:

—Miñe gni naa lo luu nu niina, pquiaaw pxeela Efés, lo zha ne quianap grè zha ne ngab xnèz naa ga, gudz lo zho: “Znu nac xtiidz men ne nzhen gza gadz mel gbaa co, men ne zodeed vult lo gza gadz candeler ne niaa niapse guieb or ga, rnee me:

² 'Nan naa zha mban to, nan naa pa lotaa noxco to run to xtsin naa, ni nacde to zha ne lega znuse guiaan zdo; stiba, ib randzede to grē zha ntseeb. Grē zha ne ziyaad i rnee zho Dios pxeel zho ziadnee zho xtiidz me, per pquia to been to zho prueb, haxta gocnan to rquidie zho. ³ Nan naa zha nactaa guielnē ne noded to loxaque ne riladz to naa; per niicle scaw tibaque dziits zo to, ib riaand zdo to.

⁴ 'Loxaque naca no tib ncuaañe glisqui naa lo to: ¡rleyniedraa to naa niina, zigne rleynietaa to naa glo, zeene glopaa biladz to xtizd naa! ⁵ Golšoladz pa lo pxin to. Golbiire golgac stib zigne nac to glo zeene psilo biladz to xtizd naa; sac gon, telne gac-wende to, ible zial naa i zialtichee naa xcandeler to zaatne zow.

⁶ 'Nli rleyniedraa to naa scataa, per rley naa ran naa ib rdzigiende to grē ncuaañe ndzinlid ne run zha Nicolaít, sac tel naa, ni lalnu ib rdzigiendi naa ncuaañe run zho.

⁷ 'Zha ne rioguicle godiidz rii, yquiaadiag zho ganle zha rnee Espiritu Sant lo grē zha ne no xnēz naa, rnee me: Grēse zha ne gdeete diidz gac-wet zho lo ncuaañe gunctal xtol zho, zha co ygaa gow xnex yag ne rdeed guielmban ga, miñe zob len huert ndzon ne rap Dios ga."

Diidz ne bnee Jesús lo zha Smirn

⁸ Blozh ga nē me lo naa:

—Pquiaa miñe gni naa lo luu nu, pxeela Smirn, lo zha ne quianap grē zha ne ngab xnēz naa ga, gudz lo zho: "Znu nac xtiidz men ne psilo grētaa ncuaañe no, men ne csaala, men ne gut ga ni brieaban me, rnee me:

⁹ 'Ran naa zha nactaa grē guielnē ne noded to. Ran naa mban rac to guiend grē ncuaañe yquiin to (nligaa peet rapde to lo guidzliu, per guielnzaac ne bgaa to i ngab to lo Dios, nroob nona). Ran naa, grē zha ne rnee i xpēed Dios zho sac zhasi zha Israel nac zho, no zho rneenē zho to; per nlid gon xpēed Dios nac zho, sac zhiwseed mendox zienal zho.

¹⁰ 'Nroob grē guielnē ne ziaadyob gan to, per gdziebde to. Squil mendox miech, gnab zho tso to ladzguiib; ga nagon glu to dien pe nli dib zdo to riladz to naa. Nli nzianlaa to guiab ladzguiib, per tib tsiise ngbidz sca yquiaanał zho to. Laga mban to lo guidzliu sca, ible csaande to zhiwseed naa, zeena ycaania to guielmban ndzon ne gnedz naa lo to.

¹¹ 'Zha ne rioguicle godiidz rii, yquiaadiag zho ganle zha rnee Espiritu Sant lo zha ne no xnēz naa, rnee me: Zha ne tiblrique tsoxco gun miñe rnabey Dios, led yedraa zha co tsoxtseeb guey gabıl."

Diidz ne bnee Jesús lo zha Pérgamo

¹² Blozh ga, nēque me lo naa:

—Miñe gni naa lo luu nu, pquiaaw pxeela Pérgamo, lo zha ne quianap grē zha ne ngab xnēz naa ga, gudz lo zho: "Znu nac xtiidz men ne nzobro tib spad lots ne ndox gropse nēz, rnee me:

¹³ 'Nanpaa naa masaque mendox rnabey lad guiedz ne no to i, per ran naa tiblrique dib zdo to rnalto to naa, niicle gon to zha psacsi zho Antip, beet zho me i, men ne scataa bioxco bnee xtizd naa lo miech.

¹⁴ 'Per no chop ncuaañe gon glisqui naa lo to: Lēda i run to randze to grē zha ne squi run zigne been Balam, men ne pquiił Balac bloo Balac guic grē zha Israel beenctal zho xtol zho, dow zho xpēel grē ma ne biogon lo mdio, ni pquiangob zho zha ne led tsiield zho. ¹⁵ Lēē tiba ga, laa stiba, randze to zha ne bii zienal zhiwseed yozh zha nicolait; tel naa, ni lalnu rdzigiendi naa wseed co.

¹⁶ 'Laa naa rso diidz lo to: golnab perdon, ni golnee lo grē zha co csaan zho grē ncuaañe ndzinlid ne run zho; sac gon, telne gond zho diidz, ible zial naa zialtilnie naa zho con spad ne zob ro naa nu.

¹⁷ 'Zha ne rioguicle godiidz rii, yquiaadiag zho ganle zha rnee Espiritu Sant lo grē zha ne no xnēz naa, rnee me: Zha ne gdeete diidz lo grē ncuaañe gunctal xtol zho, zded naa guielwagw ne rap naa gbaa yquiin zho; ni zded naa tibga quie nquits lo zho, lo quie co quia lē cub zho, ni zhase gacnan zha nac lē co zho."

Diidz ne bnee Jesús lo zha Tiatir

¹⁸ Blozh miñ co, nē me:

—Ye lo zha ne quianap zha ne no xnēz naa guiedz Tiatir, pxeel diidz rii, gudz lo zho: "Znu nac xtiidz Xpēed Dios, men ne masaque riaazbel bziaalo, men ne masaque rquiabni ni zigne rquiabni guiib brons ne tibaque riar; rnee me:

¹⁹ 'Nan naa grēse zha mban to; ran naa pa lotaa rleynie to naa, dib zdo to riladz to cho nac naa, noxco to quiaayn to xtsin naa, tiblrique rac to dziits zo to lo xtizd naa; ran naa noxcoraa to quiaayn to xtsin naa niina.

²⁰ 'Per no tib ncuaañe no glisqui naa lo to: lēda i gon run to randze to wnaa ne lē Jezabel i, rnee me Dios rsiab guic me grē ncuaañe rnee me, per nliida; sac gon, loxaque noquidie me grē zha ne no xnēz naa, noquiił me zho rquiangob zho grē zha ne led tsiield zho, ni row zho xpēel grē ma ne riogon lo mdio. ²¹ Blactaale pquiambēz naa nab me perdon, ntsēē me lo xquielmban me; per nēd me csaan me grē guielyožh ne run me i.

²² 'Gacnan to sca ganle, laa naa gnabey glan me tib guielguidzdox, tsichedraa me lo caxtigw co; scaque grēse zha ne zienal zhiwseed me, nroob guielnē ne gnabey naa

ted zho, tel laa zho csaand grē guielyozh co. ²³ Ni haxta zut naa zho, zeena sca gan grēse miech ne no xnēz naa ganle, naasi nan naa pe rza guic miech, pe rza zdoo zho; gacxe waa, tel pe ncuaaŋe ruŋ zho, zdedse naa miŋe rieguial zho tib tib zho.

²⁴ 'Sanguē to grē to zha ne zienald guielyozh ne rlu wnaa qui (wseed ne rnee zho i rdeed nroob guielbiini, per nanđ zho gon zhiwseed mendoxa), peet glisquidraa naa lo to. ²⁵ Per none gon tiblrique golgac, zeena ine dib zdoo to rnalō to naa gal dze ne laa naa guial stib. ²⁶⁻²⁸ Sac gon, grēse zha ne gdeete diidz lo grē ncuaaŋe guŋctal xtol zho, sinque tibaque tsoxco zho gban zho zigne rnabey naa, haxta gdziŋ dze ne nitlo guidzlu, zded naa tib mel gbaa lo zho, mel ne rlan rał sil, ni so naa zho gnabey zho grē guiedz. Naa gded guielrnabey co lo zho, zigne bneedz Pxoz naaw lo naa; ni lalnu yquiad zdoo zho, grēse miech ntseeb, zuŋquizh zho zho grētaa guielntseeb ne been zho.

²⁹ 'iGrēse zha ne rioguicle godiidz rii, yquiaadiag zho ganle zha rnee Espiritu Sant lo grē zha ne no xnēz naa!"

3

Diidz ne bnee Jesús lo zha Sardis

¹ Blozh ga, nē me:

—Miŋe gni naa lo luu nu, pquiaaw pxeela guiedz Sardis, lo zha ne quianap grē zha ne ngab xnēz naa, gudz lo zho: "Znu nac xtiidz meŋ ne nzheŋ gadz mel gbaa, meŋ ne nacie zhiEspiritu Dios, Espiritu ne rdeed gadz guielbiini, rnee me:

'Nan naa gon pe nac grē ncuaaŋe ruŋ to, niicle zēēb diidz mban to, per par naa miech gutle nac to. ² iGolcuee zhimcaalo to sca! Golšodziits lo spalalse xtiidz naa miŋe rso-ladz to, sac gon zhile laa to lozh guiaanladza. Ne nligaa, ran naa quiaayunde to xtsiŋ Dios zig none gaca. ³ Golšoladz ganle zha nac grē wseed ne gocnan to, grē wseed ne bin to; dzigo goltsienala, ni golnab lo Dios guŋ me to perdon. Sac gon, telne tsienalde tow, zeene laa naa guial, lega nacle zeene gan to laa naa zole lo to; zig rzac zha ne rzēēb ngbaan lidz.

⁴ 'Sca nac to, per lo to i gon lo bla zha ne bii mbe zdoo, sac zienald zho grē ncuaaŋe ruŋ to; rrieequia rdeete zho diidz guiacbeed xab nquits zho ga. Ni zha co nagon rieguial sēnal zhits naa, sac gop zho xab zho cuidad.

⁵ 'Golgona ganle, grēse zha ne gdeete diidz lo grē ncuaaŋe guŋctal xtol zho, scaania zho tib lar nquitsbie gacw zho; lē zhow, lēē quialew lo guits ne quia lē grē zha ne ygaa tib guielmban ndzon ga; haxta zanie naa zho lo Pxoz naa ni lo grē xanjł me, guiep naa: Lēē zha rii gon no xnēz naa.

⁶ 'Zha ne rioguicle grē godiidz rii, yquiaadiag zho ganle zha rnee Espiritu Sant lo grē zha ne ngab xnēz naa."

Diidz ne bnee Jesús lo zha Filadelf

⁷ Blozh ga nē me:

—Miŋe gni naa niina, pquiaaw pxeela guiedz Filadelf, lo zha ne quianap grē zha ne ngab xnēz naa, gudz lo zho: "Meŋ mbe ne rapd ni tib dol, meŋ ne rnee niapse diidzli, meŋ ne rnabey zigne bnabey rey David; zaatne rxal me, tsod zha ne grielo csiooga; zaatne csiooggaa mew, tsod zha ne grielo cxala; znu nac xtiidz me, rnee me lo to:

⁸ 'Nan naa grēse zha mban to; niicle ne squi bii nsis rac to, per rioxco to ron to xtidz naa, ni rqueetsde to ne nli rililadz to naa. Gacxe waa, rrieequia laa naa rxal tib puert ted to, ni choot grieelod csioog puert co. ⁹ Bii zan to ganle, zeene laa naa cxel gza zha ne ngab lo mendox i, guiaad zho guiadquitsgzhil zho lo to, zha ne noquidie i rnee zho xnēz naa no zho. Ga gan zho ganle nli rleynie naa to. ¹⁰ Ne squi tiblrique rac to ron to xtidz naa, peet guēnyied guic to niicle pquianał miech to, ible squianaap naa to, gande to guielnēdox ne gan grē miech ne ndxie lo guidzliu.

¹¹ 'Golsoladza ganle, merle guial naa. Golguien csaande to xtidz naa miŋe nanle to, zeena tsod stib zha ne ctiche miŋe rieguial to gnedz naa lo to. ¹² Grēse zha ne gdeete diidz lo grē ncuaaŋe guŋctal xtol zho, so naa zho gac zho zig grē pilar nroob ne zo len xyadoo ro Dios, ni gdziŋdraa dze ne griee zho ga; cho pilar co, ga yquia naa lē Dios, ga yquia naa tib lē cub naa. Laa zho ngable guiedz ne rnabey Dios ga; lēē guiedz co nac Jerusalén cub ne gnabey me guiet gbaa.

¹³ 'Zha ne rioguicle godiidz rii, yquiaadiag zho ganle zha rnee Espiritu Sant lo grē zha ne no xnēz naa."

Diidz ne bnee Jesús lo zha Laodicé

¹⁴ Ni nē me:

—Miŋe gni naa niina, pquiaaw pxeela guiedz Laodicé, lo zha ne quianap grē zha ne ngab xnēz naa ga, gudz lo zho: "Meŋ ne rnee niapse diidzli, meŋ ne ruŋ grēse miŋe rnabey Dios, meŋ ne bzo Dios psan grēse ncuaaŋe no, znu nac xtiidz me, rnee me lo to:

¹⁵ 'Nan naa grēse zha mban to. Ran naa noxcode to grē miŋe rnabey naa to, ni niicle rsaandgaa tow; nac to zig nac tib ncuaaŋe loxaque ndzēēyopse, niicle niagda ni niicle nlēēdgaaw. iTebaa nac to zig tib nis yag, zig tib nis lēēgaa! ¹⁶ Per na gon ne squi nac to zig tib nis ndzēēyopse, ni lalnu rdziguiend naa ncuaaŋe ruŋ to. iZhile gon laa to guŋctsi b naa!

¹⁷ 'Rnee to grēse ncuaaŋe rquini to laaw quianiele to, ible peet liaadz racdraa lo to,

ɨni rienɔe to ɨon ni lalnu peet nonde to! To nac miech ne mazdraa mban, peet rapde to, ni lar ne ctse lad to guiend, rrieequia haxta ni lo to roldraa. ¹⁸ Laa naa rso diidz lo to: Teɨne racladz to nɨlpaa gapchen to, ɨoltɔ lo naa, naa cto guuib or ne mazdraa wen lo to; xab tow, naa cto lar ne mazdraa nquits gacw to, zeena ctoladzniedraa to to ne squi guiend pe ctse lad to; haxta nis rmed ne tso bziaalo to, naa gnedza, zeena gbiire gan to stib.

¹⁹ Grɔe zha ne rleynie naa, rɨliski naa grɔe ncuane nonguield ne run zho, rteed naa zho tib caxtigw parne cseed zho ndzinli gban zho; gacxe waa ɨolgac ndzinli stib, ɨoltsoxco miɨe rnabey naa. ²⁰ Laa naa quiambɔz to ɨon gbiire gbig to lo naa. Rrieequia ro lidz to zo naa, quiabedz naa to. Zha ne yquiabladz cxal ro lidz sɔeb naa, zdeed naa, ni haxta sobnie naa zho diowtsee no grop no. ²¹ Grɔe zha ne gdeete diidz lo grɔe ncuane gunctal xtɔl zho, zded naa diidz sob zho cue naa, zaatne sob naa gnabey naa; zigne zoob naa cue Pxoz naa niina nonabey no; sac teɨ naa, bdeete naa diidz niun naa miɨe rnabey mɔndox.

²² "Zha ne rioguicle godiidz rii, yquiaadiag zho ganle zha rnee Espiritu Sant lo grɔe zha ne no xnɔz naa."

4

Roɨnie zho Dios gbaa

¹ Zeene bui naa stib, ɨon naa laa tib puert quia zhan gbaa, nzhialse puert co. Horco biire bin naa tsi meɨ ne bnee lo naa ga glo, meɨ ne nac tsi ga zig tsi tib trompet, nɔ me: —Biep, dɔ nu ganle, zeena glu naa lo luu zha nac grɔe ncuane ziaadyob gac.

² Zigne sca nɔ me, hor co blu Espiritu Sant lo naa, ɨon naa laa tib xcan zo gbaa, tib xcan ne rzob meɨ ne rnabeya. Lo xcan co, ga zob tib meɨ co, ³ masaque rbeɨni me zigne rbeɨni quie ne rnee zho jasp, quie ne rneegaa zho cornalin. Igose xcan co quia tib guitye, rbeɨniw zigne rbeɨni quie ne rnee zho smerald; ⁴ ni zo zgalptap xcan igow, tibga mɔngol zob tib tib lo xcan co, dib nquitsbiese rna xab me, ni zob tibga coron or guic me. ⁵⁻⁶ Masaque riab belye, ratsie rnee nguzi, ni zɔeb tsi miech zaatne zo xcan ne riaan glowtaa ga. Zaatne nac delant lo xcan co, masaque rluw zig rlu lo nisdoo ni rbeɨla zig rbeɨl quie zed; ni noquia gadz biini nroob ga, lɔe gadz biini co nac gadz guieɨbiini ne rap Dios.

Igo xcan co, ga zo tap bult mban, tibgaw zo tib nɔz; nɔz low, nɔz zhitsaquew zob bziaalow. ⁷ Tiba rlu zig rlu meedz, stiba rlu zig rlu tib ngon yeen; laa schop miɨe riaan ga, tiba rac lo zig rac lo miech, laa stiba rlu zig rlu tib msi nroob ne quiasibe. ⁸ Tib tiba zob xoopga xiɨla, ndziib bziaalow zhits

xiɨla, leɨ xiɨla ne; tibaque nguiedz zɔeb tsiw, rneeɨ:

ɨMeɨ ndzondoo nac Dios!

ɨMeɨ rnabey nac me, nroob poder ne rap me!

Notaque me, me ga no padzeela, me no niina, ni lɔeque me ga no guiaad.

⁹ Gza tap bult mban co, roɨniew meɨ ne zob lo xcan co, (meɨ ne gdziɨd dze guet) rsaɨnona me, ni rdeeda xquizh lo me. Zigse sca run gza bult co, ¹⁰ scasaque gza galptap mɔngol ne zob ga, rquitsgzhib me lo meɨ ne zob lo xcan ro co, gzase me, rgob me xcoron me rguic mew nɔz lo meɨ ne zob lo xcan co, ni rnee me:

¹¹ Luu nac xDios no, luu nac meɨ ne rnabey no.

Luuse nac meɨ ne rieguiaɨ dziuunnon no, ni gnee no grɔe diidz ndzon lo luu.

Nroob poder ne rap luu, sac grɔeta ncuane no, luu bzaaw;

laaw biaa sac ible sca gocladz luu, ni laaw niaagaa niina, sac ible sca racladz luu.

5

Tib guits ne nzhidoo gadz lɔe cint

¹ Zeene bui naa stib, ɨonpaa naa meɨ ne zob lo xcan ro co, nose tib guits nroob nia derech me. Gropse nɔz guits co quia, ndibɔdsew, nzhidooɨgad gadz lɔe cint. ² Ni ɨon naa tib anɨl, tib meɨ macis rlu me, nguiedz zɔeb tsi me, bnabdiidz me rɔb me:

—ɔCho rieguiaɨ cchug cint ne nzhidoo guits qui, cxal zho low?

³ Ni tib choot pxald lo guits co, niicle gbaaw niicle lo guidzliuw, niicle zhan guidzliugaaw, brieequiad tib zha ne nchug cint co, nwi zho lo guits co.

⁴ Mban goc naa, psilo naa nguiedz roon naa, ɨon naa sca brieequiad tib zha ne rieguiaɨ nɨal lo guits co, nlab zho low. ⁵ Dzigo bnee tib mɔngol ne zo gax lo xcan co, nɔ me lo naa:

—Goond luu. Lɔz ganle, meɨ ne brieequia lo xtiɨ Judá, lo xtiɨ rey David, me cchug gza gadz cint ne nzhidoo guits qui, me cxal low. ɨble me rieguiaɨ, sac ɨon psiaablo me grɔe zha ne rɔe lɔe me; rrieequia nac me zig tib meedz.

⁶ Horco bui naa zaatne nac lo xcan ro co, ɨon naa glowtaa lo gza bult mban co ni lo gza mɔngol co, ga zo tib Carner yeen. Rɨupaa zha psacsi zho ma, zeene beet zho ma. Zob gadz zhoz ma, ni zob gadz bziaalo ma, rrieequia gza gadz bziaalo ma ga, miɨ co nac gadz guieɨbiini ne rdeed zhiEspiritu Dios.

⁷ Dzigo wbig meɨ ne nac Carner yeen co, bnaaz me guits ne no nia derech meɨ ne zob lo xcan ro co. ⁸ Zigne bnaaz me guits co, laa gza bult mban co, ni gza galptap mɔngol

co pquitsgzhìb lo me. Tib tib meᅅgol co nzhense me tib arp ni tib ptsigui or, rso tib gox ndzon len ptsigui co (rrieequia gox co nac grè diidz ndzon ne rnee grè zha ne no xnèz Dios zeene rzodiidznie zho me).

⁹Dzigo psilo gza meᅅgol co biᅅl me tib cant cub. Znu rnee lo cant co:

ible luu rieguiaᅅl ycaania guits qui, luu rieguiaᅅl chug gza cint ne nzhidoow i!

Sac luu bded grètaa guieᅅnè co psacsi zho luu, haxta bzhiee xchen luu;

sca psilaa luu grèlose dii miech, teᅅ pa guiedztaa nac zho, teᅅ pa diidztaa rnee zho, teᅅ pa naciontaa ngab zho.

¹⁰Laa luu bzhii no grè no gac no tib guiedz cub,

guiedz ne gnabey Dios; no gac pxoz ne guᅅ dziin lo me, masaque tipse gban no zeene gnabey me lo guidzliu.

¹¹Zeene bui naa, goᅅ naa anᅅl guizhiu ne ndxie zaatne zo xcan ro co, led zha ne grieelod glab new. ¹²Nguiedz zèeb tsi zho grè zho gza bult mban co, ni grè meᅅgol co, rnee zho:

ᅅMeᅅ naᅅ nac meᅅ ne nac Carner yeen ne squi rlu beet zho!

Me rieguiaᅅl gnabey, meᅅ ro nac me, choot grieelod csiaablo me.

Ladznia me no grèse guieᅅnzaac, me rap grètaa guieᅅrien,

Meᅅ ndzon nac me, me none dziuᅅnnon ne, me none dziooᅅnie ne.

¹³Horco grèse miech, grèse ma, grèse ncuanea bzaa Dios, zigtaa gbaaw, zigtagaa lo guidzliuw; zigtaa zhan guidzliuw, zigtagaa lo nisdoow; nguiedz zèeb tsi zho, rnee zho:

ᅅNliw, meᅅ ne zob lo xcan ro qui, ni meᅅ ne nac Carner yeen qui,

ible rieguiaᅅl dziuᅅnnon ne grop me!

ᅅMe rnabey, lo me none gnee ne grètaa diidz ndzon;

nadzew, gzhew, ni grèragaa izdoo ne ziaadraaw!

¹⁴Pquiaᅅb gza tap bult co, rèb zho: —ᅅScaw, sca no gaca!

Dzigo gzase meᅅgol co, laa zho pquitsgzhìb lo meᅅ ne zob lo xcan ro co; psilo zho rnee zho grè diidz ndzon lo me.

6

Gza gadz sell co

¹Blozh ga, goᅅpaa naa zeene laa meᅅ ne nac Carner yeen co pchug primer cint ne nzhidoow guits co. Horco laa tib bult mban co bnee; masaque nac tsiw zig rio bi rnee nguzi, nèw lo naa:

—ᅅDè ganᅅle gwi luu!

²Dzigo wbig naa, goᅅ naa tib guay nquits. Zhits guay co zob tib meᅅ co nzhen me tib yag arcw ne rquiaa zho flech; blozhse pcaania me tib coron ne rzob guic zha rnabey, dzigo laa me brie. Ine zob nze me lad guay co, laa me zie ziegun me gan lo grè zha ne rlèè lo me.

³Blozh ga, laa meᅅ ne nac Carner yeen co pchug stib cint ne nzhidoow guits co. Dzigo bredz stib bult co naa.

⁴Dzigo bia naa, goᅅ naa laa stib guay nizhnie brie, zob tib meᅅ co lad ma. Blozhse pcaania me tib spad nroob, ni pcaa me didzbey tselodil me miech lo guidzliu, zeena gutlsa zho; laa me brie ga, laa me zie.

⁵Zeene laa meᅅ ne nac Carner yeen co pchug bioᅅ cint ne nzhidoow guits co, dzigo bredz stib bult co naa, nèw lo naa:

—ᅅDè ganᅅle gwi luu!

Dzigo goᅅ naa tib guay ngas, scasaque zob stib meᅅ co lad ma, nzhen me tib zhiguiib.

⁶Ni groᅅtaa zaatne zo gza bult mban co, zèeb tsi tib meᅅ co, rnee me:

—Tib kiltaa zhobxtil goᅅ ycaa zha ne guᅅ dziin tib dze; teᅅ zhobgaaw, tsoᅅtaa kila ycaa zho; saᅅque nceit ni vin ib ygaald luu.

⁷Laa zeene goc cint co tap ziechug meᅅ ne nac Carner yeen co, dzigo laa stib bult mban co bredz naa.

⁸Horco, zeene bui naa, goᅅ naa tib guay nguets; lad guay co zob tib zha co lè Guieᅅgut; zhiits co naᅅ stib zho lè Gabil. Lo tap lal ne nlè miech ne ndxie lo guidzliu, pcaa grop zha co diidzbey tsiegut zho tib lal grè miech co; zha ne guet lo dil, zha ne guet lo gbin, zha ne guet lo guieᅅguidz, zha ne guetгаа lo grè ma ntseeb.

⁹Dzigo pchug meᅅ ne nac Carner yeen co stib cint co, goca gaay. Horco, zaatne nac zhan mezh ne nac mezh lo pcoog, ga goᅅ naa grèse zha ne psacsi miech, beet miech zho loxaque ne bnee zho Xtiidz Dios, ni dib zdoo zho biladz zhow. ¹⁰Nguiedz zèeb tsi zho rnee zho:

—Luu ne nac luu meᅅ nroob ne rnabey, luu ne nac luu meᅅ ne rnee niapse diidzli, ᅅpa hor dzigo cuedz luu grè miech ne ndxie lo guidzliu, zha ne scataa psacsi no? ᅅPa hor gunquizh luu zho grètaa miᅅne been zho ga?

¹¹Dzigo bdeed me lar nquits got zho; rèb me lo zho no cuèz zho zniip, sac grèraa zha ne nacgrè zho ngab zho lo Jesús, no spalal zha ne naraa csacsi miech zigne psacsi miech zho; haxta gza zho dzigo laa me guᅅ guieᅅlwxtis.

¹²Blozhse ga, laa Carner yeen co pchug stib cint co, goca xoop; hor co laa tib zhodox bni. Goᅅpaa naa zeene laa lo ngbidz pcow, zig nac zeen tib lar ngas pquia lo ngbidz; laa mèè zig rludaa ren, sca nizhnie rlu lo mèè; ¹³grè mel ne ndziib gbaa, masaque bliaaᅅ laa lo guidzliu zig rliaaᅅ grè guigw

yeen zeene rriee medox. ¹⁴ Znuse bdbibed gbaa, goca zigne racse grē guits ne rdibēd; grē gui, grē guidzliu win ne no lo nisdoo, nēzrii nēzrec bīaana. ¹⁵ Dzigo grēse zha ne nac zha rnabey lo guidzliu, grē zha ne nac zha non, grē zha ne rapchen, grē zha nroob ne rnabey lo menguib, grē zha nroob ne non xtiidz, ni grēragaa miech, niicle grē zha ne run xtsiin beṇa, niicle grēgaa zha ne run xtsiin zhala, grēse zho biolan, zha ne biolan len grē bliee, zha ne biolangaa len grēraa quie ne no dan; ¹⁶ nguiedz roptsie zho rnee zho lo grē gui co, lo grē quie co:

—¡Golīaal lad no, goḷcolan no, zeena gandraa men ne zob lo xcan ro co no! ¡Goḷcolan no, zeena dzaian no grētaa guielnē ne cxeel men ne nac Carner yeen co! ¹⁷ ¡Sac nasi laa dze ro co bdziṇ! ¡Laa guielnēdox co nagon ziaadle! ¡Ncuuaṇe lēēbd no low!

7

Zha ne pcuee lo grēse zha Israel

¹ Bded ga, goṇ naa tap anj. Lo gza tap lad guidzliu, tibga anj co zo tib lad nocuēēz me me. Wdzeepaaw, per ni tib zhiblag yag rmidraa, niicle lo nisdoo dzese biaca; sac ni palal rriedraa me lo guidzliu.

² Tibaque zeene briecequia stib anj nēz ne rlan ngbidz, neyse me xsell Dios; nguiedz bnee me lo gza tap anj co (anj ne pcaa diidzbey ga guṇ guielqui lo guidzliu ni lo nisdoo) rēb me:

³ —¡Goḷcuēz zniip! Guṇde to guielqui lo guidzliu niina, niicle lo nisdoo, niiclegaa grē yaga; sac naraa lozh guioquia no xsell xDios ne quia grē zha ne run xtsiin me.

⁴⁻⁸ Zeene blozh pquia sell co quia grē miech co, bin naa lo grē zha ne ziaad lo xtii zha Israel, rgaa zho tib gayoo chooptap mil:

Tsiipchop mil zha xtii Judá,
tsiipchop mil zha xtii Rubén,
tsiipchop mil zha xtii Gad,
tsiipchop mil zha xtii Aser,
tsiipchop mil zha xtii Neftalí,
tsiipchop mil zha xtii Manasés,
tsiipchop mil zha xtii Simeón,
tsiipchop mil zha xtii Leví,
tsiipchop mil zha xtii Isacar,
tsiipchop mil zha xtii José,
tsiipchop mil zha xtii Benjamín.

⁹ Zeene bui naa zaatne zo xcan ro co, zaatne zo men ne nac Carner yeen co, miech guizhiu ne goṇ naa ndxie ga; grē lose dii miech ne ndxie dib lo guidzliuw. Ne nligaa miech guizhiuw, led miech ne lēbd ne glab new; grēse zho niapse lar nquits nacw zho, ni no tiblēga zin nguia nia zho; ¹⁰ nguiedz zēēb tsi zho, rnee zho:

Dios, men ne rdziunbey ne, men ne zob lo xcan ro qui,
me nac men ne psilaa ne lo grētaa xtol ne;

me ni men ne nac Carner yeen qui.

¹¹ Horco grēse anj ne ndxie igo xcan ro co, igo zaatne zob grē mengol co, ni zo gza tap bult mban co; grēse zho laa zho pquitsgzhib nēz lo xcan co, haxta bzooblo zho lo liu, rdeed zho xquizh lo Dios ¹² rnee zho:

¡Scaw! Luu none dzioolnie no,
none tibaque gneedz no xquizh lo luu,
luu rieguial dziuunnon no; sac luu nac xDios no.

Luu nac nac men ne rienraa, men ne rap poder;

gacxe waa luu none ycaania grēse diidz ndzon,

gzataa dze, niicle nadzew, gzheew, ni grēragaa izdoo ne ziaada. ¡Sca none gaca!

¹³ Dzigo bnabdiidz tib mengol co, nē me lo naa:

—¿Pe nan luu sca cho nac grē zha ne nacw lar nquits qui? ¿Pe nan luu pa nēz ziaad zho?

¹⁴ Dzigo rap naa lo me:

—Nand naaw. Bzhiguieḷ bnēw lo naa.

Nēchaa me:

—Lēē grē zha qui goṇ bded grētaa guielnēdox ne goc lo guidzliu. Laa zho nacw lar nquits qui, sac wbig zho lo Jesús psanmbe xchen me zho lo dol. ¹⁵ Gacxe waa squitaa ndzon ndxie zho gax lo zhixcan ro Dios, dze guieel quiayoone zho me len xyadoo ro me. Me nac men ne quianap zho grēse zho; ¹⁶ led yedraa niina guet gbin zho, guet nisgaa zho; led yedraa niina ctsuu ngbidz zho, sonēēggaa zho. ¹⁷ Men ne nac Carner yeen ne zo delant lo xcan ro qui, me gdeed ncuuaṇe gow zho, ni zigne rienie baxtor xpēcwiiil zho ro guiuu, sca zienie me zho zaatne quida nis ne rdeed guielmban. Led yedraa niina goon zho.

8

¹ Laa zeene laa men ne nac Carner yeen co pchug stib cint ne nzhidoo guits co, cint ne naca gadz ga, dzese biac gbaa; xtselaa sca biac dze gbaa.

² Blozh ga, goṇ naa zeene pcaania gadz anj ne rzo lo Dios, tibga trompet. ³ Ni briecequia stib anj nzhen tib ptsigui niaa niapse guib or. Zigne bdziṇ me, bzo me delant lo xcan ro co, zaatne zo mezh or ne nac lo pcoog; ga pcaania me nroob yaal parne ctsieel mew grē diidz ne rnee grē miech ne no xnēz Dios zeene rzodiidznie zho Dios.

⁴ Dzigo bzēēg anj co yaal co, tipse goc gox co grēw xtiidz grē zha ne no xnēz Dios, laaw bdziṇ lo Dios. ⁵ Blozh ga, ptop me grē gui ne ndziib lo pcoog co bloo mew len ptsigui ne nzhen me ga, blaal mew lo guidzliu; dzigo psilo masaque rnee nguzi, rio bi, riab belye ne, ni bni tib zhodox.

Pcuedz gadz anj trompet

⁶ Horco laa gza gadz anjl ne pcaania gza gadz trompet co, laa zho nsinle nzheṇa, parne ycuedz zhow.

⁷ Zeene laa tib anjl co pcuedz zhitrompet zho, hor co psilo bliaal guieque lo guidzliu ni bliaal guilēē notsa ren. Gzoob ne telne glē guidzliu tsoṇ lal, dzigo masaque tib lala bnitlo, bnitlo grēse yag, grēse lo guizh nguia ne no low.

⁸ Blozh ga, zeene laa stib anjl co pcuedz xquuib, hor co biab tib ncuaan co nisdoo, masaque rluw zig rlu tib gui nroob ne quiaayzel. Gzoob ne tel glē nisdoo tsoṇ lal, bnitlo tib lala, biallow niapse ren zeene laa ncuaan co biab low. ⁹ Bnitlo grēse ma, grēse guizh ne no lo tib lalga nis co, haxta grē barcw ne no low bnitlo.

¹⁰ Loxaque blozh goc min co, laa stib anjl co pcuedzgaue xquuib zho, hor co laa tib mel nroob bringaa gbaa, masaque rso ma bel zig razbel tib lē guier, biab ma lo guidzliu. Lo grē guuabee, lo grē zhlian ne no lo guidzliu, lo tsoṇ lal ne gzoob ne naca, pxin ma tib lala. ¹¹ Grēse nis co goc nlayag, ndal miech ne gut low. Nacne bleelē zho mel co Nlayag.

¹² Zeene laa stib anjl co pcuedz xquuib goc zho tap, hor co zigtaa lo ngbidza, zigtagaa lo mēēw, biuu tib niaza, schop niazaquew biaan rziini; grē mel ne ndziib gbaa, gzoob ne lo tsoṇ lal ne nac ma, hor co biuu tib lal ma. Rlupaa lega net net rquiaa ngbidz; zaatne nacgaa guieel, ni palal peet rlud.

¹³ Laa naa nowi, tibaque zeene goṇ naa laa tib anjl bded grolṭaa zhan gbaa, haxta rlupaa rio bi zie me lo me, nguiedz zēēb tsi me rnee me:

—jProbsaxe grē miech ne ndxie lo guidzliu! Sac ncuaane ntseebraa gac, zeene laa stsoṇ anjl qui ycuedz xquuib me.

9

¹⁻² Zeene laa anjl ne nac zho gaay ga pcuedz xquuib, hor co goṇ naa laa anjl ne brieē gbaa padzeela ga pcaania tib liow, pxal zho ro tib guierdoo ro. Zeene laa ro guieer co bzhal, per nli goxdoo ne brieē ga, tib psioogsew zhan gbaa, per ni palal rludraa lo ngbidz. ³ Lo gox co, ga brieē tiblo metso bliaal, bioogse ma gdipse lo guidzliu, grēse ma zob xcots ma, zig zob xcots meegu. ⁴ Nacle diidz, peet gund ma grē guizh nguia, grē yag ne zēēb lo guidzliu, sinque laa ma tsie tsiesacsi ma grēse miech ne quiad xbey Dios quia. ⁵ Yoobdox ne yquia zaatne yquiaaxcots ma, zigne rquia yoob zaatne rquiaaxcots meegu; per gute ma zho, loxaque sca csacsi ma zho dipse len gaay mēē. ⁶ Len dze co, haxta zhal miech yguib zho dien zha guet zho, per grieelod guet zho; soobladznē zho, tebaa zha gdzin guielgut lo zho, per lel sozita.

⁷ Masaque rac grē metso co zig rac grē guay ne tsienie zho lo dil. Rac lo ma zig rac lo miech, ni zob tib ncuaan co guic ma, rluw zig rlu tib coron or; ⁸ zēēb guitsguic ma zig zēēb guitsguic men wnaa, ni zēēb lay ma zig zēēb lay grē meedz. ⁹ Dipse lad ma ntse tib ncuaan co, rluw zig rlu guuib; rio bi rzedz lo xiil ma, pale bi ne rio zeene rded tib dzoon carret ne rgob guay, zie lo dil.

¹⁰ Lēēdaa meegu, sca zob xcots grē metso co lo xcol ma, mine yquiaaxcots ma miech dipse len gaay mēē co. ¹¹ Lēē grē metso co pxeeṇ anjl dox ne rnabey guierdoo co, anjl ne rnee zha Israel Abadón, laa xtiidz zha Gres rnee zho ma Apolión. (Nac diidz co, zig rnee ne xtiitsē ne: Zha ne rnitlo.)

¹² Lēē tib guielnē ne gaṇ miech ga, per bii ziaad schopa.

¹³ Goṇ naa zeene laa anjl ne nac zho xoop ga pcuedz xquuib, hor co bin naa zēēb tsi tib men co lo mezh or ne nac lo pcoog ne zo lo Dios ga. ¹⁴ Zēēb tsi men co rnee me lo anjl ne blozh pcuedz xquuib ga:

—Güey, güeyxadz gza tap anjl dox ne quidoo ro guuabee nroob ne nac guuabee Eufrates.

¹⁵ Ible bzole gza tap anjl dox co par gun ma guielqui zeene laa dze co, laa hor co gdzin; dzigo nac ne hor co laa ma blaa, parne tsiegt ma miech. Gzoob ne telne gac miech ne ndxie lo guidzliu tsoṇ tant, masaque tib tant zho gnitlo ma. ¹⁶ Bin naa chop gayoo millon zhaguiib ne gacnie ma, niapse guay sob grē zhaguiib co; masaque ma gnabey lo zho.

¹⁷ Gonpaa naa zha rlu grē zhaguiib co zob zho lad grē guay co. Grēse zho quiantse tib lē guuib gdipse zdoo zho; masaque tsoṇ color rbeew, rbeew color nizhnie, color nguia gbaa, ni color guts. Laa grē guay co, niaa guic ma zig niaa guic meedz, masaque rrieē bel, rrieē gox, rrieē zufr ro ma; ¹⁸ lo gza ncuaan ne sca rrieē ro ma, min co beet lalga miech co.

¹⁹ Lala rap grē guay co xquielntseeb ma ga nēz ro ma, ni rapaque maw nēz lo xcol ma; masaque nac xcol ma zig nac grē meel dox, rias xcol ma rquiaa maw lad miech.

²⁰ Niicle scataa nzian miech ne gut, zha ne biaan ib bdziebd zho. Tibaque laa zho no ziegaṇ zho mendox, ziegaṇ zho grē zhimdio zho, mdio ne niaa guuib or, mdio ne niaa guuib plat, mdio ne niaa guuib brons, mdio ne niaa quie, mdio ne niaagaa yag; ncuaane randa, ncuaane randa, ncuaane rzēda, per laa zho no tibaque ziegaṇ zhow. ²¹ Laa zho no quiauyt zho samiech zho, quianab zho pe sac samiech zho, quiangob zho zha ne led tsieeld zho, tibaque quiabān zho, jni palal zienied guic zho csaan zho grē guielntseeb co gbig zho lo Dios!

10

Anjl ne nzheñ tib libr win

¹ Blozh ga, goñ naa biet tib anjl gbaa, rilupaa tib anjl nona, masaque no me tib lo xcow, ni quia tib guitye glaa guic me. Biinidoo ne rriee lo me, lëëdaa lo ngbidz; scasaque ni me, masaque riaazbela. ² Nzheñ me tib libr win, nzhialse lo libr co.

Bdziñ me lo guidzliu, bzo me ni derech me lo nisdoo, laa min revés bzo me lo guidzliu. ³ Ga zo me pquiiaa me tib redz nroob, lëëdaa zeene rgobeedz tib meedz; loxaque blozh pquiiaa me redz co, zeene laa gadz nguzi bnee, pquiab lo redz ne pquiiaa me ga.

⁴ Laa naa zale yquia naa miñe bnee gza nguzi co, tibaque bin naa tsi tib men co gbaa, nê me lo naa:

—iCoo, yquiaad luu miñe bnee gza nguzi qui! Sac nodne gacnañ miecha.

⁵ Dzigo goñ naa blis anjl co nia derech me nêz gbaa, ⁶ bzeet me Dios (men ne gdziñd dze guet, men ne bzaa gbaa, bzaa guidzliu, bzaa nisdoo, ni grêtaa ncuane no low), rêb me:

—Dios zobwi ganle, nasi goñ laa dze co bdziñ. ⁷ Grêse miñe bnee me lo zha ne biadteed xtiidz me, laaw gac niina zeene laa stib anjl qui ycuedz xquiib zho. Grêse miñe no guic me guñ me ni gocnañd miecha, niina laa zho gaña.

⁸ Dzigo wbiire bnee men ne zëëb tsi gbaa ga, nê me lo naa:

—Güey, bnaaz libr win ne nzheñ anjl ne squi zo i.

⁹ Nacne bia naa lo anjl co, rep naa lo me gneedz me libr win co, dzigo nêchaa me lo naa:

—Ledaaw nu, per lëëraasi none gow luuw. Zeene laa luu noyowa, nex sac luuw; per zeene gdziña zdoo luu, laaw gacna.

¹⁰ Dzigo bnaz naa libr win co nia me, dow naaw. Nligaa nex rdioowa now ro naa, per zeene laaw bdziñ zdoo naa, beennêw. ¹¹ Blozh ga, nêchaa men ne bin naa tsi glo ga:

—Naraa goñ none gnee luu ganle zha nac ncuane ted grêraa miech, zigtaa zha ne no guiedz wina, zha ne no guiedz nrooba, zha ne rnabeygaaw.

11

¹ Dzigo biaad tib men co bneedz me tib yag ne rbix lo naa, rgaaw zig tib metr, bnabey me naa ctix naa xyadoo Dios, ctix naa zaatne nac lo pcoog, ni glab naa dien palal miech ne rie yadoo co riegan zho Dios. Pso me diidz lo naa, nê me:

² —Lëëraasi ctiixd luu nêz ley, sac laa lugar co nole ladznia zha zit; zha gnabeya, zha gnabey guiedz ndzon ne nacheñ Dios i; dipse len tson iz groñ ne ziaad nu, guñ zhow zigne gacladzttaa zho. ³ Gane len dze riique

laa naa cxel chop zha ne runbeyppaa cho nac naa, tib lar beelze gacw zho, zig racwxab zha ne no guielñê; dipse len tson iz groñ co gnee zho ganle pe nac grê ncuane ziaadyob gan miech.

⁴ Lëë zha co nac grop zhan yag oliv ni grop biini ne raquietle lo Xtiidz Dios ga zo lo Dios (men ne nac bizhuan guidzliu). ⁵ Zeene laa grop zha co bdziñ, choot brieelod lega nsaci zho, sac grêse zha ne wbig gocntseeb lo zho, tib biecese zha co lo bel ne brieer zho. ⁶ Bdeed Dios poder lo zho ycuëez zho nisguie, zrieelo gnabey zho guiabda dipse len dze ne nonee zho lo miech ga, haxta zrieelo gnabey zho tsaalo nis gaca ren; ni horne gacladzttaa zho, zrieelo ndalraa grê guielzi ne gnabey zho gan miech.

⁷ Zeene bzase dze ne bnee zho lo miech ga, hor co laa tib madzabdoo brieer len guierdoo co; ntseeb rac ma lo zho. Mbe blëbd zho lo ma, beet ma zho. ⁸⁻⁹ Tson ngbidz groñ goot xcuerp zho groñ len guiedz ro co, guiedz ntseeb co. Pale Sodom, pale Egipt, sac goñ guiedz coque, ga pquiiaa miech men ne rnabey zho lo cruz. Ib bdeete miech diidz ngeets zho, grêse miech ne no dib lo guidzliu goñ sca nix zho ga; ¹⁰ dipse lo guidzliu, masaque tib guielbeydoo ne bio miech gza dze co, goñ zho laa grop zha co gut, sac nroob benneed zho miech. Lo guielbey co, haxta bioxco miech pe ncuane bgadlsa zho lo samiech zho.

¹¹ Zeene blozh tson ngbidz groñ co, tibaque zeene laa zhiEspiritu Dios bdeed guielmban lo grop zha co stib, laa zho guche ga; grêse miech ne ndxie lo guidzliu, zeene goñ zhow, per nli bdzieb zho, rdzieldraa zho zha guñ zho. ¹² Horco nguiedz zëëb tib tsi men co gbaa, bredz me grop zha co. Gonlo grê miech ne rlëë ran zho ga, masaque no zho tib lo xcow, laa zho bzoquia gbaa; ¹³ loxaque laa zho bzoquia gbaa, zeene laa tib zhodox bni. Gzoob ne telne nlê guiedz ro co tsiñ tant, tib tanta bnitlo lo zho co; gut gadz mil miech. Grêraa zha ne biaan, mazdraa bdzieb zho, lo dzeb co laa zho psilo roolnie zho Dios.

¹⁴ Sca gan miech stib guielñê co. Lëë bropa ga, per znusaque guiaad stiba. ¹⁵ Sac loxaque blozh ga, zeene goñ naa laa stib anjl ne nac zho gadz ga, pcuedzlaque xquiib; hor co nzian tsi men co zëëb gbaa, nguiedz rnee me:

Nasi nagon,

laa Dios gnabey grêse guiedz ne ndxie lo guidzliu, grop me Men ne pxeel me ga.

Mele gnabeya, grêtaa len izdoo ne ziaad.

¹⁶ Psiloque gza galptap mengol ne zob lo xcan ne zo lo Dios ga, pquiitsgzhib zho lo me, haxta bzooblo zho lo liu, rdeed zho xquizh lo me, ¹⁷ rnee zho:

Xquizh xquie|nzaac luu,
sac nasi laa luu glu men nroob nac luu, laa
luu csilo gnabey.

Luutaque nac men ne mazdraa nroob.

¹⁸ Grëse guiedz, brieequia zha ne gocntseeb
lo luu;

per nasi laa dze bdziñ, laa luu glugaa
xquie|blëë luu lo zho.

Grëse zha ne gutle,

niina laa luu gdeed miñe rieguia| zho tib tib
zho.

Grë zha ne been xtsiñ luu, pteed zho xtiidz
luu lo miech,

grë zha ne ngab lo luu, zha ne runnon lë luu,
zigtaa zha gola, zigtagaa zha wina, niina laa
luu gdeed zhipremio zho;

zha ne na loxaquegaa guie|ntseeb been,
niinataa laa luu gnitlo zho.

¹⁹ Loxaque blozh sca bnee gza mengol
co, zeene laa yadoo ne no Dios gbaa bzhial,
nieenpaa guin ne notsow quie lag ne pquia
diidz ne psan me lo miech. Horco psilo
bliaa| tib guiequiedox, loxaque nëzrii
nëzrec riab belye, ni rio bi ratsie nguzi;
guiequiedox co noliala, zeene laa tib zhodox
bnique.

12

¹ Horco gon naa blu tib ncuaañe gzee
zdoo ne zhan gbaa. Ga brieequia tib wnaa,
masaque igose me riab tib biini, zig riab
xbiini ngbidz, ni zob tib coron guic me, quia
tsiipchop mel cho coron co; ngali ni me zob
mëë. ² Rlupaa zoney me mëëd, rquiaadan
me redz, laa me rquiale yoob ne gap me
xpëëd me.

³ Tibaque brieequia tib ma ngol, dipse ma
rna nizhnie, niaa ma zigne niaa ngutsiets;
zob gadz guic ma, ni tsii zhoz ma, tibga
coron zob tib tib guic ma. ⁴ Znuse bzieecw
ma xcol ma, blaal| ma palal mel gbaa lo guid-
zliu; gzoob ne nlë mel tson tant, masaque
tib tant mel co blaal| ma. Wbig ma lo wnaa
co, quiambëz ma gal xpëëd me, parne gow
ma win.

⁵ Per zigne gol mëëd co, znuse bdziñ
win nëz lo Dios, zaatne zob me rnabey
me; tib mëëdbguiw, nacle diidz tib men
ndip xtiidz gac win, win gac men ne
gnabey grëse guiedz ne ndxie lo guidzliu.

⁶ Horcogazhaquew bzhoon wnaa co ga, laa
me zie tib dan zit, zaatne psan|e Dios diidz
gan zho me dipse len tson iz grol.

⁷ Nacne bio tib dij gbaa. Psilo an|l Miguel,
grë me grëraa an|l ne nacie me, bdil|nie
me ma ngol co grë ma xan|l dox ma; ⁸ per
blëëd ma, benxoon zho ma gbaa. ⁹ Lëë
ma ngol co ga nac meel dox ne notaque
padzeela, lëë mendox ga, lëë Satanás ga, ma
ne scataa tibaque noquidie miech; hor co
laa zho bzonëz ma nëz lo guidzliu, grë xan|l
dox ma.

¹⁰ Dzigo bin naa, nguiedz zëëb tib tsi men
co gbaa, rnee me:

|Lëëw nagon!

|Nasi laa dze ne ycaaniapaa Dios zha ne
ngab lo me, laa dze co bdziñ!

Nasi laa me blu poder ne rap me,
nasi laa Men ne pxeel me lo guidzliu ga
gnabey lo grëse zha ne ngab lo me.

|Laa me benxoon|e mendox!

Ma ne scataa dze guieel nolisqui dien pe run
zho,

nac zho zha ne nacgrë ne.

¹¹ Peet brieelod ma niun ma zho,

sac niapse men ne nac Carner yeen ne gut
lo cruz ga bnaloo zho;

ni lalnu ib bdziebd zho, bnee zho lo miech
cho nac me,

bleeladz zho xquie|mban zho, no zho haxta
beet miech zho.

¹² |Gacxe waa tib guie|bley nroob ne rac gbaa
niina!

|Grëse to ne nac to zha ne no gbaa, goll|ey!

|Per probsaxe grë zha ne no lo guidzliu, sac
laa mendox co tsiesacsi zho!

Ntseeb rac ma laa ma zie nëz co,

rien ma riaandraa nroob dze ne sonlaa ma.

¹³ Zeene gon ma sca bzonëz zho ma lo
guidzliu, dzigo ptsidil ma wnaa ne gop
mëëdbgui co. ¹⁴ Nacne bzoob zho chop xiil
me, lëëdaa xiil msidoo; par grieelo xoon me
lo ma, guey me dan zit ne nole diidz gan zho
me dipse len tson iz grol co. ¹⁵ Gocladz ma
nsiloow ma me, blee ma tib nis naal ro ma,
pale tib guiubee ro, ¹⁶ per psaan|d guidzliu
me, znuse bzhial low psi grëse nis naal co.

¹⁷ Horco mazdraa blëënie ma me, psilo ma
noguiib ma zha csacsi ma grëraa zha ne ziaad
lo xti|me. Lëë grë zha co zienal| mine rnabey
Dios, ni rdziebd zho rlu zho xnëz Jesús no
zho. ¹⁸ Nacne güey ma, bzo ma ro nisdoos.

13

Brieequia chop ma ntseeb

¹ Tibaque zeene gon naa laa tib ma nroob
brieequia lo nisdoos co, ntseeb niaa ma.
Ncuaañe gdzieb ne rlu ma, gadzraa guic ma
zob ni zob tsii zhoz ma; tibga coron zob tib
tib zhoz ma. Gzase guic ma quia diidznë
ne rneenë ma Dios. ² Rna ma zig rna grë
meedz rabon, per ni ma niaa zig niaa ni os,
laa ro ma niaa zig niaa ro meedz. Dzigo bzo
ma nizhnie co ma guiaan ma xlugar ma co,
male gnabey.

³ No tib guic ma no tib mdel nroob, rlu
mer niet ma zeene sca goc guic co ma. Min
co gon miech, grëse zho psilo zho rleynie
zho ma, miñe rnabeytaa ma zho, run zhow.
⁴ Horco grëse zho rleynie zho ma nizhnie co,
rquiitsgzhib zho lo ma, rdeed zho xquizh lo
ma bzo ma ma ntseeb co; scasaque rquiits-
gzhib zho lo ma ntseeb co, rnee zho:

—¡Tso draa stib zha zig luu! ¿Cho dien grielo tilnie luu?

⁵ Dzigo rëb ma nizhnie co lo ma gnee ma grë diidz dox, grë diidznë, gneenë ma Dios; bdeed ma co diidz gnabey ma lo guidzliu dipse leñ tson iz grol. ⁶ Nacne psilo ma rneenë ma Dios, rdzibdee ma me, rdzibdee ma grë zha no gbaa ne. ⁷ Grë zha ne no lo guidzliu, zha ne ngab xnëz Dios, bdeed me diidz psacsi ma zho, haxta beet ma zho; masaque ma bnabey grëse miech ne ndxie lo guidzliu. ⁸ Laa grëraa miech, güey zho güeygan zho ma, lëë grë zha co quiad lë lo xlibr men ne nac Carner yeen ne gut ga. Haxta zeene biao guidzliu no libr co, lo co quia lë grëse zha ne yгаа guielmban ne gdziñd dze lozh.

⁹ Lo grë to ne nac to zha ne rnalo Dios, zha ne no liaadz mine none naa nu, golquiaadiag mine gne naa nu ganle: ¹⁰ Zha ne gnaaz to co zho to ladzguiib, yeque zho zio zho ladzguiib; zha ne csacsigaa to, tel zha gut zho to, scaque gut miech zho. Gacmbande to sca, sac gon ga glu to nli rnalo to Dios, nli zleb to tel pe nactaa guielnë ne gan to.

¹¹ Blozh ga, gon naa brieequia stib ma nroob lo guidzliu, scaque ntseeb niaa ma, zob chop zhoz ma zig zob zhoz carner, per ncuaañe gdzieb ne zeene laa ma roptsie. ¹² Ye ma rap ma poder, squi zo ma ne no mdel nroob co guic rnabey ma tel zha racladz ma; bnabey ma yquitsgzhib grëse miech lo ma co. ¹³ Ncuaañe gzee zdoo miech run ma, haxta brieelo bnabey ma biet gui gbaa bliaañ lo guidzliu. ¹⁴ Ne scataa grë ncuaañ ro ne rrieelo ma run ma, pquidie ma miech, bnabey ma zho bzaa zho tib mdio zig niaada ma ne bdedlaa lo guielgut ga, ma ne scataa nat guic ga bga.

¹⁵ Blozh ga, bdeed ma xquielmban mdio co, parne grielo gneew. Bnabey ma guet grëse zha ne soliaadz yquitsgzhib low, ¹⁶ ni bnabey ma grëse miech güey zho tib bey, yase yquiaw nia derech zho, yquiaagaaw quia zho; grëse zho zigtaa zha gola, zigtagaa zha lasa, zigtaa zha ne rapchëña, zigtagaa zha ne peet rapda, zigtaa zha ne run xtsiin beña, zigtagaa zha ne choot rnabeyda. ¹⁷ Zha ne tsod bey co, grielod gun zho wzi niicle grielodgaa cto zho; sac bey co rlu cho nac zha ne ngab lo ma, lëë lë ma ga, lëë número co rlu zha lë ma. ¹⁸ Tib lë miech nac número co; xoop gayoo tsongal xoop naca. Zha ne ligier, zha ne niini, zien zho cho nac ma co.

14

Biñ tib gayoo chooptap mil zho

¹ Tibaque zeene gon naa laa men ne nac Xcarner yeen Dios ga zo guic Gui Siñ, miech guizhiu ne zonie me ga; lëë grë zha co nac tib gayoo chooptap mil zha ne quia

lë me guic ga, grop me Pxoze me. ² Horco bin naa tib bi nroob gbaa, zig rio bi rrieengaa tib nis naal tib ro quie, zig ratsiegaa grë nguzidox, ni bin naa ndal tsi zha co zëëb noyool zho tib cant, rlu niapse arp noyoolnie zho cant co. ³ Tib cant cuba, laa zho noyoola lo men ne zob lo xcan ro co, zaatne zo gza tap bult mban co, zaatne zob grë mengol co. Loxaque tib gayoo chooptap mil zha ne pcuee lad grë miech guidzliu ga, zha cose brieelo pquiab lo cant co. ⁴ Sac zha co ib beenctald xtol, rrieequia nac zho zig tib wnaa ne bgaald mgui; tibaque zo zho lo Men ne nac Carner yeen co, zaatne zieetaa me. Masaque nac zho lo Dios, ni lo men ne nac Carner co, zig tib nex ne glojaa riet riogon lo me. ⁵ Biod dze ne nquidie zho, mbe zdoo zho, mbe lo zho nëz lo me.

⁶ Horco brieequia tib anjl nosiibe zhan gbaa, ney me Diidz Ndzon ne rdeed guielmban, diidz ne gdziñd dze nitlo ga; laa me ziaad par gnee mew lo grëse miech ne ndxie dipse lo guidzliu. ⁷ Nguiedz zëëb tsi me, rnee me:

—¡Golguien golgon mine rnabey Dios, ine golleynie me, sac gon laa dze ne gun me guielwxtis bdziñle! Ine golquitsgzhib lo me, golgan ganle me bzaa gbaa, me bzaa guidzliu, me bzaa nisdoos, me psañ grëse zaatne rlan nis.

⁸ Zhits anjl co nal stib anjl, nguiedz rnee me:

—¡Nasi laa guiedz Babiloin nitlo! ¡Guiedz nroob ne scataa pquiil grëraa guiedz, been grë menguiedz co ncuaañ ndzab ne beeña, pxina guic zho!

⁹ Zhiits co nalaque stib anjl, scaque nguiedz zëëb tsi me, rnee me:

—¡Grëse zha ne yquitsgzhib lo ma ntseeb ne brieequia lo nisdoos ga, yquitsgzhib zho lo mdio ne niaa zig niaa ma ga, gdeedgaa zho diidz yquia xbey ma nia zho, yquiaagaaw quia zho, ¹⁰ ib tedsod ye zho yгаа lo grëtaa guielnëdox ne csiaab Dios! Squi zobwi grë xanjl me, squi zobwi Men ne nac Xcarner yeen me, laa zho guey lo guidox ne rieguial zho, zaatne tibaque quaiyazbel tibo ncuaañe rtsuu lë zufr. ¹¹ Dze guieel cso laan ne tsec guidox co, ni palal gapd zho descans ga; sac sca pquitsgzhib zho lo ma ntseeb co, pquitsgzhib zho lo mdio ne niaa zig niaa ma ga, ni pquia zho xbey ma. ¹² ¡Ga naganle gan grë zha ne ngab lo Dios, zha ne mban zigne rnabey me, zha ne tibliche zianañ zhiwseed Jesús, zeena gacmband zho niicle tel pe nactaa grë guielnë ne noyan zho!

¹³ Dzigo bin naa zëëb tib tsi men co gbaa, në me:

—¡Pquiaa mine gni naa nu.

Nëchaa me:

—Dichos grēse zha ne rnaló Jesús, niicle niinaga guet zho.

Pquiabaque Espíritu Sant, rnee me:

—Nígaa dichos zho, sac grē guielnē ne bded zho, nataa laaw blozh; nasi laa zho ygaa guielnzaac nroob ne gdeed Dios lo zho, porne wban zho zigne rnabey me.

¹⁴ Zeene lui naa stib, dzigo laa naa gonle tib xcow nquits; lo xcow co zob tib men co, rlu me zig rlu Men ne pxeel Dios ga biaad lo guidzliu. Zob tib coron or guic me, ni nzhen me tib yaguiits nroob.

¹⁵ Dzigo briece tib anjl len yadoo ro ne zob gbaa, nguiedz bnee me rēb me lo men ne zob lo xcow co:

—iNiinaga blooyaguiits grē zhob ne squitaa zēēb lo guidzliu! iSac gon gol-lew, laa dze ne tsasa bdziñle!

¹⁶ Dzigo pteed men co yaguiits dipse lo guidzliu, ptop me grēse zhob co.

¹⁷ Blozh ga, briece tib anjl len yadoo ro co nzhen me tib guuib hoz, rlpaa per nli ndox low.

¹⁸ Loxaque briece anjl co, laa anjl ne quianap gui ne ndziib lo pcoog brieceque; nguiedz bnee me rēb me lo anjl ne nzhēn hoz ga:

—iNiinaga pchug grēse mzhiiig uv ne squitaa zēēb lo guidzliu, sac gon laaw gule!

¹⁹⁻²⁰ Horco znuse pteed anjl co hoz lo guidzliu, pchug me grēse mzhiiig uv co, güeycodzēē mew tib len pil nroob ne zob tib lad ro guiedz. Ga güeyzēēni zho grē uv co, ptaadz zhow; dzigo ren naalox ne briece zhan pil co, masaque lal ne rzēni miech xoop ngbidz, lal ga wbiig lo ren co igo pil co; tel niaca mine sēēb tib guay low, dzdiña haxta zhan cho ro ma. Rrieequia sca nagon gac mine gnabey Dios ted grē zha ntseeb.

15

¹ Tibaque zeene gon naa, ncuaañe ro, ncuaañe gzee zdoo ne goc gbaa. Briecequia gadz anjl, tib tib anjl co tibus guielnē guiaadnie me ted grē miech ne ndxie lo guidzliu; guielnē co lozh cueezhian Dios miech.

² Dzigo gax lo naa gon naa tib dzoon miech, masaque rquiabni, masaque rna gui zaatne zo zho, nēzrii nēzrec rac lo co, pale lo nisdoo. Lēē grē zha co been gan, pquiitsgzhibd zho lo ma ntseeb co, pquiitsgzhibd zho lo zhimdio ma, niicle biodgaa zho xbey ma. Grēse zho tibus xarp Dios nzhēn zho, ³ quaiyool zho zig biil grē zha ne psilaa Moisés Egipt. Rley zho, sac niina laa Xcarner yeen Dios psilaa zho lo ma ntseeb co; rnee zho:

Dios, luu ne nac luu men ne grēsew rrieelo run,

ncuaañe nroob, ncuaañe gzee zdoo miech, nac grē ncuaañe run luu.

Luu nac men ne rnabey,

lo grēse zha ne ngab lo luu, niapse diidzli rnee luu, niapse mine nonguiel rnabey luu.

⁴ iZha rna zha ne dien gdzieebd luu?

iZha rna zha ne gleyd goolnie luu?

Sac luuse nac men mbe zdoo, men ne ni tib dol rapd.

Grēse guiedz ne ndxie lo guidzliu, zriece miech guiaad zho yquiitsgzhib zho lo luu;

sac nasi laa luu blu zha run luu guielwxtis.

Gadz anjl ne pxeel guielnē lo guidzliu

⁵ Horco gon naa bzhiäl zaatne nac Lugar Nda len xyadoo Dios gbaa, ⁶ ga briece gza gadz anjl ne guiaadnie guielnē ne no guiaad lo guidzliu ga. Ine nquitsbie rna xab gza anjl co, haxta rzēēg lada, ndxiega tib cinch or haxta ncaan len zhicw me.

⁷ Dzigo wbig tib bult mban co, bdeeda tibus cop nroob niaa niapse guuib or lo tib tib anjl co; len cop co ga nodzē grēse guielnē ne nac xquielblēē Dios, men ne gdziñd dze guet. ⁸ Horco grēse xquielndzon Dios, grēse poder ne rap me, biodzē len yadoo co, rluw zig rlu tib gox; choot brieelodraa nzēēb len yadoo co, haxta blozh gon miech gza gadz guielnē ne güeynie gza anjl co.

16

¹ Dzigo bin naa nguiedz zēēb tib tsi men co len yadoo ro co, bnee me lo gza gadz anjl co, rēb me:

—Goltsie, goltsie xiee gza guielnē ne nac xian Dios i lo guidzliu.

² Dzigo briece tib anjl co, güey me, güeylaat me xcop me lo guidzliu, hor co grēse zha ne noquiitsgzhib lo zhimdio ma ntseeb co, zha ne quia xbey ma ga, psilo biall dipse lad zo, yoobdox ne rquia zho.

³ Güeyaque stib anjl co, bdziñ me blaat me xcop me lo nisdoo, zeene laa ncuaan co bzhiēe lo nisdoo, grēse nis co biallo ren ctoo; ni stib ma ne no low bialandraa.

⁴ Laa min co bded, zeene laa stib anjl ne rac zho bion ga güey, güeylaat me xcop me grēse guibee, grēse zaatne rda nis; nacne grēse nis co biallo ren. ⁵ Dzigo bin naa tsi anjl ne rnabey nis, rēb me lo Dios:

—Dios, ible rieguial mine been luu i; luu ne nac luu men mbe ne ni tib dol rapd, men ne tibaque nac, men ne gdziñd dze gdzēē. Lēēw i been luu, squi beenquizh luu grē miech qui mine zēēb zho, ⁶ sac gon blactaa grē zha ne ngab lo luu, blactaa grē zha ne biadteed xtiidz luu psaci zho, pxiee zho xchen grē zha co. Min qui rquiin zho, guie zho grē ren qui na.

⁷ Zēēbaque tsi stib men co zaatne nac lo pcoog len yadoo co, rnee me:

—iDios, luu ne nac luu men ne nroob ne gr̄esew rrieelo ruṅ, nligaa ible rieguiala squi beenquizh luu gr̄e zha qui mine been zho!

⁸Blozh ga, brieē stib anjl ne rac zho tap ga, güey me güeylaat me xcop me lo ngbidz, hor co gocnlēeraa xbiini ngbidz, ptsuuw miech. ⁹Niicle scale nodzu gr̄e miech co, per ib biablod zho, laa ne nsaan zho xquieṅntseeb zho, nleynie zho Dios, leḷ psilo zho rneenē zho me, pe nacne noxeḷ me gr̄e guiēṅnē co.

¹⁰Zeēne brieē stib anjl co, güey me güeylaat me xcop me zaatne zobnabey ma ntseeb ne brieēquia lo nisdoo ga, dzigo znuse goc tib ncowdoo gr̄ese guiedz ne rnabey ma. Lo yoobdox ne rquia gr̄e miech co, haxta rowye zho ludz zho; ¹¹per niicle scaw, ib psaand zho xquieṅntseeb zho, leḷ psilo zho rneenē zho Dios, pe nacne scataa rquia zho yoob, pe nacne scataa quiaayaḷ gdiḷ lad zho.

¹²Zeēne laa anjl ne rac zho xoop ga güey, güeylaat me xcop me leṅ guiubee Eufrates, hor cogazh wbidz nis naal ne zhoob guiubee ro co. Nacne bio nēz ted gr̄e men ne zobnabey gr̄e guiedz ne ndxie nēz ne rlan ngbidz.

¹³Horco goṅ naa tsoṅ me yozh, niaaw zig niaa mbiich, tiba brieē ro ma ngol nizhnie co, tiba brieē ro ma ntseeb ne brieēquia lo nisdoo ga, laa stiba brieē ro zha ne noteed xtiidz ma ntseeb co. ¹⁴Chēṅ meṅdox nac gza me co, ruṅa gr̄e ncuaaṅe nroob ne rzee zdoo miech; dzigo güeya güeyzodiidzniew gr̄ese zha rnabey ne no dipse lo guidzliu, parne tipse gac zho tiḷnie zho men ro ne nac Dios, gaḷ dze ro ne gdeed me mine rieguial tib tib miech.

¹⁵Tibaque zeēne laa men ne rnabey ne ga bnee, nē me:

—Zhile goṅ laa naa guaḷ. Nsin sca goḷso, sac zigne racnand bizhuan yu pa hor sēēb ngbaan yu, scaque gacnande to pa horpaa guaḷ naa. Dichos zha ne yquiambēz naa, ine mbe xab zho nacw zhow; sac goṅ mban tsie zho teḷne scase zo zho zeēne laa naa glanso, ni lala tib guiēṅntodox ga griēquia zho.

¹⁶Dzigo pcaalsa gr̄e zha rnabey co gr̄e xmenguiib zho, zaatne rnee zha Israel Armagedón.

¹⁷Horco güey anjl ne nac zho gadz ga güeylaat me xcop me lo me ne rrieē lo guidzliu; dzigo bnee tib men co zaatne nac lo zhixcan Dios leṅ yadoo gbaa ga, nguiedz zēēb tsi me rnee me:

—iNasi nagoṅ ledaaw blozh bza!

¹⁸Dzigo psilo nēzrii nēzrec riab belye, loxaque bi rio ratsie nguzi. Lo belye co, lo bidox co, laa tib zhodox psiloque bni; wlal-taa ne ndxie miech lo guidzliu, gard gni tib zhodox zig min co. ¹⁹Gr̄e guiedz ne ndxie lo guidzliu, per ni rludraa zha niaaw; zig nac guiedz nroob ne nac Babiloin ga, haxta tsoṅ leḷ goca. Horco beenquizh Dios

zha Babiloin, gr̄etaa guiēṅntseeb ne zēēb zho; psiaabzi me zho por gr̄etaa zhian ne pquiaa zho me. ²⁰Gr̄ese guidzliu win ne no lo nisdoo, rludraa dien yow; gr̄e gui glaa, loxaque nēzrii nēzrec bliaaḷa. ²¹Min co blozh, zeēne psilo bliaal tib guiēquieidox lad gr̄e miech co, tib tib guiēquie co nēw maase choo kil. Goṅ zho scataa noyab guiēquie co, laa zho noque rdzibdee zho Dios.

17

Zob tib wnaa yozh lad tib ma ntseeb

¹Lo gza gadz anjl ne sca blaad gr̄e guiēṅnē co lo guidzliu, lad co brieē tib me biaad, nē me lo naa:

—Dē ganḷe, zeēna glu naa lo luu zha nactaa caxtigw ne ygaa wnaa yozh ne ran luu squi zob lo gr̄ese nis ne no lo guidzliu. ²Lēē wnaa qui pxin guic gr̄ese miech ne no lo guidzliu güeyṅal zho gr̄etaa guielyozh ne been me; haxta gr̄e zha rnabey, güeyṅal min co.

³Sca nolu Espiritu Sant gr̄e ncuaaṅ co lo naa, dzigo güeynie anjl co naa tib dan zit. Ga goṅ naa laa wnaa co zoble lad tib ma nroob, ntseeb niaa ma co, zob gadzraa guic ma ni zob tsii zhoz ma; gdipse ma rna nizhnie, gdipse lad ma quia gr̄e diidz ntseeb ne rneenē ma Dios.

⁴Glaa glaa zhits ma ntseeb co zob wnaa co, masaque nizhnie nlaan, nizhnie ren rna xab me, loxaque gr̄e guib or, gr̄e quie rhebni, gr̄e quie perl, ngalguiee lad lar co. No tib cop nroob niaa me, niaaw niapse guib or, rrieēquia leēṅ co nodzē gr̄etaa guiēṅntseeb, gr̄etaa guielyozh ne ruṅ me. ⁵Ni quia bla lan diidz quia me, rneew: “Lēē guiedz nroob ne nac Babiloin nu, guiedz ne nac xniaa gr̄ese wnaa yozh, guiedz ne nac xniaa gr̄ese zha ne ruṅ ncuaaṅe mbixladz.” Lēē lē me ga, hor coraa bzhoobnē zha nac lē me. ⁶Dze rwi naa lo me, dzigo goṅ naa rac me zig rac zha ne rzudz. Nziandox zha ne no xnēz Jesús beet me, rrieēquia gr̄etaa ren ne pxiee me ga sca noyṅ me. Bzee zdoo naa, ni bdzieeb naa goṅ naa zha rac wnaa co. ⁷Dzigo nēchaa anjl co lo naa:

—iPe nacne rdzieeb luu? Na ganḷe gni naa lo luu cho nac wnaa co, cho nac ma ne sca zob me lad ga. ⁸Padzeela no ma ntseeb co, guiend ma niinapaa, per zhile laa ma griee leṅ guierdoo ne niioogyu ma, laa ma griee ga parne diunavez nitlo ma; gr̄e zha ne quiad lē lo libr ne zhobnee cho nac zha ne ygaa guiēṅmban ga, seedox zdoo zho zeēne ganḷe zho laa ma grieequia tib, sac tibaque nan zho gutle ma. ⁹Wen wen pquiaadiaga ganḷe: gza gadz guic ma ga, rrieēquia lēēw nac gza gadz gui win ne zob wnaa co zobnabey me. ¹⁰Ni rrieēquiaque lēē gadz zha ne rnabey ga: gaay zho bnabeyle, tib zho

quianabey niina, laa stib zho naraa gnabey; per zeene laa zha co guiaad, zhis dze ne gnabey zho. ¹¹ Lozhse gnabey zha co, laa ma gnabeyaque, ma gac zha rnabey co xon, niicle ne yele ma ga goc zha co gadz; gataa laa ma nitlo.

¹² 'Zhoz ma, rrieequia lëe stii zha ne gnabey ga, gzase zha co naraa gnabey zho, tipse ycaania zho guielrnabey gza zho ma. Zhisaque dze sca gnabey zho, ¹³ dzigo laa gza tsii zha co guiaaṅ diidz gzo zho ma, ma gac zha nroob lo zho. ¹⁴ Zacnie zho ma, grëse zho tsie tsietilnie zho Xcarner yeen Dios, per znuse guṅ meṅ ne nac Carner yeen co gan lo zho; sac me nac meṅ ne rnabey lo grëse zha ne rnabey, lo grëse zha ne non. Grëse zha ne tsienal zhits me, tsietilnie zho ma co, lëe grë zhe co nac zha ne bzooblo Dios bredz me zho bgab zho xnëz me, ni ib spaand zho me.

¹⁵ Blozh ga, nëchaa anjl co lo naa:

—Lo grëtaa nis ne goṅ luu sca zob wnaa yozh co, rrieequia lëe nis co nac grëse guiedz, grëse dii miech ne ndxie lo guidzliu. ¹⁶ Per dzidṅ dze lëeque ma ntseeb co, tilnie wnaa co, grë ma gza tsii zha ne rrieequia nac zhoz ma ga; zlëeniedox zho wnaa co, sapwin zho me, haxta xab me cuee zho, znitlo zho me, sëëg zho me lo gui. ¹⁷ Ib Dios csiaab guic zho gnitlo zho wnaa co, ni meque csiaab guic zho gzo zho ma co gac ma zha ne gnabey lo zho; laa me guṅ miṅ co, parne grieequia grëse miṅe bneele me no gac. ¹⁸ Laa wnaa co, rrieequia me nac guiedz ro ne rnabey lo grëse guiedz ne ndxie lo guidzliu.

18

¹ Blozh ga, goṅ naa laa stib anjl ziad-zëëb gbaa, rlu tib anjl nona, dipse lo guidzliu biab biinidoo ne ziaadnie me, ² nguiedz zëëb tsi me rnee me:

—iNasi laa guiedz nroob ne nac Babiloin ga nitlo! iLoxaque meṅdox yquianzë ga, loxaque grë ma guix, loxaque grë ma mbixladz cuew! ³ Laaw nitlo, sac noquiila grëse miech ne ndxie lo guidzliu, grëse zha ne rnabey, quiaayun zho grëtaa guielyozh ne ruṅa. Lo grëtaa guielyozh co quiaayun ricwa grëse zha ne ruṅ wto; quiaxin grë ncuaaṅ co zho, masaque quiaayuna zho zig ruṅ nziu.

⁴ Dzigo zëëb stib tsi meṅ co gbaa, rnee me:

—iGrëse to ne nac to miech ne ngab xnëz naa, golgon diidz, golrieie guiedz qui! Ib guṅde to doṅ ne quiaayuna; zeena ygaade to grëtaa guielnë ne ygaaw, ⁵ sac nroobdox nac grë doṅ ne quiaayuna, telne niaca ncuaaṅe cue monton, rrieequia haxta gbaale rdziṅ guic monton co; gane ib tedsod zunquizh Diosa grëtaa guielntseeb co.

⁶ 'Gacxe na grëse miṅe beena miech, miṅcoque saca. Grëse tel zha psacsiw miech,

chop lalga miṅe teda. ⁷ Zigne squitaa now lo grëtaa ncuaaṅe racladza; scagaa na guielnëdox ne gaṅa, haxta goona lo grëtaa guielnë co. Niats raca rneew: "Naa rnabey. Nacd naa cho zha ne zotib, zig rzac grë wnaa viud; naasi gdziṅd dze ne tso naa guielnë."

⁸ 'Nli squitaa niats raca, per zeene guiaba lадznia guielgut, lадznia gbin, lадznia grëraa guielnë ne gaṅa, tib dzeque lozha. Ni lozh ga, haxta zeca lo gui; miṅ co gnabey Dios teda. iMe nac meṅ ro ne guṅquizha grëtaa miṅe beena! ⁹ Grë zha ne rnabey grë guiedz, zha ne scataa bley been grë guielyozh ne ruṅa; zeene gaṅ zho goxdoo ne rso noyeca, mban gac zho, zoon zho zio zho xquielnëw. ¹⁰ Dzdieb zho gaṅ zho grëtaa guielnë ne nodeda ga, lo dzebe co, ni lalnu gbigd zho. Lëe gdib so zho goptsie zho, guiab zho: "iProbsaxe luu Babiloin, guiedz nroob, guiedz non nac luu! iPa brieie guielnë qui squi znuse nitlo luu!"

¹¹ 'Grë zha ne ruṅ wto dipse lo guidzliu, ye zho zio zho xquielnëw, mban gac zho guielndraa cho si lo zho. ¹² Sac masaque lëëw rzi:

guiib or,
guiib plat,
grë quie non,
grë perl,
grë lar niazh,
grë lar sed,
grë lar nizhnie nlaan,
grë yag ne nex rlaa,
grë ncuaaṅe niaa marfil,
grë ncuaaṅe niaa grë yag wen,
grë ncuaaṅe niaa guib,
grë ncuaaṅe niaa brons,
grë ncuaaṅe niaa quie mármol,
¹³ grë blad canel,
grë guizh scuaan,
grë yaal ne ndzon rlaa,
grë guizh, grë nceit ne nex rlaa,
grë nziu,
grë nceit,
grë zhoxttil,
grë rin niazh,
grë ma ne rey yo,
grë mëcwxiiil,
grë carret,
haxta grë miech ne ruṅzhoo dziin lo samiech.

¹⁴ 'Zrieequia zha ne guiab lo guiedz co: "iBdzinaque dze ne blozh luu, pa sëraa scataa yquianie luu grë ncuaaṅe rdziladz luu! iGrëtaa ncuaaṅ niazh, grëtaa ncuaaṅe rap luu, gdziṅdraa dze ne gbiere gaṅ luuw!"

¹⁵ 'Grë zha ne ruṅ wto ga, zha ne scataa gocricw lo grë wto ne been zho guiedz co, dzdieb zho, zit so zho gaṅ zho grëtaa guielnë ne nodeda. Zio zho xquielnëw, haxta zoon zho ¹⁶⁻¹⁷ guiab zho: "iProbsaxe guiedz ro qui,

squi znuse bnitlow! Biopaa dze gocnona, masaque goca zig tib wnaa ne racw grè lar niazh, grè lar nizhnie nlaan; wnaa ne rna grè guieb or, grè quie non, grè quie perl, rio yan, rio yan nia.”

Grè zha ne rnabey barcw, grè zha ne rsèew, zha ne no leña, ni grèragaa zha ne ruñ dziin lo nisdoo, zit so zho gan zho tsec guiedz co; ¹⁸ zeene gan zho goxdoo ne rso noyeca, ziah zho: “iZha rnaraa dze ne dzian ne stib guiedz nroob zig guiedz qui?” ¹⁹ Mban gac zho, zio zho xquieñew, zoon zho, squiaadan zho redz, guiab zho: “iProbsaxe guiedz ro qui squi znuse bnitlow! Lo grètaa dimi ne pquianiew, blactaa beenricwa ne grè ne grèraa zha ne ruñ dziin rii.”

²⁰ Sca nagon nitlo guiedz co. Grèse to ne nac to zha ne no gbaa, grèse to ne nac to zha ne ngab lo naa, grèse to ne nac to zha ne pxel naa güeynee xtudz naa, zha ne güeyteed xtudz naa, zeene gan to laa guiedz co nonitlo, golley, sac gon ga gunquizh Dios miech ne no ga grètaa mine been zho to.

²¹ Zeene blozh bnee men co, dzigo gon naa tib anjl, rlu tib anjl macisa, znuse blis me tib quie nroob, niaaw zig niaa quie molin zhoxtil dipse gan bron mew lo nisdoo; blozhse bron mew, nëchaa me:

—Squi nagon nitlo guiedz ro ne nac Babiloin ga, gdzindraa dze ne gbiire gan miecha. ²² Masaque nroobladzdoe ne raca niina, loxaque di noyac grè ro xnèza, zaatne noyoöl zho vihuel, zaatne noyoöl zho bzie, zaatne nocuedzga zho trompet, nëzrii nëzrec rac miech zie zho lo xtsiin zho, loxaque lo grè quie molin rzedz nozuu zho zho; per gal dze co grèsew lozh. ²³ Squitaa biini ne rquiaw niina, squitaa tibaque quiayac guieltsiela, per gal dze co ncowse gnaw, pa sèraa gac lniw. Laaw nitlo, sac blactaa noyungüeta miech ne no grèraa guiedz ne ndxie lo guidzliu lo grè zhiwseed mendox; pe zhidaa noyunicwa grè zha ne ruñ wto por grè wseed co; ²⁴ pe zhidaa miech zèèba. Nzian zha ne ngab lo Dios, nzian zha ne riadteed xtiidz me, rnabeya ret zho.

19

¹ Zeene blozh ga, bin naa zèèb ndal tsi men co nëz gbaa, rlu miech guizhiuw, nguiedz rnee zho:

iZha ndzontaa xDios ne! Me nac men ne rsilaa miech, parne ygaad zho lo caxtigw.

Me nac men ne rap poder, me nac men ne rieguial dziuunnon ne;

² sac gon mesi ruñ me guielwxtis zigne no gaca.

Gacxe waa, sca gunquizh me guiedz qui grètaa guieyozh ne noyuna, grètaa

xchen zha ne ngab lo me, zha ne bnabeya gut; rrieequia naca zig tib wnaa yozh, quiayungüeta miech quiayunctal zho xtol zho.

³ Blozh ga, biire bin naa tsi zho, rnee zho: iZha ndzontaa Dios! iMin qui nagon rieguiala, gdzind dze ne lozh csow gox!

⁴ Horco laa gza galptap mengol co, ni gza tap bult mban co pquittsgzhib lo Dios lo xcan ne zob me ga, haxta bzooblo zho lo liu, beennon zho me, rnee zho: “iNliw! iLuuse nac men ne ndzon!”

⁵ Zèèbaque stib tsi men co zaatne nac lo xcan co, rnee me:

iGrèse to ne nac to zha ne quiayun dziin lo me,

zha ne rien men non nac me, zigtaa zha wina, zigtagaa zha nona, golgoolnie me!

⁶ Dzigo wbiire bin naa tsi grè miech guizhiu co nëz gbaa, rio bi zèèb tsi zho, pale zeene rio bi nisdoo, zeene riogaa bi rnee grè nguzidox, rnee zho:

iGolgotsaa dzioolnie ne me!

iMe nac xDios ne, me nac men nroob ne rnabey!

⁷ Golgotsaa gley ne, golgotsaa dziuunnon ne me,

sac gon laa dze bdzin laa Carner yeen ne nac Xpèed me ga ctsieelnia;

grè zha ne ngab lo me,

zha ne rrieequia nac ndzoop ne ctsieelnia Carner yeen co, laa zho nacwxable.

⁸ Masaque rlu zho zig tib ndzoop ne ctsieelnia,

ine nquitsbie, ine rbebni lar niazh ne nacw zho;

me bdeed diidz got zho lar co,

ga rlu ganle mban zho zigne racladz me.

⁹ Dzigo rnee chaa anjl ne sca bron quie co lo nis:

—Wen zie grè zha ne bredz Dios tsie lo xquieltsieel men ne nac Carner yeen co.

Rnabey me naa pquia naa diidz co, blozhse ga, nëchaa me lo naa:

—Xtiidz Dios ga gon, me rneeew.

¹⁰ Horco pquittsgzhib naa lo anjl co ni naa gunnon naa me, per bzhiguield me.

—iCoo! —nè me lo naa—. iGuso i! Gocnan ganle ye naa tib ngundziinse nac naa lo Dios, nac naa zigne nacaque luu grè luu grèraa zha ne squi noxco zienal mine nac zhiwseed Jesús. Dios none gunnon luu, sac gon tib ngundziinse nac naa bzet naa min co, lèè gdib bne naa ganle zha nac xtiidz Jesús.

¹¹ Dzigo hor co gon naa bzhal zhan gbaa, ga brieequia tib men co zob me lad tib guay nquits, zèèb diidz niapse diidzli rnee me, sac ruñ me guielwxtis zigne no gaca, ni rdilnie me zha ne rieguial tilnie me.

¹² Masaque rbebel bziaalo me, nzian xcuaa

coron zob guic me, ni quia stib lè me quia me, loxaque mese nan dien zha nac lè co me. ¹³ Rnadraa xab me di ren, lèe me ga rnee zho: Xtiidz Dios. ¹⁴ Ndal grè menguiib ne no gbaa nał zhits me, ye zho niapse guay nquits zob zho; niapse lar niazh nacw zho, ine nquitsbie rna grè lar co. ¹⁵ Rlu choot grieelod gacndaan lo me, masaque zob tib spad lots ro me, laa me nzobro spad co parne tilnie me grè guiedz ne gacntseeb lo me. Masaque me gnabey grèse guiedz, ndip gac xtiidz me, ni tib choot quitsd mine gnabey me; zeene laa me gunquizh miech grè xquielntseeb zho, cxeel me zhian ne csi-aab Dios yгаа zho, zun me zho zigne run miech uv zeene rzèeni zhow. ¹⁶ Lad lar ne nacw me ga, ni tib cho cor me, ga quia cho nac me, rneew: "LÈE MEN RII NONRAA LO GRÈSE ZHA NON, ME RNABEY LO GRÈSE ZHA NE RNABEY."

¹⁷ Blozh ga gon naa zo tib anjl lo ngbidz, nguiedz zèeb tsi me rbedz me grèse maxiil ne row grè magut, rnee me:

—jLigier golcaalsa! jGoltè zeena yquiin to guielwagw ne gneedz Dios lo to niina! ¹⁸ Goltè zeena gow to grè zha ne rnabey grè guiedz, grè zha ne rnabey lo menguiib, grè zhaguiib ne zèeb diidz nac zha valor; goltè gow to grè guay, gow to grè zha ne rzob lad ma. Goltè gow to grèse miech, zigtaa zha ne runcunzhoo miech dziina, zigtagaa zha ne choot rnabeyda, zigtaa grè zha ne nac zha nona, zigtagaa grè zha wina.

¹⁹ Dzigo gon naa ma nroob ne brieequia lo nisdoo ga, ma ne scataa ntseeb rlu ga, psilo ma ptop ma grèse zha ne rnabey grè guiedz ne ndxie lo guidzliu. Pcaalsa zho grè xmenguiib zho, zha guizhiuw, laa zho brie zietilnie zho men ne zob lad guay nquits co grè xmenguiib me. ²⁰ Lo dil co, ga bgaa ma nroob co, ni bgaa zha ne pteed xtiidz ma lo miech; zha ne scataa squi zo ma been zho grè milagr co pquidie zho miech, bio guic zho bio zho xbey ma, ni beennon zho mdio ne rlu zig rlu ma ga. Zigtaa maw, zigtaa zha ne pteed xtiidz ma ga, nguia mban zho laa zho biab tib lo guidox zaatne noyec zufr. ²¹ Laa grèraa zha ne scataa gocnie ma ga, grèse zho gut lo spad ne nzobro men ne zob lad guay nquits co, hor co bdzinbe grèse maxiil ne row magut, güeytow ma grèse ngutoo co haxta biel ma.

20

Bnabey Jesús tib mil iz

¹ Blozh ga, tibaque zeene gon naa laa tib anjl biet gbaa, nzhen me tib liow, ni nzhen me tib caden. ² Dzigo bnaaz me ma ngol ne rna nizhnie ga, meel ne notaque padzeela ga, ma ne nac mendox ga, ma ne nac Satanás ga, bzoob me ma caden co; ³ con liow ne

nzhen me ga pxal me tib ro guierdoo, psèeb me ma len guierdoo co. Blozh ga dziits dziits psioog mew, zeena grieelod griee ma tsiequidieraa ma miech.

Ga tsogyu ma dipse len tib mil iz, lozhse tib mil iz co ible laa ma no griee ga, sonlaa ma zniip.

⁴ Horco gon naa laa grè zha ne bzo Dios cobey pe nac xtol tib tib miech, laa zho bzob lo xcan ne rieguial sob zho. Gonaque naa xalm grè zha ne psacsi miech, bga zho yan zho, beet zho zho loxaque ne no zho xnèz Jesús ni bnee zho xtiidz me lo miech; gon naa grè zha ne bzhiguielnd nquitsgzhib lo ma ngol ne brieequia lo nisdoo ga, bzhiguielnd zho niunnon zho mdio ne rlu zig rlu ma, niicle bzhiguielnd zho nio zho xbey ma. Gon naa brieegan zho grèse zho, par gbannie zho Jesús, gnabey me grè me zho dipse len tib mil iz.

⁵ Lèe grè zha co nac miech ne gloopaa grieeban, laa grèraa mengut, zha co grieeban zeene laa tib mil iz co zga. ⁶ Dichos grè zha ne glo grieeban ga; lo Diosle ngab zho ga, noxtseebdraa zho guey zho gabil, masaque lo Dios, lo Jesús gon zho dziin, gac zho zig tib pxoz lo me; tipse gnabey me grè me zho len tib mil iz co.

⁷ Zeene blozh tib mil iz co, dzigo gon naa laa mendox brie zaatne nioogyu ma ga, ⁸ güey ma güeyquidie ma zha Gog, güeyquidie ma zha Magog, grèse guiedz ne ndxie lo guidzliu güeyquidie ma miech, tipse been ma zho grèse zho parne tilnie zho Dios. Miech guizhiuw, miech ne lèb ne glab new, gon ne cuent yuzh ne ndxie ro nisdoo, ⁹ ntseeb rac zho, grèse zho laa zho bdzin zaatne ndxie guiedz ne rleynie Dios, zaatne no grè zha ne ngab lo me ga; per zeene laa zho ndxie igo guiedz co parne gnitlo zhow, hor co bnabey Dios bliaal gui lad zho, bzèega zho grèse zho. ¹⁰ Laa mendox, bnabey me bgaa ma bey ma lo guidox ne nac gabil, zaatne nole ma ngol ne sca brieequia lo nisdoo, grop ma co zha ne pteed xtiidz ma ga. Lo guidoxa, niapse zufr noyec lugar co, ga tsu ma dze guieel, gdzindraa dze ne griee ma ga; caxtigwdox ne ted ma.

Beenquizh Dios miech mine been zho

¹¹ Blozh ga, gon naa tib men co zob me tib lo xcan ro, dib nquitsbiese rna xcan co. Zigtaa guidzliu, zigtaa gbaaw, zeene gona me znuse bichew, per bdziel pa niolana lo me. ¹² Grèse zha ne brieeband glo ga, zigtaa zha nona, zigtaa zha wina, laa zho bdzin lo me. Laa zho ndxie ga, zeene laa lo bla lbra co bzhial, ni bzhialaque lo mine quia lè zha ne bgaa guielmban cub ne rdeed Dios ga; hor co bgaase zho mine rieguial zho tib tib zho tel zha zhonee lo libr co wban zho. ¹³ Grèse zha ne biaan len nisdoo, blieequia nisdoo

zho, grē zha ne bioliu blieequia baa zho; grēse zho blieequia guielgut zho. ¹⁴⁻¹⁵ Blozh ga, zigtaa guielguta, zigtaa zha ne quiad lē len libr ne no lē zha ne bgaa guielmban ga, laa zho biobe lo guidox ne nac gabil; lēē guielgut brop ga.

21

¹ Dzigo gon naa tib gbaa cub, ni tib guidzliu cub; sac zigtaa gbaa ne rdziuunbey ne, zigtaa guidzliuw, zigtagaa nisoow grēsew bnitlo. ² Grop lo naa gon naa laa Jerusalén, guiedz ne nacchen Dios ga, ziad-zēēb zhan gbaa brieew zaatne zob me; tib guiedz cuba. Tib guiedz nzhixcuaa naca, pale tib ndzoop nguieg dze ne rtsieelnia zho. ³ Dzigo bin naa nguiedz zēēb tib tsi men co zaatne nac lo xcan ro ne zo gbaa ga, rnee me:

—Nasi nagon laa Dios cuēz lo miech, nasi laa me gbannie zho; zanlo zho me, peet gunfaltraade lo zho. ⁴ Led yedraa niina pa glunē zho, led yedraa niina tsoxtseeb zho lo guielgut, led yedraa niina mban gac zho cuedz zho dien cho gun xyudar zho, led yedraa niina goon zho; grēse nis ne zo lo zho zeēne biin zho, niina laa me gunmbew. Grēse ncuane co, gdziindraa dze gan zhow.

⁵ Zēēb tsi men ne zob lo xcan co, rnee me: —Grēse ncuane no niina ncuble naca, ni naa beenncuba.

Blozh ga, nēchaa me lo naa: —Grēse diidz ne gni naa lo luu nu niina gon, pquiaaw, ib none gacnan miecha, sac ncuane no gaca. ⁶ ¡Lēēw nagon, grēse mine no gac, laaw blozh ben naa! ¡Naa psilow, ni naa psiaala, naa nac zigne nac letr “a” ni letr “z” lo grēse letr, “a” rsilow “z” riala!

¡Zha ne nē rnab zhis, naa gded nis ne rdeed guielmban guie zho, ygad naa nis co lo zho, peet gacnonda! ⁷ Ni golgacnan ganle, grēse zha ne gdeete diidz lo grē ncuane gunctal xtoj zho, ible zгаа zho grē guielnzaac ne noyaquiet nu, naazhal gbannie zho peet gunfalte lo zho, masaque tib mēēd gac zho lo naa. ⁸ Sanguie grē zha ne rdzieb gban zigne rnabey naa, grē zha ne rbiche lo naa, grē zha ne ruṅ grē ncuane mbixladz, grē zha ne rut samiech, grē zha ne rionie zha ne led tsieeld zho, grē zha ne rleynie guielbruj, grē zha ne rleynie grē mdio, grē zha ne tibaque noquidie samiech, grēse zha co mine yгаа zho nac lo guidox ne noyec zufr ga; lēē guielgut brop ga.

Guiedz ne gdziṅ zha ne ngab lo Dios

⁹ Lo gza gadz anjl ne bzhen cop ne bio grē guielnē ne gon miech ga, biaadgax tib me lo naa nē me:

—Dē ganle zeēna gan luu ndzoop nguieg ne gac tsieel men ne nac Xcarner yeēn Dios i.

¹⁰ Blozh ga, dzigo güeynie anjl co naa tib guic gui nroob, tib guic gui glaa, ga gon naa guiedz Jerusalén stib, guiedz ne nacchen Dios ga, gonpaa naa bieta zaatne zob Dios, laaw ziad-zēēb gbaa. ¹¹ Masaque rrebela guielndzon ne rap me, lēēdaa grē quie niazh ne lē jasp, ni roḷ rnaw lēēdaa grē vidr. ¹² Rna tib biedz nroob, tib biedz glaa ndze igow, quia tsiipchop puert cho biedz co, tibga anjl zo quianap tib tib ro puert co, tib tib puert co neysew tib lē mengoldoo ne goc xpēēd Israel. ¹³ Tson puert co quia nēz ya, tsona quia nēz quiet, tsona quia ngali nēz ne rlan ngbidz, stsona quia ngali nēz ne rzēēb ngbidz. ¹⁴ Lo tsiipchop quie nroob ne zob biedz co, tibga lē xpoxtl men ne nac Xcarner yeēn Dios ga quia lo co.

¹⁵⁻¹⁶ Rlupaa cuadrada niaa guiedz co; dzigo gon naa no tib bar ne rbix nia anjl co, niaaw niapse guiib or, psilo me ptiix me guiedz co, ptiix me biedz ne ndze igow ga, ni ptiix me xpuerta. Zeēne blozh ptiix mew, tib tib nēza no gaay gayoo choo kilómetro, lal ne rzēni miech tsiipchop ngbidz; lal ne zioola lalga nzhenā, ni lalgaque glaa; ¹⁷ laa xquielnaal biedz co nzhenā lal ne rgaa tsiipchop docen dzit nia ne; ptiix mew zigne rtiixaque ne nac ne miech.

¹⁸ Niapse guiib or niaa guiedz co, zigne rne naa ga, roḷ rnaw lēēdaa vidr. ¹⁹⁻²⁰ Biedz ne ndze igow ga, niapse quie niazh ne lē jasp niaaw; scaque gza tsiipchop quie ne naaz biedz co, niapse quie niazh ngalguieew: tiba ngalguiee quie niazh ne lē jasp, tiba ngalguiee quie niazh ne lē zafir, tiba ngalguiee quie niazh ne lē ágata, tiba ngalguiee quie niazh ne lē smerald, tiba ngalguiee quie niazh ne lē ónice, tiba ngalguiee quie niazh ne lē cornalin, tiba ngalguiee quie niazh ne lē crisólito, tiba ngalguiee quie niazh ne lē beril, tiba ngalguiee quie niazh ne lē topás, tiba ngalguiee quie niazh ne lē crisoprás, tiba ngalguiee quie niazh ne lē jacint, tiba ngalguiee quie niazh ne lē amatist.

²¹ Gza tsiipchop puert ne quiaw ga, tibga quie perl niaa tib tib puert co; nēzyu ne rded groḷ guiedz co, niapse guiib or niaaw, masaque mbe roḷ rnaw.

²² Ni tib yadoo gonṅ naa, sac dipse lad guiedz co rleynie zho Dios, rleynie zho men ne nac Xcarner yeēn me. ²³ Led yedraa ga rquiin xbiini ngbidz, rquiin xbiini mēē, sac masaque xquielndzon me, ni xquielndzon men ne nac Xcarner yeēn me ga nac biini.

²⁴ Grēse miech ne ngab lo me, ine gziini biini co lo zho sē zho lad guiedz co; zha ne bnabey grē guiedz ne bre lo guidzliu, bio dze zha goc zha non, per zeēne gdziṅ zho ga ye zho zuṅnon zho me. ²⁵ Led yedraa ga ycow liu, tibaque niini gnaw, tibaque gzhial

gon xpuerta. ²⁶ Grëse ncuuañe mbe ne gocnon lo grë guiedz ne bre lo guidzliu, laaw gdziñ ga; ²⁷ sangue grë ncuuañe mbixladz gdzinda ga. Zig nac grë miech ne ruñ grë guie|ntseeb, grë zha ne tibaque noquidie, gdzind zhow; loxaque zha ne zhoob lë leñ xlibr meñ ne nac Carner yeeñ co (libr ne no lë zha ne ygaa guie|mban cub ne gdeed Dios ga), zha cose gdziña.

22

¹ Blozh ga, blu anjl co tib guiubee lo naa, në me zha ne guie nis co, zgaa zho guie|mban; mbe ro| rnaaw, haxta rbebel low. Merse zhan xcan ne zob Dios ni zhan xcan ne zob meñ ne nac Carner yeeñ co, ga rriee guiubee co, ² rdeda gro|taa nëzyu ne rded leñ guiedz co. Gropse nëz ro guiubee co zëëb yag ne rdeed guie|mban, gzobse mëë rquia nex low, tsiipchop vuelt rdeeda nex tib leñ iz, haxta ye zhiblaga rquiin grë zha ne no ga, parne sacnëd zho. ³ Led yedraa ga no ncuuañe ndziibdee, ga zo zhixcan Dios ni zo zhixcan meñ ne nac Carner yeeñ co; grëse miech ne ngab lo me, rleynie zho me ruñnon zho me. ⁴ Ranlo zho me, grëse zho quia lë me quia zho. ⁵ Led yedraa ga yquiin zho pe gziini lo zho, yquiingaa zho xbiini ngbidz, sac Dioszhal rziiini lo zho, led yed ga ycow liu; ga gban zho gdziñdraa dze ne griece zho ga.

Ile ziaad Jesús

⁶ Dzigo nëchaa anjl co lo naa:

—Grëse ncuuañe quiayan luu nu, ible ncuuañe no gaca. Bui ganle Dios meñ ne rdeed guie|biini lo grë zha ne rieteed xtiidz me lo miech, rnee zho ncuuañe naraa gac, mezhah pxel xanj| me ziadnee lo luu, zeena gacnañ grëse zha ne ngab lo me ziaadyoble gac grë ncuuañ rii. ⁷ Ible nacle xtiidz meñ ne rnabey ne, zhile laa me guiaad. ¡Dichos grë zha ne gliladz grë miñe noxobneñ Dios nu!

⁸ Grop lo naa gon naa grë ncuuañ rii, naazhal bin znu bnee anjl co. Nacne pquiitsgzhib naa lo me ni naa gunnon naa me; ⁹ dzigo nëchaa me lo naa:

—Guso i, riegua|d gunnon luu naa, laa naa nile lo luu ye naa tib ngundziinse nac naa lo Dios, nac naa zigne nacaque luu grë luu grë zha ne noteed xtiidz meñ ne rnabey ne lo miech, ni grëraa zha ne gliladz miñe noxobneñ me nu. Me none gunnon luu.

¹⁰ Blozh ga, nëchaa me:

—Bien, grëse miñe quiayan luu nu, yqueetsd luuw, sac zhile gdziñ dze ne gaca. ¹¹ Lo spalalse dze ne riaan niina, grë zha ne noyun guie|ntseeb, telne racladz

zho mazdraa guie|ntseeb ne gun zho, maase gun zhow; zha ne runгаа guie|yozh, telne mincotaa rleynie zho, maase gunraa zhow. Sangue grë zha ne noxco gun miñe rnabey Dios, none toxorcaa zhow; zha ne ngableгаа lo me, none gunraa zho miñe racladz me, gbiched zho lo me.

¹² Horco bin naa tsi meñ ne nac Carner yeeñ co, në me:

—Psoladza sca gon, ible zia|niob naa; zeene laa naa guia|, hor co gded naa miñe riegua| tib tib miech, tel zha wban zho. ¹³ Notaque naa, zig nac grë ncuuañ rii naa psilow ni naa csiaa|; nac naa zig nac letr “a” ni letr “z” lo grë letr, “a” rsilow, “z” riala. ¹⁴ Dichos grë zha ne noxco guia|nmba zho nëz lo Dios, sac rrieequia xab zho ga nosanmba zho, parne grieelo ted zho ro puert ne quia guiedz cub ne nac Jerusalén ga; gdzin zho ga ine gow zho xnex yag ne rdeed guie|mban ga. ¹⁵ Sangue grë miech ne ractseeb lo Dios, zha ne rleynie guie|bruj, zha ne rionie zha ne led tsieeld, zha ne rut samiech, zha ne rleynie grë mdio, zha ne loxaque noquidie samiech, ni tib zha co grieelod ted ro puert co. ¹⁶ Naa gon nac Jesús, naa pxel xanj| naa ziaadlu grë ncuuañ rii lo luu, zeena grëse zha ne no xnëz naa gacnañ. Naa ga breeequia lo xti rei David, per naa psañ grëse xmengol me. Rreeequia naa nac mel ngol ne rziiini ra| sil.

¹⁷ Zigtaa Espiritu Sant, zigtaa grë zha ne no xnëz me, zha ne rrieequia gac tsieel me ga, laa zho quiambëz me; niicle zha ne gacnañragaa laa me no guiaad, none yquiambëz zho me. Zha ne në rnab zhis, telne gacladz zho zac gbig zho lo me, me gdeed nis ne rdeed guie|mban guie zho; ygad me nis co lo zho, peet gacnonda.

¹⁸ Grëse zha ne gon grë miñe pxobnen Dios nu, laa naa rso diidz lo zho: Gneed zho ncuuañe nacda, sac zha ne gdziibraa diidz zeene gnee zhow, scaque stiche me lë zho lo libr ne zhoobnee cho nac zha ne ygaa guie|mban ne gdeed me, grieelodraa gdziñ zho guiedz ne blozh goquiet nu, ygaadraa zho yquiin zho xnex yag ne rdeed guie|mban ga.

²⁰ Meñ ne blozh bnee lo naa ga, ible ziaadniob me rnee me. Gacxe waa, dib zdoo naa laa naa rne lo me nu:

—¡Scaw gon Jesús! ¡Dë, laa no quiambiaaz luu!

²¹ Me nac meñ ne gacnieñ to grëse to, me gunlay to.

Juan